

წიგნები, რომლებზეც ისეთივე დავაჩაქობს

TOP თრიალარი



სტივენ

კინგი

სიზმართმჭერი



სტივენ კინგი

# სიზმართმჭერი

ინგლისურიდან თარგმნა  
პაატა ჩხეიძემ

# ადინ

ეს მათი დევიზი გახდა. ჯოუნსი ვერაფრით იხსენებდა, რომელმა მათგანმა მოიგონა იგი. „ვალის დაბრუნება საზიზღრობაა“ – მისი სიტყვებია. „ბარემ მიხმარე, ფრედი“ და კიდევ ხუთი-ექვსი მსგავსი უხამსი მჭევრმეტყველება – ბივერს<sup>1</sup> ეკუთვნოდა. ჰენრიმ მათ ასწავლა: „რაც წრებზე ბრუნავს, ყველაფერი თავის ადგილს უბრუნდება“ – ამგვარი ძენ-ბუდისტური სისულელეები ბავშვობიდან მოსწონდა. აი, ადინ კი... ნეტა საიდან მოვიდა ეს ადინ? რომელმა ჭკვიანმა მოიფიქრა?

ამას მნიშვნელობა არ ჰქონდა. მთავარია, რომ როდესაც ოთხნი იყვნენ, მტკიცედ სწამდათ აბრევიატურის პირველი ნახევრის, როცა ხუთნი გახდნენ – ორივე ნახევრის, ხოლო კვლავაც კვარტეტად გადაქცევის შემდეგ – მეორე ნახევრის.

ოღონდ, ბოლო პერიოდში სიბნელემ იმატა. სადღა იყო „ბარემ-მიხმარე-ფრედის“ მსგავსი დღეები. ეს კი იცოდნენ, მაგრამ ვერაფ-

---

<sup>1</sup> თახვი

რით გაეგოთ – რატომ. რალაც ცუდი ემართებოდათ, უკეთეს შემთხვევაში – რალაც განსხვავებული, რაშიც ვერ გარკვეულიყვნენ. თავს ხაფანგში გაბმულელებით გრძნობდნენ, მაგრამ დაზუსტებით ვერაფერს ამბობდნენ. ეს ჯერ კიდევ ცაში ნათების გამოჩენამდე ხდებოდა. მაკარტიმდე და ბეკი შუმდე.

ადინ: ზოგჯერ ეს მხოლოდ სიტყვებია. ზოგჯერ გჯერა, რომ არც არაფერია სიბნელის გარდა. და მაშინ როგორღა უნდა იცხოვრო ძველებურად?

## 1988: თახვიც კი მოიწყენს ხოლმე

რომ ვთქვათ, – ბივერის ქორწინება შეცდომა იყო, იგივე იქნება, თუ ვიტყვით, რომ „ჩელენჯერის“<sup>2</sup> დაშვებამ თითქმის ვერ გაამართლა. ჯო ბივერ კლარენდონისა და ლორი სიუ კენოპენსკის სიყვარულმა რვა თვეს გაუძლო, შემდეგ კი გაქრა და იქნებ, ვინმე დამემართოთ მისი დაფანტული ნამსხვრევების შეგროვებაში.

საერთოდ, ბივი მხიარული ახალგაზრდაა, ამას მისი ყველა განუყრელი მეგობარი დაგიდასტურებთ, მაგრამ ცუდი ხანა დაუდგა. ძველ მეგობრებს აღარ ხვდება (ანუ მათ, ვისაც ნამდვილ მეგობრებად მიიჩნევს), თუ არ ჩავთვლით იმ ერთ კვირას, ყოველი წლის ნოემბერში რომ იკრიბებიან. გასულ წელს ის და ლორი სიუ კვლავაც ერთ თოკში იყვნენ ჩაბმული. მართალია, თოკი თანდათან ილეოდა, მაგრამ ჯერ არ გამწყდარიყო. ახლა კი ის ძალიან დიდ დროს ატარებს – და ამას თვითონაც ხვდება – პორტლენდის ძველი ნავსადგურის ბარებში, „პორტჰოულში“, „სიმენსქლაბსა“ და „ფრისტრიტკაბში“. უზომოდ ბევრს სვამს, მოსაწევსაც ეწევა და დილაობით სულ

---

<sup>2</sup> აშშ-ის კოსმოსური ხომალდი.

უფრო ხშირად აქცევს ზურგს სააბაზანოში ჩამოკიდებულ სარკეს: მისი ჩასისხლიანებული თვალები საკუთარ გამოსახულებას გაურბის და განზე იყურება. მხოლოდ ერთი საფიქრალი აქვს: „დასწყევლოს ღმერთმა ეს ბარები და კლუბები – დროზე უნდა შევეშვა, თორემ პიტივით, პრობლემებს ავიკიდებ“.

კლუბებში წანწალსა და დაღევაზე უარის თქმა, გაგიხარია, კარგი აზრია, მაგრამ დღე დღეს მისდევს და ყველაფერი ძველებურად გრძელდება. ამ ხუთშაბათს „ფრისტრიტპაბის“ ჯერია და ეშმაკმა წაიღოს, თუ იქ არ მოკალათდა, ხელში კათხა ლუდითა და ჯიბეში მოსაწევით. მუსიკალური ავტომატიდან ძველებური მელოდია ისმის, „ვენჩერისის“<sup>3</sup> მიერ ოდესღაც შესრულებულს რაღაცით წააგავს. ჯგუფის სახელს ვერ იხსენებს, ის ჯერ კიდევ მის დაბადებამდე იყო პოპულარული, მაგრამ ცნობს, რადგან ცოლთან გაყრის შემდეგ ხშირად უსმენს პორტლენდის რადიოთი რეტრომუსიკას. ძველებური ჰიტები ამშვიდებს. ახალი აბდაუბდა კი... ლორი სიუს ისინი მოსწონდა და უსმენდა, ბივერის გულს კი, რატომღაც, არ ეკარებოდა.

„ფრისტრიტი“ თითქმის ცარიელია: ხუთი-ექვსი კაცი თუ იქნება დახლთან და იმდენივე – უკანა ოთახში, ბილიარდის მაგიდებთან. ბივერი და მისი სამი განუყრელი მეგობარი ერთ-ერთ კაბინაში სხედან, „მილერსს“<sup>4</sup> ყლურწავენ და გაქონილ კარტს ჩეხენ, რათა წილი ჰყარონ, თუ ვის მოუწევს შემდეგი შეკვეთის გადახდა. ეს რა მელოდია ისმის გიტარის თანხლებით? „საზღვრებს გარეშე“? „ტელსტარი“? არა, „ტელსტარში“ სინთეზატორია წამყვანი, აქ კი მსგავსი არაფერია. დანარჩენები ჯექსონ ბრაუნზე<sup>5</sup> ყბედობენ, რომელიც წუხელ მუნიციპალურ ცენტრში უკრავდა და თვითმხილველ ჯორჯ პელსენის თქმით, მაგარი შოუ მოაწყო.

---

<sup>3</sup> ამერიკული მუსიკალური ჯგუფი.

<sup>4</sup> დაბალკალორიული ლუდის სახეობა.

<sup>5</sup> ამერიკელი ვოკალისტი, გიტარისტი, კომპოზიტორი.

– გგონიათ, სულ ეს იყო? – ამბობს ჯორჯი და აშკარად შთაბეჭდილების მოხდენას ცდილობს. წაწვეტილებულ ნიკაპს მალლა სწევს და კისერზე წითელ ლაქას აჩენს, – იცით, ეს რა არის?

– ვნებიანი კოცნა? – მორიდებით ეკითხება კენტ ასტორი.

– აუჰ, რა მიხვედრილი ხარ, შენი! .. – ამბობს ჯორჯი, – სპექტაკლის შემდეგ კულისებში ვყურყუტებდი ფანების ჯგუფთან ერთად, რომელიც ჯექსონის ავტოგრაფზე ნადირობდა. თუმცა, იქნებ, დევიდ ლინდლისაზეც<sup>6</sup>. ისიც მაგარია.

კენტი და შონ რობიდო ეთანხმებიან, რომ დევიდ ლინდლი მაგარია, მართალია, გიტარაზე ლმერთივით არ უკრავს (აი, მარკ ნოპფლერი „დაირ სტრეიტსიდან“<sup>7</sup>. ლმერთია, ენგუს იანგიც AC/DC-დან<sup>8</sup>, კლეპტონზე<sup>9</sup> რომ არაფერი ვთქვათ), მაგრამ კლასს არ დალატობს. დიდებულად მეტყველებს, ტექნიკაც შესაშური აქვს – ყველა რომ ინატრებს, ისეთი.

ბივერი საუბარში არ მონაწილეობს. მას მხოლოდ აქედან, ამ აყროლებული, უბადრუკი ბარიდან თავის სწრაფად დაღწევა სურს, ხვდება, რის თქმას აპირებს ჯორჯი, რა ტყუილის თქმას.

მას შანტე არ ერქვა, არც კი იცი მისი სახელი. ისე ჩაგიარა, თითქოს იქ არც იყავი. ან კი რა ხარ შენ ასეთი გოგოსთვის? – კიდევ ერთი გრძელთმიანი მშრომელი ახალი ინგლისის პატარა ქალაქიდან, უინტერესო ცხოვრებით. „შანტე“ იმ ჯგუფის სახელწოდებაა, რომელსაც ვუსმენთ, „შანტე“ და არა „მარ-კეტსი“ ან „ბარკისი“. ეს „ფაილანია“ „შანტეს“ შესრულებით. ეგ ლაქა კი, კისერზე, საპარსის კვალია და არა ვნებიანი კოცნის.

ამას ფიქრობს და ტირილი ესმის. ბარში კი არა, გონებაში. დიდი ხნის მივიწყებული ტირილი. პირდაპირ თავში ურტყამს, შუშის ნამსხვრევებით ესობა და ოჰ, ბარემ მიხმარე, მიხმარე, ფრედი, ვინმემ

---

<sup>6</sup> ამერიკელი მუსიკოსი. როკისა და ქანთრის შემსრულებელი

<sup>7</sup> ინგლისური როკჯგუფი (1977)

<sup>8</sup> ავსტრალიური როკჯგუფი (1973)

<sup>9</sup> ინგლისელი გიტარისტი, მომღერალი, მუსიკოსი.

მაინც გააჩუმეთ.

მე შევეძელი მისი დამშვიდება – ფიქრობს ბივერი, – მე მოვახერხე ეს. ხელში ავიყვანე და ვუმღერე.

ამასობაში კი ჯორჯ პელსენი აღწერს, როგორ გაიღო, ბოლოს და ბოლოს, საგრიმიოროს კარი, მაგრამ იქიდან არც ჯექსონ ბრაუნი გამოსულა და არც დევიდ ლინდლი, არამედ ბექ-ვოკალისტი გოგონების ტრიო – რენდი, სიუზი და შანტე. ემხიანი, მოხდენილი, მადის აღმძვრელი ქალიშვილები გამოვიდნენ.

– აი, მესმის! – ოხრავს შონი და თვალებს ატრიალებს. შონი დაბალი და სქელოა. მისი სექსუალური თავგადასავლები ბოსტონში შემთხვევითი მგზავრობებით შემოიფარგლება, როცა თვალებით ჭამს „ფოქსი ლედის“ სტრიპტიზიორ ქალებსა და „ჰუტერსის“ ოფიციატებს, – თვითონ შანტე?! – უხამსად ამოძრავებს ორივე თეძოს.

ამაში მაინც დაოსტატებულა, ფიქრობს ბივერი.

– გამოველაპარაკე, ძირითადად, შანტეს მივმართავდი... ვკითხე, ღამის პორტლენდის ნახვა ხომ არ აინტერესებდა. ასე რომ...

ბივერი ჯიბიდან კბილის ჩხირს იღებს, პირში იღებს და ამით ლაპარაკის გაგრძელების ხალისს უკარგავს ჯორჯს. ახლა კბილის ჩხირი უფრო საჭიროა, ვიდრე ლუდი, მოსაწევი ან ჯორჯ პელსენის ტრაბახი, თუ როგორ გამოძებნა მითურ შანტესთან საერთო ენა მისი პიკაპის ძარაში – მადლობა ღმერთს ამ თავშესაფრისთვის მაინც – და როგორ მძლავრად აქანავა აქეთ-იქით.

სისულელეა, ტყუილია, – ფიქრობს ბივერი და უეცრად საშინელი მოწყენილობა ეუფლება, უფრო ძლიერი, ვიდრე მაშინ, როდესაც ლორი სიუმ ბარგი ჩაალაგა და მშობლებთან წავიდა. ეს მის ხასიათში არ არის, მაგრამ ახლა საოცრად უნდა, სადმე გადაიკარგოს, ფილტვები ზღვის სუფთა, მარილიანი ჰაერით აივსოს, ტელეფონი იპოვოს, ჯოუნსის ან ჰენრის დაურეკოს, – სულერთია, რომელს, – და ჰკითხოს: აბა, ძველო, როგორაა საქმე? და პასუხიც მოისმინოს: შენც ხომ იცი, ბივ, აღინ. არ არის მოძრაობა, არ არის თამაში.



დგება.

– ეი, – ეძახის ჯორჯი. ბივერი ჯორჯთან ერთად „უესტბრუკ ჯუნიორ კოლეჯში“ დადიოდა და მაგარ ბიჭადაც ერვენებოდა, მაგრამ ეს მრავალი კათხა ლუდის წინ იყო, – საით გაგიწევია?

– დასაცლელად, – პასუხობს ბივერი და პირში კბილის ჩხირს ატრიალებს.

– კარგი, მაგრამ შენი უკანალი მალე დააბრუნე, თორემ მთავარზე გადავდივარ, – ეუბნება ჯორჯი და ბივერი ტანგატრუსზე ფიქრობს. ჯანდაბა, დღეს რაღაც ჰაერი არ მოსწონს, ალბათ ამინდი იცვლება ან რაღაც ამგვარი ხდება.

ჯორჯი ხმას უდაბლებს:

– კაბა რომ ავუწიე...

– ვიცი, ტანგა ეცვა, – თავიდან იცილებს ბივერი და ჯორჯის გაოცებულ მზერას ყურადღებას არ აქცევს, – ამ ნაწილს სიამოვნებით მოვისმენდი.

საპირფარეშოსკენ მიემართება, სადაც შარდისა და დეზინფექციის მოყვითალო-მოვარდისფრო სუნი დგას. გასცდება, ქალების ტუალეტსაც ჩაუვლის, კარსაც, წარწერით „ოფისი“, და გარეთ აღმოჩნდება. მონაცრისფრო, საწვიმრად გამზადებული ცაა, მაგრამ კარგი ჰაერია. ძალიან კარგი. ღრმად ჩაისუნთქავს და ფიქრებს უბრუნდება. არ არის მოძრაობა, არ არის თამაში. ოღნავ ელიმება.

ათიოდე წუთი უმიზნოდ დახეტილებს, კბილის ჩხირს ატრიალებს და გონების გაწმენდას ცდილობს. რაღაც მომენტში, ზუსტად არ ახსოვს, როდის, ჯიბიდან მოსაწევს იღებს, აგდება და „მონუმენტსკვერის“ სიახლოვეს მდებარე „ჯო სმოუქ შოფის“ ფასიანი ავტომატიდან ჰენრის ურეკავს. ავტომოპასუხის მოლოდინშია, რადგან, წესით, ჰენრი უნივერსიტეტში უნდა იყოს, მაგრამ თურმე, უკვე სახლშია და ყურმილს მეორე ზარზევე იღებს.

– როგორ ხარ, ძველო? – ეკითხება ბივერი.

– თვითონაც იცი, – პასუხობს ჰენრი, – ახალი დღე, იგივე ნაგავი.

შენ თვითონ, ბივ?

ბივი თვალებს ხუჭავს. წამით ყველაფერი ისევ კარგადაა; ისე კარგად, როგორც ამ დაწყებულ სამყაროში შეიძლება, იყოს.

– დაახლოებით ეგრე, მეგობარო, – ამბობს იგი, – თითქმის ეგრე.

# 1993: პიტი გასაჭირში ჩავარდნილ ქალ- ბატონს ეხმარება

პიტი ბრიჯტონში, „მაკდონალდ მოტორსის“ სადემონსტრაციო დარბაზის სიახლოვეს, მაგიდას უზის და ჩაფიქრებული ატრიალებს გასაღებების ასხმას, ბრელოკით, რომელზეც ცისფერი ემალით ოთხი ასოა გამოყვანილი: NASA.<sup>10</sup>

ოცნება მეოცნებებზე სწრაფად ბერდება – ეს უტყუარი ცხოვრებისეული გამოცდილება პიტმა წლების შემდეგ მიიღო – მაგრამ მწუხარედ, ნელა და მძიმედ კვდება ტვინის ღრმა კუნჭულებში. დიდი ხანია, პიტს საძინებელ ოთახში არ უძინია, იქაურობა სურათებითაა სავსე. ფოტოებზე გამოსახულია „აპოლოსა“<sup>11</sup> და „სატურნის“<sup>12</sup> ასტრონავტები და მათი გასვლა კოსმოსში (კოსმოსური მფრინავი აპა-

---

<sup>10</sup> აწმ-ის აერონავტიკისა და კოსმოსური სივრცის კვლევის ეროვნული სამმართველო.

<sup>11</sup> აწმ-ის კოსმოსური ხომალდი.

<sup>12</sup> კოსმოსური ხომალდის რაკეტა-მატარებელი.

რატის ბორტს მიღმა მუშაობა), ასევე, კოსმოსური კაფსულები თავისი გარსიანად, რომელიც ატმოსფეროს მჭიდრო ფენებში შესვლისას, ზემალაღ ტემპერატურაზე დნება, მთვარის მოდულები, „ვოი-აჯერები“<sup>13</sup> და მე-80 მაგისტრალის თავზე დაკიდებული მბრწყინავი დისკო. იმ ფოტოზე ჩანს მანქანებით გადატვირთული გზა და ავტობიდან გადმოსული ადამიანები, ძლიერი შუქისგან თვალებს ხელით რომ იჩრდილავენ. ზედ წარწერაა: ეს ობიექტი გადაღებულია კოლორადოს შტატის ქალაქ არვადაის სიახლოვეს, 1971 წელს და დღემდე ამოუცნობია. ეს ნამდვილი ამოა.

მას შემდეგ დიდი დრო გავიდა.

ორკვირიანი შვებულებიდან ერთი კვირა ვაშინგტონში გაატარა, კოლუმბიის ოლქში, სადაც ყოველდღიურად დადიოდა სმიტსონის ავიაციისა და კოსმონავტიკის ეროვნულ მუზეუმში, გაოცებული დიმილით დახეტილებდა ექსპონატებს შორის. მიაჩერდებოდა მთვარის ქვებს და ფიქრობდა: ეს ქვები იქიდანაა ჩამოტანილი, სადაც ცა ყოველთვის შავია და დამთრგუნველი, სამარისებური სიჩუმე მეფობს. ნილ არმსტრონგმა და ბაზ ოლდრინმა<sup>14</sup> ოცი კილოგრამი სხვა სამყარო ჩამოიტანეს და ახლა ის აქაა.

თვითონაც აქ არის, მაგიდას უზის იმ დღეს, როცა ერთი მანქანის გაყიდვაც ვერ მოახერხა (ადამიანებს წვიმიან ამინდში მანქანების ყიდვა რატომღაც არ მოსწონთ, პიტის მხარეს კი წვიმა ადრეული საღამოდან დაიწყო), ხელში NASA-ს ბრელოკიან გასაღებების ასხმას ათამაშებს და წამდაუწუმ საათს უყურებს. ასეთ დღეებში დრო საოცრად ნელა გადის, ხუთის მოახლოებასთან ერთად კი სულაც ჩერდება. ხუთ საათზე პირველი კათხა ლუდის დაღვევის დრო დგება. იქამდე არ შეიძლება. ერთიც კი. თუ დილიდანვე სვამ, ადრე თუ გვიან, მოგიწევს დაითვალო, რამდენი დალიე, რადგან სწორედ ასე იქცევიან ლოთები. თუ შეგიძლია, რომ დაელოდო... გასაღებების ასხმა

<sup>13</sup> მზის სისტემის საკვლევი 723-ტონიანი ზონდი.

<sup>14</sup> ამერიკელი კოსმონავტები, რომლებიც პირველები დასხდნენ მთვარეზე.

ატრიალო და ელოდო...

პიტი ნოემბრის დადგომას ისე ელოდება, როგორც პირველ კათხა ლუდს. აპრილში ვაშინგტონში გამგზავრებამ გაამართლა, მთვარის ქვეშა წარუშლელი შთაბეჭდილება დატოვა (მათზე ფიქრისას ყოველთვის აღფრთოვანებულია), მაგრამ მარტო იყო, მარტოობა კი კარგი არ არის. ნოემბერში, როდესაც კუთვნილი შვებულების მეორე კვირას აიღებს, ჰენრის, ჯოუნსსა და ბივთან ერთად იქნება. აი, მაშინ კი მისცემს თავს დათრობის უფლებას. როდესაც ტყეში ხარ და მეგობრებთან ერთად ნადირობ, დილიდან სმა ბუნებრივია. ეს, პრაქტიკულად, ტრადიციაც კია. ეს...

კარი იღება და მიმზიდველი ქერა ქალიშვილი შემოდის, ოცდაათიოდე წლის, დაახლოებით ხუთი ფუტისა და ათი დუიმის (პიტს მოსწონს მაღლები). იგი გამოფენილ მოდელებს ათვალერებს (ახალი, მუქი ბურგუნდიული „ტანდერბერდი“<sup>15</sup> სეზონის მშვენებაა. თუმცა მას არც „ექსპლორერი“<sup>16</sup> ჩამორჩება), მაგრამ ისეთი სახე აქვს, თითქოს შენაძენი ნაკლებად აინტერესებს. პიტერის დანახვაზე, ნაბიჯს მისი მაგიდისკენ დგამს, ის კი უკვე ფეხზეა, გასაღები ჩანაწერების წიგნზე უვარდება, სახეზე ორასვატიან პროფესიონალურ ღიმილს ანთებს – ამაში უნდა მენდო, პატარავ – და მისკენ ხელგაწვდილი მიიწევს. ერთმანეთს ხელს მტკიცედ ართმევენ, საქმიანად, მაგრამ აშკარაა, რომ ქალი გაღიზიანებულია.

– ალბათ, არაფერი გამოვა, – ოხრავს იგი.

– არასდროს დაიწყოთ საუბარი ავტომობილის გამყიდველთან მსგავსი სიტყვებით, – ურჩევს პიტი, – ჩვენ ძალიან მოგვწონს გამოწვევა. პიტ მური გახლავართ.

– გამარჯობა, – ამბობს ქალი, მაგრამ საკუთარ სახელს არ ეუბნება, თუმცა მას ტრიში ჰქვია, – ფრაიბურგში შეხვედრა მაქვს, ზუსტად... – იმ საათს შეხედავს, რომელსაც პიტი დილიდან თვალს არ

---

<sup>15</sup> ამერიკული ლუქსის კლასის ავტომობილი

<sup>16</sup> ამერიკული ჯიპის ტიპის ავტომობილი.

აშორებდა, – ორმოცდახუთ წუთში, კლიენტთან, რომელსაც სახლის ყიდვა სურს და მეჩვენება, რომ სწორედ ის მაქვს, რაც მას სჭირდება, საკომისიოც გვარიანია, მე კი... – ქალს თვალები ცრემლით ევსება და მისი გადაყლაპვა უწევს, ლაპარაკი რომ შეძლოს, – მე კი მანქანის გასაღები დავკარგე! წყეული გასაღები!

ქალი ხელჩანთას ხსნის და შიგნურვითად იქექება.

– მე მართვის მოწმობა მაქვს... სხვა დოკუმენტებიც... ყველა მტკიცებულება, და ვიფიქრე, რომ იქნებ, შეძლოთ და ახალი გასაღები გამოძინახოთ. მაშინ ჩემს გზას ვეწევი. ეს გარიგება გვარიანად დამეხმარებოდა. მარტო საკომისიო მთელი წლის განმავლობაში გამატანინებს თავს, მისტერ... – მისი სახელი დაავიწყდა, თუმცა პიტს არ სწყენია. მური ისეთივე ჩვეულებრივი გვარია, როგორც სმიტი ან ჯოუნსი. თანაც ქალს თავგზა აქვს აბნეული. გასაღების დაკარგვა სახუმარო საქმე როდია. ამას ხშირად შესწრებია.

– მური. მაგრამ პიტზეც ვპასუხობ ხოლმე.

– ხომ ვერ დამეხმარებოდით, მისტერ მურ? იქნებ არის ვინმე მომსახურების განყოფილებიდან, ვისაც ეს შეუძლია?

ბებერი ჯონი დეიმონი სიამოვნებით დაეხმარებოდა, მაგრამ დღეს ეს ქალი ფრაიბურგში ვერაფრით მიასწრებს.

– შეგვიძლია, ახალი გასაღები მოგიტანოთ, მაგრამ ამას, სულ ცოტა, ერთი-ორი დღე დასჭირდება, – ეუბნება იგი.

ქალი ცრემლიანი, ხავერდით ყავისფერი თვალებით შესცქერის და გამწარებული გაიძახის:

– ეშმაკმა დალახვროს! ეშმაკმა დალახვროს!

პიტს თავში უცნაური აზრი მოსდის: ქალი იმ გოგონას აგონებს, რომელსაც დიდი ხნის წინ იცნობდა. მართალია შორიდან, ჰო, შორიდან იცნობდნენ, მაგრამ იმდენად მაინც, რომ მისი სიცოცხლე გადაერჩინათ. გოგონას ჯოზი რინკენჰაუერი ერქვა.

– ასეც ვიცოდი! – ამბობს ტრიში და ტირილის შეკავებას აღარ ცდილობს, – ჯანდაბა, ასეც ვიცოდი!

თავს ველარ იკავებს, შეტრიალდება და ტირის. პიტი უკნიდან მიდის და მხარზე ფრთხილად ეხება.

– მოიცადეთ, ტრიშ, ერთი წუთი მოიცადეთ.

როგორ შეეშალა! ქალს საკუთარი სახელი არ უხსენებია, ისინი ერთმანეთისთვის არავის გაუცნია, მან კი სახელით მიმართა! თუმცა, ისეთი დამწუხრებულთა, შესაძლოა, ვერც კი გაეგონა.

– საიდან ბრძანდებით? – ეკითხება პიტი, – იმის ვგულისხმობ, რომ აქაური არ ხართ, ხომ ასეა?

– დიახ, – პასუხობს ქალი, – ჩვენი ოფისი უესტბრუკშია. „დენისონ რიალ ესთეთი“. ჩვენ ისინი ვართ, შუქურა რომ გვაქვს.

პიტი თავს ისე უქნევს, თითქოს რაიმე გაიგო.

– ახლა იქიდან მოვდივარ. ბრიჯტონის აფთიაქთან გავჩერდი ასპირინის საყიდლად, რადგან თავი მისკდება მნიშვნელოვანი შეხვედრის მოლოდინში... ეს სტრესია, ღმერთო ჩემო, საფეთქლებში თითქოს ჩაქუჩს მირტყამენ...

ამჯერად პიტი თანაგრძნობის ნიშნად უქნევს თავს. თავის ტკივილი არც მისთვისაა უცხო. მართალია, უფრო ხშირად ეს ზედმეტი ლუდის ბრალია ხოლმე და არა სტრესის, მაგრამ მისი მაინც მშვენივრად ესმის.

– ცოტა დრო მქონდა, ამიტომ აფთიაქის გვერდით, პატარა მაღაზიაში ყავის დასალევად შევედი... გეცოდინებათ, კოფეინი თავის ტკივილს შველის...

პიტი კვლავ უქნევს თავს. მათი მთავარი ფსიქოლოგი ჰენრია, მაგრამ პიტს არაერთხელ უთქვამს მისთვის, რომ კარგი გამყიდველი უშეცდომოდ უნდა კითხულობდეს სხვის აზრებს, თორემ ვერაფერს გაყიდის. პიტი კმაყოფილებით ამჩნევს, რომ მისი ახალი მეგობარი თანდათან წყნარდება. ძალიანაც კარგი. თავში ერთი აზრი მოსდის, იცის, როგორ დაეხმაროს ქალს, თუ, რა თქმა უნდა, დათანხმდება. წარმოიდგენს, რა როგორ მოხდება. მცირედი გატკაცუნება და კარი

გაიღება. მოსწონს, გატკაცუნების მოლოდინი. ცხადია, განსაკუთრებული არაფერია და არავინ იცის, რით დასრულდება ყველაფერი, მაგრამ მოსინჯვა ღირს.

– შემდეგ ქუჩის გადაღმა, „რენიში“ შევირბინე. შარფი ვიყიდე... წვიმისთვის, მოგეხსენებათ... – იგი თმას ეხება, – მერე მანქანასთან დავბრუნდი... და ეს წყეული გასაღები აღარსადაა! დაუყოვნებლივ მივბრუნდი, მაღაზიები, აფთიაქი დავიარე, მაგრამ კვალს ვერსად მივაგენი! ახლა კი კლიენტთან მაგვიანდება!

ქალს ხმაზე კვლავ აღელვება ეტყობა, საცაა ისევ ატირდება. საათს შეხედავს. პიტისთვის დრო მიიზღაზნება, ქალისთვის – მიქრის. აი, განსხვავება ადამიანებს შორის. ერთ-ერთისთვის მაინც.

– დამშვიდდით, – ეუბნება ქალს, – რამდენიმე წამით თავი ხელში აიყვანეთ და მომისმინეთ. ახლა აფთიაქში წავალთ და თქვენს გასაღებს მოვძებნით.

– მაგრამ ის იქ არაა! ყველაფერი დავათვალიერე, ის თაროც, საიდანაც ასპირინი ავიღე, გამყიდველსაც ვკითხე...

– ერთხელაც შევამოწმოთ, არაფერი დაშავდება, – აწყვეტინებს პიტი და მსუბუქად, მაგრამ მტკიცედ უბიძგებს ქალს კარისკენ. მოსწონს მისი სუნამოს სუნი, თმა – კიდევ უფრო მეტად. სწორედაც რომ თმა – თუ ამ ნაცრისფერ ღღეს ასე გამოიყურება, მზეზე რალა დაემართება?

– ჩემი შეხვედრა...

– ორმოცი წუთი კიდევ გაქვთ, – ამბობს პიტი – როდესაც ტურისტები დაიქსაქსებიან, ფრაიბურგამდე ოც წუთშიც ჩახვალთ. ათიოდე წუთი დავუთმოთ თქვენი გასაღების ძებნას და თუ არაფერი გამოვა, დანიშნულების ადგილამდე მე თვითონ ჩაგიყვანთ.

ქალი მას ეჭვის თვალით შეხედავს. მაგრამ პიტი სადღაც, მის მიღმა იყურება, რომელიღაც კაბინეტის კარისკენ.

– დიკ! – იძახის, – ეი, დიკი მ.!



დიკ მაკდონალდი ზედნადებების ფურცლებიდან თავს წამოსწევს.

– დაარწმუნე, ქალბატონი, რომ თუ საჭირო შეიქნა, ფრაიბურგამდე მშვიდობით ჩავიყვან.

– სანდო პიროვნებაა, მემ, – თავს უქნევს დიკი, – სექსუალური მანიაკი არ გეგონოთ. არც თავაწყვეტილი ქროლა უყვარს. მხოლოდ იმას შეეცდება, რომ ახალი მანქანა მოგყიდოთ.

– ჩემთვის მოყიდვა ადვილი არაა, – ქალის ცრემლიან სახეს ღიმილი ეფინება, – მაგრამ თანახმა ვარ.

– ჩემს ტელეფონს ყურადღება მიაქციე, კარგი, დიკ?

– კარგი, თუმცა ეს ადვილი როდია. ასეთ ამინდში მყიდველებს ჯოხით თუ მოიცელებ თავიდან.

პიტი და შავგვრემანი ტრიში გადიან, შესახვევს გაივლიან და ორიოდ წუთში მეინსტრიტზე აღმოჩნდებიან. აფთიაქი მარცხნიდან მეორე შენობაა. ახლა უფრო ძლიერად ცრის, თითქმის წვიმს. ქალი თავს ახალი შარფით იფარავს და უქუდო პიტს შესცქერის.

– დასველდებით, – ამბობს იგი.

– ჩრდილოეთიდან ვარ. გამოწრთობილი.

– ფიქრობთ, ვიპოვით? – ეკითხება ქალი.

პიტი მხრებს იჩეჩს.

– შესაძლოა. მაგარი ვარ დაკარგული ნივთების ძებნაში. ყოველთვის ასეთი ვიყავი.

– ისეთი რამ იცით, რაც მე არ ვიცი? – გაოცებას ვერ მალავს ქალი.

არ არის მოძრაობა, არ არის თამაში, – ფიქრობს პიტი, – სულ ეს არის, მემ.

– არა, – ამბობს ხმამაღლა, – ჯერჯერობით არაფერი.

ისინი აფთიაქში შედიან. ზღურბლზე ზარი წკარუნებს. დახლს იქით მჯდომი ქალიშვილი უნდომლად ანებებს თავს ჟურნალს. ოთ-

ხის ოცი წუთია, სექტემბრის მოღრუბლული დღეა. აფთიაქში მხოლოდ სამნი არიან, და კიდევ მისტერ დილერი, რეცეპტების გასაცემ დახლთან.

– გამარჯობა, პიტ, – ამბობს გამყიდველი.

– ჰეი, კეთი, როგორ მიდის საქმეები?

– თვითონაც ხედავ – ძალიან ნელა, – შემდეგ იგი შავგვრემან ქალს მიმართავს, – ვწუხვარ, მემ, მაგრამ კიდევ ერთხელ დავძებნე და ვერაფერს მივაგენი.

– არა უშავს, – ოღნავ ილიმება ტრიში, – ეს ჯენტლმენი დამთანხმდა, რომ მიმიყვანს.

– შესანიშნავია, – ამბობს კეთი, – პიტ, რა თქმა უნდა, კარგი ყმაწვილია, მაგრამ ასე შორსაც არ წავიდოდი, რომ მისთვის ჯენტლმენი მეწოდებინა.

– დაუკვირდი, რას ამბობ, ძვირფასო, – იკრიჭება პიტ, – თორემ „რექსოლის“ მაღაზია შორს კი არ არის.

იგი შეფარვით შეჰყურებს საათს. დრომ მისთვისაც მოუჩქარა ნაბიჯს. ძალიან კარგი, რაღაც მაინც შეიცვალა.

პიტ ტრიშისკენ იხედება.

– თავდაპირველად აქ შემოხვედით. ასპირინისთვის.

– მართალია. „ანასინი“ შევიძინე. შემდეგ კი დროის მოსაკლავად...

– ვიცი, ყავის დასალევად „ქრისტიში“ შეხვედით, მერე კი „რენიში“.

– დიახ.

– ასპირინი ცხელ ყავასთან ერთად ხომ არ მიიღეთ?

– არა, მანქანაში ერთი ბოთლი „პოლანდის“ წყალი მქონდა, – იგი ფანჯრიდან მწვანე „ტაურუსზე“ მიუთითებს, – აბებს წყალი დავაყოლე. შემდეგ ხელი სკამის ქვეშ მოვაფათურე, მისტერ... პიტ. ამნთები შევამოწმე.

ქალს მოუთმენლობა ეტყობა. მის მზერაში იკითხება: ვიცი, რასაც

ფიქრობთ, – შეშლილიაო.

– და ბოლო შეკითხვა, – ამბობს პიტი, – თუ თქვენს გასაღებს ვიპოვი, ივანშმებთ ჩემთან ერთად? შეგვეძლო „ვესტ უორფში“ შევხვედროდით ერთმანეთს.

– ვიცი „ვესტ უორფი“, – გაღიმებას ახერხებს გაჭირვებაში მყოფი ქალი. კეთილად არც კი ცდილობს, მათ თავი მოაჩვენოს, თითქოს ჟურნალს კითხულობს. ამაზე უკეთესი რომანი რა უნდა იყოს?

– რა იცით, რომ გათხოვილი არ ვარ, და საერთოდ...

– საქორწინო ბეჭედი არ გიკეთიათ, – დაუფიქრებლად პასუხობს პიტი, თუმცა არათითზე არც შეუხედავს, – გარდა ამისა, მე მხოლოდ შემწვარი მოლუსკების, სტაფილოსა და კომბოსტოს სალათას და მარწყვიანი ფენოვანი ნამცხვრის მირთმევა მქონდა მხედველობაში და არა სამუდამო კავშირი.

ქალი, თავის მხრივ, საათს დასცქერის:.

– პიტ... მისტერ მურ... ვშიშობ, ახლა ფლირტისთვის არ მცალია. თუ მიმიყვანთ, სინარულით ვივანშმებ თქვენთან ერთად. მაგრამ...

– ეს სრულიად საკმარისია, – ამბობს პიტი, – მაგრამ ვფიქრობ, საკუთარი მანქანით წახვალთ. ასე რომ, მოგვიანებით შევხვდებით. ექვსის ნახევარი გაწყობთ?

– დიახ, შესანიშნავია, მაგრამ...

– შევთანხმდით.

პიტი თავს ბედნიერად გრძნობს. მშვენიერია. ბედნიერება საუცხოო რამ არის. ბოლო ორი წლის განმავლობაში ამის მეასედიც არ განუცდია. არც კი იცის, რატომ. ნუთუ ბევრი მოსაწყენი ღამე გაატარა 302-ე გზატკეცილზე, ნორთქონვეიმდე ჩამორიგებულ ბარებში? ნუთუ მხოლოდ ეს არის მიზეზი? შესაძლოა, არა, მაგრამ ამაზე ფიქრის დრო არ აქვს. ქალბატონს საქმიან შეხვედრაზე აგვიანდება. და თუ იმდენს მოახერხებს, რომ სახლსაც გაყიდის, ვინ იცის, იქნებ პიტსაც გაუღიმოს ბედმა? მაგრამ იღბალმა ზურგი რომ აქციოს, ამ ქალს მაინც დაეხმარება. ის ამას გრძნობს.

– ახლა რაღაც უჩვეულოს, ერთი შეხედვით უცნაურს გავაკეთებ, მაგრამ არ ინერვიულოთ, – ამბობს იგი, – ეს მხოლოდ პატარა ფოკუსია, როგორც ცხვირის მოსრესა, რათა არ დააცემინოთ, ან შუბლზე ხელის შემორტყმა, როცა ვინმეს სახელის გახსენებას ცდილობთ. გასაგებია?

– ვფიქრობ, დიახ, – პასუხობს გაოცებული ქალი.

პიტი თვალებს ხუჭავს, სახესთან ოდნავ მომუშტული ხელი მიაქვს, საჩვენებელ თითს შლის და წინ და უკან ატარებს.

ტრიში კეთის, გამყიდველს, შეხედავს, ის კი მხრებს იჩეჩს, თითქოს ამბობს: *ვინ იცის?*

– მისტერ მურ, – ყოყმანით წარმოთქვამს ტრიში, – მისტერ მურ, იქნებ მე მხოლოდ...

პიტი თვალებს ახელს, ღრმად შეისუნთქავს და ხელს ჩამოუშვებს. ქალის გვერდის ავლით კარისკენ იყურება.

– მაშასადამე, თქვენ შემოხვედით, – ამბობს იგი და თვალებს ისე ამოძრავებს, თითქოს შემოსულ ტრიშს აკვირდებოდ, – დახლისკენ წახვედით... – მზერას აყოლებს, – რაღაც ჰკითხეთ, ალბათ ის, თუ რომელ განყოფილებაში დევს „ასპირინი“. რაღაც ამგვარი.

– დიახ, მე...

– მაგრამ თქვენ კიდევ რაღაც აიღეთ, – ამას იგი ტკბილეულობისთვის განკუთვნილ თაროზე ხედავს, კაშკაშა ყვითელ ნახატს ხელისგულის მსგავსი ანაბეჭდით, – „სნიკერსის“ ბატონი?

– „მაუნდსი“, – ქალს ყავისფერი თვალები უფართოვდება, – როგორ მიხვდით?

– შოკოლადი აიღეთ და მხოლოდ შემდეგ გაეშურეთ „ასპირინისკენ“. ფული გადაიხადეთ და გახვედით... მოდით, ჩვენც გავიდეთ ერთი წუთით. ნახვამდის, კეთი.

კეთი მხოლოდ თავს უქნევს და გაშტერებული რჩება.

პიტი ზღურბლს გადააბიჯებს, ყურადღებას არ აქცევს ზარის

წკარუნს, არც წვიმას, რომელიც ამასობაში ნამდვილ წვიმას დამსგავსებია. ტროტუარზე სიყვითლე აღარ მოჩანს – წვიმას გადაურეცხავს, მაგრამ მაინც ამჩნევს მას და საშინლად კმაყოფილია. ტკაცუნის შეგრძნება. მშვენიერია. ეს მთავარი ხაზია. რამდენი ხანია, ასე მკაფიოდ არ დაუნახავს.

– უკან, მანქანისკენ, – ბურტყუნებს თავისთვის, – რათა ასპირინის ტაბლეტებს წყალი დააყოლოს...

იგი ტროტუარს გადაკვეთს და ნელა მიემართება „ტაურასისკენ“. აფორიაქებული ტრიში უკან მისდევს. აღელვებული, თითქმის შემოთებული გამოხედვა აქვს.

– კარი გამოაღეთ, ხელჩანთა აიღეთ... თქვენი გასაღები... ასპირინი... შოკოლადი... სხვა წვრილმანი... ხელიდან ხელში გადაგაქვთ... და აქ...

იგი იხრება, ტროტუარის გასწვრივ მდებარე წყალსადინარში ხელს აფათურებს, თითქმის მაჯამდე ჰყოფს, იქიდან რალაც ამოაქვს და თავს იმ მეფოკუსესავით უკრავს, რომელმაც რთული ნომერი წარმატებით შეასრულა. ბინდუნდში ვერცხლისფერი გასაღები ბრჭყვიალებს. – ... გასაღები გივარდებათ.

თავდაპირველად ქალი ვერც კი მოიფიქრებს, რომ გასაღები გამოართვას. გაქვავებული მისჩერებია პიტს, თითქოს ჯადოქარს ხედავდეს, რომელმაც მის თვალწინ მაგიური მოქმედება განახორციელა.

– მიდით, აიღეთ, – ამბობს კაცი ოდნავი ღიმილით, – ზებუნებრივი აქ არაფერია. მხოლოდ დედუქციაა. თანაც, მეხერხება. ისე, გირჩევთ, დამიმგზავროთ ხოლმე. თუ დაიკარგებით, წამში ვიპოვი გზას.

ქალი მხოლოდ ახლავდა ართმევს გასაღებს. ართმევს სწრაფად. ცდილობს, მის თითებს არ შეეხოს, პიტი მაშინვე ხვდება, რომ ის მოგვიანებით რესტორანში არ მოვა. ამის დადგენას დიდ ჭკუა არ სჭირდება. ტრიშის თვალეები შემინებული უფროა, ვიდრე მაღლიერებით აღვსილი.

- გმადლობთ... გმადლობთ, - ლულულულებს ქალი და მათ შორის მანძილს ზომავს, თითქოს არ უნდა, ზედმეტად მიუახლოვდეს.

- არაფრის. ოღონდ არ დაგავიწყდეთ. „ვესტ უორფი“, ექვსის ნახევარზე. შტატის ამ ნაწილში საუკეთესოდ წვავენ მოლუსკებს.

ცოტათი თავი უნდა მოიტყუოთ. ზოგჯერ ასეა საჭირო, მიუხედავად იმისა, თუ რას გრძნობთ. და თუმცა პიტმა იმ დღეს ბოლომდე ვერ გაიხარა, პატარა სიხარული მაინც შემორჩა. მან მთავარი ხაზი დაინახა, ეს კი ყოველთვის კარგ ხასიათზე აყენებდა. უბრალო ფოკუსი იყო, მაგრამ მაინც სიამოვნებდა, რომ შეძლო.

- ექვსის ნახევარზე, - ექოსავით პასუხობს ქალი და მანქანის კარს აღებს, თუმცა ირიბად გატყორცნილი დამფრთხალი მზერა ძალიან ჰგავს იმას, კაცი ძაღლს რომ მიაპყრობს და გულის სიღრმეში ეშინია, ვაითუ, საკბენად გამოიწიოსო. უზომოდ კმაყოფილია, რომ მასთან ერთად ფრაიბურგამდე მგზავრობა არ მოუწევს. პიტს სულაც არ სჭირდება აზრების წაკითხვა ამის მისახვედრად.

მანქანების ყოჩალი და მხიარული გამყიდველი წვიმაში დგას, აკვირდება, როგორ გაჰყავს გზაზე ქალს მანქანა და დამშვიდობების ნიშნად ხელს უქნევს. პასუხად დაბნეული მძღოლი თითებს ამოძრავებს. როდესაც პიტი ზუსტად ექვსის ნახევარზე (უფრო სწორად, ექვსის თხუთმეტ წუთზე, ყოველი შემთხვევისთვის) „ვესტ უორფში“ შედის, ცხადია, ქალი იქ არ ხვდება. არც ერთი საათის შემდეგ. მაგრამ პიტი მაინც არ მიდის, ბარის დახლთან ზის, ლუდს წრუპავს და 302-ე გზატკეცილზე ჩავლილ მანქანებს აკვირდება. ხუთ საათსა და ორმოც წუთზე ეჩვენება, რომ ხედავს კიდევ ქალს, მწვანე „ტაურასით“ ჩაიქროლებს კოკისპირულ წვიმაში, მწვანე „ტაურასით“. შესაძლოა, მანქანა კვლავაც ტოვებს ყვითელ ზოლს, რომელიც სწრაფადვე ქრება განაცრისფრებულ ჰაერში.

ახალი დღე, ძველი ნაგავი, - ფიქრობს იგი და სიხარულის ნასახიც აღარ რჩება. მას სევდა ცვლის, სევდა, რომელიც ვერდავიწყებულ ღალატის გამო დაიმსახურა. სიგარეტს უკიდებს... ბავშვობაში

თავს აჩვენებდა, თითქოს ეწეოდა, ახლა ამის საჭიროება აღარ არსებობს... მორიგ კათხა ლუდს უკვეთს.

მილტს მოაქვს ბუზღუნით:

– კარგი იქნებოდა, ჯერ რამე გეჭამა.

ამიტომ პიტი შემწვარ მოლუსკებს მოატანინებს და კიდევ ჭამს რამდენიმეს, ტარტარის საწებელში ამოვლებულს, სანამ ორიოდ კათხას კიდევ დაამატებდეს. სხვა ბარში გადასვლამდე მასაჩუსეტსში, ჯოუნსისთან ცდილობს დარეკვას, მაგრამ ჯოუნსი და კარლა, როგორც ჩანს, მოულოდნელად გამოჩენილი თავისუფალი საღამოთი ტკბებიან. ყურმილს ძიძა იღებს და ეკითხება, რამე ხომ არ გადავცეო.

პიტს ლამის წამოსცდეს, არაო, მაგრამ დროულად ახსენდება რაღაც.

– გადაეცით, რომ პიტმა დარეკა და ადინო, თქვა.

– ა... დ... ი... ნ... – იმეორებს ქალიშვილი და გულმოდგინედ იწერს, – თუ მიხვდება, ეს...

– ოჰ, დიახ, – არწმუნებს პიტი, – რა თქმა უნდა, მიხვდება.

შუალამისთვის იგი ნიუ-ჰემპშირის რომელიღაც ბარში გამოტყვრება – „მადი რადერში“ თუ „რადი მადერში“. ენას ძლივს ატრიალებს, მაგრამ მაინც ცდილობს, ვიღაც გალეშილ ქალს აუხსნას, როგორ სჯეროდა ოდესღაც, რომ პირველი ადამიანი იქნებოდა, რომელიც მარსზე დადგამდა ფეხს. და თუმცა ის ქალი დაქოქილივით იმეორებს „ჰო-ჰო-ჰოს“, პიტი ხვდება, რომ ერთადერთ რამეზე ფიქრობს – როგორმე კიდევ გადაკრას ბრენდი ბარის დაკეტვამდე. არა უშავს. არაფერია. ხვალ ნაბახუსევზე საშინელი თავის ტკივილით გაიღვიძებს, მაგრამ მაინც წავა სამსახურში და მანქანასაც გაყიდის, ან ვერ გაყიდის, თუმცა სამყარო მაინც იტრიალებს. იქნებ ბორდო „ტანდერბერდი“ გაასალოს, და მაშინ – მშვიდობით, ძვირფასო! ადრე სამყარო მრავალფეროვნებით აოცებდა, ახლა კი ყველაფერი ერთმანეთს ჰგავს. ალბათ ასეც შეიძლება ცხოვრება, განსაკუთრებით

მისნაირი ხალხისთვის, ვისთვისაც ცერის წესი<sup>17</sup> მხოლოდ და მხოლოდ ადინ-ია, ახალი დღე, იგივე ნაგავი. ჯანდაბას, იყოს ასე. შენ გაიზარდე, დაკაცდი, შეეგუე, რომ იმაზე ცოტა მიიღე, ვიდრე მოელოდი; აღმოაჩინე, რომ ოცნებების მანქანაზე დიდი აბრა ჰკიდია, წარწერით „არ მუშაობს“.

ნოემბერში მეგობრებთან ერთად სანადიროდ წავა, რაც სრულიად საკმარისია, რათა ცხოვრებას კვლავ იმედის თვალით შეხედოს. ეს შესაძლოა, მანქანაში ამ გაღეშილი ქალის უხვად პომადაწასმული ტუჩებით შესრულებული მინეტი აღმოჩნდეს. უფრო მეტის სურვილი ხშირად გულისტკივილს იწვევს.

ოცნება ბავშვების საქმეა.

---

<sup>17</sup> ემპირიული კანონზომიერება, ემყარება ექსპერიმენტულ მონაცემებს და ზუსტთან მიახლოებითი შედეგის მიღების შესაძლებლობას იძლევა. მისი წარმოშობა უკავშირდება XVII საუკუნის ინგლისში არსებულ კანონს, რომლის თანახმადაც, იმ ჯოხის სისქე, რომლითაც ქმარს ცოლის ცემის უფლება ჰქონდა, მისი ხელის ცერზე მსხვილი არ უნდა ყოფილიყო.



## 1998: ჰენრის პაციენტი დივანზე წევს

ოთახი ნახევრად ჩაბნელებულია. ყოველთვის ასეა, როდესაც ჰენრის პაციენტები ჰყავს. საინტერესოა, რომ ბევრი ამას ვერ ამჩნევს. მისი აზრით, ეს იმიტომ ხდება, რომ მათი გონება დანისლულია. უმრავლესობა კი, უბრალოდ, ნევროტიკია (“ტყეები სავსეა ასეთებით” – უთხრა მან ერთხელ ჯოუნსის, როდესაც ერთად იყვნენ. ჰა-ჰა, ტყეებით). ის დარწმუნებულია, – სრულიად არამეცნიერული მიდგომის საფუძველზე, – რომ მათი პრობლემები ერთგვარი მაპოლარიზებული ეკრანია მათსა და დანარჩენ სამყაროს შორის. ნევროზის გაძლიერებასთან ერთად, ორგანიზმში წყვილია დიდ მატულობს. პაციენტების ნაწილი ერთგვარად ესიმპათიურება, ნაწილი ებრალება. და მხოლოდ ცოტას თუ შეუძლია მისი წონასწორობიდან გამოყვანა. ბარი ნიუმენი ამ უკანასკნელთა რიცხვს მიეკუთვნება.

პაციენტებს, რომლებიც მისი კაბინეტის ზღურბლს გადააბიჯებენ, არჩევანის შესაძლებლობა ეძლევათ, თუმცა ისინი ასე არ ფიქრობენ. ამას ვერც კი აცნობიერებენ. შესვლისთანავე ხედავენ საკმაოდ მყუდრო, თუმცა ნახევრად ჩაბნელებულ ოთახს, მარცხენა კედელთან – ბუხარს, რომელშიც „შეშა იწვის“ – სპილენძის ოთხი მილი

ხეებივით არის შეღებული, გაზქურის სანთურები შენიღბულია. იქვე, ვან გოგის „მზესუმზირების“ შესანიშნავი რეპროდუქციის ქვეშ, უზარმაზარი რბილი სავარძელი დგას, რომელზეც, ჩვეულებრივ, ჰენრი ზის ხოლმე (ზოგჯერ კოლეგებს ეუბნება, რომ ყოველ ფსიქიატრს კაბინეტში ვან გოგის ერთი ასეთი სურათი მაინც უნდა ჰქონდეს). მოპირდაპირე მხარეს მსუბუქი სავარძელი და დივანია. ჰენრი ყოველთვის ინტერესით ელოდება, რას აირჩევს პაციენტი. საკუთარი გამოცდილებით იცის, რომ პირველი არჩევანი შემდეგ ჩვევად იქცევა და მომდევნო სეანსების დროს აღარ შეიცვლება. ახსოვს კიდევ ამ თემაზე გამოქვეყნებული სტატია, ოღონდ თეზისებს ვერ იხსენებს. ასეა თუ ისე, გრძნობს, რომ სულ უფრო ნაკლებად აინტერესებს ჟურნალ-გაზეთები, კონფერენციები და სემინარები. ადრე ყველაფერი სხვაგვარად იყო, მაგრამ ახლა ვითარება შეიცვალა. ნაკლები სძინავს, ცოტას ჭამს და სულ უფრო იშვიათად იცინის. წყვილია მის ცხოვრებაშიც იპარება – ის მაპოლარიზებული ფილტრი – და აცნობიერებს, რომ ამას არ ეწინააღმდეგება. ნაკლები სიკაშკაშე თვალის სიმშვიდეს უწყობს ხელს.

ბარი ნიუმენი თავიდანვე დივანს ირჩევდა, მაგრამ ჰენრის ერთხელაც არ დაუშვია შეცდომა და არ უვარაუდია, რომ ეს მის ფსიქიკურ მდგომარეობას როგორღაც უკავშირდებოდა. უბრალოდ, ბარისთვის დივანი უფრო მოსახერხებელი იყო. თუმცა ჰენრის ზოგჯერ მისთვის ხელის გაწვდენა უხდებოდა, რათა ადგომაში მიხმარებოდა – ხუთი ფუტისა და შვიდი დუიმის სიმაღლის ბარი ოთხას ოც გირვანქას იწონიდა. ამიტომაც დაუმეგობრდა დივანს.

ბარი ნიუმენტან სეანსი, როგორც წესი, დიდხანს მიმდინარეობს, ვინაიდან მან დაწვრილებით უნდა მოჰყვეს საკუთარი გასტრონომიული თავგადასავლები. სულაც არ გახლავთ გურმანი, პირიქით, ყველაფერს განურჩევლად ნთქავს, რაც კი მის ორბიტაზე გამოჩნდება. ბარი საჭმლის გადამმუშავებელი ნამდვილი მანქანაა. მას ფო-

ტოგრაფიული მეხსიერება აქვს, ამ კუთხით მაინც. ბარი გასტრონომიაში იგივეა, რაც ჰენრის ძველი მეგობარი პიტი ადგილზე ორიენტირებასა და გეოგრაფიაში.

ჰენრი თითქმის აღარ ცდილობს, ბარი ხეებს მოსწყვიტოს და ტყეში გასეირნება აიძულოს, ერთი მხრივ, პაციენტის მშვიდი, მაგრამ ჯიუტი სურვილის გამო, დეტალურად იმსჯელოს მის მიერ მირთმეულ ნებისმიერ საკვებზე. თუმცა ისიც გასათვალისწინებელია, რომ ბარი მას არ მოსწონს და არც არასდროს მოსწონდა. ნიუმენს მშობლები არ ჰყავდა – თექვსმეტი წლის იყო, მამა რომ გარდაეცვალა, ექვსი წლის შემდეგ დედაც დაეღუპა. შვილს დაუტოვეს დიდძალი ქონება, რომელსაც სამეურვეო ფონდი განკარგავდა, სანამ ნიუმენს ოცდაათი წელი არ შეუსრულდებოდა. მერე კი შეეძლო მემკვიდრეობის მიღება, ოღონდ იმ პირობით, თუ იგი... ფსიქოთერაპიით მკურნალობას გააგრძელებდა. წინააღმდეგ შემთხვევაში, ძირითადი ნაწილი ფონდის განკარგულებაში კიდევ ოც წელს დარჩებოდა.

ჰენრის ეეჭვება, რომ ბარი ნიუმენი ორმოცდაათ წლამდე მიაღწევს.

ბარის სისხლის წნევა (როგორც მან ეს სიამაყით განუცხადა ჰენრის) ას ოთხმოცდაათი ას ორმოცზეა.

ბარის ქოლესტერინი ორას ოთხმოცდაათს შეადგენს; ლიპოპროტეინების ნამდვილი ოქროს ძარღვია.

– მოსიარულე ინსულტი ვარ, მოსიარულე ინფარქტი, – განუცხადა მან ჰენრის იმ ადამიანის სიხარულით აღსავსე ხმით, რომელსაც სასტიკი, შეუბრალებელი სიმართლის თქმა შეუძლია, რადგან გულის სიღრმეში იცის, რომ ამგვარი აღსასრული მას არ ემუქრება, ოჰ, რა თქმა უნდა, არა. – ლანჩზე ორი ორმაგი ბურგერი ვჭამე, – ამბობს იგი ახლა, – სწორედ ასეთი მიყვარს, რადგან შიგ ცხელი ყველია, – მისი ფუმფულა ტურნები, მსგავსი გაბარიტების ადამიანისთვის ურვეულოდ პატარაა, ქორჭილას პირს წააგავს, ისე იკუმშება და თრთის, თითქოს იმ საუცხოო ცხელ ყველს გემოს უსინჯავდეს, –

რძის კოქტილიც დავაყოლე, აქეთობას ორ „მალომარსსაც“ გეახელით. შემდეგ ცოტა წავუძინე, გაღვიძებისთანავე მიკროტალღურ ღუმელში გაყინული ვაფლის პაკეტი შევაგდე. „ლეგო-ეგო!“ – ყვირის და მერე იცინის. ამგვარი სიცილი იმ ადამიანებს ახასიათებთ, რომლებიც სასიამოვნო მოგონებებით ტკბებიან: მზის საუცხოო ჩასვლით, ქალის თხელი აბრეშუმით დაფარულ მკერდზე შეხებით (არა, ჰენრის აზრით, ბარის მსგავსი რამ არასდროს განუცდია), სანაპიროს თბილ სილაში სეირნობით. – უმრავლესობა მათ ტოსტერში აცხელებს, – განაგრძობს ბარი, – მაგრამ ეს პროდუქტს ზედმეტად აშრობს. მიკროტალღური ღუმლიდან გამოსული კი ცხელია და რბილი. ცხელი... და რბილი, – იგი ხარბად ილოკავს ქორჭილას პატარა ტუჩებს, – ცოტა კი შემრცხვა, მთელი პაკეტი რომ გადავსანსლე.

ამას სასხვათაშორისოდ, უდარდელად ამბობს, თითქოს ახსენდება, რომ ჰენრიმაც უნდა შეასრულოს თავისი წილი სამუშაო. ამგვარ მანევრს სენსის განმავლობაში ოთხჯერ თუ ხუთჯერ მიმართავს, შემდეგ კვლავ საჭმელს უბრუნდება.

ბარიმ უკვე მიაღწია სამშაბათ საღამოს. ვინაიდან ახლა პარასკევია, საუზმის, სადილის, ვახშმისა და ხემსების ჩამონათვალს დასასრული არ უჩანს. ჰენრი თავს უფლებას აძლევს ფიქრებს მიეცეს. ბარი დღეს მისი ბოლო პაციენტია. როდესაც კულინარიული გმირობების გრძელ სიას ჩაათავებს, ჰენრი თავისთან დაბრუნდება და ბარგს შეაგროვებს. ხვალ ექვს საათზე უნდა ადგეს. შვიდსა და რვას შორის ხეივანში ჯოუნსის მანქანა გამოჩნდება. ისინი თავიანთ ბარგი-ბარხანას ჰენრის ძველ სკაუტში<sup>18</sup> ჩატენიან, ჰენრი მას მხოლოდ შემოდგომაზე, სანადიროდ წასასვლელად იყენებს, ცხრის ნახევრისთვის უკვე ჩრდილოეთისკენ მიმავალ გზაზე იდგებიან. ბრიჯტონში – პიტს, დერიში კი ბივს შეუვლიან. საღამოსთვის უკვე ჯეფერსონ-ტრექტის ზემოთ, მონადირის ქოხში – „კედელში გაკეთებულ ხვრელ-

---

<sup>18</sup> აქ: ერთგვარი მაღალი გამავლობის მანქანა.

ში“ იქნებიან, სასტუმრო ოთახში კარტს ითამაშებენ და საკვამურებში ქარის ზუზუნს დაუგდებენ ყურს. თოფებს სამზარეულოს კუთხეში მიაყუდებენ, სამონადირეო ლიცენზიებს უკანა კართან, კაუჭზე ჩამოკიდებენ. ბოლოს და ბოლოს, მეგობრებთან ყოფნას ეღირსება, რაც ხანგრძლივი ხეტიალის შემდეგ მშობლიურ სახლში დაბრუნების ტოლფასია. ერთი კვირის განმავლობაში მაპოლარიზებელი ფილტრი ოდნავ დაიწმინდება. ისინი ძველ დროს გაიხსენებენ, ბივერის აღმაშფოთებელ, სასაცილო უხამსობებზე იცინებენ და თუ რომელიმე მათგანი ირმის მოკვლასაც მოახერხებს, ეს დამატებითი გასართობი იქნება. დღემდე საუცხოოდ გრძნობენ თავს ერთად, დროს დღემდე ერთად ამარცხებენ.

ფონად ბარი ნიუმენის მონოტონური სიმღერა გაისმის. დაბეგვილი ღორის ხორცი, კარტოფილის პიურე, კარაქში ამოვლებული შემწვარი სიმინდი, შოკოლადის ტორტი „ფეფერიჯ-ფარმი“, „კოკა-კოლას“ ჭიქა, რომელშიც ნაყინის – „ბენ და ჯერის ჩანკი მანკის“ ოთხი ბურთულა დაცურავს და კვერცხები: შემწვარი, მოხარშული, თოხლო...

ჰენრი თითქმის არ უსმენს, მხოლოდ თავს უქნევს, სადაც საჭიროა. ეს ფსიქიატრების ძველი ილეთია.

ღმერთმა ხომ იცის, რომ ჰენრისა და მის მეგობრებს საკუთარი პრობლემებიც ჰყოფნით. ბივერს ოჯახურ ცხოვრებაში არ უმართლებს; პიტი ძალიან ბევრს სვამს (ჰენრის აზრით, იმაზე გაცილებით მეტს, ვიდრე დასაშვებია); ჯოუნსი და კლარა კინალამ ერთმანეთს დასცილდნენ, ჰენრი დეპრესიას ებრძვის და ეს ერთდროულად მოსწონს და აწუხებს კიდევ. თუმცა ერთად ძველებურად კარგად გრძნობენ თავს, ჯერ კიდევ შეუძლიათ, ერთმანეთს გზა გაუნათონ. ხვალ სალამოსთვის ისევ ერთად იქნებიან. მთელი რვა დღის განმავლობაში. და ეს შესანიშნავია.

– ვიცი, ასე არ უნდა მოვქცეულიყავი, მაგრამ დაუოკებელმა სურ-

ვილმა ადრიანად გამაღვიძა. შესაძლოა, სისხლში შაქრის შემცველობა დაეცა, ვფიქრობ, ასეც იქნებოდა. ყოველ შემთხვევაში, დარჩენილი ერთი გირვანქა ტორტი შევჭამე, მაცივარში რომ იდო, მერე კი მანქანაში ჩავჯექი „დანკინ დონატისისკენ“ გავეშურე, თორმეტიოდე შებრაწული ვაშლი და ოთხი...

ჰენრი, რომელიც მოახლოებულ ნადირობაზე ფიქრს განაგრძობს, ვერც კი მიხვდება, ისე გამოუფრინდება სიტყვები პირიდან.

– ბარი, იქნებ ჭამის დაუოკებელი სურვილი იმასთან არის დაკავშირებული, რომ თქვენი აზრით, დედა მოკალით? როგორ ფიქრობთ, ეს შესაძლებელია?

ბარი მოულოდნელად ჩუმდება. ჰენრი თავს მაღლა სწევს და ხედავს პაციენტის უზარმაზარ, თეფშივით თვალებს, რომელიც პირველად გამოუჩნდა ცხიმის ნაკეცებიდან მთელი ამ ხნის განმავლობაში. და თუმცა ჰენრის ესმის, რომ აღარ უნდა გააგრძელოს, უნდა შეწყვიტოს საუბარი, რასაც ფსიქოთერაპიასთან კავშირი არა აქვს, მაგრამ რატომღაც არ სურს. იქნებ, ნაწილობრივ, ამის მიზეზი ძველი მეგობრების გახსენებაა, უფრო მეტად კი – ბარის მოულოდნელობისგან გაფითრებული, გაშტერებული სახე. როგორც ჩანს, ჰენრის ყველაზე მეტად ის აღიზიანებს, რომ ბარი საკუთარი თავითა და ცხოვრების წესით სრულიად კმაყოფილია, შინაგანად სწამს, რომ საკუთარი თავის დამღუპველ მოქმედებაში ცუდი არაფერია. რა საჭიროა, მისი გადარწმუნება, მიზეზების ქექვაზე რომ აღარაფერი ვთქვათ?

– თქვენ ხომ მიგაჩნიათ, რომ ის მოკალით, არა? – აგდებულად, უდარდელად განაგრძობს ჰენრი.

– მე... მე არასდროს... მე აღშფოთებული...

– ის გეძახდათ, გეძახდათ, გიყვიროდათ, რომ მკერდში აუტანელ ტკივილს გრძნობდა, თქვენ ეს ხშირად გესმოდათ, ხომ ასეა? თითქმის ყოველკვირა, თითქმის ყოველდღე. ზემოდან გეძახდათ: „ბარი,

დოქტორ უიტერსს დაურეკე, ბარი, სასწრაფო დახმარება გამოიძახე, ბარი, 911 აკრიფე“.

ისინი არასდროს საუბრობდნენ ბარის მშობლებზე. ეს ნაპატივები კაცი თავისი რბილი, მაგრამ შეუვალი მანერით ამას ყოველთვის გაუბოდა. თითქოს დაიწყებდა, მაგრამ უეცრად – ბინგო! და კვლავ შემწვარ ცხვრის ხორცზე, წიწილაზე ან ფორთოხლის წვენში ჩაღებულ იხვზე აგრძელებდა ლაპარაკს. ჰენრიმ არაფერი იცოდა ბარის მშობლებისა და, ცხადია, არც იმ დღის შესახებ, როდესაც ბარის დედა, საწოლიდან გადმოვარდა, ნოხი დაასველა, მერე კი ის სამასგირვანქიანი ხორცის მასა, საზიზღრობამდე გათქვირებული ხორცის მასა წიოდა და კიოდა. შეუძლებელია, რაიმე იცოდეს, რადგან ამის შესახებ არავის არაფერი უთქვამს. არადა იცის. ბარი მაშინ გაცილებით გამხდარი იყო. მხოლოდ ას ოთხმოცდაათ გირვანქას იწონიდა.

ეს ჰენრის ვერსიაა ხაზის შესახებ. ისევ ეს ხაზი. უკვე ხუთი წელია, რაც აღარ უნახავს (მხოლოდ რამდენჯერმე ესიზმრა), ფიქრობდა, ყველაფერი დასრულდაო, მაგრამ, როგორც ჩანს, შეცდა. ის ისევ აქაა.

– თქვენ კი ამ დროს ტელევიზორის წინ იჯექით და მის ყვირილს ისმენდით, – განაგრძობს იგი, – რიკი ლეიქს<sup>19</sup> მისჩერებოდი და ჭამდით... რას? „სარა ლის“<sup>20</sup> ყველის ტორტს? მთელ თას ნაყინს? არ ვიცი. მაგრამ მის ყვირილს ყურადღებას არ აქცევდით.

– გაჩუმდით!

– ნება მიეცით იმდენი ეყვირა, რამდენსაც მოისურვებდა და მართლაც, რატომაც არა? ის ხომ მთელი ცხოვრების განმავლობაში მგელივით ყმუოდა. სულელი არ ხართ და იცით, რომ ეს სიმართლეა. ასეთი რამ ხდება ხოლმე. ვფიქრობ, ესეც გასაგებია. ჰოდა, გაწირეთ საკუთარი თავი ტენესი უილიამსის<sup>21</sup> თქვენსავე პატარა პიესაში

<sup>19</sup> ცნობილი ამერიკელი ტელეწამყვანი ქალი.

<sup>20</sup> სამომხმარებლო პროდუქციის მწარმოებელი ფირმა.

<sup>21</sup> ფსევდ. ამერიკელი მწერალი, დრამატურგი.

მხოლოდ იმიტომ, რომ ჭამა გიყვართ. მაგრამ იცით, რას გეტყვით, ბარი? ეს თქვენ ბოლოს მოგიღებთ, მოგკლავთ. გულის სიღრმეში ამის არ გჯერათ, მაგრამ ეს ასეა. გული უკვე გიფართხალებთ, ცოცხლად დამარხულივით, რომელიც კუბოს სახურავს მუშტებს ურტყამს. საინტერესოა, რა მოხდება, როდესაც ასამდე გირვანქას კიდევ მოიმატებთ?

– ხმა...

– როცა დაეცემით, ბარი, ამას ბაბილონის გოდოლის ჩამოქცევის ეფექტი ექნება. თვითმხილველები მრავალი წლის განმავლობაში ილაპარაკებენ ამაზე. თაროებიდან ჭურჭელი ზრიალ-ზრიალით წამოვა ძირს...

– შეწყვიტეთ!

ბარი სწრაფად წამოჯდება. ამჯერად ჰენრის დახმარება არ სჭირდება. მკვდარივითაა გაფითრებული, თუ პატარა ვარდებს არ ჩავთვლით ლოყებზე.

– ... ყავაც კი გადმოიღვრება ფინჯნებიდან და ისევე ჩაისველებთ, როგორც ოდესღაც მან...

– შეჩერდით! – განწირულად ყვირის ბარი, – შეჩერდით! თქვენ ურჩხული ხართ!

მაგრამ ჰენრი ვეღარ ჩერდება. არ შეუძლია. ისევ ხაზს ხედავს. და როდესაც თქვენ მას ხედავთ, თავს ვერ მოიკატუნებთ, თითქოს ვერ ამჩნევდეთ.

– ...თუ დროულად არ გამოფხიზლდებით იმ მომწამლავი სიზმრიდან, რომელშიც იმყოფებით, გესმით, ბარი...

მაგრამ ბარის არაფრის მოსმენა არ სურს, აბსოლუტურად არაფრის. იგი ოთახიდან უშველებელი კვერცხების ქნევით გარბის და აღარ ჩანს.

ჰენრი კი გაუნძრევლად ზის და ერთ ადამიანში განსხეულებულ ბიზონთა ჯოგის თქარათქურს უსმენს. ეს ადამიანი ბარი ნიუმენია. მეორე ოთახი ცარიელია: მდივანი არ ჰყავს. ბარის გაქცევით მისი



შრომითი კვირა სრულდება. სასიამოვნო არაფერია, მაგრამ იქნებ ასე ჯობდეს კიდევ. დივანს უახლოვდება და წეება.

– ექიმო, – ამბობს ჰენრი, – მაგრად ჩავისვარე.

– ეს როგორ მოგივიდა, ჰენრი?

– პაციენტს სიმართლე ვუთხარი.

– განა სიმართლის ცოდნა თავისუფლებას არ გვანიჭებს, ჰენრი?

– არა, – პასუხობს იგი საკუთარ თავს და ჭერში იყურება, – სრულებით არა.

– თვალეები დახუჭე, ჰენრი.

– კარგი, ექიმო.

თვალეებს ხუჭავს. ოთახში სინათლეს წყვდიადი ანაცვლებს. ეს კარგია. წყვდიადი მისი მეგობარი გახდა. ხვალ მეგობრებს შეხვდება და სინათლეს ისევ კეთილ არსებად აღიქვამს. მაგრამ ახლა... ახლა...

– ექიმო!

– გისმენ, ჰენრი.

– ეს ჩვეულებრივი შემთხვევაა, სახელწოდებით „ახალი დღე, იგივე ნაგავი“. იცოდით?

– რას ნიშნავს ეს, ჰენრი? შენთვის რას ნიშნავს?

– ყველაფერს, – თვალდახუჭული ამბობს და მაშინვე ამატებს, – არაფერს.

ცრუობს. და ეს პირველი ტყუილი არ არის, რაც მას აქ უთქვამს.

ხვალ ოთხივე იმ ადგილისკენ გაემგზავრება, რომელსაც „კედელში გაკეთებული ხვრელი“ ჰქვია. წინ გადასარევი რვა დღე ელოდებათ. მასშტაბური სამონადირეო ექსპედიციები მალე საერთოდ აღარ შედგება, მაგრამ ამის შესახებ ჯერ არავინ იცის. ნამდვილი წყვდიადის დადგომამდე რამდენიმე წელი რჩება, მაგრამ ის ახლოვდება.

წყვდიადი ახლოვდება.

## 2001: ჯოუნსი. სტუდენტისა და მასწავლებლის საუბარი

ჩვენ არაფერი ვიცით იმ დღეების შესახებ, რომლებმაც ჩვენი ცხოვრება უნდა შეცვალოს. შესაძლოა, ეს უკეთესიც არის. იმ დღეს, რომელიც აუცილებლად შეცვლის ჯოუნსის ცხოვრებას, იგი „ჯონ ჯეი კოლეჯის“ მესამე სართულზე, თავის კაბინეტში ზის, ფანჯრიდან ბოსტონის ნაგლეჯს გასცქერის და ფიქრობს, რომ ცდებოდა თ. ს. ელიოტი<sup>22</sup>, როდესაც აპრილს ყველაზე სასტიკი თვე უწოდა, თანაც მხოლოდ იმიტომ, რომ მწირი დურგალი ნაზარეთიდან, სავარაუდოდ, სწორედ აპრილში აღმოჩნდა ჯვარზე, ამბოხებისკენ წაქეზებისთვის. ბოსტონის ყველა მცხოვრებმა იცის, რომ ყველაზე შეუზრალელებელი თვე მარტია, რომელიც მზაკვრულად გასცემს ყალბი იმედის რამდენიმე წამს, რათა შემდეგ თავხედურად შემოგასხას სახეში ტალახი. დღესაც სწორედ ერთ-ერთი ასეთი საეჭვო დღეა, როდესაც ისე ჩანს, თითქოს გაზაფხული მართლაც ეწვია მათ პირქუშ ქალაქს,

---

<sup>22</sup> პოეტი, მწერალი, დრამატურგი.

და ჯოუნსი ფეხით გასეირნებასაც ფიქრობს მას შემდეგ, რაც ერთ არასასიამოვნო, საძაგელ საქმეში გაერკვევა. ცხადია, ჯოუნსიმ არ იცის, რას უმზადებს დღევანდელი ამინდი; რომ საღამოს საავადმყოფოს პალატაში დასახიჩრებული აღმოჩნდება და თავისი დაწყევლილი სიცოცხლის გადასარჩენად იბრძოლებს.

ახალი დღე, იგივე ნაგავი, ფიქრობს იგი. სინამდვილეში კი ნაგავი განსხვავებული აღმოჩნდება.

ამ დროს ტელეფონი რეკავს. მაშინვე ყურმილს დასწვდება. იმედი აქვს, პატარა დეფანიაკი იქნება, რომელიც თერთმეტ საათზე დანიშნული შეხვედრის გადადებას სთხოვს. ალბათ ხვდება, საით უბერავს ქარი, ფიქრობს ჯოუნსი. სავსებით შესაძლებელია. ჩვეულებრივ, მასწავლებელთან შეხვედრას სტუდენტები ცდილობენ. როდესაც ბიჭს ატყობინებენ, რომ მასწავლებელს მისი ნახვა უნდა... დიდი განსწავლულობა არ სჭირდება მიზეზის მიხვედრას.

– ალო, ჯოუნსი გისმენთ, – ამბობს იგი.

– ჰეი, ჯოუნსი, როგორ მიდის ცხოვრება?

ამ ხმას ყოველთვის გამოიცნობს.

– ჰენრი! ჰეი! მშვენივრად, ცხოვრება მშვენიერია!

სინამდვილეში ეს ასე არ არის, სულაც არ არის ასე, მით უმეტეს იმის გაფიქრებისას, რომ თხუთმეტ წუთში დეფანიაკი უნდა გამოჩნდეს. მაგრამ ყველაფერი ხომ შედარებითია, არა? ჰოდა, იმასთან შედარებით, რაც თორმეტ საათში ელოდება – მოწრიპინე აპარატთან მიერთება, ერთი გაკეთებული და სამი გასაკეთებელი ოპერაცია... ჯოუნსი, ასე ვთქვათ, იხტიბარს არ იტყვს.

– მიხარია ამის გაგონება.

შესაძლოა, ჰენრი ცოტათი დაღონებული მოეჩვენა, მაგრამ უფრო იმიტომ, რომ ამგვარ რამეებს გრძნობს.

– რა მოხდა, ჰენრი?

დუმილი. ჯოუნსი შეკითხვის გამეორებას აპირებს, მაგრამ ჰენრი მაინც პასუხობს:

– გუშინ ჩემი პაციენტი გარდაიცვალა. გაზეთში წავიკითხე. ბარი ნიუმენი ერქვა.

პატარა პაუზა.

– დივანზე იწვა ხოლმე.

ჯოუნსიმ არ იცის, ეს რას ნიშნავს, მაგრამ ხვდება, რომ მეგობარს უჭირს. ამაში დარწმუნებულია.

– თვითმკვლელობა?

– გულის შეტევა. ოცდაცხრა წლის ასაკში. საკუთარი სამარე ჩან-გლით და კოვზით გაითხარა.

– სამწუხაროა.

– ბოლო სამი წლის განმავლობაში ჩემი პაციენტი აღარ იყო. დავაფრთხე. აი... ისეთი შემთხვევა მქონდა. ხომ ხვდები, რას ვგულისხმობ?

ჯოუნსი ფიქრობს, რომ ხვდება.

– ხაზი?

ჰენრი ღრმად ამოისუნთქებს, თუმცა ჯოუნსი განსაკუთრებულ წუხილს ვერ ამჩნევს.

– ჰო. და თითქოს მასზე ვიყარე ჯავრი. ცეცხლმოკიდებულივით მოუსვა.

– ეს სულაც არ ნიშნავს, რომ მის ინფარქტში ბრალი მიგიძღვის.

– შესაძლოა, მართალი ხარ. მაგრამ რაღაც სხვანაირად მეჩვენება.

კვლავ პაუზა. შემდეგ კი უფრო მხიარულად:

– ეს ფრაზა ჯიმ კროჩეს<sup>23</sup> სიმღერიდან ხომ არ არის? ხომ კარგად ხარ, ჯოუნსი?

– მე? ჰო. რატომ მეკითხები?

– არ ვიცი, – ამბობს ჰენრი, – მხოლოდ... შენზე მას შემდეგ ვფიქრობ, რაც გაზეთი გავშალე და ნეკროლოგების გვერდზე ბარის სურათს წავაწყდი. მინდა, რომ სიფრთხილე გამოიჩინო.

---

<sup>23</sup> ამერიკელი მომღერალი, კომპოზიტორი.

უეცრად ჯოუნსის ძვლებში (ისინი მალე ჩაემსხვრევა) სიცივე და-  
უვლის.

– რას გულისხმობ?

– არ ვიცი, – იმეორებს ჰენრი, – შესაძლოა, არაფერია. მაგრამ...

– ნუთუ ისევ ის ხაზი? – ჯოუნსი შეშფოთებულია, სავარძელში  
შეტრიალდება და ფანჯრიდან გაზაფხულის ცვალებად მზეს გაჰყუ-  
რებს. უეცრად გაიფიქრებს, რომ იმ ბიჭს, დეფანიაკს, შესაძლოა,  
თავში რაღაც გადაუტრიალდა და ახლა ჯიბეში იარაღი უდევს (დე-  
ტექტივებისა და თრილერებისთვის დამახასიათებელი პასაჟი, ჯო-  
უნსის უყვარს მათი კითხვა თავისუფალ დროს). ეს მას მხედველო-  
ბიდან გამორჩა.

– არ ვიცი. შესაძლოა, ეს მხოლოდ რეაქცია იყოს ბარის სიკვდილ-  
ზე, ნეკროლოგების გვერდზე ნანახ მის ფოტოზე. მაგრამ მინც  
ფრთხილად იყავი, შევთანხმდით?

– რადგან ასეა... დაგიჯერებ.

– ძალიან კარგი.

– შენ ხომ კარგად ხარ?

– შესანიშნავად.

მაგრამ ჯოუნსი ასე არ ფიქრობს. კიდევ რაღაცის თქმას აპირებს,  
მაგრამ ამ დროს მის ზურგს უკან ვიღაც ჩაახველებს და მიხვდება,  
რომ ეს დეფანიაკია.

– მიხარია ამის გაგონება, – ამბობს იგი და მაგიდისკენ ტრიალ-  
დება. ასეცაა – კარში თერთმეტ საათზე დაბარებული მნახველი  
დგას. ჯოუნსი მას სახიფათოს ვერაფერს ამჩნევს: ჩვეულებრივი ბი-  
ჭია. ძველი, განიერი, კაპიუშონიანი, ხისლილებიანი, თუმცა დღევან-  
დელი ამინდისთვის, ცოტა არ იყოს, თბილი პალტო აცვია; გამხდა-  
რია, გალეული, ცალი საყურე უკეთია, პანკის ვარცხნილობა აქვს,  
შეწუხებული იყურება, – ჰენრი, ახლა შეხვედრა მაქვს. მოგვიანებით  
დაგირეკავ...

– არ გინდა დარეკვა. არ არის აუცილებელი. მართლა.

– დარწმუნებული ხარ?

– ჰო. მაგრამ... კიდევ ერთი საქმეა. ოცდაათი წამი გექნება?

– ეგ რა სალაპარაკოა.

იგი თითოს მალლა სწევს და დეფანიაკი თავს დამჯერედ უქნევს, მაგრამ კვლავაც ფეხზე დგას, სანამ ჯოუნსი წიგნებისგან თავისუფალ ერთადერთ სკამზე არ მიანიშნებს. დეფანიაკი გაუბედავად მიემართება იქით.

– აბა, ამოალაგე, – ამბობს ჯოუნსი ყურმილში.

– ვფიქრობ, რომ დერიში უნდა წავიდე. ცოტა ხნით, მხოლოდ მე და შენ. ჩვენი ძველი მეგობრის მოსანახულებლად.

– გულისხმობ...

არ უნდა უცხო ადამიანის თანდასწრებით ამ ბავშვური სახელის წარმოთქმა. ეს არც სჭირდება. ამას მის ნაცვლად ჰენრი აკეთებს. ისინი ოდესღაც ოთხნი იყვნენ. შემდეგ, ცოტა ხნით, კვინტეტად იქცნენ, მერე ისევ – კვარტეტად. სინამდვილეში მეხუთეს ისინი არ მიუტოვებია. ჰენრი მის სახელს ამბობს, ბიჭის სახელს, რომელიც, რაღაც სასწაულებრივად, ახლაც ბიჭია. მის შესახებ ჰენრის შეშფოთება უფრო გასაგები და მკაფიოა. ჯოუნსის უხსნის, რომ ზუსტად არაფერი იცის, უბრალოდ გრძნობს, რომ ძველ მეგობარს დახმარება სჭირდება.

– დედამისს თუ ელაპარაკე? – ეკითხება ჯოუნსი.

– ვფიქრობ, – პასუხობს ჰენრი, – უკეთესი იქნება, თუ... მოულოდნელად დავატყდებით თავს. ამ უიკენდზე რა გეგმები გაქვს? ან შემდეგზე?

ჯოუნსის გადასამოწმებელი არაფერი აქვს. უიკენდი ზეგ იწყება. მართალია, შაბათს ფაკულტეტის სალამოს უნდა დაესწროს, მაგრამ იქიდან თავის დაღწევა ადვილია.

– ორივე დღე თავისუფალი მაქვს, – ამბობს იგი, – შაბათს რომ შემოგიარო? ათისთვის?

- კარგი იქნება, - გულზე ეშვება ჰენრის და ახლა უფრო ემსგავსება საკუთარ თავს. ჯოუნსი კი ცოტათი მოდუნდება, - მოახერხებ?

- თუ მხედველობაში გაქვს, რომ სანახავი ობიექტი... - ჯოუნსი ყოყმანობს, - ...დუგლასია, ცხადია, ასეც მოვიქცევი. დიდი დრო გავიდა.

- შენი გასაუბრება... უკვე მოვიდა?

- ჰო.

- კარგი. შაბათს გელოდები, ათისთვის. ეი, იქნებ სკაუტით წავიდეთ? მოძრაობა არც მას აწყენდა. რას იტყვი?

- ძალიან მაგარი იქნება!

ჰენრი იცინის.

- კლარა საუზმეს ისევ გიმზადებს?

- მიმზადებს.

ჯოუნსი თავის პორტფელს გახედავს.

- დღეს რა გაქვს? თინუსი?

- კვერცხის სალათა.

- ჰმ... კარგი, წავედი. აღინ, ასეა?

- აღინ, - ეთანხმება ჯოუნსი. სტუდენტის თანდასწრებით ძველ მეგობარს სახელით ვერ მიმართავს, აღინ კი სავსებით შესაძლებელია, - კიდევ ვილაპარაკებთ...

- და თავს გაუფრთხილდი. ხუმრობა არ გეგონოს, - ხაზგასმით ამბობს ჰენრი, მრავალმნიშვნელოვნად და, ცოტა არ იყოს, ავის მომასწავებლად. მაგრამ სანამ ჯოუნსი პასუხის გაცემას მოასწრებდეს (თუმცა, რა უნდა უთხრას, როდესაც დეფანიაკი კუთხეში მორჩილად ზის), ჰენრი მასთან აღარაა.

რამდენიმე წამის განმავლობაში ჯოუნსი ჩაფიქრებით დასცქერის ტელეფონს, ყურმილს კიდებს, ბლოკნოტს ფურცლავს, შაბათის ჩანაწერს - „დალევა დეკან ჯეიკობსონის სახლში“ - მსხვილად გადახაზავს და დაწერს: „უნდა დავეთხოვო - ჰენრისთან ერთად დერი-

ში გამგზავრება დ-ს სანახავად". მაგრამ ვერც ამ დაპირებას შეასრულებს. შაბათს დერი და ძველი მეგობრები თითქმის აღარ ემახსოვრება.

ჯოუნსი ჰაერს ღრმად შეისუნთქავს და ყურადღება თერთმეტსაათიან მნახველზე გადააქვს. ყმაწვილი სკამზე წრიალებს, ჩანს, შესანინშნავად ხვდება გამოძახების მიზეზს.

– მაშ, ასე, მისტერ დეფანიაკ, – ამბობს ჯოუნსი, – დოკუმენტების მიხედვით, მენის შტატიდან ხართ.

– ა-ა, დიახ. პიტსფილდი. მე...

– დოკუმენტებში ისიც წერია, რომ სტიპენდიას იღებთ და კარგადაც სწავლობთ.

ბიჭი, როგორც ჩანს, კი არ ღელავს, სადაცაა ცრემლად დაიდვრება. ღმერთო ჩემო, რა ძნელია! დღევანდლამდე ჯოუნსის სტუდენტები ტყუილში არასდროს დაუდანაშაულებია. ახლა ისეთი პირი უჩანს, რომ ეს უკანასკნელი შემთხვევა არ იქნება. იმედი აქვს, ამგვარი რამ ხშირად არ მოხდება, ვინაიდან, ეს ძალიან ძნელია, ამას ბივერი ნაგავს დაარქმევდა.

– მისტერ დეფანიაკ... დევიდ... თუ იცით, რა ემართება სტიპენდიას, როდესაც მის მფლობელს ტყუილში ამხელენ? თანაც სემესტრის გამოცდაზე?

ჭაბუკი ისე ცმუტავს, თითქოს სკამქვეშ დამალულმა არაკეთილმოსურნემ გამხდარ უკანალზე დაბალძაბვიანი, გაშიშვლებული დენის ელექტროსადენი მიადო. ტუჩები უთრთის და პირველი ცრემლი... ოჰ, ღმერთო! პირველი ცრემლი გაუპარსავ ლოყაზე მოგორავს.

– ზუსტად აგისხნით, – განაგრძობს ჯოუნსი, – ასეთი სტიპენდია ორთქლდება. აი, რა მოსდის. ბუჰ – და ჰაერში იკარგება.

– მე... მე...

ჯოუნსის მაგიდაზე საქალაღდე დევს. გახსნის და იქიდან პირველ სემესტრში გავლილ ევროპის ისტორიის ბილეთებს იღებს. ეს ერთ-



ერთი საშინელი კითხვარია, რომელიც თავის უსაზღვრო სიბრძნეში დარწმუნებულ განათლების დეპარტამენტს ეკუთვნის. ზემოდან IBM-ის ფანქრით (ეცადეთ, მკვეთრად, მკაფიოდ ჩანიშნოთ, წაშლის შემთხვევაში კი გულმოდგინედ წაშალოთ) შავად წერია: დევიდ დეფანიაკი.

– თვალი გადავაგლე თქვენს საკურსოს, დევიდ, თქვენს სტატიას შუა საუკუნეების ფრანგული ფეოდალიზმის შესახებ; დახასიათებთ ბიც გადავფურცლე. გენიოსი არ გეთქმით, მაგრამ სხვებს არ ჩამოუვარდებით. გარდა ამისა, ვიცი, რომ სავალდებულო პროგრამას ასრულებთ და თქვენი რეალური ინტერესები ჩემს სფეროს არ მოიცავს, ასეა?

დეფანიაკი უსიტყვოდ უქნევს თავს. არასაიმედო მარტის მზის სხივებში ცრემლები ოდნავ უკიაფებს. მაგიდის კუთხეში ხელსახოცების შეკვრა დევს და ჯოუნსი მას ბიჭისკენ ისვრის. მოსწავლე მას, აფორიაქების მიუხედავად, ადვილად იჭერს. სწრაფი რეაქცია აქვს. როდესაც ცხრამეტი წლის ხარ, მთელი შენი „გაყვანილობა“ საიმედო და მყარია.

რამდენიმე წელიც მოიცადეთ, მისტერ დეფანიაკ, – ფიქრობს ჯოუნსი, – მხოლოდ ოცდაცხრამეტის ვარ და ზოგიერთი სადენი უკვე მოყანყალეებული მაქვს.

– შესაძლოა, თქვენ იმსახურებთ, შანსი კიდევ მოგცეთ, – ამბობს ჯოუნსი და დეფანიაკის უზადოდ შესრულებული, უმაღლესი შეფასების მქონე ნამუშევრის დაჭმუჭნასა და დაბურთავებას იწყებს, – იქნებ გამოცდის დღეს ცუდად გახდით ან საერთოდ არ გამოცხადდით.

– ავად ვიყავი, – შეაგებებს დევიდ დეფანიაკი, – ვფიქრობ, ეს გრიპი იყო.

– ასეთ შემთხვევაში მზად ვარ, სახლში ესე გაგატანოთ იმ ტესტის ნაცვლად, რომელიც თქვენმა თანაკურსელებმა დაწერეს. თუ გასურთ, რასაკვირველია. გამოტოვებული გამოცდის აღსადგენად.

რას იტყვით, თანახმა ხართ?

– დიახ, – ქსუტუნებს ბიჭი და გაშმაგებით იწმენდს თვალებს ხელსახოცებით. კარგია, სიტყვების რახარუხს რომ არ მოჰყვა იმის შესახებ, თითქოს ჯოუნსი ვერაფერს დაამტკიცებს, რომ სტუდენტების საქმეთა სენატს მიმართავს, გააპროტესტებს და ასე შემდეგ.

ნაცვლად ამისა, ტირის, რაც უსიამოვნო საყურებელი, მაგრამ, შესაძლოა, კარგის მანიშნებელია: ცხრამეტი წელი არაფერია, მაგრამ ამ ასაკში უმრავლესობას სინდისის ნატამალიც არ გააჩნია. დეფანიაკის საქციელი აღიარების ტოლფასია, მაშასადამე, შანსი აქვს, კაცად იქცეს.

– დიახ, კარგი იქნებოდა.

– ხომ გესმით, თუ მსგავსი რამ კიდევ განმეორდება...

– არასოდეს, – სწრაფად პასუხობს ბიჭი, – არასოდეს, პროფესორო ჯოუნსი.

და თუმცა ჯოუნსი მხოლოდ ასოცირებული პროფესორია, თავში აზრადაც არ მოსდის, შეუსწოროს. ადრე თუ გვიან ხომ მაინც გახდება პროფესორი ჯოუნსი. ეს ნამდვილად წაადგებოდა. მათი სახლი სავსეა ბავშვებით და თუ მომავალში ბიუჯეტი არ გაიზარდა, ცხოვრება გაჭირდება. გარკვეული სირთულეები უკვე თავს იჩენს.

– ვიმედოვნებ, რომ ასე იქნება, – ამბობს იგი, ესე სამი ათასი სიტყვისგან უნდა შედგებოდეს და ნორმანების მიერ ინგლისის დაპყრობის შედეგებს შეეხებოდეს. შევთანხმდით? წყაროებზე მითითება დასაშვებია, ოღონდ არავითარი დამატებითი ინფორმაცია. თავისუფალი გადმოცემა, დამაჯერებელი დასკვნები. ვადა – შემდეგი ორშაბათი. შევთანხმდით?

– დიახ. დიახ, სერ.

– მაშინ შეგიძლიათ, წახვიდეთ და საქმეს შეუდგეთ, – დეფანიაკს გაცვეთილ ბოტასებზე მიუთითებს, – მომავალში, როდესაც ლუდის დალევას გადაწყვეტთ, აჯობებს, ახალი კედები შეიძინოთ. არ მინდა, ისევ ავად გახდეთ.

დეფანიაკი კარისკენ წავა, მაგრამ შემოტრიალდება. ერთი მხრივ, სურს, იქაურობას სწრაფად გაეცალოს, სანამ მისტერ ჯოუნსის არ გადაუფიქრებია, მაგრამ, მეორე მხრივ, ის მხოლოდ ცხრამეტისაა... და ცნობისმოყვარეა.

– როგორ მიხვდით? იმ დღეს ხომ იქ არ ყოფილხართ. გამოცდა ვილაც ასპირანტმა ჩაიბარა.

– ვიცი და ეს საკმარისია, – გადაჭრით ეუბნება ჯოუნსი, – წადი, შვილო. და იცოდე, კარგად დაწერე. სტიპენდიას გაუფრთხილდი. მეც მენიდან ვარ, დერიდან, და პიტსფილდიც ვიცი. აჯობებს, იმ ადგილიდან თავი შორს დაიჭირო.

– სიმართლეს ამბობთ, – გრძნობით ეთანხმება დეფანიაკი, – გმადლობთ. გმადლობთ, რომ შანსი მომეცით.

– რომ გახვალ, კარი გაიხურე.

დეფანიაკი, რომელიც დარჩენილი ფულით ბოტასებს ან ლუდს კი არა, ყვავილების თაიგულს იყიდის და პალატაში მყოფ ჯოუნსის სწრაფად გამოჯანმრთელებას უსურვებს, დერეფანში გადის და კარს მორჩილად ხურავს. ჯოუნსი ფანჯრისკენ ტრიალდება. მზე ისევ მაცდურად იზიდავს და ვინაიდან, დეფანიაკთან ურთიერთობა მოსალოდნელზე კარგად დასრულდა, ჯოუნსი გასეირნებას გადაწყვეტს, სანამ მარტის ღრუბლებს – და, შესაძლოა, თოვლსაც – ამინდი არ გაუფუჭებია. სადილობას კაბინეტში აპირებდა, მაგრამ ახლა თავში ახალი გეგმა მოსდის. ყველაზე ცუდი მის ცხოვრებაში, თუმცა ამის შესახებ, ცხადია, არაფერი იცის. გეგმის მიხედვით, პორტფელი და „ბოსტონ ფენიქსის“ ახალი ნომერი თან უნდა წაიღოს, მდინარე გადაკვეთოს და კემბრიჯში გადავიდეს. იქ ძელსკამზე დაჯდება, სენდვიჩსა და კვერცხის სალათას მიირთმევს და მზეს მიეფიცება.

დგება, რათა დეფანიაკის დოკუმენტები კარტოთეკაში შეინახოს, ფაილებში. „როგორ მიხვდით?“ – ჰკითხა ბიჭმა. ჯოუნსის მიაჩნია, რომ კარგი შეკითხვაა. შეიძლება ითქვას, შესანიშნავიც კი. პასუხი ასეთია: „იცოდა, რადგან... ზოგჯერ იცის“. სიმართლე ეს არის და

არაფერი სხვა. ვინმეს შუბლზე პისტოლეტი რომ მიედო მისთვის, აღიარებდა, რომ ეს მეორე სემესტრის პირველივე ლექციაზე აღმოაჩინა: დევიდ დეფანიაკის შუბლზე დიდი, წითელი ასოები ნეონის წარწერასავით ციმციმებდა და დაჟინებით იუწყებოდა: მატყუარა, მატყუარა, მატყუარა.

მაგრამ, ღმერთო ჩემო, ეს ხომ სისულელეა – მას არ შეუძლია აზრების წაკითხვა. არც არასდროს შეეძლო. არასდროს, არასდროს, არასდროს შეეძლო და ვერც შეძლებს. ზოგჯერ მის თავში რაღაც იფეთქებს ხოლმე. სწორედ ასე შეიტყო აბებზე ცოლის დამოკიდებულების შესახებ. იგივე მოხდა ჰენრის დეპრესიის შემთხვევაშიც, როცა მან დარეკა (არა, სულელო, მის ხმაზე მივხვდი). მაგრამ ბოლო დროს ასეთი რამ თითქმის არ ხდება. ჯოზი რინკენჰაუერის ამბის შემდეგ კი უცნაური ნამდვილად არაფერი მომხდარა. შესაძლოა, ოდესღაც, ბავშვობასა და სიჭაბუკეში, რაღაც მოხდა, მაგრამ ჩავლილია ყველაფერი. ან – თითქმის ჩავლილი.

თითქმის.

იგი შემოხაზავს სიტყვებს „დერიში გამგზავრება“, პორტფელს აიღებს და ამ დროს ახალი აზრი გაუელვებს, მოულოდნელი და უმიზეზო, მაგრამ ძალიან მძლავრი: უფრთხილდი მისტერ გრეის.

არადა, უკვე კარის გამოღებას აპირებდა. შეჩერდა. ეს მისი ხმა იყო. შეჭველად.

– რა? – ეკითხება სიცარიელეს.

არაფერი.

ჯოუნსი კაბინეტიდან გამოდის, კარს ხურავს და ამოწმებს, დაკეტილია თუ არა. განცხადებების დაფის კუთხეში ფურცელია მიმაგრებული. ჩამოხსნის და გადააბრუნებს. ზედ მხოლოდ ერთი წინადადებაა: „დავბრუნდები პირველ საათზე – მანამდე ისტორია ვარ“. მშვიდად ამაგრებს ქალაღს დაფაზე. რა იცის, რომ თითქმის ორი თვე გავა, სანამ კვლავ შემოვა ამ ოთახში და წმინდა პატრიკის დღეზე გადაშლილ თავის ბლოკნოტს დაინახავს.

„თავს გაუფრთხილდი“, – უთხრა ჰენრიმ, მაგრამ ჯოუნსი თავის მოფრთხილებაზე კი არა, მარტის მზეზე ფიქრობს. იმაზე, თუ როგორ შეჭამს სენდვიჩს, როგორი სასიამოვნოა კემბრიჯში ახალგაზრდა გოგოების ყურება – მათ მოკლე კაბები აცვიათ, მარტში კი გიჟმაჟი ქარისგან წამოეხდებათ ხოლმე. ერთი სიტყვით, ყველაფერზე ფიქრობს, გარდა იმისა, რომ მისტერ გრეის უნდა უფრთხოდეს. და რომ, საერთოდ, ფრთხილად უნდა იყოს.

ეს არის მისი შეცდომა. ეს ის არის, თუ როგორ შეიძლება შეიცვალოს ცხოვრება. სამუდამოდ.

# ნაწილი I

## კიბო

ეს ცანცახი მინარჩუნებს სიცოცხლეს,  
და რაც ხდება, მიდის, თუმცა არ მტოვებს.  
ვიღვიძებ, რომ დავიძინო, არ ვჩქარობ,  
სად მივდივარ არც კი ვიცი, არც ვნაღვლობ.

*თეოდორ როტკე<sup>24</sup>*

---

<sup>24</sup> ამერიკელი პოეტი.

# თავი პირველი

## მაკარტი

1

ჯოუნსიმ კინალამ ესროლა კაცს, როცა ამ უკანასკნელმა კორომიდან თავი გამოყო. რამდენად შეეძლო ნაბიჯის გადადგმა? „გარანდის“ შაშხანის სასხლეტზე თითის გამოკვრა? არც კი, – მხოლოდ შეხება? მოგვიანებით, როდესაც შეძრწუნებული გონება ეწმინდებოდა, ნანობდა, ნარინჯისფერი ქუდისა და იმავე ფერის, გამაფრთხილებელი ჟილეტის დანახვამდე რომ არ გაისროლა. რიჩარდ მაკარტის მკვლელობა გულს არავის დასწყვეტდა, დახმარებით კი ბევრს დაეხმარებოდა. რიჩარდ მაკარტის სიკვდილს ყველას გადარჩენა შეეძლო.

2

პიტი და ჰენრი უახლოეს, „გოსლინის“ მაღაზიისკენ გაემართნენ, რათა აუცილებელი სურსათი – პური, კონსერვები და ლუდი ეყი-

დათ. მართალია, ორი დღის სამყოფი მარაგი ჰქონდათ, მაგრამ რადიოთი გამოაცხადეს, რომ თოვას ელოდნენ. ჰენრის უკვე მოენადირებინა მოზრდილი ირემი, ჯოუნსის ეჩვენებოდა, რომ პიტი ლუდის დასაწყობებაზე უფრო მეტს ფიქრობდა, ვიდრე ნანადირევზე – პიტისთვის ნადირობა გართობა იყო, ლუდი კი – რელიგია. ბივერი სადღაც საფარში იჯდა, მაგრამ ჯოუნსის გასროლის ხმა ხუთი მილის რადიუსში არ გაუგია, ამიტომაც დაასკვნა, რომ ბივი, მის მსგავსად, მოცდას ამჯობინებდა.

ბანაკიდან დაახლოებით სამოცდაათ იარღში, ბებერი ნეკერჩხლის ტოტებში, პლატფორმა მოეწყოთ. სწორედ იქ იჯდა ჯოუნსი, ყავას მიირთმევდა და რობერტ პარკერის<sup>25</sup> დეტექტივს კითხულობდა. ამ დროს ტევრიდან ნაბიჯების ხმა მოესმა. ჯოუნსიმ თერმოსი დადგა და წიგნი დახურა. უწინ აღელვებისგან ყავას აუცილებლად დაღვრიდა, მაგრამ ამჯერად ორიოდვე წამი იმაზეც კი დახარჯა, რომ ხასხასა წითელი თავსახური მჭიდროდ ჩაეხრახნა.

მათი ოთხეული ყოველი ნოემბრის პირველ კვირას ამ ადგილას ნადირობდა თითქმის ოცდახუთი წლის განმავლობაში, თუკი იმ დროიდან ავითვლით, როდესაც ბივის მამამ ისინი პირველად წამოიყვანა აქ. ჯოუნსის თავი არასოდეს შეუწუხებია პლატფორმის მოწყობით. ისევე, როგორც დანარჩენებს. ეს ზედმეტ წვალებად მიაჩნდათ. წელს კი, ამ საქმეს ხელი რომ მოჰკიდა, მეგობრები ფიქრობდნენ, რომ იცოდნენ მიზეზი, თუმცა ასე არ იყო.

2001 წლის მარტის შუა რიცხვებში, ჯოუნსის მანქანა დაეჯახა ქუჩაზე გადასვლისას. ეს კემბრიჯში მოხდა, „ჯონ ჯეი კოლეჯის“ სიანლოვეს, რომელშიც ასწავლიდა. ავარიის შედეგად დაუზიანდა თავის ქალა, მოიტეხა ორი ნეკნი და მენჯ-ბარძაყის ძვალი, რომელიც შემდგომში ტეფლონისა და ლითონის მოდური კომბინაციით შეუცვალეს. მანქანის მძღოლი, რომელმაც მას დაარტყა, ბოსტონის უნივერსიტეტის პენსიაზე გასული პროფესორი აღმოჩნდა. ადვოკატის

---

<sup>25</sup> დეტექტიური ჟანრის ამერიკელი მწერალი.



თქმით, იგი ალცჰეიმერის დაავადების ადრეულ ეტაპზე იმყოფებოდა, და არათუ დასჯა, სიბრალული და თანაგრძნობა ესაჭიროებოდა.

ხშირად ვერავის დაადანაშაულებ, – ფიქრობდა ჯოუნსი, – სანამ მტვერი გაიფანტება და ვითარება გაირკვევა. და თუ დაადანაშაულებ კიდევ, რას მოიგებ? იძულებული იქნები, ძველი ცხოვრების ნამსხვრევები შეაგროვო, ძალღუმადურად ცხოვრება განაგრძო და თავი იმით დაიმშვიდო (მას სწორედ ასე ამშვიდებდნენ, სანამ თანდათან ყველაფერი არ დაივიწყეს), რომ შესაძლოა, უარესიც მომხდარიყო.

მართლაც შეიძლებოდა, უარესი მომხდარიყო. თავი ძველებურად უმუშავებდა, ბზარიც შეუხორცდა. მართალია, ჰარვარდის მოედანზე უბედურ შემთხვევამდე საათ-ნახევრის განმავლობაში რაც მოხდა, მეხსიერებიდან წაეშალა, მაგრამ სხვა მხრივ გონებას არ უჩიოდა. ყველაზე მეტად თეძომ შეაწუხა, მაგრამ ოქტომბრისთვის ყავარჯნებიც მოიშორა და კოჭლობა მხოლოდ დღის დასასრულსღა ეტყობოდა.

პიტი, ჰენრი და ბივი დარწმუნებული იყვნენ, რომ მან სწორედ თეძოს გამო ამჯობინა პლატფორმაზე მდგარიყო, ვიდრე სველ და ნოტიო მიწაზე. ნაწილობრივ არ შემცდარან. ჯოუნსი გულმოდგინედ მალავდა, რომ ირმებზე ნადირობის ინტერესი თითქმის დაკარგა. არ სურდა, მეგობრებს გული დასწყვეტოდათ. ამის გამო თვითონაც ბრაზობდა, მაგრამ რა ექნა? საკუთარ თავში გარკვეული ცვლილებები მხოლოდ მაშინ შეამჩნია, როდესაც ვინჩესტერის შალითა გახსნა. არა, ცხოველების მოკვლა მასში ზიზღს არ იწვევდა, მაგრამ არც ეხალისებოდა. მარტის იმ მზიან დღეს სიკვდილმა ცხვირწინ ჩაუარა და ჯოუნსის აღარ სურდა, მისთვის ისევ ეხმო. თუმცა, ამ შემთხვევაში, ის მსხვერპლი კი არა, სიკვდილის მოციქული უფრო იქნებოდა.

საოცარია, მაგრამ ბუნებაში ხეტიალი ძველებურად უყვარდა, გარკვეულწილად, უფრო მეტადაც, ვიდრე უწინ. საუბარი ღამით – წიგნები, პოლიტიკა, ყველაფერი, რაც ბავშვობაში გადახდათ, სამომავლო გეგმები. ჯერ ორმოცი წელიც არ შესრულებოდათ, თავისუფლად შეეძლოთ დაეწყოთ გეგმები, უამრავი გეგმა. მათი მეგობრობა ისევ მტკიცე იყო.

მშვენივრად გაჰყავდა დრო – საათობით რჩებოდა მარტო, პლატფორმაზე. სიცივეში საძილე ტომარა მოჰქონდა, სანახევროდ შიგ ძვრებოდა და წიგნითა და ფლეიერით იქცევდა თავს. არა, ფლეიერზე უარი თქვა, რადგან აღმოაჩინა, რომ ტყის მუსიკა – ფიჭვებში ქარის ნაზი ღლიანი და ყვავების ჩხავილი – გაცილებით მოსწონდა. წიგნს კითხულობდა, ყავას სვამდა, მერე ისევ კითხულობდა, ზოგჯერ ხასხასა წითელი საძილე ტომრიდან ამოძვრებოდა და პირდაპირ პლატფორმის კიდიდან შარდავდა. დიდი ოჯახი ჰყავდა, მრავალი კოლეგა. გულზიარი ადამიანი იყო, ყველანაირი ურთიერთობით ტკბებოდა – როგორც ოჯახურით, ისე მეგობრულითაც (სტუდენტებიც არ დაგვავიწყდეს, სტუდენტების უწყვეტი ნაკადი) – და მათ შესანიშნავად აწონასწორებდა.

მხოლოდ აქ, ზემოთ მიხვდა, რომ კვლავ არსებობდა დუმილის ძველებურად ძლიერი მიზიდულობა. თავს ისე გრძნობდა, თითქოს დიდი ხნის უნახავ მეგობარს შეხვდა.

– დარწმუნებული ხარ, რომ აქ გირჩევნია ყოფნა? – ჰკითხა ჰენრიმ გუშინ დილით, – გამიხარდება, თუკი ჩემთან ერთად წამოხვალ. გაპირდები, ფეხი არ დაგელდება.

– თავი დაანებე, – თქვა პიტმა, – მას აქ უფრო მოსწონს. ხომ ასეა, ჯოუნსი-ბიჭო?

– დაახლოებით, – მიუგო მან და აღარ განავრცო. არ უთქვამს, მაგალითად, როგორ მოსწონდა ეს ადგილი. ზოგიერთი რამ უახლოეს მეგობრებსაც არ გვინდა, გავუზიაროთ. თუმცა, ხშირად, უახლოესი მეგობრები ამას უსიტყვოდაც ხვდებიან.

– აი, რას გეტყვით, – თქვა ბივმა, ფანქრის ბოლო პირში ჩაიდლო და ღრღნა დაუწყო. ეს ნაცნობი, მათთვის ძვირფასი ჩვევა მას პირველი კლასიდან გამოჰყვა, – მომწონს, როდესაც უკან ვბრუნდებით და შენ აქ გვხვდები, ჰორნბლაუერზე<sup>26</sup> დაწერილი წიგნების პერსონაჟით ყვავის ბუდეში მოთვალთვალე. თვალი გეჭიროს და რაღაც ამგვარი.

– იალქანს ვხედავ! – აიტაცა ჯოუნსიმ და ყველას გაეცინა, მაგრამ მხოლოდ მან იცოდა, რა იგულისხმა ბივმა. გრძნობდა ამას. თვალი გეჭიროს. ფიქრებს მიეცი თავი, მაგრამ თვალი გეჭიროს გემებზე, ზვიგენებზე, ყველაფერზე, რაც კი გზად შეგხვდება.

თედოს ტკივილი კვლავ ახსენებს თავს, ხარახურით სავსე ზურგჩანთა ზურგს სტკენს. იგი ნელა, მოუხერხებლად ეშვება ხიდან. არა უშავს. სასაყვედურო არაფერი აქვს. ამქვეყნად ყველაფერი იცვლება, მაგრამ მხოლოდ სულელს სჯერა, რომ ამ ცვლილებებს კარგი არაფერი მოაქვს.

მაშინ თვითონაც ასე ფიქრობდა.

#### 4

როდესაც ტოტის შერხევის ხმა და მისი ჩამოტეხის მსუბუქი ტკაცუნის შემოესმა, – ირმის მოახლოების უტყუარი ნიშანი, – ჯოუნსის მამის სიტყვები გაახსენდა: „ილბალი თავისით მოდის. მას ძალით ვერ მოიყვან“. ლინდსი ჯოუნსი, ამქვეყნად წარუმატებლობისთვის გაჩენილი ადამიანი, ზოგჯერ მფრინავ ფრაზებს ამბობდა. ესეც მისი ერთ-ერთი გამონათქვამი იყო, რომელიც ფაქტით დასტურდებოდა: მას შემდეგ, რაც გადაწყვიტა ირემზე აღარ ენადირა, ნადავლი თავისი ფეხით მოიწვედა მისკენ. ხმის მიხედვით ზორბა, ადამიანისხელა ხარირემი უნდა ყოფილიყო.

---

<sup>26</sup> ინგლისელ მწერალ სესილ ფორესტერის (1899-1966) მოგონილი პერსონაჟი – ჰორაციო ჰორნბლაუერი, ბრიტანეთის სამეფო ფლოტის ოფიცერი. ფორესტერმა მას წიგნების მთელი სერია მიუძღვნა.

ჯოუნსი ვერაფრით წარმოიდგენდა, რომ ის ადამიანი აღმოჩნდებოდა – იმ მიყრუებულ ადგილას, რენგლის ჩრდილოეთით, ორმოცდაათ მთაზე, მონადირეთა უახლოეს ბანაკამდე არანაკლებ ორი საათის სავალზე, ერთადერთი მოხრეშილი გზაც კი, „გოსლინის“ მაღაზიისკენ რომ მიემართებოდა (შტატის საუკეთესო ლუდი, თანაც მომგებიანი!), თექვსმეტი მილით იყო დაშორებული.

რა გაეწყობა, – გაიფიქრა მან, – ბოლოს და ბოლოს, ხომ არ დამიფიცია.

არა, რა თქმა უნდა, არ დაუფიცია. მაგრამ მომავალ წელს, იარაღის ნაცვლად, სავარაუდოდ, „ნიკონის“ ფოტოაპარატს წამოიღებს, თუმცა, მანამდე დიდი დროა, „გარანდის“ ვინჩესტერი კი აქვე უდევს, გვერდით.

ჯოუნსიმ ყავის თერმოსს წითელი თავსახური ჩაახრახნა და განზე გადადო, შემდეგ საძილე ტომარა წინდასავით ჩაიწია, დაბუყებული თედოს ტკივილისგან ოდნავ შეიჭმუნა და ხელი თოფს სტაცა. ხმაურიანი გადატენა, ყურებდაცქვეტილ ირემს რომ დააფრთხოდა, არ დასჭირვებია, ხელი გაწაფული ჰქონდა – დამცველს მოხსნიდა თუ არა, იარაღი მზად იყო. ასეც მოიქცა, როდესაც ფეხზე მყარად დადგა. უწინდელ ველურ აღტყინებას აღარ გრძნობდა, მაჯისცემა მაინც გაუხშირდა, ეს სიამოვნებას ჰგვრიდა. უბედური შემთხვევის შემდეგ მსგავსი რეაქციის გამოვლინება ყოველთვის გულს უხარებდა. მასში თითქოს ორი ადამიანი სახლობდა: ერთი, რომელიც ავარიამდე უდარდელად დააბიჯებდა ქურჩა-ქურჩა, მეორე კი – ფრთხილი, ასაკში შესული ტიპი, რომელიც მასაჩუსეტსის საავადმყოფოში მოვიდა გონს, თუკი ასე დავარქმევთ ნარკოტიკების დახმარებით ცნობიერების დაბრუნებას. ზოგჯერ ახლაც ესმოდა ვილაცის ხმა (ეს მისი ხმა არ იყო), ის იძახდა: „შეწყვიტეთ, გთხოვთ... ამას ვერ გავუძლებ, ნემსი გამიკეთეთ... სად არის მარსი... მარსი მჭირდება“. ერვენებოდა, რომ ეს სიკვდილის ხმა იყო – სიკვდილის, რომელსაც ქურჩაში ას-

ცდა და რომელმაც საავადმყოფოში მიაკითხა დაწყებული საქმის დასამთავრებლად. სიკვდილს ტკივილისგან შეწუხებული მამაკაცის სახე მიეღო (იქნებ ქალისაც, ეს ძნელი გასარჩევი იყო), იმ ადამიანის სახე, მარსის რომ ეძახდა, თუმცა ჯოუნსის გულისხმობდა.

ეს აზრი გაუქრა, – ყველა სასაცილო აზრი გაუქრა, რომელიც საავადმყოფოში ეწვია, – თუმცა რაღაც მაინც დარჩა. ეს „რაღაც“ სიფრთხილე იყო. აღარ ახსოვდა, ჰენრიმ რომ დაურეკა და უთხრა, ფრთხილად იყავიო (ამას აღარც ჰენრი ახსენებდა), მაგრამ ჯოუნსი უკვე მეტ ყურადღებას უთმობდა თავს. სიფრთხილეს იჩინდა, რადგან სიკვდილი შესაძლოა, სადღაც ახლოს ყოფილიყო და ზოგჯერ მისი სახელიც წარმოეთქვა.

ეს ყველაფერი წარსულს ჩაჰბარდა. იგი გადარჩა სიკვდილთან ორთაბრძოლაში, ამ დილით კი სიკვდილი არავის ელოდა, მხოლოდ ირემს (მისი აზრით – ხარირემს), რომელიც საბედისწერო ადგილას აღმოჩნდა.

ტოტების ხმაური და ფიჩხის ტკაცუნის სამხრეთ-დასავლეთიდან მოდიოდა. ხის შემოვლა არ დასჭირდებოდა, რადგან ქარი მისკენ ქროდა. ასე უკეთესი იყო. ნეკერჩხალს ფოთლები თითქმის შემოძარცოდა, რაც ერთმანეთში გადახლართული ტოტებიდან მიზანში ამოღების კარგ, შესანიშნავ შესაძლებლობას აძლევდა. ჯოუნსიმ თოფი ასწია, მხარზე მჭიდროდ მიიბჯინა და სროლისთვის მოემზადა.

მაკარტი იმან გადაარჩინა, – დროებით მაინც, – რომ ჯოუნსის ნადირობის მიმართ ერთგვარი იმედგაცრუება დაუფლებოდა. სამაგიეროდ, ლამის სიცოცხლეს გამოასალმა იმ მოვლენამ, რასაც ჯოუნსის მამის მეგობარი ჯორჯ კილროი თვალის ციებ-ცხელებას უწოდებდა. „თვალის ციებ-ცხელება, სამონადირეო ციებ-ცხელების ერთგვარი ფორმაა და ნადირობის დროს დატრიალებული ტრაგედიების მეორე მიზეზი გახლავთ. პირველი მიზეზი კი სიმთვრალეა, – ამბობდა ჯორჯ კილროი, რომელსაც, ჯოუნსის მამის მსგავსად, ამ საქმეში რაღაც გაეგებოდა, – პირველი ყოველთვის სიმთვრალეა“.

კილროი ამბობდა, რომ თვალის ციებ-ცხელების ყველა მსხვერპლი ერთნაირად გამოხატავდა გაცელებას, როცა შეიტყობდა, რომ ტყვია ღობეს, ჩავლილ მანქანას, ფარდულს ან მის თანამგზავს (უფრო ხშირად ეს მეუღლე, ნათესავი ან ბავშვი იყო) მოხვდა. „მაგრამ მე ხომ დავინახე ნადირი“, – აპროტესტებდნენ ისინი. მათი უმრავლესობა, კილროის თქმით, სიცრუის დეტექტორსაც წარმატებით დასძლევდა, რადგან მართლა დაინახა ირემი, დათვი, მგელი ან როჭო მაინც, რომელიც შემოდგომის მაღალ ბალახში ფრაშფრაშებდა. საკუთარი თვალით ნახა.

კილროის აზრით, ამ მონადირეებს მოუთმენლობა იწირავდა – ჩვეულებრივ, მათ სურდათ, რაც შეიძლება სწრაფად გაესროლათ, გაუთავებელი ლოდინისთვის ბოლო მოეღოთ და დაძაბულობა მოეხსნათ. მღელვარება იმდენად დიდია, რომ ტვინი თვალის ნერვს სიგნალს გადასცემს და ადამიანი მართლაც ხედავს იმას, რისი დანახვაც სურს. სწორედ ეს არის თვალის ციებ-ცხელება. და თუმცა ჯოუნსი მშვიდად იყო, – თითები მაინც არ უთრთოდა, როდესაც თერმოსს თავსახურს ახრახნიდა, – მოგვიანებით აღიარა, რომ კინაღამ გადაჰყვა ამ დაავადებას.

წამით მკაფიოდ დაინახა ამაყი რქოსანი ერთმანეთში გადახლართული ტოტების უკან, ისევე მკაფიოდ დაინახა, როგორც წინა თექვსმეტი ირემი (ექვსი ფური და ათი ხარი) წლების განმავლობაში „კედელში გაკეთებულ ხვრელში“ რომ მოეყვანათ – ყავისფერი თავი, საიუველირო კოლოფში ჩაფენილი ხავერდით მუქი თვალეები, რქებიც კი.

– ესროლე! – შესძახა მისმა ნაწილმა, ალბათ უბედურ შემთხვევამდე არსებულმა ჯანმრთელმა და ბედნიერმა ჯოუნსიმ. ბოლო ხანს ის სულ უფრო ხშირად სწევდა თავს მაღლა, თითქოს იმ მისტიკურ მდგომარეობას უახლოვდებოდა, რომელსაც „სრულ გამოჯანმრთელებას“ უწოდებენ ადამიანები, მანქანის ბორბლებქვეშ რომ არას-

დროს მოხვედრილან. თუმცა არასდროს უყვირია ისე ხმაამალლა, როგორც ახლა. ეს ბრძანება იყო, თითქმის კივილი.

მისი თითი სასხლეტს მიადნა. და თუმცა აღარ გამოუკრავს, თითი მართლაც დაეჭიმა. ხმამ შეაჩერა. მეორე ჯოუნსის ხმამ, იმ ჯოუნსისამ, რომელიც გონზე მასაჩუსეტსის საავადმყოფოში მოვიდა ნარკოტიკებით გაჭყეპილი, ტკივილით გატანჯული; რომელიც დარწმუნებული არაფერში იყო, გარდა იმისა, რომ ვილაცას გაჩერებას სთხოვდა; ველარაფერს უძლებდა, თუ დაუყოვნებლივ ნემსს არ გაუკეთებდნენ; და რომელიც მარსის მოყვანას ითხოვდა.

– არა, ჯერ არა – მოიცადე, დაუკვირდი, – ახალმა, წინდახედულმა ჯოუნსიმ გააფრთხილა. და სწორედ მის ხმას დაემორჩილა. ადგილზე გაქვავდა, სიმძიმე მარცხენა, ჯანმრთელ ფეხზე გადაიტანა. თოფი კი შემართული ჰქონდა, ერთმანეთში გადახლართული ტოტების გვირაბში ზუსტად უმიზნებდა იდეალური ოცდათხუთმეტგრადუსიანი კუთხით.

სწორედ ამ დროს ჩამოცვივდა გათეთრებული ციდან თოვლის პირველი ფანტელი და ჯოუნსიმ ირმის კისერთან მკვეთრი ნარინჯისფერი ხაზი შენიშნა, თითქოს თოვლმა გაანათაო. ამჯერად მხედველობამ უღალატა და ლულის წინ გადღაბნილი საღებავების ლაქასავით გამოჩნდა. ყველაფერი გაქრა: აღარც ირემი ჩანდა, აღარც – ადამიანი, აღარც – ხეები; მხოლოდ – ერთმანეთში შერეული ყავისფერი, შავი და ნარინჯისფერი საღებავების მასა.

თანდათან ნარინჯისფერმა იმატა და ნაცნობი ფორმა მიიღო – კეპის, რომელსაც „ყურები“ აქვს, რომ არ შეგცვიდეს. ჩამოსულები მას ლ. ლ. ბინის<sup>27</sup> მაღაზიებში ორმოცდახუთ დოლარად ყიდულობენ. ეტიკეტს უცვლელი წარწერა ამშვენებს: „სიამაყით დამზადებული აშშ-ში უნიონ ლეიბორის<sup>28</sup> მიერ“. სხვათა შორის, ასეთივე ქუდები

---

<sup>27</sup> ფირმა, რომელიც მეთევზეებისა და მონადირეების ტანსაცმელს უშვებს.

<sup>28</sup> მუშათა პარტია.

„გოსლინში“ მხოლოდ შვიდი დოლარი ღირს. ეგაა, რომ წარწერა და-  
დადებს: „დამზადებულია ბანგლადეშში“.

კეპმა ყველაფერი თავზარდამცემ ფოკუსში მოაქცია – ო-ო, ღმერთო! ხარირმის თავი რომ ეგონა, დაბამბული ქურთუკი აღმოჩნდა, საიუველირო კოლოფის მუქი ხავერდი – ღილი, რქები – იმ ხის ტოტები, რომელზეც თვითონ იდგა.

უცნობის მხრიდან უგუნურება იყო (ჯოუნსის ძალიან უნდოდა, ამისთვის სიგიჟე ეწოდებინა) ტყეში ყავისფერი ქურთუკით სიარული, მაგრამ ჯოუნსი ჯერაც ვერ მიმხვდარიყო, როგორ მოხდა, რომ საბედისწერო შეცდომა კინალამ დაუშვა. კაცს ხომ ისეთივე ნარინჯისფერი კეპი ეხურა, არა? ხასხასა ნარინჯისფერი ჟილეტი კი მოუხერხებელ ყავისფერ ქურთუკზე ეცვა. მამაკაცის...

...მამაკაცის სიცოცხლე ბეწვზე ეკიდა. ბეწვზე.

ჯოუნსის თითქოს მეხი დაეცა და მისი სული და სხეული განაცალკევა. იმ საშინელ წამს, რომელიც სამუდამოდ ჩაებეჭდა მეხსიერებაში, იგი აღარ იყო ჯოუნსი ნომერი ერთი, თავდაჯერებული, მშვიდი, ავარიამდელი ჯოუნსი, არც ჯოუნსი ნომერი ორი იყო – უბედური შემთხვევის გაუბედავი მსხვერპლი, რომელმაც საკმარისი დრო გაატარა ფიზიკური დისკომფორტისა და გონებრივი ქაოსის მდგომარეობაში. იმწუთას ის სულ სხვა ჯოუნსად იქცა, უხილავ მოწმედ, რომელიც პლატფორმაზე მდგარ მონადირეს შესცქეროდა. ამ უკანასკნელს ჭაღარაშეპარული თმა მოკლედ შეეკრიჭა, პირის გარშემო ნაოჭები გასჩენოდა, ჩაცვივრულ ლოყებზე წვერი შავ წერტილებად მოუჩანდა. მონადირე საცაა, სასხლეტს თითს გამოჰკრავდა. თავზემთ თოვლის ფანტელები ცეკვავდა და შარვლიდან ამოჩაჩულ ფლანელის პერანგის კალთებზე ეშვებოდა. იგი მზად იყო, ნარინჯისფერ კეპსა და ისეთივე ჟილეტში გამოწყობილი კაცისთვის ესროლა. თვითონაც ასე ჩაიცვამდა, აქ რომ არ დარჩენილიყო და ბივერთან ერთად წასვლა გადაეწყვიტა.



მან საკუთარ სხეულში ყრუ ბრაგვანი მოადინა, აი, ისეთი, უსწორმასწორო გზაზე სწრაფად მიმავალი მანქანა მაღლა რომ აგაგდებთ და სავარძელზე დაგანარცხებთ. თავზარდაცემულმა გაიაზრა – ლულა კვლავაც უცნობისთვის მიეშვირა, თითქოს ტვინში ღრმად მოკალათებულ ალიგატორს არაფრით სურდა იმ აზრთან განშორება, რომ ყავისფერ ქურთუკში გამოწყობილი კაცი მისი ნადავლი იყო. უარესი კი ის გახლდათ, რომ ვერაფრით აიძულებდა თავს, სასხლეტიდან თითი აეღო. ამ კოშმარში მყოფს წამით მოეჩვენა კიდეც, რომ თითი შეუმჩნეველად აძლიერებდა დაწოლას და გარდაუვლად ამცირებდა მანძილს ცხოვრების უდიდეს შეცდომასთან. მოგვიანებით მიხვდა, რომ ეს იმ ილუზიას ჰგავდა, როდესაც უძრავ მანქანაში მჯდომი თვალს მოჰკრავ ჩავლილ ავტოს და თითქმის დარწმუნებული ხარ, რომ შენი მანქანა უკან მიგორავს.

არა, თითი მხოლოდ გაშეშდა, მაგრამ ესეც მეტისმეტი იყო, ნამდვილი ჯოჯოხეთი. „ჯოუნსი, შენ ძალიან ბევრს ფიქრობ“, – უთხრა პიტმა, როდესაც კიდეც ერთხელ წამოადგა თავზე სიცარიელეს მიშტერებულ მეგობარს, რომელიც გარშემო ველარავის ამჩნევდა. ეს, ალბათ, ნიშნავდა: „ჯოუნსი, ძალიან მდიდარი წარმოსახვა გაქვს“. და ეს, სავარაუდოდ, სიმართლე იყო. მართლაც მდიდარი წარმოსახვა ჰქონდა, განსაკუთრებით ახლა, როდესაც ხეზე იდგა, სეზონის პირველი თოვლის ქვეშ, თმა შუბლზე მიჰკვროდა, თითი სასხლეტზე მისწებებოდა – აღარც ეძახებოდა, რისიც ასე ეშინოდა, და აღარც უდუნდებოდა. აი, კაცი თითქმის გაუსწორდა – „გარანდის“ სამიზნეში მისი ნარინჯისფერი კეპი მოექცა. ადამიანის სიცოცხლე თოფის ლულასა და იმ კეპს შორის გაბმულ უნილავ ბეწვზე ჰკიდია. ის კი არაფერს ეჭვობს, შესაძლოა, მანქანის გაყიდვაზე ფიქრობდეს, ან იმაზე, როგორ უღალატოს ცოლს ისე, რომ მან ვერაფერი შეიტყოს, ან – უფროსი ქალიშვილისთვის პონის ყიდვაზე (მოგვიანებით, ჯოუნსიმ შეიტყო, რომ მაკარტი მსგავსს არაფერს ფიქრობდა, მაგრამ საიდან უნდა სცოდნოდა ეს, როდესაც სასხლეტზე მიდებული თითი

უდრეკ ხვიად გადაჰქცეოდა). მან ახლაც არ იცოდა, რაც ჯოუნსის-თვისაც უცნობი იყო, როცა ის კემბრიჯში ტროტუარის კიდეზე იდგა, პორტფელით ხელში და გაზეთ „ბოსტონ ფენიქსით“ – ილიაში. არ იცოდა, რომ სიკვდილი ახლოს იყო. უბრალო სიკვდილი კი არა, მისი უდიდებულესობა სიკვდილი, აჩქარებული ფიგურა, როგორც ინგმარ ბერგმანის<sup>29</sup> ადრეული ფილმიდან გადმომხტარი არსება, რომელიც უხეში მოსასხამის ქვეშ მკვლელობის იარაღს მალავს. მაკრატიელს. ან სკალპელს.

ყველაზე ცუდი კი ის იყო, რომ კაცი არ მოკვდებოდა, ყოველ შემთხვევაში, მყისიერად მაინც. დაეცემოდა და მიწაზე გორიალსა და ყვირილს დაიწყებდა, როგორც ეს ჯოუნსიმ გააკეთა ქუჩაში. მართალია, არ ახსოვდა, მაგრამ, რასაკვირველია, ასე მოხდა; ამის შესახებ მოგვიანებით უამბეს და მიზეზი არ ჰქონდა, არ დაეფერებინა. ალბათ უკანასკნელი სიტყვებით ილანძღებოდა. რა მოხდებოდა, ყავისფერ ქურთუკსა და ნარინჯისფერ აქსესუარებში გამოწყობილ კაცს, მარსისთვის რომ ეხმო? რა თქმა უნდა, სინამდვილეში არა, მაგრამ ჯოუნსის ტვინში, შესაძლოა, მაინც გაისმას მარსის სახელი. თუკი მას თვალების ციებ-ცხელება დაემართა და ყავისფერი ქურთუკი ირმის თავი ეგონა, სმენითი ჰალუცინაციაც არ გამოირიცხება. გაიგონებ მის ყვირილს და იფიქრებ, რომ ყველაფერი შენ გამო ხდება... ღმერთო დიდებულო, არა! თითი კი სასხლეტს მაინც არაფრით შორდებოდა.

დროებითი დამბლიდან იგი უბრალო და მოულოდნელმა მოვლენამ გამოიყვანა: ყავისფერქურთუკიანი უცნობი ჯოუნსის ხის ფესვიდან ათიოდ ნაბიჯში დაეცა. ჯოუნსის მისი ტკივილით აღსავსე და გაოცებული შეძახილი მოესმა: უუხ! და თითი თავისით მოსცილდა სასხლეტს.

კაცი ოთხზე იდგა. ყავისფერ ხელთათმანებში გაყრილი მისი თითები (ყავისფერი ხელთათმანები კიდეც ერთი შეცდომაა, – გაიფიქ-

რა ჯოუნსიმ, – ამ ტიპს ასეთივე წარმატებით შეეძლო, ზურგზე ფირფიტა ჩამოეკიდებინა, წარწერით „მესროლეთ“) შეეთერებულ მიწას ფხოჭნიდა. კაცი რის ვაი-ვაგლახით წამოდგა და ხმამაღლა, მაგრამ გაუგებრად და გაღიზიანებით ჩაიბურტყუნა რაღაც.

– ოჰ, ღმერთო, ოჰ, ღმერთო, – გაიმეორა მან და მთვრალივით შექანდა. ჯოუნსიმ იცოდა, რომ მამაკაცები, რომლებიც მთელი კვირის განმავლობაში ან თუნდაც შაბათ-კვირა სახლიდან შორს აღმოჩნდებიან ხოლმე, პატარა სისუსტეების გამომჟღავნებას იწყებენ, უფრო ხშირად, დილიდანვე თვრებიან. მაგრამ ჯოუნსის რატომღაც მოეჩვენა, რომ უცნობი მთვრალი არ იყო. აბა, საიდან უნდა სცოდნოდა, მაგრამ ინტუიცია კარნახობდა.

– ოჰ, ღმერთო, ოჰ, ღმერთო, ოჰ, ღმერთო, – იმეორებდა კაცი და გზას განაგრძობდა, – თოვლი. ახლა თოვს კიდევ. გთხოვ, ღმერთო, ოჰ, ღმერთო, ახლა თოვს კიდევ, ღმერთო.

თავიდან ბორძიკით, გაუბედავად მიდიოდა და ჯოუნსიმ თითქმის დაასკვნა, რომ ინტუიციამ უღალატა, მაგრამ მალე კაცმა სიარული გამოასწორა, თან ხელით მარჯვენა ლოყას იფხეკდა.

მან ზუსტად ჯოუნსის ხის ქვეშ გაიარა და წამით ადამიანიდან ნარინჯისფერ წრედ იქცა, რომელსაც ორივე მხრიდან ყავისფერი შვერილები ჰქონდა. თანდათან მიწყდა ქსუტუნით, ცრემლნარევი ხმით წარმოთქმული სიტყვები: ოჰ, ღმერთო, ღმერთო, ახლა თოვს კიდევ.

ჯოუნსი გაუნძრევლად იდგა, უყურებდა, როგორ გაიარა მან პლატფორმის ქვეშ და მეორე მხრიდან გამოჩნდა. ჯოუნსი მიტრიალდა, თვითონაც არ იცოდა – რატომ და კოჭლობით მიმავალ უცნობს თვალი გააყოლა. გაუცნობიერებლად თოფიც დამცველით ჩაკეტა და დაბლა დაუშვა.

გასაგები მიზეზის გამო, კაცისთვის არ დაუძახია – სინდისი ქენჯნიდა. ეშინოდა, – ვაითუ, უცნობმა შეხედვისთანავე ამოიკითხო სიმართლე ჩემს თვალებში და მიხვდეს, ტყუილად არ ვიდექი მალლა თოფით ხელში და კინალამ მოვკალიო.

ხიდან ოციოდე ნაბიჯში უცნობი შეჩერდა და გაქვავდა, თან მარჯვენა ხელი შუბლთან მიიტანა თოვლისგან თვალების დასაცავად. ჯოუნსიმ გაიფიქრა, რომ კაცმა „კედელში გაკეთებული ხვრელი“ დაინახა. როგორც ჩანს, მიხვდა, რომ გზა სწორედ აქ გადიოდა. ოჰ, ღმერთოს ძახილი შეწყდა და კაცი გენერატორების ხმისკენ გაიქცა, თან ისე ქანაობდა, როგორც შტორმის დროს გემბანზე გასული ნასვამი მეზღვაური. ჯოუნსის უცნობის დაძაბული, ნაწყვეტ-ნაწყვეტი სუნთქვა ესმოდა. იგი მყუდრო სამონადირეო სახლისკენ მიეშურებოდა, რომლის სახურავის თავზე ზარმაცად ჩნდებოდა და მაშინვე ჰაერში იფანტებოდა კვამლის რგოლები.

ჯოუნსი ფრთხილად შეუდგა ნეკერჩხლიდან დაბლა დაშვებას, თოფი მხარზე გადაიკიდა. მაშინ აზრადაც არ მოსვლია, რომ მას და მის მეგობრებს უცნობისგან თავი შორს უნდა დაეჭირათ. უბრალოდ „გარანდის“, ამ მშვენიერი იარაღის თოვლში დაგდება არ უნდოდა. თედო კვლავ დაუბუჟდა. სანამ ხიდან ჩამოძვრა, კაცი, რომელიც კინალამ მოკლა, უკვე სამონადირეო სახლის კართან იდგა. კარი, რა თქმა უნდა, ღია იყო. იმ მიყრუებულ ადგილას მისი დაკეტვა, აბა, ვის მოაფიქრდებოდა?

## 5

ათიოდე ფუტში გრანიტის ფილამდე, რომელიც სახლის, ეგრეთ წოდებული „კედელში გაკეთებული ხვრელის“ ზღურბლს წარმოადგენდა, ნარინჯისფერკეპიანი მამაკაცი ისევ დაეცა. კეპი გვერდზე გადავარდა და გაოფლილი, შეთხელებული წაბლისფერი თმა გამოაჩინა. რამდენიმე წამს თავდახრილი ცალ მუხლზე იდგა. ჯოუნსის კვლავ მოესმა მისი ძძიმე, ნაწყვეტ-ნაწყვეტი სუნთქვა.

შემდეგ კაცმა კეპი ისევ დაიხურა. სწორედ ამ დროს წამოეწია ჯოუნსი.

უცნობი წამოდგა და უხერხულად შემოტრიალდა. ჯოუნსის თვალში ეცა ზედმეტად წაგრძელებული სახე, როგორსაც ხალხი

ცხენისას ამსგავსებს. როდესაც მას მიუახლოვდა, ჯოუნსი აღარ კოჭლობდა, მხოლოდ ოდნავ ეყრდნობოდა ნაავადმყოფარ ფეხს და ეს კარგი იყო, რადგან მშრალ თოვლზე ფეხი სხლტოდა, – მიახლოებისას აღმოაჩინა, რომ ცდებოდა. კაცს, უბრალოდ, ძალზე შეშინებული და მკვდარივით გაფითრებული სახე ჰქონდა. ლოყაზე, სადაც ფრჩხილებს გაევლო, წითელი ლაქა აჩნდა. ჯოუნსის დანახვაზე კაცმა ხმამაღლა და შვებით ამოისუნთქა. ჯოუნსის კინალამ გაეცინა, როცა გაახსენდა, როგორ იდგა პლატფორმაზე და წუხდა, უცნობმა ჩემს თვალებში სიმართლე არ ამოიკითხოსო. კაცს ნათელმხილველობის არაფერი ეტყობოდა და არც ის აინტერესებდა, საიდან გაჩნდა ან რას აკეთებდა იქ ჯოუნსი. ისეთი სახე ჰქონდა, გეგონებოდათ, საცაა, კისერზე ჩამოეკიდება და დაკოცნისო.

– მადლობა ღმერთს! – შესძახა კაცმა და ჯოუნსის ხელი გაუწოდა, თან ახალდადებულ, მოყინულ თოვლზე ფეხს ინაცვლებდა, – ოჰ, მადლობა ღმერთს! უნდა გითხრათ, რომ დავიკარგე და გუშინდელი საღამოს აქეთ ტყეში დავხეტივალე, მეგონა, გავიყინებოდი... მე... მე...

მას ფეხი დაუცდა, მაგრამ ჯოუნსიმ დროულად სტაცა მხარში ხელი. ჯოუნსის სიმაღლე ექვსი ფუტი და ორი დუიმი იყო, კაცი კი ნამდვილი ანმახი გახლდათ, უფრო მხარბეჭიანიც. ჯოუნსის მისი დანახვისას უწონადობის შთაბეჭდილება შეექმნა, თითქოს შიშს შიგნიდან გამოეჭამა იგი და ბაბუაწვერას სიმსუბუქე მიეცა.

– ფრთხილად, მეგობარო, – უთხრა ჯოუნსიმ, – მშვიდად. ყველაფერი დამთავრდა. სამშვიდობოს ხართ. აჯობებს, ოთახში შეგიყვანოთ და სითბოში დაგსვათ, რას იტყვით?

„სითბოს“ გაგონებაზე კაცს კბილები ისე აუკაწკაწდა, თითქოს ბრძანება მიეღოს.

– რა-რა თქმა უნდა...

გალიმება სცადა, მაგრამ ვერ მოახერხა. ჯოუნსი ისევ განაცვიფრა მისმა არაბუნებრივმა სიფერმკრთალებმ. ცივი დილა იდგა, ოც

გრადუსზე ნაკლები არ იქნებოდა, მაგრამ უცნობის ლოყები ტყვიისგან ჩამოსხმულსა და ნაცარმიყრილს ჰგავდა. ერთადერთი ფერადი ლაქა მთელ სახეზე, წითელი განაკაწრის გამოკლებით, ჩაშავებული უპეები იყო. ჯოუნსიმ კაცს მხრებზე ხელი მოხვია და მოულოდნელად მისდამი აუხსნელი სინაზე იგრძნო – ისეთივე ძლიერი ემოცია, როგორც პირველი სიყვარულია სკოლაში... მარი ჯო მარტინო: მოკლე ვარცხნილობა, უსახელო თეთრი ბლუზა და მუხლებამდე ჯინსის ქვედაბოლო. ჯოუნსი ახლა აბსოლუტურად დარწმუნებული იყო, რომ კაცს სიმთვრალის არაფერი ეცხო და შიშისგან (და დაღლილობისგანაც) ქანაობდა. თუმცა პირიდან მაინც ამოსდიოდა რაღაცის სუნი... იქნებ ბანანის... რატომღაც ეთერს რომ აგონებდა, რომელსაც ზამთრის სუსხიან დილას თავისი პირველი მანქანის, ვიეტნამის დროინდელი „ფორდის“ დასაქოქად, კარბიურატორში ასხურებდა ხოლმე.

– შიგნით შევიდეთ, კარგი?

– დიახ. ც-ცივა. მაღლობა ღმერთს, რომ შეგხვდით. ეს...

– ჩემი სახლია? არა, ჩემი მეგობრისაა.

ჯოუნსიმ მუხის ხის მუქი კარი შეაღო და კაცს ზღურბლზე გადებიჯებაში დაესმარა. სახეში თბილი ჰაერი ეცათ და უცნობმა მოულოდნელობისგან შეჰყვირა კიდევ. ლოყები თანდათან გაუვარდისფრდა. ჯოუნსის გულზე მოეშვა, როცა აღმოაჩინა, რომ მის სხეულში სისხლი კიდევ მოძრაობდა.

## 6

„კედელში გაკეთებული ხვრელი“ მშვენივრად ასრულებდა ტყეში ჩადგმული სახლის ფუნქციას. შიგ მესვლისთანავე პირველი სართულის ერთადერთ უზარმაზარ ოთახში აღმოჩნდებოდით – ეს სასადილო და სასტუმრო ოთახებისა და სამზარეულოს ერთგვარი კომბინაცია იყო. უკნიდან ორი საძინებელი მიეშენებინათ, ერთიც მალლა, სახურავის ქვეშ მდებარეობდა. დიდი ოთახი ფიჭვის სასიამოვნო

სურნელითა და ნაზი, მოყვითალო ნათებით გამოირჩეოდა. იატაკზე ნავაპოს ხალიჩა ეფინა, კედელს მიკმაკის ტომის გულადი მონადირეების გამოსახულება ამშვენებდა, უკანა თათებზე შემდგარ უზარმაზარ დათვს რომ შემოხვეოდნენ. მუხის უბრალო, საკმაოდ გრძელი, რვა კაცზე გათვლილი მაგიდა სასადილო ოთახს მიეკუთვნებოდა. სამზარეულოში შეშის ღუმელი იდგა, სასტუმროში – ბუხარი და როდესაც ორივე ენთო, კაცი სიცხისგან დაიხრჩვებოდა, თუნდაც გარეთ მინუს ოცი გრადუსი ყოფილიყო. დასავლეთით სახლს დიდი ფანჯარა ჰქონდა, საიდანაც დამრეცი ფერდობი მოჩანდა. სამოცდაათიან წლებში იქ დიდი ხანძარი გაჩნდა და მკვდარი, დაგრეხილი ხეები კვლავაც შავად ანათებდა თეთრი თოვლის საბურვლიდან. ჯოუნსიმ, პიტმა, ჰენრიმ და ბივმა იმ ადგილს „ხეობა“ შეარქვეს, რადგან სწორედ ასე უწოდებდნენ მას ბივის მამა და მისი მეგობრები.

– მადლობა ღმერთს, მადლობა ღმერთს, თქვენც გმადლობთ, – უთხრა ნარინჯისფერკეპიანმა კაცმა ჯოუნსის და როდესაც მადლიერების ამ ნაკადმა მასპინძელს ღიმილი მოჰგვარა, უცნობმა გამყინავად გაიცინა, თითქოს ამბობდა: „მესმის, რომ სასაცილოა, მაგრამ სხვაგვარად არ შემიძლია“.

მან ღრმად დაიწყო სუნთქვა და იმ გურუებს დაემსგავსა, ხშირად რომ უჩვენებენ საკაბელო ტელევიზიით. ყოველ ამოსუნთქვაზე მორიგ ფრაზას ამბობდა.

– ღმერთო, წუხელ მართლა მეგონა, რომ ვერ გადავრჩებოდი... ძალიან ციოდა... ჰაერში ნესტი იგრძნობოდა, ეს მახსოვს... მახსოვს, ვფიქრობდი, ოჰ, ღმერთო, ამას თუ კიდევ თოვაც დაემატება-მეთქი... ხველა ამიტყდა და ველარ ვჩერდებოდი... ბურქებში რაღაც მოძრაობდა და მივხვდი, რომ ხველა უნდა შემეწყვიტა, რადგან დათვი რომ ყოფილიყო ან რაიმე... ხომ გესმით... მისი გაღიზიანება... ხველას ვერაფერი მოვუხერხე, ის კი... ადგა და სადღაც წავიდა...

– ღამით დათვი ნახეთ?

ჯოუნსი აღფრთოვანებულიც იყო და განცვიფრებულიც. გაეგონა, რომ ამ მხარეში დათვი იცოდა, – ბებერ გოსლინსა და მის ლოთ ამხანაგებს უყვარდათ დათვის შესახებ მოყოლა, განსაკუთრებით ჩამოსულებსთვის, – მაგრამ იმის გაფიქრებაც კი, რომ ეს საცოდავი, გზააბნეული კაცი ღამით იმ საშინელებას გადააწყდა, ჟრუანტელს ჰგვრიდა. ეს იგივე იყო, მეზღვაურის მონათხრობი მოგესმინათ, თუ როგორ შეეჩინა გემი ზღვის ურჩხულს.

– არ ვიცი, რა იყო, – თქვა კაცმა და უეცრად ჯოუნსის ისე ეშმაკურად შეხედა, რომ ეს უკანასკნელი ღამის ცუდად გახდა, – დაზუსტებით ვერაფერს მოგახსენებთ, რადგან იმ დროისთვის აღარ ელაგდა.

– ელვაც იყო? აი, ეს მესმის!

უცნობის საცოდავი შესახედაობა რომ არა, ჯოუნსი აუცილებლად დაეჭვდებოდა, ხომ არ მასუღელებსო. თუმცა, სიმართლე ითქვას, რაღაც ამგვარი მაინც იგრძნო.

– მშრალ ელვას ვგულისხმობ, – განმარტა უცნობმა და ჯოუნსიმ თითქმის დაინახა, როგორ აიჩინა მან მხრები, შემდეგ კი ლოყაზე წითელი ლაქა მოიფხანა, რაც, შესაძლოა, მსუბუქი მოყინვის შედეგი იყო, – ზამთარში ამგვარი ელვა ქარიშხლის მომასწავებელია.

– და თქვენ ის ნახეთ? წუხელ?

– ვფიქრობ, კი, – კაცმა კვლავ აღმაცერად გახედა ჯოუნსის, მაგრამ ამჯერად მასში მზაკვრობის ნასახიც არ იგრძნობოდა და ჯოუნსიმ გაიფიქრა, – ალბათ მომეჩვენაო. მის თვალებში არაფერი იყო, დაღლილობის გარდა, – თავში ყველაფერი მერევა... რაც დავიკარგე, მას შემდეგ მუცელი გამუდმებით მტკივა... ის ყოველთვის მტკივა, როდესაც... მეშინია... ჯერ კიდევ ბავშვობიდან...

მართლაც პატარა ბავშვს ჰგავს, – გაიფიქრა ჯოუნსიმ, – ისე მოურიდებლად ათვალეირებს აქაურობას, თითქოს საკუთარ სახლში იყოს.



მან უცნობი ბუხრის წინ მდგარი ღივნიკენ წაიყვანა. კაცი მის ნებას დაჰყვა. მესინია. მან „მესინია“ თქვა მეშინიას ნაცვლად. როგორც ბავშვმა. პატარა ბავშვმა.

– ქურთუკს გამოგართმევთ, – თქვა ჯოუნსიმ და როდესაც კაცმა ღილების შეხსნა დაიწყო, მერე კი ხელი ელვაშესაკრავისკენ წაიღო, ჯოუნსის კვლავ გაახსენდა, როგორ მიაძმგავსა იგი ირემს – ხარი-რემს, შეცდა, ღილი თვალი ეგონა და კინალამ ტყვია ჩააჭედა შუბლში.

კაცმა ელვაშესაკრავი ნახევრამდე ჩასწია, შემდეგ კი გაეჭედა – ველარც ქვევით მიჰყავდა, ველარც – ზევით. შეხედა მას, უფრო სწორად, მიაშტერდა, თითქოს მსგავსი არაფერი ენახა. როდესაც ჯოუნსიმ დახმარება გადაწყვიტა, ხელები უღონოდ დაუშვა და თავისუფლად მოქმედების შესაძლებლობა მისცა. პირველკლასელს ჰგავდა, კალოშების ჩაცმის დროს მარჯვენა და მარცხენა ერთმანეთში რომ აერია, ან ყაკეტი უკუღმა გადაიცვა, და ახლა მასწავლებლის დახმარებას რომ ელის.

ჯოუნსიმ ელვაშესაკრავი კვლავ აამუშავა და ბოლომდე გახსნა. ფანჯრის მიღმა ხეობა თანდათან ქრებოდა, თუმცა ხეების დაგრებილი შავი სილუეტები ჯერაც მოჩანდა.

პირველად აქ სანადიროდ თითქმის ოცდახუთი წლის წინ შეიკრიბნენ და მას შემდეგ ყოველ წელს მოდიოდნენ, ერთიც არ გაუცდენიათ, მაგრამ ასეთი უხვი თოვლი არასდროს ყოფილა. მოულოდნელი, ხვავრიელი თოვა სერიოზული მოვლენაა. როგორც ჩანს, ამიერიდან ყველაფერი შეიცვლება, თუმცა, ვინ იცის? ჩვენს დროში რადიოსა და ტელევიზიის მყვირალა წამყვანები ოთხდუმიდან ახლად მოსულ პუდრს სტიქიურ უბედურებას, ახალ გამყინვარებას უწოდებენ.

კაცი კვლავ გაუნძრევლად იდგა შეხსნილი ქურთუკითა და თოვლიანი ჩექმით, რომლის ირგვლივაც გაპრიალებულ ხის იატაკზე უკ-

ვე გუბე დამდგარიყო, თვითონ კი ჭერში გადებულ კოჭებს პირდა-  
დებული მისჩერებოდა. ექვსი წლის გოლიათს ჰგავდა – ან დადიტს.  
თითქოს სადაცაა სახელოებიდან რეზინზე დამაგრებული ხელთათ-  
მანები უნდა გამოსჩროდა. ქურთუკიც ბავშვივით გაინადა – მხრები  
შეათამაშა და ისიც ძირს ჩამოცურდა. ჯოუნსის რომ არ ეტაცა ხელი,  
იატაკზე დავარდებოდა, პირდაპირ გუბეში.

– ეს რა არის? – იკითხა უცნობმა.

თავდაპირველად ჯოუნსი ვერ მიხვდა, რას გულისხმობდა კაცი,  
მაგრამ მის მზერას თვალი რომ გააყოლა, ცენტრალური კოჭიდან ჩა-  
მოშვებული, ერთმანეთში გადახლართული წითელი, მწვანე და ში-  
გადაშიგ ჭყეტილა ყვითელი ფერის ძაფები დაინახა – ობობას ქსელს  
ჰგავდა.

– ეს სიზმართმჭერია, – თქვა ჯოუნსიმ, – ინდიელთა ავგაროზი.  
როგორც ამბობენ, კოშმარებს აფრთხობს.

– თქვენია?

ჯოუნსი ვერც ამჯერად მიხვდა, შეკითხვა სახლს შეეხებოდა (იქ-  
ნებ უცნობმა მისი ნათქვამი ვერ გაიგონა), თუ ავგაროზს, მაგრამ  
ორივე შემთხვევას ერთი და იგივე პასუხი ერგებოდა:

– არა, ჩემი მეგობრის. აქ ყოველ წელს სანადიროდ ჩამოვდი-  
ვართ.

– რამდენი ხართ?

კაცი კანკალებდა, მკლავები ერთმანეთზე შემოეჭდო და ყურად-  
ღებით აკვირდებოდა, როგორ ჰკიდებდა ჯოუნსი მის ქურთუკს კარ-  
ზე მიმაგრებულ კაჩხაზე.

– ოთხნი. ბივერი – ეს მისი სახლია – ტყეშია. არ ვიცი, თოვლი  
აქეთ თუ გამოაგდებს. შესაძლოა, ასეც მოხდეს. პიტი და ჰენრი კი  
მალაზიაში წავიდნენ.

– ალბათ, გოსლინთან, არა?

– ჰო. წამოდით, დივანზე დაჯექით.

ჯოუნსიმ უჩვეულოდ გრძელი, სექციებად დაყოფილი დივნისკენ

წაიყვანა. ასეთი ავეჯი მოდიდან ათწლეულების წინ გადავიდა, მაგრამ ეს ისევ ყოჩაღად იდგა და არც ჭია უჩნდებოდა და არც სხვა მსგავსი სისაძაგლე. ამ „ხვრელში“ მოდასა და გემოვნებას დიდ მნიშვნელობას არ ანიჭებდნენ.

– შეეცადეთ, გათბეთ, – თქვა ჯოუნსიმ და უცნობი მარტო დატოვა. კაცი საცოდავად იჯდა, მობუზული კანკალებდა და ხელები მუხლებს შორის მოექცია. ჯინსის შარვალი შრებოდა და ალაგ-ალაგ იფუყებოდა, რაც მოწმობდა, რომ მის ქვეშ გრძელი საცვალი ეცვა. კაცი, როგორც ჩანს, გვარიანად გათოშილიყო. სითბომ კი სახის ფერი საგრძნობლად შეუცვალა – თუ აღრე მიცვალებულს ჰგავდა, ახლა დიფთერიის მსხვერპლს დამსგავსებოდა.

პიტსა და ჰენრის ქვევით მდებარე ორი საძინებლიდან შედარებით დიდში ეძინათ ხოლმე. ჯოუნსი იმ ოთახში შევიდა და კარის მარცხნივ მდგარი კვიპაროსის ხის სკივრიდან დაკეცილი საბანი ამოიღო. შემდეგ ბუნრისკენ გაეშურა, უცნობი ისევ ცახცახებდა. თავში გაუელვა, ელემენტარული შეკითხვებიც არ დაუსვამს, ისეთი, ექვსი წლის ბავშვიც რომ მოახერხებდა, თუნდაც ელვაშესაკრავის ხმარება არ სცოდნოდა.

ჯოუნსიმ კაცს საბანი მოახურა და ჰკითხა:

– რა გქვიათ?

თუმცა მაშინვე გაიფიქრა, რომ პასუხი თითქმის იცოდა. მაკოი? მაკანი?

კაცმა, რომელიც ჯოუნსიმ კინალამ მოკლა, საბანი მჭიდროდ შემოიხვია და ჯოუნსის შეხედა. ჩაშავებულ უპეებზე იისფერი დაედო.

– მაკარტი, რიჩარდ მაკარტი, – თქვა მან და ხელი, რომელიც უხელთათმნოდ საოცრად ფუმფულა და თეთრი მოჩანდა, საბნიდან დამფრთხალი ცხოველივით გამოაძვრინა, – თქვენ?

– გარი ჯოუნსი, – მიუგო მასპინძელმა და რბილ ხელისგულს ის თითები შეაგება, კინალამ სასხლეტს რომ გამოჰკრა, – მეგობრებისთვის ჯოუნსი.

- გმადლობ, ჯოუნსი, - მაკარტიმ მას მადლიერებით აღსავსე მზერა მიაპყრო, - თქვენ მე სიცოცხლე შემინარჩუნეთ.

- ოჰ, ამის შესახებ არაფერი ვიცი, - თქვა ჯოუნსიმ და კვლავ წითელ ლაქას შეავლო თვალი. უდავოდ მოყინვას ჰგავდა. მცირე მოყინვას.

# თავი მეორე

## ბივი

1

– ალბათ ხვდებით, რომ ვერავის დავურეკავ, არა? – თქვა ჯოუნსიმ, – ახლომახლო ტელეფონი არსადაა. აქ მხოლოდ გენერატორი გვაქვს ღენის მისაღებად, მეტი არაფერი.

თავიდან ფეხებამდე საბანში გახვეულმა მაკარტიმ თავი დაუქნია.

– გუგუნი მესმოდა, მაგრამ როდესაც გზააბნეული დადიხარ, სმენა გატყუებს. გეჩვენება, რომ ხმა მარცხნიდან ან მარჯვნიდან მოდის, შემდეგ კი მზად ხარ, დაიფიცო, რომ უკნიდან გესმის და იქით ამჯობინებ წასვლას.

ჯოუნსიმ თავი დაუქნია, თან გაიფიქრა, რომ ამის შესახებ არაფერი იცოდა. იგი არასდროს დაკარგულა, თუ იმ უბედური შემთხვევის შემდგომ რამდენიმე დღეს არ ჩათვლიდა, ნარკოტიკებითა და ტკივილით გაბრუებულმა რომ გაატარა.

– ვცდილობ, მოვიფიქრო, როგორ მოვიქცეთ, – თქვა ჯოუნსიმ, –

პიტი და ჰენრი რომ დაბრუნდებიან, ალბათ გაგაცილებთ. რამდენი კაცი იყო თქვენს ჯგუფში?

თავდაპირველად მაკარტი თითქოს ვერც მიხვდა, რას ეკითხებოდნენ. ამან და მისმა ბარბაცმა ჯოუნსი დაარწმუნა, რომ კაცი შოკში იყო. აინტერესებდა, შეიძლებოდა თუ არა ამგვარი რამ ტყეში გატარებული ერთადერთი ღამის შემდეგ დამართოდა, და რას მოიმოქმედებდა, მის ადგილზე რომ ყოფილიყო.

– ოთხი, – მიუგო მაკარტიმ წუთიერი დაფიქრების შემდეგ, – თქვენსავით. მეგობართან, სტივ ოტისთან ერთად ვიყავი. ისიც ადვოკატია, ჩემსავით, სქოუჰეგანიდან. ოთხივენი იქიდან ვართ. მინდა გითხრათ, რომ ეს კვირა ჩვენთვის... მეტად მნიშვნელოვანია.

– მესმის, – ღიმილით დაუქნია თავი ჯოუნსიმ, – ისევე, როგორც ჩვენთვის.

– ასეა თუ ისე, ჩანს, ჩაფიქრებული მივდიოდი და გზას ავცდი, – მან თავი გადააქნია, – არ ვიცი, ეს როგორ მოხდა. სტივის ხმა მესმოდა, დროდადრო ხეებს შორის მის ჟილეტს ვხედავდი კიდეც, მერე კი... არ ვიცი. ალბათ ფიქრებმა გამიტაცა... ტყე ამისთვის შესაფერისი ადგილია. როცა გამოვერკვიე, ამ მიყრუებულ ადგილას აღმოვჩნდი. თავდაპირველად დავაპირე, საკუთარ ნაკვალევს უკან გავყოლოდი, მაგრამ უკვე ბნელოდა, – მან კვლავ გადააქნია თავი, – თავგზა მაქვს აბნეული. დიახ, ოთხნი ვიყავით. ეს ერთადერთია, რაშიც დარწმუნებული ვარ – მე, სტივი, ნეთ როუპერი და ნეთის და, ბეკი.

– ახლა ისინი, ალბათ, ძალიან ნერვიულობენ.

ამ სიტყვებზე მაკარტი დაიბნა და მოიღღუშა – ასეთი მარტივი ჭეშმარიტება არც კი გახსენებია.

– დიახ... ალბათ. რა თქმა უნდა! ოჰ, ღმერთო, ღმერთო!

ჯოუნსიმ ღიმილი ძლივს შეიკავა. ამგვარ მდგომარეობაში მყოფი მაკარტი საოცრად აგონებდა პერსონაჟს ფილმიდან „ფარგო“<sup>29</sup>.

– ამიტომაც აჯობებს, დაგაბრუნოთ. თუ ეს...

---

<sup>29</sup> ძმები კონენების მძაფრსიუჟეტიანი, კომედიური ჟანრის ფილმი (1996)

– არ მინდა, ტვირთად დაგაწვეთ...

– წაგიყვანთ. თუ შევძლებთ. თუკი ამინდი დაგვაცდის.

– ამინდი! – მწარედ წარმოთქვა მაკარტიმ, – თითქოს თანამგზავრებიც აქვთ, დოპლერის რადარებიც – რა უდგას წინ ზუსტი პროგნოზის გაკეთებას? მაგრამ არა! ინებეთ „სეზონური აცვივება“. როგორ მოგწონთ!

ჯოუნსი გაოცებით მიაჩერდა მაკარტის გაწითლებულ სახეს, შუბლზე მიკრული შეთხელებული წაბლისფერი თმა რომ ამშვენებდა. ამინდის პროგნოზი თვითონაც მოისმინა – მასთან ერთად პიტმაც, ჰენრიმაც და ბივმაც. აფრთხილებდნენ, რომ უახლოეს დღეებში თოვა იყო მოსალოდნელი. მართალია, ზოგიერთი წამყვანი ამატებდა, თოვლი წვიმაში გადაიზრდებაო, მაგრამ რადიოსადგურ ქასლროკის (მათ მხოლოდ ამ სიხშირის დაჭერა შეეძლოთ, ისიც ხარვეზებით) დიქტორმა ქარბუქიც ახსენა, ექვსი-რვა დუიმის სიმაღლის ნამქერიც, შესაძლო ჩრდილო-აღმოსავლეთის ქარიც, თუ ტემპერატურა არ აიწევდა და ციკლონი ზღვისკენ არ გადაინაცვლებდა. ჯოუნსი ვერ მიხვდა, სად მოისმინა მაკარტიმ განსხვავებული პროგნოზი, მაგრამ ამას ქასლროკი რომ არ გადმოსცემდა, ეჭვი არ იყო. შესაძლოა, რაღაც ისე ვერ გაიგო. ჰო, ვერ გაიგებდა. ხდება ხოლმე.

– აჯობებს, სუპი შევათბო. რას იტყვით, მისტერ მაკარტი?

– ამაზე უკეთესი რა უნდა იყოს, – მაღლიერებით გაიღიმა მაკარტიმ, – წუხელ და დღეს დილით მუცელი საშინლად მტკიოდა, მაგრამ ახლა აღარ მაწუხებს.

– ეს სტრესია, – თქვა ჯოუნსიმ, – თქვენს ადგილას პირლებინება ამიტყდებოდა. იქნებ ჩამესვარა კიდევც.

– მე არ მიღებინებია, – თქვა მაკარტიმ, – ამაში დარწმუნებული ვარ. მაგრამ... – მან თავი კვლავ მკვეთრად გადააქნია. ეს ალბათ ნერვული ტიკი იყო, – არ ვიცი. ყველაფერი ერთ უზარმაზარ კომმარად იქცა.

- ახლა კომპარი დასრულდა, - ჯოუნსი გრძნობდა, რომ მოხუცებულ დეიდასავით რაღაც სისულელეს როშავდა, მაგრამ რა ექნა, კაცი ხომ უნდა დაემშვიდებინა.

- კარგი, - თქვა მაკარტიმ, - გმადლობთ. სუპს სიამოვნებით გეახლებოდით.

- როგორი გნებავთ? გვაქვს პამიდვრის, ქათმისა და, თუ არ ვცდები, ერთი ქილა ხორციანიც.

- ქათმის იყოს, - თქვა მაკარტიმ, - დედაჩემი ყოველთვის ამბობდა, ქათმის ბულიონი ყველაფერს კურნავსო.

ფართოდ გაიღიმა და ჯოუნსიმ თავი ძლივს შეიკავა, რომ შეძრწუნება დაემალა. მაკარტის თეთრი, ჩაწიკწიკებული კბილები ჰქონდა, მისი ასაკის, დაახლოებით ორმოცდახუთი წლის კაცისთვის ზედმეტად, არაბუნებრივად ჩაწიკწიკებული. ჩასმულს ჰგავდა, მაგრამ, სულ ცოტა, ოთხი კბილი აკლდა - ზედა ეშვები (რომლებსაც ჯოუნსის მამა „ვამპირის კბილებს“ ეძახდა) და ორიც - წინა ქვედა. მათი სახელები არ ახსოვდა, მაგრამ ერთ რამეში დარწმუნებული იყო: მაკარტიმ ამ დანაკარგის შესახებ არაფერი იცოდა. ადამიანი, რომელსაც თავისი კბილების მდგომარეობა ახსოვს, ასე მოურიდებლად მათ არ გამოაჩენს, არც ერთ ვითარებაში.

იგი სამზარეულოსკენ შეტრიალდა, რათა მაკარტის მისი განცვიფრებული სახე არ დაენახა და არ შეშფოთებულიყო. იქნებ ჰკითხოს, რა დაემართა.

- ერთი ქათმის ბულიონი. შეკვეთა მიღებულია. ცოტა ხანს მოცდა მოგიწევთ. შებრაწულ ყველს ხომ არ მიაყოლებდით?

- თუ არ შეწუხდებით. რიჩარდი დამიძახეთ, კარგი? ან რიკი, ასე უკეთესიც კია. იმ ადამიანთან, რომელმაც სიკვდილს გადამარჩინა, მირჩევნია, თავიდანვე შეძლებისდაგვარად ახლოს ვიყო.

- იყოს რიკი, - თქვა ჯოუნსიმ და გაიფიქრა: რიკ, სხვა მსაჯულების წინაშე წარდგომამდე აჯობებს, კბილები ჩაისვა.

მას სულ უფრო ცუდს უგრძნობდა გული. ისევ ის გატკაცუნდა



ტვინში, როგორც მაშინ, როცა თითქმის გამოიცნო მაკარტის სახელი. ჯერ შორს იყო სინანულისგან, პირველივე შესაძლებლობაზე ტყვია რომ არ დაახალა, თუმცა, გული თითქოს უკვე წყდებოდა იმის გამო, რომ განგებამ ასი მილით შორს არ გადაისროლა მაკარტი მისი ხიდან და მისი ცხოვრებიდან.

## 2

ღუმელზე ბულიონი რომ დადგა და სენდვიჩისთვის ყველს ქრიდა, ძლიერმა ქარმაც დაუბერა – გამყინავი ხმით ეძგერა სახლს, ააჭრაჭუნა და თოვლის სუდარა გაშმაგებით მოხადა. წამით ხეობაში დამწვარი ხეების გაძვალტყავებული ტოტები გაქრა და ფანჯარას უზარმაზარი თეთრი მოჩვენება აეკრა, თითქოს ვიღაცამ გიგანტური კინოეკრანის მოწყობა განიზრახაო.

მთელი ამ ხნის განმავლობაში ჯოუნსი პირველად შეშფოთდა. არა მხოლოდ პიტსა და ჰენრიზე ფიქრობდა, რომლებიც ალბათ უკვე აქეთ მოდიოდნენ, ჰენრის სკაუტით, არამედ – ბივზეც. რა თქმა უნდა, ბივზე უკეთ აქაური ტყეები ვის უნდა სცოდნოდა, მაგრამ გამოადგებოდა კი ეს ცოდნა ამ გადათეთრებულ ზღვაში, როდესაც „ყველა ფსონი გაუქმებულია“ – მისი არაფრის მაქნისი მამის კიდევ ერთი ფრთიანი გამონათქვამი, თუმცა, არც ისეთი ზუსტი, როგორცაა „იღბალს ყურით ვერ მოათრევ“. მართალია, ბივერს გზის გაგნება გენერატორის ხმის მიხედვით შეეძლო, მაგრამ, როგორც სწორად აღნიშნა მაკარტიმ, ტყეში, თანაც ქარბუქის დროს, ძნელი დასადგენია, საიდან მოდის ხმა. ამას თუ თავაწყვეტილ ქარსაც მივუმატებთ...

დედამ მას ათიოდე უბრალო კერძის მომზადება ასწავლა, მათ შორის სენდვიჩისა, შემწვარი ყველით. „ჯერ ცოტა მდოუგვი აიღე, – ეუბნებოდა იგი (ასე უწოდებდა ჯენეტ ჯოუნსი მდოუგვს), – მერე კი კარაქი პურს წაუსვი და არა – ტაფას, თორემ მხოლოდ შემწვარი პუ-

რისა და ყველის ნაჭრებს მიიღებ“. ახლაც ვერ ხვდებოდა, რა განსხვავება იყო და რა გავლენას ახდენდა კარაქწასმული ტაფა საბოლოო შედეგზე, მაგრამ ყოველთვის ზუსტად ასრულებდა დედის რჩევას, თუმცა დიდ ხათაბალად მიაჩნდა პურის ზედა მხარეზე კარაქის წასმა, სანამ ქვედა მხარე იბრაწებოდა. იმავე მიზეზით სახლში შესვლისთანავე იხდიდა რეზინის ჩექმებს, რადგან, დედის თქმით, ისინი „ფეხებს უწვავდა“. არ იცოდა, ეს რას ნიშნავდა, მაგრამ ახლაც კი, თითქმის ორმოცი წლის ასაკში, ჩექმებს ზღურბლზე გადაბიჯებისთანავე იძრობდა და ფეხები აღარ „ეწვებოდა“.

– მგონი, არც მე ვიტყვი მათზე უარს, – თქვა ჯოუნსიმ და კარაქწასმული სენდვიჩები ტაფაზე დააწყო. საცაა ბულიონიც წამოდუღდებოდა და ოთახში საუცხოო სუნი იდგა, რაც კომფორტისა და სიმყუდროვის შექმნას უწყობდა ხელს.

– კარგი აზრია. ვიმედოვნებ, თქვენს მეგობრებს არაფერი უჭირთ.

– დიან, – გაფანტულად მიუგო ჯოუნსიმ, რომელიც სუპს ურევდა, – თქვენ სად გაჩერდით?

– ჩვენ... ჩვეულებრივ მარს-ჰილში ვნადირობდით. იქ ნეთისა და ბეკის ბიძას სამონადირეო ქოხი ჰქონდა, მაგრამ ორი წლის წინ ვილაც იდიოტმა ცეცხლი წაუკიდა. როგორც მეხანძრეები ამბობენ, ლოთობასა და სიგარეტის ნამწვავებს კარგი არაფერი მოაქვს.

– ჰო, ჩვეულებრივი ამბავია, – თავი დაუქნია ჯოუნსიმ.

– დაზღვევის ფული კი ავიღეთ, მაგრამ ვეღარსად ვნადირობთ. ვფიქრობდი, ეს საქმე ჩვენთვის სამუდამოდ დასრულდა-მეთქი, მერე სტივმა საკმაოდ კარგ ადგილს მიაგნო კინეოში. თავიდან არაკორპორაციული დაბა მეგონა, ჯეფერსონტრექტის კიდევ ერთი ნაწილი, მაგრამ იქაურები (იქ ცოტა ხალხი ცხოვრობს), კინეოს ეძახიან. იცით, რაზე ვლაპარაკობ?

– ვიცი, – მიუგო ჯოუნსიმ გაშეშებული ტურჩებით. მორიგი სატე-

ლეფონო ზარი არსაიდან. „კედელში გაკეთებული ხვრელი“ გოსლინის მაღაზიის დასავლეთით მდებარეობდა, დაახლოებით ოცი მილის დაშორებით, კინეო კი – დასავლეთით, ოცდაათ მილში. ჯამში ორმოცდაათი მილი გამოდიოდა. და მან უნდა დაიჯეროს, რომ ამ ადამიანმა, დივანზე რომ ზის და თავიდან ფეხებამდე საბანში გახვეულა, წუხელს აქეთ ფეხით ორმოცდაათი მილი გაიარა? სისულელეა. წარმოუდგენელია.

– იფ, რა სუნია! – თქვა მაკარტიმ.

ასეც იყო, მაგრამ ჯოუნსის მაღა დაჰკარგოდა.

### 3

თეფში დივანისკენ რომ წაიღო, გრანიტის ფილებზე ბრაგაბრუგი გაისმა. წამის შემდეგ კარი გაიღო და ოთახში თოვლში ამოგანგლული ბივერი შემოვარდა.

– დალახვროს ეშმაკმა, ბანანები! – შესძახა მან. ერთხელ პიტმა ბივერიზიმების სია შეადგინა და დალახვროს-ეშმაკმა-ბანანები პირველ ხუთეულში აღმოჩნდა ისეთ შედევრებთან ერთად, როგორიცაა პატარაზე-შემაყოფინე და მაკოცე-ტაკოზე. ეს გამოთქმები ძენ-ბუდიზმსა და უხამსობას შორის ერთგვარად მერყეობდა, – აღარ მეგონა, თუ თოვლს თავს დავალწევდი, მაგრამ შუქი დავინახე, – განაგრძო ბივმა და გაშლილი ხელები ჭერისკენ ალაპყრო, – სინათლე ვინილე, ღმერთო, დიახ, სერ, დიდება იე...

ამ დროს სათვალის დაორთქლილი მინები თანდათან შეშრა, ბივმა დივანზე უცხო ადამიანი შეამჩნია, ხელები ნელა დაუშვა და გაიღიმა. ეს ერთ-ერთი მიზეზი იყო, რის გამოც ჯოუნსის ის ჯერ კიდევ დაწყებითი სკოლიდან უყვარდა. მართალია, ბივი ზოგჯერ დამძლეული და მომაბეზრებელი გახლდათ და, რა თქმა უნდა, სიკაშკაშით არც ქალის ნათურებში გამოირჩეოდა, მაგრამ ყოველგვარ დაუგეგმავ თუ მოულოდნელ მდგომარეობას შუბლშეკვრით კი არა, ღიმილით ხვდებოდა.

– გაუმარჯოს, – თქვა მან, – მე ჯო კლარენდონი ვარ. თქვენ ვინ ხართ?

– რიკ მაკარტი, – მიუგო მაკარტიმ და წამოდგა. საბანი ჩამოუვარდა და ჯოუნსიმ სვიტერის ქვეშ მოზრდილი ღიპი დაუნახა. მერე რა, – გაიფიქრა მან, – ეს შუახნის ადამიანებისთვის დამახასიათებელია და ოციოდე წლის შემდეგ ჩვენც მოგვიღებს ბოლოს.

მაკარტიმ ხელი გაიწვდინა და ნაბიჯის გადადგმა სცადა, მაგრამ ფეხი ძირს დავარდნილ საბანს წამოჰკრა. ჯოუნსის რომ მისთვის ხელი არ შეეშველებინა, იატაკზე დაენარცხებოდა და ყავის მაგიდიდან თეფშებსაც გაიყოლებდა. ჯოუნსი კვლავ განაცვიფრა სტუმრის მოუხერხებლობამ და გაახსენა საკუთარი თავი, შარშან გაზაფხულზე ხელმეორედ რომ სწავლობდა სიარულს. ახლალა შეათვალიერა დაკვირვებით ლაქა მაკარტის ლოყაზე და აღმოაჩინა, რომ ეს მოყინვის შედეგი კი არ იყო, არამედ რაღაც ხალის მსგავსი შიგ ჩაზრდილი წვერით.

– კარგი, კარგი, ოღონდ ნურაფერს დაამტვრევთ! – ბივმა მაკარტის ხელი ენერგიულად ჩამოართვა და ისე დიდხანს აჯანჯლარა, ჯოუნსის მოეჩვენა, რომ სტუმარი ისევ დაეცემოდა. გულში გაუხარდა, როდესაც ბივმა – მისმა ხუთმა ფუტმა და ექვსმა ღუიშმა – უკან დაიხია და შავი, ჰიპივით გრძელი თმიდან დნობაშეპარული თოვლის ჩამოფერთხვას შეუდგა. ბივი ისევ იღიმებოდა, ამჯერად ჩვეულებრივზე უფრო ფართოდ და თავისი დაუვარცხნელი თმითა და სქელ-შუშიანი სათვალით გენიოს მათემატიკოსს თუ სერიულ მკვლელს ჰგავდა, თუმცა სინამდვილეში დურგალი გახლდათ.

– რიკს ბევრის გადატანა მოუხდა, – თქვა ჯოუნსიმ, – გუშინ გზა აებნა და ღამე ტყეში გაატარა.

ბივის სახეზე სტუმართმოყვარე ღიმილი თანაგრძნობის გამომეტყველებამ შეცვალა. ჯოუნსიმ იცოდა, ამას რაც მოჰყვებოდა, ამიტომ დაიძაბა და გონების ძალით მეგობრისთვის გაჩუმების ბრძანე-

ბის გადაცემა სცადა. შთაბეჭდილება შეექმნა, რომ მაკარტი მორწმუნე კაცი იყო და ღვთის გმობას ვერ შეეგუებოდა, მაგრამ გინდ ბივერისთვის გეთხოვნა პირის გამორეცხვა და გინდ ქარისთვის – ჩადგომა.

– ამის დედა ვატირე! – შესძახა ბივერმა, – რა ჩათლახური ამინდია! დაჯექით! ჭამეთ! შენც, ჯოუნსი.

– არა, აჯობებს, შენ ჭამო, – თქვა ჯოუნსიმ, – ასეთ ყინვასა და თოვლში გივლია.

– დარწმუნებული ხარ?

– ჰო. მე ერბოკვერცხს შევიწვავ. იქამდე კი რიკი თავის თავგადასავალს მოგიყვება, – იქნებ შენ მაინც გამოიტანო დასკვნა ამ აბდაუბლიდან, – გაიფიქრა მან.

– კარგი, – ბივერმა ქურთუკი (წითელი) და ჟილეტი (ცხადია, ნარინჯისფერი) გაიხადა. უნდოდა, შეშის გროვისკენ ეტყორცნა, მაგრამ რალაც გაახსენდა, – მოიცა, მოიცა, აქ შენი ნივთი მაქვს.

მან ხელი დაბამბული ქურთუკის ჯიბეში მოაფათურა და იქიდან რბილყდიანი, საკმაოდ დაჭმუჭნილი, მაგრამ კითხვისთვის სავსებით გამოსადეგი წიგნი ამოიღო. ყდაზე, რომელზეც „რობერტ პარკერი – პატარა სისუსტეები“ ეწერა, ფიწლებით შეიარაღებული პატარა ემ-მაკები ცეკვავდნენ. ჯოუნსის ეს წიგნი პლატფორმაზე დარჩენოდა.

ბივმა იგი ღიმილით გაუწოდა მეგობარს, – შენი საძილე ტომარა იქ დავტოვე, მაგრამ ვიფიქრე, ვერ დაიძინებს, სანამ არ გაიგებს, ეს ვინ ოხერმა გააკეთა-მეთქი.

– არ ღირდა ასეთ ამინდში აძრომა, – თქვა ჯოუნსიმ, მაგრამ ბივის საქციელმა გული აუჩუყა. მის გარდა ამას არავინ გააკეთებდა. მაშასადამე, ბივი ასეთ ქარბუქში გზას მოიკვლევდა და არ იცოდა, ჯოუნსი ისევ ხეზე იყო თუ არა. ცხადია, მას შეეძლო შეხმიანებოდა, მაგრამ მაშინ ის ხომ ბივი აღარ იქნებოდა, მას მხოლოდ იმის სჯეროდა, რასაც საკუთარი თვალით ხედავდა.

– რა პრობლემაა, – სიტყვა ბანზე აუგდო ბივმა და გვერდით მიუჯდა მაკარტის, რომელიც ისე შესცქეროდა მას, როგორც რომელიღაც ეგზოტიკურ პატარა ცხოველს.

– კარგი, მაინც გმადლობ, – თქვა ჯოუნსიმ, – ახლა მაგ სენდვიჩს მიხედე. მე კი ერბოკვერცხს მოვიმზადებ, – იგი ღუმლისკენ დაიძრა, მაგრამ მაშინვე შეჩერდა.

– პიტისა და ჰენრის შესახებ რას იტყვი? როგორ ფიქრობ, მშვიდობით მოალწევენ?

ბივმა პირი გააღო, მაგრამ სანამ პასუხის გაცემას მოასწრებდა, ქარმა სახლს ახალი ძალით შეუტია, ააჭრაჭუნა და ნივნივებზე სტვენა ატეხა.

– ეჰ, დიდი ამბავი, ორიოდე ფანტელი თუ ჩამოვარდა, – გაეცინა ბივერს, როდესაც ქარი ოდნავ მიწყნარდა, – მოალწევენ, აბა რა. მაგრამ თუ ნამდვილი ჩრდილოეთის ქარბუქი ატყდა, გარეთ ცხვირსაც ვერ გავყოფთ.

ბივი ხარბად შეუდგა სენდვიჩის ქამას, ჯოუნსიმ კი ღუმელზე ერბოკვერცხიანი ტაფა და კიდევ ერთი ქილა სუპი შემოდგა. ახლა, როცა ბივერი შინ დაიგულა, მაკარტის გამოც აღარ წუხდა. სიმართლე რომ ითქვას, ბივერის გვერდით იგი თავს ყოველთვის კარგად გრძნობდა. ეს სიგიჟე იყო, მაგრამ – სიმართლე.

#### 4

იმ დროისთვის, როდესაც ერბოკვერცხიც შეიწვა და სუპიც გაცხელდა, მაკარტი და ბივერი დიდი ხნის მეგობრებივით საუბრობდნენ. შესაძლოა, მაკარტის შეურაცხყოფდა კიდევ ბივერის განუწყვეტელი კომიკური ბილწსიტყვაობა, მაგრამ ამ ყველაფერს ბივის უდავო მომხიბლობა წონიდა. „ამის ახსნაც კი შეუძლებელია, – უთხრა ერთხელ ჰენრიმ ჯოუნსის, – ბივი ფეთხუმი, ნამდვილი ფეთხუმი, მაგრამ შეუძლებელია, არ გიყვარდეს. ამიტომაც მიილტვიან მისკენ ქალები – არ მითხრა ახლა, მისი სილამაზე აგიჟებთო!“

ჯოუნსიმ ერბოკვერცხი და სუპი სასტუმრო ოთახის მხარეს გადაიტანა, ცდილობდა, არ ეკოჭლა – საოცარია, რომ ცუდ ამინდში თქო გაცილებით სტკივა. ეს მოხუცი ქალების ზღაპრები ეგონა, მაგრამ აღმოჩნდა, რომ არ ცდებოდნენ.

გაჭირვებით ჩაეშვა დივანთან მდგარ ერთ-ერთ სავარძელში. მაკარტი ჭამას ლაპარაკს ამჯობინებდა. სუპისთვის პირი თითქმის არ დაუკარებია, მხოლოდ ყველიანი სენდვიჩის ნახევარს დასჯერდა.

– როგორ ხართ, ბიჭებო? – იკითხა ჯოუნსიმ, ერბოკვერცხს პილპილი მოაყარა და ყბები ენერგიულად აამუშავა, როგორც ჩანს, მადა დაუბრუნდა.

– ჩვენ ორი ბედნიერი სუტენიორი ვართ, – თქვა ბივმა, მაგრამ მიუხედავად იმისა, რომ მისთვის დამახასიათებელი უდარდებლობით საუბრობდა, ჯოუნსიმ მას აღელვება, შეშფოთებაც კი შეამჩნია, – რიკმა საკუთარი თავგადასავალი მიაშო. იმ ჟურნალებში მოყვანილ ამბებს მაგონებს, საპარიკმახეროებში რომ ეყარა ჩემს ბავშვობაში, – კვლავაც ღიმილით მიუბრუნდა მაკარტის. ეს ისევ ის მოლიმარი ბივი იყო. და, ჩვეულებისამებრ, ხელი ხშირ შავ თმაში შეიცურა, – მაშინ დერიში, ჩვენს მხარეს, პარიკმახერად ბებერი კასტონგე მუშაობდა. თავისი უზარმაზარი მაკრატილით ისე მაშინებდა, რომ იქით დღემდე არ ვიხედები.

მაკარტიმ ოდნავ გაიღიმა, მაგრამ არაფერი თქვა, სენდვიჩის დარჩენილი ნახევარი აიღო, შეათვალიერა და ისევ დადო. ლოყაზე წითელი ლაქა ახალდასმულ დამლასავით უღაჟღაჟებდა. ბივერი კი ენას არ აჩერებდა, თითქოს ეშინოდა, მაკარტის სიტყვა არ წამოსცდესო.

გარეთ ისევ ბარდნიდა, ქარი არ ცხრებოდა. ჯოუნსის ფიქრები კვლავ ჰენრისა და პიტს გადასწვდა, რომლებიც ალბათ ძველი სკაუტით დიფქათროუდის რომელიღაც მონაკვეთზე იმყოფებოდნენ.

– რიკი შუალამით კინალამ რალაც ურჩხულს შეუჭამია, მისი აზ-

რით, ეს დათვი იყო. ამასთან თოფიც დაკარგა, სულ ახალი „რემინგტონ .30-.30“, მაგარი რამეა, მაგრამ შენ მას ველარასოდეს იხილავ, ამის ერთი შანსიც კი არ არსებობს ასი ათასიდან.

– ვიცი, – თქვა მაკარტიმ, რომელსაც ლოყებზე სიწითლის ნაცვლად ისევ ტყვიისფერი დაედო, – ისიც არ მახსოვს, როდის დავაგდე ან...

ოთახში მოულოდნელად კალიების ჭრიჭინის მსგავსი, დაბალი ხმა გაისმა. ჯოუნსის გააცია. გაიფიქრა, საკვამურში რაღაც ხომ არ გაიჭედაო. მერელა მიხვდა, რომ ეს მაკარტი იყო. ჯოუნსის მუცლის მრავალგვარი ხმაური სმენოდა – ხმამალალიც, ხანგრძლივიც, მაგრამ ასეთი... ეს თითქოს რაღაც დაუსრულებელი იყო, თუმცა, სინამდვილეში, მხოლოდ რამდენიმე წამს გაგრძელდა და აუტანელი სიმყრალე მოჰყვა.

მაკარტის კოვზი გაუვარდა და თითქმის ხელუხლებელ სუპში ჩაუვარდა. მან მარცხენა ხელი ქალწულივით მორცხვად მიიტანა და ზიანებულ ლოყასთან და თქვა:

– ოჰ, ღმერთო, მაპატიეთ.

– არაფერია, ვის არ მოსვლია, – თქვა ბივერმა ინსტინქტურად. დიახ, მხოლოდ ინსტინქტურად და ყოველდღიური ჩვეულებით. ჯოუნსი ხედავდა, რომ ამ საშინელი სუნის გამო ბივი განცვიფრებას ვერ მალავდა, ისევე, როგორც თვითონ. ეს ლაყე კვერცხისთვის დამახასიათებელი გოგირდოვანი სიმყრალე როდი იყო, როდესაც შეგიძლია გაიცინო, ხელი სახის წინ რამდენჯერმე მსუბუქად გაიქნო და ხუმრობით იკითხო: „დალახვროს ეშმაკმა, ვინ ჭრის ყველს?“ – არც ჭაობიდან გავრცელებული მეთანის სუნი გახლდათ. არა, ჯოუნსიმ ეს მაკარტის პირიდან ამოსულ სუნს მიამსგავსა – ეთერისა და გადამწიფებული ბანანების ნაზავს, სუსხიან დილას კარბიურატორში რომ ასხამდა ხოლმე.

– ღმერთო ჩემო, რა საშინელებაა, – გაიმეორა მაკარტიმ, – ძალიან მეუხერხულება.



- ნუ ღელავთ, ყველაფერი კარგადაა, - თქვა ჯოუნსიმ, თუმცა ლამის მთელი შიგნეულობა ამოუტრიალდა, როგორც პირღებინების წინ. ახლა საჭმელს პირს ველარ დააკარებდა, ყელში ლუკმა არ გადაუვიდოდა. საერთოდ, ზიზღიანი არ იყო, მაგრამ ახლა გულიც კი უწუნდა.

ბივი დივნიდან წამოდგა, ფანჯარა გააღო და თოვლნარევი, მაგრამ მაცოცხლებელი სუფთა ჰაერი შემოუშვა.

- დამშვიდდი, პარტნიორო... მაგრამ საშინელება კი გამოუშვით. ასეთი რა ჭამეთ, გარეული ღორის განავალი ხომ არა?

- ფოთლები, ხავსი, ყველაფერი, რაც ხელში მხვდებოდა, ზუსტად არ მახსოვს. ისე მშობდა, უარს არაფერზე ვამბობდი. ოღონდ ამის არაფერი გამეგება, ეუელ გიბონსის<sup>30</sup> ერთი წიგნიც არ წამიკითხავს... ცხადია, ბნელოდა კიდევ, - დაამატა მან ერთგვარი აღმაფრენით. და ჯოუნსიმ ბივერს შეხედა, რათა მის თვალებშიც იგივე ამოეკითხა, რასაც თვითონ ფიქრობდა: მაკარტი ცრუობდა. მას ან არ ახსოვდა, რა ჭამა, ან არაფერი უჭამია და მხოლოდ ამ საზიზღარი, ბაყაყის ყიყინის მსგავსი ხმაურისა და მისი თანმხლები სიმყრალის გამართლებას ცდილობდა.

ქარმა კვლავ დაუბერა და ღია ფანჯრიდან ხმამალალი კვნესით თოვლის ახალი ტალღა შემოაგდო. მადლობა ღმერთს, აქ დაგროვილ ჰაერს მაინც გაიტანდა!

მაკარტი ნაჩქარევად გადაიხარა წინ, თითქოს ზურგში ხელი ჰკრესო და როგორც კი თავი ჩაქინდრა, ჯოუნსი მაშინვე მიხვდა, რაც მოხდებოდა. მშვიდობით, ნავაჰოს ხალიჩავ! როგორც ჩანს, ბივმაც იგივე გაიფიქრა, რადგან სასწრაფოდ გასწია გრძელი ფეხები შხეფებისგან დასაცავად.

თუმცა, ღებინების ნაცვლად მაკარტის სხეულიდან ხანგრძლივი, ჩუმი გუგუნის გაისმა, თითქოს რაღაც დაზგა შესაძლებლობების

---

<sup>30</sup> ამერიკელი ტურისტის და დიეტოლოგის, ნატურალური დიეტის მომხრე.

ზღვარზე მუშაობდა. მარმარილოს ბურთულეზად გადაქცეული თვალელები კინალამ ბუდეებიდან გადმოუცვივდა, ყვრიმალეზზე კანი ისე დაეჭიმა, გეგონებოდათ, საცაა გასკდებაო. ეს ყველაფერი გრძელდებოდა და გრძელდებოდა, გრუზუნი გრუზუნს მოსდევდა და როდესაც დასრულდა, მოეჩვენათ, რომ გენერატორი ძალზე ხმამალა ზუზუნებდა.

– რა არ მომისმენია, მაგრამ ამას ვერაფერი შეედრება, – თქვა ბივმა მშვიდად და გულწრფელი პატივისცემით.

მაკარტი დიუნის საზურგეზე გადაწვა: თვალელები დახუჭა, პირის კუთხეები ჩამოუშვა – ან სირცხვილის, ან ტკივილის, ან ორივეს გამო. კვლავაც იმ ბანანებისა და ეთერის სუნი იდგა, თითქოს რალაც ლპობას იწყებდა.

– ღმერთო ჩემო, ძალიან ვწუხვარ, – თქვა მაკარტიმ ისე, რომ თვალე არ გაუხელია, – მთელი დღეა, ასე ვარ, გათენებიდან მოყოლებული. მუცელიც ისევე მტკივა.

ჯოუნსიმ და ბივმა ერთმანეთს შემოფოთებით გადახედეს.

– იცით, რას ვფიქრობ? – თქვა ბივმა, – უნდა დაწვეთ და დაიძინოთ. მთელი ღამე ფეხზე გაატარეთ, გეშინოდათ, დათვს ან რაიმე სხვას არ გადაჰყროდით. ახლა დალლილი, გაწამებული იქნებით. წაუძინეთ რამდენიმე საათით და რომ გაიღვიძებთ, ძველებურად ყოჩაღად იქნებით.

მაკარტი ბივს გასაცოდავებული კაცის მაღლიერებით მიაჩერდა და ჯოუნსის ცოტათი შერცხვა, თითქოს სხვის ფანჯარაში იჭყიტებოდა. მაკარტის კვლავაც მქრქალი ნაცრისფერი სახე ჰქონდა, შუბლზე ოფლის ორი მსხვილი წვეთი გაუჩნდა და ლოყებზე გამჭვირვალე ზეთით ჩამოუგორდა. და ეს მიუხედავად ცივი ორპირი ქარისა, ოთახში რომ ქროდა.

– როგორც ჩანს, მართალი ხართ, – თქვა მან, – ძალიან დავიღალე. სულ ეს არის. მართალია, მუცელი მტკივა, მაგრამ ამის მიზეზი სტრესი უნდა იყოს. თანაც ვინ იცის, რას ვჭამდი, იქნებ ტოტებსაც

კი. ოჰ, ღმერთო ჩემო! – მან დაბნეული სახით მოიფხანა ლოყა, – ეს რაღაც, ლოყაზე რომ მაქვს, ძალიან ცუდად მოჩანს? სისხლი ხომ არ მომდის?

– არა, – დაამშვიდა ჯოუნსიმ, – ჩვეულებრივი სიწითლეა.

– ალერგიაა, – მწუხარებით აღნიშნა მაკარტიმ, – ასეთი რამ მიწის თხილისგანაც მემართება. ახლა კი დავწვები. მგონი, რაღაც მემწველება.

წამოდგა და შებარბაცდა, მაგრამ სანამ ბივი და ჯოუნსი ხელს შეაშველებდნენ, გაიმართა და წონასწორობა შეინარჩუნა. ჯოუნსი მზად იყო, დაეფიცა, რომ მაკარტის გვარიანი ღიპი თითქმის გამქრალიყო. წარმოუდგენელია! ნუთუ ამ საცოდავს მართლაც ამდენი გაზი ჰქონდა დაგროვილი? ველარაფერი მოეფიქრებინა. მხოლოდ ის იცოდა, რომ ამ კაცის მიერ გამოშვებული გაზი სრულიად საკმარისი იყო მომდევნო ოცი წლის განმავლობაში დაახლოებით ასეთი მოგონებებისთვის: „მოგესხენებათ, ყოველ წელს, ნადირობის სეზონის დაწყების პირველ კვირას ბივერ კლარენდონის ქოხში ვიკრიბებით ხოლმე. 2001 წლის ნოემბერში – თუ გახსოვთ, მაშინ საშინელი ქარბუქი ამოვარდა – ჩვენთან ვიღაც ტიპი მოვიდა...“ სასაცილო ისტორია იქნებოდა, ასეთ რაღაცებზე ხალხს ყოველთვის ეცინება, ყოველთვის ეცინება იმ საბრალო ადამიანებზე, რომლებიც მთელი ქვეყნის გასაგონად აბოყინებენ ან გაზებს უშვებენ ხოლმე. ჯოუნსი, რა თქმა უნდა, არავის გაუმხელდა, რომ მაკარტი ირემი ეგონა და კინაღამ გამოჰკრა თითი „გარანდის“ სასხლეტს. ამას თავისთვის დაიტოვებდა. არ ღირდა მოყოლად.

ვინაიდან, ქვედა საძინებელი პიტსა და ჰენრის ეკავათ, ბივერმა მაკარტი იქით წაიყვანა, საითაც, ჩვეულებრივ, ჯოუნსი იძინებდა. მეგობარს თვალებით წინასწარ მოუბოდიშა კიდევ. ჯოუნსიმ მხოლოდ მხრები აიჩიჩა. ეს ლოგიკური იყო. იგი ბივერთან ერთად დაწვებოდა, როგორც ამას ბავშვობაში აკეთებდნენ. გარდა ამისა, არც ის იცოდნენ, მაკარტი კიბეზე ასვლას თუ შეძლებდა – ჯოუნსის სულ

უფრო მეტად აფრთხობდა მისი გაოფლილი, ტყვიისფერი სახე.

ჯოუნსი იმ ადამიანთა რიცხვს მიეკუთვნებოდა, რომლებიც, ლოგინის გასწორებისთანავე, მასზე ათასგვარ ნივთს ახვავებენ: წიგნებს, გაზეთებს, ტანსაცმელს, პაკეტებს... ახლაც იძულებული გახდა, ყველაფერი მოეხიკა და იატაკზე დაეწყო.

– ძილის წინ ხომ არ დაიცლებოდით, პარტნიორო? – შესთავაზა ბივმა.

მაკარტიმ თავი გადააქნია, თან მონუსხულივით შესცქეროდა სუფთა, ცისფერ ზეწარს.

ჯოუნსი კვლავ განაცვიფრა მისმა გაყინულმა მზერამ. ასეთი იმ მხეცებზე შეემჩნია, რომელთა ფიტულებსაც, ნადავლის სახით, კედელზე კიდებენ.

მოულოდნელად, სრულიად დაუკითხავად, თვალწინ საკუთარი სასტუმრო ოთახი წარმოუდგა ბრუკლინში, ბოსტონის ერთ-ერთ ყველაზე პრესტიჟულ გარეუბანში. ხელით ნაქსოვი ნოხები, ძველებური ამერიკული ავეჯი და... ლუმლის თავზე მიმაგრებული მაკარტის თავი. „ეს მენის შტატში მოვინადირე, – მოუყვებოდა სტუმრებს სალამოობით გამართულ წვეულებებზე, – დიდი კი იყო ის შობელ-ძაღლი, ას სამოცდაათ გირვანქას მაინც იწონიდა“.

თვალეები დახუჭა და როცა გაახილა, დაინახა, რომ ბივი ერთგვარი შეშფოთებით უცქერდა.

– თეძომ მომიჭირა, – თქვა ჯოუნსიმ, – მაპატიე. მისტერ მაკარტი, რიკ, სვიტერი და შარვალი გაიხადეთ. ჩექმებიც, რა თქმა უნდა.

მაკარტიმ მას ახალგამოღვიძებული კაცივით შეხედა.

– რა თქმა უნდა, – ჩაილაპარაკა მან, – აბა რა!

– ხომ არ დაგეხმაროთ? – ჰკითხა ბივმა.

– არა, ღმერთმანი, – თქვა მაკარტიმ. ჯოუნსიმ ვერ გაარჩია, დამფრთხალი იყო, კმაყოფილი თუ ორივე ერთად, – არც ასე წავმბდარვარ.

– მაშინ თქვენს თავს ჯოუნსის ჩავაბარებ, – თქვა ბივერმა და წავიდა.

მაკარტი საქმეს შეუდგა. ჯერ სვიტერი გაიხადა. მის ქვეშ მონადირის წითელი და შავი ფერებით გაწყობილი პერანგი ეცვა, პერანგის ქვეშ კი თბილი მაისური. ჯოუნსი ახლა საბოლოოდ დარწმუნდა, რომ მაკარტის მუცელი საგრძნობლად დაჰკატარავებოდა.

ღიახ... თითქმის საბოლოოდ. საკუთარ თავს შეახსენა, რომ სულ რაღაც ერთი საათის წინ ეგონა, მაკარტის ქურთუკს კი არა, ირმის თავს ხედავდა.

მაკარტი ჩექმების გასახდელად ფანჯარასთან მდგარ სკამზე ჩამოჯდა და კვლავ გააკუა: ისე გამაყრუებლად არა, როგორც პირველ ჯერზე, თუმცა მაინც ხმამაღლა და უხეშად. არაფერი შეიმჩნიეს, მაგრამ იქაურობა ისე აყროლდა, რომ ჯოუნსის თვალები აეწვა.

მაკარტიმ ჩექმები გაიხადა, ისინი ხმაურით დაეცა ხის იატაკზე, შემდეგ წამოდგა, ქამარი შეიხსნა და ლურჯი ჯინსის შარვალი გაიხადა. მის ქვეშ, როგორც ჯოუნსი ვარაუდობდა, თბილი საცვალი ეცვა. ამასობაში ოთახში ბივი დაბრუნდა ქაშანურის ლამის ქოთნით, რომელიც სტუმარს სასთუმალთან დაუდგა და უთხრა:

– ყოველი შემთხვევისთვის... ხომ გესმით, თუ მოგინდებათ. ან თუ ისე მოგაწვებათ, რომ გარეთ გასვლას ვეღარ მოასწრებთ.

მაკარტი ლენჩით იყურებოდა, თითქოს ვერ ხვდებოდა, რას ეუბნებოდნენ. ჯოუნსის კვლავ შიში შეეპარა. მის საძინებელ ოთახში ვიღაც უცნობი იდგა, მოჩვენება დიდი, ფართხუნა ქვედა საცვლით. უცნობი ავადმყოფი. საინტერესოა, რამდენად ავადმყოფი.

– იმ შემთხვევისთვის, თუ სააბაზანომდე მირბენას ვერ მოასწრებთ, – აუხსნა ბივმა, – სხვათა შორის, ის აქვია, სულ ახლოს. საძინებლიდან მარცხნივ. ოღონდ დაიმახსოვრეთ: ამ კედლის გასწვრივ პირველი კი არა, მეორე კარი. თუ პირველში შევარდებით, თეთრეულის ოთახში მოგიწევთ მოსაქმება.

ჯოუნსის მოულოდნელად გაეცინა, მაგრამ სულ არ ნალვლობდა,

რომ ამას ხმამაღლა, ოდნავ ისტერიკულადაც კი აკეთებდა.

– უკეთ ვარ, – თქვა მაკარტიმ, მაგრამ ჯოუნსიმ მის ხმაში გულწრფელობის ნასახიც ვერ შეამჩნია. გარდა ამისა, მაკარტი შუა ოთახში ანდროიდივით იდგა, რომელსაც მეხსიერების სამი მეოთხედი წაშლოდა. თუ ადრე რაღაც სიცოცხლეს მაინც ამჟღავნებდა, მოუსვენრადაც წრიალებდა, ახლა მსგავსი აღარაფერი ეტყობოდა, სიწითლეც გადასვლოდა ლოყებიდან.

– აბა, რიკ, – მშვიდად უთხრა ბივმა, – დაწეპით და წაუძინეთ. ძალა უნდა მოიკრიბოთ.

– დიახ, დიახ, – სტუმარი მიძიმედ დაეშვა გაშლილ საწოლზე და ფანჯარაში გაიხედა. ფართოდ გახელილი ცარიელი თვალები. ჯოუნსიმ იგრძნო, რომ ცუდი სუნი თანდათან გაქრა, თუმცა ვინ იცის, იქნებ უბრალოდ მიეჩვია. ასე მაშინ ხდება, როდესაც მაიმუნების საშენში დიდხანს გიწევს ყოფნა, – ღმერთო ჩემო, როგორ თოვს!

– დიახ, – გამოეხმაურა ჯოუნსი, – მუცელი როგორ გაქვთ?

– უკეთ, – მაკარტიმ ჯოუნსის შეხედა. თვალებში შიში ედგა. პატარა ბავშვივით, – ბოდის გინდით, ასე უცერემონიოდ რომ ვუშვებ გაზებს. ასეთი რამე არასდროს მომსვლია. არმიაშიც კი, სადაც ლობიოს მეტს არაფერს გვაჭმევდნენ. მაგრამ ახლა მართლაც მომეშვა.

– დარწმუნებული ხართ, რომ ძილის წინ მოშარდვა არ გინდათ?  
– ჯოუნსიმ, ოთხი შვილის მამამ, მისთვის ჩვეული შეკითხვა თითქმის ავტომატურად დასვა.

– დიახ. ტყეში მოვისტუმრე, თქვენთან შეხვედრის წინ. გმადლობთ, რომ შემიფარეთ. ორივეს გმადლობთ.

– დალახვროს ეშმაკმა, – თქვა ბივერმა და ფეხი უხერხულად მონაცვლა, – ჩვენს ადგილას ყველა ასე მოიქცეოდა.

– შესაძლოა, კი, – თქვა მაკარტიმ, – თუმცა, შესაძლოა, არა. ხომ გახსოვთ, ბიბლია ამბობს: „აი, ვდგავარ კართან და ვაკაკუნებ...“

გარეთ ქარი სულ უფრო გაშმაგებით ქროდა, კედლებს აზანზარებდა. ჯოუნსი გაგრძელებას ელოდა, ჩანდა, მაკარტის რაღაც

ჰქონდა სათქმელი, მაგრამ უთქმელად დაწვა და საბანი დაიხურა. საწოლის სიღრმიდან მორიგი მყრალი გრუხუნი გაისმა. ჯოუნსის ყელში ამოუვიდა. ერთია, შენს ზღურბლთან აღმოჩენილ გზააბნეულ მგზავრს კარი გაუღო და სახლში შემოუშვა, მაგრამ სულ სხვაა, მის გაუთავებელ გაზის შემოტეევებს გაუძლო.

ბივერი უკან მიჰყვა და კარი ფრთხილად მიხურა.

## 5

ჯოუნსის რაღაცის თქმა უნდოდა, მაგრამ ბივემა თავი გააქნია, ტუჩებზე თითი მიიღო და იგი სამზარეულოში გაიყვანა – საძინებლიდან შორს. აბა, ასეთ ამინდში გარეთ ხომ არ გავიდოდნენ!

– მომისმინე, ამ ტიპს რაღაც სჭირს, – თქვა ბივერმა და ჯოუნსიმ სამზარეულოს ფლორესცენციული ლამპის მქრქალ ნათებაშიც კი გაარჩია მისი შეწუხებული სახე. ბივემა კომბინეზონის ფართო გულის ჯიბიდან კბილის ჩხირი ამოიღო და ღეჭვას შეუდგა. სამ წუთში – ამ დროს ანდომებს ძველი მწვეველი ერთი ღერი სიგარეტის მოწევას – ნამცეცა ნაფოტებად აქცევდა. ჯოუნსი ვერაფრით მიძვდარიყო, როგორ უძლებდა მისი კბილები (და კუჭი) ასეთ დატვირთვას, მაგრამ რაც თავი ახსოვდა, ბივი სულ ასე იქცეოდა.

– იმედი მაქვს, ცდები, თუმცა... – ჯოუნსიმ თავი გადააქნია, – ასეთი სუნი ოდესმე თუ გიგრძნია?

– ცხადია, არა, – თქვა ბივერმა, – მაგრამ კუჭის აშლა მთავარი არ არის.

– რას გულისხმობ?

– იცი, რა, ის ფიქრობს, რომ დღეს თერთმეტი ნოემბერია.

ჯოუნსი ვერ მიხვდა, რის თქმა სურდა ბივს. როგორც ყოველთვის, ისინი ჰენრის ძველი სკაუტით აქ სწორედ თერთმეტ ნოემბერს ჩამოვიდნენ.

– ბივ, დღეს ოთხშაბათია. თოთხმეტი.

ბივერმა თავი დაუქნია და გაუღიმა. უკვე გაბზარულმა კბილის

ჩხირმა პირის მეორე მხარეს გადაინაცვლა.

– ვიცი. ეს შენც იცი. რიკმა კი – არა. მას ჰგონია, რომ დღეს უფლის დღეა.

– ბივ, გაიხსენე, ზუსტად რა გითხრა.

რაც უნდა ეთქვა, მნიშვნელოვანი არაფერი იქნებოდა: რა დრო დასჭირდებოდა ერბოკვერცხის შეწვასა და სუპის გაცხელებას? ბივი ჩაფიქრდა, ჯოუნსი კი ჭურჭლის რეცხვას შეუდგა. ლაშქრობების საწინააღმდეგო არაფერი ჰქონდა, მაგრამ, ბევრი მამაკაცისგან განსხვავებით, სალორეში ცხოვრება არ უყვარდა.

– თქვა, რომ ისინი შაბათს ჩამოვიდნენ, რათა დღე არ დაეკარგათ. კვირას სახურავი შეაკეთა. დაამატა, რომ ღმერთის მცნება მაინც არ დაარღვია შაბათ დღეს უქმობასთან დაკავშირებით. როცა ტყეში იკარგები, მხოლოდ ერთ რამეზე ფიქრობ, – ჭკუაზე არ შეიშალოო.

– გასაგებია, – თქვა ჯოუნსიმ.

– დაფიცებით ვერ დავიფიცებ, რომ დღეს თერთმეტი ჰგონია. იქნებ გასულ კვირას გულისხმობდა, ოთხ ნოემბერს, რადგან სულ კვირა ეკერა პირზე. გარდა ამისა, წარმოუდგენელია, ათი დღე ეხეტილა.

ჯოუნსიმ თავი დაუქნია. ათი დღე ნამეტანი იყო. სამი? სამს კი დაიჯერებდა კაცი.

– ეს მის ზოგიერთ ნათქვამს ნათელს ჰფენს, – დაიწყო ჯოუნსიმ, – მან...

ამ დროს იატაკმა დაიჭრაჭუნა. მოულოდნელობისგან ორივე შეხტა და საძინებლის მიხურული კარისკენ გაიხედა, მაგრამ იქიდან არავინ გამოჩენილა. სულ გადაავიწყდათ, რომ იატაკი და კედლები უქარო ამინდშიც გამუდმებით ჭრიალებდა. ერთმანეთს დარცხვენით გადახედეს.

– დღეს რატომღაც გალიზიანებული ვარ, – თქვა ბივერმა. შესაძ-



ლოა, მან ეს ჯოუნსის სახეზე ამოიკითხა, შესაძლოა, მის აზრებს ჩასწვდა, – მაგრამ აღიარე, რომ მისმა გამოჩენამ შენც აგაფორიაქა. ნეტა, საიდან დაგვატყდა თავს?!

– გეთანხმები.

– ისეთ ხმას გამოსცემს, თითქოს უკანალში ვილაც ჰყავდეს გაჭედილი და კვამლით იგუდებოდეს.

ბივი თვითონაც გაცემული ჩანდა საკუთარი ენამოსწრებულობით. მათ ერთდროულად გაეცინათ. საჩქაროდ პირზე ხელი აიფარეს, რათა სტუმარს არ გაეგონა და დაცინვად არ მიეღო. ჯოუნსის განსაკუთრებით უჭირდა: გრძნობდა რომ განმუხტვა სჭირდებოდა, თორემ საცაა ისტერია დაემართებოდა. ორად იკეცებოდა, ოხრავდა, ფრუტუნებდა, სუნთქვა ეკვროდა, თვალეზე მომდგარ ცრემლებს არც კი იწმენდა.

ბოლოს ბივერმა ხელი მოჰკიდა და გარეთ გაიყვანა, დიდხანს იდგნენ უქურთუკოდ ღრმა თოვლში, უხაროდათ, რომ შეეძლოთ იმდენი ეცინათ, რამდენიც გაუხარდებოდათ. ქარის ზუზუნი ხომ ყველანაირ ხმას ახშობდა.

## 6

როდესაც სახლში შებრუნდნენ, ჯოუნსის ხელები გასთოშოდა. ცხელ წყალში ჩაჰყო, მაგრამ თითქმის ვერაფერი იგრძნო. სამაგიეროდ, გულიანი სიცილის შემდეგ სიმშვიდე დაეუფლა. კვლავ გაახსენდა პიტი და ჰენრი – ნეტა, როგორ არიან? მშვიდობიანად თუ მოაღწევენ?

– შენ აღნიშნე, ეს მის ზოგიერთ ნათქვამს ნათელს ჰფენსო, – შეახსენა ბივმა და მორიგი კბილის ჩხირი აიღო, – კერძოდ, რომელს?

– მან არ იცოდა, რომ თოვა იყო მოსალოდნელი, – ნელა დაიწყო ჯოუნსიმ, თან ცდილობდა, მაკარტის სიტყვები ზუსტად გაეხსენებინა, – სინოპტიკოსების მიმართ უკმაყოფილებას გამოთქვამდა, ესეც შენი მოწმენდილობა და ზომიერი სიცივეო, მგონი, ასე თქვა. მაგრამ

ამას მაშინ ექნებოდა აზრი, ბოლო პროგნოზი თერთმეტში ან თორმეტში რომ მოესმინა, შუალამემდე ცა ხომ მართლაც მოწმენდილი იყო, არა?

– ჰო, და ზომიერად ციოდა, მაგის დედაც! .. – დაეთანხმა ბივერი, ჭიამაიებით მოქარგული, გახუნებული ტილო აიღო და ჭურჭლის გამშრალებას შეუდგა, – კიდევ რა თქვა?

– კინეოში გავჩერდითო.

– კინეოში? ეს ხომ აქედან ორმოცი-ორმოცდაათი მილის მანძილზეა. ის... – ბივერმა კბილის ჩხირი პირიდან გამოიღო, შეათვალიერა და ისევ ჩაიღო, – გასაგებია.

– ჰო, ერთ ღამეში ამხელა მანძილს ვერ გაივლიდა, მაგრამ თუ სამი დღე იხეტიალა...

– და ოთხი ღამე. თუ გზა შაბათს დაკარგა, ოთხი ღამე გამოდის...

– დიახ, ოთხი ღამე. თუ დაფუშვებთ, რომ მთელი ამ ხნის განმავლობაში ზუსტად დასავლეთით მიდიოდა... – ჯოუნსიმ გონებაში გამოიანგარიშა და დღეში თხუთმეტი მილი მიიღო, – ჩემი აზრით, ეს სავსებით შესაძლებელია.

– ნეტა, გაყინვას როგორ გადაურჩა? – ბივერმა ხმას გაუცნობიერებლად დაუწია და თითქმის ჩურჩულზე გადავიდა, – გრძელი ქურთუკი და თბილი საცვლები კი ეცვა, მაგრამ ჰელოუინის<sup>31</sup> შემდეგ ტემპერატურა ოლქის ჩრდილოეთ ნაწილში მინუს ოც გრადუსზე მაღლა არ ასულა. იქნებ ამიხსნა, როგორ მოხდა, რომ ოთხი ღამე ტყეში დაწანწალებდა და არ გაიყინა? არც არაფერი მოჰყინვია, იმ ნაკაწრს თუ არ ჩავთვლით ლოყაზე.

– ვერაფერს გეტყვი. კიდევ არის ერთი დეტალი, – თქვა ჯოუნსიმ, – წვერი რატომ არ გაეზარდა?

– რაო? – ბივერმა პირი დააღო, კბილის ჩხირი სახიფათოდ დაეკიდა ქვედა ტუჩზე. ბოლოს, გონს მოეგო და თავი ნელა დააქნია, – მართალი ხარ. წვერი თითქმის არ აქვს.

---

<sup>31</sup> დღესასწაული, რომელიც იმართება 31 ოქტომბერს.

– ჰო, დიდი-დიდი, ერთი დღის გაუპარსავი იყოს.

– მაშასადამე, გუშინ საღამომდე გაუპარსავს, არა?

– ეგრეა, – თქვა ჯოუნსიმ და ტყეში მოხეტილ მაკარტი წარმოდგინა – გზააბნეული, შეშინებული, გათოშილი და მშვიერი (თუმცა დიდი ხნის ნაშიმშილევს აშკარად არ ჰგავდა), ყოველ დღით ნაკადულთან მიდის, ფეხით ყინულს ამტვრევს და თავის ერთგულ „ჟილეტს“ იღებს... საიდან? ქურთუკის ჯიბიდან?

– იქნებ სამართებელი დღეს დილით დაკარგა და ეს პატარა წვერიც ამით აიხსნება? – თქვა ბივმა და ისევ გაიღიმა, ოღონდ არცთუ მხიარულად.

– აბა, აბა! თოფთან ერთად! მისი კბილები თუ ნახე?

ბივერი მრავალმნიშვნელოვნად შეიჭმუნა:

– ოთხი აკლია. ორი ზედა, ორიც ქვედა. „რა-მაწუხებს-ბიჭს“ ჰგავს, ჟურნალ MAD-ის ყდიდან რომ არ ჩამოდის.

– დიდი ამბავი, მეგობარო. მეც ჩამომძვრა ორი ცალი ისე, რომ არაფერი უკითხავთ, – მან ტუჩი ასწია, არცთუ სასიამოვნოდ დაიღრიჯა და მარცხენა მხარეს ღრძილები გამოაჩინა, – ხედავ? ხომ მაინც ვცხოვრობ?!

ჯოუნსიმ თავი გააქნია. ეს სრულიად სხვა შემთხვევა იყო.

– შეიგნე, ბივ, რომ ის ტიპი ადვოკატია. მუდამ ხალხში ტრიალებს. გარეგნობა მისი იმიჯის ნაწილია. ამით შოულობს ფულს. უკბილოსთან არავინ მივა. შემიძლია დავიფიცო, რომ ამის შესახებ არაფერი იცის.

– ხომ არ გიფიქრია, რომ მომატებული რადიაციის ზონაში მოჰყვა? – პირქუშად იკითხა ბივერმა, – იმ დაწყევლილი რადიაციის შედეგად კბილებსაც კარგავენ, კინოში მინახავს. საშინელებათა ერთერთ ფილმში, ისეთში, შენ რომ გიყვარს ყურება. რას იტყვი, შესაძლებელია? იქნებ ლოყაზე ის წითელი ლაქაც იმავე მიზეზით აქვს?

– ჰო, ალბათ მაშინ მოჰყვა რადიაციის ზონაში, როცა მარს-ჰილში მდებარე ატომური რეაქტორი აფეთქდა, – თქვა ჯოუნსიმ, მაგრამ

როგორც კი ბივერის გაოცებულ სახეს შეხედა, მაშინვე ინანა, თავი რომ ვერ შეიკავა, – ბივ, დასხივების დროს თმაც სცვივათ.

ბივერს სახე წამსვე გაუბრწყინდა;

– მართალია! ის ტიპიც გამელოტდა, როგორც ტელი, რა ერქვა იმ შობელძალს, ტელევიზიით პოლიციელს რომ თამაშობდა, – პაუზის შემდეგ კი დაამატა, – ბოლოს მოკვდა. ტელი კი არა, ის – ფილმში. მაგრამ თუ კარგად დავფიქრდებით...

– ამას თმა არ აკლია, – შეაწყვეტინა ჯოუნსიმ, თორემ ბივერი რომ მიეშვა, ველარც გაიხსენებდა, თავიდან რაზე საუბრობდნენ.

შენიშნა, რომ უცნობის არყოფნაში მას რიკს ან მაკარტის კი არა, ტიპს უწოდებდნენ, ქვეცნობიერად ორივე ცდილობდა, უმნიშვნელო ადამიანად წარმოეჩინა, თითქოს ამ შემთხვევაში ნაკლები მნიშვნელობა ექნებოდა იმასაც... მოკლედ, იმასაც.

– არ აკლია, – დაეთანხმა ბივერი, – ბევრიც კი აქვს.

– იქნებ ამნეზია სჭირს?

– შესაძლოა, მაგრამ ახსოვს, რა ჰქვია, ვისთან ერთად მოვიდა და მსგავსი რაღაცები. ისე, მაგრად კი გააკუა! თითქოს საყვირს ჩაბერაო. რა სუნი გაუშვა! ნაღდი ეთერი იყო!

– ჰო. გამშვებ სითხეს ჰგავდა. სხვათა შორის, ზოგჯერ კომაში მყოფ დიაბეტიანებსაც ასლით სუნი. მგონი, რომელიღაც თრილერში ამოვიკითხე.

– გამშვებ სითხეს თუ ჰგავს?

– არ მახსოვს.

ისინი დიდხანს იდგნენ ჩუმად, ერთმანეთს შესცქეროდნენ და ქარის ზუზუნს უსმენდნენ. უეცრად, ჯოუნსის გაახსენდა, რომ ბივს იმ ელვის შესახებ არ უამბო, რომელიც უცნობმა ვითომდა დაინახა, მაგრამ ღირდა კი ამის თქმა? ისედაც საკმარისად ილაპარაკეს.

– როდესაც წინ გადმოიხარა და თავი ჩაქინდრა, მეგონა, ალები-ნებდა, – თქვა ბივერმა, – შენც?

ჯოუნსიმ თავი დაუქნია.

– ისე, ცუდად კი გამოიყურება, საძაგლად.

– ძალიან ცუდად.

ბივერმა ამოიხვნეშა, კბილის ჩხირი ნაგვის ყუთში ჩააგდო და ფანჯრიდან თოვლის კედელს გახედა.

– დალახვროს ეშმაკმა! ჰენრი და პიტი მაინც იყვნენ აქ. განსაკუთრებით ჰენრი.

– ბივ, ჰენრი ფსიქიატრია.

– ვიცი, მაგრამ მედიცინის კუთხით სხვა არავინ გვყავს, ამ ტიპს კი მკურნალობა ნამდვილად სჭირდება.

ჰენრი მართლაც ექიმი იყო, სხვაგვარად ფსიქონალიტიკოსის დიპლომს ვერ მიიღებდა, მაგრამ როგორც ჯოუნსიმ იცოდა, სხვა მიმართულებით პრაქტიკული გამოცდილება არ ჰქონდა.

– ბივ, კვლავაც გჯერა, რომ მოვლენ?

– მჯეროდა. ნახევარი საათის წინ. მაგრამ ხომ ხედავ, რა ხდება. იმედი ვიქონიოთ, – პირქუშად თქვა ბივმა. უდარდელი და ხალისიანი ბივერ კლარენდონისგან აღარაფერი დარჩენილიყო, – მე მაქვს იმედი.

# თავი მესამე

## ჰენრის სკაუტი

### 1

ახლა, როდესაც თვალს არ აცილებდა სკაუტის ფარების შუქს, დიფქატროუდზე გადაფარებულ თოვლის საბურველს რომ ბურღავდა, ჰენრი ამ ერთგვარი გვირაბით „კედელში გაკეთებული ხვრელისკენ“ მიიწევდა და გზადაგზა ფიქრობდა, როგორ ემოქმედა.

ცხადია, ყოველთვის არსებობდა „ჰემინგუეის გამოსავალი“ – ოდესღაც, ჰარვარდში, ბოლო კურსზე, მან სტატიაც დაწერა ამ სათაურით, მაშასადამე, უკვე მაშინ უტრიალებდა ეს აზრი: ეს პირადული იყო და არა, უბრალოდ, მორიგი საკურსო დავალება. დიახ, უკვე მაშინ. „ჰემინგუეის გამოსავალი“ თოფს გულისხმობდა და ახლა ჰენრის ეს იარაღი თან რომ ჰქონოდა... არა, მაინცდამაინც მეგობრების წრეში კი არ იზამდა ამას. მათი ოთხეული „კედელში გაკეთებულ ხვრელში“ შესანიშნავად ატარებდა დროს და უნამუსობა იქნებოდა ყველაფრის გაფუჭება. ეს სამუდამოდ შეაზიზღებდა ამ ადგილს პიტ-

სა და ჯოუნსის, ბივერსაც. შესაძლოა, ყველაზე მეტად სწორედ ბივერს. ასეთ სისაძაგლეს ვერ ჩაიდენდა. თუმცა მალე ყველაფერი დასრულდებოდა, ისევე გრძნობდა მის მოახლოებას, როგორც დაცემინების წინ ცხვირში ლიტინს. სასაცილოა, მაგრამ, ალბათ, ასეც მოხდებოდა. ერთი ცხიკ, და გამარჯობა, წყვილიადო, ჩემო ძველო მეგობარო.

„ჰემინგუეის გამოსავლის“ მიხედვით, იხდით ფეხსაცმელსა და წინდას, თოვის კონდახს იატაკს აბჯენთ, ლულას პირში იდებთ და ფეხის ცერით სასხლეტს გამოჰკრავთ.

სამახსოვროდ, – გაიფიქრა ჰენრიმ და მოცურებული სკაუტის საჭე გაასწორა. ამაში ბორბლების მიერ დატოვებული ნაკვალევი დაენმარა. კაცმა რომ თქვას, გზა ზაფხულში მორების სათრევი ტრაექტორებისგან დატოვებული ორი ნალარი იყო და სხვა არაფერი. თუ ამას გადაწყვეტ, ჯერ სასაქმებელი წამალი დალიე და მოიცადე, სანამ ტუალეტში არ წახვალ – რა საჭიროა, ზედმეტი საქმე გაუჩინო იმას, ვინც გიპოვის.

– იქნებ ცოტა ნელა გევილო, – თქვა პიტმა, რომელსაც ფეხებს შორის ნახევრად დაცლილი ლუდის ბოთლი ედგა. მაგრამ კარგ ხასიათზე დასადგომად მისთვის ერთი ბოთლი არ კმაროდა. კიდევ სამი-ოთხიცი და, ჰენრი შეძლებდა, სამოციტაც ევილო ამ გზაზე, პიტი კი მხოლოდ ხმამაღლა აჰყვებოდა „პინკ ფლოიდის“<sup>32</sup> რომელიღაც შემადრწუნებელ სიმღერას. თავისუფლად გაქაჩავდა სამოცამდე, სკაუტს არაფერი დაემართებოდა, შესაძლოა, მხოლოდ ბამპერი გაღუნოდა ოდნავ. რალა დიფქათის ნალარებში სიარული, თუნდაც თოვლით ამოვსებულში, და რალა რელსებზე ქროლა. თუ თოვა გაგრძელდებოდა, საქმე გაფუჭდებოდა, მაგრამ ჯერჯერობით ყველაფერი კარგად იყო.

- ნუ ლელავ, პიტ, ყველაფერი რიგზეა.
- დალევ ლუდს?

---

<sup>32</sup> ცნობილი ინგლისური როკჯგუფი.

- საჭესთან არა.
- არც ამ მიყრუებულ ადგილას?
- მოგვიანებით.

პიტი მიყურდა და ჰენრი მოსაწყენ სამუშაოს შეატოვა: ფარების შუქისთვის თვალის დევნებასა და მიხვეულ-მოხვეულ გზაზე ხეებს შორის ძრომიალს. ფიქრებსაც შეატოვა, რაც ასე ძლიერ უნდოდა. ეს იმას ჰგავდა, გაფუჭებულ კბილს ენით რომ ეხები – გაინტერესებს, კიდევ გტკივა თუ გადაგიარა. უნდოდა და რა ექნა.

ახებიც არსებობდა. არსებობდა ძველი ხერხი – სააბაზანოში პლასტიკური პაკეტის თავზე წამოცმა. წყალში დახრჩობა. დიდი სიმაღლიდან გადახტომა. ძალზე არასაიმედოდ ეჩვენებოდა რევოლვერის ყურზე მიდება, რადგან გადარჩენის შანსი მნიშვნელოვნად იზრდებოდა, ისევე, როგორც სამუდამოდ პარალიზებისა. ვენების გადაჭრა მათი საქმე იყო, ვინც მხოლოდ ვარჯიშობდა ამაში. ჰენრი ერთმა იაპონურმა მეთოდმა დააინტერესა: კისერზე ყულფს ჩამოიცივამ, მეორე ბოლოს დიდ ქვას გამოაბამ, ქვას სკამზე დადებ, იატაკზე დაჯდები და ზურგით რამეს მიეყრდნობი, უკან რომ არ გადავარდე. შემდეგ სკამს გადააყირავებ. ქვა შორს გადავარდება. ამ დროს ასფიქსიის მდგომარეობაში მყოფი ადამიანი 3-5 წუთს თუ იცოცხლებს, მერე კი ნაცრისფერი შავად გადაიქცევა და – გამარჯობა, წყვდიადო, ჩემო ძველო მეგობარო.

ამ მეთოდის შესახებ ჯოუნსის საყვარელი კინსი მილჰოუნის<sup>33</sup> ერთ-ერთ დეტექტივში წაიკითხა. დეტექტივები და საშინელებათა ფილმები ჯოუნსის განუყრელი თანამგზავრები იყო.

მთლიანობაში ჰენრი უფრო „ჰემინგუეის გამოსავლისკენ“ იხრებოდა.

პიტმა პირველ ბოთლს წირვა გამოუყვანა და კმაყოფილი ღიმილით მეორე გახსნა.

- მერედა, რას ფიქრობ ამაზე? – ჰკითხა მან ჰენრის.

---

<sup>33</sup> ამერიკელ მწერალ სიუ ტაილორ გრაფტონის დეტექტივების პერსონაჟი.



ჰენრი თითქოს ძალით შეათრიეს იმ ქვეყანაში, სადაც ცოცხლებს მართლაც უნდოდათ სიცოცხლე. და როგორც ბოლო დროს ემართებოდა, მაშინვე შეიჭმუნა. ახლა მთავარი იყო, ეჭვი არავის აეღო. ერგებოდა, რომ ჯოუნსის უკვე დაეცქვიტა ყურები. თითქოს ბივერსაც. იმ ორს ზოგჯერ აზრების წაკითხვა შეეძლო. პიტმა, ცხადია, არაფერი იცოდა მისი ჩანაფიქრის შესახებ, მაგრამ სრულიად შეუფერებელ მომენტში შეეძლო ეთქვა, – ჰენრი რაღაც შეწუხებული მერგებება, რაიმე ისეთი ხომ არ აიკვიატაო. და გააფუჭებდა ყველაფერს. ეს ხომ მათი ოთხეულისთვის, მესამე-მეოთხე კლასში შექმნილი კანზასელი ალისფერი მეკობრეების ბანდისთვის, „კედელში გაკეთებულ ხვრელში“ უკანასკნელი ჩამოსვლა იყო, ამიტომ საუკეთესო მოგონებები უნდა დარჩენოდათ. დაე, მომხდარმა თავზარი დასცეს მათ, ჯოუნსისაც, რომელსაც სხვებზე ხშირად შეუძლია მისი აზრების ამოცნობა. დაე, ამტკიცონ, რომ ამას არაფრით ელოდნენ. უკეთესია, ასე მოხდეს, ვიდრე თავჩაქინდრულები იხდნენ, ერთმანეთს თვალი ვერ გაუსწორონ და საკუთარ თავს უსაყვედურონ, – ეს როგორ ვერ შევამჩნიეთ, ყველაფერი ამაზე მიგვანიშნებდა, ჩვენ კი ხელიც არ გავანძრიეთო.

ამიტომ სხვა სამყაროში დაბრუნდა და გულწრფელი დაინტერესება გამოხატა. ფსიქიატრზე უკეთ ამას ვინ მოახერხებდა?

– რაზე მეკითხები?

– იმ სულელ გოსლინზე, – უთხრა პიტმა, – იმ ბებერი გოსლინის მონაჩმასზე.

– პიტ, მას ტყუილად კი არ ეძახიან ბებერს. ოთხმოცი წლის მაინც იქნება. ერთადერთი, რის ნაკლებობასაც ბებრები არ უჩივიან, ისტერიია.

არც სკაუტი იყო ახალგამორჩევილი წიწილა, თოთხმეტი წლის განმავლობაში ოდომეტრზე უკვე მეორე წრეს ამთავრებდა. ნაღარიდან ამოვარდა და ოთხბორბლიანი ამძრავის მიუხედავად, მაშინვე მოსრიალდა. ჰენრიმ საჭე გაასწორა და კინალამ გაეცინა, როდესაც პიტს

ბოთლი გაუფარდა და ხმამაღალი შეძახილი აღმოხდა:

– ეი, ამის დედაც! .. ფრთხილად იარე!

ჰენრიმ სიჩქარეს უკლო, იგრძნო, რომ სკაუტი ისევ ემორჩილებოდა და განზრახ ძლიერად და სწრაფად დააწვა გაზის პედალს. მანქანა კვლავ მოსრიალდა, ამჯერად საპირისპირო მიმართულებით. პიტმა კვლავ შეჰყვირა. ჰენრიმ მანევრი გაიმეორა, სკაუტი ისევ ნალარში აღმოჩნდა და დაუბრკოლებლად გაქანდა წინ. ეს თვითმკვლევლობის გადაწყვეტილების მიღების უდავო უპირატესობა იყო – პატარ-პატარა საფრთხეები ნერვებს აღარ უშლიდა.

მანქანის შუქი მილიარდობით მოცეკვავე ფიფქისგან შემდგარ დამაბრმავებელ სითეთრეს ბურღავდა. ფიფქებს შორის, თუ გავრცელებულ სიბრძნეს ვენდობით, ორ ერთნაირი არ არსებობდა.

პიტმა ძირს დავარდნილი ბოთლი აიღო (სულ ცოტა გადმოღვრილიყო) და მკერდზე ხელი მიირტყა.

– ძალიან ხომ არ მიერეკები?

– სულაც არა, – მიუგო ჰენრიმ და, თითქოს არაფერი მომხდარა (არადა, მოხდა) და არც ფიქრი შეუწყვეტიაო (არც შეუწყვეტია), განაგრძო, – მასობრივი ისტერია ჩვეულებრივი მოვლენაა ძალიან მონუცებსა და ძალიან ახალგაზრდებს შორის. ეს ფენომენი დაწვრილებითაა აღწერილი როგორც ჩემს სფეროში, ასევე მეზობელ პროფესიაში – სოციოლოგიაში.

ჰენრიმ სპიდომეტრს დახედა, დაინახა, რომ საათში ოცდათხუთმეტი მილი სიჩქარით მიდიოდა და სვლა შეანელა, რადგან ასეთი ამინდისთვის მეტისმეტი იყო.

– არ გეწყინოს, მაგარი მძღოლი კი ხარ, მეგობარო, მაგრამ ხომ ხედავ, როგორი თოვლია. გარდა ამისა, მანქანა დატვირთულია, – თითი უკანა სავარძელზე მოთავსებული ორი პაკეტისა და ორი ყუთისკენ გაიშვირა, – სოსისთან ერთად იქ „კრაფტის“ მაკარონი და ყველიცაა. ბივერი მათ გარეშე ვერ ძლებს.

– ვიცი. მეც მომწონს. გაიხსენე სატანისტების ისტორია ვაშინ-გტონის შტატში. ოთხმოცდაათიანი წლების შუაში პრესა კინალამ ჭკუაზე შეიშალა. კვალი მოხუცებამდე მივიდა, რომლებიც ბავშვებთან ცხოვრობდნენ, ერთ შემთხვევაში – შვილიშვილებთან, სიეტლის სამხრეთით მდებარე ორ ქალაქში. საბავშვო ბაღებში პატარებზე განხორციელებული სექსუალური ძალადობის შესახებ მრავალრიცხოვანი საჩივარი, როგორც ჩანს, მას შემდეგ გაჩნდა, რაც მოზარდმა გოგონებმა, რომლებიც არასრული სამუშაო დღის განმავლობაში მუშაობდნენ, ერთდროულად ატეხეს ცრუ განგაში დელავერსა და კალიფორნიაში. ეს, შესაძლოა, დამთხვევა იყო. შესაძლოა, უბრალოდ, მსგავსი სენსაციებისთვის შესაფერისი ვითარება მომწიფდა და გოგონებმა ამით ისარგებლეს.

სიტყვები თავისით მოედინებოდა, თითქოს რაიმე დატვირთვა ჰქონოდა. ჰენრი გაუთავებლად ლაქლაქებდა, გვერდით მჯდომი ადამიანი ჩუმი აღფრთოვანებით უსმენდა, და ვერავინ წარმოიდგენდა (განსაკუთრებით, პიტი), რომ იგი არჩევანს აკეთებდა თოფს, თოკს, გამოსაბოლქვ მილსა და აბებს შორის. თავი თითქოს მაგნიტოფონის ფირით გავსებოდა, მისი პირი ფლეიერი იყო, რომელიც კასეტებს შეუჩერებლად ატრიალებდა.

– სალემში, – განაგრძო ჰენრიმ, – მოხუცები და ახალგაზრდა ქალიშვილები ისეთმა ისტერიამ მოიცვა, რომ ვოილა<sup>34</sup> – სალემის ალქაჯების პროცესი<sup>35</sup> მივიღეთ.

– ეს ფილმი ჯოუნსისთან ერთად ვნახე, – თქვა პიტმა, – მასში ვინსენტ პრაისი<sup>36</sup> თამაშობდა. შიშისგან კინალამ ჩავისვარე.

– მჯერა, – გაეცინა ჰენრის. წამით მოეჩვენა, რომ პიტი „სასტიკ

---

<sup>34</sup> აი, აპა (ფრ)

<sup>35</sup> სასამართლო პროცესი მასაჩუსეტის შტატში 1692 წელს, როდესაც ადამიანებს ჯადოქრობის ბრალდებით ასამართლებდნენ.

<sup>36</sup> ამერიკელი მსახიობი.

გამოცდას“<sup>37</sup> სალემის ჯადოქრებზე გამართული სასამართლო პროცესის დროს მომხდარი მოვლენების შესახებ.) გულისხმობდა, – როდის ძლიერდება ისტერიული იდეები? როცა მოსავალს აიღებენ და ამინდები აირევა, საშინელი თავგადასავლების მოყოლისა და ათასგვარი სისაძაგლის გამოგონების დრო მოდის. უინატჩიში, ვაშინგტონის შტატში – სატანიზმი და ტყეში ბავშვების მსხვერპლად შეწირვა. სალემში – ალქაჯები. ჯეფერსონტრექტში კი, სადაც გოსლინის ერთადერთი და განუმეორებელი მაღაზიაა, – უცნაური ნათება ცაში, დაკარგული მონადირეები და სამხედრო მანევრები, ფანტასტიკურ წითელ საგნებზე რომ აღარაფერი ვთქვათ, ხეებზე რომ იზრდება.

– ვერტიფრენებისა და ჯარისკაცების თაობაზე ვერაფერს ვიტყვი, მაგრამ ნათება უკვე იმდენმა ხალხმა დაინახა, ქალაქის კრებას იწვევენ. ეს თვითონ ბებერმა გოსლინმა მითხრა, სანამ შენ კონსერვებს არჩევდი. გარდა ამისა, კინეოდან რამდენიმე ადამიანი გაქრა, ეს კი ისტერია აღარაა! – შეეპასუხა პიტი.

– ოთხი სწრაფი შენიშვნა, – თქვა ჰენრიმ, – ჯერ ერთი, ჯეფერსონტრექტში ქალაქის კრებას ვერ მოიწვევ, რადგან ის ქალაქი არაა. კინეოც კი მხოლოდ საკუთარი სახელის მქონე, არაკორპორაციული დაბაა. მეორე ის, რომ ეს კრება ბებერი გოსლინის ღუმლის გარშემო გაიმართება, დამსწრეთა ნახევარს პიტნის შნაპსი და ყავის ლიქიორი ექნება ნაყლურწი.

პიტმა ჩაიხიბოხიოთა.

– მესამე – სხვა რა აკეთონ? მეოთხე, მონადირეებს რაც შეეხება, ბევრს ნადირობა, შესაძლოა, უბრალოდ მოჰბეზრდა და სახლში წავიდა, ან კარაბასეტში გახსნილ ახალ კაზინოში გამდიდრება გადაწყვიტა.

– ასე გგონია? – პიტი დათრგუნვილი ჩანდა. მოულოდნელად, ჰენრის მეგობრისადმი სიყვარული მოეძალა და მუხლზე ხელი მოუთათუნა.

---

<sup>37</sup> არტურ მილერის პიესის მიხედვით გადაღებული ფილმი (1996 წ.)

- ნუ იტანჯები, - თქვა მან, - სამყარო სავსეა გაუგებარი და აუხსნელი მოვლენებით.

სამყარო რომ მართლაც ასეთი ყოფილიყო, საეჭვოა, ჰენრის მისი ნაჩქარევად დატოვება განეზრახა, მაგრამ თუკი ფსიქიატრებმა სრულყოფილად რამე მაინც იცოდნენ ("პროზაკის", „პაქსილისა“ და „ამბიენის“ რეცეპტების გამოწერის გარდა), ეს ტყუილის თქმა გახლდათ.

- ერთდროულად ოთხი მონადირის გაუჩინარება ძალზე უცნაურად მეჩვენება.

- სულაც არა, - გაეცინა ჰენრის, - ერთის გაქრობა მართლაც უცნაური იქნებოდა. ორისაც. მაგრამ ოთხის? ალბათ შეიკრიბნენ და სადმე წავიდნენ.

- ჰენრი, „კედელში გაკეთებულ ხვრელამდე“ ბევრი დაგვრჩა? - იკითხა პიტმა, რაც სინამდვილეში ნიშნავდა: მოვასწრებ კიდევ ერთი ბოთლის დაღევას?

ჰენრიმ ოდომეტრი გოსლინთან ყოფნისას გაანულა. ასეთი ჩვეულება ჯერ კიდევ მასაჩუსეტისის შტატში „სასწრაფოზე“ მუშაობისას გამოუმუშავდა, სადაც თორმეტ ცენტს უხდიდნენ ყოველ გავლილ მილზე, მას კი იმდენი ბებერი ფსიქოპათი უნდა ჩაეწერა, რამდენსაც მოასწრებდა. მალაზიასა და „ხვრელს“ შორის მანძილი ადვილი დასამახსოვრებელი იყო - 22,2. ოდომეტრი 12,7-ს უჩვენებდა. მაშასადამე...

- ფრთხილად, - შეჰყვირა პიტმა და ჰენრიმ საქარე მინას გახედა.

სკაუტი ციცაბო, ხეებით დაფარული მთის თხემის წვერზე იმყოფებოდა. აქ უფრო ხშირად თოვდა, მაგრამ ჰენრის შორი განათება ჰქონდა ჩართული და ამიტომ მკაფიოდ დაინახა მის წინ, ასიოდე ფუტში, გზაზე მჯდომი ადამიანი. უცნობი კაპიუშონიან განიერ პალტოში იყო შეფუთილი. ზემოდან ხასხასა ნარინჯისფერი ჟილეტი ეცვა, რომელიც ქარში სუპერმენის მოსასხამივით უფრიალებდა. თავზე რუსული ბეწვის ქული ეხურა, ზედ მიმაგრებული, აქეთ-იქით

მოქანავე ნარინჯისფერი ლენტები იმ ფერად ნაჭრებს ჰგავდა, ნახ-  
მარი მანქანების სადგომს რომ შემოავლებენ ხოლმე. უცნობი შუა  
გზაზე იჯდა – გეგონებოდათ, ინდიელია და მშვიდობის ყალიონის  
მოწვევა გადაუწყვეტიაო. მანქანის ფარების შუქზე არც კი შერხე-  
ულა. ჰენრიმ მისი მუმის მსგავსი თვალები შეამჩნია: ფართოდ გა-  
ხელილი, უძრავი, მბრწყინავი, უმეტყველო, და გაიფიქრა, – მეც ასე-  
თი მექნება, თავი ხელში თუ არ ავიყვანეო.

დამუხრუჭების დრო აღარ იყო, მით უმეტეს ასეთ თოვლში. ჰენ-  
რიმ საჭე მარჯვნივ აიღო და ბიძგი იგრძნო, რადგან სკაუტი ნალა-  
რიდან ამოვარდა. თვალი მოჰკრა თეთრ, გაყინულ სახეს და გაუელ-  
ვა: დალახვროს ეშმაკმა! ეს ხომ ქალია!

სკაუტი ნელა მოცურდა, მაგრამ ამჯერად ჰენრიმ განზრახ სცადა,  
თოვლში ჩაფლულიყო – შინაგანმა ხმამ (ფიქრის დრო აღარ ჰქონდა)  
მიანიშნა, რომ მხოლოდ ეს თუ გადაარჩენდა გზაზე მჯდომ ქალს.

პიტმა შეჰყვირა და ჰენრიმ დაინახა, რომ მან, თავდასაცავად, ინ-  
სტინქტურად გაიწვდინა ხელები წინ. სკაუტი კოლბოხიდან კოლ-  
ბოხზე გადავიდა და ჰენრიმ მოხვევა სცადა, რათა უცნობ ქალს პირ-  
დაპირ არ დასჯახებოდა. საჭე საზიზღარი, გასაოცარი სიმსუბუქით  
უსხლტებოდა ხელთათმინიანი ხელებიდან. სამიოდე წამის განმავ-  
ლობაში სკაუტი თოვლით დაფარულ დიფქატროუდზე ორმოცდა-  
ხუთგრადუსიანი კუთხით აღიოდა ნაწილობრივ ულმობელი ქარის,  
ნაწილობრივ კი მძლოლის, ჰენრი დევლინის ოსტატობის წყალობით.  
გარშემო თოვლი მტვერივით ტრიალებდა. მანქანის ფარებიდან წა-  
მოსული შუქი გზის მარცხენა მხარეს ნამქერისგან დამძიმებულ ფიჭ-  
ვის ხეებს ანათებდა. ეს მხოლოდ სამი, უსაშველოდ გაწეილი სამი  
წამის განმავლობაში გაგრძელდა. ჰენრიმ დაინახა, როგორ ჩაუქრო-  
ლა ადამიანის სილუეტმა, თითქოს მანქანის ნაცვლად ის მოძრაობდა  
და მაშინაც კი არ განძრეულა, როდესაც ჟანგიანი ბამპერი მის სახეს  
დუიმზე ნაკლები მანძილით ასცდა. მხოლოდ ერთი დუიმი თოვლიანი  
ჰაერი ქალის ლოყასა და რკინას შორის.

- გადავრჩით! - აღმოხდა ჰენრის, - გადავრჩით, შე ბოზიშვილო!  
შემდეგ კონტროლის უკანასკნელი, მაგრად დაჭიმული ძაფიც გაწყდა და სკაუტი გვერდზე მოსრიალდა. როდესაც ბორბლებმა ნალარს კვლავ მიაგნო, გარდიგარდმო მდგარი მანქანა ციებცხელებიანივით აცახცახდა, შემოტრიალება და მყარად დადგომა სცადა - „ყველაფერი პირიქით, ყველაფერი უკუღმა“ როგორც დაწყებით სკოლაში მწკრივად მოწყობისას მღეროდნენ - მაგრამ ლოდს თუ მორს შეეჯახა, ხმაურით გადაწვა გვერდზე, მგზავრის მხრიდან, გატეხილი ფანჯრის ნამსხვრევები აქეთ-იქით მიმოიფანტა, შემდეგ ამოტრიალდა. უსაფრთხოების ღვედის ერთი ნაწილი მოსძვრა და ჰენრი სავარძლიდან ჩამოვარდა. მარცხენა მხრით დაეცა ძირს, სათესლე პარკი საჭეს ჩამოჰკრა და საზარდული მაშინვე ტყვიასავით დაუმიძიდა. ციმციმას მართვის გატეხილი სახელური თედოში შეერქო, ფეხზე თბილი სისხლი ჩამოედვარა და ჯინსი დაუსველა. „კლარეტი“<sup>38</sup>, - ასე აცხადებდა ოდესღაც კრივის რადიოკომენტატორი, - „შენედეთ, მეგობრებო, კლარეტი დაიღვარა“. პიტი ყმუოდა თუ წკმუტუნებდა. შესაძლოა, ერთდროულად ყმუოდა და წკმუტუნებდა კიდეც.

სკაუტის ძრავა რამდენიმე წამს კიდეც მუშაობდა, შემდეგ კი მიზიდულობის ძალამ თავისი გაიტანა და გააჩუმა. ოდესღაც მძლავრი მანქანა გზაზე ამოსულ საშინელ კუზად იქცა, თუმცა ბორბლები ტრიალს განაგრძობდა, ფარების შუქი კი კვლავინდებურად ანათებდა და გზის მარცხენა მხარეს მინამქრულ ფიჭვებს. მალე ერთი ფარი ჩაქრა, მეორე არ ნებდებოდა.

## 2

ჰენრი დიდხანს ესაუბრა ჯოუნსის უბედური შემთხვევის შესახებ (თუმცა, უფრო მეტს უსმენდა, ვიდრე ლაპარაკობდა, რადგან მისი

---

<sup>38</sup> წითელი ღვინის სახეობა.

თერაპია, ძირითადად, პაციენტის შემოქმედებითად მოსმენას გულსხმობდა) და იცოდა, რომ უშუალოდ შეჯახების მომენტი მას არ ახსოვდა. რამდენადაც ჰენრის შეეძლო თქმა, ავარიის შემდეგ გონება წამით არ დაუკარგავს და მოგონებათა ჯაჭვიც არ გასწყდომია. ახსოვდა, როგორ ეჩალიჩებოდა ღვედის შესაკრავს, რათა არაფრის მაქნისი ქამარი სწრაფად მოეცილებინა, ამასობაში პიტი ბლაოდა, – ფეხი, ეს დაწყევლილი ფეხი მოვიტყხეო. ახსოვდა მინასაწმენდის შარიშური, ხელსაწყობის პანელის ციმციმი მის თავზემით. ბოლოს მიაგნო შესაკრავს, დაჰკარგა, ისევ მიაგნო და ლილაკს დააწვა. ღვედი შეიხსნა, უხერხულად დაეცა, სახურავს მხარი მიარტყა და ჭერის პლასტიკური პლაფონი გატეხა. შემდეგ ხელი კარზე მოაფათურა, სახელურს მიაგნო და გაღება სცადა, მაგრამ უშედეგოდ.

– ფეხი! უჰ, შენი! ..

– მოკეტე! – უთხრა ჰენრიმ, – შენს ფეხს არაფერი სჭირს.

ისე თქვა, თითქოს იცოდა. მერე ისევ მოძებნა სახელური და დააწვა, კვლავ არაფერი გამოუვიდა. ბოლოს მიხვდა – მანქანა ამოყირავებული იყო, მაშასადამე საპირისპირო მხარეს უნდა დაექაჩა. სცადა კიდევ ეს გაშიშვლებული ნათურის ნათებით ლამის დაბრმავებულმა. კარმა გაიტკაცუნა. ხელი ჰკრა თითქმის დარწმუნებულმა, რომ არაფერი გამოუვიდოდა, რადგან გაღუნულ ჩარჩოს, უკეთეს შემთხვევაში, მხოლოდ რამდენიმე ღუიმიტ თუ დაძრავდა ადგილიდან.

მაგრამ მოულოდნელად კარმა დაიჭრაჭუნა და თავზე თოვლი დაეყარა, სუსხმა სახე და კისერი აუწვა. მხრით მიაწვა, მაგრამ როდესაც საჭის სვეტს ფეხები მოაცილა, მიხვდა, რომ ჰაერში დაეკიდა. ნახევარი საღმთო გააკეთა და აღმოაჩინა, რომ დაჟინებით მისჩერებოდა ჯინსში გამოკვალთულ საკუთარ საზარდულს, თითქოს ნატკენი კვერცხების კოცნას აპირებდა. დიაფრაგმა თითქმის ორად მოჰკეცოდა და სუნთქვა უჭირდა.

– ჰენრი, მიშველე! გავიჭედე! გავიჭედე, ამის დედაც! ..



- ახლავე! - თქვა ჰენრიმ უცხო, მოგუდული ხმით. აქედანაც კი ხედავდა, რომ შარვლის მარცხენა ტოტის ზედა ნაწილი სისხლისგან გამუქებულიყო. ფიჭვებში ქარი ისე ზუზუნებდა, როგორც ღმერთის მაცივარი „ელექტროლუქსი“.

ჰენრი კარს ჩაეჭიდა - გულში უხაროდა, რომ მანქანას ხელთათმნიანი ხელებით ატარებდა - და მთელი ძალით გაიწია: აუცილებლად უნდა გაეღწია აქედან და დიაფრაგმა გაეთავისუფლებინა, თორემ გაიგუდებოდა. წამიც და ბოთლიდან მომძვრალი საცობივით გავარდა გარეთ. ცოტა ხანს გაუნძრევლად იწვა, მოლივლივე თოვლს შესცქეროდა და ისვენებდა, ფიფქების მოსაცილებლად თვალებს ახამხამებდა. ცა, როგორც ყოველთვის, ჩვეულებრივი იყო, განსაკუთრებული არაფერი შეიმჩნეოდა, - ამაზე სასამართლოში ყველა ბიბლიაზე ერთად დაიფიცებდა, - მხოლოდ ღრუბლების დაბლა ჩამოშვებული ნაცრისფერი მუცლები და თოვლის საყოველთაო ფსიქოდელიური ციმციმი.

პიტი მას შეუჩერებლივ ეძახდა. პანიკა ემატებოდა.

ჰენრი გადაბრუნდა, მუხლებზე დადგა, მიხვდა, რომ თითქმის არაფერი სჭირდა და წამოდგომაც გაბედა. ქარი ოდნავ არხევდა. ეშინოდა, დაჭრილ ფეხს არ ემტყუნა და არ დაცემულიყო, მაგრამ გაუძლო. თავი გაიქნია და კოჭლობით შემოუარა სკაუტს, რათა ენახა, თუ რა შეეძლო პიტის დასახმარებლად. გზად გაიხედა ქალისკენ, რომლის გამოც ამ ხათაბალაში გაეხვივნენ. ის კი კვლავაც ლოტოსის პოზაში იჯდა შუა გზაზე, სანახევროდ თოვლით დაფარული. ქარი ხმაურით უფრიალებდა ჟილეტს, ქუდზე მიმაგრებული ლენტები მხიარულ ცეკვას განაგრძობდნენ. ქალს მათკენ არც კი გამოუხედავს, კვლავინდებურად გოსლინის მაღაზიის მხარეს გაშტერებოდა მზერა. ბორბლების ფართო კვალსა და მის მოხრილ ფეხს შორის ერთ ფუტზე მეტი არ იქნებოდა. ჰენრი ვერაფრით მიმხვდარიყო, როგორ ააცილა.

- ჰენრი! ჰენრი, მომეხმარე!

ჰენრი კოჭლობით წავიდა ღრმა თოვლში მოპირდაპირე კარისკენ. ის გაჭედილი იყო, მაგრამ როდესაც ჰენრი მუხლებზე დადგა და დაეჯაჯგურა, კარი უხალისოდ გაიღო. ისევ მუხლებზე დაეცა, პიტს ხელი მხარში წაავლო და თავისკენ დაქაჩა. არაფერი გამოუვიდა.

– ღვედი შეიხსენი, პიტ.

პიტმა აბზინდის მოძებნა სცადა, მაგრამ ვერ მიაგნო, თუმცა მუცელზე ედო. ჰენრიმ ფრთხილად, ისე, რომ მოუთმენლობის ნასახიც არ ეტყობოდა (როგორც ჩანს, ჯერაც შოკში იყო), აბზინდა შეხსნა და პიტი ტომარასავით დაეცა სახურავზე. თავი უღონოდ გადაუვარდა გვერდზე. პიტმა ტკივილისა და გაოცებისგან შეჰყვირა, მაგრამ მაშინვე მიხვდა, რაც უნდა გაეკეთებინა და ნახევრად ღია კარიდან გამოფოფხდა. ჰენრიმ ილღიებში ხელები ამოსდო და მოშორებით გაათრია. ორივენი თოვლზე დაეცნენ და ჰენრის უეცრად *déjà vu*<sup>39</sup> დაემართა, ისეთი ძლიერი და მოულოდნელი, რომ კინაღამ გონება დაკარგა. განა ასე არ თამაშობდნენ ბავშვებთან? რა თქმა უნდა! იმ დღეს, როდესაც დადიტსს თოვლისგან ანგელოზების გაკეთება ასწავლეს.

უეცრად ვიღაცის სიცილი გაისმა. ჰენრი შეკრთა. შემდეგ მიხვდა, რომ თვითონ იცინოდა.

პიტი წამოჯდა. თვალები ველურივით უელავდა, ხელები დაემუშტა, ზურგი თოვლს დაეფარა.

– რა ჯანდაბა გაცინებს? – შეუტია ჰენრის, – ამ ვირმა კინაღამ ორივე საიქიოს გაგვისტუმრა! დავახრჩობ მაგ ბოზიშვილს!

– სხვათა შორის, ქალია, – უთხრა ჰენრიმ და სიცილს უმატა. საესებით შესაძლებელია, რომ ქარის ზუზუნში პიტმა მისი ნათქვამი ვერ გაიგონა, მაგრამ ამას მნიშვნელობა არ ჰქონდა. კარგა ხანია, თავი ასე კარგად არ უგრძნია.

პიტი ძალდაუტანებლად წამოდგა და ჰენრი უკვე რაღაც ჭკვი-

---

<sup>39</sup> შეგრძნება, თითქოს ის, რაც თქვენ წინაშეა, უკვე სადღაც გინახავთ.

ანურის თქმას აპირებდა იმასთან დაკავშირებით, რომ, ფეხმოტეხილი კაცის კვალობაზე, ძალიან მსუბუქად დადიოდა, მაგრამ მოულოდნელად პიტი მოცელილივით დაეცა და ტკივილისგან აყმუფლდა. ჰენრი მიუახლოვდა და გაჭიმული ფეხი გაუსინჯა. თითქოს არაფერი სჭირდა – ორი ფენა ტანსაცმლის გარედან დაზუსტებით რა უნდა ეთქვა?

– მოტეხილი არ მაქვს, – თქვა პიტმა და ტკივილისგან დაილრიჯა, – მენისკი იქნება, როგორც ფეხბურთის თამაშის დროს მემართებოდა ხოლმე. სად არის ის? მართლა ქალია?

– ჰო.

პიტი წამოდგა და ფეხათრევით შემოუარა მანქანას წინიდან. ერთი ფარა კვლავაც გმირულად ანათებდა თოვლს.

– თუ აღმოჩნდება, რომ არც ხეიბარია და არც ბრმა, საკუთარ საქციელზე პასუხს არ ვაგებ, – განაცხადა პიტმა, – ისეთ პანდურს ამოვკრავ, რომ წამში გოსლინის მალაზიასთან აღმოჩნდება.

ჰენრის ისევ სიცილი აუტყდა – წარმოიდგინა, როგორ დახტოდა პიტი ჯანმრთელ ფეხზე, ნატკენს კი უცნობ ქალს უქნევდა. ამან „როკეტის“<sup>40</sup> შხვართი მოცეკვავეები მოაგონა.

– ხელი არ ახლო, პიტერ! – შესძახა მან. ეჭვი ჰქონდა, რომ მანიაკური სიცილის შემოტევა მკაცრ ბრძანებას ყოველგვარ ეფექტს დაუკარგავდა.

– არ ვახლებ, თუ არ შემომიღრენს, – შეჰპირდა პიტი შეურაცხყოფილი შინაბერას კილოთი, რამაც ჰენრი კვლავ აახარხარა. როცა დაწყნარდა, ჰენრიმ ჯინსის შარვალი და საცვალი ჩაიწია, რათა ქრილობა შეეთვალეირებინა. აღმოჩნდა რომ მხოლოდ სამი დუიმი სიგრძის განაკაწრი ჰქონდა თეძოს შიგა მხარეს. მართალია, სისხლდენა ბოლომდე არ შემწყდარიყო, მაგრამ ჰენრიმ ეს განსაკუთრებულ საფრთხედ არ მიიჩნია.

---

<sup>40</sup> მოცეკვავე ქალთა მრავალრიცხოვანი ანსამბლი, დაარსდა 1925 წელს აშშ-ში. გამოირჩეოდა მოძრაობის სიზუსტით.

– აქ რა ჯანდაბას აკეთებთ? – გასძახა პიტმა უცნობს გადაბრუნებული სკაუტის მეორე მხრიდან, რომლის მინასაწმენდები კვლავაც მწუხარე ხმით შრიალებდა. მისი ტირადა უხვად შეიცავდა მაგარ-მაგარ სიტყვებს (ეს აშკარად ბივერიზმების გავლენა იყო). ჰენრის თვალწინ შეურაცხყოფილი, ხანდაზმული მასწავლებელი ქალი წარმოუდგა, რამაც მასში მხიარულების ახალი ტალღა წარმოშვა.

სწრაფად აიწია შარვალი და წელში გასწორდა.

– რატომ დამჯდარხართ ამ დედანატირები გზის შუაში ასეთ დედანატირებ ქარბუქში? დათვერით? თუ კაიფში ხართ? მაგარი სულელი კი ჩანხართ! ეი, მიპასუხეთ! მე და ჩემმა მეგობარმა თქვენ გამო კინალამ ფეხები გავფშიკეთ, შეგეძლოთ... ოოჰ, ბარემ მიხმარე, ფრედი!

ჰენრიმ სწორედ რომ დროულად მიიღბინა. დაინახა, როგორ დაეცა პიტი გაუნძრევლად მჯდარი მის ბუდას გვერდით. ეტყობა, ისევ მუხლმა უმტყუნა. ქალმა თავიც კი არ მიაბრუნა. ზურგს უკან ნარინჯისფერი ლენტები უფრიალებდა. სახე ქარბუქისთვის მიემვირა, ფართოდ გახელილ თვალებს არ ახამხამებდა, მაშინაც კი, როცა ფიფქები თბილ, ცოცხალ ლინზებზე ეცემოდა და დნებოდა. ჰენრიმ იგრძნო, რომ, ყველაფრის მიუხედავად, პროფესიული ცნობისმოყვარეობა გაუჩნდა. ნეტა, რას გადაეყარნენ?

### 3

– ოჰ, ამის დედა ვატირე, რა ჯოჯოხეთური ტკივილია!

– როგორ ხარ? – ჰკითხა ჰენრიმ პიტს და ისევ გაეცინა. რა სულელური შეკითხვაა.

– როგორ ვიქნები შენი აზრით, გიჟების ექიმო? – გესლიანად მიუგო პიტმა, მაგრამ როდესაც ჰენრი მისკენ დაიხარა, ხელი ჩაიქნია, – არა მიშავს. აჯობებს, სანაგვეთის პრინცესას მიხედო, აქ რომ დაბრძანებულა!

ჰენრი ქალის წინ მუხლებზე დაეშვა. ტკივილისგან სახე დაეღრიჯა. ყველაფერი სტკიოდა – ფეხები, სახურავზე მირტყმული მხარი, კისერი, რომელიც თავის მოტრიალებას უშლიდა, მაგრამ მაინც ეცინებოდა.

უცნობი სულაც არ ჰგავდა გასაჭირში ჩავარდნილ ქალს. ორმოციოდე წლის იქნებოდა, ულამაზო და მკვრივი აღნაგობის. პარკა<sup>41</sup> საკმაოდ სქელი ჩანდა, მის ქვეშაც ბევრი უნდა სცმოდა, მაგრამ მაინც გარკვევით მოუჩანდა ამობურცულობები. ალბათ ასეთების გამო მოიგონეს მკერდის დაპატარავების ოპერაცია. თმა, რომელიც ბეწვის ქუდიდან მოუჩანდა, აშკარად ნაჩქარევად ჰქონდა შეკრეჭილი. მასაც ჯინსის შარვალი ეცვა, მაგრამ მისი ერთი ბარძაყიდან ჰენრის ორი თეძო გამოვიდოდა. ჰენრის თავში გაუელვა, რომ მის წინ სოფლელი ქალი იჯდა – აი, ისეთი, თავისი დიდი ტრაილერის გვერდით მოწყობილ პატარა ეზოში, თოკზე სარეცხს რომ ჰფენს, ფანჯარაზე შემოდგომული რადიომიმღებიდან კი გარტის<sup>42</sup> ან შანიას<sup>43</sup> ხმა-მაღალი სიმღერა ისმის... სურსათს ალბათ გოსლინთან ყიდულობს. ნარინჯისფერი ჟილეტი და ლენტები იმაზე მიუთითებდა, რომ სანადიროდ იყო, მაგრამ ამ შემთხვევაში, თოფი სადღა ჰქონდა? თოვლმა დაფარა? ფართოდ გახელილ ცისფერ თვალებში სიცარიელე აღბეჭდოდა. ჰენრიმ ნაკვალევის მოძებნა სცადა, მაგრამ ვერ მიაგნო. ალბათ ქარმა წაშალა, თორემ საიდან გაჩნდებოდა აქ, ციდან ხომ არ ჩამოვარდებოდა.

ჰენრიმ ხელთათმანი გაიძრო და უცნობს გაშეშებულ სახესთან თითები გაუტკაცუნა. ქალმა თვალები დაახამხამა. ეს ბევრი არაფერი იყო, მაგრამ ამაზე მეტს არც ელოდა, იმის გათვალისწინებით, რომ ცოტა ხნის წინ კინალამ მრავალტონიანი მანქანა დაეჯახა და არც კი შერხეულა.

---

<sup>41</sup> გრძელი და თბილი, სიცივისგან დამცავი ქურთუკი.

<sup>42</sup> გარტ ბრუსკი – ქანთრის სტილის მომღერალი.

<sup>43</sup> შანია ტვეინი (ფსევდ.) – აილინ რეგინა ედვარდსი, კანადელი მომღერალი ქალი (ქანთრი, პოპმუსიკა)

– ეი! – შესძახა მთელი ხმით, – ეი, გამოფხიზლდით! გამოფხიზლდით!

კვლავ გაატკაცუნა თითები, მაგრამ თითქმის ვერაფერი იგრძნო – ასე როდისღა გაითოშა? ოჰ, რა ცუდ დღეში ვართ, – გაიფიქრა მან.

ქალმა დააბოყინა, რაც ქარის ხმაურშიც კი საოცრად ხმამაღლა გაისმა. ჰენრის ცხვირში ეცა მკვეთრი მომწარო სუნი, სამედიცინო სპირტის მსგავსი. უცნობი აწრიალდა, შეიჭმუხნა და გაზები ისეთი ხმაურით გამოუშვა, გეგონებოდათ, მანქანა დაქოქესო. იქნებ ეს ადგილობრივების მისალმების წესია, – გაიფიქრა ჰენრიმ. ამ აზრმა ისევე ღიმილი მოჰგვარა.

– გაგიჟდება კაცი, – ჩასჩურჩულა პიტმა, – არა მგონია, ასეთი გამონაბოლქვის მერე შარვალი სუფთა ჰქონდეს. „პრესტოუნი“<sup>44</sup> ხომ არ დალიეთ, ქალბატონო? – შემდეგ ჰენრის მიუბრუნდა, – რაღაც დაუღვევია. თავს ვდებ, ანტიფრიზი იქნებოდა.

ჰენრიც ასე ფიქრობდა.

მოულოდნელად ქალს თვალებში სიცოცხლე ჩაუდგა და ჰენრის მზერას შეეჩინა. კაცი შეძრწუნდა, იმხელა ტკივილი დაინახა მათში.

– სად არის რიკი? – იკითხა ქალმა, – რიკი უნდა ვიპოვო, მხოლოდ ის გადარჩა.

სახე უშნოდ დაეღრიჯა და ჰენრიმ დაინახა, რომ უცნობს კბილების ნახევარი აკლდა, რაც ჰქონდა, მორყეული ღობის სარებს მიუგავდა. მან კვლავ დააბოყინა და ისეთი მძაფრი სუნი ამოუშვა, რომ ჰენრიმ თვალები დახუჭა.

– ღმერთო ჩემო! – შესძახა პიტმა, – რა ემართება?

– არ ვიცი, – მხრები აიჩეჩა ჰენრიმ და შეშფოთებულმა შეამჩნია, რომ ქალს თვალები კვლავ უმეტყველო გაუხდა. ეს მათ მდგომარეობას ართულებდა. მარტო რომ ყოფილიყო, ქალს გვერდით მიუჯდებოდა და მხარზე ხელს მოხვევდა, ეს უკანასკნელი, „ჰემინგუეის გამოსავალთან“ შედარებით, პრობლემის გაცილებით საინტერესო და

---

<sup>44</sup> ანტიფრიზის მარკა.

ორიგინალური გადაწყვეტა იქნებოდა. მაგრამ პიტზეც უნდა ეზრუნა – პიტზე, რომელსაც ჯერ ალკოჰოლიზმისგან განკურნების პირველი ეტაპიც კი არ გაეგლო, თუმცა, შესაძლოა, ყველაფერი წინ იყო.

გარდა ამისა, იგი ცნობისმოყვარეობას შეეპყრო.

#### 4

პიტი თოვლში იჯდა, მუხლს ისრესდა და ჰენრის მისჩერებოდა. ელოდა, რას მოიმოქმედებდა – იგი ხომ ხშირად ასრულებდა მათი ოთხეულის ტვინის ფუნქციას. ლიდერი არ ჰყავდათ, მაგრამ ჰენრი ამ როლისთვის, სკოლის პერიოდიდან მოყოლებული, ყველაზე შესაფერისი იყო.

ამასობაში ქალს კვლავაც თოვლიანი სივრცისთვის გაეშტერებინა თვალი.

დაწყნარდი, – უბრძანა ჰენრიმ საკუთარ თავს, – ღრმად ისუნთქე და დაწყნარდი.

მან ღრმად შეისუნთქა და პაუზის შემდეგ ნელა ამოისუნთქა. ასე ჯობდა. ცოტათი ჯობდა. კარგი, რა უყონ ამ ქალს? მნიშვნელობა არა აქვს, საიდან გაჩნდა, აქ რას აკეთებს და რატომ ყარს ანტიფრიზის სუნად. ახლა რა ემართება?

ეს, ალბათ, შოკი იყო. იმდენად ძლიერი, რომ კატატონია<sup>45</sup> გამოიწვია. არც კი შემკრთალა, როდესაც სკაუტმა კინალამ გადაუარა. თუმცა, არც იმდენად ღრმად წასულა საკუთარ თავში, რომ მხოლოდ ჰიპნოზს შეეძლოს მდგომარეობიდან მისი გამოყვანა. თითების ტკაცუნზე რეაქცია ჰქონდა. დაილაპარაკა კიდევ. ვილაც რიკი ახსენა.

– ჰენრი...

– გაჩუმდი ერთი წუთით.

მან კვლავ გაიძრო ხელთათმანები, ხელები ქალის სახესთან მიიტანა და ტაში შემოჰკრა. თუმცა გაშმაგებული ქარის ღრიალში ეს

---

<sup>45</sup> ფსიქოპათოლოგიური სინდრომი, რომლის ძირითადი კლინიკური გამოვლენა მამოძრავებელი სისტემის დარღვევაა. შიზოფრენიის ერთ-ერთი სახე.

ხმა ძალიან სუსტად გაისმა, ქალმა თვალები მაინც დაახამხამა.

– ადექით!

ჰენრიმ ქალს ხელი წაავლო და გაუხარდა, როდესაც მისი თითების კონფულსიური მოჭერა იგრძნო. წინ გადაიხარა და ეთერის სუნისგან სახე დაემანჭა. შეუძლებელია, ადამიანს ასეთი სუნი ასდიოდეს და კარგად იყოს.

– აბა, ადექით! ჩემთან ერთად! სამ დათვლაზე! ერთი, ორი და სამი!

ჰენრი წამოდგა და ქალიც წაიყოლა. ისიც ფეხზე დადგა, მთვრალივით ქანაობდა. მერე ისევ დააბოყინა და გაზებიც მიაყოლა. ქუდი ცალ თვალზე ჩამოეფხატა. ჰენრიმ დაინახა, რომ უმოძრაოდ იდგა და პიტს შესძახა:

– ქუდი გაუსწორე!

– რაო? – თქვა პიტმა და ისიც წამოდგა, თუმცა არცთუ ისე მყარად გრძნობდა თავს.

– არ მინდა, ხელი გავუშვა. ქუდი გაუსწორე, თვალი რომ გამოუჩნდეს.

პიტი უხალისოდ დაემორჩილა. ქალი ოდნავ მოიხარა, სახე დამანჭა და გააკუა.

– ღიდად გმადლობთ, – მუავე სახით ჩაიბურტყუნა პიტმა, – შესანიშნავი გადაცემა მოვისმინეთ, ღამე მშვიდობისა.

ჰენრიმ იგრძნო, რომ ქალი მოდუნდა, ამიტომ ხელები უფრო ღონივრად მოუჭირა.

– იარეთ! – შედრიალა სახეში, – ჩემთან ერთად იარეთ. სამ დათვლაზე. ერთი, ორი და სამი!

ჰენრიმ იგი სკაუტის კაპოტისკენ წაიყვანა. ქალი ახლა მას მიაჩერდა და ჰენრიც ცდილობდა, მისთვის თვალებში ეცქირა. პიტს უბრძანა, ისე, რომ თავი მისკენ არ მიუბრუნებია (ქალის მზერის დაკარგვა არ სურდა):

– ქამარში ჩამეჭიდე და გამიძეხი.



- საით?
- სკაუტის გარშემო.
- დარწმუნებული არ ვარ, რომ შევძლებ...
- მოგიწევს, პიტ. გააკეთე, რასაც გეუბნები.

მხოლოდ ერთი წუთის შემდეგ იგრძნო ჰენრიმ პიტის ხელი თავის ქურთუკის ქვეშ. იგი მას ქამარში ჩაეჭიდა და სამივენი კონგას<sup>46</sup> მოუხერხებელი მოცეკვავეებივით, ნელა გაუყვნენ გადარჩენილი ფარის ყვითელი შუქით განათებულ ვიწრო ზოლს. უზარმაზარი და უმწეო სკაუტის მეორე მხარეს ქარი შედარებით სუსტად ქროდა. ეს უკვე კარგი იყო.

მოულოდნელად ქალმა მკვეთრი მოძრაობით ხელები გამოსტაცა ჰენრის, დაიხარა და პირი ფართოდ გააღო. ჰენრიმ მარჯვედ დაიხია უკან, რათა ნარწყვევი სახეში არ შესხმოდა, მაგრამ, ამის ნაცვლად, ქალმა საშინლად დააბოყინა და მაშინვე გაზებიც მიაყოლა. ასეთი გრუხუნი ჰენრის არასდროს სმენია, არადა, რა აღარ ენახა და მოესმინა დასავლეთ მასაჩუსეტსის საავადმყოფოს პალატებში. ქალი წონასწორობას ინარჩუნებდა და ქშენდა.

- ჰენრი! - შესძახა პიტმა შიშისგან თუ მოკრძალებისგან ჩახრინწული ხმით, - ღმერთო ჩემო, შეხედე!

განცვიფრებული მიაჩერდა ცას. ჰენრიმ დაინახა, რომ მეგობარს ლამის ყბა ჩამოუვარდა, ზევით აიხედა და გაშტერდა - დაბლა მცურავ ღრუბლებზე ნელა დასრიალებდა კაშკაშა, ცეცხლოვანი რგოლები. ჰენრიმ თვალელები მოჭუტა და მათი დათვლა სცადა, თუმცა ვერაფრით მოახერხა. ცხრა თუ ათი? გაახსენდა ცას მიშვერილი პროექტორების შუქი ჰოლივუდური პრემიერების დროს, მაგრამ აქ ხომ პროექტორები არ იყო. რომც ყოფილიყო, თოვლიან ჰაერში აუცილებლად დაინახავდნენ სინათლის სვეტებს. სინათლის წყარო ან ღრუბლების თავზე უნდა ყოფილიყო, ან ღრუბლებში, ოღონდ არავითარ შემთხვევაში - ღრუბლებს ქვემოთ. ცეცხლოვანი რგოლები

<sup>46</sup> კუბური ცეკვა.

ქაოსურად დაქროდა წინ და უკან. უეცრად ჰენრი ატავისტურმა შიშ-  
მა შეიპყრო... იგი მის იდუმალ სიღრმეებში გაჩნდა და ზევით მო-  
იწევდა. ზურგის ტვინი წამსვე ყინულის სვეტად ექცა.

– ეს რა არის? – თითქმის დაიყმუვლა პიტმა, – ღმერთო ჩემო, ეს  
რა არის, ჰენრი?

– არ...

ამ დროს ქალმა თავი ასწია, მოცეკვავე ცეცხლოვანი რგოლები  
დაინახა და ისე ხმამაღლა და გულშემბარავად აკვივლდა, რომ ჰენ-  
რისაც იმავსე გაკეთება მოუნდა.

– დაბრუნდნენ! – ყვიროდა ქალი, – ისინი დაბრუნდნენ! დაბრუნ-  
დნენ!

შემდეგ თვალები დახუჭა და აყირავებული სკაუტის წინა საბუ-  
რავს თავით მიეყრდნო. აღარ ყვიროდა, მხოლოდ ჩუმად კვნესოდა  
ხაფანგში გაბმული მხეცივით, რომელსაც თავის დახსნის იმედი გა-  
დასწურვია.

## 5

გარკვეული დროის განმავლობაში (შესაძლოა, არა უმეტეს ხუთი  
წუთისა, თუმცა მათთვის ეს დრო უსაშველოდ გაიწელა) ისინი ცაში  
ცეცხლის თამაშს აკვირდებოდნენ. ფერადი რგოლები დახტოდა, ქა-  
ნაობდა, ციმციმებდა, ერთიმეორეზე გადადიოდა, თითქოს ართურ-  
მას<sup>47</sup> თამაშობდა. რაღაც მომენტში ჰენრიმ აღმოაჩინა, რომ მათი  
რაოდენობა ხუთამდე შემცირდა, შემდეგ ორიც გაქრა. ბორბალზე  
კვლავინდებურად თავმიდებულმა ქალმა ისევ გააკუა. ჰენრიმ გააც-  
ნობიერა, რომ თოვლის უდაბნოში იდგნენ და რაღაც ციურ, სავარა-  
უდოდ, თოვის შედეგად წარმოქმნილ ოპტიკურ მოვლენას შესცქე-  
როდნენ. ეს საინტერესო იყო, მაგრამ სულაც არ უწყობდა ხელს  
უსაფრთხო ადგილას სწრაფად დაბრუნებაში. ჰენრის შესანიშნავად

---

<sup>47</sup> ერთგვარი საყმაწვილო თამაში, როცა ერთი ახალგაზრდა წელში მოხრილ  
ამხანაგს უნდა გადაახტეს.

ახსოვდა ოდომეტრის ბოლო ჩვენება: 12,7. „კედელში გაკეთებულ ხვრელამდე“ თითქმის ათი მილი რჩებოდა, რაც ხელსაყრელ ვითარებაშიც არ იყო მცირე მანძილი, აქ კი ქარიშხალი საცაა, ქარბუქში გადაიზრდებოდა. თანაც, – გაიფიქრა მან, – ფეხით სიარული მხოლოდ მე შემიძლია.

– პიტ!

– ეს ის არის, არა? – შესძახა პიტმა, – დედანატირები ამო, როგორც „საიდუმლო მასალებში“<sup>48</sup> როგორ გგონია...

– პიტ! – ჰენრიმ მეგობარს ხელი ნიკაპზე წაავლო და სახით თავისკენ მოატრიალა. ცაში ორი უკანასკნელი ცეცხლოვანი რგოლიც ქრებოდა, – ეს რაღაც ელექტრული მოვლენაა, სხვა არაფერი.

– ასე ფიქრობ? – პიტს სახეზე იმედგაცრუება გამოეხატა.

– ჰო, ეს ქარიშხალს უკავშირდება. მაგრამ თუნდაც პლანეტა ალნიტაკიდან<sup>49</sup> მოფრენილი უცხოპლანეტელი პეპლების პირველი ტალღა იყოს, ჩვენთვის ამას მნიშვნელობა არ ექნება, თუ ესკიმოებად ვიქცევით. შენ მე მჭირდები. შენი საუკეთესო ტრიუკი გაიხსენე. შეძლებ?

– არ ვიცი, – თქვა პიტმა და ცას ერთხელაც ახედა. იქ მხოლოდ ერთი რგოლიღა რჩებოდა და ისიც ბუნდოვნად მოჩანდა, – მემ? მემ, ისინი თითქოს გაქრნენ. ახლა კი დნობის დრო მოვიდა. რას იტყვი?

ქალმა არაფერი უპასუხა, კვლავაც საბურავს ეკვროდა. პიტმა ამოიოხრა და ჰენრის მიუბრუნდა.

– რა გჭირდება?

– მეტყვევთა ქოხები თუ იცი გზის გასწვრივ? – ჰენრის აზრით, ასეთი ცხრა თუ ათი იყო – მხოლოდ და მხოლოდ ოთხი ბოძი და დაუანგული თუნუქის სახურავი. ქაღალდის ფაბრიკის მუშები გაზაფ-

---

<sup>48</sup> ამერიკული ტელესერიალი პარანორმალურ მოვლენებზე (1993-2002). რეჟ. კრის კარტერი.

<sup>49</sup> ვარსკვლავი ორიონის თანავარსკვლავედში.

ხულის დადგომამდე იქ მორებსა და სხვადასხვა მასალას ინახავდნენ.

– რა თქმა უნდა, ვიცი, – მიუგო პიტმა.

– თუ შეგიძლია მითხრა, რომელია ყველაზე ახლოს?

პიტმა თვალეზი დახუჭა და თითი აქეთ-იქით გაიქნია, თან ენას აწკლაპუნებდა. სკოლიდან მოყოლებული ეს ჩვევა, ხანდაზმულობით, ბივერის მიერ ფანქრებისა და კბილსაჩიჩქნების ლეჭვას ან დეტექტივებისა და საშინელებათა ფილმების მიმართ სიყვარულს ვერ შეედრებოდა, მაგრამ მაინც მისი იყო. პიტი არასდროს ცდებოდა. ჰენრი იმედოვნებდა, რომ ამჯერადაც ასე იქნებოდა.

ქალმა, შესაძლოა, ყური მოჰკრა ჩუმ წიკწიკს, თავი ასწია და მიხედ-მოიხედა. საბურავისგან შუბლი გაშავებოდა.

როგორც იქნა, პიტმა თვალი გაახილა.

– აქვეა, – განაცხადა მან და თითი „კედელში გაკეთებული ხვრელის“ მიმართულებით გაიშვირა, – პირველივე მოსახვევში პატარა გორაკია. იქიდან პირდაპირ თუ ივლი, მალე მიხვალ. სახურავის ნაწილი ჩაქცეულია. ვილაც სტივენსონს იქ სისხლი სდიოდა.

– მართლა?

– ჰო, მაგრამ მეტი არაფერი ვიცი, – შეცბუნდა პიტი.

ჰენრის ბუნდოვნად გაახსენდა უბადრუკი თავშესაფარი... ჩაქცეული სახურავი აწყობდათ კიდეც – თუ მიწამდე იყო, მიეყრდნობოდნენ მაინც.

– რა მანძილი იქნება?

– ნახევარი მილი. დიდი-დიდი, მილის სამი მეოთხედი.

– დარწმუნებული ხარ?

– ჰო.

– მაგ მუხლით იქამდე მიაღწევ?

– მგონი, კი, მაგრამ ამ ქალს რა ეშველება?

– თუ არ ვცდები, გონზე მოდის, – თავი დაუქნია ჰენრიმ, ფართოდ

თვალგახელილ ქალს მხრებზე ხელები დააწყო და ისე შემოატრიალა, რომ ერთმანეთს ლამის ცხვირებით შეეხნენ. უცნობს პირი საშინლად უყარდა – ანტიფრიზისა და რალაც ორგანულის, ზეთოვანის ნარევის სუნი ამოსდიოდა... მაგრამ უკან დახევა არც უცდია.

– უნდა წავიდეთ, – უთხრა პიტმა ქალს ხმამაღლა, მბრძანებლური კილოთი, თუმცა ყვირილის გარეშე, – სამ დათვლაზე დავიძრებით. ერთი, ორი და სამი!

მან ქალს ხელი შეაშველა, სკაუტს შემოუარა და გზაზე გავიდა. წამიერი შეწინააღმდეგების შემდეგ ქალი მორჩილად გაჰყვა – ქარსა და სიცივეს თითქოს ვერც კი გრძნობდა. ასე გაგრძელდა ხუთიოდე წუთს, შემდეგ პიტი ისევ წაბორძიკდა.

– მოიცა, – თქვა მან, – მუხლი საშინლად სტკიოდა.

დაიხარა და მუხლი დაიზილა. ჰენრიმ ცა შეათვალიერა. არაფერი ჩანდა.

– უკეთ ხარ? შეძლებ სიარულს?

– შევძლებ, – მიუგო პიტმა, – მიდი, დავიძრათ.

## 6

შუა გზაში პიტი კვნესით დაეცა, ფეხზე ხელი წაივლო და გინებას მოჰყვა. მან ჰენრის მზერა დაიჭირა და სიცილისა თუ ბურტყუნის მსგავსი, უცნაური ბგერები გამოსცა.

– ნუ ღელავ. პიტი-ჩიტი მიაღწევს.

– დარწმუნებული ხარ?

– ჰო, – თქვა პიტმა და შეშფოთებულ ჰენრის თვალწინ (უცნაურია, მაგრამ ამ შეშფოთებას პირქუში მხიარულებაც ერთოდა, რაც ბოლო დროს მუდამ თან სდევდა) საცოდავ მუხლს მუშტები დაუშინა.

– პიტ...

– თავი დამანებე, დამპალო, თავი დამანებე! – ყვიროდა პიტი და მეგობარს ყურადღებას არ აქცევდა. მთელი იმ დროის განმავლობაში მხრებში მოხრილ ქალს თითქოს სულ არ ადარდებდა, რომ ქარი

ზურგში უბერავდა და ნარინჯისფერ ლენტებს თვალებში სჩრიდა. გამორთულ დაზგასავით იდგა.

– პიტ!

– კარგად ვარ, – ხელი აუქნია პიტმა და ჰენრის დაღლილი მზერა მიაპყრო, მაგრამ თვალებში მხიარულების ნაპერწკლები უელავდა, – მაგრად დაგვერხა, არა?

– მაგრად.

– დერისი რა მოგახსენო, მაგრამ იმ ნანგრევებამდე კი მივალწევ, – მან ჰენრის ხელი გაუწვდინა, – წამოდგომაში მომეხმარე, ბელადო.

ჰენრიმ მეგობარს ხელი ჩასჭიდა და წამოაყენა. პიტი მოუხერხებლად, შებოჭილად იდგა, თითქოს ფეხები დაჰბუჟებოდა.

ცოტა ხნის შემდეგ თავი დააქნია:

– წავიდეთ. ამ ქარს მაინც დავაღწიოთ თავი. დალახვროს ეშმაკმა, ერთი-ორი ბოთლი ღვინო არ გვაწყენდა.

ისინი გორაკის თავზე აბობლდნენ. მეორე მხარეს ქარი ისე აღარ უბერავდა. როცა დაეშვნენ, ჰენრის იმედი გაუჩნდა, რომ მოგზაურობის ეს ნაწილი მაინც ჩაივლიდა მშვიდობიანად, მაგრამ თავშესაფრის ჩაბნელებული ჩონჩხისკენ მიმავალ გზაზე ქალი ჯერ მუხლებზე დაეცა, მერე მთელი ტანით განერთხა მიწას. გაუნძრევლად იწვა, თავი ოდნავ გვერდზე მიებრუნებინა და მისი პირიდან ამოსული ორთქლილა მიანიშნებდა, რომ ჯერაც ცოცხალი იყო (ოჰ, ყველაფერი ხომ გაცილებით მარტივად იქნებოდა, რამდენიმე საათით ადრე რომ მოეყინა, – გაიფიქრა ჰენრიმ). ცოტა რომ დაისვენა, ქალი გვერდზე გადაბრუნდა და დააბოყინა.

– აუჰ, რა გაგვიტრაკა ამ ბოყინით! – თქვა პიტმა უბოროტოდ, დაღლილი ხმით და ჰენრის შეხედა, – ახლა რა ვქნათ?

ჰენრიმ ჩაიმიუხლა, ქალს ხმამაღლა დაუყვირა, ცხვირწინ თითები გაუტკაცუნა, ტაშიც შემოჰკრა, სამამდეც დათვალა, მაგრამ არაფერმა გაჭრა.

– შენ მასთან დარჩი. მე კი იქნებ, ციგის მსგავსი ვიპოვო.

– წარმატებას გისურვებ.

– უკეთესი აზრი ხომ არ გაქვს?

პიტი შეიჭმუნხნა, თოვლზე დაჯდა და ნატკენი ფეხი გაშალა.

– არა, სერ, – თქვა მან, – აზრებისგან სრულიად დაცლილი ვარ.

## 7

ჰენრიმ ქოხს ექვსიოდე წუთში მიაღწია. დაჭრილი თეძო დაუბუჟდა, მაგრამ ცდილობდა, ამისთვის ყურადღება არ მიექცია. თუ პიტსა და ქალს როგორმე აქამდე მოიყვანდა და „კედელში გაკეთებულ ხვრელში“ უქმად მდგომი Arctic Cat-იც<sup>50</sup> დაიქოქებოდა, ყველაფერი, შესაძლოა, კარგად დასრულებულიყო. ისე, დალახვროს ეშმაკმა, საინტერესო რამ კი იყო ეს ცეცხლოვანი რგოლები ცაში...

დაღარული თუნუქის სახურავი მოხერხებულად ჩაქცეულიყო. გზის მხარეს გახსნილი იყო, უკანა მხარეს კი კედელს ქმნიდა. ნამქერიდან ნახერხითა და ნაფოტებით დაფარულ, ჭუჭყიანი ნაცრისფერი ბრეზენტის ნაჭერს ამოეყო თავი.

– არის! – შესძახა ჰენრიმ და ხელი მოყინულ ბრეზენტს სტაცა. თავდაპირველად, ბრეზენტი გაუძალიანდა, მაგრამ ბოლოს, ხმაურით დანებდა და ქალის მიერ გამოცემული ხმა გაახსენა. ჰენრიმ თავისი ნადავლი იქით წაათრია, საითაც პიტი და უცნობი ეგულებოდა.

პიტი კვლავ თოვლში იჯდა, გრძნობადაკარგული ქალის გვერდით, და ფეხი წინ არაბუნებრივად გაეშვირა.

## 8

ყველაფერი იმაზე მარტივი აღმოჩნდა, ვიდრე ჰენრი ფიქრობდა. ყველაზე მეტად ბრეზენტზე ქალის მოთავსება გაუჭირდა, შემდეგ კი საქმე რიხინ-რიხინით წავიდა წინ. მიუხედავად მისი წონისა, თით-

---

<sup>50</sup> თოვლმავალი მანქანა.

ქოს, ციგით მიასრიალებდა. ჰენრის უხაროდა, რომ ასე ყინავდა. ხუთი გრადუსით მეტი რომ ყოფილიყო, სველი თოვლი ქსოვილს მიეკრობოდა. სავალიც ცოტა დარჩა.

თოვლი უკვე კოჭებამდე სწვდებოდა. თოვამ იკლო, მაგრამ ფანტელები გადიდდა. ბავშვობაში ასეთ დროს მოიწყენდა ხოლმე: „მთავრდება“, – ეუბნებოდნენ ერთმანეთს და ცხვირჩამოშვებულები ოხრავდნენ.

– ეი, ჰენრი! – გასძახა პიტმა. სუნთქვა უჭირდა, მაგრამ ამას მნიშვნელობა აღარ ჰქონდა, რადგან ქონამდე აღარაფერი რჩებოდა. ცდილობდა, ფეხს მოფრთხილებოდა, მუხლში თითქმის არ ხრიდა და ისე მიჩაქჩაქებდა.

– რა მოხდა?

– ბოლო დროს დადიტსი მახსენდება ხოლმე... განა უცნაური არ არის?

– არ არის მოძრაობა... – დაუფიქრებლად თქვა ჰენრიმ.

– ეგრეა, – ნერვიულად აიტაცა პიტმა, – თუ არ იმოძრავე, ვერ ითამაშებ. არ გეჩვენება, რომ უცნაურია?

– თუ ასეა, ორივეს რალაც დაგვმართია, – მიუგო ჰენრიმ.

– რას გულისხმობ?

– დადიტსზე მეც ხშირად ვფიქრობ. გასული მარტიდან მოყოლებული. მე და ჯოუნსი მის მონახულებას ვაპირებდით...

– მართლა?

– ჰო. მაგრამ ჯოუნსის მანქანა დაეჯახა.

– უჭკუო ბებერი სულელი! როგორ დართეს საჭესთან დაჯდომის უფლება! – იფეთქა პიტმა, – ჯოუნსი სიკვდილს ძლივს გადაურჩა!

– სასწაულებრივად, – დაეთანხმა ჰენრი, – „სასწრაფოში“ გული გაუჩერდა, მაგრამ გადაარჩინეს.

პიტს პირი ღია დარჩა.

– რას ამბობ? მართლა ასე ცუდად იყო?

ჰენრი მიხვდა, რომ ზედმეტი წამოსცდა.



– ჰო, მაგრამ ენას კბილი დააჭირე. როგორც კარლამ მითხრა, ჯოუნსიმ, მგონი, არ იცის. მე კი... – მან გაურკვეველად გაიქნია ხელი, მაგრამ პიტმა თავი გაგებით დაუქნია. მე კი ვერაფერი ვიგრძენი, – უნდოდა ეთქვა ჰენრის.

– ნუ ლელავ, სამარე ვარ, – დაარწმუნა პიტმა.

– ჰო, შეეცადე.

– მაშასადამე, დადსი ვერ ინახულეთ.

– ვერ მოვახერხეთ, – თქვა ჰენრიმ, – ჯოუნსიზე ვლელავდი და სულ გადამავიწყდა. მერე ზაფხული დადგა. ხომ იცი, როგორ მიეწყობა ხოლმე ერთმანეთს...

პიტმა თანაგრძნობით ამოიოხრა.

– თუ დამიჯერებ, სულ ახლახან ვფიქრობდი მასზე. გოსლინთან ყოფნისას.

– იმ ფერადპერანგიან ბავშვზე? – ჰკითხა პიტმა. ლაპარაკისას პირიდან ორთქლი გამოსდიოდა.

ჰენრიმ თავი დაუქნია. „ბავშვი“ ოცი-ოცდახუთი წლის იქნებოდა. დაუნის სინდრომის შემთხვევაში ასაკი ძნელი გამოსაცნობია. მაღაზიის ცენტრალურ გასასვლელში უღალთმიანი პატარა ერთ კაცს, ალბათ მამას მისდევდა კუდში: მასაც ისეთივე, შავი და მწვანე უჯრედებით გაწყობილი მონადირის ქურთუკი ეცვა და, რაც მთავარია, ისეთივე სტაფილოსფერი. ოღონდ ალაგ-ალაგ შეთხელებული თმა ჰქონდა. მკაცრად იყურებოდა, თითქოს ყველას აფრთხილებდა, – გაგიბედავთ და რამე წამოგცდენიათ ჩემს ბიჭზე, ყოფას გიტირებთო!

ცხადია, არავის არაფერი უთქვამს. ბოლოს და ბოლოს, „კედელში გაკეთებული ხვრელიდან“ თორმეტი მილი ლუდის, პურისა და სხვა საკვების შესაძენად გაევლოთ და არა უსიამოვნებებისთვის. გარდა ამისა, ოდესღაც დადიტს იცნობდნენ... რატომ ოდესღაც? ახლაც იცნობდნენ. საშობაოდ – საჩუქრებს, დაბადების დღეზე კი ღია მისალლოც ბარათებს უგზავნიდნენ. დადიტსი ერთ-ერთი მათგანი იყო,

ოღონდ ძალზე თავისებური. ჰენრი ვერ უმხელდა პიტს, რომ დადსი სრულიად შეუფერებელ დროს ახსენდებოდა ხოლმე. შეუფერებელ დროს? ჰო, იმ თექვსმეტი თვის განმავლობაში, რაც თავის მოკვლა უნდოდა და ყველაფერს, რასაც აკეთებდა და ამბობდა, იმ გარდაუვალი წუთის გადასადებად ან მოსამზადებლად აკეთებდა. ზოგჯერ იგი ძილში ბივსაც კი ხედავდა, რომელიც ამტკიცებდა:

„მოდი, ამას მე მოვაგვარებ, ბებერო“.

დადიტსი კი ცნობისმოყვარეობით იმეორებდა: „რას აგვარებ?“

– პიტ, სულაც არ არის უცნაური, რომ დადიტსს ვიხსენებთ, – თქვა მან, იმპროვიზებული ციგა ქონში შეიტანა და სული მოითქვა, – ჩვენ სწორება დადიტსზე გვექონდა. დადიტსი ყველაზე ნათელი წერტილი იყო ჩვენს ცხოვრებაში.

– ასე გგონია?

– ჰო, – ჰენრი ნაჩქარევად მიწვა თოვლზე, რათა დაესვენა, სანამ გვემის მომდევნო პუნქტზე გადავიდოდა. მან საათს დახედა. თითქმის შუადღე იდგა. წესით, ჯოუნსი და ბივერი უკვე უნდა მიმხვდარიყვნენ, რომ მხოლოდ ქარბუქის გამო არ შეყოვნდებოდნენ ასე და რალაც უჭირდათ. თუ მიხვდებოდნენ და თოვლმავალს დაქოქავდნენ (თუ დაიქოქა, – შეახსენა ჰენრიმ საკუთარ თავს, – თუ ის წყეული დაიქოქა) და მათ საძებრად წამოვიდოდნენ, ეს მდგომარეობას საგრძნობლად შეამსუბუქებდა.

მან ბრეზენტზე დაწოლილ ქალს გადახედა. ცალ თვალს გაწეწილი თმა უფარავდა, მეორით კი სრულიად გულგრილად შესცქეროდა ჰენრის, თუმცა, ალბათ, მას ვერც კი ხედავდა.

ჰენრის მტკიცედ სწამდა, რომ, ადრე თუ გვიან, ყველა ბავშვისთვის დგება დრო, როცა მან თავი უნდა დაიცვას და საკუთარი თავის იმედად მყოფი ბევრად გაბედულია. ძალიან ხშირად, სხვების იმედად ყოფნა, გაუმართლებელი სისასტიკის სახეს იღებს. ჰენრი და მისი მეგობრები, რალაც უცნობი მიზეზის გამო, წესიერად იქცეოდნენ.

მართალია, საბოლოოდ ამას, ისევე როგორც ყველაფერს, მნიშვნელობა არ ჰქონდა, მაგრამ არც იმის გახსენება იყო ურიგო, განსაკუთრებით შავზნელი ფიქრების შემოტევისას, რომ ოდესღაც მოსალოდნელი შეტევების ეშინოდა და გამგონე ბიჭად მიიჩნევდნენ.

მან პიტს გეგმა გააცნო, აუხსნა, რა ევალეზობდა მას და მძიმედ წამოაღება. უნდა როგორმე დაღამებამდე „ხვრელამდე“ მიეღწიათ. სუფთა, უხიფათო, თბილ ადგილამდე...

– კარგი, – უხალისოდ დაეთანხმა პიტი, – იმედი ვიქონიოთ, რომ იქამდე სული არ გასძვრება. და არც ის ცეცხლოვანი რგოლები დაბრუნდება, – მან კისერი წაიგრძელა და ცას ახედა, მაგრამ მუქი, საავდრო ღრუბლების გარდა, ვერაფერი დაინახა, – როგორ ფიქრობ, რა იყო ეს? რაღაც ელვის მსგავსი.

– ეი, შენ ნამდვილი ექსპერტი გახდი კოსმოსურ საკითხებში, – გაეცინა ჰენრის, – აჯობებს, ნაფოტები შეაგროვო. ამისთვის ადგომაც კი არ მოგიწევს.

– ცეცხლის დასანთებად?

– მიხვდი, არა? – ჰენრიმ მას თავი დაუქნია, ქალს გადააბიჯა და ტყის პირისკენ გაემართა, სადაც უფრო მსხვილი მორები ეყარა. წინ დაახლოებით ცხრა მილი ედოთ. მაგრამ ჯერ ცეცხლი უნდა დაენთოთ და გამთბარიყვნენ.

# თავი მეოთხე

## მაკარტი ტუალეტიში მიდის

### 1

ჯოუნსი და ბივერი სამზარეულოში ისხდნენ და ქრიბიჯს<sup>51</sup> თამაშობდნენ, რომელსაც, უბრალოდ, თამაშს ეძახდნენ, ბივერის მამის, ლამარის პატივსაცემად. ისიც ასე უწოდებდა, თითქოს ამქვეყნად სხვა თამაში არ არსებობდა. ლამარ კლარენდონისთვის, რომლის ცხოვრებაც ცენტრალურ მენში მის სამშენებლო კომპანიას უკავშირდებოდა, ქრიბიჯი, შესაძლოა, მართლაც იყო ერთდაერთი თამაში – ერთ-ერთი საშუალება საღამოების გასატარებლად მათთვის, ვინც მთელ თავის დროს ტყისმჭრელების ბანაკებში, რკინიგზის ვაგონებსა და სამშენებლო ტრაილერებში ატარებდა. დაფა ას ოცი ნახვრეტიტ, ოთხი პალოტი და ძველი, გაქონილი ბანქოს დასტა. თუ ეს ყოველივე გქონდათ, საქმეში იყავით.

ქრიბიჯს უფრო ხშირად დროის მოსაკლავად თამაშობდნენ: სანამ

---

<sup>51</sup> ბანქოს სახეობა.

წვიმა გადაიღებდა, შეკვეთილი ტვირთი მოვიდოდა, ან მაღაზიაში შეყოვნებული მეგობრები დაბრუნდებოდნენ და უკარნახებდნენ, როგორ მოქცეოდნენ უცნაურ ტიპს, რომელიც საძინებელი ოთახის კარის მიღმა იწვა.

ყველაზე მეტად ჰენრი გვჭირდება, – ფიქრობდა ჯოუნსი, – პიტი კი მისი ერთგვარი დამატებაა. მხოლოდ ჰენრიმ იცის, როგორ მოვიქცეთ. ბივერი მართალია – მთავარი ჰენრია.

მაგრამ პიტი და ჰენრი არ ჩანდნენ. განგაშის ატეხა ჯერ არ ღირდა. იქნებ თოვამ შეაყოვნა. თუმცა, გულის სიღრმეში, ჯოუნსი მაინც შფოთავდა. ბივერიც წრიალებდა. ჯერჯერობით არ ამუღავნებდნენ – საღამომდე დიდი დრო იყო, თუმცა დაძაბულობა უკვე ჰაერში იგრძნობოდა.

ჯოუნსიმ სცადა, მხოლოდ თამაშზე ეფიქრა, მაგრამ ცალი თვალი საძინებლისკენ ეჭირა მაინც. მაკარტის, ალბათ, უკვე ეძინა, მაგრამ, დაღაბვროს ეშმაკმა, არ მოსწონდა იმ კაცის სახე!

ჯოუნსიმ შენიშნა, რომ ბივიც ხშირ-ხშირად იყურებოდა იქით. მან ძველი დასტა აჩენა, ორი კარტი დაიდო და ოთხი გადადო, ბივმა კი წვიპურტით მიუჩოჩა კიდეც ორი. ბივერმა მოხსნა და თამაში დაიწყო – საქმეში პალოები<sup>52</sup> ჩაერთო. „შესაძლოა, ბევრჯერ აღნიშნო სვლა და მაინც წააგო, – ჩასჩინებდა ლამარი, რომელსაც პირში მუდამ სიგარეტ „ჩესტერფილდის“ ღერი ედო და „კლარენდონ ქონსტრაქშნის“ ლოგოტიპიანი კეპი მარცხენა თვალზე ჩამოეფხატა, იმ კაცის მსგავსად, საიდუმლო რომ იცის და მხოლოდ შესაფერისი თანხის საფასურად აპირებს მის გამხელას. ლამარ კლარენდონი, წესიერი, მშრომელი მამა, ორმოცდარვა წლის ასაკში ინფარქტით გარდაიცვლილი, – სამაგიეროდ, თუ სვლას აღნიშნავ, ვერასდროს გაგაცურებენ“.

არ არის მოძრაობა, – გაიფიქრა ჯოუნსიმ, – არ არის თამაში. და მაშინვე ის დაწყევლილი ათრთოლებული ხმა ჩაესმა საავადმყოფოს

---

<sup>52</sup> მათი საშუალებით ქრიბიჯში სვლას აღნიშნავენ.

კომპარებიდან: „შეწყვიტეთ, გთხოვთ... ამას ვერ გავუძლებ... ნემსი გამიკეთეთ... სად არის მარსი“... ღმერთო ჩემო, რატომაა ეს სამყარო ასეთი სასტიკი? რატომ შესცქერიან შენს თითებს დამშეული თვალებით და მზად არიან, ყველა ძვალი გადაგიმტვრიონ?

– ჯოუნსი!

– რა?

– კარგად ხარ?

– ჰო, რა მოხდა?

– კანკალებ.

– მართლა? – ეს არ უნდა ეკითხა, რადგან თვითონაც მშვენივრად იცოდა.

– სერიოზულად გეუბნები.

– ალბათ ორპირი ქარის ბრაღია. რაიმე სუნს ხომ არ გრძნობ?

– მისგან?

– აბა, მეგ რაიანის<sup>53</sup> ილღიებიდან ხომ არა? ცხადია, მისგან.

– არა, – თქვა ბივერმა, – ერთი-ორჯერ კი მომეჩვენა... იქნებ წარმოსახვის ბრაღია. როცა ვიღაც გამუდმებით გაზებს გამოჰყოფს, ხომ იცი...

– საშინელი სუნი დგას.

– ჰო. ეგრეა. თან ეს ბოყინიც. მეგონა, საცაა, მთელი შიგნეულობა ამოუტრიალდებოდა. არ გატყუებ.

ჯოუნსიმ თავი დაუქნია. მეშინია. ვზივარ ამ ქარბუქში, შიშისგან ლამის ჩავისვარო და ჰენრის მოსვლას ველოდები, მეტს არაფერს, – გაიფიქრა მან.

– ჯოუნსი!

– ახლა რაღა გინდა? ამ პარტიას ოდესმე დავამთავრებთ თუ არა?

– ცხადია, მაგრამ... როგორ ფიქრობ, ჰენრი და პიტი კარგად არიან?

---

<sup>53</sup> ამერიკელი მსახიობი.

- საიდან უნდა ვიცოდე, დალახვროს ეშმაკმა?
- იქნებ რაიმე... წინათგრძნობა გაქვს? იქნებ ხედავ...
- შენი სახის გარდა ვერაფერს ვხედავ.

ბიგმა ამოიოხრა.

- და მაინც, შენი აზრით, არაფერი უჭირთ?

- ვფიქრობ, არაფერი, - ჯოუნსიმ მალულად დახედა საათს, თორმეტის ნახევარი იყო. შემდეგ დახურულ კარს მიაპყრო მზერა, რომლის მიღმაც მაკარტი იმყოფებოდა. შუა ოთახში, ცეკვავდა და ტრიალეზდა სიზმართმჭერი ავგაროზი, რომელსაც ყველა მხრიდან უბერავდა ქარი, - ხომ ხედავ, როგორ თოვს. ალბათ ნელა მოდიან. საცაა გამოჩნდებიან. მიდი, ითამაშე.

- კარგი. რვა.

- თხუთმეტი ორისთვის.

- უჰ, შენი! - ბივერმა პირში კბილსაჩიჩქნი ჩაიდო, - ოცდახუთი.

- ოცდაათი.

- მიდი.

- ერთი ორისთვის.

- რა ჯანდაბაა! - უხალისოდ ჩაეცინა ბივერს, რომელიც მიხვდა, რომ აგებდა, - როცა არიგებ, ამ წყეულ პალოებს არ მირჭობ უკანალში, თორემ, სხვას არაფერს მაკლებ.

- რატომ? შენი დარიგების დროსაც იგივე ხდება. მიდი, ითამაშე.

- ცხრა.

- თექვსმეტი.

- და ერთიც, ბოლო კარტისთვის, - ისეთი სახით განაცხადა ბიგმა, თითქოს მორალური გამარჯვება მოეპოვებინოს. წამოდგა, - გარეთ გავალ, დავიცლები.

- ეგ რად გინდა? თუ არ გახსოვს, შეგახსენებ, რომ სავსებით ნორმალური ტუალეტი გვაქვს.

- ვიცი. უბრალოდ იმის შემოწმება მინდა, თოვლში ჩემი სახელის დაწერა ხომ არ დამვიწყებია.

– ოდესმე თუ გამოხვალ ბავშვობის ასაკიდან? – გაეცინა ჯოუნსის.

– არასოდეს, თუ ეს ჩემი ნება იქნება. და ნუ ხმაურობ, თორემ იმ ტიპს გააღვიძებ.

ჯოუნსიმ კარტი მოხიკა, დაბნეულად აჩეხა და კარისკენ მიმავალ ბივერს თვალი გააყოლა. რატომღაც ბავშვობისდროინდელი თამაში გაახსენდა.

მაშინ ამას დადიტის თამაშს უწოდებდნენ, ქვევლების სასტუმრო ოთახში საათობით ისხდნენ და ჩვეულებრივ ქრიბიჯს უბერავდნენ, ოღონდ სვლების აღნიშვნა დადიტს ევალეობოდა. „მე ათი მაქვს. – ამბობდა ჰენრი, – დადიტს, პალო ათიანზე დასვი“. გაბადრულ დადიტს არასდროს ავიწყდებოდა ჯოუნსის გაბედნიერება და პალოს ექვსიანზე, ათიანზე ან ას ოციდან ნებისმიერ რიცხვზე ათავსებდა. დადიტის თამაშის წესების მიხედვით, არავის ჰქონდა უფლება, დაეჩივლა და ეთქვა: „დადიტს, ეს ძალზე ბევრია, დადიტს, ეს საკმარისი არაა“. ოჰ, ღმერთო ჩემო, როგორ ხალისობდნენ! ზოგჯერ ოთახში მისტერ და მისის ქვევლები შემოიხედავდნენ ხოლმე და ისინიც იცინოდნენ. ჯოუნსის ის შემთხვევა გაახსენდა, მაშინ თხუთმეტი-თექვსმეტი წლისანი იქნებოდნენ – ოღონდ, დადიტს ქვეელი მეტად აღარ გაზრდილა და სწორედ ეს იყო ყველაზე შესანიშნავი და ყველაზე შემაშინებელი მასში, – როდესაც ელფი ქვევლს უეცრად ტირილი აუვარდა და ეთქვა: „ბიჭებო, რომ იცოდეთ, რას ნიშნავს ეს ჩემთვის და ჩემი ცოლისთვის, რომ იცოდეთ, რას ნიშნავს ეს დუგლასისთვის...“

– ჯოუნსი...

მის ფიქრებში ბივერის ყრუ და უცნაურად მქრქალი, თითქოს ინტონაციადაკარგული ხმა შემოიჭრა. მასთან ერთად ცივი ჰაერის ნაკადიც შემოვარდა. ჯოუნსი მოიკუნტა.

– კარი მიკეტე, ბივ, ყინვაგამძლე ხომ არ ხარ?

– აქ მოდი. ეს უნდა ნახო.



ჯოუნსი წამოდგა, კართან მივიდა და ის იყო, ბივი უნდა გაეკიცხა, რომ ყველაფერი გადაავიწყდა. ეზო სავსე იყო ცხოველებით, პატარა ზოოპარკს რომ თავისუფლად ეყოფოდა. ძირითადად, ირმები იყვნენ, ოცზე მეტი ფურირემი და რამდენიმე ხარირემი. ენოტებიც დასუნსულებდნენ, ვირზაზუნები ამაყად დაიარებოდნენ, ციყვები უხმაუროდ დაცუნცულებდნენ, თითქოს თოვლსაც არ ეხებოდნენ. ფარდულის მხრიდან, სადაც ყველგანმავალი, ხელსაწყობები და სათადარიგო ნაწილები ინახებოდა, სამი უზარმაზარი ძაღლი გამოჩნდა, ჯოუნსის თავდაპირველად მგლები ეგონა. შემდეგ, ერთ-ერთს კისერზე თოკის ნაგლეჯი შეამჩნია და მიხვდა, რომ ისინი გაველურებული ძაღლები უნდა ყოფილიყვნენ.

ხეობას მალლა მიუყვებოდნენ, აშკარად აღმოსავლეთისკენ ეჭირათ გეზი. ჯოუნსიმ დიდი ზომის ორი გარეული კატაც შეამჩნია, ირმების გვერდით მიაბიჯებდნენ. თვალებიც კი მოიფშვნიტა, ხომ არ მეჩვენებაო, მაგრამ კატები არ გაქრნენ, არც – ირმები, ენოტები, ციყვები და ვირზაზუნები. ყველანი აუჩქარებლად და პანიკის გარეშე მოძრაობდნენ. ხანძრის დროს ასე არ ხდება ხოლმე. თუმცა, კვამლის სუნი არც იგრძნობოდა. ისინი კი არ გარბოდნენ, არამედ სხვა ადგილას, აქედან რაც შეიძლება შორს, გადადიოდნენ საცხოვრებლად.

– ღმერთო ჩემო, ბივი! – ხმადაბლა ჩაილაპარაკა განცვიფრებულმა ჯოუნსიმ.

ბივმა, რომელიც ზევით იყურებოდა, წამით თვალები დახარა, ცხოველებს გადახედა და მზერა ისევ ცას მიაპყრო.

– ზევით აიხედე.

ჯოუნსიმ მის მაგალითს მიჰბაძა და თორმეტი კაშკაშა ნათება გაარჩია – წითელი და მოთეთრო-მოლურჯო. ისინი ტრიალებდნენ, ცეკვავდნენ, ღრუბლებს ანათებდნენ, წინ და უკან დაქროდნენ, მარჯვედ მანევრირებდნენ, წამით ერთმანეთს ერწყმოდნენ და ისეთ და-

მაბრმავებელ სინათლეს ასხივებდნენ, რომ ჯოუნსიმ თვალები მოიჩრდილა. უეცრად მიხვდა, თუ რას გრძნობდა მაკარტი, ტყეში ხეტილისას.

– ეს რა არის? – იკითხა მან.

– არ ვიცი, – თავმიუბრუნებლად მიუგო ბივმა, გაფითრებულ სახეზე წვერი საშინლად მკვეთრად მოუჩანდა, – მაგრამ ცხოველებს ეშინიათ და ამიტომაც ცდილობენ აქედან წასვლას.

## 2

ისინი თხუთმეტიოდე წუთის განმავლობაში იდგნენ ზღურბლზე. მოულოდნელად ჯოუნსის ტრანსფორმატორის მსგავსი, ხმადაბალი ზუზუნი მოესმა. ბივერს ჰკითხა, – შენ თუ გესმისო. მან თავი უსიტყვოდ დაუქნია, თუმცა თვალი არ მოუცილებია რამდენიმე მოცეკვავე ფერადი რგოლისთვის, რომელიც, ჯოუნსის აზრით, ლიუკის სარქვლისხელა იქნებოდა. ფიქრობდა, რომ ხმას გაქცეული ცხოველები გამოსცემდნენ და არა მანათობელი რგოლები, მაგრამ არაფერი უთქვამს, რადგან ლაპარაკი უჭირდა – ის გრძნობდა შიშს და რაღაცნაირ გასავათებას, მოურჩენელმა დაბალსიცხიანმა გრიპმა რომ იცის.

თანდათანობით ცეცხლოვანი რგოლები გაფერმკრთალდა და სულ უფრო დაპატარავდა. ცხოველების ნაკადიც შეწყდა და მომაბეზრებელი ზუზუნიც უკვე შორიდან ისმოდა.

ბივერი შეიშმუშნა, თითქოს ღრმა ძილიდან გამოფხიზლდა.

– კამერა! – შესძახა მან, – რამდენიმე სურათი მაინც გადავიღო, სანამ ყველაფერი გამქრალა.

– არა მგონია, მოახერხო...

– ვცდი მაინც! – თითქმის დაიყვირა ბივერმა, მაგრამ მაშინვე ხმას დაუწია, – უნდა ვცადო. იქნებ, ირმები მაინც დავიჭიროო ობიექტივში, სანამ ისინი...

შეტრიალდა და სამზარეულოსკენ გავარდა. ალბათ, იმის გახსე-

ნებას ცდილობდა, ჭუჭყიანი ტანსაცმლის რომელი გროვის ქვეშ განისვენებდა მისი ძველი, ელემენტებზე მომუშავე კამერა, მაგრამ მაშინვე შეჩერდა და მისთვის სრულიად უჩვეულო, დაღვრემილი სახით ჩაილაპარაკა:

– ოჰ, ჯოუნსი, მგონი, პრობლემა გვაქვს.

ჯოუნსიმ უკანასკნელად შეავლო თვალი ცაზე დარჩენილ ცეცხლოვან რგოლებს (უკვე გახუნებულსა და დაპატარავებულს) და შემოტრიალდა. ბივერი სამზარეულოს ნიჟარასთან იდგა და დაბნეულად გასცქეროდა ოთახის ცენტრალურ ნაწილს.

– რა არის? კიდევ რა მოხდა? – ნუთუ ეს საზიზღარი, მწივანა, ოღნავ ათრთოლებული ხმა... მისია?

ბივერმა ხელი გაიწვდინა. საძინებლის კარი, სადაც მათ მაკარტი დააწვინეს, ღია იყო. სამაგიეროდ, ვილაცას სააბაზანოს კარი მიეხურა, რომელიც განზრახ არ მიკეტეს, რათა რიკი უშეცდომოდ გამოხმაურებოდა ბუნების ძახილს.

ბივერმა შეწუხებული, წვერგაუპარსავი სახე ჯოუნსისკენ მიაბრუნა.

– სუნს გრძნობ?

ჯოუნსი გრძნობდა, მიუხედავად იმისა, რომ კარიდან ცივი ჰაერი უბერავდა. ისევ ეთერს თუ ეთილის სპირტს ჰგავდა, ოღონდ ამჯერად დამატებით კიდევ რაღაც შერეოდა, ალბათ – ექსკრემენტები. და, შესაძლოა – სისხლი. და კიდევ – მეთანის მსგავსი, რომელიც მილიონობით წელი შახტში გროვდებოდა და ახლა ამოხეთქა. იმ სუნს არ ჰგავდა, სასკოლო ლაშქრობების დროს მათ სიცილს რომ იწვევდა. გაცილებით მძაფრი და საშინელი იყო. ამას ჩვეულებრივ აირებს თუ შეადარებდა კაცი, სხვას ვერაფერს. თითქოს ცხვირში გახრწნილი თუ ლპობაშერეული გვამის სუნი სცემდათ.

– იქით გაიხედე.

ბივერმა თითი იატაკისკენ გაიშვირა. ფიცრებზე კარიდან კარამ-

დე სისხლის ლაქები ჩანდა. თითქოს მაკარტის მოულოდნელად ცხვირიდან სისხლი წასკდომოდა.

მაგრამ, ჯოუნსის აზრით, ცხვირი აქ არაფერ შუაში იყო.

### 3

ცხოვრებაში ჯოუნსის რამდენჯერმე მოუხდა იმის გაკეთება, რაც საშინლად არ უნდოდა: ძმას, მაიკს, შეატყობინა, რომ დედა გულის შეტევით გარდაიცვალა; კარლას უთხრა, რომ სახლიდან წავიდოდა, თუ სმას თავს არ დაანებებდა; დიდ ლუს, თავის კომპანიონს, კემპ-აგავამის პალატაში, ჩასჩურჩულა, ლოგინში ჩაგისველებიაო. მაგრამ ყველაზე მძიმე მაინც ამ რამდენიმე ნაბიჯის გადადგმა და ოთახის გადაკვეთა აღმოჩნდა. თითქოს კომმარულ სიზმარში უნდა ევლო, მიწის ზემოთ ელივლივა და მნიშვნელობა არ ჰქონდა, ფეხებს სწრაფად ამოძრავებდა თუ ნელა.

ცუდ სიზმრებში ვერასდროს მოხვდებით საჭირო ადგილას, მაგრამ აქ მათ მოახერხეს ოთახის მეორე მხარეს გადაადგილება. ასე რომ, ჯოუნსის დასკვნით, ეს სიზმარი არ იყო. ორივენი სისხლის ლაქებს დააჩერდნენ, ყველაზე დიდი ლაქა ათცენტვიანისხელა იქნებოდა.

– ალბათ მორიგი კბილი მოსძვრა, – კვლავინდებურად ხმადაბლა ჩაილაპარაკა ჯოუნსიმ, – სხვა ახსნა ვერ მომიძებნია.

ბივმა უსიტყვოდ აზიდა წარბები და, როგორც ჩანს, კარს იქით შეხედვა გადაწყვიტა. შემდეგ ჯოუნსის თითის დაქნევით უხმო. ის გვერდულად, კედლის გაყოლებით მიუახლოვდა მას, თან სააბაზანოს კარს თვალს არ აცილებდა. საბანი ძირს ეგდო, თითქოს მაკარტი მოულოდნელად წამომხტარიყო ლოგინიდან. ბალიშს თავის კვალი ჯერაც ეტყობოდა, ლეიბი დაჭმუჭნილი ჩანდა. ცისფერ ზეწარს შუაში იისფერი სისხლის ლაქა ეცხო.

– ჩემი აზრით, იმ ადგილას კბილები არ იზრდება, – ჩაიჩურჩულა

ბივერმა და კბილსაჩიქნი გადაკვნიტა. წვეტიანი ჩხირი იატაკზე და-  
ეცა, – იქნებ თვიური დაეწყო?

პასუხის ნაცვლად, ჯოუნსიმ კუთხეზე მიუთითა, სადაც მაკარტის  
სისხლიანი საცვალი და ტრუსი ედო. ყველაზე ცუდ დღეში ეს ტრუ-  
სი იყო: რომ არა ელასტიკური ქამარი და ქსოვილის გადარჩენილი  
ნაწილი, კაცი მას იმ ტიპის უხამს სექსუალურ საცვალს მიამსგავსებ-  
და, პენტჰაუსის ცისფერ თაყვანისმცემლებს რომ უყვართ და წინას-  
წარვე ასკვნიან, რომ მორიგ შეყვარებულთან შეხვედრა აუცილებ-  
ლად ლოგინში უნდა დამთავრდეს.

– ლამის ქოთანში ჩაიხედე, – კვლავ ჩაიჩურჩულა ბივერმა.

– იქნებ სააბაზანოს კარზე დავაკაკუნოთ და ვკითხოთ, თავს რო-  
გორ გრძნობს?

– როგორ ვერ ხვდები, რომ იმის გაგება მინდა, თუ რა მოგველის!

– ბრაზიანად წაისისინა ბივერმა, ხელი მკერდზე მოისვა და კბილის  
ჩხირის დანაწევრებული ნარჩენები გადმოაფურთხა, – ბებერო, ასე  
მგონია, საცაა გავაფრენ.

ჯოუნსის გული გაშმაგებით უცემდა, სახეზე ოფლი ღვარად ჩა-  
მოსდიოდა, მაგრამ ოთახში მაინც შეაბიჯა. სახლის უდიდესი ნაწი-  
ლი განიავებული იყო, აქ კი კვლავაც განავლის, მეთანისა და ეთე-  
რის აუტანელი სუნი იდგა. ჯოუნსიმ იგრძნო, რომ ის ცოტაოდენი  
საჭმელიც კი, რისი გადაყლაპვაც მოასწრო, უკან ამოუვიდა. რომ არ  
ერწყია, მთელი სხეული დაძაბა. ლამის ქოთნისკენ ნაბიჯი გადადგა,  
მაგრამ შიგ ჩახედვას ვერ ბედავდა: საშინელებები ეჩვენებოდა –  
სისხლის ბულიონში მოცურავე ადამიანის ორგანოები, კბილები,  
მოჭრილი თავი.

– მიდი, – უთხრა ბივერმა.

ჯოუნსიმ თვალები დახუჭა, თავი დახარა, სუნთქვა შეიკავა და  
თვალეები ისევ გაახილა. არაფერი ჩანდა. არაფერი. მხოლოდ სუფთა  
ქაშანური ბრწყინავდა მქრქალად პლაფონის შუქზე. ცარიელი იყო.  
მან ხმაურით ამოისუნთქა ერთმანეთზე მიჭერილი კბილებიდან და

სისხლის ლაქების გვერდის ავლით ბივთან დაბრუნდა.

– არაფერია, – უთხრა მას, – გვეყო ეს კუკუმალულობანა.

თეთრეულის სათავსს გასცდნენ და ფიჭვის პანელებით მოპირკეთებულ ტუალეტის კართან შეჩერდნენ. ბივერმა ჯოუნსის კითხვის გამომხატველი მზერა მიაპყრო. მან თავი გადააქნია.

– შენი ჯერია. მე ახლახან გავიარე დანაღმული ველი.

– ის შენ აღმოაჩინე, – წასჩურჩულა ბივმა და ნიკაპი წინ ჯიუტად გამოსწია, – ჰოდა, შენვე მიხედე.

მხოლოდ ახლად, ყოველგვარი მიყურადების გარეშე, მოესმა ჯოუნსის კიდეც რაღაც ხმა – ჯერ ერთი, ეცნო, მეორეც, სხვა დამოკიდებულება გაუჩნდა მაკარტის მიმართ, რომელიც კინალამ შემოაკვდა. ეს ხმა, თითქოს, მუდმივად რჩებოდა მის გონებაში – ტრახ-ტრახ-ტრახ – და სულ უფრო ძლიერდებოდა. და ღმერთმა იცის, საიდან მოდიოდა.

– ამის დედაც! .. – შეიგინა ჯოუნსიმ და, თუმცა ჩვეულებრივი კილოთი საუბრობდა, ორივენი რაღაცისგან თითქოს შეხტნენ, – მისტერ მაკარტი, – შესძახა მან და დააკაკუნა, – რიკ! კარგად ხართ?

არ მიპასუხებს, – გაიფიქრა ჯოუნსიმ, – არ მიპასუხებს, რადგან მოკვდა. მოკვდა და ტახტზე ზის ელვისივით<sup>54</sup>.

მაგრამ მაკარტი ცოცხალი აღმოჩნდა. დაიკვნესა და თქვა:

– რაღაც ვერ ვარ კარგად, ბიჭებო. ცოტა ხანს უნდა ვიჯდე. თუ მოვახერხებ... – ისევ დაიკვნესა და ჩუმად, თითქმის მელოდიურად გააკუა. ჯოუნსი შეიჭმუნა, – ...ჩემს ბედს ძალღი არ დაჰყეფს.

ჯოუნსის აზრით, მაკარტი აზვიადებდა, მაგრამ თან აშკარად იტანჯებოდა ტკივილისგან. თითქოს ამის დასამტკიცებლად, მაკარტიმ გატანჯული ხმით ისევ დაიკვნესა. გაისმა მორიგი მელოდია და შემდეგ ყვირილი.

– მაკარტი! – ბივერმა ხელი სახელურს წაავლო, მაგრამ ვერ გა-

---

<sup>54</sup> ელვის პრესლი, როკ-ენ-როლის მეფე.

დაატრიალა. მაკარტის – ტყის პატარა ნობათს, კარი შიგნიდან ჩაკეტა. ბივი სახელურს დაეჯაჯგურა, – რიკ! გააღე, მეგობარო! – შესძახა მან ისეთი ხმით, თითქოს არაფერი მომხდარაო, თითქოს ეს მისი ჩვეულებრივი ხუმრობა იყო და სხვა არაფერი, ერთი მხიარული გათამაშება ბუნების წიაღში. მაინც ძალიან შეშინებული კი ჩანდა.

– კარგად ვარ, – გამოეხმაურა მაკარტი, – ბიჭებო, მე... მხოლოდ ნაწლავები უნდა გავისუფტაო.

მის სიტყვებს რამდენიმე მყრალი „გასროლა“ მოჰყვა. სისულელე იყო, რომ იმას, რაც ესმოდათ „გაზებს“ ეძახდნენ – კარს იქიდან ისეთი უხეში და ძარღვიანი ხმა ისმოდა, გეგონებოდათ, ადამიანი გასკდა და ხორცის ნაფლეთები აქეთ-იქით მოიფანტაო.

– მაკარტი! – იყვირა ჯოუნსიმ და კარზე დააბრაახუნა, – შემოგვიშვით!

მაგრამ უნდოდა კი შიგნით შესვლა? სულაც არა. ღმერთო, როგორ წუხდა, რომ მაკარტი ახლა ტყეში არ დახეტილებდა, ან ვინმე სხვას არ გადაეყარა. ყველაზე ცუდი კი ის იყო, რომ ტვინის სიღრმეში მოთავსებული ნუშისებური ჯირკვალი, ეს სასტიკი რეპტილია, ეუბნებოდა: ჯობდა, თავიდანვე ტყვია დაგეხალა და მოგეკლა. განა, კარლას „ანონიმური ნარკომანების პროგრამაში“ არ ეწერა, – ყველაფერს მარტივად შეხედე, სულელოო?

– მაკარტი!

– მომწყდით თავიდან! – მიუგო გაბრაზებულმა მაკარტიმ, – ნუთუ არ შეგიძლიათ, წახვიდეთ და მარტო დატოვოთ ადამიანი... აცალოთ, რომ დაიცალოს? ღმერთო ჩემო!

ტრახ-ტრახ-ტრახ! – გაისმა უფრო ახლოს და უფრო ხმამაღლა.

– რიკ! – ახლა უკვე ბივი იყვირა მოჩვენებითი უდარდელი კილოთი, თითქოს ყველაფერი ამაზე იყო დამოკიდებული, – სისხლდენა საიდან აგიტყდათ?

– სისხლდენა? – გულწრფელად გაიკვირვა მაკარტიმ, – ეგ საიდანლა მოიტანეთ?

შეძრწუნებულმა ჯოუნსიმ და ბივერმა ერთმანეთს გადახედეს.

ტრახ-ტრახ-ტრახ!

როგორც იქნა, ჯოუნსიმ ამ უცნაურ ხმაურს ყურადღება მიაქცია და როდესაც ყველაფერს მიხვდა, მაშინვე გასაოცარი შვება იგრძნო.

– ვერტიფრენი! – შესძახა მან, – გეფიცები, მას ეძებენ!

– ასე გგონია? – იკითხა ბივემა ისეთი სახით, თითქოს ჯადოსნური შელოცვა გაეგონოს.

ჯოუნსიმ თავი დაუქნია. შესაძლოა, ვერტიფრენი იმ უცნაურ ცეცხლოვან რგოლებს მისდევდა ან ცხოველების ჯგუფური გაქცევის მიზეზს არკვევდა, მაგრამ ჯოუნსის ამის გაგონებაც არ სურდა, ცეცხლოვანი რგოლები და ცხოველები სულ არ ადარდებდა, მთავარი იყო, მაკარტი მოეცილებინათ თავიდან, მეჩიასსა ან დერიში გაეგზავნათ.

– გარეთ გადი და დროშასავით აქნიე რამე.

– იქნებ...

ტრახ-ტრახ-ტრახ! – ახლა კარს იქიდან გაისმა ტკაცატკუცი ჭინთვის თანხლებით, რასაც მაკარტის კვნესაც მოჰყვა.

– ეზოში გავარდი! – შესძახა ჯოუნსიმ, – რაც გინდა, იქნიე, ოღონდ იმ დარტყმულებს დაშვება აიძულე! თუგინდ შარვალი ჩაიხადე და კანკანი იცეკვე, ოღონდ მოახერხე ეს!

– კარგი, – ბივი კარისკენ შეტრიალდა, მაგრამ მაშინვე შეკრთა და შეჰყვირა.

უეცრად, ბნელი კარადიდან უამრავი მივიწყებული ნივთი დაიძრა და ავბორცული ხითხითით დღის სინათლეზე გამოფრინდა. ჯოუნსიმ ხელების ქნევა და ყვირილი რომ შეწყვიტა, ერთადერთი რაც დაინახა, ეს ფურირემი იყო, რომელიც ღმერთმა იცის, საიდან გაჩნდა სამზარეულოში. კისერი კოხტად წაეგრძელებინა და მაგიდას ყნოსავდა. ჯოუნსიმ ღრმად, ნაწყვეტ-ნაწყვეტად ამოისუნთქა და კედელს მიეკრა.

– ერთი ამას დამიხედეთ! – ჩაიბურტყუნა ბივერმა, გონს მოეგო



და ცხოველისკენ დაიძრა, – აქედან მოუსვი, მეიბლ! – ბრძანა მან და ტაში შემოჰკრა, – წელიწადის დრო ხომ არ შეგეშალა? წადი, სანამ მთელი ხარ!

ფურირემი ცოტა ხანს კიდევ იდგა და ადამიანური წუხილით საე-სე, დიდრონი თვალებით მისჩერებოდა ბივერს. შემდეგ შეტრიალდა, თავი ღუმლის ზემოთ ჩამწკრივებულ ქვაბებსა და ჩამჩებს გაჰკრა და ხმაურით გადმოყარა.

ფურირემი კარისკენ გაიქცა, მისმა პატარა თეთრმა კუდმა გაი-ელვა და ბივერმა ნალვლიანად დახედა სუფთა ლინოლეუმზე დახვავ-ებულ ფუნას. თვითონაც გარეთ გავარდა.

#### 4

ცხოველთა დიდი მიგრაცია თითქმის დასრულდა. სამზარეულო-დან ბივერის მიერ გაგდებული ფურირემი თავზე გადაახტა კოჭლ მელიას, რომელსაც თათი, როგორც ჩანს, ხაფანგში დაეკარგა, და ტყეში გაუჩინარდა. ფარდულის თავზე ჩამოწოლილ ღრუბლებში ყა-ვისფერი, ქალაქის ავტობუსისხელა ვერტიფრენი გამოჩნდა, რომელ-საც ბორტზე თეთრი საღებავით ეწერა „ნგა“.

ნგა? – გაიფიქრა ბივერმა, – ნეტა, რა ჯანდაბას უნდა ნიშნავდეს? ალბათ ნაციონალური გვარდიის ავიაციას ბანგორიდან.

ვერტიფრენს მძიმე ცხვირი ძირს დაეწია. ბივერი ეზოში გავარდა და გაშმაგებით იქნევდა ხელებს.

– ჰეი! დაგვეხმარეთ! დაგვეხმარეთ, ბიჭებო!

ვერტიფრენმა დაშვება დაიწყო, სამოცდათხუთმეტი ფუტის სი-მალღებე თოვლი უკვე აქეთ-იქით გაფანტა. შემდეგ ბივერისკენ ისე დაიძრა, თითქოს თოვლს მძარღვევდა.

– ჰეი! აქ ავადმყოფი გყავს! ავადმყოფი! – ბივერი მთელი ხმით ღრიალებდა, დისკოთეკაზე მყოფი ბრეიკ-დანსის მოცეკვავისავით დახტოდა და გრძნობდა, რომ შტერივით იქცეოდა. მაგრამ რა ექნა? ასე იყო საჭირო.

ვერტიმფრენი მიუახლოვდა, მაგრამ უფრო ქვევით აღარ დაეშვა, ამას, როგორც ჩანს, არც აპირებდა. ბივს თავში საშინელმა აზრმა გაუელვა. ვერ ხვდებოდა, რომ ეს პარანოია ვერტიმფრენში მსხდომი ადამიანებისგან მოდიოდა. წინააღმდეგ შემთხვევაში, რატომ იგრძნობდა თავს ტირის სამიზნის ცენტრში მოთავსებულ ქინქლასავით: „მთარტყი ბივერს და მოიგე საათი-რადიო“.

ვერტიმფრენის გვერდითი კარი გაიღო და ლიობში მეგაფონიანი კაცი გამოჩნდა. უშველებელი პარკა ეცვა, მაგრამ ბივს ეს არ აწუხებდა. მას ის აღარდებდა, რომ უცნობს სახეზე ჟანგბადის ნილაბი ეკეთა. არასდროს სმენოდა მფრინავების შესახებ, რომლებიც სამოცდათხუთმეტი ფუტის სიმაღლეზე ჟანგბადის ნილბებს ატარებდნენ, ცხადია, თუ ჰაერი მოწამლული არ იყო.

კაცმა ნილაბთან მეგაფონი მიიტანა. ხმამაღლა და გარკვევით ლაპარაკობდა, ვერტიმფრენის ხმაურს ფარავდა, მაგრამ მისი ხმა, გამაძლიერებლის თუ ნილბის გამო, მექანიკურს წააგავდა, თითქოს ბივს რაღაც რობოტის მსგავსი ღვთაება მიმართავდა.

– რამდენი ხართ? – იკითხა ღვთაებამ, – თითებით მიჩვენეთ.

საგონებელში ჩავარდნილმა და შეშინებულმა ბივერმა, პირველ რიგში, საკუთარ თავსა და ჯოუნსიზე გაიფიქრა. ბოლოს და ბოლოს, ჰენრი და პიტი ჯერ არ დაბრუნებულიყვნენ. ორი თითი ასწია – გამარჯვების ნიშანი.

– არსად წახვიდეთ! – დაიგრგვინა ღვთაებამ, – რაიონში დროებით კარანტინია გამოცხადებული. გიმეორებთ, რაიონში დროებით კარანტინია გამოცხადებული. ამ ადგილის დატოვება გეკრძალებათ.

თოვა თითქმის შეწყდა, მაგრამ ქარი ძველებურად ძლიერად ქროდა და ვერტიმფრენის პროპელერებით გაფანტულ ყინულოვან მტვერს ბივერს სახეში აყრიდა. ბივერმა თვალები მოჭუტა და კვლავ ხელების ქნევას მოჰყვა, თან სუსხიან ჰაერს ისუნთქავდა. იძულებული გახდა, კბილსაჩიჩქნი გადაეგდო, რათა შემთხვევით არ გადას-

ცდენოდა (ტყუილუბრალოდ როდი აფრთხილებდა დედა, თუ მოგკლავს, ეგ მოგკლავს, გადაგცდება და ფეხებს გაფშეკო).

– როგორ თუ კარანტინი? – იღრიალა მან, – აქ ავადმყოფი გვყავს, ჩამოდით და წაიყვანეთ!

მას მშვენივრად ესმოდა, რომ ძრავების გუგუნში მის ხმას ვერავინ გაიგონებდა, მას ხომ, დალახვროს ეშმაკმა, მეგაფონი არ ჰქონდა, მაგრამ ბლავილს მაინც არ წყვეტდა. როგორც კი სიტყვა „ავადმყოფი“ წამოსცდა, მიხვდა, რომ ვერტიმფრენში მყოფი კაცი შეცდომაში შეიყვანა: ისინი ხომ სამნი იყვნენ და არა ორნი!

უკვე სამი თითის აწევას აპირებდა, როდესაც ჰენრი და პიტი გაახსენდა. მართალია, ახლა იქ არ იყვნენ, მაგრამ თუ ცუდი არაფერი მოსვლოდათ, საცაა გამოჩნდებოდნენ. მაშ, რამდენი იყვნენ სინამდვილეში? ორი – აშკარად მცდარი პასუხი იყო. სამი? ხუთი? რომელი აერჩია? როგორც მსგავს სიტუაციებში ემართებოდა ხოლმე, ბივერს ახლაც გადაეკეტა გონება. ძალღმაც ასე იცის ღრანჭის მოქცევა. როცა ასეთი რამე სკოლაში ხდებოდა, გვერდით ჯოუნსი ან ჰენრი ჰყავდა, რომლებიც ყოველთვის მზად იყვნენ მის დასახმარებლად. აქ კი ვერავინ უშველიდა, მხოლოდ ტრახ-ტრახ-ტრახ! სჭრიდა ყურს. თოვლი სახეს უწვავდა, ყელსა და ფილტვებში ცივი ჰაერი ჩასლიოდა და ხველას იწვევდა.

– არსად წახვიდეთ! ვითარება ოცდაოთხიდან ორმოცდარვა საათის განმავლობაში გაირკვევა! თუ საჭმელი გჭირდებათ, ხელები თავზემით გადაიფვარედინეთ.

– მეტნი ვართ! – ისეთი ძალით იყვირა ბივერმა, რომ თვალწინ ციციანათელები აუკიაფდა, – ავადმყოფი გვყავს! ჩვენ... ავადმყოფი გვყავს!

ვერტიმფრენში მყოფმა ილიოტმა მეგაფონი ჩამოსწია და საჩვენებელი და ცერა თითებით წრე შეკრა, რაც ნიშნავდა: „კარგი! გასაგებია!“

ბივერს სიმწრისგან ტირილი მოუნდა, მაგრამ ამის ნაცვლად, ხუთი გაფარჩხული თითი ასწია – მათი ოთხეულისა და კიდევ ერთის, მაკარტის აღსანიშნავად. თვითმფრინავში მყოფმა კაცმა ყურადღებით ჩამოხედა და გაუღიმა. წამით ბივერმა გაიფიქრა, – მგონი, სასწაული მოხდა და იმ ნიღბიან დარტყმულს სათქმელი გავაგებინეო, – მაგრამ აღმოჩნდა, რომ იმ დარტყმულმა სასოწარკვეთილი ბივერის ნიშანი მისალმებად მიიღო, საპასუხოდ ხელი დაუქნია და მფრინავს რალაც უთხრა. ვერტიმფრენმა, წარწერით „ნგა“, ნელ-ნელა მალლა აფრენა დაიწყო. თოვლისა და თეთრი, სუსხიანი მტვრის მორევში მდგარი ბივერი კი შეუჩერებლივ ბლაოდა:

– ჩვენ ხუთნი ვართ და დახმარება გვჭირდება! ხუთნი ვართ, თქვენი დედაც! დაგვეხმარეთ!

ვერტიმფრენი ღრუბლებში გაუჩინარდა.

## 5

ჯოუნსიმ, ცხადია, რალაც გაიგონა, კერძოდ, მეგაფონით გაკეთებული განცხადება, მაგრამ გონებით ვერაფერი აღიქვა, იმდენად შეშფოთებული იყო მაკარტის გამო, რომელიც რამდენიმე ჩუმი შეძახილის შემდეგ ხმას აღარ იღებდა. კარიდან გამოსული სუნი კი თანდათანობით ძლიერდებოდა.

– მაკარტი! – გასძახა მან, როგორც კი ზღურბლზე ბივერი გამოჩნდა, – გააღეთ, თორემ შემოვამტვრევთ!

– თავიდან მომწყდით! – იყვირა მაკარტიმ წრიპინა, თითქოსდა სხვისი ხმით, – კუჭში უნდა გავიდე, სულ ესაა, კუჭში უნდა გავიდე! თუ გავალ ყველაფერი კარგად იქნება.

ასეთმა პირდაპირობამ იმ კაცისგან, რომელსაც სულ „ღმერთო ჩემო“ ეკერა პირზე, ჯოუნსი იმაზე მეტად შეაშინა, ვიდრე გასისხლიანებულმა ზეწარმა და თეთრეულმა. ბივერს მიუბრუნდა, ყურადღება აღარ მიუქცევია, რომ ის ერთიანად თოვლიანი იყო და თოვლის პაპას ჰგავდა.

– წამოდი, კარი შევამტვრიოთ. როგორმე უნდა დავეხმაროთ.

ბივერი დაბნეული და დაქანცული ჩანდა. ლოყებზე მიკრული თოვლი ნელ-ნელა ზედ ადნებოდა.

– არავითარ შემთხვევაში. ვერტიმფრენში მყოფმა კაცმა კარანტინის შესახებ გაგვაფრთხილა. იქნებ, ეს ტიპი დასნებოვნებულია? გაიხსენე, ლოყაზე წითელი ლაქა...

მიუხედავად იმისა, რომ მაკარტის მიმართ დიდად კეთილგანწყობილი არ იყო, ჯოუნსიმ თავი ძლივს შეიკავა, ძველი მეგობრისთვის სილა არ გაეწნა. დაავიწყდა შარშანდელი მარტი, როცა კემბრიჯში, ქუჩაში ეგდო და სისხლისგან იცლებოდა. რა მოხდებოდა, შიდსის შიშით, მასაც არავინ მიჰკარებოდა და დახმარების გარეშე დაეტოვებინათ? გვერდი აევლოთ, რადგან სეზონის შესაფერისი ხელთათმანები თან არ ჰქონდათ?

– ბივ, ჩვენ უკვე გვქონდა მასთან ურთიერთობა. თუ ეს მართლაც ინიფექციაა, უკვე დავავადდებოდით. აბა, რას იტყვი?

ბივერმა დუმილი ამჯობინა. ჯოუნსის ტვინში, ჩვეულებრივ, რალაც გატკაცუნდა და წამით ბივერი დაინახა, მასთან ერთად კი ბიჭი მოტოციკლეტისტის ძველი, გაცვეთილი ქურთუკით, რომელიც ყვიროდა: „ეი, ბიჭებო, გეყოფათ! გეყოფათ, თქვენი დედაც! “

დაინახა და მიხვდა, რომ ყველაფერი კარგად იყო.

ბივერმა ნაბიჯი წინ წადგა:

– ეი, რიკ! რას იტყვი, რომ გავალოთ? ჩვენ მხოლოდ დახმარება გვინდა.

კარს იქიდან არაფერი ისმოდა – არც კვენესა, არც სუნთქვა, არც ტანსაცმლის შრიალი, მხოლოდ გენერატორის თანაბარი გუგუნის და ვერტიმფრენის შორეული ტრახ-ტრახ.

– კარგი – თქვა ბივერმა და მოულოდნელად პირჯვარი გადაიწერა, – შევამტვრიოთ, ამის დედაც! ..

მათ ერთდროულად დაიხიეს უკან და კარისკენ გვერდულად შეტრიალდნენ, მექანიკურად ტელესერიალებში ნანახ პოლიციელებს

მიჰბაძეს.

– სამ დათვლაზე, – თქვა ჯოუნსიმ.

– შენი ფეხი ხომ გაუძლებს, ბებერო?

თითქოს ჯიბრზე, ჯოუნსის თეძომაც და ფეხმაც თავი შეახსენა, თუმცა უკანასკნელ წუთამდე ამას ვერ გრძნობდა.

– კარგად ვარ, – თქვა მან.

– ჰო, ჩემი უკანალი კი მსოფლიოს მბრძანებელია.

– სამ დათვლაზე. მზად ხარ? – ჯოუნსი ბივერის თავის დაქნევას აღარ დაელოდა და წარმოთქვა:

– ერთი... ორი... სამი.

ისინი ერთდროულად გაქანდნენ კარისკენ და მხრებით შეეჯახნენ. კარი ისე ადვილად დაემორჩილა მათ ძალას, რომ ერთმანეთს ხელი სტაცეს, წაბორძიკდნენ, სააბაზანოში შეცვივდნენ და სისხლით მოთხვრილ კაფელზე ფეხი დაუსხლტათ.

– ამის დედაც! .. – თქვა ბივერმა და ხელისგული პირზე მიიფარა.

ამჯერად კბილსაჩიჩქნი არ ედო, – ამის დედაც! .. ამის დედაც! ..

ჯოუნსიმ აღმოაჩინა, რომ სათქმელი არაფერი ჰქონდა.

# თავი მეხუთე დადიტსი

ნაწილი პირველი

1

– ქალბატონო, – თქვა პიტმა.

კაპიუშონიანქურთუკიანმა ქალმა არაფერი უპასუხა. ნახერხით დაფარულ ბრეზენტზე იწვა და დუმდა. მხოლოდ ცალი თვალი მოუჩანდა, რომლითაც პიტს მისჩერებოდა, თუმცა, ალბათ, ვერ ხედავდა. იქნებ, რულეტივით დატრიალებული წყეული სამყაროს ცენტრს შესცქეროდა? ვინ იცის. პიტს ჟრუანტელმა დაუარა. ცეცხლი ტკაცუნობდა, თანდათან ღვივდებოდა და სითბოს გამოჰყოფდა. ჰენრი თხუთმეტი წუთის წინ გავიდა და, პიტის გამოთვლით, სამ საათზე ადრე ვერ დაბრუნდებოდა. სამი საათი. არადა, უკვე ცუდად გრძნობდა თავს უცნობი ქალის საზარელი, უსიცოცხლო მზერისგან.

– ქალბატონო, – გაიმეორა მან, – გესმით ჩემი?

დუმილი. თუმცა ქალმა ერთხელ დაამთქნარა და პიტმა შეამჩნია,

რომ მას კბილების თითქმის ნახევარი აკლდა. ნეტა, ასეთი რა უქნეს?

ნუთუ ეს აინტერესებდა?

ჰოც და არაც, ცოტაოდენი ფიქრის შემდეგ დაასკვნა პიტმა. ცხადია, ცნობისმოყვარეობა არ ასვენებდა, ან ვის მოასვენებდა მის ადგილზე, მაგრამ მაინც ჯობდა, მისგან თავი შორს დაეჭირა. რა საჭიროა იცოდეს, ვინ არის ეს ქალი, ვინ არის რიკი და რა შეემთხვა? „ისინი დაბრუნდნენ! – გაჰკიოდა ქალი, როდესაც ცაში ცეცხლოვან რგოლებს მოჰკრა თვალი, – დაბრუნდნენ!“

– ქალბატონო! – დაუძახა მესამედ.

დუმილი.

ქალმა ახსენა, რომ რიკი ერთადერთი იყო, ვინც გადარჩა, მერე კი დაიყვირა: „ისინი დაბრუნდნენ!“ შესაძლოა, ცეცხლოვან რგოლებს გულისხმობდა. მას შემდეგ მხოლოდ აბოყინებდა და გაზებზე გადიოდა, ერთხელ დაამთქნარა კიდეც და უკბილო ღრძილები გამოუჩნდა... და ეს მზერა... საზარელი, უსიცოცხლო მზერა. ჰენრი მხოლოდ თხუთმეტი წუთის წინ წავიდა: მაშინ პირველის ხუთი წუთი იყო, ახლა კი პიტის საათი პირველის ოც წუთს უჩვენებდა. ეს დაწყევლილი დღე, ალბათ, საოცრად გაიწელებოდა. და თუ სურდა, გაეძლო (გამუდმებით ფიქრობდა ერთ მოთხრობაზე, რომელიც მერვე კლასში წაიკითხეს, ოღონდ ავტორს ვერ იხსენებდა: ბიჭმა მოხუცი კაცი იმიტომ მოკლა, რომ მის გამონედვას ვერ უძლებდა. მაშინ პიტს ეს არ ესმოდა, სამაგიეროდ, ახლა მიხვდა. დიახ, სერ), მაშინ, უნდა გამხნევებულიყო.

– ქალბატონო, გესმით ჩემი?

დუმილი. მხოლოდ საზარელი, გაყინული მზერა.

– მანქანასთან უნდა დავბრუნდე. მგონი, იქ რაღაც დამრჩა. ჩემს მოსვლამდე არაფერი მოგივათ, ხომ ასეა?

არავითარი პასუხი – მხოლოდ ხმაურით გამოუშვა გაზები, თან



გაიჭინთა და სახე ისე დაემანჭა, თითქოს რაღაც ეტკინა... ხმების მიხედვით, ეს მართლაც მტკივნეული უნდა ყოფილიყო. და თუმცა პიტმა წინდახედულად იბრუნა მისგან პირი, ცხვირში მაინც ეცა მყრალი, საშინელი, არაადამიანური სუნი, რომელიც საქონლის ფუნისას აშკარად არ ჰგავდა. ბავშვობაში ლაიონელ სილვესტრთან მუშაობდა და ხშირად წველიდა ძროხებს. ისინიც ხშირად უშვებდნენ გაზებს, როცა პიტი ტაბურეტზე იჯდა და ცურებს ექაჩებოდა – ახლაც ახსოვდა დაჭაობებული ბალახის მძიმე, მყავე სუნი. მაგრამ ეს სულ სხვა იყო. იმას ჰგავდა... თითქოს ბავშვობაში დაბრუნდა და თავის პირველ ქიმიურ ცდას ატარებდა სახელმძღვანელოს მიხედვით, შემდეგ კი ყელში ამოუვიდა და გაბრაზებულმა ყველაფერი ერთმანეთში აურია, იქნებ აფეთქდესო.

პიტი მიხვდა, რომ სწორედ ეს არ ასვენებდა, ეს უშლიდა ნერვებს. ცხადია, სისულელე იყო, რადგან ადამიანები ასე, უბრალოდ, არ ფეთქდებიან, დახმარების გარეშე არაფერი გამოვიდოდა. ამის გამო, შიშისგან გული ელეოდა.

პიტმა კოცონს ჰენრის მოტანილი შეშის ორი ნაჭერი შეუკეთა, დაფიქრდა და მესამეც დაუმატა. კოცონის თავზე ოქროსფერი ნაპერწკლების თაიგული აცეკვდა, თავბრუდამხვევი სისწრაფით დატრიალდა და გაქრა.

– მე იქამდე დავბრუნდები, სანამ დაიწვება, მაგრამ თუ გნებავთ, შეშა დაუმატეთ, არ მოგერიდოთ. შევთანხმდით?

დუმილი. უეცრად მოუნდა, ქალისთვის ხელი ჩაეკლო და შეეჯანჯღარებინა. მაგრამ მანქანამდე ერთ-ნახევარი მილი იყო. უკანაც იმდენივე. ძალა უნდა შეენახა. გარდა ამისა, ვაითუ, ქალს კიდევ გაეშვა გაზები ან მისთვის პირდაპირ სახეში შეებოყინებინა.

– კარგი, ასე მოვიქცეთ. დუმილი თანხმობის ნიშანია, როგორც მისის უაიტს უყვარდა თქმა, მეოთხე კლასში.

პიტმა მუხლზე ხელი იტაცა და წამოდგა, სახე დაემანჭა, დაეღრიჯა, კინალამ დაეცა, მაგრამ ბოლოს წელში მაინც გაიმართა. მხოლოდ

იმიტომ, რომ ულუდოდ არსებობა არ შეეძლო – ვერ გაძლებდა. ლუდს კი არავინ უფეშქაშებდა, თვითონ უნდა ეშოვა. დიახ, შესაძლოა, ლოთი იყო. თუმცა, რაღა „შესაძლოა“. ამისთვის, ადრე თუ გვიან, უნდა მიეხედა. ჯერჯერობით, საკუთარი თავის იმედად ყოფნა და მოქმედება უწევდა, რადგან იმ გათიშული ძუკნასგან არაფერი დარჩენილიყო გულის ამრევი გაზებისა და საზარელი, გაყინული მზერის გარდა. თუ ძალიან შესცივდებოდა, კოცონს შემას შეუკეთებდა, მაგრამ შემცივნებას ვერც მოასწრებდა, რადგან პიტი კოცონის ჩაქრობამდე დაბრუნდებოდა. სულ რაღაც ერთ-ნახევარი მილი უნდა გაეველო. მისი ფეხი ამ მანძილს გაუძლებდა.

– მალე დავბრუნდები, – თქვა და ფეხი მოისრისა. სტკიოდა, მაგრამ უფრო ნაკლებად. აშკარად უფრო ნაკლებად. მხოლოდ ლუდს ჩადებდა პაკეტში, შესაძლოა, კრეკერიც წამოეღო ამ ძუკნასთვის, და მაშინვე დაბრუნდებოდა, – დარწმუნებული ხართ, რომ არაფერი გიჭირთ?

დუმილი. და ეს საშინელი მზერა.

– დუმილი თანხმობის ნიშანია, – გაიმეორა პიტმა და გორაკისკენ ბრეზენტით გაკვალულ ზოლს გაუყვა. ყოველი ათი-თორმეტი ნაბიჯის შემდეგ მუხლის დასაბეღად ჩერდებოდა. ერთხელ უკან მიიხედა. ნაცრისფერი დღის მქრქალ შუქში კოცონი წერტილად მოეჩვენა.

– რა სისულელეა, – ჩაილაპარაკა და გზა განაგრძო.

## 2

გორაკის ძირიდან ნახევარი აღმართი უჭირველად აიარა და ის იყო, გაბედა და სიჩქარეს მოუმატა, რომ წყეული მუხლი – ჰა-ჰა, მაინც გაბრწყინდა – ისევ გაჭირვეულდა და ისევ უპწკინა, რომ იქვე ჩაიკეცა, ტკივილისგან კბილები გააღრჭიალა და გემრიელად შეიკურთხა.

სანამ თოვლზე იჯდა და იგინებოდა, მიხვდა, რომ გარშემო რა-

დაც უჩვეულო ხდება. მოზრდილმა ირემმა გვერდით ისე ჩაუარა, ზედაც არ შეუხედავს, თუმცა გუშინ თავეჭუდმოგლვეჯილი გაურბოდა. მას წითური ციყვი მისდევდა და ლამის ფეხებში ებლანდებოდა.

პიტი თოვლზე იჯდა, – დიდრონი ფანტელები მიწაზე სუდარასავით ეფინებოდა, – ფეხი გაეშალა და პირდაღებული იყურებოდა. გზაზე სხვა ცხოველებიც გამოჩნდნენ, ძირითადად, ირმები. მოდიოდნენ, მოხტოდნენ, თითქოს უბედურების ადგილს გაურბოდნენ. ცოცხალი ტალღა აღმოსავლეთისკენ მიემართებოდა.

– საით გაგიწევიათ, ბიჭებო? – ჰკითხა მან კურდღელს, რომელიც მიხტუნაობდა და ყურები უკან გაეკრა, – შეჯიბრებაა თუ დისნეის მულტფილმებისთვის მსახიობებს არჩევთ? იქნებ...

მას სიტყვა გაუწყდა, პირი გაუშრა და ენა ჩაუვარდა. ხეებს შორის წოლისგან ცხიმდაგროვილი მურა დათვი მოაბიჯებდა და თუმცა პიტისკენ არც გაუხედავს, ამ უკანასკნელს საბოლოოდ გაუქრა ილუზია ჩრდილოეთის დიდ ტყეებში საკუთარ სტატუსზე. ის ახლა, მონადირე კი არა, მხოლოდ და მხოლოდ, გემრიელი თეთრი ხორცის მასა იყო, რომელიც, რაღაც შემთხვევითობის წყალობით, ჯერ კიდევ სუნთქავდა. უიარალოდ ის ირმის ფეხებში გაბლანდულ ციყვზე უფრო უმწეოდ გამოიყურებოდა. ციყვიც კი უახლოეს ხის კენწეროზე აძვრებოდა და დაემალებოდა დათვის. ის, რომ დათვი ყურადღებას არ აქცევდა, პიტისთვის დიდი ვერაფერი ნუგეში იყო – უკან, ალბათ, სხვებიც მოჰყვებოდნენ, რომლებიც მასავით დაბნეულები არ იქნებოდნენ.

როცა დარწმუნდა, რომ დათვი აღარ იყო, წამოდგა, ღმერთოო ჩემო, როგორ უცემდა გული! ის უტვინო კუანა ქალი მარტო როგორ დატოვა! თუმცა, დათვის თავდასხმის შემთხვევაში, მაინც ვერ დაეხმარებოდა. მოკლედ, მანქანიდან თავისი და ჰენრის იარაღი უნდა გადმოეღო, თუ, რა თქმა უნდა, მათ თრევას შეძლებდა.

მომდევნო ხუთი წუთის განმავლობაში, სანამ გორაკის წვერზე

ადიოდა, მის ფიქრებში პირველი ადგილი იარაღს ეჭირა, ლუდმა მეორე ადგილზე გადაინაცვლა. მაგრამ დაშვებისას ლუდმა ყველა საფრთხე დაავიწყა. ბოთლებს ტომარაში ჩააწყობდა და მხარზე მოიკიდებდა. გზაში არ დაღევდა. მხოლოდ მაშინ გადაყლურწავდა, კოცონის პირას რომ დაჯდებოდა. ეს მისი ჯილდო იქნებოდა. ჯილდოდ მიღებულ ლუდს კი ვერაფერი შეედრებოდა.

შენ ლოთი ხარ. იცი ეს, არა? დედანატირები ალკოჰოლიკი.

დიახ, და მერე რა? ის, რომ სხვა იმ ქალს არ დატოვებდა. ვერავინ გაიგებს, ნახევრად კომატოზურ მდგომარეობაში მყოფი ქალი, ტყეში მარტო რომ დააგდო და მაცოცხლებელი სითხის საშოვნელად წავიდა. ახსოვდა, რომ ცარიელი ბოთლები შორს უნდა მოესროლა. თუმცა ჰენრი მაინც მიხვდებოდა – ისინი ერთმანეთის ვერაფერს გამოაპარებდნენ. არ იცოდა, ეს აზრობრივი კავშირი იყო თუ სხვა რამ, მაგრამ აღიარებდა, რომ ჰენრი დევლინი ჯერ ვერავის გაეცურებინა.

პიტე ფიქრობდა, რომ ჰენრი ლუდის გამო ამბავს არ ატყებდა. შესაძლოა, ამის თაობაზე მასთან დალაპარაკებაც გადაეწყვიტა. დიახ, ალბათ, უკვე მოვიდა დრო. ალბათ ღირდა, ჰენრისთვის დახმარება ეთხოვა. ადრე თუ გვიან, მოუწევდა. მაგრამ ახლა პიტს სინდისი აწუხებდა. პიტერ მურს ქალის საფრთხეში მიტოვება არ ახასიათებდა. ეს არცთუ ღირსეული საქციელი იყო. მაგრამ ჰენრი... ჰენრისაც რაღაც სჭირდა. პიტმა არ იცოდა, გრძნობდა თუ არა ამას ბივერი, მაგრამ ჯოუნსი კი ნამდვილად ხვდებოდა. ჰენრი შეცვლილი ეჩვენებოდა. სასოწარკვეთილი. შესაძლოა...

და უკნიდან გემრიელი ხრაშინაბრუში მოესმა. პიტმა შეჰყვირა და შეტრიალდა. მუხლმა საშინელი ძალით გაჰკრა, მაგრამ ტკივილი ვერც კი იგრძნო. დათვი! დათვმა – იმან, პირველმა, ან იქნებ სხვამ – ზურგიდან მოუარა...

დათვი კი არა, ცხენირემი აღმოჩნდა. ამაყად ჩაუარა პიტს, მან კი შვებით ამოისუნთქა, უწმაწური გინებით დაეცა თოვლზე და ფეხზე

ხელი იტაცა. სახე მოფარფატე ფიფქებს შეუშვირა და გაიფიქრა, – რა სულელი ვარო. ტვინგაწყალებული ალკოჰოლიკი!

ყველაზე მეტად ნერვიულობდა, ფენმა საბოლოოდ არ მიმტყუნოსო. ალბათ რაღაც გაუწყდა და თოვლში უნდა გდებულებო, უმწეოდ ედევნებინა თვალი მშობლიური ადგილებიდან აყრილი ცხოველების უცნაური მსვლელობისთვის, სანამ ჰენრი თოვლმავლით არ მოვიდოდა და არ ჰკითხავდა: „აქ რა ჯანდაბას აკეთებ? რატომ მიატოვე ის ქალი? დალახვროს ეშმაკმა, თითქოს არ ვიცოდი, ასე რომ იქნებოდა!“

ბოლოს მოახერხა და წამოდგა, ოღონდ ამჯერად უხერხულად მიათრევდა ფეხს. ეს თოვლში ცხენირმის ახალი, ცხელი ფუნის გვერდით წოლას მაინც ჯობდა. უკვე მოჩანდა ამოყირავებული, ნახევრად დათოვლილი სკაუტი. თავს უმტკიცებდა, თავიდანვე რომ დაცემულიყავი, კოცონთან მჯდარ ქალთან მივბრუნდებოდი, მაგრამ ახლა, როცა თითქმის სკაუტთან ვარ, წინ წასვლა უფრო ადვილიაო. მთავარი მიზანი თოფის შოვნა იყო, ლუდი კი – მხოლოდ სასიამოვნო წვრილმანი. იმდენი ქნა, სანამ თავი არ დაირწმუნა. აი, უკან დაბრუნება კი... ამას როგორღაც მოახერხებდა. აქამდე ხომ მოაღწია?

სკაუტამდე, სულ რაღაც, ორმოცდაათი იარდიღა რჩებოდა, როდესაც ციდან ვერტიფრენის ტრაბ-ტრაბ-ტრაბ მოესმა. გახარებულმა თავი ასწია, გადაწყვიტა, მის მოახლოებას დალოდებოდა და მფრინავებისთვის ხელი მერე დაექნია – ღმერთი ხომ ხედავდა, რომ ზეციდან დახმარება, უპირველეს ყოვლისა, მას სჭირდებოდა.

მაგრამ ვერტიფრენმა დაბლა დაწეული ღრუბლების ფენა ვერ გაარღვია. პიტმა წამით მოჰკრა თვალი მუქ სილუეტს, მის თავს ზემოთ, ნაცრისფერ ცაში რომ გამოჩნდა, მაგრამ ჩრდილმა გაიელვა და გაქრა: ვერტიფრენის ხმა აღმოსავლეთისკენ თანდათან მიწყდა – სწორედ იქით, საითაც ცხოველები გარბოდნენ. უკმაყოფილების თხელი ფენის ქვეშ პიტმა მორცხვად მიმალული საზიზღარი შვება

იგრძნო: ვერტიფრენი რომ დაშვებულებო, ლუდამდე ველარ მიაღწევდა, არადა, ამხელა გზა ხომ ამისთვის გამოიარა.

### 3

ხუთი წუთის შემდეგ პიტი უკვე მუხლებზე იდგა და გადაბრუნებულ სკაუტში შეძრომას ცდილობდა. სწრაფად მოისაზრა, რომ მორიგი შემოტევა ნებისმიერ წუთს იყო მოსალოდნელი (ჯინსის შიგნით მუხლი საშინლად გასივებოდა) და თოვლით დაფარულ კაბინაში შესრიალდა. იქაურობა საოცრად არ მოეწონა – სივიწროვე და მძაფრი სუნი ისეთ შთაბეჭდილებას უქმნიდა, თითქოს ჰენრის ოდეკოლონით გაჟღენთილ სამარეში იმყოფებოდა.

ნაყიდი პროდუქტი უკანა სავარძელზე გაფანტულიყო, პიტმა მხოლოდ პური, კონსერვები და სოსისის პაკეტი (ბებერი გოსლინი ხორცად რომ ასაღებდა) დაინახა. ახლა მას მხოლოდ ლუდი სჭირდებოდა. სავარაუდოდ, სკაუტის გადაბრუნებისას, მხოლოდ ერთი ბოთლი გაუტყდათ. აი, ასე უმართლებს ლოთებს! სალონშიც ლუდის სუნი იდგა, რადგან ავარიის წინ ლუდს მიირთმევდა, ბოთლი ხელიდან გაუვარდა და მშვენიერი სითხე დაეღვარა. მოსწონდა ეს სუნი – ჰენრის ოდეკოლონს კი არ ჰგავდა... ფუი! იმ ჭკუანალრძობი ქალივით ყარდა. პიტი ვერაფრით მიმხვდარიყო, რატომ აგონებდა ოდეკოლონის სურნელი კუბოს, საფლავებსა და სამგლოვიარო გვირგვინებს, მაგრამ ასე იყო და რა ექნა.

– ამ უსიერ ტყეში ოდეკოლონის შესხურება საიდან მოგაფიქრდა, ბებერო მაწანწალავ? – იკითხა მან. სიტყვებს პატარა თეთრი რგოლები გამოჰყვა. ჰენრი რომ ყოფილიყო, ცხადია, უპასუხებდა, – ეს ფიქრადაც არ გამივლია, მანქანაში მხოლოდ ლუდის სუნიაო. და მართალიც იქნებოდა.

უეცრად პიტს ის სასიამოვნო შესახედაობის ქალი მოაგონდა, – პირველად ამდენი ხნის განმავლობაში, – ბრიჯტონის აფთიაქთან

მანქანის გასაღები რომ დაკარგა. როგორ მოახერხა მაშინ გასაღების პოვნა? როგორ მიხვდა თითქმის უხილავი ნიუანსების მიხედვით, რომ ქალი მასთან ერთად ვახშობობას არ აპირებდა, ის კი არა, მისი დანახვა, მასთან მიახლოებაც კი აღარ სურდა? ნუთუ არარსებული ოდეკოლონის შეგრძნებაც იმ შემთხვევას ჰგავდა? ეს მან არ იცოდა. მხოლოდ ხვდებოდა, რომ საქმე კარგად არ იყო. ტყუილად ხომ არ შეერია ტვინში ოდეკოლონის სუნი სიკვდილზე ფიქრს.

დაივიწყე ეს სისულელე. საკუთარი თავის დაშინება გადაგიწყვეტია და ეგაა. ერთია – როცა მართლა ხედავ ხაზს, და სულ სხვაა – ათასგვარი საშინელების გამოგონება. ყველაფერი დაივიწყე და ის გააკეთე, რისთვისაც მოხვედი.

– კარგი აზრია, მაგის დედაც! .. – თქვა პიტმა.

მაღაზიის პაკეტები ქალაღდის კი არა, პლასტიკატის იყო, თანაც სახელურიანი: ბებერი გოსლინი პროგრესს ფეხს უწყობდა. პიტმა ერთ-ერთისკენ ხელი გაიწვდინა და უეცრად მარჯვენა ხელისგულში მტკივნეული ჩხვლეტა იგრძნო. წყეული გატეხილი ბოთლი! მოახერხა და ხელი გაიჭრა, სავარაუდოდ, საკმაოდ ღრმად. იქნებ ქალის მიტოვების გამო დაისაჯა? თუ ასეა, კაცურად უნდა მოქცეულიყო და მადლობა ეთქვა, რომ ასე ადვილად გადარჩა.

მან რვა ბოთლი მოხიკა და სკაუტიდან გამოძრომა დააპირა, მაგრამ გადაიფიქრა. ნუთუ აქ მხოლოდ ამ რვა ქეციანი ბოთლისთვის მოვ იდა?

– არა, ბატონო, – ჩაიბურტყუნა პიტმა და დარჩენილი შვიდიც აიღო. არ დაეზარა და თითოეული მათგანი გულდასმით შეათვალიერა, თუმცა სკაუტში გატარებული ყოველი დამატებითი წუთი სულს უმძიმებდა. ბოლოს, უკუსვლით დაიწყო გამოძრომა, ცდილობდა, შიში დაეთრგუნა და არ ეფიქრა, რომ რომელიმე მტაცებელი უკნიდან შიგ კვერცხებში ეცემოდა. პიტის დასჯა, ნაწილი მეორე.

არა, არც ასე ძალიან ეშინოდა, მაგრამ გაცილებით სწრაფად გამოცოცდა. ეგაა, რომ მუხლი ასტკივდა. კვნესით გაგორდა თოვლში,

თან ცას შეჰყურებდა, საიდანაც რწევა-რწევით, მედიდურად ეშვე-  
ბოდა ქალის საუკეთესო საცვლების მსგავსი, მაქმანიანი ფანტელე-  
ბი. აბა, გამიშვი, საყვარელო, – ცდილობდა მუხლის დაყოლიებას, –  
გამიშვი, შე ბოზო, ნულარ წელავ!

სწორედ მაშინ, როდესაც ფიქრობდა, ყველაფერი დასრულდაო,  
ტკივილი მოეშვა. პიტმა ფილტვებიდან ჰაერი შიშინით ამოუშვა და  
შიშით შეხედა პაკეტს, საიდანაც უზარმაზარი წითელი ასოები მე-  
გობრულად უპაჭუნებდა თვალს: „გმადლობთ, რომ ჩვენს მაღაზიაში  
შეიძინეთ!“

– თითქოს აქ სხვა მაღაზიაც იყოს, ბებერო არამზადავ, – ჩაიბურ-  
ტყუნა პიტმა და გადაწყვიტა, რომ უკან დაბრუნების წინ ერთი ბოთ-  
ლის დაღევა არ აწყენდა. დალახვროს ეშმაკმა, ასე ხომ ტვირთის  
თრევა გაუადვილდებოდა.

ერთი ბოთლი ამოაძვრინა, თავსახური მოხადა და თითქმის ნა-  
ხევრამდე ჩაცალა. ლუდი ცივი იყო, თოვლი, რომელზეც იჯდა, – კი-  
დევე უფრო ცივი, მაგრამ თავი მაშინვე უკეთ იგრძნო. ლუდი, რო-  
გორც ყოველთვის, სასწაულს ახდენდა. ისევე, როგორც სკოჩი, არა-  
ყი და ჯინი, თუმცა, როცა საუბარი ალკოჰოლს შეეხებოდა, პიტი  
სავსებით ეთანხმებოდა ტომ ტ. ჰოლს,<sup>55</sup> – ამქვეყნად ლუდზე უკეთე-  
სი არაფერი მოიძებნებოდა.

პაკეტის შემყურეს კვლავ გაახსენდა ის მოყვითალო სახე მაღა-  
ზიაში – იდუმალი ღიმილი, ჩინელივით წვრილი თვალელები და დანაო-  
ჭებული ქუთუთოები. მსგავს ადამიანებს ოდესღაც მონღოლოიდე-  
ბს, მონღოლოიდ იდიოტებს ეძახდნენ. ამან ისევ დადიტსთან – ოფი-  
ციალურად, დუგლას ქეველთან – დააბრუნა. პიტს ვერ აეხსნა, რა-  
ტომ ვერ მოიშორა დადიტსზე ფიქრი, მაგრამ საკუთარ თავს დაჰ-  
პირდა, რომ როგორც კი ეს ყველაფერი დასრულდებოდა, დერიში  
შეივლიდა და დადიტსს ინახულებდა. სხვებსაც აიყოლიებდა –  
გრძნობდა, რომ ამისთვის ხვეწნა არ დასჭირდებოდა. შესაძლოა,

---

<sup>55</sup> ამერიკელი კომპოზიტორი, შემსრულებელი.



სწორედ დადიტის იყო მიზეზი, რის გამოც მეგობრებად რჩებოდნენ. დალახვროს ემმაკმა, უმრავლესობას აღარც კი ახსოვდა კოლეჯის ან ინსტიტუტის მეგობრები, დაწყებით სკოლაზე რომ აღარაფერი ვთქვათ, რომელსაც ახლა საშუალოს ეძახდნენ, თუმცა, პიტს სჯეროდა, რომ ის გაუბედაობის, მტანჯველი ეჭვების, ოროსნობის, ოფლიანი ილღიების, გიჟური გატაცებებისა და იდეების ჯუნგლებად რჩებოდა. რასაკვირველია, დადიტს ისინი სკოლიდან არ იცნობდნენ, რადგან მას დერის საშუალო სკოლაში არასდროს უვლია. დადსი მერი მ. სნოუს გონებრივად ჩამორჩენილთა სკოლაში დადიოდა, რომელსაც ახლომახლო მცხოვრები ბავშვები დებილებს აკადემიას, ზოგჯერ კი კრეტინების სკოლას ეძახდნენ.

ჩვეულებრივ ვითარებაში მათი გზები არასდროს გადაიკვეთებოდა, მაგრამ კანზასსტრიტზე მიტოვებული აგურის შენობის წინ დიდი ცარიელი მოედანი მდებარეობდა. შენობის ფასადზე ჯერაც ეკიდა გახუნებული აბრა წარწერით „ძმები თრექერები, გადაზიდვა და შენახვა“. მეორე მხრიდან, თალის თავზე, კიდევ რაღაც ეწერა.

ახლა, როდესაც თოვლში იჯდა, მაგრამ საჯდომის ქვეშ გამდნარი ყინულის ფაფას ველარ გრძნობდა და ვერც იმას აცნობიერებდა, რომ უკვე მეორე ბოთლს სვამდა (პირველი ბარდებში მოისროლა, სადაც ჯერაც მიძვრებოდნენ ცხოველები), პიტმა ის დღე გაიხსენა, დადსს რომ შეხვდნენ. გაიხსენა ბივის სულელური ქურთუკიც, რომელიც მას ძალიან მოსწონდა, მისი წვრილი, მაგრამ მბრძანებლური ხმა, რაღაცის დასასრულსა და დასაწყისს რომ აცხადებდა და საოცრად მტკიცე და ყოვლისმცოდნე კილოთი რომ იუწყებოდა, – ჩვენი ცხოვრება სამუდამოდ შეიცვალა იმ მშვენიერ სამშაბათ დღეს, როდესაც ოთხივენი ჯოუნსის სახლის სიახლოვეს, ჯერ ორი-ორზე კალათურთის სათამაშოდ, შემდეგ კი პარჩიზში<sup>56</sup> ძალების მოსასინჯად გავემართეთო. ახლა კი ტყეში, გადაყირავებული სკაუტის წინ იჯდა, იმ

---

<sup>56</sup> იგივე „ოცდახუთი“ ან „ლუდო“ – სამაგიდო თამაში.

ოდეკოლონის სუნი სცემდა, ჰენრის რომ არ უხმარია, გასისხლიანებულ ხელთათმანში გაყოფილი ხელით ბოთლი ეჭირა, ტკბილ საწამლავს მიირთმევდა და მანქანების გამყიდველ იმ ბიჭუნას იხსენებდა, რომელიც მათემატიკაში მზარდი ჩამორჩენის მიუხედავად (მას ჯერ ჯოუნსი ეხმარებოდა, შემდეგ – ჰენრი, მაგრამ მეათე კლასში საბოლოოდ ჩაიძირა), ასტრონავტობაზე ოცნებობდა. სხვა ბიჭებიც გაიხსენა, ძირითადად, ბივი, რომელმაც სამყარო გადაატრიალა მკივანი, გარდატეხის ასაკისთვის დამახასიათებელი ხმით:

– ეი, ბიჭებო, გეყოფათ! გეყოფათ, თქვენი დედაც! ..

– ბივერ, – წარმოთქვა პიტმა ხმამალლა, მისალმების ნიშნად ბოთლი ასწია და სკაუტის გაცივებულ გვერდს მიეყრდნო, – შესანიშნავი იყავი, ძველო.

და დანარჩენები?

განა, ყველანი შესანიშნავები არ იყვნენ?

#### 4

პიტი ყოველთვის მეგობრებზე ადრე თავისუფლდება, რადგან მერვე კლასშია და ამ დღეს ბოლო გაკვეთილი მუსიკა აქვს პირველ სართულზე. დანარჩენ სამს გაკვეთილები მესამე სართულზე უტარდება. ჯოუნსი და ჰენრი ამერიკულ ლიტერატურაში მეცადინეობენ (ეს ფაკულტატივია მოწინავე მოსწავლეთათვის), ბივის კი მეზობელ ოთახში პრაქტიკული მათემატიკა აქვს, ანუ მათემატიკა შტერი ბიჭებისა და გოგონებისთვის. პიტი უკანასკნელ ძალ-ღონეს იკრებს, ასეთ ჯგუფში რომ არ მოხვდეს, მაგრამ, როგორც ჩანს, უთანასწორო ომს აგებს. იცის შეკრება-გამოკლება, გამრავლება-გაყოფა და წილადებიც კი, თუმცა ეს უკანასკნელი ძალიან უჭირს. ახლა საიდანღაც ხ-ი ჩნდება. პიტმა ხ-ს ვერაფერი გაუგო, ამიტომაც ეშინია.

ჭიშკრის მიღმა, ლობესთან დგას და მერვეკლასელებისა და ჯერაც გამოუცდელი მეშვიდეკლასელების ჩავლას ელოდება, ფენსაც-

მლის ჭვინტით მიწას ჩიჩქნის და თავს იკატუნებს, თითქოს სიგარეტს ეწევა: ერთი ხელი პირზე აუფარებია, მეორე კი, ჰიპოთეტიური სიგარეტით, მის უკან დაუმალავს.

მაგრამ აი, მესამე სართულიდან მეათეკლასელები ჩამოდიან, მათ შორის კი მონარქებივით, უგვირგვინო მეფეებივით – თუმცა ამის ხმამალლა თქმას პიტი ვერასდროს გაბედავს – მისი მეგობრები: ჯოუნსი, ბივერი და ჰენრი. მეფეთ მეფე, რა თქმა უნდა, ჰენრია, რომელიც ყველა გოგოს უყვარს, მიუხედავად იმისა, რომ სათვალეს ატარებს. პიტს მეგობრებში გაუმართლა. მან ეს კარგად იცის. იმასაც გრძნობს, რომ, შესაძლოა, ყველაზე ილბლიანი მერვეკლასელია დერში, ყოველგვარი ხ-ის მიუხედავად. ლაპარაკიც ზედმეტია, რომ მათი შიშით ვინმე გაბედავს და თითს დააკარებს.

– ეი, პიტ! – იძახის ჰენრი ჭიშკარში გამოსვლისთანავე. პიტის დანახვაზე ჰენრის ყოველთვის ოდნავ გაოცებული, მაგრამ მხიარული სახე აქვს, – რა არის ახალი შენკენ?

– არაფერი, – პასუხობს პიტი ჩვეულებისამებრ, – შენკენ?

– ადინ, – ამბობს ჰენრი და სათვალეს იწმენდს. კლუბი რომ ჰქონდეთ, ეს დევიზადაც გამოადგებოდათ. დროთა განმავლობაში ამის თქმას დადიტსაც ასწავლიან, თუმცა მას მხოლოდ ასე გამოსდის: „ალი დე ივე ნავი“ – ერთ-ერთი დადიტსსიზმნათაგანი, რომლის გაგებაც მშობლებს არ ძალუძთ, რაც პიტისა და მისი მეგობრების ალფრთოვანებას იწვევს.

მაგრამ ახლა, როდესაც მათ ცხოვრებაში დადიტსის გამოჩენამდე ჯერ კიდევ ნახევარი საათია დარჩენილი, პიტი ჰენრის კვალდაკვალ ექოსავით იმეორებს:

– ჰო, მეგობარო, ადინ.

ახალი დღე, იგივე ნაგავი. გულის სიღრმეში ბიჭებს ამ გამოთქმის მხოლოდ მეორე ნახევრის სწამთ, რადგან, მათი აზრით, ყოველი დღე ერთნაირია. ეს დერია, 1978 წელი. და ყოველთვის 1978 წელი იქნე-

ბა. დაე, ამტკიცონ, რომ მომავალი არსებობს, რომ ისინი ოცდამეერთე საუკუნემდე მიაღწევენ, ჰენრი ადვოკატი გახდება, ჯოუნსი – მწერალი, ბივერი – შორეული გადაზიდვების მძღოლი, პიტის კი... პიტის ასტრონავტი გახდება, მხარზე NAშA-ს წარწერით. ეს დაუფიქრებელი ლაპარაკია, ასევე დაუფიქრებლად მღერიან კვირაობით ეკლესიაში „მრწამსს“. ის უფრო აინტერესებთ, თუ რა აქვს მორინს ჩესმენს მოკლე კაბის ქვეშ, რომელიც წინ გადახრისას, ლამის ბოლომდე წამოეხადოს. მტკიცედ სჯერათ, რომ ერთ მშვენიერ დღეს მორინის საცვლების ფერსაც შეიტყობენ, რომ დერი ყოველთვის იარსებებს და თვითონაც მუდამ იქნებიან. ყოველთვის დერის საშუალო სკოლაში ისწავლიან, ხოლო როდესაც სამს თხუთმეტი წუთი დააკლდება და გაკვეთილები დასრულდება, კანზას-სტრიტს გაუყვებიან, ჯოუნსის სახლის სიახლოვეს კალათბურთს ითამაშებენ (კალათა პიტის სახლთანაც არის, მაგრამ უფრო მეტად ჯოუნსისთან მოსწონთ, რადგან ჯოუნსის მამამ იგი დაბლა მიამაგრა, რათა ბურთი ადვილად ჩაეგდოთ). აი, ისინიც, ტროტუარის მთელ სიგანეზე მოსეირნობენ და ყოველდღიურ თემებზე საუბრობენ: გაკვეთილებზე, მასწავლებლებზე, ვინ ვის უთავაზა და ვინ ვის დაუბრუნებს ხურდას, რა გამოვა, თუ შეიკრიბებიან და იმათ დასცხებენ (ოლონდ საეჭვოა, რომ შეიკრიბონ და იმათ დასცხონ, ვინაიდან ეს კარგს არაფერს მოიტანს), ვიღაცის მორიგ გამირობაზე (ჯერჯერობით ფავორიტი მეშვიდეკლასელი ნორმან პარმელოა, ცნობილი მეტსახელით მაკარონი პარმელო, რომელიც, მათი აზრით, მას საუკუნის ბოლომდე შერჩება, და, შესაძლოა, ოცდამეერთე საუკუნეშიც გადაჰყვავს. ნორმან პარმელომ სანაძლეო მოიგო ორმოცდაათ ცენტზე, როდესაც, მოწმეების თანდასწრებით, ორივე ნესტოთი ყველიანი მაკარონი შეისრუტა, შემდეგ უკანვე გადმოაგდო და გადაყლაპა. მაკარონი პარმელო, რომელმაც შეცდომით, სკოლის მოსწავლეთა უმრავლესობის მსგავსად, ცუდი სახელი დიდებად აღიქვა), იმაზე, თუ ვინ ვისთან დადის (თუ შეამჩიეს, რომ ბიჭი და გოგო გაკვეთილების შემდეგ ერთად მიდიან,

ჩათვლიან, რომ სავარაუდოდ, ერთად სეირნობენ კიდეც, ხოლო თუ ხელჩაკიდებულნი მიაბიჯებენ, ყველაფერი გარკვეულია), ვინ მოიგებს სუპერთასს (დედანატირები „პატრიოტები“, დედანატირები „ბოსტონელი პატრიოტები“, თუმცა მათ არასდროს მოუგიათ, „პატრიოტებს“ მხოლოდ ხეპრეები გულშემატკივრობენ).

ერთი და იგივე, მაგრამ გაუხუნარი თემები, რომელთა გარჩევით არასდროს იღლებიან, სანამ ყოველდღე იმავე სკოლიდან (მწამს ერთი ღმერთი, ყოვლისმპყრობელი მამა), იმავე ქუჩით (ცისა და მიწის შემქმნელი), იმავე ოქტომბრის თეთრი ცის ქვეშ (საუკუნო ცხოვრების), იმავე მეგობრებთან ერთად ბრუნდებიან (ამინ).

ახალი დღე, იგივე ნაგავი – ეს ჭეშმარიტება მათ მტკიცედ ჩაიბეჭდეს გულში. მიდიან, სიამოვნებით უსმენენ დისკოს მხიარულ მოტივს, თუმცა თქმა უყვართ: რყ-და (როკი ყველაფერია, დისკო არაფერი).

ცვლილებები მოულოდნელად, გაუფრთხილებლად ეწვევათ – მათ ასაკში ყოველთვის ასე ხდება; ცვლილებებს უფროსკლასელების ნებართვა რომ სჭირდებოდა, საერთოდ არ იარსებებდა, მაგრამ დღეს ისინი ნადირობაზეც საუბრობენ, რადგან მისტერ კლარენდონი დაჰპირდათ, რომ მომდევნო თვეში პირველად წაიყვანთ „კედელში გაკეთებულ ხვრელში“. იქ სამი დღე დარჩებიან, აქედან ორი – სასწავლო იქნება (სკოლიდან ნებართვას უპრობლემოდ აიღებენ, ტყუილის თქმა არ მოუწევთ: შესაძლოა, სამხრეთ მენს ურბანიზაციის კვალი დაეტყო კიდეც, მაგრამ აქ, ამ ღვთისგან მივარდნილ ადგილას, ნადირობა კვლავ ახალგაზრდის განათლების ნაწილია, განსაკუთრებით იმ შემთხვევაში, თუ ის ახალგაზრდა ბიჭია). იმის გაფიქრებაც კი, რომ სანამ ტყეში დატენილი თოფებით ივლიან, მათი ამხანაგები მშობლიურ სკოლაში გაკვეთილების გაზუთხვით იქნებიან დაკავებული, მათში ისეთ აღფრთოვანებას იწვევს, რომ ვერც კი შეამჩნევენ ქუჩის გადაღმა, დებილების აკადემიას. გაკვეთილები გო-

ნებრივად ჩამორჩენილებსაც დაახლოებით იმავე დროს უმთავრდებათ, მაგრამ მათი უმრავლესობა სკოლიდან მშობლებთან ერთად გამოდის ან სპეციალურ ავტობუსებში ჯდება, რომლებიც ყვითლად კი არა, ცისფრადაა შეღებილი, ბამპერზე წარწერით: „მხარი დაუჭირე მენტალურ სიჯანსაღეს, თორემ მოგკლავ“.

როდესაც ჰენრი, ბივერი, ჯოუნსი და პიტი „მერი მ. სნოუს“ ჩაუფლიან, რამდენიმე ჭკუასუსტი, ისეთი, სხვებზე ოდნავ უკეთ რომ აზროვნებს და შინ დამოუკიდებლად წასვლის უფლება აქვს, ჯერაც დაფლატუნებს ქუჩაში. მომრგვალებულ სახეებზე, როგორც ყოველთვის, გაოცება აღჰბეჭდვიათ. პიტი და მისი მეგობრები, ჩვეულები-სამებრ, გულგრილად გახედავენ მათ და ალბათ, ვერც აღიქვამენ – ესენი ხომ მხოლოდ პეიზაჟის ნაწილია.

ჰენრი, ჯოუნსი და პიტი პირდაღებულნი უსმენენ ბივს, რომელიც უხსნის, რომ ხეობაში მოუწევთ ჩასვლა, რადგან საუკეთესო ირმები სწორედ იმ ადგილებს ეტანებიან, სადაც მათი საყვარელი ბუჩქებია.

– მე და მამამ იქ მილიარდი ირემი ვნახეთ! – სხაპასხუპით ამბობს იგი, რაზეც გაცვეთილი ქურთუკის შეხსნილი ელვამესაკრავი წკარუნით ეთანხმება.

ლაპარაკობენ, როგორ მოინადირონ საუკეთესო, დიდი ირემი, სად უნდა მოარტყან ტყვია, რომ მაშინვე მოკვდეს და ზედმეტად არ დაიტანჯოს („მამაჩემმა მითხრა, რომ ისინი ჭრილობისგან ისე არ იტანჯებიან, როგორც ადამიანები, – ამბობს ჯოუნსი, – რომ ღმერთმა ისინი ისე შექმნა, რომ მათზე ნადირობა დაუბრკოლებლად შეგვეძლოს“.) იცინიან, ჯიკაობენ და იმაზე კამათობენ, თუ პირველად რომელს აერევა გული სისხლის დანახვაზე. დებილების აკადემიას გასცდებიან. საცაა წითელი აგურის კვადრატულ შენობას მიუახლოვდებიან, იქ „ძმები თრექერები“ საქმიანობენ.

– თუ ვინმე აღებინებს, ეს მე ნამდვილად არ ვიქნები! – ტრაბახობს ბივერი, – ათასჯერ მაინც მინახავს ირმის ნაწლავები, თქვენც ამბობთ, რა! მახსოვს, ერთხელ...

– ეი, ბიჭებო, – აწყვეტინებს მოულოდნელად აღელვებული ჯოუნსი, – თინა ჯინ შლოსინგერის ფისოს ნახვა ხომ არ გასურთ?

– ვინ არის თინა ჯინ სლოპინგერი? – მოჩვენებითი გულგრილობით ეკითხება პიტი, მაგრამ ყურები დაცქვეტილი აქვს. ფისოს ნახვა მისი დიდი ხნის ოცნებაა: იგი ყოველთვის ჩუმად ათვალიერებს მამამისის ჟურნალებს – „პენტჰაუზსა“ და „ფლეიბოის“, რომლებიც სახელოსნოში, ხელსაწყოების დიდი ყუთის უკანაა დამალული. ფისო სწორედ ისაა, რაც მას ძალზე აინტერესებს. თუმცა, მისგან ისე არ აღიგზნება, როგორც მოშიშვლებული ძუძუებისგან, ალბათ იმიტომ, რომ ჯერ პატარაა.

მაგრამ ფისო მართლაც საინტერესოა.

– შლოსინგერი, – სიცილით უსწორებს ჯოუნსი, – შლოსინგერი, პიტეცკი. შლოსინგერები ჩემგან ორ კვარტალში ცხოვრობენ და... – მოულოდნელად ჩუმდება, შეკითხვა დაებადება, რაც დაუყოვნებლივ მოითხოვს პასუხს, ამიტომ ჰენრის სახელოზე ექაჩება, – შლოსინგერები ებრაელები არიან თუ რესპუბლიკელები?

ახლა ჰენრი დასცინის ჯოუნსის, მაგრამ ამას უბოროტოდ აკეთებს.

– ჩემი აზრით, ტექნიკურად შესაძლებელია, ერთდროულად ერთიც იყო და მეორეც, ან... არც ერთი.

ჰენრი სიტყვა „არც ერთს“ ისე წარმოთქვამს, როგორც „ას ერთს“, რაც პიტზე წარუშლელ შთაბეჭდილებას ტოვებს. რა სასიამოვნოდ ჟღერს, დედის გინებასავით! საკუთარ თავს უბრძანებს, ამიერიდან მხოლოდ „ას ერთი, ას ერთი, ას ერთი“ წარმოთქვას... თუმცა იცის, მათ რიცხვს ეკუთვნის, ვინც მთელი ცხოვრება „ას ერთი“ უნდა იძახოს.

– არასოდეს იფიქრო რელიგიასა და პოლიტიკაზე, – სიცილით განაგრძობს ჰენრი, – თუ იმ შენი თინა ჯინ შლოსინგერის სურათი გაქვს შიშველი ფისოთი, მეც ვნახავდი.

ბივი აშკარად აღგზნებულია: ლოყები უპრიალებს, თვალები უბრწყინავს, ნახევრად დაღეჭილ კბილსაჩიჩქნს ახლით ცვლის. იმ ქურთუკის ელვამესაკრავი, მისი უფროსი ძმა რომ ატარებდა, ფონზით<sup>57</sup> გატაცების ოთხი წლის განმავლობაში, უფრო ხმამაღლა წკარუნებს.

– ქერაა? – ეკითხება იგი, – ქერაა და თანაც უმაღლეს სკოლაში? სუპერბომბი? – მკერდზე ხელებს იდებს და ძუძუების იმიტაციას აკეთებს. ხედავს, რომ ჯოუნსი ღიმილით ეთანხმება, სახით პიტისკენ ტრიალდება და ხმამაღლა პასუხობს:

– წლის დედოფალია, სულელი, გესმის? ხომ გახსოვს კურსდამთავრებულთა შეხვედრის დღე? სწორედ იქ აირჩიეს! მისი სურათი გაზეთშიც დაბეჭდეს! ნავში იჯდა რიჩი გრენადოსთან ერთად!

– ჰო. მაგრამ იმ დღეს დაფეხვილმა „ვეფხვებმა“ თამაში წააგეს, გრენადოს კი ცხვირი გაუტეხეს, – ერთვება ჰენრი, – ხომ წარმოგიდგენიათ?! პირველად ისტორიაში დერის სკოლის გუნდი კლასის გუნდს შეხვდა სამხრეთ მენიდან, იმ ხეპრეებმა კი...

– ეშმაკსაც წაუღია ის „ვეფხვები“, – ხელს ჩაიქნევს პიტი, რომელსაც სასკოლო ფეხბურთი საძულველ ხ-ზე ოდნავ მეტად თუ აინტერესებს. რაც მთავარია, ახლა იცის, ვისზეც საუბრობენ. გაზეთში დაბეჭდილი გოგონას ფოტოც ახსენდება – ცელულოზის გადამტან ბარჯაზე „ვეფხვების“ წამყვან მოთამაშესთან ერთადაა, ყვავილებით მორთულ გემბანზე დგანან და თავზე ფოლგისგან გაკეთებული გვირგვინები ადგათ, იღიმებიან და მაყურებლებს ხელს უქნევენ. გოგონას ტალღოვანი თმა აქვს, უბრეტელო კაბიდან მკერდი მოუჩანს.

პიტს ცხოვრებაში პირველად ეწვევა ავტორცული ყინი. ხორციელი, სისხლიანი ვნება ასოს გაუმაგრებს. პირი უშრება, თავში ყველაფერი ერევა. ფისო, რასაკვირველია, საინტერესო რამეა, მაგრამ

---

<sup>57</sup> ტელესერიალ „ბედნიერი დღეების“ პერსონაჟ ფონზარელის, მეტსახელად ფონზის, ჩაცმულობის მიხედვით.



ადგილობრივი, პირადი „ფისოს“, ნაცნობი გოგოს, მეჯლისის დედოფალ „ფისოს“ დანახვა გაცილებით ამაღელვებელია! როგორც ქალაქის „ახალი ამბების“ კინოკრიტიკოსი ამბობს იმ ფილმებზე, რომლებიც განსაკუთრებით მოსწონს, ეს აუცილებლად უნდა ნახოს!

– სად? – ეკითხება ჯოუნსის და წარმოიდგენს, თინა ჯინ შლოსინგერი ქუჩის კუთხეში სკოლის ავტობუსს როგორ ელოდება, დგას, მეგობარ გოგონებთან ერთად კისკისებს და წარმოიდგენა არ აქვს, რომ გამვლელ ბიჭს ნანახი აქვს, რასაც მალავს კაბის თუ ჯინსის შარვლის ქვეშ, თმისფერი ბეწვებიც კი დაუნახავს მის ფისოზე, – სად არის?

– აქ, – ჯოუნსი წითელი აგურის ყუთზე უთითებს, რომელსაც ოდესღაც „ძმები თრეპერები“ საწყობად იყენებდნენ. კედლებს სურო მოსდებია, შემოდგომა ცივი იყო და თითქმის ყველა ფოთოლი გაშავებულია და დამჭკნარა. ფანჯრების ნაწილი ჩამტვრეულია, ნაწილი – საშინლად ქუჩყიანი. ამ ადგილის დანახვაზე პიტს ტანში ჟრუანტელი უვლის, შესაძლოა იმიტომ, რომ მოზრდილი ბიჭები, უმაღლესი სკოლიდან, ხშირად თამაშობენ ბეისბოლს შენობის უკან მდებარე მოედანზე, ზოგიერთს კი ძვალ-რბილში აქვს გამჯდარი პატარების დაცინვა და წვალება – ალბათ ერთფეროვანი ცხოვრების გამო. მაგრამ ახლა ასე არაა, რადგან ბეისბოლს წელს აღარ ითამაშებენ, დიდმა ბიჭებმა კარგა ხანია, სტროფორდ-პარკისკენ გადაინაცვლეს, სადაც თოვლის მოსვლამდე ამერიკული ფეხბურთით გაერთობიან (თოვლის მოსვლის შემდეგ კი ერთმანეთს თავ-ყბას დაამტვრევენ ძველი, იზოლაციაშემოხვეული ჰოკეის ყვანჯებით). უბედურება ისაა, რომ ზოგჯერ, დერიში ბავშვები იკარგებიან. ამ მხრივ დერი უცნაური ქალაქია. და ისე ხდება, რომ დაკარგულ ბავშვებს უკანასკნელად „ძმები თრეპერების“ ცარიელ, ძველ საწყობთან ხედავენ ხოლმე. უსიამოვნო ფაქტზე ხმამაღლა არავინ საუბრობს, მაგრამ ყველამ იცის. იციან და დუმიან.

მაგრამ ეს ფისო აბსტრაქტული „პენტჰაუზიდან“ კი არ არის, არამედ მეზობელ ქუჩაზე მცხოვრები გოგოს ნამდვილი მუფტაა...<sup>58</sup> მის ნახვას რა სჯობს. მაგარი რამეა!

– „ძმები თრექერები“? – ჰენრის ხმაში უნდობლობა გამოსჭვივის. ვერც კი შეამჩნიეს, შენობის სიახლოვეს რომ შეჩერდნენ და სანამ ჭკუასუსტები ქუჩის მეორე მხარეს დაბარბაცებენ, ესენი ტროტუარზე ადგილს ტკეპნიან, – ცუდად არ გამიგო, ჯოუნსი, ჩემთვის ავტორიტეტი ხარ, გეფიცები, დიდ პატივს გცემ, მაგრამ საიდან მოიტანე, რომ იქ თინა ჯინის ფისოს სურათებია?

– აბა, რა ვიცი? – მხრებს იჩიჩს ჯოუნსი, – დეივი ტრასკმა ნახა და იფიცება, რომ ისაა.

– რომ იცოდეთ, სულაც არ მეხალისება იქ წასვლა, – ამბობს ბივერი, – არა, თინა ჯინ სლოპჰენგერის ფისოს ნახვის წინააღმდეგი კი არ ვარ...

– შლოსინგერის...

– ...მაგრამ ეს ადგილი მეხუთე კლასში რომ ვიყავით, მას შემდეგ ცარიელია.

– ბივ...

– ...დარწმუნებული ვარ, იქაურობა ვირთხებითაა სავსე.

– ბივ...

მაგრამ ბივს მტკიცედ გადაუწყვეტია ყველაფრის ბოლომდე თქმა.

– ვირთხებს ცოფი სჭირთ და ადამიანებზე გადააქვთ, – ამბობს იგი.

– შესვლა რად გვინდა, – უხსნის ჯოუნსი და სამივე ინტერესით შესცქერის მას, – ეს, როგორც ვილაცამ თქვა, შავგვრემანი შვედის დანახვისას, სრულიად სხვა ფერის ნორვეგიელია.

ჯოუნსი გრძნობს, რომ მეგობრები ყურადღებით უსმენენ და განაგრძობს:

---

<sup>58</sup> აქ: ქალის გენიტალია.

– დევიმ თქვა, რომ სადარბაზოს უნდა შემოვუაროთ და მესამე თუ მეოთხე ფანჯარაში შევიხედოთ. ოდესღაც იქ ფილ და ტონი თრექერების კაბინეტი ყოფილა. კედელზე ჯერაც ჰკიდია განცხადებების დაფა. დევი იფიცება, რომ იმ დაფაზე ორადორი რამ არის გაკრული: ახალი ინგლისის რუკა სატვირთო მანქანების მარშრუტით და თინა ჯინ შლოსინგერის სურათი შიშველი ფისოთი.

ყველა პირდაღებული უყურებს, მხოლოდ პიტს ჰყოფნის გამბედაობა, ყველასთვის მნიშვნელოვანი შეკითხვა დასვას:

– სულ არაფერი აცვია?

– არა, დევი ამბობს, რომ ძუძუები დაფარული აქვს, – აღიარებს ჯოუნსი, – სამაგიეროდ, კაბა აქვს წამოხდილი და ტრუსი არ აცვია. ეს ისევე მკაფიოდ ჩანს, როგორც მე თქვენ გხედავთ.

პიტი იმედგაცრუებულია, რომ კურსდამთავრებულთა სადამოს ამჟამინდელი დედოფალი დედიშობილა არ დგას, მაგრამ მისი წამოხდილი კაბა ყველას აღაგზნებს და პირველყოფილ, ნახევრად აკრძალულ წარმოდგენას ნამდვილ სექსზე ასაზრდოებს. ბოლოს და ბოლოს, ყველა ქალს აქვს კაბის წამოხდის უფლება, ყველას.

შეკითხვები ამოწურულია. მხოლოდ ბივი ცდილობს ჯოუნსისთან დააბუსტოს, რომ შიგნით შესვლა ნამდვილად არ მოუწევთ, მაგრამ ისინი უკვე ერთად, მტკიცედ და გაუცნობიერებლად მიემართებიან შენობის უკან მდებარე ცარიელი მოედნისკენ.

## 5

პიტმა მეორე ბოთლსაც მოუღო ბოლო და ცარიელი ჭურჭელი ბარდებში მოისროლა. ახლა თავს უკეთ გრძნობდა. დარწმუნდა, რომ სიარული შეეძლო, ფრთხილად წამოდგა და თოვლი დაიფერთხა. მუხლი თითქოს აღარ სტკიოდა. დიან, ასე ჩანდა. თუმცა საშინ-

ლად გამოიყურებოდა, გეგონებოდათ, ჯინსის ქვეშ მინესოტას მეტროდოუმის<sup>59</sup> პატარა მოდელს მალავსო. მაინც ცდილობდა, ნელა ევლო და პაკეტს ოდნავ აქნევდა. ახლა, როდესაც აღარ ჩაესმოდა ხმა, რომელიც ჩუმად, მაგრამ დაჟინებით უმტკიცებდა, – ლუდი უნდა დალიოო, – ვალდებული იყო, ეს გაეკეთებინა, ერთგვარი თანაგრძნობითაც კი განიმსჭვალა ქალის მიმართ და გულის სიღრმეში იმედს არ კარგავდა, რომ მან მისი არყოფნა ვერ შეამჩნია. ნელა ივლიდა, მუხლს ყოველ ხუთ წუთში დაიზებდა (იქნებ დალაპარაკებოდა კიდევ მას, დაემშვიდებინა. გიჟური იდეა იყო, მაგრამ, ბოლოს და ბოლოს, აქ ხომ მარტო იმყოფებოდა და ეს ზიანს ვერ მიაყენებდა) და თანდათანობით დანიშნულების ადგილამდე მიაღწევდა. იქ კი ლუდსაც დალევდა.

ერთხელაც არ გახედა მიტოვებულ სკაუტს და ვერ დაინახა, რომ თოვლზე დიდი ასოებით რამდენჯერმე ეწერა „დადიტსი“, ვერ გააცნობიერა, რომ თვითონ დაწერა ეს სახელი, სანამ შორეულ 1978 წელს იხსენებდა.

... მაშინ ჰენრიმ იკითხა, რატომ უნდა ეკიდოს შლოსინგერის გოგოს ფოტოსურათი ცარიელ კაბინეტში ან საწყობშიო, და პიტს თავში გაუელვვა, რომ ჰენრიმ შეკითხვა იმიტომ დასვა, რომ მათ შორის სკეპტიკოსი სწორედ ის იყო. მხოლოდ იკითხა, დანარჩენებმა კი დაუჯერეს. რატომაც არა? ცამეტი წლის პიტს ნახევარი ცხოვრების განმავლობაში სანტა კლაუსის არსებობაც კი სჯეროდა. თანაც...

გორაკის წვერზე მყოფი პიტი შეჩერდა – არა ფეხის ტკივილის გამო, არც იმიტომ, რომ ველარ სუნთქავდა. უეცრად წყნარი ზუზუნის მოესმა, თითქოს ტრანსფორმატორი ამუშავდაო. მართალია, წყვეტილად, მაგრამ რიტმულად – „დნ-დნ-დნ“. არა, უეცრად არა, უეცრად არ გაუგონია. ეს ხმა დიდი ხნის განმავლობაში ისმოდა, თუმცა

---

<sup>59</sup> მულტისპორტული სტადიონი მინესოტის შტატის ქალაქ მინეაპოლისის ცენტრში.

პიტმა მხოლოდ ახლა გაიგონა. და თავში მაშინვე სულელური აზრები მოუვიდა. კვლავ ჰენრის ოდეკოლონი და... მარსი. ვიღაც, სახელად მარსი. ნაცნობებს შორის მარსი არავინ ჰყავდა, მაგრამ ეს სახელი რატომღაც აეკვიატა: მჭირდები, მარსი, „მინდინარ, მარსი“ ან „დალახვროს ეშმაკმა, მარსი, ბენზინი მოიტანე!“

პიტი იდგა და გამშრალ ტუჩებს ილოკავდა. მივიწყებული პაკეტი მაჯაზე ეკიდა. სასწრაფოდ აიხედა ზევით, დარწმუნებული იყო, რომ ცეცხლოვან რგოლებს დაინახავდა. დაინახა კიდეც, ოღონდ მხოლოდ ორი ცალი და ისიც სუსტად მანათობელი.

– მარსის უთხარი, აიძულოს, რომ ნემსი გამიკეთონ, – პიტი ცდილობდა, ყოველი სიტყვა მკაფიოდ წარმოეთქვა სიცარიელეში. რატომღაც სჯეროდა, რომ სწორად იქცეოდა. რატომ და რა მიზეზით, ამის ახსნა არ შეეძლო, მაგრამ ამ ფრაზამ მის თავში გაიჟღერა. ძნელი სათქმელია, რამ გააცოცხლა ის – წვიპურტმა თუ ნათებამ. დარწმუნებით ვერაფერს იტყოდა.

– იქნებ, არავინ და არაფერმა, – თქვა მან და ახლალა მიხვდა, რომ აღარ თოვდა. მის გარშემო არსებულ სამყაროში მხოლოდ სამი ფერი დარჩენილიყო: მუქი ნაცრისფერი ცა, მუქი მწვანე წიწვები და ქათქათა ხელუხლებელი თოვლი.

ყველაფერი მიყუჩდა.

პიტმა თავი ჯერ მარცხნივ გადახარა, შემდეგ – მარჯვნივ, და მიაყურადა. დიახ, ყოველივე მართლაც გარინდულიყო. მდუმარება. მთელ სამყაროში არაფერი იძროდა. არც ზუზუნი ისმოდა. თვალები ასწია და დაინახა, რომ პეპლის ფრთებივით გამჭვირვალე ნათება აღარ ჩანდა.

– მარსი? – თქვა მან, თითქოს ვინმეს ეძახდა. თავში გაუელვა, რომ მარსი იმ ქალს ერქვა, ვის გამოც ავარია მოხდა, მაგრამ ეს აზრი მაშინვე უკუაგდო. იმ ქალს ბეკის ეძახდნენ – ეს ისევე ზუსტად იცოდა, როგორც გასაღებდაკარგული სიმპათიური ქალის სახელი. მარსი მხოლოდ სიტყვა იყო და არავითარ მოგონებას არ აღუძრავდა.

ტვინი ხომ არ ეღრძო? ასეთი რამ ადრეც მოსვლია.

მწვერვალი გადაიარა და დაშვება დაიწყო. კვლავ გაახსენდა 1978-ის შემოდგომის ის დღე, როდესაც დადიტსს შეხვდნენ.

თითქმის დაივაკა, როდესაც მუხლი კი არ ეტკინა, ლამის აუფეთქდა და შიგ ხანძარი გაუჩნდა.

თოვლში დაეცა. ვერ გაიგონა, როგორ დაიმტვრა „ბუდვაიზერის“ ბოთლები პაკეტში, ყველა, გარდა ორისა. მთელი ხმით ყვიროდა.

# თავი მეექვსე დადიტსი

ნაწილი მეორე

1

ჰენრი სწრაფად დაიძრა სახლის მიმართულებით, მაგრამ როდესაც თოვა თითქმის შეჩერდა, ერთი-ორი ფანტელი თუ ფარფატებდა და ქარიც შესუსტდა, იგი სპორტულ ძუნძულზე გადავიდა. წლების განმავლობაში დარბოდა და ის ტემპი სავსებით მისაღებად ერგენა. ადრე თუ გვიან, გაჩერება, სიჩქარის დაგდება ან დასვენება მოუწევდა, თუმცა ეს უკანასკნელი ნაკლებად სავარაუდო იყო. მას ცხრა მილზე გაცილებით მეტი ურბენია, ოღონდ – არა თოვლში და არა უახლოეს წარსულში. შესაშფოთებელი რა ჰქონდა? დაეცემოდა და ფეხს მოიტეხდა? გულის შეტევას მიიღებდა? ოცდაჩვიდმეტი წლის ასაკში გულის შეტევა სრულიად არარეალურად ერგვენებოდა, მაგრამ ინფარქტის კანდიდატი რომც ყოფილიყო, ახლა ამაზე ფიქრი მი-

სი მხრიდან უგუნურება იქნებოდა, განსაკუთრებით იმის გათვალისწინებით, რაც ჩაიფიქრა. მაშ, რაღაზე ენერვიულა?

ჯოუნსისა და ბივერზე. აი, ვისზე. თუმცა, ეს ისეთივე სისულელე იყო, როგორც იმაზე ფიქრი, რომ ამ თეთრ უდაბნოში გული უმტყუნებდა. უბედურება უკან, პიტთან და იმ უცნაურ, ნახევრად გათიშულ ქალთან უნდა მოეკითხა, და არა წინ, „კედელში გაკეთებულ ხვრელში“... არადა, ნამდვილი უბედურება სწორედ იქ, „კედელში გაკეთებულ ხვრელში“ ტრიალებდა.

ვერ ხვდებოდა, ეს საიდან იცოდა. იცოდა და მორჩა. ჯერ კიდევ იქამდე იცოდა, სანამ ცხოველებს გადაეყრებოდა, ცოცხალ ჯაჭვში ჩაბმულნი აღმოსავლეთისკენ რომ მიიწევდნენ და ადამიანს არ უფროთხოვდნენ.

ერთი-ორჯერ ცას ახედა, ცეცხლოვან რგოლებს ეძებდა, მაგრამ ვერაფერი ნახა. მალე ამაზე ფიქრის თავი აღარ ჰქონდა – წინ უნდა ეყურა, რათა ცხოველებს არ შესჯახებოდა. არა, ისინი უწესრიგოდ როდი გარბოდნენ, მაგრამ თვალეხი უცნაურად, შიშით უკრთოდათ, რაც ადრე მათთვის არასდროს შეუძმნევია. ერთხელ განზეც კი გახტა, კუდფუმფულა მელიების წყვილისთვის გზა რომ დაეთმო.

„კიდევ რვა მილი“, – უთხრა საკუთარ თავს. სპორტული ძუნძულის დროს ეს თავისებურ მანტრად ექცა, იმისგან განსხვავებით, რაც, ჩვეულებრივ, მოაფიქრდებოდა ხოლმე (ძირითადად, საბავშვო ლექსები), თუმცა, პრინციპი იგივე იყო. „კიდევ რვა მილი, კიდევ რვა მილი ბენბერი-კროსამდე“. არავითარი ბენბერი-კროსი, მხოლოდ მისტერ კლარენდონის, ახლა კი ბივერის ძველი სამონადირეო ქოხი, და არანაირი ცხენ-ჯოხი იქ მისასვლელად. როგორ შეიძლება ცხენ-ჯოხით მგზავრობა? ვინ იცის! ღმერთო დიდებულო, რა ხდება აქ? ცეცხლოვანი ნათება, ცხოველების ნელი, მაგრამ განუხრელი გადაადგილება (ო-ო, ღმერთო! ვაითუ, ტყეში ნამდვილი დათვია?), შუა გზაზე, თოვლში მჯდარი ქალი, არა მარტო კბილები, შესაძლოა,



ტვინიც რომ დაჰკარგოდა. და ეს გაზები, ღმერთო ჩემო! მათ სიმყრალეს მხოლოდ ნაწლავის კიბოს ბოლო სტადიაზე მყოფის, სიმსივნით დაავადებულის პირიდან ამოსულ სუნს თუ შეადარებდა... „ამ სუნს ვერაფრით მოიშორებენ, – აუხსნა მეგობარმა გასტროენტეროლოგმა, – თუნდაც კბილები დღეში ოცჯერ იხეხონ, კბილის სავლები იხმარონ, არაფერი უშველით. ორგანიზმი საკუთარ თავს შიგნიდან ჭამს და თუ დიაგნოსტიკურ რევერანსებს არ გამოვედევნებით, კიბო ნამდვილი კანიბალიზმია“.

კიდევ შვიდი მილი, კიდევ შვიდი მილი. ცხოველები კი კვლავ გარბიან, ყველანი დისნეილენდისკენ მიიწევენ. როცა მიაღწევენ, ჩამწკრივდებიან, „კონგას“ იცეკვებენ და „რა პატარაა ეს სამყარო“ – ს იმღერებენ.

ჩექმების თანაბარი, ყრუ ბაგუნი. ცხვირის ძგიდეზე სათვალის ცეკვა. ცივ ორთქლად გადაქცეული ამოსუნთქული ჰაერი. სირბილით გახურებულს ენდორფინები<sup>60</sup> გამოუმუშავდა. რაც უნდა დამართოდა, ენერგია მაინც არასდროს გამოეღეოდა. შესაძლოა, თვითმკვლელობა აეკვიატა, მაგრამ დისტიმნია<sup>61</sup> მაინც არ სჭირდა.

ეს იყო მისი პრობლემის ნაწილი, – ფიზიკური და ემოციური სიცარიელე, აბორგებულ ქარბუქთან შერწყმა, – ჰორმონალური უკმარისობა, ამაში ეჭვი არ ეპარებოდა. ისევე, როგორც იმაში, რომ თუ სრულად განკურნება არა, ავადმყოფობის იმ აბებით გაკონტროლება მაინც შეიძლებოდა, რომელსაც ჰენრი ლიტრობით უწერდა პაციენტებს. მაგრამ, პიტის მსგავსად, რომელსაც მკურნალობის კურსის გავლა და წლების განმავლობაში ანონიმურ ალკოჰოლიკებთან შეხვედრები ელოდა, – ჰენრის განკურნება არ სურდა და დარწმუნებული იყო, რომ თავის მოტყუება იქნებოდა და სულის ნაწილს წაართმევდა მას.

---

<sup>60</sup> ტვინის მიერ გამოუმუშავებული ნივთიერება, უზრუნველყოფს დადებით ემოციას.

<sup>61</sup> მკვეთრი გადავარდნა ეიფორიიდან დეპრესიაში.

ანტიერესებდა, პიტი ლუდის მოსატანად თუ წავიდა. თითქმის დარწმუნებული იყო, რომ ასეც მოიქცა. ლუდი რომ გახსენებოდა, ჰენრი თვითონ შესთავაზებდა, – ორიოდ ბოთლს წამოგიღებო. ეს მას სახიფათო მოგზაურობას ააცილებდა (სახიფათოს არა იმდენად პიტისთვის, რამდენადაც ქალისთვის). მაგრამ იმ მომენტში ჰენრი ძალიან დაიბნა და ლუდისთვის არ ეცალა!

სამაგიეროდ, ეჭვი არ ეპარებოდა, რომ პიტს გაახსენდა. ოღონდ შეძლებდა კი ნატკენი მუხლით სკაუტამდე მისვლას? სავსებით შესაძლებელი იყო, თუმცა თავს ვერ დადებდა.

„ისინი დაბრუნდნენ! – ყვიროდა ქალი და ცაში იყურებოდა, – ისინი დაბრუნდნენ! ისინი დაბრუნდნენ!“

ჰენრიმ თავი დახარა და ნაბიჯს მოუჩქარა.

## 2

„კიდევ ექვსი მილი, კიდევ ექვსი მილი!“ – ბენბერი-კროსამდე მართლა ექვსი მილი რჩებოდა თუ მოჭარბებული ოპტიმიზმი აფიქრებინებდა ამას? ზედმეტად ხომ არ ენდო ბებერ ენდორფინებს? და თუ ასეა, ოპტიმიზმი არაფერს ავნებდა. თოვა თითქმის შეწყდა, ცხოველთა ნაკადიც შემცირდა – ესეც კარგი იყო.

სამაგიეროდ, ფიქრები აეკვიატა, რომელთა უმრავლესობა, როგორც ჩანს, სხვებს ეკუთვნოდა. თუნდაც ბეკის. ვინ იყო ბეკი? ეს სახელი დიდხანს უბურღავდა ტვინს, სანამ მანტრის ნაწილი არ გახდა. ჰენრის აზრით, ეს ის ქალი იყო, რომელიც კინალამ მოკლა. ვისია ეს გოგო? ბეკი, რატომ ბეკი, მე მშვენიერი ბეკი შუ ვარ.

ოღონდ მშვენიერს ვერ უწოდებდით, ნამდვილად ვერ უწოდებდით. ზორბა, აყროლებული დედაკაცი – აი, ვინ იყო სინამდვილეში – ახლა პიტ მურის საეჭვო მზრუნველობის ქვეშ რომ იმყოფებოდა.

„ექვსი. ექვსი. კიდევ ექვსი მილი ბენბერი-კროსამდე“.

ჯერჯერობით კი აუჩქარებლად სირბილი, შეძლებისდაგვარად აუჩქარებლად სირბილი, გზისა და თავში მოზუზუნე უცხო ხმების

გათვალისწინებით. სიმართლე ითქვას, უცხო მხოლოდ ერთი იყო, ისიც ხმა კი არა, რაღაც რიტმული მისამღერის მსგავსი გახლდათ: „ვისია ეს პატარა გოგო, ვისია ეს პატარა მშვენიერი ბეკი შუ“.

დანარჩენ ხმებს ცნობდა. ისინი ან მეგობრებს ეკუთვნოდა, ან მათ, ვისაც მისი მეგობრები იცნობდნენ. ერთ-ერთი მათგანი ის იყო, რომლის შესახებაც ჯოუნსი საუბრობდა, ხმა, რომელიც უბედური შემთხვევის შემდეგ ჩაესმოდა და მის ტკივილებს გადაჯაჭვოდა: „შეწყვიტეთ, გთხოვთ. ამას ვერ გავუძლებ, ნემსი გამიკეთეთ. სად არის მარსი...“

შემდეგ ბივერის ხმა: „წადი, ღამის ქოთანში ჩაიხედე“.

და ჯოუნსის პასუხი: „იქნებ სააბაზანოს კარზე დავაკაკუნოთ და ვკითხოთ, როგორ არის“...

უცნობის კვნესა და მტკიცება, რომ თუ კუჭში გასვლას მოახერხებდა, ყველაფერი კარგად იქნებოდა...

...მაგრამ ეს უცნობი არაა. ეს რიკია, მშვენიერი ბეკი შუს მეგობარი. რიკ... რა გვარია? მაკარტი? მაკკინლი? მაკინი? ჰენრი დარწმუნებული არ იყო, მაგრამ უფრო მაკარტისკენ იხრებოდა, რაც კევის მაკარტის<sup>62</sup> ახსენებდა საშინელებათა იმ ძველი ფილმიდან, რომელშიც უცხოპლანეტელები დედამიწაზე ჩვეულებრივი ადამიანების სახით წარდგნენ. ის ყველაზე მეტად ჯოუნსის მოსწონდა. ცოტაოდენი სასმელი, ფილმის ხსენება და, ჯოუნსი მაშინვე საკვანძო სიტყვებით პასუხობდა.

„ისინი აქ არიან! ისინი აქ არიან!“

ქალი ცას მიშტერებოდა და ისიც ყვიროდა:

– ისინი ბრუნდებიან! ისინი ბრუნდებიან!

ღმერთმანი, მსგავსი არაფერი ენახა ბავშვობის შემდეგ. თითქოს მაღალი ძაბვის კაბელში დენის მაგივრად ხმები გადიოდა.

მის პაციენტებსაც, ალბათ, მსგავსი ხმები ჩაესმოდათ. ჰენრი კი, ეს უდიდესი ფსიქიატრი (“ახალგაზრდა მისტერ ღმერთი”, როგორც

---

<sup>62</sup> ამერიკელი მსახიობი.

ერთმა პაციენტმა უწოდა წლების წინ), მათ თავს ისე უქნევდა, თითქოს ყველაფერს ხვდებოდა. ეგონა კიდევ, რომ ხვდებოდა, თუმცა, მათ ჭეშმარიტ მნიშვნელობას მხოლოდ ახლაღა ჩასწვდა.

ხმები. ამ ხმებმა ისე გაიტაცა, რომ ყურადღება აღარ მიაქცია ვერტიმფრენის გუგუნს, ღრუბლებიდან ზვიგენივით რომ ამოყვინთა. თანდათანობით ხმები ისევე მიწყდა, როგორც შორიდან მომავალი რადიოსიგნალი იკარგება ხოლმე, როდესაც დღის შუქი მატულობს და ჟანგბადი გაიშვიათებული აღარ არის. ბოლოს და ბოლოს, ეს მისი ფიქრების გამოძახილი იყო. დაეჟინა, რომ „კედელში გაკეთებულ ხვრელში“ რაღაც საშინელება მოხდა ან ხდებოდა. ისეთივე, როგორც სკაუტში ან მეტყვევთა ქოხში.

„კიდევ ხუთი მილი. კიდევ ხუთი მილი“.

აღარ უნდა ეფიქრა, რა შეემთხვათ მის წინ და უკან მყოფ მეგობრებს, გონება იქით მიმართა, საითაც, მისი აზრით, პიტი უკვე ნამყოფი იყო: 1978 წლისკენ, „ძმები თრექერებისა“ და დადიტისკენ. რა კავშირი შეიძლებოდა ჰქონოდა დადიტს ამ წყეულ ვითარებასთან, ჰენრიმ არ იცოდა, მაგრამ ყველანი მასზე ფიქრობდნენ, ამის დადგენა მას სულ არ გასჭირვებია. პიტმა დადიტსი მაშინ ახსენა, როდესაც ბრეზენტზე დაწვენილ ქალს ქოხისკენ მიათრევდნენ; ბივერმა – როდესაც ის და ჰენრი ტყეში იყვნენ და ირემს კვალში ედგნენ, გაიხსენა, როგორ წაიყვანეს ერთხელ დადიტსი საშობაო საყიდლებზე ბანგორში. სწორედ მას შემდეგ, რაც ჯოუნსიმ ლიცენზია აიღო. იმ ზამთარს ჯოუნსი ყველგან წავიდოდა, სადაც კი სთხოვდნენ. ბივს დადიტსზე ეცინებოდა, რადგან ის წუხდა, სანტა კლაუსი ნამდვილი არ არისო, ესენი კი, საშუალო სკოლის ოთხი მუტრუკი, დარწმუნებულნი, რომ ამქვეყნად ყველაფერი შეეძლოთ, მის გადარწმუნებას ცდილობდნენ და მოახერხეს კიდევ. გასულ თვეს ჰენრის ნასვამმა ჯოუნსიმ დაურეკა (პიტისგან განსხვავებით, ის არ თვრებოდა, განსაკუთრებით ავარიის შემდეგ, და სენტიმენტალობაც მანამდე არასოდეს გამოუვ-

ლენია) და უთხრა, – საბრალო დადიტს ქეველს 1978 წელს რომ დავენმარეთ, იმაზე კარგი ცხოვრებაში არაფერი გამიკეთებია, ის ჩვენი გამარჯვების საათი იყო. ჰენრი მიხვდა, რომ მან პიტსაც იგივე უთხრა. დადიტსი. მაგარი დადიტსი.

„კიდევ ხუთი მილი... იქნებ ოთხიც კი. კიდევ ხუთი მილი... იქნებ ოთხიც კი“.

ისინი ფოტოსურათზე აღბეჭდილი რომელიღაც გოგოს „ფისოს“ სანახავად მიდიოდნენ. ფოტო თითქოსდა მიტოვებული ოფისის განცხადებების დაფაზე მიემაგრებინათ. ამდენი წლის შემდეგ ჰენრი მის სახელს ვერ იგონებდა, მხოლოდ ის ახსოვდა, რომ გოგო იმ დარტყმული გრენადოს შეყვარებული და დერის საშუალო სკოლის ყოველწლიური გამოსაშვები სადამოს დედოფალი იყო. ეს ორი ფაქტი ქალიშვილის „ფისოს“ ნახვის სურვილს განსაკუთრებით ამძაფრებდა. შენობასთან მისასვლელ გზაზე მათ „დერელი ვეფხვების“ წითელი და თეთრი ფერებით გაწყობილი მაისური იპოვეს, ცოტა მოშორებით – კიდევ რაღაც.

„მეზიზღება ეს შოუ, ისინი ტანსაცმელს არასდროს იცვლიან“, – თქვა მაშინ პიტმა. ჰენრიმ პასუხის გაცემა დააპირა და პირი გააღო კიდევც...

– ბავშვი ყვიროდა, – თქვა ჰენრიმ. მას თოვლზე ფეხი დაუსხლტა და შექანდა, მაგრამ დაცემას გადაურჩა და სირბილი განაგრძო. გონებაში კვლავ ოქტომბრის ის დღე და თეთრი ცა უტრიალებდა. გარბოდა და დადიტსზე ფიქრობდა. დადიტსის ყვირილმა მათი ცხოვრება შეცვალა, როგორც მიაჩნდათ – უკეთესობისკენ, მაგრამ ახლა ჰენრი ამას ასე გადაჭრით ვერ განაცხადებდა.

პირველად მოხდა, რომ ამაში დარწმუნებული აღარ იყო.

### 3

შენობამდე მისასვლელი გზა დაბზარულია, მიწიდან სარეველებს

ამოუყვია თავი, – აბა, ეს რა გზაა. ბივერი, ცხადია, ყველაზე წინ მიდის, თუმცა დაძაბულობისგან ლამის დუჟი გადმოუვიდეს. ჰენრის ეჩვენება, რომ პიტიც გაღიზიანებულია, თუმცა უკეთ გამოიყურება, მიუხედავად იმისა, რომ ერთი წლით უმცროსია. ბივერი კი... რა სიტყვა მოუხდება?.. ლამის შარვლიდან ამოხტეს.

ჰენრის გულში უხარია, ასეთ ზუსტ ფრაზას რომ მიაგნო და ცდილობს, არ გაეცინოს. თუმცა, ბივერი ისე მოულოდნელად ჩერდება, რომ პიტი ლამის ზედ შეასკდეს.

– ეი! – ამბობს იგი, – ეს რა ჯანდაბაა! ბარემ მიხმარე, ფრედი! ბავშვის მაისურია!

და მართლაც, ეს მაისურია. წითელ და თეთრ ფერებში. არც ძველია და არც ქუჩყიანი, მაშასადამე, აქ დიდხანს არ გდებულა. პირიქით, ახალივით გამოიყურება.

– მაისური-შმაისური, ვის რაში სჭირდება? – ხელს იქნევს ჯოუნსი, – მოდიო...

– ცხენს ლაგამი ამოსდე, – ამბობს ბივერი, – ვერ ხედავ, მშვენიერი მაისურია.

მაგრამ როდესაც აიღებს, აღმოჩნდება, რომ არც ასეა საქმე. არა, ახალი კია – „დერელი ვეფხვების“ მაისურია, ზურგზე 19 აწერია. პიტი ფეხბურთისთვის გახვრეტილ ცენტსაც არ გაიმეტებს, მაგრამ დანარჩენები ხვდებიან, რომ ეს რიჩი გრენადოს ნომერია. უკნიდან საყელო გახეული აქვს, თითქოს მისი პატრონი გაქცევას ცდილობდა, მაგრამ ქეროში ხელი წაავლეს და კინწისკვრით დააბრუნეს უწინდელ ადგილზე.

– როგორც ჩანს, შევცდი, – ნაღვლიანად ამბობს ბივი და მაისურს მოისვრის, – წავედიო.

მაგრამ რამდენიმე ნაბიჯის გადადგმასაც ვერ ასწრებენ, რომ კიდევ რაღაცას წააწყდებიან – ამჯერად წითელს კი არა, ყვითელს, ხასხასა ყვითელ პლასტიმასს, ასე რომ უყვართ პატარებს. წინ მიმავალი ჰენრი იხრება და იმ რაღაცას იღებს. საუბმის ჩასადები ყუთია.

ზემოდან სკუბი-დუ და მისი მეგობრები ახატია, რომლებიც მოჩვენებებით სავსე სახლიდან გარბიან. მაისურის მსგავსად, ისიც ახალივითაა. არაფერი მიუთითებს, რომ დიდხანს ეგდო ნაგავში, მაგრამ ჰენრი ლამის ცუდად გახდეს. არ უნდა მოსულიყვნენ ამ მიყრუებულ ადგილას... ყოველ შემთხვევაში, სხვა დღე უნდა შეერჩიათ. მიუხედავად იმისა, რომ მხოლოდ თოთხმეტი წლისაა, ხვდება, სისულელე გაიფიქრა. როდესაც საქმე „ფისოს“ ეხება ან სწრაფი მოქმედებაა საჭირო, ან – უარის თქმა. მაგრამ სამომავლოდ გადადებაზე ლაპარაკიც ზედმეტია.

– ვერ ვიტან ამ დამპალ შოუს, – ამბობს პიტი და ჰენრის მხარზე მოდან ათვალიერებს კოლოფს, – თუ შეგიძინევია, რომ ტანსაცმელს არასდროს იცვლიან და ყოველ შოუში ერთი და იგივე აცვიათ?

ჯოუნსი ჰენრის სკუბი-დუს ყუთს ართმევს და ატრიალებს, რათა მეორე მხარეს გულმოდგინედ გამოყვანილ ასოებს დააკვირდეს. ადგნებული თვალები თანდათან უმწვიდდება და მათ ერთგვარი გაოცება ცვლის. ჰენრი გრძნობს, რომ ჯოუნსიც ნანობს აქ წამოსვლას. აჯობებდა, ორი ორზე ეთამაშათ...

ყუთზე უკნიდან მიკრული სტიკერი იუწყება: „მე დუგლას ქეველს ვეკუთვნი. მენის შტატი, ქალაქი დერი, მეიპლეინის ქუჩა, სახლი №19. თუ ბიჭი, რომელსაც ვეკუთვნი, დაიკარგება, დარეკეთ 949-1864. გმადლობთ!“

ჰენრი პირს ალებს და აპირებს თქვას, რომ ყუთი და მაისური, სავარაუდოდ, იმ ბიჭისაა, რომელიც დებილების აკადემიაში დადის, – ეს აშკარაა სტიკერის მიხედვით; ძაღლების საყელურზე გაკეთებულ წარწერას ჰგავს, – მაგრამ ამ დროს შენობის მოპირდაპირე მხრიდან, იქიდან, სადაც მოზრდილი ბიჭები ზაფხულობით ბეისბოლს თამაშობენ, ყვირილი ისმის, თანაც ისეთი შესაბრალისი, რომ ჰენრი მაშინვე ადგილიდან წყდება და იქით გარბის, წარმოდგენა არ აქვს, რომ ამ ხმის პატრონს, შესაძლოა, ცხოვრებაში პირველად აწყენინეს ან შეაშინეს (იქნებ ორივე ერთად).

მას დანარჩენებიც მიჰყვებიან. შენობისკენ სარეველებით დაფარული მოკლე გზით ერთიმეორის მიყოლებით გარბიან: ჰენრი, ჯოუნსი, ბივი და პიტი.

იქიდან კაცის სიცილი ისმის.

– მიდი, შეჭამე, – მბრძანებლობს ვილაც, – შეჭამე და გაგიშვებ. შესაძლოა, დუნკანმა შარვალიც კი დაგიბრუნოს.

– ჰო, თუ... – იწყებს მეორე ბიჭი, ალბათ დუნკანი, მაგრამ მაშინვე ჩუმდება და ჰენრისა და მის მეგობრებს მიაჩერდება.

– ეი, ბიჭებო, გეყოფათ! – ღრიალებს ბივერი, – გეყოფათ, თქვენი დედაც! ..

დუნკანის ორი მეგობარი, რომელიც ხვდება, რომ მათი სიმყუდროვე ვილაცამ უხეშად დაარღვია, შემოტრიალდება. მათ წინ ტრუსისა და ცალი ბოტასის ამარა, ჭუჭყით, სისხლით, ცრემლებითა და წვინტილით მოთხვრილი სახით, გაურკვეველი ასაკის ბიჭი მუხლებზე დგას. არა, პატარა სულაც არ არის, თუ მკერდზე ამოსული ბეწვით ვიძსჯელებთ, მაგრამ მაინც პატარას ჰგავს. ხასხასა მწვანე თვალები, ჩინელებისთვის დამახასიათებელი ჭრილით, ცრემლით ავსებულია.

ჯგუფის უკან, წითელი აგურის კედელზე, მოჩანს დიდი თეთრი ასოებით გაკეთებული წარწერა, ეტყობა, კარგა ხნის წინ დაწერეს: „არ არის მოძრაობა, არ არის თამაში“. ეს ალბათ რჩევაა, ბურთი აიღო და მოსცილდე შენობასა და ცარიელ მოედანს, სადაც მძიმე ტექნიკის ღრმა კვალი და ძველი ნაწილების გროვა შემორჩენილა. მაგრამ ვინ იტყვის ამას დარწმუნებით? არ არის მოძრაობა, არ არის თამაში. მომდევნო წლების განმავლობაში ისინი ხშირად გაიმეორებენ ამ ფრაზას. ეს მათი ახალგაზრდობის კოდური გამონათქვამებიდან ერთ-ერთი გახდება. შინაარსით მასთან ყველაზე ახლოს, ალბათ, ესაა: „ვინ იცის?“ ან „აბა, აქ რას გააწყობ?“ ღიმილით უნდა თქვა და ხელები გაშალო ან მხრები აიჩირო.

– თქვენ ვინ ჩემი ფეხები ხართ? – ეკითხება ბივის ერთ-ერთი ბიჭი.



მარცხენა ხელზე ბეისბოლის თუ გოლფის მოთამაშის თათმანი უკეთია – რაღაც, სპორტული. იმ თათმანით ძაღლის გამხმარი განავალი უჭირავს და ცდილობს, თითქმის შიშველ ბავშვს შეაჭამოს.

– რას აკეთებთ? – ყვრის შეძრწუნებული ჯოუნსი, – გინდათ, აჭამოთ? ხომ არ გადაირიეთ?

ბიჭს, რომელსაც განავალი უჭირავს, ცხვირზე თეთრი ლეიკოპლასტიკური აკრავს. ჰენრის კინალამ სიცილი წასკდება, როცა მას სახეზე იცნობს. რა მაგარია! აი, ეს მესმის! მეჯლისის დედოფლის „ფისოს“ ნახვა უნდოდათ და წააწყდნენ მეფეს, რომლის საფეხბურთო სეზონიც განსაკუთრებული ტრაგედიების გარეშე დასრულდა – თუ გატეხილ ცხვირს არ ჩავთვლით – და რომელიც ახლა თავის გემოზე ერთობა მაშინ, როდესაც დანარჩენი გუნდი მომდევნო მატჩისთვის ემზადება.

რიჩი გრენადო, როგორც ჩანს, ვერ ხვდება, რომ იცნეს: ის ჯოუნსის მისჩერებია. მოულოდნელად წაადგნენ თავს, თანაც, ჯოუნსის ხმაში ისეთი დაუფარავი ზიზლი იგრძნობა, რომ რიჩი იბნევა და ნაბიჯით უკან იხევს, მაგრამ მაშინვე აცნობიერებს, რომ ის, ვინც საყვედურს უბედავს, მასზე სამი წლით უმცროსი და ასი გირვანქით მსუბუქი მაინც არის, და ჩამოშვებულ ხელს ისევ მაღლა სწევს.

– ეს განავალი უნდა ვაჭამო, – ამბობს იგი, – მერე კი გავუშვებ. აქედან მოუსვი, ცინგლიანო, თუ არ გინდა, რომ ნახევარი შენ შეგხვდეს.

– ჰო, მოცოცხეთ, – ერთვება მესამე. რიჩი გრენადო გვარიანი მოზვერია, მაგრამ ისიც კი ვერ მივა ახლოს ამ მოტრეტილ, ექვსი ფუტი და ხუთი დუიმი სიმაღლის ახმახთან, სახე რომ დამუწუკებია, – სანამ...

– ვიცი, ვინც ხართ, – აწყვეტინებს ჰენრი.

რიჩი ახლა მას მიაპყრობს ფრთხილ და, იმავდროულად, გაღიზიანებულ მზერას.

– მომწყდი თავიდან, შვილო, აღარ გამამეორებინო.

– რიჩი გრენადლო ხარ. შენი სურათი გაზეთში ვნახე. როგორ გგონია, რას იტყვის ხალხი, როდესაც ყველას გავაგებინებთ, რასაც აკეთებდი?

– ვერავისაც ვერ გააგებინებთ, რადგან მიცვალებულები ხმას არ იღებენ, – სისინებს ის, რომელსაც დუნკანი ჰქვია. ღია ქერა, ჭუჭყიანი, დაუვარცხნელი თმა სახეზე ჩამოშვებია და მხრებამდე სწვდება, – აქედან დაიკარგეთ! ვის ეუბნებიან!

ჰენრი მას ყურადღებას არ აქცევს და ჯიქურ შესცქერის რიჩი გრენადლოს. ოღნავაც არ ეშინია, თუმცა ხვდება, რომ ამ სამს მათი ცომივით გაბრტყელება შეუძლია. მაგრამ ისეა გაშმაგებული, როგორც არასდროს. მუხლებზე მდგარი ბიჭი აშკარად ჭკუასუსტია, მაგრამ არც იმდენად, რომ ვერ მიხვდეს – ეს სამნი მას განზრახ აწვალებენ, ჯერ მაისური დაუხიეს, ახლა...

ჰენრი ცხოვრებაში არასდროს ყოფილა ასე ახლოს ცხვირ-პირის დანაყვასთან, მაგრამ ეს ყველაზე ნაკლებად ადარდება. ხელებმომუშტული დიდ ბიჭებს უახლოვდება. მუხლებზე მდგარ ბავშვს თავი ჩაუქინდრავს და სლუკუნებს. ეს ხმა ჰენრის ექოსავით ჩაესმის და ბრახს უღვივებს.

– ყველას მოვუყვები, – იმეორებს იგი, და თუმცა ეს მუქარა ბავშვურად უღერს, მას ასე არ ჰგონია. არც – რიჩის. რიჩი უკან იხევს და თათმანიან ხელს, რომლითაც განავალი უჭირავს, დაბლა უშვებს. სახეზე პირველად ემჩნევა შეშფოთება, – სამნი ერთის, საბრალო ჭკუასუსტი ბიჭის წინააღმდეგ, არა? შენი დედაც! .. ყველას ვეტყვი, ყველას. ვიცი, ვინც ხარ.

დუნკანი და ახმახი, რომელსაც სასკოლო ქურთუკი არ აცვია, რიჩის აქეთ-იქიდან ამოუდგებიან. ტრუსის ამარა ბიჭი მათ ზურგს უკან აღმოჩნდება, თუმცა ჰენრის კვლავაც ესმის მისი ქვითინის მფეთქავი რიტმი, რომელიც თავში გადაეცემა, საფეთქლებში ურტყამს. გაგიჟებას აღარაფერი უკლია.

- კარგი, ეს თვითონ მოისურვებ, - იკრიჭება ახმახი და მომტვრეული კბილების ადგილას შავი ორმოები მოუჩანს, - ახლავე მოგიღებთ ბოლოს.

- პიტი, თუ მოგვიახლოვდებიან, გაიქეცი, - ამბობს ჰენრი და რიჩი გრენადოს თვალს არ აცილებს, - შინ გაიქეცი. დედას დაუძახე, რომ პოლიციაში დარეკოს. თქვენ სამნი მას ვერასდროს დაიჭერთ, ვერ დაეწევით.

- მართალი ხარ, ჰენრი, - უდასტურებს პიტი. წვრილი ხმა აქვს, შიშის ნასახიცი არ ეტყობა.

- რაც უფრო მაგრად გვცემთ, მით უფრო ცუდად წავა თქვენი საქმე, - ამბობს ჯოუნსი. ჰენრი უკვე გამოწრთობილი მებრძოლია, მაგრამ ჯოუნსისთვის ამგვარი რამ ნამდვილი მოვლენაა, ამიტომ გამომწვევად იცინის, - რომ მოგვკლათ კიდევ, ამითი რას მოიგებთ? პიტი მართლაც კარგად დარბის და ყველას მოუყვება.

- მეც სწრაფად დავრბივარ, - მშვიდად იგერიებს რიჩი, - ვერსად გამექცევა.

ჰენრი, როგორც იქნა, შემოტრიალდება - ჯერ ჯოუნსისკენ, შემდეგ კი პიტისკენ. ჩანს, რომ ისინი ფეხის მოცვლას არ აპირებენ. ბივი რალაცას ხლაფორთობს კიდევ: მიწიდან ორ მოზრდილ, წვეტიან ქვას იღებს, ერთმანეთზე მრავალმნიშვნელოვნად აკაკუნებს და მოჭუტული თვლებით ხან რიჩის შეჰყურებს, ხანაც - ახმახს. პირში გაჩრილ კბილსაჩიჩქნს აგრესიულად ამოძრავებს.

- როგორც კი მოგვიახლოვდებიან, გრენადოს ეცით, - ბრძანებას იძლევა ჰენრი, - სხვები პიტს ვერ დაეწევიან.

იგი პიტს შესცქერის, რომელსაც სახე გაჰფითრებია, მაგრამ ვაჟკაცურად დგას: თვალეები უბრწყინავს, ფეხს მოუთმენლად ინაცვლებს, ყოველ წუთს მზად არის გასაქცევად.

- პიტი, დედას ეტყვი, სადაც ვართ. პოლიციელები გამოგზავნოს. ამ დარტყმულის სახელიც არ დაგავიწყდეს, - იგი ოლქის პროკურორით იშვერს თითს გრენადოსკენ, რომელსაც ისევ გაუბედაობა

ეტყობა. და შიშიც.

– რიჩი გრენადო, – ამბობს პიტი და ლამის აცეკვდეს, – არ დამავიწყდება.

– მიდი, შე ვირის მხედნელო, – აქეზებს ბივერი. როგორც ყოველთვის, საუკეთესო ეპითეტს ირჩევს, – მაგ ცხვირს ერთხელაც გაგისწორებ. მხოლოდ წიწილასავით მშიშარა თუ მიატოვებს გუნდს ასეთი ცხვირის გამო!

გრენადო აღარ პასუხობს: ალბათ აღარ იცის, რომელს უპასუხოს. ამ დროს მორიგი სასწაული ხდება – ღუნკანი, მეორე შავქურთუკიანი ბიჭი, ფეხს უხერხულად ინაცვლებს. ლოყები და შუბლი თანდათან უწითლდება, ნერვიულად ილოკავს ტუჩებს და გაუბედავად უყურებს რიჩის. მხოლოდ ახმახია ბრძოლისთვის მზად და ჰენრი თითქმის დარწმუნებულია, რომ შერკინება გარდაუვალია. ჰენრი, ჯოუნსი და პიტი ასე ადვილად არ დანებდებიან. თუ საქმე ჩხუბამდე მივა, აჩვენებენ, რაც შეუძლიათ, რადგან ეს ტირილი, ეს საშინელი, აუტანელი ტირილი, თავში ჩაქუჩივით ურტყამთ...

– ეი, რიჩ, იქნებ არ ღირდეს... – იწყებს ღუნკანი.

– მოვკლათ, – იღრინება ახმახი, – მივასიკვდილოთ ეს ცინგლიანები.

ნაბიჯს წინ დგამს. წამით ყველაფერი ბეწვზე ჰკიდია. ჰენრი ხვდება, რომ თუ ეს საფრთხობელა მათ კიდევ უფრო მიუახლოვდება, რიჩი გრენადო მას ველარ გააკონტროლებს, და ისიც, ბებერი, ბრაზიანი პიტბულივით აიწყვეტს და ხორცისა და ძვლების ეს საშინელი მასა მსხვერპლს დაეძგერება.

მაგრამ რიჩი მეგობარს განავარდებისა და ვაი-უმველებლის ატეხის საშუალებას არ აძლევს. დროულად სწვდება ახმახს მაჯაში, რომელიც ჰენრის მაჯაზე ორჯერ მსხვილია და მოწითალო ბალნითაა დაფარული.

– არა, სკოტი, – ამბობს იგი, – მოიცადე.

- ჰო, მოიცადე, - კვერს უკრავს თითქმის პანიკაში მყოფი ღუნკანი და შეხედავს ჰენრის, რომელსაც ეს მზერა, თავისი თოთხმეტი წლის მიუხედავად, უცნაურად ეჩვენება. საყვედურით აღსავსე, გამკიცხავი მზერაა. თითქოს სწორედ ჰენრი და მისი მეგობრები კადრულობენ უკადრებელს.

- რა გინდათ? - კითხულობს რიჩი, - გსურთ, რომ წავიდეთ? ჰენრი თავს უქნევს.

- თუ წავალთ, როგორ მოიქცევით? ენას აყრანტალებთ?

მოულოდნელად ჰენრი რაღაც განსაცვიფრებელს აღმოაჩენს: ახმახი სკოტის მსგავსად, ერთი სული აქვს, იჩხუბოს. მისი სულის რომელიღაც ნაწილი საჩხუბრად მიიწევს, უნდა, რიჩის სახეში მიახალოს: „ყველას ვეტყვით, შენი დედაც!“ იცის, რომ მეგობრები არ მიატოვებენ და ზედმეტი სიტყვა არასდროს დასცდებათ, თუნდაც სასტიკად გაილახონ, თუნდაც საავადმყოფოში აღმოჩნდნენ.

მაგრამ ბავშვი... საბრალო, ატირებუი, გონებრივად ჩამორჩენილი ბავშვი. როგორც კი ეს ბიჭები ჰენრის, ბივერსა და ჯოუნსის გალახავენ (პიტსაც, თუ მის დაჭერას მოახერხებენ), მას მიუბრუნდებიან და შესაძლოა, უარესიც დამართონ, ვიდრე ძალის განავლის ქმევაა.

- არავის ვეტყვით, - ამბობს იგი, - სიტყვას არავისთან დავძრავთ.

- ცრუობს, - სისინებს სკოტი, - იტყუება ეს ტრაწიანი, კარგად დააკვირდი, რიჩ!

სკოტი კვლავ იქაჩება, მაგრამ რიჩი მაჯაზე ხელს უფრო მაგრად უჭერს.

- თუ ყველაფერი მშვიდობიანად მოგვარდება, - ამატებს ჯოუნსი დინჯი და გონებადამჯდარი კაცივით, - მოსაყოლიც არაფერი იქნება.

რიჩი აღმაცერად გახედავს და ჰენრის მიუბრუნდება:

- ღმერთი დაიფიცე.

– ღმერთს გეფიცები.

– თქვენ არ დაიფიცებთ? – ეკითხება გრენადო დანარჩენებს.  
ღმერთს ჯოუნსი, ბივი და პიტცი იფიცებენ.

გრენადო ცოტა ხანს დაფიქრდება, მოწინააღმდეგე მხარისთვის დრო უსასრულოდ იწელება, შემდეგ კი მხრებს იჩეჩს.

– ჯანდაბას, ასე იყოს, მივდივართ.

– თუ ჩვენკენ წამოვლენ, შენობას სხვა გზით შემოუბრუნე, – სწრაფად ჩასჩურჩულებს ჰენრი პიტს, რადგან მოზრდილი ბიჭები უკვე გადიან ეზოდან, მაგრამ გრენადოს კვლავაც ღონივრად ჩაუვლია ხელი ახმახისთვის, რაც, ჰენრის აზრით, კარგის ნიშანია.

– დიდი ამბავი! არც ღირს დროის დაკარგვად, – აგდებულად ამბობს რიჩი და ჰენრის ისე ძლიერ უნდება გაცინება, რომ თავს ძლივს იკავებს. ისღა აკლია, რომ ასეთ შეუფერებელ დროს გაეცინოს, როცა ყველაფერი მოგვარდა. მისი ერთი ნაწილი სიძულვილისგან ადგილს ვერ პოულობს, მეორე კი შვებისგან ცანცანებს.

– ვერ გამიგია, ასე რამ გადაგრიათ! – ამბობს მოულოდნელად რიჩი, – ასეთი რა მოხდა.

ჰენრის, თავის მხრივ, ენა ექავება, სურს ჰკითხოს, თვითონ როგორღა შეეძლო ასე მოქცევა, ოღონდ ეს რიტორიკული შეკითხვა არაა. ღმერთო ჩემო, ეს ტირილი! მაგრამ დუმს, იცის, რომ მისი ნათქვამი მხოლოდ გააღიზიანებს ამ ვირიშვილს და ყველაფერი წრეზე დატრიალდება.

აქ იწყება ერთგვარი ცეკვა, რომლის ათვისებაც ყველას მოუწევს, ვინც პირველ და მეორე კლასებში სწავლობს. როგორც კი რიჩი, დუნკანი და სკოტი დაიძრებიან (რწევა-რწევით, რათა აჩვენონ, რომ დგომა მოჭებურდათ და მცირეწლოვნების ბანდას კი არ გაუბრებიან, არამედ საკუთარი სურვილით მიდიან), ჰენრი და მისი მეგობრები მათკენ სახით შეტრიალდებიან, შემდეგ გვერდიგვერდ დგებიან, ერთად იხევენ უკან ატირებული ბავშვისკენ და ბოროტ სამეუღლს მისკენ გზას უღობავენ.

შენობის კუთხეში რიჩი ჩერდება და მათკენ იხედება.

– არა უშავს, კიდეც შევხვდებით, – ამბობს იგი, – ერთი ერთზე ან ყველა ერთად.

– ჰო, – ეთანხმება დუნკანი.

– დარჩენილ ცხოვრებას ჟანგბადის პალატაში გაატარებთ, – ამიტებს სკოტი და ჰენრი კვლავ გრძნობს მხიარულების შემოტევას. გულში ლოცულობს, რომ მის მეგობრებს რამე არ წამოსცდეთ, სიტუაცია არ აირიოს, მაგრამ ყველა ჩუმად. ეს თითქმის სასწაულია.

რიჩის უკანასკნელი ბოროტი გამოხედვა და, – ჰენრი, ჯოუნსი, პიტი და ბივი მარტო რჩებიან პატარა ბავშვთან, რომელიც ჭუჭყიან მუხლებზე წინ და უკან ქანაობს; მოთხუპნილი, სისხლითა და ცრემლებით მოსვრილი, განყენებული მზერა თეთრი ცისთვის რომ მიუპყრია და სახე გაფუჭებული საათის ციფერბლატს მიუგავს. ბიჭები ერთმანეთს გადახედავენ, არ იციან, როგორ მოიქცნენ. დაელაპარაკონ? აუხსნან, რომ ყველაფერი მოგვარდა, რომ ცუდი ბიჭები წავიდნენ და საფრთხემ ჩაიარა? მაინც ვერაფერს გაიგებს. ოჰ, რა ძნელია ამ ტირილის ატანა. როგორ შეეძლოთ იმ კრეტინებს, თუნდაც ბოროტებსა და სულელებს, ბავშვის გულის მომკვლელი ქვითინი არაფრად ჩაეგდოთ და აბუჩად აეგდოთ საბრალო?

მოგვიანებით ჰენრი ამას მიხვდება... გაერკვევა... მაგრამ ჯერჯერობით ეს მისთვის საიდუმლოებითაა მოცული.

– რალაცას მოვსინჯავ, – დაახეთქებს ბივერი.

– რა თქმა უნდა, რაც გენებოს, – ამბობს ჯოუნსი. ხმა უკანკალებს.

ბივი წინ გამოდის, მაგრამ მაშინვე მეგობრებს გახედავს. ამ მზერაში სირცხვილიც იკითხება, გამოწვევა, და – ჰენრი მზადაა, დაიფიცოს – იმედიც!

– თუ ვინმესთან წამოგცდებათ, რასაც გავაკეთებ, სამუდამოდ დაგკარგავთ, – აფრთხილებს იგი.

– გეყოფა ლაქლაქი, – ამბობს პიტი და ხმა მასაც უთრთის, – თუ

მისი გაჩერება შეგიძლია, იმოქმედე!

ბივერი რამდენიმე წამით იმ ადგილას ჩერდება, სადაც რიჩი იდგა და ბავშვისთვის ძაღლის განავლის ჭმევას ცდილობდა, შემდეგ კი მუხლებზე დგება. უეცრად ჰენრი ხედავს, რომ პატარა ბიჭის ტრუსი, ისევე, როგორც ყუთი, მულტფილმის პერსონაჟებით – სკუბი-დუთი და მისი მეგობრებით, – შეგის მაგიური მანქანებითაცაა მოხატული.

ბივერი ატირებულ, თითქმის შიშველ ჭკუასუსტ ბავშვს ხელებს მოხვევს და სიმღერას იწყებს.

#### 4

„კიდევ ოთხი მილი ბენბერი-კროსამდე... შესაძლოა, სამიც კი. კიდევ ოთხი მილი ბენბერი-კროსამდე... შესაძლოა, მხოლოდ...“

ჰენრის კვლავ დაუცდა ფეხი, მაგრამ ამჯერად თავის შეკავება ვეღარ მოახერხა: ძალზე ღრმად წავიდა მოგონებებში და დაეცა. გონს მოსვლაც ვერ მოასწრო, რომ უკვე მიწისკენ მიექანებოდა.

იგი ზურგზე მძიმედ დაეცა და შეჰყვირა. თოვლი შაქრის ფხვნილივით აიყარა ჰაერში. ყველაფერს ისიც დაემატა, რომ კეფა დაარტყა და თვალებიდან ნაპერწკლები გადმოსცვივდა.

ისე ეტკინა, ერთბაშად წამოდგომა ვერ შეძლო, იწვა და ელოდა, როდის შეახსენებდა თავს რომელიმე მოტეხილი კიდური. როდესაც სერიოზული ვერაფერი იგრძნო, ხელი ზურგს უკან წაიღო და წელი მოისრისა. სტკიოდა, მაგრამ გაუძლებდა. ათი-თერთმეტი წლის ასაკში, ზამთრობით სტროფორდ-პარკში ციგაობისას უარესიც მოსვლია, მაგრამ მხოლოდ იცინოდა ხოლმე. ერთხელ ციგას ყაჩაღანა პიტ მური მართავდა და გორაკის ძირში ორივენი დიდ ფიჭვის ხეს შეასკდნენ, ბიჭებმა მას „სიკვდილის ხე“ შეარქვეს. მაშინ ჩალურჯებებითა და ორიოდე კბილის მოყანყალებით გამოძვრნენ. სამწუხაროდ, ათი-თერთმეტი წლისანი ძალიან დიდი ხნის წინ იყვნენ.

– ადექი, პატარავ, ყველაფერი კარგადაა, – თქვა მან და ფრთხილად წამოჯდა. ზურგი დასჭიმოდა, მაგრამ ეს ტრაგედია არ იყო.



მხოლოდ ძვლები გაუტკაცუნდა ცოტათი. არაფერი დაზიანებია, წყეული თავმოყვარეობის გარდა, როგორც ისინი ოდესღაც ამბობდნენ ხოლმე. ჰენრი მაინც არ დგებოდა. მან რიგიანი დრო უჩვენა და დასვენებაც დაიმსახურა. თანაც მოგონებებმა გული აუჩუყა. რიჩი გრენადო, დამპალი რიჩი გრენადო, როგორც აღმოჩნდა, მართლაც აითესა ფეხბურთის გუნდიდან, ოღონდ არა გატეხილი ცხვირის გამო.

– კიდევ შევხვდებით, – დაჰპირდა დამშვიდობებისას და ჰენრიმ ეს მხოლოდ მუქარად როდი მიიღო, მაგრამ ჩხუბი აღარ მომხდარა, საერთოდ აღარ მომხდარა.

სამაგიეროდ, ამის ნაცვლად, სხვა რამ მოხდა. ძალიან დიდი ხნის წინათ. ახლა მას ბენზერი-კროსი – „კედელში გაკეთებული ხვრელი“ – ელოდებოდა. და არ არსებობდა ცხენ-ჯოხი, რომელიც იქამდე მიიყვანდა, მხოლოდ ღარიბების ცხენი ჰყავდა – საკუთარი ფეხები. ჰენრი წამოდგა და ტანსაცმლიდან თოვლის ჩამოფერთხვას შეუდგა. უცრად თავში საშინელი ყვირილი ჩაესმა.

– ო-ო, ო-ო, ო-ო! – შესძახა მან.

ღმერთო ჩემო, თითქოს უკნიდან ვილაც მიეპარა და ფლეიერი მთელ ხმაზე ჩართო, თითქოს თავში ყუმბარა აუფეთქდა, თითქოს თვალწინ შენობა ჩამოიქცა. ერთბაშად უკან გადავარდა, როგორც დარტყმისგან გადავარდებიან ხოლმე, ხელებს უწესრიგოდ იქნევდა და წაიქცეოდა კიდევ, შემთხვევით გზის მარცხენა მხარეს, ფიჭვის გაყინულ ტოტებს რომ არ შეეჩერებინა.

როგორღაც გათავისუფლდა ხის „კლანჭებისგან“, თუმცა ყურები უწინდებურად უწიოდა... თავიც, დალახვროს ეშმაკმა... ნაბიჯი წინ გადადგა, არ სჯეროდა, რომ ცოცხალი იყო. ხელი ცხვირთან მიიტანა და ხელისგული სისხლმა დაუსველა. პირში რაღაც ეგდო. თითები შეიყო და იქიდან კბილი გამოიღო, გაცეცხით დახედა, მოისროლა და ამით ქურთუკის ჯიბეში მისი ჩადების სურვილს სძლია. რამდენადაც იცოდა, ჯერ არავის გაეკეთებინა მოტეხილი კბილის ქირურგიული იმპლანტაცია, და ჰენრის ძალიან ეეჭვებოდა, რომ დასახმარებლად

ჯადოსნური ქვეყნიდან კბილების ფერია გამოეცხადებოდა.

ვერაფრით გაარკვია, ვინ დაიყვინძა, მაგრამ რატომღაც გაიფიქრა, – პიტ მურს დიდი უსიამოვნება შეემთხვაო.

ჰენრიმ სხვა ხმებსა და აზრებსაც მიუგლო ყური. ვერაფერი გაიგონა. შესანიშნავია. თუმცა ისიც უნდა ეღიარებინა, რომ მთელი ცხოვრება ხმების გარეშეც ჩაუვლიდა თვალწინ.

– აბა, ყმაწვილო, წინ, ლონეს არ უჩივი, – თქვა მან და კვლავ „კედელში გაკეთებული ხვრელისკენ“ გაიქცა. შეგრძნება, რომ იქ რაღაც ისე არ იყო, სულ უფრო უძლიერდებოდა, და თავს ძლივს იკავებდა, რომ უფრო არ აჩქარებულყო.

„წადი, ღამის ქოთანში ჩაიხედე“.

„იქნებ, სააბაზანოს კარზე დავაკაკუნოთ და ვკითხოთ, როგორ არის?“

ნუთუ, მართლა გაიგონა ეს ხმები? მართალია, ახლა აღარ ესმოდა, მაგრამ მან ეს გაიგონა, ისევე მკაფიოდ, როგორც საშინელი, აგონიის მომასწავებელი ყვირილი. პიტის? თუ ქალი? მშვენიერი ბეკი შუ?

– პიტის, – თქვა მან და პირიდან ორთქლი გამოუშვა, – ეს პიტია... თუმცა ბოლომდე დარწმუნებული არ იყო. და მაინც...

თავდაპირველად ჰენრის ეშინოდა, რომ სირბილის საჭირო რიტმს ვერ მიაგნებდა, მაგრამ ტყუილუბრალოდ წუხდა, ვერც კი შეამჩნია, ისე დაუბრუნდა უწინდელ რიტმს, დაძაბული სუნთქვისა და მობაგუნე ფეხების ერთიანობის შესანიშნავ უბრალოებას.

კიდევ სამი მილი ბენბერი-კროსამდე, – გაიფიქრა მან, – შინ ვბრუნდები. როგორც დადიტის წავიყვანეთ შინ იმ დღეს.

(თუ ვინმესთან წამოგცდებათ, რასაც გავაკეთებ, სამუდამოდ დაგკარგავთ.)

ჰენრი ისევ ჩაიძირა იმ ოქტომბრის დღეში, როგორც ღრმა ძილში. ისე ღრმად და სწრაფად ჩაყვინთა მოგონებების ჭაში, რომ თავი-

დან ვერც კი იგრძნო მისკენ მცურავი ღრუბლები, რომლებიც სიტყვების, აზრების ან ყვირილისგან კი არ შედგებოდა, არამედ მხოლოდ მისი შავ-წითელი მე-სგან, რომელსაც უამრავი საქმე და უამრავი ადგილი ელოდა.

## 5

ბივერი მათ გამოეყოფა და ცოტაოდენი ყოყმანის შემდეგ მუხლებზე ეშვება. ჭკუასუსტი მას ვერ ხედავს – თვალები დაუხუჭავს, კვნესის და ქოშინებს. ვიწრო მკერდი ჩქარ-ჩქარა ადი-ჩაუდის. ელვით მოხატული მოტოციკლეტისტის ქურთუკი, მხიარული ტრუსის გვერდით, საკმაოდ სასაცილოდ გამოიყურება, მაგრამ ბიჭები არ იცინიან. ჰენრის მხოლოდ ერთი რამ სურს: ბიჭი გაჩუმდეს. მისმა ტირილმა ლამის ბოლო მოუღოს.

მუხლებზე მდგარი ბივერი მტირალ ბავშვს მიუჩოჩდება და მხრებზე ეხვევა.

„პატარას ნავი ვერცხლისფერი სიზმარია, რომელიც ახლოსაც და-ცურავს და შორსაც“...

ჰენრის არასდროს მოუსმენია ბივერის სიმღერა, მას მხოლოდ ზოგჯერ თუ აუყოლებია ხმა რადიოსთვის, – კლარენდონებს ძნელად თუ უწოდებდა კაცი მორწმუნებს, – და ახლა აღტაცებულია მისი ტენორით. ერთი-ორი წლის შემდეგ, როდესაც გარდატეხის ასაკი დაუდგება, ბივერს ხმა შეეცვლება, ჩვეულებრივი და არაფრით გამორჩეული გახდება, მაგრამ აქ, მიტოვებული შენობის სარეველებით მოფენილ მოედანზე, იგი ყველას აოცებს, ყველას გულს იპყრობს. ჭკუასუსტიც კი წყვეტს ტირილს და გაშტერებული შესცქერის მას.

„ის ბიჭუნას ოთახიდან უახლოესი ვარსკვლავისკენ მიცურავს; იცურე, პატარავ, იცურე, გამოცურე ჩემი სახლისკენ, გადაცურე ზღვები, გასცდი ვარსკვლავებს, ჩემს სახლთან მოცურდი“...

ჰაერში უკანასკნელი ნოტი მიცურავს და სამყარო კრძალვით

ირინდება. ჰენრის თვალზე ცრემლი ადგება. ჭკუასუსტი ბიჭი ბივერს მისჩერებია, ბივერი მას სიმღერის ტაქტში არწევს. მოთხუპნილ სახეზე ნეტარება და აღტაცება ახატია. უკვე დაავიწყდა გახეთქილი ტუჩი, ნატკენი კისერი, დაკარგული ტანსაცმელი და კოლოფი საუზმისთვის, და ბივერს ეუბნება: – იდე იდა.

თითქმის მხოლოდ ხმოვნებით, რაც ყველაფერს შეიძლება აღნიშნავდეს. უცნაურია, მაგრამ ჰენრი ნათქვამს მშვენივრად ხვდება, ასევე ბივერიც.

– კიდევ გინდა? მეტი აღარ შემიძლია, – ამბობს იგი, გააცნობიერებს, რომ კვლავაც მხრებზე ეხვევა ბიჭს და მოსცილდება. ჭკუასუსტი მაშინვე მოილუშება, მაგრამ ამჯერად ამის მიზეზი არც შიშია და არც განებივრებული ბავშვის ქირვეულობა, არამედ – გულწრფელი სევდა. უზარმაზარი ცრემლები სცვივა საოცრად მწვანე თვალებიდან და გაშავებულ ლოყებზე ანკარა ნაკადულებად მოედინება. იგი ბივერის ხელს მხარზე იდებს და ეუბნება:

– იდე იდა.

შეშფოთებული ბივერი მეგობრებს შესცქერის.

– ასე დედა მიმღეროდა ძილის წინ, – ამბობს იგი, – ამის შემდეგ მკვდარივით მეძინებოდა.

ჰენრი და ჯოუნსი ერთმანეთს გადახედავენ და სიცილი წასკდებათ. ეს არცთუ ისე გონივრული საქციელია: ბიჭუნას შეიძლება შეეშინდეს და ისევ ატირდეს, მაგრამ თავს ვერ ერევიათ. პატარა კი, ტირილის ნაცვლად, მათ ფართოდ, თბილად უღიმის, ჩაწიკწიკებული კბილების ორ რიგს აჩენს, ბივერს შესცქერის და ხელს არ უშვებს.

– იდე იდა! – იძლევა ბრძანებას.

– კიდევ იმღერეო, მიდი, მიდი! – ამბობს პიტი.

ბივი იძულებულია, კიდევ სამჯერ იმღეროს, სანამ ბიჭი ხელს გაუშვებს და დანარჩენებს ნებას მისცემს, რომ შარვალი და დახეული მაისური ჩააცვან, სწორედ ის, ზურგზე რიჩი გრენადოს ნომრით. ჰენ-

რიმ ვერაფრით დაივიწყა ეს სურათი და ზოგჯერ სრულიად შეუფერებელ დროს ახსენდებოდა ხოლმე, მაგალითად, უნივერსიტეტის საძმოს წვეულებაზე, როცა ქალწულობა დაკარგა, ქვემოთ განლაგებული დინამიკებიდან კი სიმღერა „კვამლი წყლის ზედაპირზე“ მოისმოდა; ასევე, გაზეთში ნეკროლოგების გვერდის კითხვისას, სამმაგლაბაბიანი ბარი ნიუმენის მომხიბლველი ღიმილი რომ დაინახა; მამას რომ აჭმევდა (ალცჰეიმერის დაავადება სრულიად შეუფერებელ, ორმოცდაცამეტი წლის ასაკში აღმოაჩნდა), ის კი ჯიუტად იმეორებდა, რომ ჰენრი ჰენრი არ იყო და მას სემს ეძახდა. „ნამდვილი მამაკაცი ვალს ყოველთვის აბრუნებს, სემი“, – უთხრა მამამ, შვრიის ფაფის მორიგი ლუკმა გადაყლაპა და ნიკაპზე რძე ჩამოელვარა – აი, ასეთ წუთებში ბივერის ძილისპირული ჩაესმოდა ხოლმე და ცოტა ხნით გულზე მოეშვებოდა. არ არის მოძრაობა, არ არის თამაში.

ბოლოს და ბოლოს, ბიჭს თითქმის ყველაფერს ჩააცმევინ წითელი ბოტასების გარდა. ცდილობს, თვითონ ჩაიცვას, მაგრამ ფენსაცმელი რატომღაც უკუღმა უჭირავს. საბრალო, სრულიად უმწეოა და ჰენრი ვერაფრით მიმხვდარა, რატომ იგდებდნენ აბუჩად ის ახვრები. როგორ შეიძლება, კაცი ასე საზიზღრად მოიქცეს, თუნდაც ის ტირილი არ გაეგონოს, რომლის მსგავსიც ჰენრის არასდროს მოუსმენია?

– მოდი, მე მოგარგებ, შე კაცო, – ამბობს ბივი.

– ას აგებ? – ეკითხება ბიჭი ისეთი კომიკური სახით, რომ ჰენრის, ჯოუნსისა და პიტს კვლავ ეცინებათ. ჰენრიმ იცის, რომ ავადმყოფს არ უნდა დასცინოს, მაგრამ თავს ვერ იკავებს. ბიჭს ძალიან სასაცილო გამომეტყველება აქვს, ზედგამოჭრილი მულტფილმის პერსონაჟია.

მაგრამ ბივერი მხოლოდ იღიმება.

– შენს ბოტასს.

– ოტას აგებ?

– დიან, სენიორ, თქვენი ყველა მცდელობა უსარგებლო გახლავთ. ბივერი მას ბოტასს გამოართმევს და ბიჭი უდიდესი ინტერესით

აკვირდება, თუ როგორ ჩააყოფინებს შიგნით ფეხს, ზონრებს შეუკრავს და ბანტსაც გამოუნასკვავს. როდესაც წელში გასწორდება, ჭკუასუსტი ჯერ ბანტს დახედავს, შემდეგ მზერას ბივერზე გადაიტანს, კისერზე მოეხვევა და ლოყაზე აკოცებს.

– ვინმესთან მაინც თუ წამოგცდებათ, რაც მან გააკეთა.. – იწყებს ბივერი, თუმცა კმაყოფილი ილიმება.

– ვიცით, ვიცით, სამუდამოდ დაგვკარგავ, – იკრიჭება ჯოუნსი, შემდეგ ძირს დავარდნილ საუზმის კოლოფს იღებს და ბიჭუნას აწვდის.

– ეს შენია, ბიჭი?

ბიჭი ისე აღტაცებით ილიმება, თითქოს დიდი ხნის უნახავ მეგობარს შეხვდაო და კოლოფს ხელს სტაცებს.

– უბი-უბი-დუ, სად იავიო? – მღერის იგი, – სამე მონაო, აი ასეო.

– მართალია, – ეთანხმება ჯოუნსი, – ბევერი საქმე გვაქვს. პირველ რიგში, ავდგებით და სახლში მიგიყვანთ. მგონი, დუგლას ქვევლი გქვია, არა?

ბიჭუნა ჭუჭყიანი ხელებით კოლოფს მკერდში იხუტებს, სიყვარულით ეფერება და ზუსტად ისე კოცნის, როგორც ბივერს აკოცა.

– მე დადიტსი! – იძახის იგი.

– კარგი, – თავს უქნევს ბივერი და ხელს ჩაჰკიდებს. ჯოუნსიც იმავეს აკეთებს და ორივე დადიტსს წამოაყენებს. მეიპლეინი აქედან, სულ რაღაც, სამ კვარტალშია და იქ მისასვლელად ათ წუთზე მეტი არ დასჭირდება, თუ, რა თქმა უნდა, სადმე რიჩი და მისი მეგობრები არ ჩაუსაფრდნენ, – ახლა კი შინ წავიდეთ, დადიტს. დედა ალბათ უკვე ნერვიულობს შენ გამო.

მაგრამ ჰენრი ჯერ პიტს გზავნის შენობის კუთხიდან არემარის დასაზვერად. როდესაც ის ბრუნდება და ამბობს, რომ ნაპირზე არავინ ჩანს, გასვლას გადაწყვეტენ. მთავარია, ქუჩაში გავიდნენ, სადაც ხალხია, იქ ვერავინ ვერაფერს გაუბედავს, მაგრამ გარისკვა არ სურს და პიტს ერთხელაც გაგზავნის, რათა ბოლომდე შეამოწმოს

ყველაფერი და დაუსტვინოს, თუ საფრთხე არ ემუქრებათ.

– ისინი წავიდნენ, – ამბობს დადიტსი.

– შესაძლოა, – ეთანხმება ჰენრი, – მაგრამ აჯობებს, თუ პიტი მაინც შეამოწმებს.

დადიტსი დგას და მშვიდად ათვალიერებს ნახატებს კოლოფზე, სანამ პიტი დაზვერვაზეა. მას ყველაზე მეტად შეეფერება ასეთი დავალების შესრულება. ჰენრი არ აზვიადებს: თუ რიჩი და მისი მეგობრები მათზე თავდასხმას გადაწყვეტდნენ, პიტი რეაქტიულ სისწრაფეს განავითარებს და მტერს პირში ჩალაგამოვლებულს დატოვებს.

– მოგწონს ეს მულტფილმი, მეგობარო? – წყნარად ეკითხება ბივერი ბიჭს და ყუთს გამოართმევს. ჰენრი ყურადღებით აკვირდება მათ, აინტერესებს, ბავშვი თუ ატირდება. მაგრამ ჭკუასუსტი არ ტირის.

– ისინი უბი-დუ! – იძახის პატარა. ხვეული თმა აქვს, ოქროსფერი. ჰენრის ვერაფრით დაუდგენია მისი ასაკი.

– ვიცი, რომ ეს სკუბი-დუა, – მოთმინებით პასუხობს ბივი, – მაგრამ ისინი ტანსაცმელს არასდროს იცვლიან. პიტი მართალია. „ბარემ-მინმარე-ფრედის“ გულისხმობ, ეგრეა?

– ომე! – იგი ხელს იწვდის და ბივერი ყუთს უბრუნებს. ჭკუასუსტი მას მკერდზე იკრავს და ილიმება.

რა მშვენიერი ღიმილია, – ფიქრობს ჰენრი და თვითონაც ილიმის. ისეთი შეგრძნება აქვს, თითქოს ოკეანეში დიდხანს ცურვისგან ითოშება, შემდეგ ნაპირზე გამოდის, გამხდარ მხრებსა და დახორკლილ ზურგზე პირსახოცს მოიხვევს და ისევ სითბო დაუვლის.

ჯოუნსიც ილიმება.

– დადიტს, – ეკითხება, – რომელია მათ შორის ძალლი?

ჭკუასუსტი ჯოუნსის შესცქერის, ისევ ილიმება, მაგრამ ოდნავ შეფიქრიანდება.

– ძალლი, – იმეორებს ჰენრი, – რომელია ძალლი?

ბავშვი ახლა მას შეხედავს, თავგზააბნეული ჩანს.

– დადიტს, რომელია სკუბი-დუ? – ეკითხება ამჯერად ბივერი. დადიტსს სახე უნათდება და თითს ნახატს ადებს.

– უბი! უბი-უბი-დუ! ეს აი ძაღლი!

ყველა იცინის. დადიტსიც. ამ დროს პიტის სტვენა ისმის. ისინი მიაბიჯებენ, თითქმის გზის ნახევარი აქვთ გავლილი, მაგრამ უცებ ჯოუნსი შესძახებს:

– მოიცადეთ! მოიცადეთ!

იგი ოფისის ერთ-ერთ ქუჩიან ფანჯარასთან მიიღბენს, შუბლს მიადებს და ხელებით მოიჩრდილავს. უეცრად, ჰენრის მათი აქ მოსვლის მიზეზი ახსენდება: თინა-ჯინ-ვილაცის ფისო. თითქოს ეს ათასი წლის წინ იყო.

ათიოდე წამის შემდეგ ჯოუნსი მათ ეძახის:

– ჰენრი! ბივ! აქ მოდით! ბავშვი მანდ დატოვეთ!

ბივერი ჯოუნსისკენ გარბის. ჰენრი ჭკუასუსტ ბიჭს მიუბრუნდება და მკაცრად ეუბნება:

– აქ იდექი, დადიტს. ზუსტად აქ იდექი შენს საუბმის ყუთთან ერთად, კარგი?

დადიტსი მას შესცქერის, მწვანე თვალები გაბრწყინებია, კოლოფს გულში იხუტებს. შემდეგ თავს უქნევს და ჰენრი ფანჯარასთან შეგროვილ მეგობრებს უერთდება. სივიწროვია. ერთმანეთს აწვებიან. ბივერი ბუზლუნებს, – ვილაცამ ფეხზე დამაბიჯაო, მაგრამ საბოლოოდ ყველაფერი წყნარდება. მალე მათი გაუჩინარებით გაოცებული პიტიც მოდის და თავს ჰენრისა და ჯოუნსის მხრებს შორის აკვებებს. და აი, ოთხივე ბიჭი ყოფილი ოფისის დამტვერილ ფანჯარასთან დგას. უკეთ დასანახავად ხელისგულები საფეთქლებთან მიუტანიათ. მენუთე კი მორჩილად დგას მათ უკან, ბალახით დაფარულ გზაზე, საუბმის კოლოფი ვიწრო მკერდზე სათუთად მიუკრავს და შემოდგომის ცას შესცქერის, სადაც მზე ღრუბლებიდან გამოჭყეტას ცდილობს. ქუჩიანი ფანჯრის მიღმა (რომელზეც მათი შუბლები ნახევარმთვარის მსგავს კვალს ტოვებს) – დიდი ცარიელი ოთახია,



მტვრიან იატაკზე რაღაც თეთრი ნაჭრები ყრია, რომლებსაც ჰენრი პრეზერვატივებს ამსგავსებს. კედელზე, ზუსტად ფანჯრის წინ, განცხადებების დაფა კიდია, რომელზეც ახალი ინგლისის ჩრდილოეთ ნაწილის რუკა და კაბააწეული ქალის პოლაროიდის ფოტოსურათია მიკრული. არავითარი ფისო, ყველაფერი თეთრი ტრუსიტაა დაფარული. თან არც სკოლის მოსწავლეა. ოცდაათი წლის მანც იქნება.

– ღმერთო დიდებულო! – ოხრავს პიტი და ჯოუნსის ზიზლით სავესე მზერას მიაპყრობს, – ამის გულისთვის მოვეთრით აქ?

ჯოუნსი მზად არის, თავის მართლებას შეუდგეს, მაგრამ მოულოდნელად სახე ებადრება და ცერით მხარს უკან უთითებს.

– არა, – აქნევს იგი თავს, – ამ ბიჭისთვის მოვედით.

## 6

ჰენრი მოგონებებიდან ძლიერმა დარტყმამ – განსაცვიფრებელი და მოულოდნელი ფაქტის გაცნობიერებამ გამოაფხიზლა: იგი შიშს შეუპყრია და ეს კარგა ხნის განმავლობაში გრძელდება. გონების მისადგომებთან ჯიუტად ციმციმებდა რაღაც ახალი, რასაც დადიტსთან პირველი შეხვედრის უჩვეულოდ მკაფიო მოგონებები უკეტავდა გზას, ახლა კი მუქარით აღსავსე ყვირილით გამოექანა და თავისი კუთვნილი ადგილის დაკავება სცადა.

ჰენრი შუაგზაზე შეჩერდა და ხელების ქნევას მოჰყვა, რათა კვლავაც არ დაცემულიყო, გაშეშდა და შეძრწუნებულმა თვალეები დააჭყიტა. „კედელში გაკეთებული ხვრელიდან“ სულ რაღაც ორ-ნახევარი მილი აშორებდა. ამჯერად რაღა მოხდა, ღმერთო?

ღრუბელი, – გაიფიქრა მან, – ეს რაღაც ღრუბლის მსგავსია. ზუსტად ვერ ვიტყვი, მაგრამ ვგრძნობ, რომ ცხოვრებაში ასეთი არაფერი განმიცდია. ყოველ შემთხვევაში, მას შემდეგ, რაც წამოვიზარდე. გზიდან უნდა გადავუხვიო. აქაურობას უნდა მოვშორდე. ამ კინოს უნდა მოვცილდე. ცაში რაღაც ფილმია. ისეთი, ჯოუნსის რომ უყვარს. საშინელებათა ფილმი.

– სისულელეა, – ჩაიბურტყუნა მან, თუმცა იცოდა, რომ თავს იტყუებდა.

უეცრად „კედელში გაკეთებული ხვრელის“ მხრიდან ვერტიკალური გუგუნი, ასევე, სავარაუდოდ, ფარდულში შენახული ყველგანმავალ არცტიც ჩატის სულ უფრო ხმამაღალი ღრიალი მოესმა... მაგრამ ყველაზე სწრაფად მოწითალო-მოშავო ღრუბელი მოიწევდა შიგნით მოთავსებული ფილმით, რაღაც საშინელი, ბოროტი ენერჯია ცდილობდა, დასწეოდა.

ჰენრი გაქვავდა, ადგილიდან ველარ იძვროდა. უამრავი ბავშვური შიში დაეუფლა: საწოლქვეშ შემძვრალი ურჩხულები, კუბოებში ჩაწოლილი ჩონჩხები, ქვების ქვეშ მოფუთფუთე მატლები, ბეწვიანი ლორწო, დიდი ხნის შებრაწული ვირთხის ნარჩენები, რომლებიც მამამ მაშინ აღმოაჩინა, როდესაც რობეტის შესამოწმებლად ქურა კედელს მოაცილა. არც არაბავშვური შიში აკლდა: საკუთარ საძინებელში გზააბნეული და მყვირალა მამა; მისი კაბინეტიდან გაქცეული ბარი ნიუმენი, რომელსაც მსუქანი სახე იმიტომ მოღრეცოდა, რომ ჯიუტად სთხოვდნენ შეეხედა იქ, სადაც შეჭყეტა არ სურდა ან იქნებ, არ შეეძლო. თვითონაც, დილის ოთხ საათზე თვალზე რული რომ არ ეკარებოდა, იჯდა და გვერდით სკოტჩით სავსე ჭიქა ედგა. მთელი სამყარო უსიცოცხლო უდაბნოს ჰგავდა, ასევე, მისი ტვინიც, და, ოო, პატარავ, გათენებამდე ათასი წელი რჩებოდა, უსასრულოდ დიდი დრო, ძილისპირულის სიმღერა კი აეკრძალათ, გაეუქმებინათ. და ეს ყველაფერი გახვეულიყო შავ-წითელ ღრუბელში, რომელიც მისკენ ჩალისფერი ცხენით მოქროდა. ეს ყველაფერი და კიდევ ვინ იცის, რამდენი რამ. ყოველგვარი სისაძაგლე, რაც კი შეიძლება თავში მოსვლოდა, ჩალისფერი ცხენით კი არა, საღებავშემოცლილი ძველი ყველგანმავლით მისკენ მოექანებოდა. სიკვდილს არ ჰგავდა, მაგრამ სიკვდილზე უარესი იყო. ეს მისტერ გრეი გახლდათ.

„გზიდან გადადი! – უყვიროდა ტვინი, – დაუყოვნებლივ! დაიმალო!“

განძრევა არ შეეძლო, ფეხებით თითქოს მიწას ჩაეზარდა. გატეხილ ციმციმასაგან გაკაწრული თეძო საშინლად უხურდა. ახლა კი ხვდებოდა, რას გრძნობდა მანქანის ანთებული ფარების ხაფანგში მომწყვდეული ირემი ან მოახლოებული გაზონსაკრეჭის წინ მოხტუნავე ბურუნდუკი. ღრუბელმა თვითგადარჩენის ინსტინქტი, გაქცევის შესაძლებლობა წაართვა. ისე გაშეშდა, როგორც კობრას წინ – უმწეო ბაჭია.

უცნაურია, მაგრამ თვითმკვლელობაზე ფიქრმა ცხოვრებისკენ შემოაბრუნა. განა ხუთასი ლამე თავისი გადაუწყვეტლობით იმიტომ იტანჯა, რომ ვილაც უხილავს, მონადირის აზარტით შეპყრობილს, ეს მის მაგიერ გაეკეთებინა? ვერა, ბატონო, ვერ მოგართვით! ტანჯვა ხომ თავისთავად უსიამოვნოა, მაგრამ როგორ მიეცა საკუთარი შეშინებული სხეულისთვის უფლება, რომ ეს ტანჯვა იმ დემონების მორჩილად ლოდინის პაროდიად ექცია, აღტაცებისგან წინასწარ ხელებს რომ იფშვნეტდნენ? არა, ამას ვერ დაუშვებდა!

ასე რომ, თავს ძალა დაატანა და ადგილიდან დაიძრა, ნელა, ერთგვარ ლამის კოშმარში, კისელივით უცებ შესქელებულ ჰაერში მიიწევდა. ფეხებს ისე ამოძრავებდა, თითქოს წყალქვეშ ბალეტს ცეკვავდა. როგორც შენელებულ კადრში. ნუთუ რამდენიმე წუთის წინ მირბოდა? მართლა მირბოდა? მოგონებების ტყვეობაში კი იყო, მაგრამ მაინც ვერ წარმოედგინა.

ჯიუტად მიიწევდა წინ ნაბიჯ-ნაბიჯ, ძრავის გუგუნე კი სულ უფრო ახლოვდებოდა და მხეცის ღრიალს ემსგავსებოდა. ბოლოს, გზისპირა ხეებში შევარდა, თხუთმეტი ფუტის სიღრმეზე, სადაც თოვლი თითქმის არ იდო, მხოლოდ მოვერცხლისფრო ბუმბულის თხელი ფენა მოჩანდა სურნელოვან, მოყავისფრო ნარინჯისფერ წიწვებზე. ჰენრი მუხლებზე დაემხო, შიშისგან ასლუკუნდა და პირზე ხელი აიფარა. ვაითუ, გაიგონონ? ეს მისტერ გრეია. ღრუბელი მისტერ გრეია. და რომ გაიგონოს?

ხავსმოდებულ ნაძვთან მიიპარა, ტანზე მოეხვია და ფრთხილად

გაიხედა საფრიდან, რათა რამე მაინც გაერჩია თვალებზე ჩამოფხატული ოფლიანი თმის საბურველიდან. დაინახა, რომ მოღუშულ ბინდუნდში სინათლემ იფეთქა. ირხეოდა, თრთოდა, გადაადგილდებოდა ანთებული ფარებივით.

წყვიადი მოიწევდა. ჰენრიმ უმწეოდ დაიკვნესა. სინათლის რგოლმა მის ტვინში შეაღწია, აზრებს ნთქავდა და მათ ნაცვლად საშინელებებით ავსებდა. ეს იყო მამის ნიკაპზე ჩამოღვრილი რძე, პანიკა ბარი ნიუმენის თვალებში, დაუძღურებული სხეულები და უზარმაზარი თვალები, დაჟინებით რომ იყურებოდნენ სადღაც მავთულხლართებიდან, გატყავებული ქალები და ჩამომხრჩვალი კაცები. რაღაც მომენტში მისი წარმოდგენა სამყაროზე ჯიბესავით ამოტრიალდა და მიხვდა, რომ ყველაფერს ჭირი მოედო... შესაძლოა, მოედო. ყველაფერს. მისი მოსაზრებები თვითმკვლევლობის შესახებ ძალზე უმნიშვნელო აღმოჩნდა მოახლოებული უბედურების წინაშე.

ყვირილის შესაკავებლად ტუჩებით ხეს მიეკრა, იგრძნო, როგორ აკოცა ცივ ხავსს, თითქმის ძირისძირობამდე, სადაც ქერქის სისველე და გემო შენარჩუნებულიყო. ამ დროს არცტიც-ჩატ-მა ჩაუქროლა, და ჰენრიმ მასზე მჯდომი სილუეტი იცნო. იცნო ქმნილება, რომელმაც შავ-წითელი ღრუბელი გააჩინა და თავი მშრალი მხურვალეებით გაუვსო.

მოგუდული ყვირილით ჩაემხო ხავსში, მშრალი, წვრილი, თამბაქოს მსგავსი ნამცეცები ცხვირით უნებლიეთ შეისუნთქა და ისევ შეჰყვირა. კვლავაც მუხლებზე იდგა, ხეს შემოხვეოდა და მთელი ტანით ცახცახებდა. ყველგანმავლის ღრიალი თანდათან დასავლეთისკენ გადაადგილდა, მომაბეზრებელ წკმუტუნად იქცა და საბოლოოდ გაქრა.

იქ, სადღაც, პიტია, – გაიფიქრა მან, – ის რაღაც პიტსაც მისწვდება და იმ ქალსაც.

ჰენრი უკან, გზისკენ წაბარბაცდა, ვერ ამჩნევდა, რომ ტიროდა, ვერ ამჩნევდა, რომ ცხვირიდან სისხლი სდიოდა. კვლავ „კედელში

გაკეთებული ხვრელისკენ“ გაემართა, მაგრამ უწინდებურად დამა-  
ჯერებლად ვედარ მიძუნძულებდა. ძლივს მიდიოდა, კოჭლობდა,  
ბორძიკობდა. თუმცა ამას, შესაძლოა, მნიშვნელობა არც ჰქონდა,  
რადგან სახლში ყველაფერი დასრულდა.

რა საშინელებაც უნდა მომხდარიყო იქ, მან მაინც დააგვიანა. მისი  
ერთი მეგობარი მოკვდა, მეორე კვდებოდა, მესამე კი, ღმერთო, უენ  
დაიფარე, კინოვარსკვლავი გახდა.

# თავი მეშვიდე ჯოუნსი და ბივი

## 1

ბივერი ამას კვლავ და კვლავ იმეორებდა. ეს ბივერიზმი კი არ იყო, არამედ – უბრალო და მოკლე გინება, რაც მაშინ მოგდის თავში, როგორც კი კედელს მიეყრდნობი და შეძრწუნების გამოსახატავად სხვა სიტყვები არ გახსენდება.

– ვაჰ, ამის დედაც! .. ამის დედაც! ..

მაკარტი საშინელ ტკივილს გრძნობდა, მაგრამ მაინც მოახერხა, რომ სააბაზანოში სარკის ორივე მხარეს ფლუორესცენციული, ზემოთ კი მრგვალი პლაფონი აენთო. არაბუნებრივად თეთრი, მკვეთრი შუქის ფონზე იქაურობა დანაშაულის ადგილზე პოლიციელების გადაღებულ ფოტოსურათს ჰგავდა, სიურრეალიზმის ნიშნებიც დაჰკრავდა, რადგან ნათურები თანაბრად არ ენთო, დროგამოშვებით ციმციმებდა და ძნელი მისახვედრი არ იყო, რომ დენი გენერატორიდან მოდიოდა და არა იმ ქვესადგურიდან, დერისა და ბანგორს რომ ამარაგებს.

იატაკზე ღია ცისფერი კაფელი ეგო და თუკი კართან ალაგ-ალაგ მოჩანდა სისხლის ლაქები, ტუალეტთან უკვე გუბეები იდგა და ალისფერი ნაკადულები მოედინებოდა. ჯოუნსისა და ბივს ჩექმების გახდით თავი არ შეუწუხებიათ და კაფელი საშინლად აატალახეს. საშხაპის ლურჯ ფარდას თითების ოთხი ჭუჭყიანი ანაბეჭდი ეტყობოდა. ჯოუნსი კიდევ უფრო მოიღუშა და გაიფიქრა: ალბათ, ფარდას მოეჭიდა, უნიტაზზე დაჯდომისას რომ არ დაცემულიყო.

მაგრამ უფრო დიდი საშინელება ის იყო, რასაც ჯოუნსი თავის წარმოსახვაში ხედავდა: მაკარტის ცალი ხელი ზურგს უკან წაეღო, ცისფერ კაფელზე აქეთ-იქით აწყდებოდა და რალაცის შეჩერებას ცდილობდა.

– ფუჰ, ამის დედაც! .. – დაქოქილივით გაიმეორა ბივმა. საცაა ას-ლუკუნდებოდა, – ველარ ვუყურებ, ჯოუნსი, მეგობარო, აღარ შემიძლია!

ჯოუნსის საკუთარი ხმა ყრუდ, სადღაც შორიდან ჩაესმა:

– მოგიწევს, ბივ. სხვა გზა არ გვაქვს. მაშინ რიჩი გრენადოს თუ გავუძელით, ახლაც შევძლებთ.

– არ ვიცი, ძმაო, არ ვიცი...

არც ჯოუნსიმ იცოდა, მართლა არ იცოდა, მაგრამ მაინც გადაიხარა წინ და ბივს ხელზე ხელი მოჰკიდა. ბივმა ცივი თითები მაშინვე ჩაავლო და ისინი ერთად შევიდნენ სააბაზანოს სიღრმეში. ჯოუნსი ცდილობდა, ფეხი სისხლში არ ჩაეკრა, მაგრამ ეს შეუძლებელი იყო: სისხლი ყველგან ეცხო. და არა მარტო სისხლი.

– ჯოუნსი, – ხრინწიანად ჩაიჩურჩულა ბივმა, – იმ ტრაწიან ფარდას თუ ხედავ?

– კი.

ანაბეჭდებს შორის მოწითალო-ოქროსფერი ყელეს კვალი მოჩანდა, ობივით. იატაკზე უფრო მეტი ჩანდა, ოღონდ ყველაზე დიდ გუბეში კი არა, ნახევრად გამშრალ ლაქებში.

– ეს რა არის?

– არ ვიცი, – მხრები აიჩეჩა ჯოუნსიმ, – თითქოს იგივე ნაგავია, რაც მის სახეზე. ახლა კი ცოტა ხნით გაჩუმდი, – და პაუზის შემდეგ დაიძახა:

– მაკარტი! .. რიკ!

უნიტაზზე მჯდარი მაკარტი არ პასუხობდა. რალაც მიზეზის გამო თავზე ისევ ნარინჯისფერი კეპი დაეხურა: წინაფრა გალუნოდა და დარდიმანდულად მოჰქცეოდა გვერდზე. რომ არა ეს კეპი, თითქმის შიშველი იყო. ნიკაპი მკერდამდე ჩამოვარდნოდა, რაც ღრმად ჩაფიქრების უშნო პაროდიას ჰგავდა (იქნებ, სულაც არ იყო პაროდია, ვინ იცის?), თვალები დაეხუჭა, ერთმანეთზე გადადებული ხელებით ბოქვენი დაეფარა. უნიტაზის ცალი მხრიდან ფართოდ მოედინებოდა სისხლი, მაგრამ თვითონ მაკარტის, რამდენადაც ჯოუნსი ხედავდა, წვეთიც არ ეცხო.

ერთი რამე კი აშკარად დაინახა: მაკარტის მუცელზე კანი ორი დიდი, ცარიელი ტიკივით ჩამოჰკიდებოდა. ჯოუნსის სურათი ეცნო, თავს ძალა დაატანა და გაიხსენა, რომ სწორედ ასე გამოიყურებოდა კარლას მუცელი ყოველი მშობიარობის შემდეგ. თედოს თავზე მაკარტის კანი მხოლოდ გასწითლებოდა, მუცელი კი პატარ-პატარა ლურჯი ნაწიბურებით დაჰლაროდა. თუ მაკარტი დაფხმძიმდა, როგორც ჩანს, მხოლოდ რალაც პარაზიტებით – მატლებით, ან რალაც მათი მსგავსი არსებებით. მაგრამ რით აეხსნათ დაღვრილ სისხლზე გაჩენილი ობი და სიტყვები, რომლებიც სტუმარმა ჯოუნსის ლოგინში დაწოლის წინ წარმოთქვა? „ვდგავარ შენს კართან და ვაკაკუნებ“. ახლა ჯოუნსი ძალიან ნანობდა, რომ კაკუნს არ გამოეხმაურა. არა, სიმართლე ითქვას, იმას უფრო ნანობდა, რომ მაკარტი თავიდანვე არ მოკლა. დიახ. ზოგჯერ, შიშის მარწუხებში მოქცეულ მფეთქავ გონებაში, ამას საოცრად გარკვევით ხედავდა, და ამ დროს აცნობიერებდა, რომ მაკარტისთვის ტყვია მანამ უნდა დაეხალა, სანამ ნარინჯისფერ ყილეტსა და კეპს მოჰკრავდა თვალს. ყოველ შემთხვევაში, ეს თუ არ დაეხმარებოდა, არც დააზიანებდა.



- კართან იდექი და გაჩუმდი, - ჩაიბურტყუნა ჯოუნსიმ.
- ჯოუნსი, ის ცოცხალია?
- არ ვიცი.

ჯოუნსიმ კიდევ ერთი ნაბიჯი გადადგა და იგრძნო, რომ ბივმა თითები გაშალა. ჩანდა, რომ ამტანობის მარაგი ეწურებოდა.

- რიკ! - ჩუმად დაუძახა ჯოუნსიმ იმ ადამიანის ხმით, რომელსაც არ უნდა, რომ ბავშვს გაეღვიძოს, იმ ადამიანის ხმით, რომელმაც მიცვალებული იხილა, - რიკ, თქვენ...

უნიტაზზე მჯდომმა მამაკაცმა ხმამაღლა გააკუა და ოთახში მაშინვე ექსკრემენტებისა და საავიაციო წებოს მძაფრი სუნი დატრიალდა.

სასწაულია, რომ საშხაპის ფარდა არ დადნა, - გაიფიქრა ჯოუნსიმ.

უნიტაზიდან დგაფუნი გაისმა. ეს ქაშანურის თასში განავლის ტყაპანს კი არა, გუბეში თევზის მხიარულ სხმარტალს უფრო ჰგავდა.

- ღმერთო ძლიერო, რა სიმყრალეა! - შესძახა ბივერმა და ხელისგული ცხვირ-პირზე მიიფარა, რის გამოც მეტყველება გაურკვეველი გაუხდა, - მაგრამ რახან გაზებზე გადის, მაშასადამე, ცოცხალია. რას იტყვი, ჯოუნსი? ის ისევ...

- მოკეტე! - ჩუმად უბრძანა ჯოუნსიმ, თან საკუთარმა სიმშვიდემ გააოცა, - მხოლოდ მოკეტე, კარგი?

ბივმა მოკეტა.

ჯოუნსი უფრო ქვემოთ დაიხარა, ასე რომ, შეეძლო, კარგად გაერჩია პატარა სისხლის ლაქა მაკარტის მარჯვენა წარბზე, წითელი ნაწიბური ლოყაზე, სისხლი ლურჯ, პლასტიკურ ფარდაზე, ფირფიტა მხიარული წარწერით „ლამარის ფიქრების კუთხე“, რომელიც ჯერ კიდევ მაშინ ეკიდა, როდესაც აქ ბიოტუალეტი იდგა, წყალს კი ტუმბოთი ქაჩავდნენ. მან შეამჩნია სუსტი, ლაბისებური გამონათება მაკარტის დახრილი ქუთუთოებიდან, ნახეთქები ტუჩებზე, თეთრ შუქ-

ზე იასამნისფრად და წითლად რომ მოჩანდა; ცხვირით საზიზღარ ჰაერს ისუნთქავდა და თითქოს ხედავდა, როგორ მიიწევდა ჭერისკენ მდოგვის აირის მსგავსი მუქი ყვითელი სვეტები.

– მაკარტი! რიკ! გესმით ჩემი? – ნახევრად დახუჭულ თვალებთან თითები გაუტკაცუნა. არავითარი რეაქცია. შემდეგ ხელის ზურგზე ენა აისვა და ჯერ მაკარტის ნესტოებთან მიიტანა, შემდეგ პირთან. კვლავ არაფერი.

– ის მკვდარია, ბივ, – თქვა ჯოუნსიმ და უკან დაიხია.

– კარგი რა! – აღშფოთებით, შეურაცხყოფილი კაცის კილოთი მიუგო ბივმა, თითქოს მაკარტის, თავისი სიკვდილით, სტუმარმასპინძლობის ყველა წესი დაერღვიოს და, მიუხედავად საშინელი მდგომარეობისა, ჯოუნსის კინალამ გაელიმა ბივის ხმაში გაჟღერებულ აბსურდულ წყენაზე, – ახლახან მოგვართვა ვეებერთელა ულუფა, თვითონ გავიგონე.

– ჩემი აზრით, ეს...

ბივი წინ გავარდა და ჯოუნსი ნატკენი თეძოთი პირსაბანზე მიაჭყლიტა.

– გეყოფა, შე კაცო! – წაისისინა მან, მაკარტის მომრგვალებულ, დაჭორფლილ, მოღუნებულ მხარში ხელი ჩაავლო და გამაგებით შეაჯანჯლარა, – ადექი, გესმის? აბა, ჩამოდი უნიტაზიდან!

მაკარტი ნელა დაიძრა წინ და უეცრად ჯოუნსის მოეჩვენა, რომ ბივერი მართალი იყო და კაცი წამოდგომას ცდილობდა. მაგრამ ამ დროს მაკარტი აბაზანისკენ გადავარდა და ფარდის ლურჯ, გამჭვირვალე ღრუბელს გაედო, ნარინჯისფერი კეპი დაუვარდა და თავი ფაიფურს ხმაურით მიარტყა. მხიარული, ცისფერი კაფელით გაწყობილი ოთახი მოულოდნელად საზარელ სივრცედ იქცა. შეშინებულმა ჯოუნსიმ და ბივმა ერთმანეთს ხელი სტაცეს და შეჰყვირეს. მაკარტის უკანალი სავსე მთვარეს ჰგავდა, რომლის ცენტრშიც გიგანტური სისხლიანი კრატერი, საშინელი ამოფრქვევის წყარო მდე-

ბარეობდა. ამ ყველაფერს ჯოუნსიმ იქამდე მოჰკრა თვალი, სანამ მაკარტი საბოლოოდ გაუჩინარდებოდა აბაზანაში. ფარდა უკანასკნელად აფრიალდა და ისე დაეშვა, როგორც ეს თეატრში ხდება ტრაგიკული ფინალის შემდეგ. იმავე წამს ჯოუნსის მოეჩვენა, რომ ნახვრეტის დიამეტრი ფუტზე ნაკლები არ იქნებოდა. ნუთუ ეს შესაძლებელი იყო? ფუტი? რა თქმა უნდა, არა!

უნიტაზში კვლავ რალაც გადგაფუნდა, საკმარისად ძლიერად, და სისხლიანი წყალი ცისფერ უნიტაზს შეეშხევა. ბივერმა დააპირა დახრილიყო და ახლოდან დაეთვალიერებინა, მაგრამ ჯოუნსიმ, თვითონაც არ იცოდა, რატომ, უნიტაზს თავსახური ხმაურით დაახურა.

– არა, – თქვა მან.

– არა?

ბივერმა პიჯაკის ზედა ჯიბიდან კბილსაჩიჩქნის ამოღება მოინდომა, მაგრამ ხელს ბევრი ამოაყოლა და ძირს დაუცვივდა. კბილსაჩიჩქნები ასანთის ღერებივით მოეფინა იატაკს. ბივემა მათ დაბნეული სახით დახედა, შემდეგ კი ჯოუნსის შეხედა. თვალეში ცრემლი ედგა.

– როგორც დადიტსი, – თქვა მან.

– ღვთის გულისთვის, მითხარი რას გულისხმობ?

– როგორ არ გახსოვს? ისიც თითქმის შიშველი იყო. იმ არამზადებმა ტრუსის გარდა ყველაფერი გახადეს, მაგრამ ჩვენ გადავარჩინეთ.

ბივერმა თანხმობის ნიშნად თავი ისე ენერგიულად დაუქნია, თითქოს ჯოუნსი სულის საიდუმლო კუნჭულებში ამ ფაქტის გამახსნარავებას ცდილობდა.

არადა, ჯოუნსის ეს არც კი გაუფიქრებია, თუმცა მაკარტი დადიტსს ოდნავაც არ ჰგავდა. იგი მის თვალწინ იყო აბაზანაში ჩავარდნილი: ნარინჯისფერი კეპი მოხდოდა, მკერდზე ცხიმოვანი ნაკეცები ("ძუძუები უზრუნველი ცხოვრებისგან", როგორც მათ ჰენრი უწო-

დებდა, როდესაც ვინმეს მაისურის ქვეშ ამგვარს შეამჩნევდა) ჟელესავით უთრთოდა. მის უკანალს, მკაფიოდ რომ მოჩანდა ფლუორესცენციულ შუქზე, საიდუმლოს შენახვა არ შეეძლო და ყველაფერს დაუფარავად ჰყვებოდა ჯიუტი, მონოტონური ზუზუნით. ეს მამაკაცის უზადო, თეთრი უკანალი იყო, უთმო, ოდნავ დონდლო, მომჩვარვის საწყის სტადიაზე, მსგავსი უკანალები ჯოუნსის ათასობით ენახა მამაკაცების გასახდლებში, სადაც ტანსაცმელს იცვლიდა ხოლმე და შხაპს იღებდა, მისი საკუთარიც ხომ თანდათან ასეთს ემსგავსებოდა (და დაემსგავსებოდა კიდევ, ის ბებერი სულელი მანქანით რომ არ დასჯახებოდა და მეხუთე წერტილის კონფიგურაცია არ შეეცვალა, შესაძლოა, სამუდამოდაც), მაგრამ ამდაგვარს ჯერ არასდროს გადაჰყროდა. თითქოს მაკარტის მუცელში ვიღაცამ ხელყუმბარა ააფეთქა ან ნაღმსატყორცნიდან ისროლა, რათა... რატომ?

უნიტაზიდან მორიგი ყრუ დგაფუნი გაისმა. თავსახურავი შეხტა. სავსებით შესაფერისი პასუხი იყო. აშკარად გარეთ სურდა გამოსვლა.

– ზედ დაჯექი, – უთხრა ჯოუნსიმ ბივერს.

– რაო?

– დაჯექი-მეთქი! – ჯოუნსიმ თითქმის იყვირა. ბივერი მოიბუზა და თავსახურზე დაებერტყა. ფლუორესცენციულ შუქზე, რომელიც ყოველ კუთხე-კუნჭულს ანათებდა, ბივერის სახეს გამომშრალ მიწასავით ნაცრისფერი დასდებოდა, შავი თმის ღერებს დაეწინწკლა, ტუჩები გალურჯებოდა და შეთხლებოდა. თავს ზემოთ ძველი, მხიარული წარწერა მოჩანდა: „ლამარის ფიქრების კუთხე“, ცისფერ, ფართოდ გახელილ თვალებში შიში ჩასდგომოდა.

– ვზივარ, ჯოუნსი, ხომ ხედავ!

– კარგი. მაპატიე, ბივ, თავი ვერ შევიკავე. შენ მხოლოდ იჯექი, ხომ გესმის? იდგაფუნოს, ის მახეშია მომწყვდეული და ვერსად წავა, თუ არა კანალიზაციის სადინარში. ახლავე დავბრუნდები...

– სად მიდიხარ? არ მინდა, მარტო დამტოვო ამ მიცვალებულთან.

თუ ორივენი გავიქცევით...

– ჩვენ არსად გავიქცევით, – გააწყვეტინა ჯოუნსიმ, – ეს ჩვენი სახლია და გასაქცევი არაფერი გვჭირს.

ეს სიტყვები კეთილშობილურად კი უღერდა, მაგრამ ასეთი გაბედული განცხადების უმთავრეს მოტივს ნათელს არ ჰფენდა. ჯოუნსი შიშობდა, რომ უნიტაზში მომწყვდეულ რაღაცას მათზე სწრაფად გადაადგილება – ხოხვა ან ფრენა – შეეძლო.

მის გონებაში სინათლის სხივის სიჩქარით ჩაიქროლა უამრავმა კადრმა საშინელებათა ფილმებიდან: „პარაზიტი“, „გადამთიელები“, „ისინი შიგნიდან მოვიდნენ“.

კარლა მსგავს სისაძაგლებს, როგორც თვითონ უწოდებდა, არ უყურებდა და აიძულებდა, რომ ქვევით ჩასულიყო, კაბინეტში. ტელევიზორი იქაც იდგა. მაგრამ ახლა იმ ფილმებიდან ერთ-ერთს, უფრო სწორად, იმას, რაც იმ ფილმში ნახა, მათი გადარჩენა შეეძლო.

ჯოუნსიმ მაკარტის თითების ანაბეჭდზე გაჩენილ მოწითალო-ოქროსფერ ობს შეხედა. უნიტაზში დამწყვდეული სისაძაგლისგან თავი უნდა დაეხსნათ. ობი... ღვთის გულისათვის, ვინ იცის, ეს რა არის?

უნიტაზში მოქცეული სისაძაგლე კვლავ შეხტა და სახურავს დაეჯახა, მაგრამ ბივერი მყარად იჯდა და დათმობას არ აპირებდა. ძალიანაც კარგი. იქნებ ის რაღაც, უბრალოდ, დამხრჩვალყო. თუმცა ჯოუნსის ამის დიდი იმედი არ ჰქონდა, ის ხომ მაკარტიში ცხოვრობდა! იგი ამ ბებერ მისტერ შენს-კართან-ვდგავარ-და-ვაკაკუნებში საკმაოდ დიდხანს ცხოვრობდა. შესაძლოა – ოთხი დღე, სანამ ტყეში დაეხეტებოდა. როგორც ჩანს, მან მაკარტის წვერის ზრდა შეაჩერა, კბილებიც მის გამო დასძვრა, გაზებსაც ამიტომ უშვებდა, – თითქმის მომწამვლელ აირებს, – რაც ყველაზე თავაზიანი ადამიანების საზოგადოებაშიც კი გამოიწვევდა უკმაყოფილებას. სამაგიეროდ, თვითონ ის არსება იფურჩქნებოდა... ცელქობდა... იზრდებოდა.

უეცრად ჯოუნსის ღორის თეთრი ჭია წარმოუდგა, ის უმი ხორცის გროვიდან მოძვრებოდა. ყელში ნაღველი მოაწვა. უცნაური, ბუყბუყის მსგავსი ხმა გამოსცა.

– ჯოუნსი! – ბივერმა ოღნავ წამოიწია. უწინდელზე მეტად შემფოთებული ჩანდა.

– ბივერ, ახლავე დაჯექი!

ბივერი ასეც მოიქცა. და სწორედ რომ დროულად – სისაძაგლე ახტა და თავსახურს ძლიერად, ხმაურით დაეჯახა... „შენს კართან ვდგავარ და ვაკაკუნებ“.

– ის ფილმი თუ გახსოვს, „სასიკვდილო იარაღი“, რომელშიც მეღ გიბსონის პარტნიორი უნიტაზზე ზის და ადგომას ვერ ბედავს? – ჰკითხა ბივერმა ღიმილით, თუმცა შეშინებული და გაფითრებული სახით, – ჰგავს, არა?

– არა, – მიუგო ჯოუნსიმ, – რადგან აქ ასაფეთქებელი არაფერია. თანაც მე მეღ გიბსონი არ ვარ და შენც ძალზე თეთრი ხარ დენი გლოვერისთვის. მისმინე, ბივ, ახლა ფარდულში უნდა წავიდე...

– არავითარ შემთხვევაში... აქ ვერ მიმატოვებ...

– მოკეტე და მისმინე, იქ სადღაც იზოლაციის ლენტის გორგალი უნდა ეგდოს, არა?

– ჰო, ოღონდ კი არ გდია, ლურსმანზე ჰკიდია, ყოველ შემთხვევაში, მე ასე...

– მართალი ხარ, გამახსენდა. ლურსმანზე კიდია. საღებავების ქილების გვერდით. ბორბალივით უშველებელია. წავალ, მოვიტან და უნიტაზს შემოვახვევ. შემდეგ...

მორიგი დგაფუნი. თითქოს იმ რალაცამ გაიგონა და ყველაფერს მიხვდა. რა ვიცით, იქნებ ასეცაა, – გაიფიქრა ჯოუნსიმ. როდესაც ის რალაც თავსახურს დაეჯახა, ბივერი შეიჭმუხნა.

– შემდეგ კი აქედან მოვუსვამთ, – დაასრულა ჯოუნსიმ.

– ჩატ-ით?

ჯოუნსიმ თავი დაუქნია, თუმცა სინამდვილეში ყველგანმავალი

სულ აღარ ახსოვდა.

– ჰო, ჩატ-ით. ჰენრისა და პიტს უნდა მივუსწროთ...

ბივი თავს უქნევდა.

– კარანტინიო, თქვა იმ ტიპმა ვერტიმფრენიდან. ალბათ, ამიტომაც ვერ დაბრუნდნენ, ნუთუ არ გესმის? შესაძლოა, დააკავეს კიდევ ამ...

ბახ!

ბივერი მოიკუნტა. ჯოუნსის გააჟრიალა.

– კარანტინის გამო.

– ალბათ, – დაეთანხმა ჯოუნსი, – მაგრამ მომისმინე, ბივ. ვფიქრობ, აქ ჯდომას პიტთან და ჰენრისთან ერთად კარანტინში ყოფნა სჯობია. რას იტყვი?

– მოდი, ავდგეთ და წყალი ჩავუშვათ, – შესთავაზა ბივერმა, – უბრალოდ, ჩავრეცხოთ.

ჯოუნსიმ, პასუხად, თავი გადააქნია.

– რატომ?

– იმიტომ, რომ ორივემ ვნახეთ ის ნახვრეტი, რომელიც იმ რაღაცამ გააკეთა, როცა გარეთ გამოდიოდა, – თქვა ჯოუნსიმ, – არ ვიცი, რა არის, მაგრამ ერთი ხელის მოსმით თავიდან ვერ მოვიცილებთ. ძალიან დიდია.

– ამის დედაც! .. – ხმადაბლა წარმოთქვა ბივერმა და შუბლზე ხელი შემოირტყა.

ჯოუნსიმ თავი დაუქნია.

– კარგი, ჯოუნსი, წადი და ლენტი მოიტანე.

ჯოუნსი კარისკენ გაემართა, მაგრამ ზღურბლზე შეჩერდა და უკან მოიხედა.

– ბივერ...

ბივერმა წარბები აზიდა.

– მიწებებუღივით იჯექი, მეგობარო.

ბივერმა ნერვიულად ჩაიხითხითა. მას ჯოუნსიც აჰყვა. ერთმანეთს უყურებდნენ და იცინოდნენ: ერთი კარის ღიობში იდგა, მეორე უნიტაზზე დაბრძანებულიყო.

ჯოუნსიმ სიცილით გადაჭრა დიდი ოთახი, „მიწებებულებით იჯექი“. რაც უფრო მეტს ფიქრობდა ამაზე, მით უფრო სასაცილოდ ეჩვენებოდა – სამზარეულოს კარისკენ გაემართა. ციებ-ცხელების მსგავსი რამ სჭირდა, ხან სცხელოდა, ხან სციოდა, შიშისგანაც კანკალებდა და ნერვიული მხიარულებისგანაც. მიწებებულებით იჯექი. ღმერთო დიდებულო! ბანანები!

## 2

ბივს კარის მიხურვის შემდეგაც ესმოდა ჯოუნსის ხითხითი, მიუხედავად ყველაფრისა, მაინც უხაროდა ამ ხმის გაგონება. ეს წელი ისედაც რთული აღმოჩნდა ჯოუნსისთვის. თავდაპირველად იმასაც კი ფიქრობდნენ, ხელიდან არ გამოგვეცალოსო. საბრალო ჯოუნსი! მას ხომ ჯერ ოცდათვრამეტიც არ შესრულებოდა. პიტისთვისაც ცუდი წელი იყო, ბევრს სვამდა, ჰენრისთვისაც – ზოგჯერ უაზროდ იყურებოდა... იმის თქმაც შეიძლებოდა, რომ ეს წელი ბივერ კლარენდონისთვისაც საზიზღარი გამოდგა. მართალია, სამას სამოცდახუთიდან მხოლოდ ერთი დღე იყო ასეთი, მაგრამ განა არსებობს ამქვეყნად ადამიანი, რომელიც დილით იმ რწმენით იღვიძებს, რომ შუადღისთვის აბაზანაში ვილაც შიშველი კაცი იწვეება, თვითონ კი უნიტაზის თავსახურზე იჯდება, რათა იქიდან მისთვის სრულიად უცნობი არსება არ ამოხტეს?...

– არა, ბატონო, – გადაჭრით თქვა ბივერმა, – მის ნახვას არც ვაპირებ. არავითარ შემთხვევაში.

ეს არც მოუწევდა. ჯოუნსი საიზოლაციო ლენტს ორ, მაქსიმუმ სამ წუთში მოიტანდა. მთავარია, დახვდებოდა მისი დაბრუნების დროისთვის? სად იგრძნობდა თავს კარგად და თავისუფლად?



დადიტსთან, აი, სად. დადიტსზე ფიქრისას ყოველთვის კარგ ხასიათზე დგებოდა. რობერტაზე ფიქრიც სიამოვნებდა. უდავოდ.

ბივს გაეღიმა, როდესაც წარმოიდგინა, თუ როგორ იდგა ყვითელკაბიანი პატარა ქალი იმ დღეს მებიპლენინზე, სახლის ღობესთან. იმის გახსენებაზე, რაც მან მათ დანახვაზე თქვა, სახე გაებადრა. შვილს დაუძახა. მან დაიძახა...

### 3

– დადიტს! – ყვირის ყვავილებიან ჩითის კაბაში გამოწყობილი, ჭალარაშეპარული პატარა ბელურა და ტროტუარზე მათ შესახვედრად მორბის.

დადიტსი მშვიდად მიაბიჯებს ახალშეძენილ მეგობრებთან ერთად, მარცხენა ხელში სკუბიდუნახატიანი კოლოფი უჭირავს და წუთში ბორძიკ-ბორძიკით ექვს სიტყვას ამბობს. მარჯვენა ხელი ჯოუნსისთვის ჩაუვლია და აქეთ-იქით მხიარულად აქანავებს. თითქმის მხოლოდ ხმოვნებით ბურტყუნებს, მაგრამ ბივს ის აოცებს, რომ ამ უაზრო ბგერების ნაკადში მისთვის ყველაფერი გასაგებია.

ჭალარაშეპარული ქალი-ბელურის დანახვაზე დადიტსი ჯოუნსის ხელს უშვებს და მისკენ გარბის, ორივენი გარბიან და ბივერს ეს რომელიღაც მიუზიკლს აგონებს მომღერლების ჯგუფის შესრულებით, ფონ კრიპსის, ფონ კრაპსის თუ ვილაც ამგვარის სოლისტობით.

– მოედი! მოედი! – ყვირის გახარებული დადიტსი, – დეიკო! დეიკო!

– სად იყავი? სად იყავი, ცუდო ბიჭო, ცუდო ბებერო დადიტს?

ისინი ერთმანეთთან მიირბენენ. დადიტსი მასზე მაღალია, ორისამი დუიმიტ მაინც. ამის დანახვაზე ბივერი იჭმუხნება, ელოდება, რომ ქალი-ბელურა გაბრტყელდება, როგორც კატა, სახელად ტომი, დისნეის მულტფილმიდან, მაგრამ, ამის მაგიერ, იგი ხელში აიტაცებს შვილს და დაატრიალებს. ბოტასებიანი ფეხები ულონოდ ჰკიდია ჰაერში, ბიჭს პირი ყურებამდე გაულია და სახეზე ბედნიერი ღიმილი

უთამაშებს.

– უკვე პოლიციაში დარეკვას ვაპირებდი, ცუდო, საძაგელო ბიჭო, ცუდო, საძაგელო დად...

ამ დროს იგი ბივერსა და მის მეგობრებს ამჩნევს და შვილს მიწაზე სვამს. ღიმილი უქრება, იღუმება და ნაბიჯს დგამს, პატარა გოგოების მიერ ცარციით დახატულ წრეში. შეწუხებული ბივერი ფიქრობს, რომ დადიტსი ამ უბრალო თამაშსაც ვერ დაძლევს. ქალს კი ღრუბლებიდან როგორღაც გამოჰყვითილ მზის შუქზე ცრემლი უბრწყინავს.

– უჰ-უჰ, – ამბობს პიტი, – ახლა მაგრად მოგვხვდება.

– გამაგრდი, – ჩუმად და სწრაფად ურჩევს ჰენრი, – ყვირილით გული იჯეროს, მერე ყველაფერს ავუხსნი.

მაგრამ ისინი არ იცნობენ რობერტა ქეველს, უფრო სწორად, მასზე ისე მსჯელობენ, როგორც უფროსების უმრავლესობაზე, რომელიც პატარა ბიჭებს იმთავითვე დამნაშავეებად თვლის, სანამ საპირისპირო არ დამტკიცდება. რობერტა ქეველი მათ სრულებით არ ჰგავს. ისევე, როგორც მისი ქმარი, სახელად ელფი. ეს დადიტსის დამსახურებაა.

– ბიჭებო, – ეკითხება მეგობრებს ქალი, – ქალაქში დახეტილებოდა? გზა აებნა? ძალიან მეშინია, სკოლაში მარტოს რომ ვუშვებ, მაგრამ საშინლად უნდა, რომ სხვა ბიჭებს ჰგავდეს.

იგი ცალ ხელს ბივერს უჭერს თითებზე ღონივრად, მეორეს კი – პიტს. შემდეგ ჯოუნსისა და ჰენრის რიგი დგება.

– მემ, – იწყებს ჰენრი. მის ქეველი დაჟინებით შესცქერის მას, თითქოს მისი აზრების წაკითხვა სურდეს.

– გზა არ აბნევია, – ამბობს ქალი, – არც უბრალოდ დახეტილებოდა.

– მემ, – იმეორებს ჰენრი და მაშინვე ხვდება, რომ მას ვერაფერს დაუმაღავს. ვერაფერს დაუმაღავს დადიტსის მსგავს, ოღონდ ჭკვიან, ფრთხილ და გამჭრიახ, კითხვის გამომხატველ თვალებს, – არა,

მემ, – ღრმად ამოისუთქავს ჰენრი, – უბრალოდ არ დახეტიალეხდა.

– ჩვეულებრივ, იგი პირდაპირ შინ ბრუნდება. მიმტკიცებს, რომ გზა არ აებნევა, რადგან ხაზს ხედავს. რამდენი იყვნენ?

– ოჰ, ცოტანი, – არწმუნებს ჯოუნსი და ჰენრის აღმაცერად გასცქერის. ამასობაში დადიტს ბაბუაწვერებისთვის მიუგნია, მუცელზე გაწოლილა, გატაცებით უბერავს მათ სულს და ჰაერში პატარა პარაშუტებს უშვებს, – სამი ბიჭი დასცინოდა, მემ.

– დიდი ბიჭები, – აზუსტებს პიტი. ქალი კვლავ ყურადღებით ათვალიერებს მათ – ჯოუნსიდან მზერა პიტზე გადააქვს, პიტიდან – ბივერზე, ბივერიდან – ჰენრიზე.

– შემოდით, – ეპატიჟება მათ ქალი, – მიხდა მოვისმინო, რა მოხდა. დღისით დადიტსი თავის „ზარექსს“ სვამს, თავის საყვარელ სასმელს, მაგრამ დარწმუნებული ვარ, თქვენ ყინულიან ჩაის ამჯობინებთ. ასეა?

სამი მეგობარი ჰენრის შესცქერის, რომელიც ხანმოკლე ფიქრის შემდეგ თანხმობის ნიშნად თავს აქნევს.

– დიახ, მემ, ყინულიანი ჩაი შესანიშნავი იქნება.

ქალი მათ სახლისკენ მიუძღვის, სადაც, მეიპლეინის ცხრამეტ ნომერში, მომდევნო წლებში ისინი უამრავ დროს გაატარებენ. ოლონდ, სინამდვილეში, მათ წინ დადიტსი მიაბიჯებს, უცნაურად მიხტის, ფეხებით რალაც ფიგურებს ხაზავს, ღროდადრო თავზემოთ სკუბი-დუს საუზმის ყუთს სწევს, მაგრამ, როგორც ბივერი აკვირდება, გზისპირიდან – ბალახიანი ბორდიურიდან – მანძილს ინარჩუნებს, დაახლოებით ერთ ფუტს. წლების შემდეგ, როდესაც გოგონას, გვარად რინკენჰაუერს გადაეყრებიან, ბივერს მისის ქვეელის ნათქვამი გაახსენდება. და არა მარტო მას. ყველას. „იგი ხაზს ხედავს“.

#### 4

– ჯოუნსი! – დაუძახა ბივერმა.

პასუხი არ ისმის. ღმერთო ჩემო, თითქოს საუკუნეა, რაც ჯოუნსი

წავიდა. შესაძლოა, ასე არაა, ძნელი სათქმელია – დილით ბივერს საათის გაკეთება დაავიწყდა, სისულელე დაემართა, თუმცა ყოველთვის ასე იქცევა, ამას, კარგა ხანია, უნდა მისჩვეოდა. ჯოუნსისა და ჰენრის გვერდით, ის და პიტი მუდამ სულელებს ჰგვანან. ჯოუნსი და ჰენრი ამას არასდროს აგრძნობინებდნენ და ბივერს ეს ყოველთვის ალაფრთოვანებდა.

– ჯოუნსი!

დუმილი. იქნებ ლენტს ვერ მიაგნო? ალბათ ასეცაა.

მაგრამ ბოროტი ხმა უმტკიცებს, რომ ლენტი არაფერ შუაშია, რომ ჯოუნსი აითესა და ის უნიტაზზე დატოვა, დენი გლოვერივით, იმ ფილმიდან. არა, ყურს არ დაუგდებს ამ ხმას, რადგან ჯოუნსი ასე არასდროს მოიქცევა. ისინი ყოველთვის მეგობრები იყვნენ და სიკვდილამდე ასე დარჩებიან.

მართალია, – ეთანხმება ბოროტი ხმა, – სიკვდილამდე. სიკვდილი კი აქვეა.

– ჯოუნსი! ჰეი, აქ ხარ?

სიჩუმე. ალბათ გორგალი ჩამოვარდა და სადღაც შეგორდა.

მის ქვეშ არაფერია. დალახვროს ეშმაკმა, ის ხომ საშინელებათა ფილმის გმირი არ არის. როგორ მოხდა, რომ მაკარტიმ უეცრად ამგვარი საშინელება გამოაგლო, უნიტაზში მხეცი გააჩინა? მართლაც საშინელებათა ფილმის პაროდიაა, სახელწოდებით „შაბათ ღამით“. ასეც რომ იყოს, უნიტაზში მხეცი, ალბათ, კარგა ხნის წინ დაიხრჩო, ჩაიძირა და გაუჩინარდა.

მოულოდნელად მას ერთი ფრაზა გაახსენდა იმ ისტორიიდან, რომელსაც რიგრიგობით უკითხავდნენ დადიტსს. კიდევ კარგი, რომ ოთხნი იყვნენ, რადგან დადიტსი არასდროს იღლებოდა იმით, რაც მოსწონდა.

„წაივით ორი! – მოითხოვდა იგი და მათკენ თავზემით აღმართული წიგნით მორბოდა – სწორედ ასე ეჭირა საუბრისთვის განკუთვნი-

ლი კოლოფიც იმ დღეს, – წაიფე ორი! წაიფე ორი! " რაც ამ შემთხვევაში ნიშნავდა: „წაიკითხე „ტბორი“. დოქტორ სიუსის წიგნს „მაკელიგოტის ტბორი“ ერქვა, რომლის პირველი სტროფიც დღემდე ახსოვდა:

იცინის გლეხი, იცინის:  
ბრიყვი ხარ, თუ ასე გშია?  
თევზს ვერასოდეს დაიჭერ  
მაკელიგოტის ტბორშია.

მაგრამ ტბორში თევზი იყო, ყოველ შემთხვევაში, იმ ამბის პატარა გმირის წარმოსახვაში მაინც. ბევრი თევზი. დიდი თევზი.

ქვემოდან დგაფუნი აღარ ისმოდა. რამდენიმე წუთი ისე გავიდა, თავსახურს არავინ მისჯახებია. იქნებ გარისკოს და სწრაფად შეხედოს – თავსახური ასწიოს და მაშინვე დაუშვას, თუ...

მაგრამ... „მიწებებუღივით იჯექი, მეგობარო“ – ეს ჯოუნსის ბოლო ფრაზაა და ჯობს, დაუჯეროს.

ჯოუნსი უკვე ერთ მილს გაივლიდა, – ჩასჩურჩულებს ბოროტი ხმა, – ერთ მილს გაივლიდა. თავქუდმოგლეჯით გარბის.

– არა, ტყუილია, – ხმამაღლა თქვა ბივერმა, – ჯოუნსი ამას არ იზამს.

აწრიალდა, ელოდება, როდის ამოხტება ის რალაც, მაგრამ არაფერი ხდება. ალბათ, აქედან უკვე სამოცი იარდით მაინც იქნება დაშორებული და კანალიზაციის რეზერვუარში ექსკრემენტებთან ერთად დაცურავს. ჯოუნსიმ თქვა, ისეთი დიდია, მილში ვერ გაეტევაო. ასეა თუ ისე, მესიე ბივერ კლარენდონს აქ ჯდომა მოუწევს, რადგან სიტყვა აქვს მიცემული, რადგან დრო ყოველთვის ნელა გადის, როდესაც უფოთავ ან გემინია. და რადგან ჯოუნსისა სჯერა. ჯოუნსისა და ჰენრის მისთვის არასდროს უწყენინებიათ, აბუჩად არასდროს აუგდიათ. არც პიტი. არც დადიტისთვის უწყენინებიათ ან დაუცინიათ.

ბივმა სასაცილოდ ჩაიფრუტუნა. დადიტსი და მისი საუზმის კოლოფი სკუბი-დუსთან ერთად. დადიტსი მუცელზე წევს და ბაბუაწვერებს სულს უბერავს. დადიტსი უკანა ეზოში ცელქობს, ბედნიერია, როგორც ჩიტი ხეზე. იმ ადამიანებს, რომლებიც მისნაირ ბავშვებს სხვებისგან განსხვავებულებს უწოდებენ, არაფერი ესმით. ის ბავშვები მართლაც განსაკუთრებულები არიან, სხვებისგან გამორჩეულები, ამ საზიზღარი სამყაროსგან დასაჩუქრებულები, თუმცა მისგან, კარგს რას უნდა ელოდო. დადიტსი გასაოცარი ბავშვია, მათი სულის გამაკეთილშობილებელია და მათ ის უყვართ.

## 5

ისინი მზით განათებული სამზარეულოს კუთხეში სხედან, – ღრუბლები, თითქოს რაღაც ჯადოქრობით, გაიფანტა – ყინულიან ჩაის მიირთმევენ და დადიტსს აკვირდებიან, რომელიც თავის „ზარექსს“ (შესახედავად საზიზღარ ნარინჯისფერ სითხეს) შეეცქევა. სამოთხ იმხელა ყლუპს სვამს, ლამის დაიხრჩოს. ჭიქას დაცლის და სათამაშოდ გარბის.

ჰენრი თხრობას საკუთარ თავზე იღებს და მისის ქვევლს უხსნის, რომ „ის ბიჭები დადიტსს მხოლოდ ხელს ჰკრავდნენ, ცოტათი გაცხარდნენ, მაისური შემოახიეს, შეაშინეს და ისიც ატირდა“. არც ერთი სიტყვა იმის შესახებ, რომ რიჩი გრენადომ და მისმა მეგობრებმა დადიტსი თითქმის გააშიშვლეს და ძაღლის განავლის შეჭმას აიძულებდნენ, ხოლო როდესაც მისის ქვევლი ეკითხება, იცნობს თუ არა ჰენრი იმ ბიჭებს, იგი ოდნავ ყოყმანობს, – არაო, – ამბობს და ამატებს, რომ უფროსკლასელები იყვნენ, რომელთა სახელებიც არ იცის.

ქალი ჯოუნსის, ბივერსა და პიტს შესცქერის, მაგრამ ისინიც გულმოდგინედ უარობენ. იქნებ, ეს შეცდომაც იყოს და დადიტსს მომავალში საფრთხე შეუქმნას, მაგრამ მათ არ შეუძლიათ, ერთბაშად გადააბიჯონ ცხოვრების კანონებსა და წესებს. ბივერს ისიც კი ვერ

გაუგია, საერთოდ, როგორ გაბედეს ჩარევა, მოგვიანებით დანარჩენებიც იმავეს იტყვიან. მათ არა მარტო საკუთარი გამბედაობა აოცებთ, არამედ ისიც, თუ როგორ მოახერხეს, რომ საავადმყოფოში არ მოხვდნენ.

რობერტა ნალვლიანად ოხრავს და უეცრად ბივერი ხვდება, რომ ქალმა ბვერი რამ იცის იქიდან, რასაც ისინი ბოლომდე არ ამბობენ, იქნებ იმდენიც კი, რომ მთელი ღამე თვალზე რული არ მიეკარება. თუმცა, ამ დროს ის ილიმის, ბივერს ულიმის და ამ უკანასკნელს ტანში ჟრუანტელი უვლის.

– რამდენი ელვა ახატია თქვენს ქურთუკს! – ამბობს რობერტა.

– დიახ, მემ, – ელიმება ბივერს, – ეს ჩემი ფონზი-ქურთუკია. ადრე ჩემს ძმას ეცვა. მეგობრები დამცინიან, მაგრამ მე მაინც მიყვარს.

– „ბედნიერი დღეები“<sup>63</sup> – ამბობს ქალი, – ის ჩვენც მოგვწონს. დადიტსაც. იქნებ, როგორმე შემოგვიაროთ და ერთად ვუყუროთ. მასთან ერთად.

ლიმილი ცოტათი შესაბრალისი გაუხდა, თითქოს გრძნობს, რომ ეს არ მოხდება.

– დიახ, კარგი იქნებოდა, – ეთანხმება ბივი.

– გეთანხმებით, – თავს აქნევს პიტი.

რამდენიმე წუთის განმავლობაში ყველანი ღუძმან და ეზოში დადიტის ხტუნვას შეჰყურებენ. ვილაცას, ალბათ მამას, ეზოში ორადგილიანი საქანელა ჩამოუკიდია. დადიტსი მას ჩაურბენს, ხელს ჰკრავს და გააქანებს. ზოგჯერ ჩერდება, ხელებს გულზე დაიკრეფს, უციფრო ციფერბლატის მსგავს სახეს ცას მიაპყრობს და იცინის.

– მგონი, კარგად არის, – ამბობს ჯოუნსი და ჩაის სმას ამთავრებს, – ყველაფერი დაივიწყა.

მისის ქვეელი წამოდგომას აპირებდა, მაგრამ კვლავ ჯდება და დაბნეულად უყურებს მას.

– არა, სულაც არა, – თავს აქნევს იგი, – ახსოვს. ისე არა, როგორც

---

<sup>63</sup> ამერიკული ტელესერიალი.

თქვენ ან მე, მაგრამ ბევრი რამ ახსოვს. ამაღამ, ალბათ, კოშმარებს ნახავს, მაგრამ როდესაც მე და მამამისი მივაკითხავთ, ვერაფერს აგვიხსნის. ეს ყველაზე ცუდია: არ შეუძლია გვითხრას, რას ხედავს, რას ფიქრობს ან გრძნობს. სიტყვები არ ჰყოფნის, – ღრმად ამოიხრებს, – ნებისმიერ შემთხვევაში, ის ბიჭები მას არ დაივიწყებენ. იქნებ მასზე ან თქვენზე შურისძიება მოინდომონ?

– საკუთარ თავზე ჩვენ თვითონ ვიზრუნებთ, – ამბობს ჯოუნსი. ხმა არ უთრთის, მაგრამ მზერა სადღაც გაურბის.

– შესაძლებელია, – ეთანხმება ქალი, – მაგრამ დადიტსი? შემიძლება, გავაცილო სკოლაში, როგორც ამას ადრე ვაკეთებდი. როგორც ვატყობ, ასეც მომიწევს, ცოტა ხანს მაინც. მაგრამ მას ძალიან უყვარს სკოლიდან მარტო დაბრუნება.

– ასე თავს, ალბათ, მოზრდილ ადამიანად გრძნობს, – ვარაუდს გამოთქვამს პიტი.

ქალი ხელს იწვდის და პიტს თითებზე ეხება, რის გამოც ბიჭი წითლდება.

– მართალია, ასე თავს მოზრდილ ადამიანად გრძნობს.

– იცით, რა, თუ წინააღმდეგი არ იქნებით, ჩვენ შეგვიძლია მისი გაცილება. ყველანი საშუალო სკოლაში დავდივართ, იქიდან კანზას-სტრიტამდე კი ორიოდე ნაბიჯია. – სთავაზობს ჰენრი,

რობერტა ქვეელი ამაზე არაფერს ამბობს. პატარა ქალი-ბელურა ყვავილებიანი კაბით ისე ყურადღებით შესცქერის ჰენრის, გეგონებთ ანეკდოტის კულმინაციურ მომენტს ელოდებო.

– თანახმა ხართ, მისის ქვეელ? – ეკითხება ბივერი, – ეს ჩვენთვის სირთულეს არ წარმოადგენს.

მისის ქვეელს სახე უცნაურად ეცვლება: კანქვეშ კრუნჩხვასავით დაუვლის, ცალი ქუთუთო დაშვებული აქვს, თითქოს თვალის ჩაკვრას აპირებსო, მეორე თვალი კი მართლაც უხამხამებს. ჯიბიდან ცხვირსახოცს იღებს და ენერგიულად იხოცავს ცხვირს. ცდილობს,



რომ ჩვენზე არ გაეცინოს, – ფიქრობს ბივერი. როდესაც შინისკენ მიმავალ გზაზე ამ ფიქრებს ჰენრის გაუზიარებს, ეს უკანასკნელი გაცივებით მიაჩერდება მას. „ის ქალი ტირილის შეკავებას ცდილობდა, – აუხსნის ბივს და მცირე პაუზის შემდეგ თბილად დაამატებს, – ბრიყვო“.

– შეძლებდით ამის გაკეთებას? – ეკითხება მათ ქალი და როდესაც ჰენრი ყველას მაგივრად თანხმობის ნიშნად თავს უქნევს, შეკითხვას ცვლის, – რატომ?

ჰენრი მეგობრებს შესცქერის, თითქოს ეუბნება, – იქნებ, თქვენც გამოთქვათ აზრი ამის შესახებო.

– ჩვენ მოგვწონს ეს ბიჭი, მემ.

– განსაკუთრებით ის, როცა საუბრისთვის განკუთვნილ ყუთს ზემოთ სწევს და დადის, – თავის ქნევით ეთანხმება ჯოუნსი.

– დიახ, ეს მაგრად ასწორებს, – ამბობს პიტი. ჰენრი მაგიდის ქვეშ ფეხს ურტყამს. პიტი ხვდება, რომ ზედმეტი თქვა – ამკარაა, როგორ აქვს ტვინი მოწყობილი, – და შეცბუნებისგან წითლდება.

მისის ქვეელი თითქოს ვერაფერს ამჩნევს. იგი სხვა რამით არის დაკავებული – დაძაბული მზერით ჰენრის მისჩერებია.

– ჩვეულებრივ, რვას რომ თხუთმეტი აკლია, სახლიდან მაშინ გადის, – ამბობს ბოლოს.

– ამ დროისთვის ჩვენ თითქმის თქვენს სახლთან ვართ ხოლმე, – პასუხობს ჰენრი, – ხომ ასეა, ბიჭებო?

და თუმცა შვიდი საათი და ორმოცდახუთი წუთი მათთვის ცოტა ადრეა, ყველანი თავის ქნევით ეთანხმებიან და ამბობენ, – ზედგამოჭრილი დროაო.

– და თქვენ ამას გააკეთებდით? – კვლავ ეკითხება მისის ქვეელი და ამჯერად ბივერს მისი აზრების წაკითხვა არ უჭირს. ქალს სკეპტიკი-მაინცვინხართ-იზმი ალაპარაკებს, რაც ადამიანურ ენაზე ნიშნავს, რომ მათი ბოლომდე არ სჯერა.

- რა თქმა უნდა, - არწმუნებს ჰენრი, - ოღონდ, იქნებ დადიტ-სმა...

- არ მონდომოს, რომ ჩვენ გავაცილოთ, - ამთავრებს წინადადებას ჯოუნსი.

- გაგიჟდით? - შესძახებს ქალი. ბივერს ეჩვენება, რომ მისის ქვეელი საკუთარ თავს ესაუბრება და სურს დააჯეროს, რომ სამზარეულოში მართლაც სხედან ეს ბიჭები და წარმოუდგენელს სთავაზობენ, - თქვენთან მეგობრობა? ბიჭებთან, რომლებიც, როგორც დადიტის ამბობს, ნამდვილ სკოლაში დადიან? იფიქრებს, რომ სამოთხეში მოხვდა! @

- მაშ, კარგი, - დაასკვნის ჰენრი. - რვას რომ თხუთმეტი დააკლდება, აქ ვიქნებით და სკოლამდე მივაცილებთ, შემდეგ კი უკან მოვიყვანთ.

- იგი ამთავრებს...

- ვიცით, როდის უშვებენ ბავშვებს დებილების აკადემიიდან, - მხიარულად ამბობს ბივერი და წამით ადრე, ვიდრე მეგობრების შეწუხებულ სახეებს დაინახავდეს, ხვდება, რომ გაცილებით საშინელი რამ წამოსცდა, ვიდრე სიტყვა „ასწორებს“. და სასწრაფოდ პირზე ხელს იფარებს. შეშინებული თვალები ჭუჭყიანი ხელისგულის ზემოთ ორ ლამბაქს მიუგავს. ჯოუნსი ფეხს ისე მაგრად გაჰკრავს, რომ კინალამ სკამიდან გადააგდებს.

- ყურადღებას ნუ მიაქცევთ, მემ, - ჰენრი მაშინვე ცდილობს მდგომარეობის გამოსწორებას, რაც მის შეცბუნებაზე მიანიშნებს, - მას მხოლოდ...

- არაფერია, - ხელს იქნევს ქალი, - ვიცი, რას ეძახის ხალხი „მერი მ. სნოუს“. ზოგჯერ ელფისაც კი წამოსცდება ხოლმე.

უცნაურია, მაგრამ ეს საკითხი მას თითქმის არ აღარდებს.

- რატომ? - იმეორებს იგი შეკითხვას და თუმცა ჰენრის უყურებს, ბივერი, აწითლებული ლოყებისა და შეცბუნებული სახის მიუხედავად, თამამად პასუხობს:

– იმიტომ, რომ ის ძალიან მაგარია.

დანარჩენები თავს უქნევენ.

ისინი დადიტსს თითქმის ხუთი წლის განმავლობაში გააცილებენ სახლიდან სკოლამდე და პირიქით, იმ დღეების გამოკლებით, როცა ის ავადაა ან ესენი მიემგზავრებიან „კედელში გაკეთებულ ხვრელში“. ხუთი წლის გასვლის შემდეგ დადიტსი მერი მ. სნოუს სკოლიდან, ანუ დებილების აკადემიიდან, დერის პროფესიულ სასწავლებელში გადადის, სადაც ღვეზლების ცხოვრებას („ზელების ცხოვრება“ დადიტსის ენაზე), მანქანებში აკუმულატორების შეცვლასა და ჰალსტუხის გამონასკვას სწავლობს (კვანძი ყოველთვის მშვენიერი გამოსდის, თუმცა ზოგჯერ ჭიპამდე სწვდება).

ჯოზი რინკენჰაუერთან დაკავშირებული ამბავი დიდი ხანია, წარსულს ჩაჰბარდა: ხანმოკლე, ცხრადღიანი სასწაული ყველას დაავიწყდა, ჯოზის მშობლების გარდა, რომლებსაც ეს, ცხადია, სიცოცხლის ბოლომდე ემახსოვრებათ.

მათ უკვე ასწავლეს დადიტსს პარჩიზი და მონოპოლის გამარტივებული ვარიანტი, „დადიტსის თამაშიც“ მოიგონეს, რომელსაც გაუთავებლად თამაშობენ და ისე ხარხარებენ, რომ ელფი ქეველი (ცოლისგან განსხვავებით, იგი მაღალია, მაგრამ რაღაცით ისიც ჩიტს წააგავს) სათამაშო ოთახთან დგება და ხმამაღლა მოითხოვს აუხსნან, თუ რატომ ხმაურობენ, რა არის ასეთი სასაცილო; ისინიც გულწრფელად ცდილობენ, აუხსნან, რომ დადიტსმა ჰენრის პალო მეორის ნაცვლად მეთხუთმეტე ორმოში ჩაარჭო და მას პატიოსნად გამოუმავებელი თხუთმეტი ქულა წაართვა; მაგრამ ელფი ამგვარ საკითხებში, როგორც ჩანს, ცუდად ერკვევა: იგი კიბის უჯრედზე დგას, ხელში გაზეთი უჭირავს, გაოცებული ილიმება და ერთსა და იმავეს იმეორებს: „ასე ნუ ღრიალებთ, ბიჭებო...“ შემდეგ ისევ თავის ოთახში შედის და კარს ხურავს. „დადიტსის თამაში“ ყველა გასართობზე სასაცილოა და როგორც პიტი იტყოდა, მაგრად ასწორებს.

ზოგჯერ ბივერი იმდენს იცინის, გეგონებათ, საცაა გასკდებაო, დადიტსი კი ქრიბიჯის ძველი დაფის გვერდით, ნოხზე ლოტოსის პოზაში ზის და ბუდასავით ყურებამდე ილიმება. გასაგიჟებელია!

მაგრამ ეს ყველაფერი მომავალში მოხდება, ახლა კი ყველანი სამზარეულოში სხედან, მზე საოცრად თბილად ანათებს, დადიტსი ეზოში საქანელას აქანავებს. დადიტსი, რომელიც – ისინი ამას თავიდანვე მიხვდნენ – არავის ჰგავს, ვინც კი უნახავთ.

– ვერაფრით გამიგია, როგორ შეეძლოთ მისი ტირილის ატანა, – იძახის მოულოდნელად პიტი, – არ მესმის, როგორ შეეძლოთ მისი აბუჩად აგდება.

რობერტა ქეველი მას სევდიანი თვალებით შესცქერის და ამბობს:

– დიდ ბიჭებს, უბრალოდ, არ ესმით ის, რაც თქვენ გაიგონეთ. ვიმედოვნებ, ამის გაგებას ვერასდროს შეძლებთ.

## 6

– ჯოუნსი! – იჭაჭება ბივერი, – ჰეი, ჯოუნსი!

ამჯერად პასუხი ესმის, სუსტი, მაგრამ მკაფიო. ფარდულში თოვლმავალთან ერთად ათასი წვრილმანია, მათ შორის ძველებური საყვირი, რომელსაც ოციან-ოცდაათიან წლებში ველოსიპედის საჭეზე ამაგრებდნენ. და ახლა ბივერს მისი გაბმული ხმა ესმის: პი-იი... პი-იი...

ხმაური, რომელიც დადიტსს ისე მოეწონებოდა, რომ სიცილისგან ჩაბჟირდებოდა; ბებერი დადსი – აი, ვის უყვარდა გამაყრუებელი, ტკბილი ჰანგები.

გამჭვირვალე ცისფერი ფარდა შეირხა და ბივერს ტანში ჟრუანტელმა დაუარა. კინალამ წამოხტა, წარმოიდგინა, რომ ეს მაკარტი იყო, მაგრამ მაშინვე მიხვდა, რომ თვითონ გაჰკრა მას იდაყვი – აბა, რა ექნა ამ სივიწროვეში. კვლავ მოხერხებულად მოკალათდა. ქვემოლან არაფერი ესმოდა; ის რაღაც საზიზღარი ქმნილება ან მოკვდა,

ან კანალიზაციის რეზერვუარში ეგდო. შეჭველად.

ჰო... თითქმის შეჭველად.

ბივმა ხელი ზურგს უკან წაიღო, წყლის ჩასარეცხ ლილაკს მიაგნო, დაჭერა დააპირა, მაგრამ გადაიფიქრა.

„მიწებებუღივით იჯექი“, – უბრძანა ჯოუნსიმ. ასე რატომ იგვიანებდა ჯოუნსი? ლენტს თუ ვერ მიაგნო, ხომ უნდა დაბრუნებულიყო? ათი წუთი მაინც გავიდა. თუმცა ეჩვენებოდა, რომ უკვე მთელმა საათმა განვლო. იჯდა უნიტაზის თავსახურზე მიცვალებულის საზოგადოებაში, რომლის უკანალიც ისე გამოიყურებოდა, თითქოს დინამიტი შესტენეს და ცეცხლი წაუკიდეს, რათა მოესაქმებინა.

– მიდი, ერთხელაც დაასიგნალე, – ჩაიბურტყუნა ბივმა, – დააწექი იმ წყეულ ოყნას, გამაგებინე, რომ აქ ხარ.

მაგრამ ჯოუნსი დუმდა.

## 7

ჯოუნსიმ ლენტს ვერ მიაგნო.

ყველგან ეძება, მაგრამ ვერ ნახა. ნამდვილად იქ უნდა ყოფილიყო, მაგრამ ლურსმანზე არ ეკიდა. არც ხარახურით სავსე დაზგაზე აღმოჩნდა, არც საღებავიანი ქილების უკან, არც კაუჭზე, რომელზეც გაყვითლებულთასმებიანი რესპირატორები ქანაობდა.

ჯოუნსიმ მაგიდის ქვეშაც შეიხედა, არცტიც ჩატ-ის სკამქვეშაც, შორეულ კედელთან დაწყობილი ყუთებიც შეამოწმა. მანქანის სათადარიგო ფარა კვლავაც ყუთში იდო, იქვე იყო სიგარეტი – ნახევარი კოლოფი „ლაქი სთრაიქი“, მაგრამ ლენტის თითქოს მიწას ჩაეყლაპა.

გრძნობდა, როგორ გადიოდა წუთები. ერთხელ აშკარად მოესმა ბივის ძახილი, მაგრამ ულენტოდ დაბრუნება არ უნდოდა, ამიტომ ძირს დაგდებული ძველი საყვირი აიღო, გაცვეთილ რეზინს ხელი რამდენჯერმე დააჭირა და გულის გამაწვრილებლად დაასიგნალა. ეს რომ დადიტსს გაეგონა, შეჭველად მოეწონებოდა.

რაც უფრო გაშმაგებით იქექებოდა ძველ ნივთებში, მით უფრო

იპყრობდა ლენტის მოძებნის უინი. მართალია, თოკის გორგალს მი-  
აგნო, თუმცა ტუალეტის საჯდომი ბაწრით როგორ დაემაგრებინა?  
გაახსენდა, რომ სამზარეულოს კარადაში სადღაც სკოტჩი უნდა ყო-  
ფილიყო, ამაში ჯოუნსის ეჭვი არ ეპარებოდა, მაგრამ ის საზიზღარი  
არსება, დგაფუნის მიხედვით, საკმაოდ ღონიერი ჩანდა, მოზრდილი  
თევზისხელა, და სკოტჩი ვერ გაუძლებდა.

ჯოუნსი ყოყმანობდა, ფარდულს ათვალიერებდა, თმას იწვალე-  
და (ხელთათმანი არ ეცვა, აქ საკმაოდ დიდხანს იმყოფებოდა და შე-  
საძლოა, თითები მოჰყინოდა) და ყოველ ამოსუნთქვაზე პირიდან  
თეთრ ორთქლს უშვებდა.

– სად ხარ, შენი დედაც! .. – შესძახა ხმამაღლა და დაზგას მუშტი  
გამეტებით დასცხო. დარტყმისგან ლურსმნებით, ბოლტებითა და  
ქანჩებით სავსე, ერთიმეორეზე შემოდებული პატარა ყუთები გად-  
მოცვივდა, ყველაფერი მიმოიფანტა და იატაკზე საიზოლაციო ლენ-  
ტის დიდი გორგალი გაგორდა. დაღახვროს ეშმაკმა, ალბათ, ათჯერ  
მაინც შეხედა მას და ვერ შეამჩნია!

ჯოუნსიმ რულონი ქურთუკის ჯიბეში ჩაიდო – კიდევ კარგი, რომ  
თბილად ჩაცმა არ დაავიწყდა, თუმცა არ შეუკრავს – და კარისკენ  
შეტრიალდა. ამ დროს ბივერის გამყინავი ყვირილი მოესმა. გულის  
გამგმირავი ხმა ძლივს აღწევდა, მაგრამ აუტანელი ტკივილით აღ-  
სავსე ძახილის გაგონება ჯოუნსის არ გასჭირვებია.

იგი კარისკენ გავარდა.

## 8

ტყუილად როდი ჩასჩინებდა დედა ბივერს, ადრე თუ გვიან, ეგ  
კბილის ჩხირები ბოლოს მოგიღებსო, მაგრამ ასეთ რამეს რას წარ-  
მოიდგენდა?!

ბივერი დამჯერე ბავშვივით იჯდა უნიტაზის თავსახურზე. ხელი  
კომბინეზონის წინა ჯიბეში ჩაიყო, მაგრამ იქ ერთი კბილსაჩიქნიც  
აღარ დახვდა – ყველა იატაკზე ეყარა. მართალია, ორ-სამს სისხლი

არ ეცხო, მაგრამ მათ ასაღებად ოდნავ უნდა წამოწეულიყო და წინ გადახრილიყო.

ბივერი საკუთარ თავს ცხარედ ეკამათებოდა. „მიწებებუღივით იჯექი“, – უბრძანა ჯოუნსიმ, თუმცა ეს საზიზღრობა, ალბათ, კარგა ხანია, სადღაც ჩაიძირა. „ვეშვებით, ვეშვებით, ვეშვებით“ – ასე ამბობდნენ წყალქვეშა გემების მეზღვაურები ძველებურ სამხედრო ფილმებში. ასეც რომ არ ყოფილიყო, მხოლოდ წამით მოაცილებდა საჯდომს უნიტაზის თავსახურს. თუ ის ქმნილება ამოხტომას დააპირებდა, მთელი სიძიმით მაშინვე ზედ დაებერტყებოდა და იქნებ მისთვის თხელი ქერცლიანი კისერიც მოეტეხა (იმ პირობით, თუ ასეთი რამ ჰქონდა).

ბივი ნაღვლიანად შესცქეროდა კბილსაჩიჩქნებს. ორი ცალი საკმაოდ ახლოს ეგდო, ხელის გაწვდენაზე, მაგრამ პირში სისხლიანი ღერების ჩადება, იმის გათვალისწინებით, თუ საიდან გაჩნდა ეს სისხლი... თანაც ეს ბეწვიანი ობი, კაფელებს შორის ჩამდგარ სისხლს რომ მოსდებოდა... უკვე – კბილსაჩიჩქნებსაც. ოღონდ იმათ არა, რომლებსაც სისხლი არ მოეცხოთ. ისინი სუფთა და ქათქათა იყო. ცხოვრებაში ასე არ მონდომებია ხის ნამცეცის ლეჭვა და დანაწევრება.

– ჯანდაბას! – თქვა ბივმა, წინ გადაიზნიქა და ხელი გაიწვდინა. ცოტაც და, თითებით მისწვდებოდა უახლოეს სუფთა კბილსაჩიჩქნს. ფეხის კუნთები დაძაბა და საჯდომით უნიტაზიდან ჩამოსრიალდა. სწორედ იმ დროს, როდესაც კბილსაჩიჩქნს ხელი ჩაავლო, – აჰა, ხომ დაგიჭირე, – თავსახურს ქვემოდან რაღაც ისეთი ძალით შეეჯახა, რომ ბივერს დაუცველი კვერცხები კინალამ გაუჭყლიტა და წინ გადააგდო. ბივერი საშხაპის ფარდას მოეპოტინა და მთელი ძალა მოიკრიბა, რომ არ წაქცეულიყო, მაგრამ მოულოდნელად ფარდის რგოლები ღრჭიალით მოსძვრა ლავგარდანს, კაცს სისხლზე ფეხი დაუსხლტა და თვითმფრინავიდან კატაპულტით ამოვარდნილი ადამიან-

ნის სისწრაფით გაიშლართა იატაკზე. მის უკან უნიტაზის თავსახური ავარდა და ბივერს ზურგზე რაღაც სველი და მიძიმე დაეცა, რაც დაკუნთულ კუდად, მატლად თუ მახინჯი არსების საცეცად მოეჩვენა, ის მის ფეხებს შორის დაიგორგლა და ისედაც ნატკენ სათესლე პარკზე პითონივით ღონივრად მოუჭირა. სისხლიან კაფელზე გაწოლილმა ბივერმა (ნიკაპი დაჩეჩქოდა, თვალები ლამის ბუდიდან გამოსცვენოდა) თავი ასწია და საშინელი ხმით იყვირა. სველი და ცივი არსება, ბივის კეფიდან წელამდე, ცოცხლად დახვეული ნოხივით გაიჭიმა და ისე ახმაურდა, კაცს ჩიტების თავაწყვეტილი ყვიყვი ან მაიმუნის ჭყვივილი ეგონებოდა.

ბივერმა ისევ დაიყვირა და კარისკენ გახობდა, შემდეგ კი როგორღაც მუხლებზე დადგა, საზიზლარი ქმნილება რომ ჩამოეგდო. მის ფეხებს შორის ფოლადის თოკი კვლავ შეიკუმშა და იმ ადგილიდან, სადაც საზარდული საშინლად სტკიოდა, ჩუმი ტკაცუნის გაისმა.

ღმერთო ჩემო, – გაიფიქრა ბივმა, – ღმერთო დიდებულო, მგონი, ეს ჩემი კვერცხი იყო.

ოფლში გაწურულმა, ძალღივით ენაგადმოვარდნილმა ბივერმა ის ერთადერთი რამ გააკეთა, რაც თავში მოუვიდა: კვნესით ზურგზე გადაბრუნდა, რათა საზიზლარი ქმნილება კაფელზე მიესრისა. ის კი აჭყვივლდა და გააფთრებით ასხმარტალდა. ბივერმა ფეხებს შორის მოქცეულ კუდში ხელი წაავლო – ჯაგარივით იჩხვლიტებოდა, თუმცა გლუვი და უხმო იყო. და – სველი. წყალი? სისხლი? თუ ორივე?

– ა-ა-ა! ღმერთო, გამიშვი! გამიშვი შენი დედაც! .. ღმერთო! ჩემი კვერცხები! ღმერთოო!

მაგრამ სანამ კუდს კარგად მოიხელთებდა, კეფაში ერთი მუჭა ნემსი შეესო. ბივერი ღრიალით შეირხა. ქმნილება მოულოდნელად მოსცილდა. ბივერმა წამოდგომა სცადა, ხელებს დაეყრდნო, რადგან ფეხებში ძალა გამოლეოდა, ხელისგულები არა მარტო სისხლში უსხლტოდა, – გატეხილი უნიტაზიდან წყალი გადმოდიოდა და იქაურობა საციგურაო მოედანს ჰგავდა.



როგორც იქნა, წამოდგა და კარზე მიკრული სინდიოფალას მსგავსი არსება დაინახა. უფეხო, მსხვილი, მოწითალო ოქროსფერი კუდით. თავის ნაცვლად ლორწოვანი უფორმო გუნდა ება, საიდანაც ღვარძლით სავსე შავ თვალებს აკვესებდა. ორად გაყოფილი ქვედა ნახევრიდან ჩაწიკწიკებული კბილები მოუჩანდა. მოულოდნელად ქმნილება ბივერს გველივით ეძგერა: გუნდა წინ გავარდა, უთმო კუდი კი კარის სახელურზე დაეხვია.

ბივერმა შეჰყვირა და უკან დაიხია, თვალებთან ხელი მიიტანა, ზედ უკვე სამი თითი აკლდა. მხოლოდ ცერი და ნეკი შერჩენოდა. უცნაურია, რომ ტკივილი ვერ იგრძნო, ალბათ, გაჭყლეტილი სათესლე პარკის ტკივილმა გადასძალა. ბივერმა ნაბიჯის უკან გადადგმა სცადა, მაგრამ ნაკუთალებით უნიტაზს მიეზჯინა. იქით გზა აღარ იყო.

ეს არსება იჯდა მასში? – მოასწრო გაფიქრება ბივერმა, – ეს იჯდა?

არსებამ კუდი, საცეცი თუ ის რაღაც გაშალა, რაც ჰქონდა და კვლავ ეცა ბივს. რუდიმენტული თავის ზედა ნახევარში შეშლილის თვალები ელავდა, ქვედა ნახევარი ნემსებს დაეფარა. სადღაც შორიდან, სხვა სამყაროდან, სადაც გონება ჯერაც ცოცხლობდა, ჯოუნსის ხმა ისმოდა. მაგრამ ჯოუნსიმ დააგვიანა. სამუდამოდ.

მაკარტიში მყოფი არსება წკლაპუნით დაეშვა ბივერის მკერდზე. მისგან მაკარტის გაზების სუნი, ზეთის, ეთერისა და მეთანის სიმყრალე მოდიოდა. დაკუნთული მათრახი ბივერს წელზე მოხვია, თავი წინ გაისროლა და მსხვერპლს კბილები ცხვირში ჩაავლო.

ბივერი იგრინებოდა, ქმნილებას მუშტებს უშენდა. ბოლოს უნიტაზზე დაეცა. როდესაც არსებამ გარეთ გამოაღწია, უნიტაზის დასაჯდომი და თავსახური შეხტა. დასაჯდომი თავის ადგილზე დაეშვა, თავსახური კი დარტყმისას გატყდა და აწეული დარჩა. ბივერი უკანალით უნიტაზში ჩავარდა. ქმნილება კვლავ ცხვირში ჩაჰფრენოდა.

– ბივერ! ბივ, რა...

ბივერმა იგრძნო, რომ ქმნილება გაშეშდა, ალგზნებული მამაკაცის ასოსავით გამაგრდა. წელზე შემოხვეული საცეცი ჯერ დაიჭიმა, მერე მოდუნდა. შავი თვალებისა და იდიოტური სახის მქონე არსებამ იქით გაიხედა, საიდანაც ჯოუნსის ხმა გაისმა. ბივმა ჩამქრალი, წითელი, ბისტგადაკრული თვალებით კარში მდგარ მეგობარს შეხედა: ჯოუნსის ყბა ჩამოვარდნოდა, უღონოდ ჩამოშვებულ ხელში საიზოლაციო ლენტი ეჭირა (ალარაფერში დაგჭირდება, – გაიფიქრა ბივმა, – ალარაფერში), სრულიად უმწეოდ, შეძრწუნებული იყურებოდა. საზიზლარი ქმნილების მორიგი სადილი.

– ჯოუნსი, გაიქეცი! – იყვირა ბივერმა, რომელსაც პირი სისხლით ევსებოდა. მან იგრძნო, რომ საზიზლარი არსება ნახტომისთვის ემზადებოდა, ამიტომ ორივე ხელი მოხვია და შეყვარებულივით მკერდზე მიიკრა, – გაიქეცი! კარი მიხურე! ცეცხლ...

უნდოდა ეთქვა, – სახლს ცეცხლი წაუკიდე, ორივენი ჩაგვკეტე, დაწვი ეს სისაძაგლე, ცოცხლად დაწვი, მე კი ამ წყეულ უნიტაზზე ვიჯდები, მის შეკავებას ვეცდები და თუ მისი დამწვარი სხეულის სუნს ვიგრძნობ, ბედნიერი მოვკვდებიო.

მაგრამ ქმნილება მთელი ძალით ცდილობდა თავის დახსნას, ჯოუნსი კი შტერივით იდგა კარში, ხელში ის სულელური საიზოლაციო ლენტი ეჭირა, პირი დაელო და, დალახვროს ეშმაკმა, საოცრად ჰგავდა დადიტსს. ასეთ გამოთავყვანებულს კაცი, აბა, რას შეაგნებინებდა.

ქმნილებამ კვლავ ბივისკენ მიატრიალა უყურო გუნდა თავი, რომელიც ოდნავ უკან გადაეხარა, და სანამ ისევ წინ გატყორცნიდა და სამყარო უკანასკნელად აფეთქდებოდა, ბივერს თავში გამოსამშვიდობებელმა, ბავშვურად გულუბრყვილო აზრმა გაუელვა: კბილსა-ჩიჩქნი, დასწყევლოს ღმერთმა, დედა ყოველთვის ამბობდა...

დახუჭული თვალების წინ წითელმა ცეცხლმა იელვა, შიგ შავი ყვავილები ყვაოდა და სადღაც შორიდან მისი ყვირილი გაისმა. სიკვდილისწინა. უკანასკნელი.

ჯოუნსიმ უნიტაზზე მჯდომი ბივერი დაინახა, რომელსაც მკერდზე რალაც შავ-წითელი, გიგანტური მატლის მსგავსი არსება მიჰკროდა. მეგობარს დაუძახა და ქმნილებამ მახინჯი, თავის მსგავსი ნაწილი მისკენ მოატრიალა. ღვარძლით სავსე, ზვიგენისებური თვალელები და ისეთი კბილები ჰქონდა, რომ მავთულის გაკვნიტაც კი არ გაუჭირდებოდა. შიგ რალაც გასჩროდა. ჯოუნსის უჭირდა იმის დაჯერება, რომ ბივერ კლარენდონის ცხვირის ნარჩენებს ხედავდა, მაგრამ, როგორც ჩანს, ასე იყო.

გაიქეცი! – უყვირა საკუთარ თავს, მაგრამ მაშინვე მეორე ხმა გაისმა, – გადაარჩინე! ბივერი გადაარჩინე!

ორივე ხმას ერთნაირი ძალა ჰქონდა, ამიტომ ჯოუნსი ზღურბლზევე გაქვავდა, გრძობდა, რომ ფეხები ტყვიასავით დამძიმებოდა. ბივერის მკლავებში მოქცეული ქმნილება უცნაურ ხმებს გამოსცემდა: გიჟურად ჭყიოდა, რაც ჯოუნსის ტვინს უბურღავდა და აიძულებდა, რალაც დიდი ხნის წინანდელზე ეფიქრა, მაგრამ რაზე?

უნიტაზში ჩაჭედილი ბივერი გულგამგმირავად უყვიროდა, – გაიქეცი და კარი მიკეტეო. ქმნილებამ ამ ხმაზე თავი მიაბრუნა, თითქოს მივიწყებული საქმე გაახსენდაო და ბივერს ამჯერად თვალში ეცა. ბივერი იკლავებოდა, საშინელ ხმებს გამოსცემდა, ცდილობდა, საზიზღარი არსება შეეჩერებინა, სანამ ის ჭყიოდა და სულ უფრო ღრმად ასობდა მსხვერპლს კბილებს, კუდის მაგვარ ნაწილს კი მაგრად უჭერდა წელზე და ცდილობდა, კომბინეზონიდან პერანგი ამოეჩარა და შიშველ სხეულზე მიჰკვროდა. ბივერი ფეხებს გაშმაგებით იქნევდა, ქუსლებით სისხლიან წყალს აშხეფებდა. კედელზე ჩრდილი გროტესკულ თოჯინასავით ცეკვავდა, საძაგელი ხავსი კი მთელ აბაზანას ედებოდა და საოცრად სწრაფად იზრდებოდა...

ჯოუნსიმ დაინახა, რომ ბივერი აგონიაშია; რომ ქმნილებამ მას თავი იმ დროს დაანება, როდესაც ბივი უნიტაზიდან აბაზანაში გა-

დავარდა და მაკარტის, იმ ბებერ შენს-კართან-ვდგავარ-და-ვაკაკუნებს ზედ დაეცა. ქმნილება იატაკზე დახტა და მისკენ გახონდა – ღმერთო ჩემო, რა სწრაფად! ჯოუნსიმ უკან დაიხია და კარის მიხურვა მოასწრო. ქმნილება მას ყრუდ შეასკდა – სწორედ ისე, როგორც უნიტაზის თავსახურს – მაგრამ ისე ძლიერად, რომ კარი შეზანზარდა. კარს ქვემოთ, სინათლის ზოლში მოჩანდა, როგორ შფოთავდა მისი ჩრდილი. კიდევ დარტყმა. ჯოუნსიმ დააპირა, სკამისთვის ეტაცა ხელი და სახელურში გაერჭო, მაგრამ მაშინვე მიხვდა, რომ ეს სისულელე და იდიოტიზმი იქნებოდა, რადგან კარი გარეთ კი არა, შიგნით იღებოდა. მთავარი იყო, საზიზლარი ქმნილება თუ მიხვდებოდა კარის სახელურის დანიშნულებას და თუ მისწვდებოდა მას.

თითქოს ჯოუნსის აზრები წაიკითხაო, – ვინ თქვა, რომ ეს შეუძლებელია? – ფაჩუნი გაისმა და სახელური გადატრიალდა. რაც უნდა ყოფილიყო ეს არსება, ძალა ნამდვილად არ აკლდა. ჯოუნსი მარცხენა ხელითაც ჩააფრინდა კარს, მაგრამ არსება ისე ღონივრად აწვებოდა სახელურს, რომ ჯოუნსი სასოწარკვეთამ შეიპყრო, პანიკაში ჩავარდნილს ეგონა, რომ ველარ გაუძლებდა და გაქცევაც კი დააპირა, მაგრამ ის სისაძაგლე ძალიან მოხერხებული ჩანდა, ამიტომაც გადაიფიქრა. ორი ნაბიჯის გადადგმასაც ვერ მოვასწრებ, რომ დამეწევა, – გაუელვა თავში, – პატარა ოთახი მაინც იყოს. მომვარდება, ფეხში ჩამაფრინდება და...

ჯოუნსიმ უკანასკნელი ძალა მოიკრიბა. ხელებზე ძარღვები დაეებრა, სახე დაეღრიჯა და კბილები დააკრაჭუნა. თედოში აუტანელი ტკივილი იგრძნო. ეს დაწყევლილი ფეხი სირბილის საშუალებას არ მისცემდა, – ამისთვის მადლობა მოხუც პროფესორს, იმ ბებერ დარტყმულს, რომელიც, წესით, საჭესთან ახლოსაც კი არ უნდა მიემვათ, – და თუ კარის შეკავებასაც ვერ შეძლებდა, მაშინ რაღა ეშველებოდა?

რა თქმა უნდა, ბივერის ბედს გაიზიარებდა. მისი ცხვირი იმ ქმნილებას ახლაც ქაბაბივით ჰქონდა პირში გაჩრილი.

ჯოუნსი კვენსით დააწვა სახელურს. იქითა მხრიდან წინააღმდეგობამ იმატა, მერე კი მოულოდნელად შესუსტდა და გაავეებული ყეფა გაისმა. ზიზლით შეისუნთქა ეთერისა და მეთანის მყრალი ნაზავი.

ნეტავ, როგორ აწვება კარს ის საზიზღრობა? მას ხომ ფეხებიც კი არ აქვს – მხოლოდ მოწითალო-ოქროსფერი კუდი, ასე რომ...

უეცრად თავზარი დაეცა – თავზემთ ხის ქრიალი მოესმა. მიხვდა, რომ ქმნილებამ საქმეში კბილები ჩართო. გაუცნობიერებელმა შიშმა შეიპყრო. ეს საზიზღრობა, როგორღაც, მაკარტის მუცელში მოხვდა, იქ გაიზარდა და გიგანტურ, საშინელ სოლიტერად, კბილებიან კიბოდ იქცა. ბოლოს, ველარ დაეცია, კაცს შიგნეულობა გამოსჭამა და გარეთ გამოვიდა.

– ო-ო, არა, ღმერთო! – სლუკუნით წარმოთქვა თვალეზზე ცრემლმომდგარმა ჯოუნსიმ.

სააბაზანოს კარის სახელური ახლა საწინააღმდეგო მხარეს გადატრიალდა. ჯოუნსიმ ნათლად წარმოიდგინა, როგორ მიჰკვროდა კარს ის საზიზღრობა, კუდით თუ საცეცით, ფიჭვის ხის ფიცრებს კბილებით როგორ ჩაჰფრენოდა, ექაჩებოდა და ამტვრევდა...

– არა, არა, არა, – იმეორებდა ღონემიხდილი ჯოუნსი. ძალა ელეოდა, ოფლიანი ხელები სახელურზე უსრიალებდა, სახე მსხვილი წვეთებით დაჰფაროდა, დაძაბულობისგან გადმოკარკლული თვალეზით შესცქეროდა უკანასკნელ დამცავ ზღუდეს. რამდენიმე დუიმიტ ზემოთ კი კბილები შეუჩერებლივ მუშაობდა. მალე ნაფოტები ჩამოცვივდებოდა (თუ იქამდე კარს ხელს არ გაუშვებდა) და ხვრელში გამორჩნდებოდა საზიზღარი ქმნილების ხახა, რომელმაც ბივერის ცხვირი შთანთქა.

ახლადა გააცნობიერა, რომ ბივერი, მისი ძველი მეგობარი, ცოცხალი აღარ იყო.

– ის შენ მოკალი! – უყვირა გამწარებულმა ჯოუნსიმ კარის მეორე მხარეს მყოფ ქმნილებას, – ბივი მოკალი!

გახურებულ ლოყებზე ახლა, ოფლის ნაცვლად, ცრემლები სდიოდა. ბივერი თავისი შავი ტყავის ქურთუკით ("რამდენი ელვაა!" – შესძახა დადიტის დედამ მათი გაცნობის დღეს), ბივერი, უფროსკლასელთა გამოსაშვებ სალამოზე რომ გამოტყვრა და კაზაკივით ცეკვავდა: ხელები მკერდზე დაეწყო და ბუქნისას ფეხებს წინ ისროდა, ბივერი ჯოუნსისა და კლარას ქორწილში, სიძისთვის მხარზე ხელი რომ გადაეხვია და ყურში გაშმაგებით ჩასჩურჩულებდა: „ბედნიერი უნდა იყო, მეგობარო, ყველა ჩვენგანზე ბედნიერი!“ მაშინ პირველად იგრძნო, რომ ბივერი უბედური იყო. ჰენრისა და პიტთან დაკავშირებით შეკითხვები არ უჩნდებოდა, მათი ისედაც ესმოდა, მაგრამ ბივი? ახლა ბივი მკვდარია, სანახევროდ აბაზანაზე გადაწოლილა და მისტერ რიჩარდ შენს-კართან-ვდგავარ-და-ვაკაკუნებ მაკარტის მკერდზე განისვენებს.

– შენ ის მოკალი, შენი დედაც! .. – დაუღრიალა მან კარის ღრიჭობებში გამობერილ ბუშტუკებს, რომელთა რაოდენობაც სულ უფრო იზრდებოდა... ხუთი, ექვსი... ცხრა... თორმეტი!

საზიზღარმა ქმნილებამ – თითქოს ჯოუნსის გააფთრებამ გააოცაო – ზეწოლა შეასუსტა. ჯოუნსიმ გაგიჟებული სახით მიიხედმოიხედა რაიმე იარაღის პოვნის იმედით და თვალი მოჰკრა ძირს დაგდებულ საიზოლაციო ლენტს. შეეძლო, ასაღებად დახრილიყო, მაგრამ მერე რაღა ექნა? მის მოსაგლეჯად ორივე ხელი დასჭირდებოდა, მოწინააღმდეგეს რომც ეცლია, კარს თვითონ ძლივს აკავებდა და ლენტი, აბა, როგორ დაიჭერდა?

სახელური ისევ გადატრიალდა. თანდათან ღონე ელეოდა, ადრენალინი აღარ ჰყოფნიდა, ხელები უსხლტოდა, ეთერის სუნი სულ უფრო მძაფრი, მაგრამ სუფთა, ერთგვაროვანი ხდებოდა, რადგან მაკარტის გაზები და ექსკრემენტები მასში აღარ ერეოდა. ცოტაც და, ვეღარ გაუძლებდა, თუ...

ნახევარი წამით ადრე, სანამ კარში ორივე მხრიდან ჩასმული სახელურების შემაერთებელი ღერძი ტკაცუნით გატყდებოდა, ოთახში

მოულოდნელად ჩამოხენლდა. სულ ოდნავ. თითქოს უკნიდან ვილაც მიეპარა და მასსა და ნათურას შორის ჩადგა...

ღერძი გატყდა. სახელური, რომელსაც ჯოუნსი ჩაჰფრენოდა, მოძვრა და, გველისებური საზიზღარი ქმნილების ზეწოლით, კარი მაშინვე გაიღო. ჯოუნსიმ შეჰყვირა და სახელურს ხელი უშვა. ლენტის ხვეულაზე დაეცა და გადავარდა.

ჯოუნსი შეტრიალდა და გაქცევა დააპირა. მის წინ ნაცრისფერი კაცი იდგა.

ეს ვილაც... თუ რაღაც... მისთვის უცნობი იყო, მაგრამ ეცნო კიდევ. ჯოუნსის იგი ზებუნებრივ მოვლენებთან დაკავშირებულ უამრავ სატელევიზიო შოუში ენახა, ასევე, ათასობით ტაბლოიდის პირველ გვერდზე (სერიული საშინელი კომიქსებით რომ გბომბავენ, სანამ სუპერმარკეტის სალაროს რიგში ხარ გატყედილი), ფილმებში, როგორცაა „უცხოპლანეტელი“, „ახლო კონტაქტი“ და „ცეცხლოვანი ცა“; მისტერ გრეი „საიდუმლო მასალებშიც“ ხშირად ფიგურირებდა.

ყველა ფილმში ზუსტად იყო დაჭერილი მისი თვალების გამომეტყველება. ყოველ შემთხვევაში, ეს დიდი შავი თვალები იმ საზიზღარი არსების თვალებს ჰგავდა, მაკარტის უკანალი რომ გამოაჭამა და გარეთ გამოაღწია, პირიც ისეთივე ჰქონდა, – რუდიმენტული ნაპრალი და მეტი არაფერი, – ოღონდ ნაცრისფერი კანი ნაკეცებად ეკიდა მომაკვდავ ბებერ სპილოსავით. ნაოჭებიდან მოყვითალო-მოთეთრო ჩირქოვანი სითხე სდიოდა, ასევე – უსიცოცხლო თვალების კუთხეებიდან. სიზმართმჭერის ფეხებთან, ნავაჰოს ხალიჩაზე პატარ-პატარა გუბეები და შენადედეები მოჩანდა, წვეთები ბილიკივით მიიკვლევდა გზას სამზარეულოს კარისკენ, საიდანაც თვითონ შემოვიდა. რამდენი ხანი იყო აქ მისტერ გრეი? ნუთუ ფარდულთანაც იდგა და აკვირდებოდა, როგორ გარბოდა ჯოუნსი სამზარეულოსკენ ხელში უსარგებლო საიზოლაციო ლენტით?

მან ეს არ იცოდა. მხოლოდ იმას ხედავდა, რომ მისტერ გრეი კვდებოდა. მის გვერდით უნდა გაერბინა, რადგან სააბაზანოში ის

საზიზლარი ქმნილება იატაკზე ყრუდ დაეცა. ახლა მასთანაც მივიდოდა.

– მარსი, – წარმოთქვა მისტერ გრეიმ მკაფიოდ და გარკვევით, თუმცა ტურების მსგავსი ორგანო არც კი შეურხევია. ჯოუნსიმ ეს ტვინის ცენტრით შეისმინა, სწორედ იმ ადგილით, სადაც დადიტსის ტირილი ჩაესმოდა ხოლმე.

– რა გინდა?

ქმნილება მის ფეხებთან მიხობდა, თუმცა ჯოუნსიმ იგი ძლივს შეამჩნია. ძლივს შეამჩნია, როგორ დაიკრუნჩხა ნაცრისფერი ადამიანის შიშველ, უთითებო ფეხებთან.

– გაჩერდი, თუ შეიძლება – თქვა მისტერ გრეიმ ჯოუნსის ტვინის რომელიღაც კუნჭულში. ეს ტკაცუნია, არა, უფრო მეტი, ხაზი იყო. ზოგჯერ შენ ხედავ ამ ხაზს, ზოგჯერ გესმის, როგორც მაშინ გაიგონა დეფანიაკის მოსანანიებელი აზრები: ამას ვერ გავუძლებ, ნემსი გამიკეთეთ, სად არის მარსი?

იმ დღეს სიკვდილი მეძებდა, – გაიფიქრა ჯოუნსიმ, – ქუჩაში ვერ მომიხელთა, ვერც საავადმყოფოში, – იქნებ პალატა აერია, – და მას შემდეგ ჩემზე ნადირობდა. საბოლოოდ, მაინც მომაგნო.

ამ ღროს ქმნილებას თავი გაუსკდა და იქიდან ეთეროვანი ნაწილაკების მოწითალო ნარინჯისფერი ღრუბელი წამოვიდა.

ჯოუნსიმ ის შეისუნთქა.



# თავი მერვე რობერტა

## 1

დადიტსის დედა, ორმოცდათვრამეტი წლის ჭალარა ქვრივი (მაგრამ უწინდებურად ქალჩიტა მუდამ ყვავილებიანი კაბით, ამგვარი რამ არ იცვლება ხოლმე), ვესტდერიეიკრისის ქუჩაზე მდებარე სახლში, პირველ სართულზე, სადაც ახლა იგი შვილთან ერთად ცხოვრობდა, – ტელევიზორს უყურებდა. სახლი, რომელიც მეიპლეინზე ჰქონდათ, მან ელფის სიკვდილის შემდეგ გაყიდა. შეეძლო, ასე არც მოქცეულიყო, რადგან ქმარმა ბევრი ფული დაუტოვა. კომპანიამაც, სადაც ელფიმ საკუთარი სიცოცხლე დააზღვია, გვარიანი თანხა გადაუხადა, ავტომობილების სათადარიგო ნაწილების იმპორტზე მომუშავე, მის მიერ 1975 წელს დაარსებული ფირმის აქციები კი უჭირველი ცხოვრების შესაძლებლობას აძლევდა. მაგრამ სახლი ძალიან დიდი იყო; მის ყოველ კუთხე-კუნჭულში, და არა მარტო სასტუმრო ოთახში, სადაც ის და დადიტსი თითქმის მთელ დროს ატარებდნენ, უამრავი მოგონება იმალებოდა. ზემოთ ცოლ-ქმრის საძინებელი

ოთახი იყო. იქ საუბრობდნენ, სიყვარულის მორევში იძირებოდნენ, გეგმებს აწყობდნენ. ქვემოთ სათამაშო ოთახი მდებარეობდა, სადაც დადიტსი და მისი მეგობრები დილიდან საღამომდე ერთობოდნენ. რობერტას აზრით, მეგობრები ღვთის მიერ მოვლენილი ანგელოზები იყვნენ, ეგაა, რომ ბილწსიტყვაობა უყვარდათ, და როდესაც დადიტსი, მათი წაბაძვით „მოგიყანს“ ამბობდა, თავხედურად უმტკიცებდნენ, თქვენი შვილი პიტის ახალი ლეკვის, მოჰიკან ელმერის, სახელის შემოკლებით გამოთქმას ცდილობსო. რობერტა ისეთ სახეს იღებდა, თითქოს სჯეროდა და ვერ ხვდებოდა, რომ სიტყვაში ასო „ტ“ იყო გამოტოვებული.

დიახ, ძალზე ბევრი მოგონება, ბედნიერად გატარებული წუთების მრავალი აჩრდილი უკავშირდებოდა იმ სახლს. შემდეგ კი დადიტსი ავად გახდა. ეს უკვე ორი წლის განმავლობაში გრძელდებოდა და ძველმა მეგობრებმა ამის შესახებ არაფერი იცოდნენ, რადგან ისინი მას მერე აღარ გამოჩენილან. ქალს კი გამბედაობა არ ჰყოფნიდა, ყურმილი აეღო და ბივერისთვის დაერეკა, რომელიც ყველას მოუყრიდა თავს.

ახლა იგი ტელევიზორთან იჯდა და ახალი ამბების მორიგ გამოშვებას უყურებდა. შეძრწუნებული და თავზარდაცემული, მონუსხულივით უსმენდა იმას, რაც, დიქტორის სიტყვებით, შტატის ჩრდილოეთ ნაწილში ხდებოდა. საშინელება ის იყო, რომ დეტალები და სიმართლე ზუსტად არავინ იცოდა. მენის ტყეებში, დერიდან ას ორმოცდაათი კილომეტრის დაშორებით, მონადირეების იღუმალი გაუჩინარების შესახებ იტყობინებოდნენ. თორმეტი კაცი კვლავაც დაკარგულად ითვლებოდა, რაც უტყუარ ცნობად მიიჩნეოდა. რობერტა თითქმის დარწმუნებული იყო, რომ რეპორტიორები ჯეფერსონტრექტს გულისხმობდნენ, სადაც, ჩვეულებრივ, მისი შვილის მეგობრები ნადირობდნენ ხოლმე, იქიდან დაბრუნების შემდეგ კი დადიტსს სისხლიან ამბებს უყვებოდნენ, რაც მასში ინტერესს, და, იმავდროულად, შიშსაც აღძრავდა.

იქნებ, მონადირეებს ტყეში ქარიშხალმა „ალბერტ კლიპერმა“ მოუსწრო, იქაურობას გადაუარა და ექვსი თუ რვა დუიმის სიმაღლის თოვლის საფარი დატოვა? შესაძლებელია. დარწმუნებით ვერავინ ვერაფერს ამბობდა, მაგრამ კინეოში ჩასული ერთი ოთხეული, როგორც ჩანს, მართლაც უგზო-უკვლოდ გაქრა. მათ სურათებს წამდაუწუმ აჩვენებდნენ, სახელებს კი საზეიმო ხმით გადმოსცემდნენ: ოტისი, როუპერი, მაკარტი და შუ. ეს უკანასკნელი ქალი გახლდათ.

დაკარგულ მონადირეებს ესოდენ დიდ ყურადღებას არ დაუთმობდნენ და მათ გამო „საპნის ოპერებს“ არ შეწყვეტდნენ, რომ არა ერთი გარემოება. ხალხი ირწმუნებოდა, რომ ცაში უცნაური, ფერადი ნათება იხილა. ორი მილინოკეტელი მონადირე, რომელიც კინეოში ორი დღით ადრე იმყოფებოდა, ამტკიცებდა, რომ მაღალი ძაბვის ელექტროგადამცემი ხაზების თავზე სიგარის მსგავსი, უფროთ და უძრავი ობიექტი შენიშნა. იგი სადენების თავზე ოციოდე ფუტის სიმაღლეზე ეკიდა, ჩუმად ზუზუნებდა და ძვლების ვიბრაციას იწვევდა. და, როგორც ჩანს, კბილებისასაც. ორივენი ჩიოდნენ, რომ კბილები დაკარგეს და როდესაც ამის საჩვენებლად პირს ფართოდ აღებდნენ, რობერტას ეჩვენებოდა, რომ დარჩენილი კბილებიც მალე დასძვრებოდათ. მონადირეები ძველ „შევროლეში“ მსხდარან და როდესაც მიახლოება დაუპირებიათ, მანქანის ძრავა ჩამქრალა. ერთ-ერთ მათგანს ელემენტზე მომუშავე კვარცის მაჯის საათი ჰკეთებია, რომელიც ამ მოვლენიდან სამი საათის განმავლობაში უკულმა ტრიალებდა, მერე კი სამუდამოდ გაჩერებულა (მეორე, ძველმოდურ მექანიკურ საათს კი არაფერი მოსვლია). რეპორტიორის თქმით, ამ ორი მონადირის გარდა, ამოუცნობი მფრინავი ობიექტები ბოლო ორი კვირის განმავლობაში ბევრმა სტუმარმა თუ ადგილობრივმა ნახა: ზოგმა სიგარის, ზოგმაც ტრადიციული თეფშის ფორმისა. რეპორტიორმა დაამატა, რომ ამგვარ მასობრივ გამოჩენას სამხედროების ჟარგონზე „შეკრება“ ეწოდებოდა.

მაშ, ასე – დაკარგული მონადირეები, ამოუცნობი მფრინავი ობიექტები, გემრიელი, საინტერესო, დამაინტრიგებელი ახალი ამბები პირდაპირ ეთერში საღამოს ექვს საათზე (“თქვენი შტატისა და ქალაქის ცინცხალი ამბები!”). მაგრამ დღეს ამას სხვა ბევრი სიახლეც დაემატა. თანაც გაცილებით ცუდი. მართალია, ჯერჯერობით მხოლოდ ჭორები იყო. და რობერტაც ღმერთს შესთხოვდა, რომ ყველაფერი ჭორადვე დარჩენილიყო, თუმცა ავი წინათგრძნობა არ ასვენებდა და უკვე ორი საათი ტელევიზორს მისჩერებოდა, ძალიან ბევრ ყავას სვამდა და სულ უფრო ნერვიულობდა.

რეპორტაჟებიდან ყველაზე მეტად ის აშინებდა, რომ რალაც ობიექტი ტყეში ჩამოვარდა და იმ ადგილის სიახლოვეს დაეცა, სადაც მონადირეებმა მაღალი ძაბვის გადამცემების თავზე სიგარის მსგავსი ობიექტი დაინახეს. ასევე აშფოთებდა ცნობა, რომ ერუსტუკის რაიონის უმეტეს ნაწილში – ეს დაახლოებით ორასი კვადრატული მილის ფართობი იყო და ძირითადად, ქალაქის მწარმოებელ კომპანიებს თუ სახელმწიფოს ეკუთვნოდა – კარანტინი გამოეცხადებინათ.

მაღალმა, ფერმკრთალმა მამაკაცმა ღრმად ჩამჯდარი თვალებით (მის უკან მოჩანდა აბრა, წარწერით „მანიაკების თავშესაფარი“) ეროვნული გვარდიის ბანგორის ბაზაზე მისულ რეპორტიორებთან ხანმოკლე საუბრის შემდეგ განაცხადა, რომ გავრცელებული ჭორები სიმართლეს არ შეესაბამებოდა, თუმცაღა ამჟამად „ზოგიერთ ურთიერთგამომრიცხავ განცხადებას“ ამოწმებდნენ. მკერდზე ჩამოკიდებული წარწერის მიხედვით, ეს კაცი აბრაჰამ კურცი იყო. რობერტამ ვერაფრით დაადგინა ვერც მისი რანგი და ვერც ის, სამხედროებს წარმოადგენდა თუ სამოქალაქოებს. უბრალო მწვანე, ელვაშესაკრავიანი კომბინეზონი ეცვა და მეტი არაფერი, რის გამოც უნდა გეფიქრათ, რომ, შესაძლოა, სციოდა კიდევ, მაგრამ არ იმჩნევდა. რობერტას მისი დიდრონი, თეთრწამწამებიანი თვალები რატომღაც არ მოეწონა – მოეჩვენა, რომ ცრუობდა.

- შეგიძლიათ, დაგვიდასტუროთ, რომ ჩამოვარდნილი თვით-მფრინავი უცხოური ან არამიწიერი წარმოშობის არ არის? - იკითხა ახალგაზრდა შესახედაობის რეპორტიორმა.

- „სატელეფონო ზარი უცხო პლანეტიდან“<sup>64</sup>, - მიუგო კურცმა და გაიცინა. მას ზოგიერთი რეპორტიორიც აჰყვა. ვესტდერიეიკრისზე ტელევიზორთან მიმჯდარი რობერტას გარდა ვერავინ მიხვდა, რომ კურცმა შეკითხვას არ უპასუხა.

- შეგიძლიათ, დაადასტუროთ, რომ ჯეფერსონტრექტის რაიონში კარანტინი არ მოქმედებს? - დაინტერესდა მეორე რეპორტიორი.

- ამჟამად ამას ვერც დავადასტურებ, ვერც უარვყოფ, - მიუგო კურცმა, - საქმეს სრული სერიოზულობით ვეკიდებით. თქვენი მთავრობის დოლარები შეუფერხებლად იხარჯება, ქალბატონებო და ბატონებო, - იგი მოთუხთუხე ვერტიმფრენისკენ გაეშურა, რომელზეც თეთრი ასოებით ეგა ეწერა.

ეკრანზე გაკეთებული წარწერის მიხედვით, სიუჟეტი ცხრა საათ-სა და ორმოცდახუთ წუთზე ჩაიწერა. მომდევნო რეპორტაჟი - მონტუნავე გამოსახულება მოწმობდა, რომ იგი ხელის ვიდეოკამერით იყო გადაღებული - „სესნადან“<sup>65</sup> გაუშვეს, თვითმფრინავი მეცხრე არხს ჯეფერსონტრექტის თავზე საფრენად დაექირავებინა. ხილვადობას კარგი არ ეთქმოდა, მაგრამ თოვანშიც კი ჩანდა ორი ვერტიმფრენი, რომელიც გიგანტურ ყავისფერ ნემსიყლაპიასავით ამოსდგომოდა აქეთ-იქიდან „სესნას“. ისინი ერთმანეთს რადიოგადამცემებით ესაუბრებოდნენ, მაგრამ ხმა ცუდად ისმოდა და რობერტა იძულებული იყო, მათი დიალოგი ეკრანის ქვედა ნაწილში, ყვითელ ზოლში ამოეკითხა: „რაიონი იზოლირებულია. ბრძანების თანახმად, უკან, აეროდრომზე უნდა დაბრუნდეთ. ვიმეორებ, რაიონი იზოლირებულია. დაბრუნდით“.

იზოლირებული კარანტინს გულისხმობდა? რობერტა ქვევლის

<sup>64</sup> პანკროკჯგუფ „კლეშის“ სიმღერა.

<sup>65</sup> ამერიკული თვითმფრინავის მოდელი.

აზრით, ეს სიმართლესთან ახლოს იყო, თუმცა კურცის მსგავს ტიპს პასუხისთვის თავის არიდება არ გაუჭირდებოდა. ვერტიმფრენებზე მკაფიოდ მოჩანდა წარწერა ეგა. სავარაუდოდ, აბრაჰამ კურცი სწორედ ერთ-ერთი მათგანით ჩაფრინდა დანიშნულების ადგილზე.

„სესნას“ მფრინავი: „ვინ ხელმძღვანელობს ოპერაციას?“

რადიო: „მობრუნდით, „სესნა“, თორემ ამის გაკეთებას გაიძულებენ“.

„სესნა“ დამორჩილდა და მოტრიალდა. როგორც წამყვანმა აღნიშნა, საწვავი ისედაც უთავდებოდათ, თითქოს ამით ყველაფერი აიხსნებოდა. იმ წუთიდან მოყოლებული წამყვანი მხოლოდ ძველ შეტყობინებებს იმეორებდა და ჯიუტად უკანასკნელ ცნობებად ასაღებდა. მსხვილმა ტელეკომპანიებმა შემთხვევის ადგილისკენ, როგორც ჩანს, საკუთარი კორესპონდენტები მიაგვლინეს.

ქალი ტელევიზორის გამორთვას აპირებდა, – ერთისა და იმავეს ყურება ნერვებს უშლიდა, – როდესაც დადიტის ყვირილი შემოესმა. რობერტას წამით გული გაუჩერდა. შემოტრიალდა, სიჩქარეში იმ მაგიდას დაეჯახა, ოდესღაც ელფის, ახლა კი მას რომ ეკუთვნოდა, და ყავის ჭიქა წააქცია. ყავისფერი სითხე „თV-გიდს“ გადაესხა და „სოპრანოს კლანის“ თავზე პატარა გუბე დააყენა.

ყვირილს გულის გამგმირავი ისტერიული ქვითინი, ნაწყენი ბავშვის ტირილი მოჰყვა. დადიტს ასე ემართებოდა ხოლმე – ახლა ოცდაათის იყო, მაგრამ მაინც ბალლად მოკვდებოდა, თანაც ორმოც წლამდე გაცილებით ადრე.

წამით რობერტას კინალამ ფეხები მოეკვეთა. ბოლოს თავს ძალა დაატანა და შვილის საძინებლისკენ გაემართა. ერთი კი ინატრა: ნეტავ, ჩემ გვერდით ელფი იყოს... ან კიდევ უკეთესი, რომელიმე ბიჭი მაინც. თუმცა, კარგა ხანია, ბიჭები აღარ იყვნენ, არც ერთი, დადიტის გარდა. დაუნის სინდრომმა იგი პიტერ პენად (ჯეიმს ბარის წიგნების პერსონაჟი – ბიჭი, რომელსაც არ უნდა, რომ გაიზარდოს და მარადიული ბავშვობის ქვეყანაში, სადღაც-არსაითში ცხოვრობს.)

აქცია და მალე სამუდამოდ წავიდოდა იმქვეყნად, შორეულ კუნძულ სადღაც-არსაითში.

– მოვდივარ, დადი! – გასძახა რობერტამ შვილს და წავიდა კიდევ, მაგრამ სადღა ჰქონდა უწინდებური სიმკვირცხლე! გული შეშინებული კურდღელივით უცემდა, ართრიტს გაეწამებინა. პიტერ პენის კუნძული მისთვის მიუწვდომელი იყო.

– მოდის, დედიკო, მოდის!

კვლავ გულგატეხილი ადამიანის გაუთავებელი სლუკუნი. პირველად მაშინ დაიყვირა, როდესაც კბილების გამოხვნვის შემდეგ აღმოაჩინა, რომ ღრძილებიდან სისხლი მოსდის. მაგრამ არასდროს გაჰკიოდა. მრავალი წელი გავიდა იმ დღიდან, როდესაც მწარედ, შესაბრალისად იტირა. გაშმაგებული, განუწყვეტელი ქვითინი სულსა და ტვინს აფორიაქებდა. მოთქმით ტირილი და სლუკუნი, მოთქმით ტირილი და სლუკუნი, მოთქმით ტირილი და სლუკუნი...

– დადი, რა მოხდა?

რობერტა ოთახში შევარდა და ბიჭს გაფართოებული თვალებით შეაცქერდა. იმდენად იყო დარწმუნებული, შვილს სისხლდენა დაეწყო, ზეწარზე სისხლის გუბეც კი მოელანდა, მაგრამ მალევე დარწმუნდა, რომ ეს წარმოსახვა იყო. თვალცრემლიანი დადიტსი საავადმყოფოს მოყანყალეზულ, მოჭრიჭინე საწოლზე ქანაობდა. თვალები ძველებურად მწვანედ უხასხასებდა, ოღონდ ლოყებიდან სიწითლე გადასვლოდა. აღარც შესანიშნავი ქერა თმა ჰქონდა, ახალგაზრდა არტ გარფუნკელს<sup>66</sup> რომ ამსგავსებდა. ფანჯრებიდან შემოსული ზამთრის დასუსტებული მზის სხივები სააფთიაქო ფლაკონებზე (ანტიბიოტიკებსა და ტკივილგამაყუჩებლებს შორის ერთიც არ იყო ისეთი, მის დაავადებას რომ შეაჩერებდა) ირეკლებოდა, მოშიშვლებულ თავის ქალაზე თამაშობდა და მაგიდის წინ მდგარ წვეთოვანსაც ეცემოდა.

რობერტამ უჩვეულო ვერაფერი დაინახა. ისეთი ვერაფერი, რაც

<sup>66</sup> ამერიკელი მომღერალი, პოეტი და მსახიობი.

აუტანელი ტკივილის გამო თითქმის გროტესკულ გამომეტყველებას გაამართლებდა.

შვილს გვერდით მიუჯდა და მისი აქეთ-იქით უმწეოდ მოყანყალე თავი მკერდზე მიიკრა. დადიტს, ალგზნებულობის მიუხედავად, გრილი კანი ჰქონდა; სიკვდილის გზაზე შემდგარი სისხლი სხეულს ველარ ათბობდა. რობერტას გაახსენდა, როგორ კითხულობდა დიდი ხნის წინ „დრაკულას“<sup>67</sup> და სასიამოვნო ძრწოლისგან კრთებოდა, ოღონდ ღამით, ჩრდილებით სავსე ოთახში, ეს ნაკლებად სიამოვნებდა. უხაროდა, რომ ნამდვილი ვამპირები სინამდვილეში არ არსებობდნენ. თუმცა მოგვიანებით, მრავალი წლის შემდეგ მიხვდა, რომ ნაადრევად დამშვიდებულიყო. მის ცხოვრებაში შეუბრალებელი ვამპირი გაჩნდა, რომელთანაც ტრანსილვანიელი გრაფი ახლოსაც ვერ მივიდოდა. მას ლევკემია ერქვა და არ არსებობდა სოლი მის გულში ჩასასობად.

– დადიტს, დადი, რა მოხდა, ჩემო კარგო?

შვილი დედას მკერდში ჩაეკრა და საკუთარი შიშის მოყოლას შეუდგა. გაგონილმა რობერტას წამსვე გადაავიწყა ჯეფერსონტრექტზე მომხდარი ამბავი, ტანში სიცივემ დაუარა და გულში ფოლადის მარწუხი ისე ჩაესო, კინალამ სუნთქვა შეუჩერდა.

– იერი ოვდა! იერი ოვდა! ოჰ, ეიკო, იერი ოვდა!

ზედმეტი შეკითხვის დასმას აზრი არ ჰქონდა, რობერტასთვის ყველაფერი ცხადი იყო – მთელი ცხოვრება შვილის გვერდით გაეტარებინა და მის ყოველ სიტყვას ხვდებოდა.

ბივერი მოკვდა! ბივერი მოკვდა! ოჰ, დედიკო, ბივერი მოკვდა!

---

<sup>67</sup> ირლანდიელ მწერალ ბრემ სტოკერის რომანი.



# თავი მეცხრე

## პიტი და ბეკი

### 1

პიტი თოვლით დაფარულ ნალარში იწვა და იქამდე გაჰყვიროდა, სანამ ხმა არ ჩაუწყდა, შემდეგ კი მოდუნდა, სცადა, რომ ტკივილს შესჩვეოდა, როგორმე გაეყუჩებინა. არაფერი გამოუვიდა. ეს უკომპრომისო, შეუბრალებელი ტკივილი იყო, ბლიცკრიგის აგონია. არც კი იცოდა, ასეთი ტკივილი თუ არსებობდა – რომ სცოდნოდა, ქალთან დარჩენას ამჯობინებდა. მარსისთან, თუმცა მას მარსი არ ერქვა. თითქმის გაახსენდა მისი სახელი, მაგრამ ამას რა მნიშვნელობა ჰქონდა? ახლა ხომ უჭირდა: ცხელი, საშინელი სპაზმები მუხლიდან ზემოთ აღიოდა და მთელ სხეულს მსჭვალავდა.

გზაზე იწვა და სიცივისგან კანკალებდა. გვერდით პოლიეთილენის ჩანთა ეგდო, წარწერით: „გმადლობთ, რომ ჩვენთან შეიძინეთ!“ პიტმა ხელი მისკენ გაიწვდინა, რათა ენახა, ერთი ბოთლი თუ მაინც გადარჩა, და როგორც კი მუხლი გაანძრია, ისეთი დარტყმა იგრძნო, თითქოს ღენმა დაუარა. წინა ტკივილი რა მოსატანი იყო. პიტმა

მან არ იცოდა, რამდენ ხანს ეგდო უგონოდ – ალბათ არც ისე დიდ ხანს, მაგრამ ფეხებიც გაეთოშა და ხელებიც, თუმცა თბილი ჩექმა და ხელთათმანი ეცვა.

პიტი სანახევროდ გვერდზე იწვა. გვერდით, ქარვისფერ ჭენჭყოში ლუდის პაკეტი ეგდო. მუხლის ტკივილი ოდნავ დაუცხრა – ალბათ, სიცვიემ უშველა – და მიხვდა, რომ აზროვნება შეეძლო. ამასაც არა უშავდა, რადგან სულელურ მდგომარეობაში აღმოჩნდა. როგორმე ქოხამდე და ცეცხლამდე უნდა მიეღწია და ამ საქმეში მხოლოდ საკუთარი თავის იმედი უნდა ჰქონოდა. თუ არ იმოქმედებდა და ჰენრისა და თოვლმავალს დაელოდებოდა, მათი გამოჩენის დროისთვის ყინულის დიდ ლოლოდ გადაიქცეოდა, იქვე კი ბოთლის ნამტვრევებით სახვე პაკეტი ეგდებოდა, წარწერით: „გმადლობთ, რომ ჩვენთან შეიძინე, ბატონო ალკოჰოლიკო, დიდი მადლობა!“ შორიანლოს ქალია, რომელიც შეიძლება მოკვდეს და ისიც იმიტომ, რომ პიტ მურს გადაყლურწვა მოუნდა.

მან ზიზლით შეხედა პაკეტს. უფრო შორს ვერ გადააგდებდა, მხოლოდ მუხლს თუ გაიმიზებებდა, ამიტომ პიტმა მას თოვლი წააყარა, როგორც ძალღი მალავს საკუთარ განავალს, და გახონდა. აღმოჩნდა, რომ მუხლი არც ისე ძლიერ დაჰბუჟებოდა. პიტმა იდაყვები აამუშავა, ძირითადად, ჯანმრთელ ფეხს ატანდა ძალას, კბილს კბილზე აჭერდა და თვალეში ჩამოფხატულ თმას სულს უბერავდა. ცხოველები აღარ ჩანდნენ. ჩაურბინეს და მარტო დატოვეს. საოცარი სიჩუმე იდგა, მხოლოდ საკუთარი ქოშინი ესმოდა და კვნესაც, მიწაზე მტკივანი მუხლის შეხების დროს. ზურგსა და მკლავებზე ოფლი წურწურით ჩამოსდიოდა, თუმცა ხელ-ფეხს თითქმის ვერ გრძნობდა.

ალბათ დანებდებოდა კიდევ, მაგრამ ცოტა ხანში, გზის ბოლოს მისი და ჰენრის მიერ დანთებული კოცონის კაშკაშა ლაქა დაინახა.

მართალია, ალი პატარა იყო, მაგრამ, რაც მთავარია, ჯერ კიდევ ენ-  
თო. პიტმა გზა განაგრძო, როგორც კი ფეხში არაადამიანურ ტკი-  
ვილს იგრძნობდა, ტურებს მაგრად კუმავდა და თოვლის უდაბნოში  
ნარინჯისფერ ნაპერწკალს მიაჩერდებოდა. რადაც უნდა დასჯდო-  
მოდა, იქამდე უნდა მიეღწია, თუნდაც ყოველი მოძრაობა გულში  
ხანჯალივით ჩასობოდა. ოჰ, როგორ უნდოდა ბოლომდე მისვლა!  
ოღონდ აქ, შუაგზაზე არ გაყინულიყო!

– მე შევძლებ ამას, ბეკი, – ბურტყუნებდა თავისთვის, – შევძლებ.

მან ეს სახელი რამდენჯერმე გაიმეორა, სანამ მიხვდებოდა, რას  
ამბობდა.

კოცონთან მიახლოებულმა საათს დახედა და მოიღუშა. თორმეტს  
ოცი აკლდა. ეს შეუძლებლად მოეჩვენა, რადგან, როდესაც სკაუტის-  
კენ გამობრუნდა, დრო დაინიშნა და პირველის ოცი წუთი იყო. კარ-  
გად რომ დაუკვირდა, ამ უცნაური მოვლენის მიზეზსაც ჩასწვდა. სა-  
ათი უკუღმა ტრიალებდა. წუთების მაჩვენებელი ისარი მკვეთრი,  
სპაზმური ბიძგებით მოძრაობდა. პიტს ეს დიდად არ გაჰკვირვებია.  
თუ აღრე ყველაფერი უჩვეულო მასში ცხოველ ინტერესს იწვევდა,  
ახლა ყურადღებას აღარაფერს აქცევდა. ფეხიც კი აღარ მიაჩნდა  
მთავარ პრობლემად. გაიყინა, ისე გაიყინა, რომ სხეული თითქმის  
აღარ ემორჩილებოდა. მან სიჩქარეს მოუმატა, შესამჩნევად დალ-  
ლილ ჯანმრთელ ფეხს უფრო ენერგიულად აწვებოდა და ვერც კი  
შეამჩნია, როგორ გაიარა ბოლო ორმოცდაათი იარდი და თითქმის  
მინავლულ კოცონს მიაღწია.

ქალი ბრეზენტზე აღარ დახვდა. როგორც ჩანს, ჩამოხობებულიყო  
და ახლა ცეცხლის მოპირდაპირე მხარეს იწვა, თითქოს დარჩენილ  
შეშამდე მისვლა სურდა, მაგრამ შუაგზაზე წაქცეულიყო.

– ეი, მოვედი, ჩემო კარგო, – ამოიხვნეშა მან, – მუხლთან დაკავ-  
შირებით პატარა უსიამოვნება შემემთხვა, მაგრამ მაინც დავბრუნ-  
დი. სხვათა შორის, ამ დაწყევლილი ფეხის ამბავი სულ შენი ბრალია,  
ბეკი, ასე რომ, არ იწუწუნო, კარგი? ბეკი – მგონი, ასე გქვია, არა?

შესაძლოა, ასეც იყო, მაგრამ ქალმა არაფერი უპასუხა. იწვა და იყურებოდა. პიტი, კვლავინდებურად, მის ცალ თვალს ხედავდა, თუმცა აღარ ახსოვდა, ეს ის თვალი იყო თუ მეორე. ახლა მისი გამოხედვისგან ჟრუანტელი აღარ უვლიდა, რადგან საფიქრალი სხვაც ბევრი ჰქონდა. თუნდაც ცეცხლი. პიტმა სწორედ რომ სულზე მოუსწრო – ნაკვერჩხალი ჯერ კიდევ ენთო. თავდაპირველად ეს ღორმუცელა უნდა გაეძლო, თანაც ისე, რომ დიდხანს არ ჩამქრალიყო, შემდეგ კი თავის ბეკის მიუწვებოდა (ოღონდ, ზურგით ქარისგან, რათა, ღმერთო, დაიფარე, კვამლს არ გაეგუდა) და ჰენრის დაელოდებოდა. იმედი ჰქონდა, რომ ჰენრის, პიტის სახით, ცეცხლში შებრაწული წაბლი არ დახვდებოდა.

პიტი ქალისკენ და იქვე დაყრილი შეშის პატარა გროვისკენ გახიზნდა და მალევე იგრძნო მძაფრი ქიმიური სიმყრალე. მიხვდა, რატომ აღარ აშფოთებდა უცნობის მზერა. ერთადერთი თვალი სადღაც შორს იყურებოდა. მაშასადამე, ყველაფერი დამთავრდა. ქალმა ცეცხლამდე მიღწევა სცადა და შუაგზაზე მოკვდა. მის წელსა და თეძობზე დაფენილი თოვლი მუქწითლად შეფერილიყო.

პიტი შეჩერდა, კვნესით წამოიწია და ქალს მიაჩერდა, მაგრამ ცოცხალს ხედავდა თუ მკვდარს, დიდად აღარ აინტერესებდა, ისევე, როგორც უკულმა მომუშავე საათი. იგი მხოლოდ ერთს ნატრობდა – როგორმე ცეცხლი დაენთო და გამთბარიყო. ქალზე ფიქრს მერეც მოასწრებდა. თუნდაც ერთი თვის შემდეგ, როდესაც სასტუმრო ოთახში თაბაშირიანი მუხლით იჯდებოდა და სურნელოვანი ყავის სმით დატკბებოდა.

როგორც იქნა, შეშას ხელი წაავლო. ოთხი ნაჭერიღა იყო, მობრდილი ნაჭრები. სანამ ისინი ბოლომდე ჩაიწვებოდა, ჰენრი აუცილებლად დაბრუნდებოდა, შეშის მარაგს დაუტოვებდა და დახმარების საძებნელად გაემშურებოდა. ჰენრი ყველაფერს შეძლებდა! მართალია, რბილი კონტაქტური ლინზებისა და ლაზერული ქირურგიის ეპოქაში რქოვან ჩარჩოში ჩასმულ სასაცილო სათვალეს ატარებდა,

მაგრამ პიტი მას თვალდახუჭული ენდობოდა.

შიგადაშიგ პიტი ფიქრებით სკაუტსა და ჰენრის ოდეკოლონს უბრუნდებოდა. „მოდით, არ გვინდა იქ წასვლა“, – ასე ამბობდნენ ხოლმე ბავშვობაში. მოგონებები თითქოს მტრად ექცა. არავითარი ოდეკოლონი, არავითარი სიბრაღული დადიტის მიმართ. არავითარი მოძრაობა და თამაში. მას ახლა სხვა საზრუნავი ჰქონდა.

ძლივს ამატებდა ცეცხლს შეშას და იმანჭებოდა ტკივილისგან, სამაგიეროდ, ტკბებოდა ზემოთ ატყორცნილი ნაპერწკლებით, რომლებიც გაქრობამდე გიჟურ ცეკვას ასრულებდნენ.

ჰენრი მალე მოვა. აი, რაზე უნდა იფიქროს. ცეცხლს უყუროს და ჰენრიზე იფიქროს. ის დაბრუნდება და...

არა, არ დაბრუნდება. იმიტომ, რომ „კედელში გაკეთებულ ხვრელში“ რაღაც ისე ვერ არის...

– რიკს უკავშირდება, – თქვა მან, თან აკვირდებოდა, როგორ ხარბად ნთქავდა ცეცხლი მორიგ ლუკმას. მალე ცეცხლის ენები უფრო დაგრძელდებოდა.

ხელთათმანები კბილებით გაიძრო და ხელები სითბოსკენ გაიწვდინა. მარჯვენა ხელისგულზე, სადაც შუშის ნატეხი შეესო, საკმაოდ გრძელი და ღრმა ჭრილობა ემჩნეოდა. ნაიარვეი დარჩებოდა. დიდი ამბავი. მეგობრობაში იარას ვინ უყურებს. არადა, ისინი მეგობრები იყვნენ. ბანდა ძველი კანზასსტრიტიდან. ალისფერი მეკობრეები პლასტიკის ხმლებითა და ელემენტებზე მომუშავე ბლასტერებით „ვარსკვლავური ომებიდან“. ერთხელ გამირობაც კი ჩაიღინეს, არა, ორჯერ – თუ პატარა გოგონა რინკენჰაუერსაც ჩათვლით. მაშინ მათი სურათები გაზეთებშიც დაბეჭდეს, ასე რომ, იარა აქ რა მოსატანი იყო! რა მოსატანი იყო ისიც, რომ ერთხელ, შესაძლოა, ჰო, შესაძლოა, ის ტიპი გაასაღეს... ასეც მოუხდებოდა. თუკი ვინმე სიკვდილს იმსახურებდა...

„არა, აქეთ წასვლა საჭირო არ არის. ასე არ გამოვა, პატარავ“.

მაგრამ იგი ხედავდა ხაზს. უნდოდა თუ არა, გაცილებით მკაფიოდ ხედავდა, ვიდრე გასული წლების განმავლობაში. ყველაზე ადრე მან ბივერი დაინახა. მისი ხმაც ჩაესმა. თითქოს შიგ ტვინში ურტყამდნენ.

ჯოუნსი! აქ ხარ?

– არ ადგე, ბივ, – გააფრთხილა პიტმა, თან ცეცხლის ალს თვალს არ ამორებდა. სითბო სახეზე ელამუნებოდა და ძილს ჰგვრიდა, – იქ დარჩი, სადაც ხარ. მხოლოდ... ხომ იცი, მიწებებულივით იჯექი.

ბოლოს და ბოლოს, რას ნიშნავს ეს ყველაფერი? „რა აბლი-ბაბ-ლია?“ – როგორც ბივერი ამბობდა ხოლმე ბავშვობაში, ეს უაზრო ფრაზა მათ მუდამ ალაფრთოვანებდა. პიტი გრძნობდა, რომ სურვილის შემთხვევაში, ყველაფერს შეიტყობდა – ხაზი ძალზე მკაფიოდ მოჩანდა. თვალწინ ცისფერი კაფელი წარმოუდგა, აგრეთვე საშხაპის გამჭვირვალე ცისფერი ფარდა, ხასხასა ნარინჯისფერი კეპი – რიკის, მაკარტის კეპი, ბებერი მისტერ შენს-კართან-ვდგავარ-და-ვა-კაკუნების კეპი. თუ მოინდომებდა, სხვა რამესაც დაინახავდა. პიტმა არ იცოდა, რაც ახლა ხდებოდა, მომავალი იყო თუ წარსული, მაგრამ ყველაფერს გაიგებდა, თუ მოისურვებდა, თუ...

– არ მინდა, – თქვა მან და აზრები უკუაგდო. შეშის რამდენიმე ნაჭერი და ფიჩხილა დარჩა. პიტმა ისინი ცეცხლში შეაგდო და ქალს მიაშტერდა. ღია თვალში ღვარძლი აღარ ჩანდა. მოკლული ირმის მსგავსად, ზედ მტვრის თხელი აპკი გადაჰკროდა. და ეს სისხლი მის ირგვლივ... ალბათ, სისხლისგან დაიცალა. რაღაც გაუსკდა შიგნით. საშინელი ძალით აუფეთქდა. შესაძლოა, იცოდა, ეს ყველაფერი რით დასრულდებოდა და ამიტომაც დაჯდა გზაზე. იმედოვნებდა, რომ ვინმე წააწყდებოდა. წააწყდნენ კიდევ, მაგრამ დახეთ, აქედან რა გამოვიდა. საბრალო ძუკნა. საბრალო უიღბლო ძუკნა.

პიტი ნელა გადაცოცდა მარცხნივ, ბრებენტს ხელი ჩაავლო და ქალისკენ გაათრია. თუ ეს უხეში ქსოვილის ნაჭერი ადრე ციგის მაგივრობას ასრულებდა, ახლა სუდარად გამოდგებოდა.

– ძალიან ვწუხვარ, – ჩაილაპარაკა მან, – ბეკი, თუ რა გქვია, მართლა ძალიან ვწუხვარ. მაგრამ შენთან რომც დავრჩენილიყავი, არაფერი შეიცვლებოდა. მე ხომ ექიმი არ ვარ, მხოლოდ და მხოლოდ მანქანების გამყიდველი გახლავარ. შენ...

თავიდანვე განწირული იყავი, – უნდოდა ეთქვა, მაგრამ ზურგიდან რომ შეხედა, სიტყვები ყელში გაეჩხირა. ადრე ვერაფერს ამჩნევდა, რადგან გვერდულად იწვა, პირით კოცონისკენ. საჯდომზე ჯინსიდან უზარმაზარი ხვრელი მოუჩანდა, თითქოს გაზების ნაცვლად იქ ნალმი აფეთქებულიყო. ქარი ჯინსისა და საცვლის – თეთრი ხაოიანი ტრიკოტაჟისა და ვარდისფერი აბრეშუმის ნაფლეთებს ერთად აფრიალებდა. ფეხებსა და ზურგზე რალაც ეზრდებოდა. ობის თუ სოკოს მსგავსი... მოწითალო ოქროსფერი... თუ ამის ილუზიას შუქი ქმნიდა?

ქალის სხეულში რალაც იყო და გარეთ გამოვიდა. რალაც...

ღიახ. რალაც. და ახლა ის მე მითვალთვალებს.

პიტმა ტყისკენ დაიწყო ყურება. არაფერი ჩანდა. ცხოველები თვალს მიეფარნენ. მარტო იყო.

თუ იმას არ გავითვალისწინებთ, რომ მარტო არა ვარ.

ღიახ, ეს სიმართლეს ჰგავდა. შორიახლოს რალაც იმალებოდა, რალაც, რაც სიცივეს ვერ იტანდა. რალაც, რაც თავს ყველაზე კარგად სითბოსა და სინოტივეში გრძნობდა.

ჰო, სითბოსა და სინოტივეში რჩება, სანამ ძალიან არ გაიზრდება და იქ ველარ დაეტევა, სადაც გაჩნდა. და სანამ საჭმელი გამოეღევა.

– აქ ხარ?

პიტს ეგონა, რომ ამგვარი შეძახილი მას სულელურ მდგომარეობაში ჩააყენებდა, მაგრამ ასე არ მოხდა. ვერაფერს გრძნობდა, დამთრგუნველი შიშის გარდა.

ჟეცრად შენიშნა, რომ ობი წვრილი ბილიკით მოიწევდა წინ ბეკის მხრიდან, – ღიახ, მას ბეკი, სწორედ რომ ბეკი ერქვა, – და თუნუქის კედელთან უხვევდა. წამის შემდეგ საშინელი ფხაჭუნი მოესმა,

თითქოს რაღაც ქერცლიანი სახურავზე მიხობავდა. პიტმა კისერი წაიგრძელა, რათა გაერჩია, ხმა საიდან მოდიოდა.

– აქედან წაეთრიე! – ჩაიჩურჩულა მან, – აქედან წაეთრიე და მარტო დამტოვე. მე... მე საშინლად დავიღალე.

პასუხად ისევ ფაჩუნი გაისმა, თითქოს ქმნილება ცოტათი უფრო მაღლა აცოცდა. დიან, პიტი დაქანცული იყო. საუბედუროდ, იმავედროულად, გემრიელი ლუკმაც გახლდათ. ქმნილება კვლავ შეირხა. პიტს სულაც არ ეგონა, რომ ის დიდხანს მოიცდიდა. პირიქით, მას, ალბათ, ლოდინი არ შეეძლო, მით უმეტეს დიდხანს ლოდინი; ეს იმას ჰგავდა, გეკონი<sup>68</sup> მაცივარში რომ შეგესვათ. საცაა ჩამოვარდებოდა და თავზე დაეცემოდა. პიტმა ახლალა გააცნობიერა საშინელი რამ: ისე აჩრემა ის ლუდი, რომ იარაღი გადაავიწყდა.

თავდაპირველად, იმპულსურად, ფარდულში ღრმად შეძრომა დააპირა, მაგრამ ეს შეცდომა იქნებოდა – იმ ჩიხიდან თავს ვეღარ დააღწევდა. მაშინ მან კოცონში ახალშეგდებულ ტოტს სტაცა ხელი, ტოტის მეორე ბოლო უკვე ბრიალებდა. ჯერ მაღლა არ სწევდა, მხოლოდ ეჭირა.

– აბა, მოდი! – შესძახა თუნუქის სახურავის მიმართულებით, – გიყვარს სიმხურვალე? შენთვის რაღაც ცხელი მაქვს. მოდი, გასინჯე. იფ-იფ!

მაგრამ სახურავიდან არაფერი ისმოდა. მხოლოდ უახლოესი ფიჭვიდან ჩამოვარდა თოვლი მსუბუქად – ქვედა ტოტები სიმძიმისგან თავისუფლდებოდა. პიტმა იმპროვიზებულ ჩირაღდანს ხელი ღონივრად ჩაავლო, ცეცხლიდან სანახევროდ გამოიღო და დაიყვირა:

– რაღას ელოდები, შე დამპალო, მოდი! ცხელი ვარ, გემრიელი, და გელოდები!

კვლავ სიჩუმე. მაგრამ ის იქ იყო, ზევით. და დიდხანს არ ალოდინებდა. მალე მოვიდოდა. ამაში პიტს ეჭვი არ ეპარებოდა.

---

<sup>68</sup> ხვლიკის მსგავსი ქვეწარმავალი.



გავიდა რალაც დრო, მაგრამ რამდენი – პიტმა დაზუსტებით არ იცოდა, რადგან საათი გაუჩერდა. თითქოს მასში რალაცების აღქმის ძლიერმა უნარმა გაიღვიძა, როგორც იმ წლებში, დადიტსთან რომ მეგობრობდნენ. თუმცა, ისინი იზრდებოდნენ, დადიტსი კი ისეთივე რჩებოდა და პიტის შეცვლილი სხეული და ტვინი დადიტსისგან უცნაური სიგნალების აღქმას ვეღარ ახერხებდა. ახლაც, სავარაუდოდ, იმავე, ოღონდ, ოდნავ განსხვავებულ მოვლენასთან ჰქონდა საქმე. შესაძლოა, რალაც ახალი გაჩნდა, რაც ცაში ნათებას უკავშირდებოდა. პიტმა იცოდა, რომ ბივერი მოკვდა, ჯოუნსის კი რალაც საშინელება შეემთხვა – ზუსტად ვერაფერს იტყოდა.

პიტის აზრით, ჰენრიმაც ყველაფერი იცოდა, თუმცა არა ბოლომდე. ჰენრი ღრმად იჯდა პიტის თავში და მისი ფიქრები ადვილად იკითხებოდა: ბენბერი-კროსი, ბენბერი-კროსი, მამლების კროსი ბენბერი-კროსში.

შეშის ნაჭერი იწვოდა და საცაა, პიტს ხელს დასწვავდა. როგორ მოქცეულიყო, თუ ჩაქრებოდა? ქმნილება, ალბათ, მოთმინებით ელოდებოდა, როდის დადგებოდა მისი დრო.

უეცრად თავში ახალი აზრი მოუვიდა, დღესავით ნათელი და შიშით გავარვარებული. აზრმა მისი გონება მოიცვა და პიტი მისთვის გაუგებარი ფრაზების ყვირილს მოჰყვა.

– შეგვიბრალეთ, თუ შეიძლება! Ne nous blames pas! <sup>69</sup> – მაგრამ მისი არ ესმოდათ და თავისას განაგრძობდნენ, რადგან... რა? – რადგან ისინი სულაც არ არიან პატარა უმწეო უცხოპლანეტელები, რომელთაც იმედი აქვთ, რომ ვიღაც მათ კომპანია „ნიუ-ინგლანდ-ტელის“ სატელეფონო რუკას აჩუქებს, რათა შინ დარეკვა შეძლონ, ისინი სასიკვდილო დაავადებაა. ისინი კიბოა, მადლობა უფალს, და ბიჭებო, ჩვენ, ყველანი, ქიმიოთერაპიის ერთი უზარმაზარი რადიოაქტიური ინიექცია ვართ. გესმით, ბიჭებო?

<sup>69</sup> არ მოგვკლათ (ფრ).

პიტმა არ იცოდა, ესმოდათ თუ არა მათ, ბიჭებს, რომლებსაც ეს ხმა მიმართავდა, მაგრამ თვითონ ესმოდა. ისინი მოდიოდნენ, ბიჭები, ალისფერი მეკობრეები მოდიოდნენ და ვერავითარი ხვეწნა-მუდარა ვერ შეაჩერებდათ. და მაინც, ისინი ეხვეწებოდნენ, და მათთან ერთად პიტიც ემუდარებოდა.

– შეგვიბრალეთ, თუ შეიძლება! შეგვიბრალეთ! S'il vous plait! Ne nous blesses pas! Ne nous blesses pas mal, ნოუს სომმეს სანს დეფენსე!  
– საცოდავი სლუკუნი, – თუ შეიძლება! ღვთის გულისათვის, ჩვენ უმწეონი ვართ!

პიტს თვალწინ ედგა გაწვდილი ხელი, ძალის განავალი, ატირებული, თითქმის შიშველი ბიჭი. და მთელი ამ დროის განმავლობაში სახურავზე მოკალათებული ქმნილება – მომაკვდავი, მაგრამ არა უღონო. უტვინო, მაგრამ არა სულელი. სანამ ის მკვდარი ქალის სი-ახლოვეს გვერდულად იწვა და აპოკალიფსური სასაკლავოს ხმებს ისმენდა, ქმნილება კლაკნით მოიწევდა და პიტს უკნიდან ეპარებოდა, „კიბო“, – თქვა თეთრწამწამებიანმა კაცმა.

– გთხოვთ! – შესძახა პიტმა, – შეგვიბრალეთ! ჩვენ უმწეონი ვართ!

– ტყუილ-მართალს მნიშვნელობა აღარ ჰქონდა, უკვე ძალზე დაგვიანებული იყო.

#### 4

თოვლმავალმა სიჩქარის დაუგდებლად ჩაუქროლა ჰენრის თავ-შესაფარს დასავლეთის მიმართულებით. მისი ხმა სულ უფრო სუსტად ისმოდა. ახლა უკვე უსაფრთხოდ შეიძლებოდა გამოსვლა, მაგრამ ჰენრი არ ინძრეოდა. არ შეეძლო. ჯოუნსიში ჩასახლებულმა მზვერავმა იგი ვერ აღმოაჩინა. შესაძლოა, ყურადღება გაეფანტა; შესაძლოა, ჯოუნსიმ მოახერხა... იქნებ მას ჯერაც შესწევდა უნარი...

არა. იმის გაფიქრებაც კი წარმოუდგენლად ეჩვენებოდა, რომ იმ საშინელი ღრუბლის შიგნით ჯოუნსის რაღაც ნაწილი იმყოფებოდა.

ახლა, როდესაც ის ქმნილება წავიდა, – ყოველ შემთხვევაში, გარკვეული მანძილით დაშორდა, – ჰენრის რალაც ხმებმა შემოუტია. ხმები დაუკითხავად მიძვრებოდა მის ტვინში, ლამის ჭკუაზე შეეშალა, ადრე დადიტსის ტირილი აგიჟებდა ხოლმე, სანამ სქესობრივმა სიმწიფემ ამას ბოლო არ მოუღო. ერთი ხმა იმ კაცს ეკუთვნოდა, რომელმაც რალაც თქვა სოკოს თუ ობის შესახებ...

(“სწრაფად იღუპება, თუ ცოცხალ ორგანიზმზე ვერ მოხვდა”).

და „ნიუ-ინგლანდ-ტელის“ სატელეფონო რუკაც ახსენა... და ქიმიოთერაპია? ღიახ, ქიმიოთერაპიის უზარმაზარი რადიოაქტიური ინიექცია. ჰენრიმ ის მთვარეულის ხმას მიაამგავსა. ღმერთმა ხომ იცოდა, რომ მრავალი ასეთი ადამიანისთვის უმკურნალია და ამაში კარგად ერკვეოდა.

დანარჩენმა ხმებმა საკუთარ ჭკუათამყოფლობაში დააეჭვა. ზოგიერთი ამოიცნო კიდევ: უოლტერ კრონკაიტი<sup>70</sup>, ბაგს ბანი<sup>71</sup>, ჯონ უენინი<sup>72</sup>, ჯიმი კარტერი<sup>73</sup>; ქალი, მისი აზრით, მარგარეტ ტეტჩერი<sup>74</sup> უნდა ყოფილიყო. ხმები ხან ინგლისურად გაისმოდა, ხანაც – ფრანგულად.

– Il n'y pas d'infection ici<sup>75</sup>, – ჩაილაპარაკა ჰენრიმ და ატირდა. გაოცდა და გამხნევდა, როდესაც აღმოაჩინა, რომ ცრემლები კვლავაც მისი გულიდან მოდიოდა, საიდანაც, მისი აზრით, სიცილი, გულწრფელი სიცილი და ყოველგვარი ცრემლი იღებდა სათავეს – შიშის, სიბრალულის ცრემლი, ცრემლი, რომელიც უსაზღვრო თავკერძობის ქვის კედელსა და კლდესაც კი გაანგრევდა და ააფეთქებდა, – აქ ინფექციის მსგავსიც კი არ არის, ოჰ, ღმერთო, შეაჩერე ეს, არ გინდათ, არ გინდათ, ნოუს სომმეს სანს დეფენსე<sup>76</sup>, NOUS SOMMES SANS...

<sup>70</sup> ამერიკელი ტელეჟურნალისტი და ტელეწამყვანი.

<sup>71</sup> მულტფილმების გმირი ეშმაკი ბაჭია.

<sup>72</sup> ამერიკელი კინომსახიობი, „ვესტერნის მეფე“.

<sup>73</sup> აშშ-ის ოცდამეცხრამეტე პრეზიდენტი (1977-1981)

<sup>74</sup> დიდი ბრიტანეთის პრემიერ-მინისტრი (1979-1990). „რკინის ლედი“.

<sup>75</sup> “აქ ინფექცია არ არის” (ფრ)

<sup>76</sup> “ჩვენ დაუცველები ვართ” (ფრ).

ამ დროს დასავლეთიდან ზვავევით დაატყდა ხმები და ჰენრიმ ხელელები თავში იტაცა – შეეშინდა, რომ ტკივილიან შეძახილებს შიგნიდან არ აეფეთებინა. ის არამზადები...

## 5

ის არამზადები მათ მოკვლას ცდილობდნენ.

პიტი კოცონთან იჯდა, საშინლად გასივებული მუხლის ტკივილს ყურადღებას არ აქცევდა და ვერც კი გრძობდა, რომ ცეცხლმოკიდებული ტოტი ლამის საფეთქელთან მიეტანა. მის თავში ატეხილი ყვირილი სრულად ვერ ახშობდა დასავლეთის მხრიდან აკაკანებული ტყვიამფრქვევების, მსხვილკალიბრიანი ტყვიამფრქვევების ხმას. უწინდელი შეძახილი – „გთხოვთ, შეგვიბრალეთ, უმწეონი ვართ, აქ ინფექციის კერა არ არის“ – პანიკაში გადაიზარდა; ეს არ შევლოდა, ველარაფერი უშველიდა, ყველაფერი გადაწყვეტილი იყო.

უეცრად, პიტმა თვალი რაღაცას მოჰკრა და სწორედ მაშინ გაიწია გვერდზე, როდესაც სახურავზე მოკალათებული არსება თავზე უნდა დახტომოდა. დაინახა უფნოს სინდიოფალასავით ვიწრო და მოქნილი არსების ბუნდოვანი სილუეტი, მძლავრი, დაკუნთული კუდით. ბასრი კბილები კოჭში ჩაასო. პიტმა შეჰყვირა და ფეხი ისე ძლიერად გამოსწია, მუხლი კინალამ ნიკაპში მიირტყა, მაგრამ საზიზღარი არსება ვერ მოიცილა – წურბელასავით ჩაჰფრენოდა. ნუთუ ეს სისაძაგლე მოუწოდებდა გულმოწყალებობისკენ? თუნდაც ასე იყოს, ჯანდაბას მაგათი თავი. ჩაძალდნენ, მაგათი დედაც! ..

მისკენ მარჯვენა ხელი გაიწვდინა, სწორედ ის, ლუდის ბოთლზე რომ გაიჭრა; მარცხენაში კვლავაც ცეცხლმოკიდებული ხის ნაჭერი ეჭირა. ხელისგულზე რაღაც ცივი, ბეწვიანი ყელე იგრძნო. ქმნილებამ კოჭს თავი დაანება და სანამ ხელში უამრავ ნემსს ჩაურჭობდა და ისედაც ღრმა ჭრილობას შეუბრალეზლად გაუფართოებდა, წამით პიტს მიაპყრო უგრძობელი, შავი, ზვიგენის თუ არწივის თვალელები.

თითქოს სამყაროს აღსასრული დადგა. პიტს აგონია დაეწყო. ქმნილების თავი – თუ ეს თავი იყო – ხელისგულში სწვდა, გლვჯდა, ჭრიდა, სულ უფრო ღრმად შეღწევას ცდილობდა. როდესაც პიტი მის მოცილებას შეეცადა, სისხლის შეხებები საზარლად მოიფრქვა ყველა მხარეს და თოვლზე, ჭირხლით დაფარულ ბრებენტსა და გარდაცვლილი ქალის ქურთუკზე ალისფერი კვალი დატოვა. ცეცხლში მოხვედრილი წვეთები გახურებულ ტაფაზე დასხმული ზეთივით აშიშინდა. გააფთრებული ქმნილება ცოფიანივით ჭყოდა. გველთევზასავით სქელი კუდი პიტს ათრთოლებულ ხელზე მოხვია და თითქოს გაკავება სურდა.

სისხლმოწყურებულ საშინელ ქმნილებასთან ბრძოლაში გართულ პიტს ცეცხლმოკიდებული ხის ნაჭერი არც განსენებია, მექანიკურად მოიქნია და დაარტყა. თავიდან, როდესაც ცეცხლის ალში გახვეული არსება გაზეთივით დაიგრაგნა, პიტი ვერც კი მიხვდა, რა მოხდა, თუმცა გამარჯვების ყიჟინა მაინც დასცა. მუხლი მაშინვე ეტკინა, მაგრამ ამისთვის ყურადღება არ მიუქცევია, წამოხტა და მარჯვენა, დასახიჩრებული ხელით ფარდულის საყრდენს მოეჭიდა. ტკაცუნის გაისმა და ჭყვილი წკმუტუნმა შეცვალა. უსასრულოდ გაგრძელებული წამის განმავლობაში ხელისგულში ჩაფრენილი კბილები კვლავაც სილრმისკენ მიიწევდა, მაგრამ მოჭიდების ძალამ იკლო და ცეცხლმოდებული ქმნილება მიწაზე დაეცა. პიტმა იგი ფეხით გასრისა. გრძნობდა, როგორ დაიკლაკნა ის რაღაც მის ქუსლქვეშ. ლამის სუნთქვა შეეკრა გამარჯვების შეგრძნებისგან, რომელმაც მთელი მისი არსება მოიცვა. მაგრამ ამ დროს უპატივცემულო მოპყრობით აღშფოთებულს მუხლი მოეკეცა, მყესები დაუწყდა და ფეხი კუტკალისასავით საწინააღმდეგო მხარეს ამოუტრიალდა.

პიტი მძიმედ დაეცა გვერდზე და სასიკვდილო „ავტოსტოპის“ მოყვარულ ბეკის თვალი თვალში გაუყარა. ვერ შეამჩნია, რომ მახინჯი ქმნილების თავი, თუ თავის მსგავსი ნაწილი, პიტის სახისგან, სულ რაღაც, სამ დუიმში აღმოჩნდა. აალებულ სხეულს ქურთუკზე

ურტყამდა. შავი თვალები თითქოს ბუდეებში იხარშებოდა. საშიში აღარაფერი იყო, მაგრამ როდესაც ძლივს შესამჩნევი ნაპრალი ოდნავ გაიხსნა და კბილების ორი მწკრივი გამოჩნდა, პიტმა შეჰყვირა: „არა! არა! არა!“ და ქმნილება ცეცხლში მოისროლა, სადაც იგი მაიმუნივით აჭყვივლდა და უმწეოდ აფართხალდა.

პიტმა მარცხენა ფეხით ქმნილება ცეცხლში უფრო ღრმად შეაგდო, ამისთვის კიდევ ერთხელ მოეჭიდა ფარდულის დაცერებულ საყრდენს, რომელიც მანამდე პატიოსნად ასრულებდა თავის მოვალეობას. შეხებისგან საყრდენი გადატყდა. მეორე ბოძმაც ველარ გაუძლო სიმძიმეს და წაიქცა. სახურავი ჩამოწვა, ცეცხლს ზემოდან დაეფარა და ყველა მხარეს მუჭა-მუჭა ნაპერწკლები გაფანტა.

ცოტა ხნით ყველაფერი გაყურდა. ჩამოვარდნილი ჟანგიანი თუნუქის ფურცელი ისე შეინძრა, თითქოს მძიმედ სუნთქავსო. მალე იქიდან პიტი გამოძვრა. ქურთუკის მარცხენა ყოშს ბოლი ასდიოდა. პიტი გამოთავყვანებულებით მიაშტერდა ბოლს. დაავიწყდა, რომ ფეხებზე მუხლებამდე ჩამოქცეული სახურავი აწვებოდა. შემდეგ ხელი სახესთან მიიტანა, ფილტვები ჰაერით გაივსო და გიგანტურ სადღესასწაულო სანთლად ქცეულ ქურთუკზე ცეცხლის პატარ-პატარა ენების ჩაქრობას შეუდგა.

აღმოსავლეთიდან თოვლმავლის ღმუილი გაისმა. ჯოუნსი... ან ის, რაც მისგან დარჩა. ღრუბელი. პიტს მისი გულმოწყალების იმედი არ ჰქონდა. ჯეფერსონტრექტზე დღეს ღმობიერება ყველას დაავიწყდა. კარგი იქნებოდა, დამალულიყო, მაგრამ ხმა, რომელიც ამას ურჩევდა, შორიდან ისმოდა და პიტს მისი სიტყვები უმნიშვნელოდ ეჩვენებოდა.

კვლავ ასწია დასახიჩრებული ხელი. ერთი თითი აკლდა. ის, ალბათ, საზარელი ქმნილების მუცელში განისვენებდა. კიდევ ორი თითი მყესებზედა ეკიდა. ჭრილობებს უკვე ოქროსფერბეწვიანი ობი მოსდებოდა. პიტმა მსუბუქი ქავილი იგრძნო და მიხვდა, რომ ეს სისაძაგლე მის სისხლსა და ხორცს ჭამდა.

სიკვდილი ინატრა, მაგრამ იცოდა, ჯერ ადრე იყო.

დასავლეთით ტყვიამფრქვევების კაკანი მიწყდა, მაგრამ ეს არ იყო ნამდვილი დასასრული. სულაც არა. თითქოს, ამის დასტურად, ჰაერში საშინელი აფეთქების ხმა გაისმა, რამაც თოვლმავლის ღმუილიცა და სხვა ყველაფერიც გადაფარა. ხელის ქავილის გარდა, კუჭსა და ფილტვებში ჩასახლებული მტაცებელი სოკო კიბოსავით ნთქავდა მას და მანამ არ დაწყნარდებოდა, სანამ ბოლოს არ მოუღებდა. პიტმა ენით მოსინჯა და ამოვარდნილი კბილების ადგილზე გაჩენილი ხვრელები იგრძნო.

მან თვალეხი დახუჭა და დაელოდა.

## ნაწილი II

რუხი კაცუნები

ქვეცნობიერიდან ჩნდება მოჩვენება,  
და კვნესით ცდილობს ხელახლა დაბადებას.  
სულ არ ჰგავს მეგობარს – ეჰ, ვრჩები ეულად,  
ხელი ჩემს მხარს ზემოთ რქად გადაქცეულა.

*თეოდორ როტკე*



# თავი მეათე

## კურცი და ანდერჰილი

### 1

საბრძოლო მოქმედებების რაიონში ერთადერთი შენობა პატარა მაღაზია იყო, სახელწოდებით „გოსლინის სოფლის მარკეტი“. კურცის მწმენდავები იქ თოვის დაწყების წინ, თერთმეტის ნახევრისთვის მივიდნენ. კურციც იმ დროს გამოჩნდა, თანდათანობით დამხმარე ძალამაც მოიყარა თავი. ბოლოს და ბოლოს, ვითარება კონტროლს ექვემდებარებოდა.

მაღაზიას პირობითად „ცისფერი ბაზა“ დაარქვეს, საქონლის ბაკს, მის გვერდით მდებარე თავლასა (ძველს, მაგრამ ჯერაც საიმედოდ მდგარს) და ბოსელს – „ცისფერი იზოლატორი“. იქ უკვე პირველი დაკავებულებიც მოეთავსებინათ.

არჩი პერლმუტერს, კურცის ახალ ადიუტანტს (წინა, კალვერტი, ორი კვირის წინ გულის შეტევით გარდაიცვალა – და ძალიან უდროოდ), ხელში პლანშეტი ეჭირა, რომელზეც თორმეტი გვარი ეწერა. ცხადია, პერლმუტერმა თან ლეპტოპიც წამოიღო და პორტატიული

კომპიუტერი Palm Pilot-იც, მაგრამ აღმოჩნდა, რომ ნებისმიერი ელექტრონული მოწყობილობა აქ მწყობრიდან გამოდიოდა.

სიაში პირველები გოსლინები იყვნენ: მალაზიის ბებერი მეპატრონე და მისი ცოლი.

– ეს არასრული სიაა, – თქვა პერლმუტერმა.

კურცმა ერთი კი შეავლო სიას თვალი და პერლს დაუბრუნა. მათ უკან დიდი ტრაილერები ჩამოდგა, ნახევრადმისაბმელიანები, საფარნე ბოძებს ამაგრებდნენ. ღამით ეს ადგილი ისე განათდებოდა, როგორც ნიუ-იორკის სტადიონი „იანკი“ ბეისბოლში მსოფლიო ჩემპიონატის დროს.

– ორმა ტიპმა, აი, ამდენით გაგვასწრო, – თქვა პერლმუტერმა და თვალსაჩინოებისთვის ცერითა და საჩვენებელი თითით დუიმის მეოთხედის ტოლი მანძილი უჩვენა, – პროდუქტი შეუძენიათ, ძირითადად, ლუდი და სოსისი.

პერლმუტერი ფერმკრთალი იყო, ორივე ლოყაზე ველური ვარდი გაჰფურჩქნოდა. მომატებული ხმაურის გამო ხმამაღლა ლაპარაკი უხდებოდა, რაც მას სიმშვიდისთვის სულაც არ განაწყობდა. ვერტმფრენები წყვილ-წყვილად მოფრინავდნენ და ღორღიან და ასფალტიან გზაზე ეშვებოდნენ, რომელიც შტატების შემაერთებელი 95-ე გზატკეცილისკენ მიემართებოდა. იქიდან დასავლეთით, ერთ მიყრუებულ ქალაქში (პრესქაილში) შეიძლებოდა მოხვედრა, სამხრეთით კი რამდენიმე ისეთივე პატარა ქალაქი (ბანგორისა და დერის მსგავსი) მდებარეობდა. ვერტმფრენები, ცხადია, გამოდგებოდა, მაგრამ იმ შემთხვევაში, თუ მფრინავები სანავიგაციო ხელსაწყოებზე არ იქნებოდნენ დამოკიდებულნი, რადგან ხელსაწყოები, როგორც სხვა ელექტრონული მოწყობილობა, აღარ მუშაობდა.

– საით წავიდნენ ის ბიჭები? ტყისკენ თუ გზატკეცილისკენ? – იკითხა კურცმა.

– უკან, ტყისკენ, – მიუგო პერლმუტერმა, რომელსაც ვერ გაეხედა და უფროსისთვის თვალებში შეხედვა, – გოსლინი ამბობს, რომ იქით

კიდევ ერთი გზა მიდის – დიფქათროუდი. იგი სტანდარტულ რუკებზე აღნიშნული არაა, მაგრამ მე ტურისტული რუკა „დაიამონდ ინტერნეიშნლ ფეიფარ“ ვიშოვე, სადაც ნაჩვენებია...

– შესანიშნავია. ისინი დაბრუნდებიან ან დარჩებიან. ორივე ვარიანტი გვაწყობს.

ვერტმფრენების კიდევ ერთი წყება მოფრინდა. იქ უცხო არავინ იყო და ეკიპაჟის წევრები მძიმეკალიბრიანი ტყვიამფრქვევების გადმოტვირთვას შეუდგნენ. ისეთი პირი უჩანდა, რომ ეს ყველაფერი, თავისი მასშტაბით, ცნობილ ოპერაციას, სახელწოდებით „ქარიშხალი უდაბნოში“ უტოლდებოდა და, შესაძლოა, აღემატებოდა კიდევ.

– პერლი, ვიმედოვნებ, გესმით, რა მისიაც გეკისრებათ.

პერლის ეს, გარკვეულწილად, ესმოდა. იგი ახალბედა იყო, შთაბეჭდილების მოხდენას ცდილობდა და მოუთმენლობისგან ცქმუტავდა. სპანიელივით ვარ, გემრიელი ლუკმა რომ იყნოსა, – გაიფიქრა კურცმა. თან, მისთვის თვალეზში ერთხელაც არ შეუხედავს.

– სერ, ჩემი სამუშაო სამნაწილიანია.

სამნაწილიანი, – კვლავ გაიფიქრა კურცმა, – სამნაწილიანი... ეს რა სიტყვა სცოდნია.

– პირველი – უნდა დავაკავო, მეორე – დაკავებული მედიკოსებს მივუყვანო, მესამე – მორიგი ბრძანების მიღებამდე საკარანტინო ზონიდან არავინ გავუშვა.

– სავსებით სწორია. ეს...

– მაპატიეთ, სერ, მაგრამ აქ ერთი ექიმიც კი ვერსად ვნახე, მხოლოდ რამდენიმე სამხედრო სანიტარი და...

– მოკეტე, – მოუჭრა კურცმა. და მიუხედავად იმისა, რომ ხმისთვის არ აუწევია, მწვანე კომბინეზონებში გამოწყობილი ექვსი კაცი (ყველას, კურცის ჩათვლით, კომბინეზონი ეცვა, განმასხვავებელი ნიშნების გარეშე) წამით გაშეშდა, შემდეგ კი გაორმაგებული, არა, გასამმაგებული სიჩქარით გავარდა დავალებების შესასრულებლად. ოღონდ იქამდე ყველამ კურცისა და პერლმუტერის მხარეს გაიხედა.

პერლმუტერის ლოყებზე გაფურჩქნილი ვარდები მყისიერად ჩამოქცნა. ადიუტანტმა უკან დაიხია და უფროსთან მანძილი ერთი ფუტით გაზარდა.

– თუ კიდევ გამაწყვეტინებ, პერლი, ნოკაუტში გაგზავნი. კარგად დაიხსომე. ერთხელაც გამაწყვეტინებ და ჰოსპიტალში აღმორჩნდები. გასაგებია?

პერლმუტერმა უდიდესი ძალისხმევის ფასად შეხედა კურცს სახეში და ხელი ქუდთან ისე სწრაფად მიიტანა, რომ კინალამ ცეცხლი გააჩინა.

– სერ, დიახ, სერ!

– მორჩი მაგ ოფიციალობას, ეგ არაფერში მჭირდება, – უთხრა გაღიზიანებულმა კურცმა. შეამჩნია, რომ პერლმუტერმა თვალები დახარა, – თვალებში მიყურე, ყმაწვილო, როცა გელაპარაკები.

პერლმუტერი უხალისოდ დაემორჩილა ბრძანებას. სახეზე ტყვიისფერი დაედო. ირგვლივ ვერტიფრენების გამაყრუებელი გუგუნისმოდა, მაგრამ იქ, სადაც ისინი იდგნენ, ისეთი არაბუნებრივი სიჩუმე ჩამოწოლილიყო, თითქოს კურცი უხილავ ხმაგაუმტარ კაბინაში იმყოფებოდა. პერლმუტერი გრძნობდა, რომ ყველანი მას აკვირდებოდნენ და მის შიშსაც ხედავდნენ. ზოგიერთს ზუსტად ახალი უფროსისნაირი თვალები ჰქონდა – ცარიელი და გაყინული, თითქოს ტვინის ნასახი არ გააჩნდა. პერლმუტერს სმენოდა ათასიარდიან გამჭოლ მზერაზე, თუმცა, კურცის მზერას, მილიონიარდიანი უფრო ეთქმოდა, ან სინათლის წელიწადის.<sup>77</sup>

პერლმუტერმა როგორღაც მოახერხა და იმ მზერას გაუძლო. სიცარიელეში იყურებოდა. დასაწყისი არცთუ ისე სახარბიელო გამოვიდა. ახლა ყველაზე მნიშვნელოვანი – აუცილებელიც კი – ის იყო, რომ დაცურებული თოვლი შეეჩერებინა და მისი ზვავად გადაქცევა არ დაემწვა.

---

<sup>77</sup> მანძილი, რომელსაც მზის სინათლე წელიწადში გადის.

– აი, ასე, კარგია. ყოველ შემთხვევაში, უკეთესია, – კურცი ხმა-  
დაბლა ლაპარაკობდა, მაგრამ პერლმუტერს თავისუფლად ესმოდა  
მისი, ვერტიფრენების ძრავების ღრიალის მიუხედავად, – ამას მხო-  
ლოდ ერთხელ გეტყვი და ისიც იმიტომ, რომ ახალბედა ხარ და ვირის  
განავალი ტორტისგან ვერ განგისხვავებია. ბრძანების თანახმად, აქ  
ოპერაცია „პუჟკა“ უნდა ჩავატარო. იცი, ეს რა არის?

– არა, – მიუგო პერლმუტერმა, თუმცა თითქმის ფიზიკურ ტკი-  
ვილს განიცდიდა, რადგან სიტყვა „სერ“-ის წარმოთქმის უფლება არ  
ჰქონდა.

– ირლანდიელების თქმით, იმ რასებისთვის, რომლებიც ბოლომ-  
დე ვერ გათავისუფლდნენ დედის რძესთან ერთად მიღებული სულე-  
ლური ცრურწმენებისგან, პუჟკა ცხენი-მოჩვენებაა, იგი მგზავრებს  
იტაცებს, ზურგზე მოიგდებს და სადღაც მიჰყავს. მე მას იმ ოპერაცი-  
ის აღსანიშნავად ვიყენებ, რომელიც ერთდროულად გასაიდუმლოე-  
ბულიცაა და ღიაც. ეს ხომ პარადოქსია, პერლმუტერ! კიდევ კარგი,  
რომ მსგავსი შემთხვევებისთვის სტრატეგიულ გეგმებს ჯერ კიდევ  
1947 წლიდან ვამუშავებთ, მას შემდეგ, რაც სამხედრო-საჰაერო ძა-  
ლების წარმომადგენლებმა პირველად გადმოგვცეს არამიწიერი  
წარმოშობის საგანი, რომელსაც „სასიგნალო შუქს“ ვუწოდებთ. ცუ-  
დი ისაა, რომ შორეული მომავალი აწმყოში გვეწვია და ამ საქმეში  
შენნაირი ბიჭების დახმარება გვჭირდება. გასაგებია, რიგითო?

– დიახ, ს... დიახ.

– იმედი მაქვს, რომ ასეა. პერლმუტერ, ჩვენ გვევალება, რომ პუ-  
ჟკასავით სწრაფად და მტკიცედ ვიმოქმედოთ. შავი სამუშაო უნდა  
შევასრულოთ და რაც შეიძლება სუფთა... დიახ, სუფთა დავრჩეთ...  
და კიდევ – მოლიმარი, ღვთის წყალობით...

კურცმა ოდნავ გაიღიმა, კბილები გამოაჩინა და ისე საოცრად და-  
ემსგავსა ბოროტ სატირს<sup>78</sup>, რომ პერლმუტერმა შიშისგან კინალამ

---

<sup>78</sup> ბერძნულ მითოლოგიაში ტყის ღვთაება, ნაყოფიერების დემონი, თხის ფე-  
ხებზე მდგარი, ნიმფებზე მონადირე ავხორცი არსება.

შეჰყვირა. მაღალი, წელში მოხრილი კურცი კაცს ბიუროკრატი ეგონებოდა, მაგრამ იყო მასში რაღაც შემადრწუნებელი. ყველაზე უგრძობი ადამიანიც კი შეამჩნევდა რაღაც შემზარავს მის თვალებში, ხელების შეზღუდულ მოძრაობაში... მაგრამ პერლმუტერს ეს არ აშინებდა. არც ამის გამო შეერქმიათ მისი უფროსისთვის ბებერი საშინელი კურცი. პერლმუტერს ზუსტი მიზეზის თქმა არ შეეძლო და არც უნდოდა. ახლა მხოლოდ ერთი რამ სურდა: საუბარი სწრაფად დაემთავრებინა და იქიდან სალსალამათს გაესწრო. ვის სჭირდებოდა დასავლეთით ოცი თუ ოცდაათი მილის გავლა უცხო ჯურის გადამთიელებთან კონტაქტის დასამყარებლად? ერთ-ერთი მათგანი ახლა პერლმუტერის წინ იდგა.

კურცმა ტუჩები მოკუმა.

– მაშასადამე, ერთად ვართ, არა?

– დიახ.

– ერთ დროშას ვცემთ პატივს? ერთ ტულეტში დავდივართ?

– დიახ.

– და რომ მოვრჩებით, როგორი უნდა ვიყოთ, პერლი?

– სუფთა?

– სწორია! და კიდევ?

პერლმუტერი წამით დაიბნა. მხოლოდ წამით.

– მოლიმარი, სერ.

– კიდევ ერთხელ მიწოდებ სერს და ნოკაუტში გაგიშვებ.

– მაპატიეთ, – ჩაიწურჩულა პერლმუტერმა. ისედაც ნოკაუტში იყო.

გზაზე ნელა მიგორავდა სკოლის ავტობუსი, ფრთხილად მანევრირებდა და ვერტმფრენებს გვერდს უქცევდა. სანახევროდ გზისპირზე მოძრაობდა. ყვითლად შეღებილ გვერდზე დიდი შავი ასოებით ეწერა: მილიკონეტის სასკოლო დეპარტამენტი.

ეს სამეთაურო ავტობუსი იყო. შიგნით ოუენ ანდერჰილი და მისი ხალხი იჯდა. კლასის გუნდი. ავტობუსის დანახვამ პერლმუტერს

შეება მოჰგვარა. სხვადასხვა დროს ორივენი ანდერჰილთან ერთად მუშაობდნენ.

– მედიკოსები სალამოსთვის ჩამოვლენ, – შეატყობინა კურცმა, – ყველა დარგის ექიმი იქნება, ვინც კი შეიძლება დაგჭირდეთ. გასაგებია?

– გასაგებია.

კურცი მაღაზიის წინ მდებარე ერთადერთ ბენზინგასამართთან გაჩერებული ავტობუსისკენ გაემართა და საათს დახედა. თერთმეტი ხდებოდა. ღმერთო, როგორ მიქრის დრო, როცა მხიარულობთ და ერთობით. პერლმუტერი გვერდით მიჰყვებოდა, მაგრამ კოკერ-სპანიელის მანერები დაევიწყებინა.

– ახლა კი, არჩი, დააკვირდი მათ, დაყნოსე, ზღაპრები მოისმინე და რიპლის ყველა შემთხვევა დაარეგისტრირე. გეცოდინება, რიპლი რაც არის, არა?

– დიახ.

– ძალიან კარგი. ოღონდ არ შეეხო!

– არა, ღმერთო ჩემო! – შესძახა პერლმუტერმა და სახე წამოერთო.

კურცს ოღნავ გაელიმა. ეს მის პირველ, ზვიგენისებურ ლიმილს არაფრით სჯობდა.

– შესანიშნავია, პერლმუტერ! აირწინალები ხომ გაქვთ?

– ახლახან მოიტანეს. თორმეტი ყუთია, უმეტესობა...

– კარგი. ჩვენ რიპლის პოლაროიდული სურათები გვჭირდება. დაწვრილებითი დოკუმენტაცია. ნიმუში A, ნიმუში B და ასე შემდეგ. დაიმახსოვრეთ?

– დიახ.

– ვიმედოვნებ, ერთი... სტუმარიც კი ვერ დაგისხლტებათ, ასეა?

– ვერც ერთი! – პერლმუტერმა ისეთი აღშფოთებული სახე მიიღო, თითქოს ამბობდა, ეს როგორ მაკადრეთო.

კურცმა ტუჩები გაწელა, ფართოდ გაილიმა და კიდევ ერთხელ

გამოაჩინა ზვიგენის ხახა. უსიცოცხლო თვალებით პერლმუტერს ბურღავდა და მის იქით, დედამიწის ცენტრში იყურებოდა, ყოველ შემთხვევაში, პერლმუტერმა ასე აღიქვა და საკუთარ თავს შეკითხვა დაუსვა: ნეტავ, მისიის დასრულების შემდეგ, კურცის გარდა, ცოცხალი თუ ვინმე დატოვებს „ცისფერ ბაზას“?

– განაგრძეთ, მოქალაქე პერლმუტერ. ამას ხელისუფლების სახელით გიბრძანებთ.

არჩი პერლმუტერმა თვალი ავტობუსისკენ მიმავალ კურცს გააყოლა, საიდანაც ანდერჰილი – დაბალი და მსუქანი კაცი ჩამოდიოდა. პერლის ცხოვრებაში არასდროს ისე არ გახარებია ვინმეს ზურგის დანახვა, როგორც ახლა.

## 2

– სალამი, ბოს, – თქვა ანდერჰილმა. ისევე, როგორც სხვებს, მასაც უბრალო მწვანე კომბინეზონი ეცვა. ოღონდ, კურცის მსგავსად, ისიც იარაღს ატარებდა. ავტობუსში კიდევ ოცამდე კაცი იჯდა. მათი უმრავლესობა საუზმეს ამთავრებდა.

– აბა, რა გვაქვს აქ, მეგობარო? – იკითხა კურცმა და ანდერჰილს ზემოდან დააცქერდა. ეს უკანასკნელი, თავის მხრივ, მასზე სამოცდაათი გირვანქით მეტს იწონიდა.

– „სამეფო ბურგერი“. პირდაპირ გადმოვჭერით. არ მეგონა, ავტობუსი თუ გამოეტეოდა, მაგრამ იოდერი გვარწმუნებდა, ყველაფერი გამოვაო, და მართალიც აღმოჩნდა. ბურგერი ხომ არ გინდათ? მართალია, ცოტათი გაცივდა, მაგრამ მიკროტალღოვანი ღუმელი ამ დასაკარგავშიც იქნება, – ანდერჰილმა თავით მაღაზიაზე მიანიშნა.

– თავს შევიკავებ. ქოლესტერინი ღვიძლისთვის მავნებელია.

– საზარდული როგორ გაქვთ?

ექვსი წლის წინ, კალათბურთის თამაშისას, კურცი სერიოზულად დაშავდა, რაც ირიბად, მაგრამ მაინც, მათი პირველი და უკანასკნელი დაშორების მიზეზი გახდა. ანდერჰილის აზრით, ისეთი არაფერი



მომხდარა, თუმცა კურცის მსგავსი ტიპებისგან ყველაფერი მოსალოდნელი იყო. უსიცოცხლო ნიღბის მიღმა მოქნილი გონება იმალებოდა, რომელიც სინათლის სხივის სისწრაფით აზროვნებდა, ყოველდღიურ გეგმებს ადგენდა, წარმოუდგენელ პროგრამებს ქმნიდა, ემოციას უმკლავდებოდა. ბევრს კურცი შეშლილად მიაჩნდა. ოუენ ანდერჰილი დაზუსტებით ვერაფერს იტყოდა, მაგრამ ხვდებოდა, რომ ასეთ ადამიანთან სიფრთხილე უნდა გამოეჩინა. უკიდურესი სიფრთხილე.

– როგორც ირლანდიელები ამბობენ, *me groin's foine*<sup>79</sup>, – მან შარვლის უბეზე ხელი წაივლო, მოქაჩა და ოუენს შიშის მომგვრელი ღიმილი აჩუქა.

– მიხარია ამის მოსმენა.

– და თქვენ? კარგად ხართ?

– *me groin's foine*, – მიუგო ოუენმა. კურცს გაეცინა.

ამჯერად გზაზე ავტობუსით ნელა და ფრთხილად, ოღონდ უფრო მსუბუქად, ახალთახალი „ლინკოლნ-ნავიგატორი“ მოგორავდა. შიგ ნარინჯისფერ სამოსში გამოწყობილი სამი ზორბა მონადირე იჯდა, რომელიც გაოცებით მისჩერებოდა ვერტიკალურებსა და მწვანე-კომბინეზონიან, მოფუსფუსე ჯარისკაცებს. მონადირეებს, ძირითადად, ტყვიამფრქვევები აინტერესებდათ. მადლობა უფალს, ვიეტნამს ჩრდილოეთ მენამდეც მოელწია. მალე ისინი საკარანტინო ბლოკში მყოფთ შეუერთდებოდნენ.

როგორც კი „ნავიგატორი“ ავტობუსთან გაჩერდა. მაშინვე ექვსი სამხედრო გაჩნდა. ის სამნი ადვოკატები ან ბანკირები უნდა ყოფილიყვნენ, თავიანთი ქოლესტერინიანი პრობლემებითა და აქციების სქელ-სქელი პაკეტებით – ადვოკატები თუ ბანკირები, თავი გულკეთილ ბიჭებად რომ წარმოედგინათ და ნადირობით ერთობოდნენ ქვეყანაში, რომელიც გულწრფელად მიაჩნდათ ბებერ, მშვიდობიან ამერიკად (ამ რწმენისგან მათ მალე განკურნავდნენ). რამდენიმე

---

<sup>79</sup> „ჩემი საზარდული საათივით მუშაობს“ (ირლ)

წუთში მათ ბოსელში მოათავსებდნენ (ან ბაკში, თუ სუფთა ჰაერზე ყოფნა სურდათ), სადაც Visa-ბარათებს ყურადღებას არავინ მიაქცევდა. მობილურ ტელეფონებს დაუტოვებდნენ, რადგან აქ კავშირი გაწყვეტილი იყო, თუმცა, სურვილის შემთხვევაში, ღილაკებზე თითის დაჭერით გაერთობოდნენ.

– რაიონი საიმედო ალყაშია? – იკითხა კურცმა.

– ვფიქრობ, ასეა.

– ყველაფერს ძველებურად სწრაფად ითვისებთ?

ოუენმა მხრები აიჩიჩა.

– სულ რამდენი ადამიანი იქნება „ცისფერ ზონაში“, ოუენ?

– ჩვენი ანგარიშით, რვაასამდე. A და B პრიმა ზონებში – არა უმეტეს ასისა.

ეს კარგი მონაცემია, იმ პირობით, თუ კორდონის გარღვევა ვერავინ მოახერხა. შესაძლო დაბინძურების თვალსაზრისით, რამდენიმე გაქცეულს დიდი მნიშვნელობა არ ჰქონდა – ყოველ შემთხვევაში, ამ კუთხით დამაიმედებელი ცნობები მოსდიოდათ. ინფორმაციის გაჟონვას გამოუსწორებელი შედეგების მოტანა შეეძლო. ჩვენს დროში მოჩვენება-ცხენით ჯირითი სულ უფრო რთულდებოდა. ყველა ვიდეოკამერით დადიოდა, ვერტიფრენებზე სატელევიზიო დანადგარებს ამონტაჟებდნენ, ცნობისმოყვარე ადამიანების რიცხვმაც საგრძნობლად იმატა.

– მაღაზიაში შედით, – თქვა კურცმა, – შემპირდნენ, რომ ცალკე ტრაილერს გამომიყოფენ, თუმცა, ჯერ არ მოუყვანიათ.

– *Un momenta*<sup>80</sup>, – ანდერჰილი მისი წონისთვის შეუფერებლად სწრაფად გაიქცა ავტობუსისკენ და მალე „სამეფო ბურგერის“ ცხიმიანი ლაქებით დაფარული პაკეტითა და მხარზე შემოდებული მაგნიტოფონით დაბრუნდა.

– მოგკლავთ ეგ ნაგავი, – უთხრა მას კურცმა და თავით პაკეტზე ანიშნა.

---

<sup>80</sup> "ერთი წუთით" (იტ)

- სამყაროთა ომს ვიწყებთ, თქვენ კი ქოლესტერინის მაღალი შემცველობა გადარდებთ?

მათ უკან ერთ-ერთი ახმახი მონადირე ხმამაღლა გამოთქვამდა უკმაყოფილებას, ყვიროდა, რომ ადვოკატთან დაკავშირება სურდა, რაც კიდევ უფრო ამტკიცებდა აზრს, რომ ბანკირთა მოდგმას მიეკუთვნებოდა. კურცი ანდერჰილს მაღაზიაში შეუძღვა. მათ ზემოთ, ცაში, უკან დაბრუნებული მრავალი სასიგნალო შუქი ნაცრისფერი ღრუბლების ფენაში აღწევდა და დისნეის პერსონაჟებივით ხტოდა.

### 3

ბებერი გოსლინის ოფისში სალიამის, სიგარების, ლუდისა და გოგირდის სუნი იდგა. ასეთი სიმყრალე გაზების ან ლაყე კვერცხის ან ერთდროულად ორივეს ბრალი იქნებაო, - დაასკვნა კურცმა. კიდევ რალაცის სუსტი, მაგრამ მკაფიო სუნი შეიგრძნო - ეთილის სპირტის. ეს მათი სუნი იყო. ყოველ კუთხე-კუნჭულს მოსდებოდა. კურცის ადგილზე სხვა ადამიანი ცდუნებას აჰყვებოდა და ამას აწეწილ ნერვებსა და ძლიერ წარმოსახვას დააბრალებდა, მაგრამ კურცს არც ერთი აწუხებდა, არც - მეორე. ყოველ შემთხვევაში, იგი არ ფიქრობდა, რომ დაახლოებით ასი კვადრატული მილის ფართობის ტყის მასივი, გოსლინის მაღაზიას რომ ერტყა, მომავალშიც სიცოცხლისუნარიანი ეკოსისტემის სახით იარსებებდა. ზოგჯერ, ავეჯის რომელიმე ნაწილი უნდა გაწირო, მთელი ბინა რომ არ დაზარალდეს.

კურცი საწერ მაგიდას მიუჯდა და ერთ-ერთი უჯრა გამოსწია. შიგ მუყაოს ყუთი იდო, წარწერით „ქიმ/აშშ/10 ერთეული“. პერლმუტერს ნამდვილად გაუხარდებოდა. კოლოფი ამოიღო და გახსნა. მასში გამჭვირვალე პლასტმასის მომცრო ნიღბები ეწყო, აი ისეთი, ცხვირ-პირზე რომ იფარებენ ხოლმე. ერთი ანდერჰილს გადაუგდო, მეორე თვითონ გაიკეთა და ელასტიკური თასმებით შეიკრა.

- ეს აუცილებელია? - იკითხა ოუენმა.
- არ ვიცი. ეს პრივილეგიად არ ჩათვალოთ; ერთ-ორ საათში მას

ყველა გაიკეთებს, ცხადია, საკარანტინო ბლოკში მყოფთა გარდა.

ანდერჰილმა კომენტარისგან თავი შეიკავა და ნილაბი გაიკეთა. კურცი კედელზე ჩამოკიდებულ, პროფესიული უსაფრთხოებისა და ჯანმრთელობის ადმინისტრაციის პლაკატს (გააკარი ეს ან მოკვდი) თავით მიეყრდნო.

– ისინი მუშაობენ? – ანდერჰილის ხმა ნილბიდანაც მშვენივრად ისმოდა. მას თითქოს არც ფორები ჰქონდა და არც ფილტრი, მაგრამ სუნთქვას არ ართულებდა.

– ისინი ებოლაზე, ციმბირულ წყლულსა და ახლა სუპერქოლერაზე მუშაობენ. რიპლიზე? შესაძლოა, ჩვენი საქმე ცუდადაა, ჯარისკაცო. იქნებ უკვე დაგვერხა კიდევ. მაგრამ დრო მიდის და თამაში დაწყებულია. იმ ჩანაწერის მოსმენა მინდოდა, რომელიც უეჭველად მხარზე გადაკიდებულ მოწყობილობაში გიდევთ.

– ვფიქრობ, ყველაფრის მოსმენა არ ღირს, აჯობებს, თქვენი გემოვნებით შეარჩიოთ.

კურცმა თავი დაუქნია, ჰაერში საჩვენებელი თითი დაატრიალა (იმ მსაჯვით, გარბენის დაწყების ნიშანს რომ იძლევა) და გოსლინის სავარძელში მოხერხებულად მოეწყო.

ანდერჰილმა მხრიდან მაგნიტოფონი ჩამოიღო, მაგიდაზე დადო და ღილაკს დააწვა. გაისმა მექანიკური ხმა:

„ნაციონალური უსაფრთხოების სამმართველოს მიერ მოპოვებული რადიოჩანაწერი. სიხშირე – სამოცდაორი მილიონ ცხრაას თოთხმეტი ათას ორმოცდაოთხი. მასალას მიენიჭა გრიფი „სრულიად საიდუმლო“. მოპოვების დრო – ექვსი საათი და ოცდამეხუთი წუთი, თოთხმეტი ნოემბერი, ორი-ნული-ნული-ერთი. ჩანაწერი იწყება ტონალური სიგნალის შემდეგ. თუ არ გაქვთ მონიჭებული დაშვების პირველი დონე, დააჭირეთ გაჩერების ღილაკს.

– გთხოვთ, – გაიმეორა კურცმა და მოწონების ნიშნად თავი დააქნია, – კარგია. არაავტორიზებული პერსონალის უდიდეს ნაწილს დააფრთხობს. ასე არ არის?

ამას პაუზა მოჰყვა, პაუზას – ორწამიანი სიგნალი და ქალის ხმა გაისმა:

„ერთი. ორი. სამი. გთხოვთ, შეგვიბრალეთ! Ne nous blames pas“.

კვლავ ორწამიანი პაუზა. შემდეგ ახალგაზრდა კაცმა წარმოთქვა:

„ხუთი. შვიდი. თერთმეტი. ჩვენ უმწეონი ვართ, Nous sommes sans defense. გთხოვთ, შეგვიბრალეთ, Ne nous faites, ჩვენ უმწეონი ვართ“...

– ღმერთმანი, ეს ხომ ბერლიცის<sup>81</sup> უცხო ენების კურსს ჰგავს, – გაეცინა კურსს.

– ხმა ვერ იცანით? – ჰკითხა ანდერჰილმა.

კურცმა თავი დააქნია და ტუჩებზე თითი მიიღო.

შემდეგი ხმა ბილ კლინტონს<sup>82</sup> ეკუთვნოდა:

„ცამეტი. ჩვიდმეტი. ცხრამეტი“...

ბოლო სიტყვა კლინტონმა არკანზასული აქცენტით წარმოთქვა.

„აქ ინფექციის მსგავსი არაფერია. Il n'y pas d'infection იცი“.

კიდევ ერთი ორწამიანი სიჩუმე და მაგნიტოფონიდან ტომ ბროკაუს<sup>83</sup> ხმა გაისმა:

„ოცდასამი. ოცდაშვიდი. ოცდაცხრა. ჩვენ ვკვდებით. On se meurt, on creve<sup>84</sup>. ჩვენ ვკვდებით“.

ანდერჰილმა STOP–ს დააჭირა.

– თუ გაინტერესებთ, პირველი ხმა ჯესიკა პარკერს, მსახიობს ეკუთვნის, მეორე – ბრედ პიტს.

– ეს ვინლაა?

– ისიც მსახიობია.

– აჰა.

– ყოველი პაუზის შემდეგ სხვა ხმა გაისმის. მათი გამოცნობა აქ

---

<sup>81</sup> მაქსიმილიან ბერლიცი, გერმანელ-ამერიკელი ლინგვისტი და პედაგოგი.

<sup>82</sup> ამერიკის ორმოცდამეორე პრეზიდენტი (1993-2001)

<sup>83</sup> ამერიკელი ჟურნალისტი და ტელეწამყვანი.

<sup>84</sup> „ჩვენ ვკვდებით, ვიხრცებით“(ფრ).

მყოფი ადამიანების უმრავლესობისთვის სირთულეს არ წარმოადგენს. ეს ალფრედ ჰიჩკოკის<sup>85</sup>, პოლ ჰარვის<sup>86</sup>, ჯეიმზ ბრაუნის<sup>87</sup>, ტიმ სემპლის – ადგილობრივი, ძალიან პოპულარული კომიკოსისა და სხვა, ასობით პიროვნების ხმებია. თუმცა ზოგიერთი მათგანის დადგენა ვერ შევძელით.

– ასობით სხვა? რამდენ ხანს გრძელდება ჩანაწერი?

– დაზუსტებისთვის გეტყვით, ეს ჩანაწერები არ მოგვიპოვებია, პირიქით, ისინი ღია ეთერში ისმოდა და რვა საათსა და ნული წუთიდან ვახშობთ. ეს იმას ნიშნავს, რომ არ ვიცით, ეს ნაგავი რა რაოდენობით გავიდა ეთერში, თუმცა ვფიქრობთ, ვინც მოისმინა, ვერაფერს გაიგებდა. რომც გაეგოთ... – ანდერჰილმა მხრები ფილოსოფიურად აიჩეჩა, რაც ნიშნავდა: „მერე რა?“ – ხმები ისევ ისმის. ხმები, როგორც ჩანს, ნამდვილია. ჩვენ მათი შედარებითი ანალიზი მოვახდინეთ, ვინც უნდა იყვნენ, ამ ბიჭებს თავისუფლად შეუძლიათ, რიჩ ლიტლი<sup>88</sup> უმუშევრად დატოვონ.

ამ დროს ვერტმფრენების მკაფიო ტრახ-ტრახ-ტრახ გაისმა. კურცი ამ ხმას არა მარტო ისმენდა, გრძნობდა კიდევ. დაფის, პროფესიული უსაფრთხოებისა და ჯანმრთელობის ადმინისტრაციის პლაკატის გავლით, მისი ტვინის ხვეულებში სიგნალი შედიოდა და უბრძანებდა: დაიწყეთ, დაიწყეთ, დაიწყეთ, იჩქარეთ, იჩქარეთ, იჩქარეთ! კურცის სისხლი მზად იყო ბრძანების დაუყოვნებლივ შესასრულებლად, მაგრამ თვითონ კურცი გაუნძრევლად იჯდა და მშვიდად შეჰყურებდა ოუენ ანდერჰილს. მასზე ფიქრობდა. ნელა იჩქარე, ჭკვიანური რჩევაა. განსაკუთრებით მაშინ, როდესაც საქმე ოუენის მსგავს ადამიანებთან გაქვს. რაო? საზარდული როგორ გაქვსო?

ერთხელ ხომ დამიდე კვანტი, – გაიფიქრა კურცმა, – იქნებ ჩემი ხაზი არ გადმოგიკვეთია, მაგრამ მითხარი, გულახდილად, ერთი-

<sup>85</sup> ბრიტანელ-ამერიკელი კინორეჟისორი.

<sup>86</sup> ამერიკელი რადიოკომენტატორი.

<sup>87</sup> ამერიკელი მომღერალი, „სოულის ნათლია“.

<sup>88</sup> ამერიკელი პაროდისტი.

ორი ნაბიჯი ხომ გადმოდგი? ვფიქრობ, რომ კი. და იმასაც ვფიქრობ, რომ მეტი სიფრთხილე გმართებს.

– სულ ოთხი ფრაზაა, რომელიც განუწყვეტლივ მეორდება, – და-ამატა ანდერჰილმა და თითებით ჩამოთვლას შეუდგა, – „არ გვატკინოთ“, „უმწეონი ვართ“, „აქ ინფექციის მსგავსი არაფერია“ და ბოლო...

– ინფექცია არ არის, – გაიმეორა კურცმა, – ჰმ! კარგი ნერვები კი ჰქონიათ, არა?

იგი ხელავდა მოწითალო ოქროსფერ ბუსუსებს, „ცისფერი ბიჭის“ გარშემო მდებარე ხეებზე რომ იზრდებოდა. და ადამიანებზეც. ძირითადად, გვამებზე. ბიოლოგებმა მას რიპლის სოკო უწოდეს, იმ ყოჩაღი ქალის პატივსაცემად, რომლის როლსაც კოსმოსურ სერიალში სიგურნი უივერი<sup>89</sup> ასრულებდა. მათი უმრავლესობა ძალზე ახალგაზრდა იყო და არ იცნობდა კიდევ ერთ რიპლის, რომელსაც გაზეთებში რუბრიკა მიჰყავდა, სახელწოდებით „გინდ დაიჯერეთ, გინდ არა“. ეს „გინდ დაიჯერეთ, გინდ არა“ დიდი ხანია წარსულს ჩაჰბარდა, როგორც პოლიტკორექტული ოცდამეერთე საუკუნისთვის შეუფერებელი უხამსობა. სამაგიეროდ, ძალიან კი მოერგებოდა დღევანდელ ვითარებას, – გაიფიქრა კურცმა. დიახ, ხელთათმანივით. ბებერი მისტერ რიპლის სიამის ტყუპები და ორთავიანი ძროხები ამასთან შედარებით სავსებით ნორმალურ არსებებად გამოჩნდებოდნენ.

– და ბოლო, მეოთხე: „ჩვენ ვკვდებით“, – დაასრულა ანდერჰილმა, – ეს საინტერესოა, რადგან ფრანგულიდან ორგვარად ითარგმნება. პირველი – პირდაპირი მნიშვნელობით, მეორე – ონ ცრევე – სლენგია. ჩვენ ვიტყვით: „საცაა ფეხებს გავფშევით“, – და შეხედა კურცს, რომელსაც აშკარად გული სწყდებოდა, რომ პერლმუტერი ამას ვერ ხელავდა, თუმცა გამოსწორება ჯერ კიდევ შეიძლებოდა, – ისინი მართლაც ფშეკენ ფეხებს? ვგულისხმობ, თუ ღავუშვებით, რომ

---

<sup>89</sup> ამერიკელი მსახიობი.

ამაში არ ვეხმარებით?

– მაგრამ რატომ ფრანგულად, ოუენ?

ანდერჰილმა მხრები აიჩეჩა.

– შესაძლოა, აქ მათი მეორე ენაა.

– აჰა. და ციფრები? იმის ჩვენება სურთ, რომ საქმე გონიერ არსებებთან გვაქვს? და რომ ნებისმიერ სხვა სახეობას შეუძლია ჩვენთან მოფრენა რომელიმე ვარსკვლავური სისტემიდან, განზომილებიდან თუ ღმერთმა იცის, კიდეც საიდან?

– ალბათ. სასიგნალო შუქთან დაკავშირებით რა ხდება, ბოს?

– ახლა უმეტესობა ტყეშია, მაგრამ როცა მუხტი უთავდებათ, სწრაფად ქრებიან. ისინი, რომელთა დაბრუნებაც შეეძელით, სუპის ეტიკეტამძვრალ თუნუქის კოლოფებს ჰგვანან. მათი ზომების მიხედვით თუ ვიმსჯელებთ, ეფექტური შოუ გამოუვიდათ, არა? ადგილობრივებმა შიშისგან კინაღამ ჩაისვარეს. გაბნევის შემდეგ სასიგნალო შუქი სოკოს, სპორებს თუ ეშმაკმა იცის, რას ტოვებს. იგივე ითქმის უცხოპლანეტელთა შესახებაც. დარჩენილები ხომალდის ირგვლივ მოგროვდნენ, როგორც მგზავრები დამტვრეულ ავტობუსთან და წუწუნებდნენ, რომ დასნებოვნებულები არ იყვნენ, მაღლობა ღმერთს, დამშვიდება შეიძლებოდა. თუმცა, როგორც კი ეს რაღაც თქვენს სხეულზე მოხვდებოდა, როგორც ოუენმა თქვა, სავარაუდოდ, ფეხებს გაფშეკდით. ცხადია, ჯერ ძალიან ადრე იყო, დანამდვილებით რამე რომ სცოდნოდათ, მაგრამ ვარაუდების გამოთქმის უფლება კი ჰქონდათ.

– რამდენი უცხოპლანეტელი დარჩა ზევით? – დაინტერესდა ოუენი.

– ასამდე.

– კიდეც რა ვიცით? ვინმეს რამე იდეა ხომ არ აქვს?

კურცმა ხელი ჩაიქნია. საიდან უნდა სცოდნოდა. ამის ცოდნა რომელიღაც დეპარტამენტს ევალებოდა და არა ბიჭებს, რომლებიც მაღლიერების დღის წინ ამ მხიარულ წვეულებაზე მიიპატიჟეს.



– როგორ გგონიათ, გადარჩენილები ერთი გუნდია? – არ ეშვე-  
ბოდა ანდერჰილი.

– არ ვიცი. შესაძლოა, არა. ძალზე ბევრნი არიან გუნდისთვის,  
არასაკმარისი – კოლონისტებისთვის, და ძალიან ცოტა – დამრტყმე-  
ლი ძალისთვის.

– კიდევ რა ხდება იქ, ზევით, ბოს? კიდევ არის რაღაც, არა?

– დარწმუნებული ხარ?

– ჰო.

– რატომ?

– იქნებ ინტუიცია მკარნახობს, – მხრები აიჩეჩა ანდერჰილმა.

– ეს ინტუიცია არ არის, – თითქმის თავაზიანად შეუსწორა კურ-  
ცმა, – ეს ტელეპათიაა.

– ამით რისი თქმა გასურთ?

– ცხადია, დაბალი დონის. თუმცა, დაეჭვების საფუძველი არ არ-  
სებობს. ადამიანი რაღაცას გრძნობს, რისთვისაც ვერც სახელი მო-  
უძებნია, ვერც – ახსნა. რამდენიმე საათის შემდეგ ეს უნარი სრულად  
ვლინდება. ჩვენი რუხი მეგობრები ტელეპათები არიან და ამას, რო-  
გორც ჩანს, სოკოსავით ავრცელებენ.

– მაგათი დედაც! .. – ჩაიჩურჩულა ოუენ ანდერჰილმა.

კურცი გაჩუმდა. ახლა იგი ანდერჰილს აკვირდებოდა. უყვარდა  
ჩაფიქრებული ადამიანების ყურება, ცხადია, თუკი მათ ფიქრის უნა-  
რი შესწევდათ. მაგრამ ამჯერად რაღაც სხვა იყო: მას ოუენის აზრე-  
ბი ესმოდა – სუსტი, მაგრამ მკაფიო ხმა, როგორც ოკეანის სუნთქვა  
ნიჟარაში.

– სოკო სწრაფად ილუპება გარემოში, – თქვა ოუენმა, – ეს მათ-  
ზეც ცუდად მოქმედებს. რას იტყვი ექსტრასენსორულ აღქმაზე?

– ამაზე ლაპარაკი ადრეა. მაგრამ თუ ეს უნარი სამუდამოდ რჩება  
და უფრო მეტიც, თუ ამ სალექარის გარეთაც ვრცელდება, სადაც ახ-  
ლა ვიმყოფებით, ვითარება ძირფესვიანად შეიცვლება. ხვდებით  
ამას?

ანდერჰილი ხვდებოდა.

– ვერ ვიჯერებ, – თქვა მან.

– ახლა მე მანქანაზე ვფიქრობ, – თქვა მოულოდნელად კურცმა,  
– აბა, რომელ მანქანაზე?

ოუენმა მას შეხედა. ალბათ იმის დადგენა სურდა, მოსაუბრე ხომ არ ხუმრობსო, მაგრამ კურცის სერიოზული სახის დანახვაზე თავი გადააქნია.

– საიდან უნდა... – იგი შეყოვნდა, – „ფიატზე“.

– სინამდვილეში – „ფერარიზე“. ახლა ნაყინზე ვფიქრობ. რომელ...

– ფსტიანზე.

– სწორია.

ოუენი ცოტა ხნით გაჩუმდა, შემდეგ კი გაუბედავად ჰკითხა კურცს, – ჩემი ძმის სახელს თუ მეტყვიო.

– კელოგი, – დაუფიქრებლად მიუგო კურცმა, – ღმერთო ჩემო, ოუენ, ეს რა სახელია ბიჭისთვის?

– დედაჩემის გვარია გათხოვებამდე. ო-ო ღმერთო, ტელეპათია!

– წარმომიდგენია, რა დღეში ჩაცვივდებიან „რისკის“<sup>90</sup> ან „ვის უნდა გახდეს მილიონერის“<sup>91</sup> მომწყოებში, თუ ეს მთელ ქვეყანაში გავრცელდება?

გვერდით მდებარე შენობიდან გასროლა და ყვირილი გაისმა.

– ეს არ უნდა გაგვეკეთებინათ! – ყვიროდა ვილაც, რომლის ხმა-შიც შიში და აღშფოთება იგრძნობოდა, – ამის უფლება არ გქონდათ! ისინი დაელოდნენ. ხმაური მიწყნარდა.

– რუხი კაცუნების სხეულების დადასტურებული რაოდენობა ოთხმოცდაერთია, – თქვა კურცმა, – თუმცა, ალბათ, მეტნი არიან. ძირს ჩამოვარდნისთანავე გახრწნას იწყებენ. მათგან არაფერი რჩება, მხოლოდ ლორწო... შემდეგ კი – სოკო.

---

<sup>90</sup> სატელევიზიო თამაში-ვიქტორინა, აშშ.

<sup>91</sup> სატელევიზიო თამაში-ვიქტორინა, აშშ.

– მთელ ზონაში?

კურცმა თავი დააქნია.

– წარმოიდგინეთ ისარი, რომელიც დასავლეთს გვიჩვენებს, მეორე ბოლო – „ცისფერ ბიჭს“. ჩვენ ახლა დაახლოებით ამ ისრის ცენტრში ვართ. აქედან აღმოსავლეთით რუხების სექტის კიდევ რამდენიმე არალეგალი დახეტილებს. სასიგნალო შუქი, ძირითადად, ისრის ბოლოში ჩნდება. უცხოპლანეტელთა საგზაო პატრული.

– და ეს ყველაფერი ჰაერში უნდა ავწიოთ, არა? – იკითხა ოუენმა,  
– არა მარტო რუხი კაცუნები, ხომალდი და სასიგნალო შუქი, არამედ მთელი ეს დედანატირები გეოგრაფია?

– ამაზე სალაპარაკოდ ჯერ მზად არ ვარ, – მიუგო კურცმა.

არა, ცხადია, ჯერ მზად არ ხარ, – გაიფიქრა ოუენმა და მაშინვე თავში გაჰკრა, ვაითუ, კურცმა ჩემი აზრები წაიკითხოსო. მაგრამ უსიცოცხლო თვალეში ვერაფერი შეატყო.

– მხოლოდ იმის თქმა შემიძლია, რომ დარჩენილი რუხი კაცუნების განადგურებასაც ვაპირებთ. საბრძოლო ვერტმფრენებში მხოლოდ თქვენი ხალხი ჩაჯდება. მხოლოდ და მხოლოდ თქვენი ხალხი. დაიმახსოვრეთ მოსახმობი სახელი – „ცისფერი ბიჭების ლიდერი“. გასაგებია?

– დიახ, სერ.

კურცმა არ შეუსწორა. ამ კონტექსტში, მისიისადმი ანდერჰილის ზიზლის გათვალისწინებით, მიმართვა „სერ“, არც ისე ცუდად ჟღერდა.

– მე „ცისფერი ერთი“ ვარ.

ოუენმა თავი დაუქნია.

კურცი წამოდგა და ჯიბის საათი ამოიღო. ისრები თორმეტს უჩვენებდა.

– ამ ყველაფრის დამალვას ვერ მოვახერხებთ, – თქვა ანდერჰილმა, – ზონაში ძალზე ბევრი ამერიკელია. რამდენი არიან... ეს იმპლანტები?

კურცს კინალამ გაელიმა. ჰო, ეს სინდიოფალები. საკმაოდ ბევრნი არიან. წლების განმავლობაში მათი რაოდენობა იზრდება. ანდერჰილმა ეს არ იცოდა, სამაგიეროდ, კურცმა იცოდა. საზიზლარი პატარა არსებები! ბოსის როლში ყოფნას ერთი უდავო უპირატესობას ჰქონდა: სურვილის შემთხვევაში, შეგეძლოთ შეკითხვაზე არ გეპასუხათ.

– ყველაფერი, რაც მერე მოხდება, პოლიტიქნოლოგიების საქმეა, – თქვა მან, – ჩვენი სამუშაო იმაზე რეაგირებაა, რაც კონკრეტულმა პიროვნებებმა შეერთებული შტატების მოსახლეობისთვის აშკარა და რეალურ საფრთხედ მიიჩნიეს, ერთ-ერთი მათგანის ხმა, შესაძლოა, ფირზეც გაქვთ ჩაწერილი. გასაგებია, ჯარისკაცო?

ანდერჰილმა მას უსიცოცხლო თვალებში შეხედა და მზერა აარიდა.

– და კიდევ ერთი, – დაამატა კურცმა, – პუუკა თუ გახსოვთ?

– ირლანდიელების ცხენი-მოჩვენება?

– რაღაც ამის მსგავსი. როდესაც საქმე ჯაგლაგებს ეხება, იცოდეთ, რომ ისინი ჩემია. და ყოველთვის ჩემი იყო. ვილაც-ვილაცებს ბოსნიაში უნახავთ, როგორ დააჭენებდით ჩემს პუუკას. ეს სიმართლეა?

ოუენმა გადაწყვიტა, არ ეპასუხა. კურცს ეს არ სწყენია. მხოლოდ უფრო დაჟინებით მიაჩერდა მას.

– ამის გამეორებას არ დავუშვებ, ოუენ. დუმილი ოქროა. როდესაც პუუკას მოვაჯდებით, უხილავნი უნდა გავხდეთ. გასაგებია?

– დიახ.

– ყველაფერი გასაგებია?

– დიახ, – მიუგო ოუენმა. მას კვლავაც აინტერესებდა, რა დონეზე შეეძლო კურცს მისი აზრების წაკითხვა. თვითონ მხოლოდ სახელწოდება გაარჩია, რომელიც კურცს ლამის შუბლზე ეწერა. როგორც ჩანს, განზრახ. ბოსანსკი-ნოვი<sup>92</sup>.

---

<sup>92</sup> დღევანდელი ნოვი-გრადი. ქალაქს ბოსანსკი-ნოვი ბოსნიის ომამდე ერქვა

ისინი გასამგზავრებლად მზად იყვნენ: ოუენ ანდერჰილის მებრძოლები ოთხ სამხედრო ვერტიკალურ ფორსირებაში იხსდნენ. მათ ეგა-ს ბიჭები ჩაანაცვლეს, რომლებმაც ჩრ-47-ები გზაზე დასვეს. უკვე აფრენას აპირებდნენ, იქაურობა ძრავების გუგუნს გაეყრებინა, როდესაც კურცმა შეჩერება უბრძანა. ოუენმა ბრძანება ხელქვეითებს გადასცა, პატარა ბერკეტი მარცხნივ გადასწია და კურცთან პირდაპირი კავშირის სიხშირეზე აღმოჩნდა.

– ბოდიში მომითხოვია და, რა ჯანდაბა ხდება? – იკითხა ოუენმა. თუ ეს უნდა გაეკეთებინათ, ერჩინათ, დროულად დაეწყათ და დაესრულებინათ. თუმცა, ეს ბოსანსკი-ნოვიზე უარესი იყო. ყველაფერი ფეხებზე დაეკიდებინა? იმიტომ, რომ კურცმა უთხრა, რუხი კაცუნები ადამიანები არ არიანო? არა, ასე ვერ მოიქცეოდა. არსებები, რომლებმაც „ცისფერი ბიჭი“ ააწყვეს და მათთან მოფრენა შეძლეს, ადამიანებს აღემატებოდნენ.

– ეს ჩემი ხუშტური არაა, ბიჭუნი, – უთხრა კურცმა, – ბანგორელი სინოპტიკოსები ამბობენ, რომ ის დამპალი ძალიან სწრაფად გვიანხლოვდება. ქარიშხალია, „ალბერტ კლიპერს“ ეძახიან. ნახევარ საათში, მაქსიმუმ ორმოცდახუთ წუთში დაგვატყდება თავს. იმის გათვალისწინებით, რომ სანავიგაციო ხელსაწყოები არ მუშაობს, თუ შეგვიძლია, – და ჩვენ ეს შეგვიძლია, – აჯობებს დაველოდოთ. მერე მადლობასაც მეტყვი.

ეჭვი მეპარება, ბოს.

– მიღება, მიღება, – მან პატარა ბერკეტი მარჯვნივ გადასწია, – კონკლინ.

ამ დავალების შესრულებისას, განსაკუთრებით რადიოგადამცემებით საუბრისას, ყოველგვარი სამხედრო წოდების ხსენება იკრძალებოდა.

– აქ ვარ... აქ ვარ.

– ყველას გადაეცი, რომ ოცდაათი-ორმოცდახუთი წუთით უნდა შევეყოვნდეთ. ვიმეორებ: ოცდაათი-ორმოცდახუთი წუთი.

– მიღებულია. ოცდაათი-ორმოცდახუთი წუთი.

– იქნებ მუსიკა დაგეკრა.

– კარგი. რას შეუკვეთავთ?

– შენს გემოვნებას ვენდობი. ოღონდ „გუნდის ჰიმნი“<sup>93</sup> არ გინდა.

– გასაგებია, „გუნდის ჰიმნი“ გამოირიცხა.

კონკლინის ხმაში ლიმილის ნასახიც არ იგრძნობოდა. ის ერთადერთი იყო, ვისაც მომხდარი ოუენივით არ სიამოვნებდა. ცხადია, ბოსანსკი-ნოვის ოპერაციაში, 95-ში, კონკლინიც მონაწილეობდა. თავზე გაკეთებულ ყურსასმენებში „პერლ ჯემის“ ჯაგიჯუგი ჩაესმოდა, მოისხნა და კისერზე ჩამოიკიდა. „პერლ ჯემი“ გულზე არ ეხატებოდა, მაგრამ წინ გაცილებით უარესი ელოდათ.

არჩი პერლმუტერი და მისი ხალხი აქეთ-იქით თავწაწყვეტილი ქათმებივით აწყდებოდნენ, ხან სამხედრო სალამს იძლეოდნენ, მაგრამ ხელი საფეთქელთანაც არ ჰქონდათ მიტანილი, რომ მაშინვე ძირს უშვებდნენ, თან შეფარვით, შიშით შესცქეროდნენ პატარა, მწვანე ფერის სადაზვერვო ვერტმფრენს, რომელშიც კურცი იჯდა: მას გადამცემი თავზე მოერგო, სახეს „დერი ნიუსის“ ბოლო ნომერი უფარავდა. ჩანდა, თითქოს კითხვით იყო გართული, მაგრამ ოუენი რატომღაც გრძნობდა, რომ იგი ყველა იმ ჯარისკაცს ხედავდა, რომელსაც დავიწყებოდა, რომ საგანგებო ვითარებაში იმყოფებოდნენ და სამხედრო კოდექსის მიხედვით უნდა ემოქმედათ. კურცის გვერდით ფრედი ჯონსონი იჯდა. იგი მუდამ თან ახლდა მას, იმ დროიდან მოყოლებული, რაც ნოეს კიდობანი არარატის მთაზე აღმოჩნდა. ბოსანსკიშიც იყო და ეჭვი არ ეპარებოდა, რომ წვრილად მოახსენებდა იქ მომხდარის შესახებ ზურგში ჩარჩენილ კურცს – ამ უკანასკნელმა საზარდულის ტკივილის გამო თავის საყვარელ პუუკაზე ამხედრება ვერ შეძლო.

---

<sup>93</sup> „როლინგ სტოუნზი“ ასრულებს.

1995 წლის ივნისში სამხედრო ავიაციამ აკრძალულ საფრენ ზონაში, ხორვატიის საზღვართან, NATO-ს მზვერავი თვითმფრინავი დაკარგა. სერბებმა ერთი ამბავი ატეხეს კაპიტან ტომი კალაჰენის თვითმფრინავის გამო. თვით კალაჰენიც რომ ხელში ჩაეგდოთ, უფრო დიდ საჩვენებელ სპექტაკლს გამართავდნენ. მთავრობის წარმომადგენლებს ჯერაც თვალწინ ედგათ ჩრდილოვიეტნამური კომმარები, როცა მოწინააღმდეგეს ტვინგამორეცხილი მფრინავები საერთაშორისო პრესის წინაშე სისტემატურად და დაუფარავი ღვარძლით გამოჰყავდა, დღედაღამ გაიძახოდნენ, სამხედროების უმთავრესი მოვალეობა ტომი კალაჰენის დაბრუნება არისო.

ძალისხმევის მიუხედავად, მფრინავის კვალს ვერსად მიაგნეს და, ის იყო, უფროსობას მაძებარი ჯგუფებისთვის უკან დაბრუნება უნდა ებრძანებინა, რომ კალაჰენი თვითონ დაუკავშირდა თავისიანებს დაბალსიხშირიან დიაპაზონზე. მისმა სკოლის მეგობარმა გოგონამ მათ ტომის ძველი მეტსახელი შეატყობინა. ცხადია, ესეც სცადეს. მოულოდნელად, მათ კალაჰენი გამოეხმაურა, თან დაამატა, რომ მეგობრებმა პურჭყია გამოსაშვები კლასის დაუფიწყარ წვეულებაზე შეარქვეს, როდესაც სმაში საკუთარი შესაძლებლობები გადაჭარბებით შეაფასა.

კურცის ბიჭები მისკენ ორი ვერტიკალურით გაემართნენ, გაცილებით პატარებით, ვიდრე დღეს უნდა გამოეყენებინათ. ოპერაციას ხელმძღვანელობდა ოუენ ანდერჰილი, რომელსაც ბევრი (თვითონაც ასე ფიქრობდა) კურცის მემკვიდრედ მიიჩნევდა, კალაჰენს უბრძანეს, რომ მათი მიახლოებისას კოცონი დაენთო და დალოდებოდა. ანდერჰილს დავალებული ჰქონდა, კალაჰენი ისე წამოეყვანა, – პუუკაზე შეესვა, – რომ ამის შესახებ ვერავის გაეგო. ოუენის გადმოსახედიდან, ეს აუცილებელი არ იყო, მაგრამ კურცს ასე სურდა: მისი მებრძოლები უჩინარ ირლანდიურ ცხენზე შემომსხდარი უხილავი მხედრები უნდა ყოფილიყვნენ.

თავდაპირველად, მისია წარმატებით მიმდინარეობდა. მართალია, ვერტიმფრენებს „მიწა-ჰაერის“ ტიპის რამდენიმე რაკეტა ესროლეს, მაგრამ ძალზე არაზუსტად – მილოშევიჩის<sup>94</sup> ჯარისკაცებისგან მეტი არც იყო მოსალოდნელი. როდესაც კალაჰენი ბორტზე აიყვანეს, ოუენმა რამდენიმე ბოსნიელს მოჰკრა თვალი – ხუთ თუ ექვს ბავშვს, რომელთაგან უფროსი მხოლოდ ათი წლის იქნებოდა, შეშინებული შესცქეროდნენ ამერიკელებს. კურცის ბრძანებით, ყველა მოწმე უნდა გაენადგურებინათ, მაგრამ ოუენს აზრად არ მოსვლია, სახემოთხუპნილი ბავშვები მოწმეებად ჩაეთვალა. კურცს ეს ფაქტი მისთვის არასდროს შეუხსენებია.

დღემდე.

ოუენს კურცი საშინელ ადამიანად მიაჩნდა. ამაში ეჭვი არ ეპარებოდა. მაგრამ არმიაში მისნაირები ცოტანი როდი იყვნენ, უფრო – ეშმაკის მოციქულები, ვიდრე წმინდანები, და ამასთან გასაიდუმლოების დიდი მოყვარულები. ოუენმა ზუსტად არც იცოდა, რით განსხვავდებოდა მათგან მაღალი და მელანქოლიური კურცი თავისი თეთრი წამწამებითა და უძრავი თვალებით. იმ თვალებს ძნელად თუ გაუსწორებდა მზერას კაცი, ისინი არც სიყვარულს გამოხატავდა, არც – მხიარულებას და არც – ცნობისმოყვარეობას. ეს უკანასკნელი ოუენისთვის ყველაზე უარესი იყო.

მაღაზიასთან შელახული „სუბარუ“ გაჩერდა და იქიდან ფრთხილად გადმოვიდა ორი მოხუცი. ერთს ქარისგან აქერცლილ ხელში შავი ხელჯოხი ეჭირა. წითელი და შავი უჯრედებით გაწყობილი სამონადირეო ქურთუკები ეცვათ, გახუნებული კეპები ეხურათ. წინაფრაზე ერთ-ერთ მათგანს თეთრი ასოებით CASE ეწერა, მეორეს – DEER. ისინი გაოცებით შესცქეროდნენ ჯარისკაცებს, რომლებიც მათკენ მირბოდნენ. ჯარისკაცები გოსლინის მაღაზიაში? ეს რა უბე-

---

<sup>94</sup> სერბეთისა და იუგოსლავიის პრეზიდენტი. 2006 წელს ჰააგის ციხეში გარდაიცვალა.



დურებაა? ოთხმოც წელს მიღწეულ მოხუცებს სწორედ ცნობისმოყვარეობა კლავდათ, რაც ასე აკლდა კურცს და რაც ასე ადვილი შესამჩნევი იყო გვერდზე გადახრილი თავისა და გაფართოებული თვალების მიხედვით.

ყველა შეკითხვა, რომელიც კურცს არ დაუსვამს: რა უნდათ? ტკივილის მოყენება? იქნებ, ჩვენთვის საზიანოდ ვიქცევით? იქნებ, ქარს ვთესავთ, და ქარიშხალს მოვიმკით? ნუთუ მართალია, რომ ყველა უწინდელმა კონტაქტმა – რუხმა კაცუნებმა, სასიგნალო შუქმა, ციდან ანგელოზების თმისა და წითელი მტვრის ჩამოცვენამ, სამოციანი წლების ბოლოდან დედამიწელების გატაცებამ, მათ მიმართ დაუძლეველი შიში ჩაგვინერგა? თუ ყოფილა ამ ქმნილებებთან რაიმე სახის კავშირის დამყარების მცდელობა?

და ბოლო, მთავარი შეკითხვა: ეს რუხი კაცუნები ჩვენ ხომ არ გვგვანან? იქნებ, არიან კიდევ ადამიანები? იყო თუ არა ეს მკვლელობა, ჩვეულებრივი, აშკარა მკვლელობა?

კურცის თვალებში მსგავსი არაფერი იკითხებოდა.

## 5

თოვამ იკლო, გამოიდარა და საბრძოლო მზადყოფნის გაუქმებიდან ზუსტად ოცდაცამეტი წუთის შემდეგ კურცმა აფრენის ბრძანება გასცა. ოუენი კონკლინს დაუკავშირდა და „ჩინების“<sup>95</sup> ძრავები კვლავ აგუგუნდა. მათ მიწიდან თოვლის თხელი საბურველი აიტაცეს და მბრწყინავ მოჩვენებებად იქცნენ. ხის კენწეროებს რომ ასცდნენ, ანდერჰილის ვერტმფრენს მიჰბაძეს და დასავლეთისკენ, კინოსკენ აიღეს გეზი. ქვემოთ და ოდნავ მარჯვნივ კურცის „კაიოვა-58“<sup>96</sup> მიფრინავდა. ამან ოუენს მოულოდნელად ჯონ უეინის ძველი ფილმი გაახსენა: „ლურჯი მუნდირები“ მზვერავ ინდიელს ტყეში მის-

<sup>95</sup> სამხედრო ვერტმფრენის სახეობა.

<sup>96</sup> სამხედრო ვერტმფრენის სახეობა.

დევენ, ის უუნაგრო, ფაფარგაწეწილ პონიზე ამხედრებულა. მართალია, კურცს ვერ ხედავდა, მაგრამ სჯეროდა, რომ ის კვლავ გაზეთს კითხულობდა. იქნებ, საკუთარ ჰოროსკოპსაც კი – „თევზებო, დღეს თქვენი შერცხვენის დღეა. აჯობებს, ლოგინში დარჩეთ“.

მათ ქვემოთ თეთრ ორთქლში გახვეული ფიჭვები და ნაძვები ხან ჩნდებოდა, ხანაც ქრებოდა. მოცეკვავე ფიჭვები „ჩინების“ საქარე მინებს ეჯახებოდა და უჩინარდებოდა. ფრენა ექსტრემალურ პირობებში მიმდინარეობდა, – ადამიანები თითქოს სარეცხი მანქანის ცენტრიფუგაში ტრიალებდნენ, – მაგრამ ოუენს ახლა მეტი არც არაფერი უნდოდა. მან თავზე გაკეთებული გადამცემი კარგად მოირგო. რომელიღაც სხვა ჯგუფი უკრავდა, „მატჩბოქს თვენთის“<sup>97</sup> ჰგავდა, მაგრამ „პერლ ჯემს“<sup>98</sup> მაინც სჯობდა. თუ რამის ეშინოდა, ეს „გუნდის ჰიმნი“ იყო. თუმცა იმასაც მოუსმენდა. დიახ, მართლა მოუსმენდა.

კვლავ და კვლავ ეფლობოდნენ დაბლა მცურავ ღრუბლებში, ამოყვინთავდნენ და უსასრულოდ გადაჭიმული ტყის თავზე მისრიანებდნენ დასავლეთით, დასავლეთით, დასავლეთით...

– ვიძახებ „ცისფერ ლიდერბიჭს“, მე „ცისფერი ორი“ ვარ.

– მიღებაზე გადავდივარ, ორიანო.

– ვიზუალური კონტაქტი „ცისფერ ბიჭთან“. ადასტურებთ?

ოუენმა უკვე წამის შემდეგ შეძლო დადასტურება. ნანახმა სუნთქვა შეუკრა. ერთია ფოტოსურათი, რომელზეც გამოსახულება მკაფიოდ მოჩანს, საგანი, რომლის ხელში დაჭერაც შეგიძლია, და სულ სხვაა...

– ვადასტურებ, ორიანო. „ცისფერო ჯგუფო“, მე „ცისფერი ლიდერბიჭი“ ვარ. გიბრძანებთ, ჰაერში დაეკიდოთ. ვიმეორებ – გიბრძანებთ, ჰაერში დაეკიდოთ.

ყველა ვერტმფრენი ერთიმეორეზე მიყოლებით ადასტურებდა

<sup>97</sup> ამერიკული როკბენდი.

<sup>98</sup> ამერიკული როკბენდი სიეტლიდან.

ბრძანების შესრულებას. ყველა, კურცის გარდა, თუმცა ისიც ჰაერში ეკიდა. „ჩინუკები“ და „კაიოვა“ დაახლოებით სამი მეოთხედი მილის მანძილზე იმყოფებოდნენ ჩამოვარდნილი კოსმოსური ხომალდისგან, რომელსაც ერთი მხრიდან ძალზე განიერი განაკაფი ზოლი ესაზღვრებოდა, თითქოს გიგანტურ ხისმჭრელს უზარმაზარი ხეები ერთი მოსმით მიეწვინა. ზოლის ბოლოში ჭაობი მოჩანდა. გამშრალი ვარჯები გამოხუნებულ ცას ებლაუჭებოდნენ და ღრუბლების მოგლეჯას ცდილობდნენ. იქაურობა დნობაშეპარულ თოვლის ზიგზაგებს დაელარა და ნაპირებში, იქ, სადაც თოვლი სველ ნიადაგს შეეწოვა, ყვითლად შეფერილიყო. მათ შორის შავი წყლის ვენები და კაპილარები მიიკლაკნებოდა.

უზარმაზარი ხომალდი, დაახლოებით ერთი მილი დიამეტრის ნაცრისფერი თევში, შუაგულ ჭაობში ჩამოვარდნილიყო, უსიცოცხლო ხეებს დასცემოდა, დაელეწა და აქეთ-იქით ნაფოტების გროვებად მიეყარ-მოეყარა. ცალი გვერდი მერყევ, წყალნარევ ნიადაგში ჩაჰფლობოდა და გლუვ ზედაპირზე ტალახი და ტოტები მიჰკვროდა.

მის სიახლოვეს გადარჩენილი რუხი კაცუნები შეჯგუფულიყვნენ. უმრავლესობა თოვლიან კოლბოხებზე იდგა ხომალდის აყირავებული გვერდის ჩრდილში – როგორც ჩანს, მზის პირდაპირ სხივებს თავს არიდებდნენ.

ზოგიერთი ადამიანი ჩამოვარდნილ ხომალდს გაცილებით საშიშტროას ცხენთან აიგივებდა, მაგრამ ოუენის აზრით, ამ შიშველი და უიარალო არსებების მხრიდან განსაკუთებული საფრთხე არ ემუქრებოდათ. კურცი ამბობდა, რომ ისინი ასამდე იყვნენ, სინამდვილეში კი გაცილებით ცოტანი აღმოჩნდნენ. ოუენის ვარაუდით – სამოცამდე. ათიოდე მათგანი თოვლიან ბექობზე იწვა. მოწითალო ფერი დასდებოდათ, თუმცა გახრწნის სხვადასხვა სტადიაზე იმყოფებოდნენ. ზოგიერთი პირქვე ეგდო თავთხელ შავ წყალში. თოვლში აქა-იქ ეგრეთ წოდებული რიპლის სოკოს ლაქები ხასხასებდა. მართალია, მათ ნაწილს უკვე განაცრისფრება დაეწყო სიცივის, ატმოსფეროს ან

ორივეს გავლენით. არა, ისინი აქ ვერ გადარჩებოდნენ – ვერც რუხი კაცუნები და ვერც მათ მიერ მოტანილი სოკო.

ნუთუ ამ რაღაცას გავრცელება შეეძლო? ოუენს ამის ნაკლებად სჯეროდა.

– ვიძახებ „ცისფერ ლიდერბიჭს“! – აქ ხარ, ყმაწვილო?

– აქ ვარ, მოკეტე ერთი წუთით.

ოუენი წინ გადაიხარა, მფრინავს (ტონი ეღვარდს, კარგ ტიპს) იდაყვზე შეეხო და რადიო საერთო არხზე გადართო. ამ დროს სულ აღარ გახსენებია კურცის სიტყვები ბოსანსკი-ნოვის შესახებ, არც იმაზე დაფიქრებულა, რომ საბედისწერო შეცდომას უშვებდა და სათანადოდ ვერ აფასებდა კურცის შეურაცხადობის დონეს. ფიქრობდა კი საერთოდ რამეზე? უბრალოდ, ის გააკეთა, რაც საჭიროდ მიიჩნია. ასე დაასკვნა მოგვიანებით, როდესაც არაერთხელ დაუბრუნდა იმდღევანდელ ფიქრებს და მომხდარ ამბავს. გადამრთველის ერთადერთი გატკაცუნება, რომელმაც ადამიანის ცხოვრება შეცვალა.

აი. ისიც, მკაფიოდ, გარკვევით მჟღერი ხმა. კურცის პირტიტველა ბიჭები მას ვერაფრით ამოიცნობდნენ. მათ იცოდნენ, ვინ იყო ედი ვედერი<sup>99</sup>, მაგრამ უოლტერ კრონკაიტის შესახებ არაფერი სმენოდათ.

– ...არაფერია. Il n'y pas d'infection იცი.

ორწამიანი პაუზა და შემდეგ, სავარაუდოდ, ბარბრა სორეიზანდის<sup>100</sup> ხმა:

„ას ცამეტი. ას ჩვიდმეტი. ას ცხრამეტი“.

ოუენმა დაასკვნა, რომ მათ ათვლა ერთიდან დაიწყეს და სანამ გოსლინის მაღაზიისკენ მიემართებოდნენ, ასსაც გადასცდნენ.

„ჩვენ ვკვდებით, – თქვა ბარბარა სორეიზანდის ხმამ, – On se meurt, on creve“.

<sup>99</sup> ამერიკელი მომღერალი, კომპოზიტორი.

<sup>100</sup> ამერიკელი მსახიობი, მომღერალი.

შემდეგ კვლავ პაუზა და დევიდ ლეტერმენი<sup>101</sup>:

„ას ოცდაშვიდი. ას...“

– შეწყვიტეთ! – შეჰყვირა კურცმა. ამდენი წელია, ერთად მოდი-  
ოდნენ, მაგრამ ოუენს იგი გაბრაზებული არასდროს ენახა. ძლიერ  
აღელვებული ჩანდა, – ოუენ, რატომ უნაგვიანებ ყურებს ჩემს ბი-  
ჭებს მაგ სისაძაგლით? მიპასუხე! დაუყოვნებლივ მიპასუხე!

– მინდოდა გამეგო, რამე ხომ არ შეიცვალა, ბოს, – მიუგო ოუენ-  
მა. ეს აშკარა სიცრუე იყო. კურცმა, ცხადია, ეს იცოდა და ადრე თუ  
გვიან, პასუხს მოსთხოვდა. იგი კვლავ მის წინააღმდეგ წავიდა, რო-  
გორც მაშინ, როდესაც ბოსნიელ ბავშვებს არ ესროლა, ოღონდ, ახ-  
ლა საქმეს ცუდი, გაცილებით ცუდი პირი უჩანდა. ოუენს ეს სულ არ  
ანაღვლებდა. ჯანდაბას პუუკა ცხენი. თუ ამის გაკეთებას აპირებენ,  
დაე, კურცის ბიჭებმა („დარტყმა ციდან“ – ბოსნიაში, „ცისფერი ჯგუ-  
ფი“ – აქ, ახალი კოდური სახელწოდება მომავალში და ახალგაზრდე-  
ბის მუდამ სასტიკი სახეები) უკანასკნელად მოუსმინონ რუხ კაცუ-  
ნებს. სხვა ვარსკვლავური სისტემიდან, სხვა სამყაროდან თუ დროის  
ნაკადიდან მოსულმა გადამთიელებმა იმდენი რამ იცოდნენ, რომ მათ  
პატრონებს ამის წარმოდგენაც კი გაუჭირდებოდათ (თუმცა კურცს  
ეს, ალბათ, არ ადარდებდა). „პერლ ჯემს“, „ჯარ ოვ ფლაიზსა“ და  
სხვა ნაგავს კი არ მოუსმინონ, არამედ რუხი კაცუნების მოწოდებებს  
ადამიანური ბუნების საუკეთესო თვისებების გამოსავლენად, რისიც  
მათ გულუბრყვილოდ სჯეროდათ.

– მერედა შეიცვალა რამე? – კურცის ხმას თან ტკაცატკუცი ახ-  
ლდა. მწვანე „კაიოვა“ კვლავ დიდი ვერტიფრენების ქვეშ, ბებერი,  
მაღალი ნაძვის თავზე ეკიდა, რომლის კენწეროსაც მისი პროპელე-  
რები აქეთ-იქით არწევდა, – რას იტყვი, ოუენ?

– არა, – თქვა მან, – ოდნავადაც არა, ბოს.

– თუ ასეა, ეგ ლაქლაქი აღარ გამაგონო. არ დაგავიწყდეს, მალე  
ჩამობნელდება.

---

<sup>101</sup> ამერიკელი კომიკოსი, პოპულარული ტელეშოუს წამყვანი.

ხანმოკლე პაუზის შემდეგ ოუენმა ხაზგასმული აუჩქარებლობით უპასუხა:

– დიახ, სერ.

## 6

კურცი „კაიოვას“ მარჯვენა სავარძელში გაჭიმულიყო სარგადაყლაპულივით, – როგორც წიგნებსა და ფილმებში ამბობენ. მიუხედავად იმისა, რომ მოლრუბლული დღე იდგა, მზის სათვალე ეკეთა, მაგრამ ფრედი, მისი მფრინავი, მაინც მხოლოდ ცერად თუ გაბედავდა ხოლმე შეხედვას. ჯაზმენებისა და მაფიოზებისთვის დამახასიათებელი ფართო და წაგრძელებული სათვალის შუშები სახის ნახევარს უფარავდა და შეუძლებელი იყო იმის თქმა, თუ საით იყურებოდა ბოსი. თავის მიმართულების მიხედვით ვერაფერს დაასკვნიდით.

კურცს მუხლებზე „დერი ნიუსი“ ელო (იდუმალი ნათება ცაზე, დაკარგული მონადირეები, პანიკა ჯეფერსონტრექტზე – ეწერა პირველ გვერდზე). მან გაზეთი აიღო და აკურატულად შეუდგა მის დაკეცვას. ეს კარგად ეხერხებოდა – მალე „დერი ნიუსი“ კლოუნის სამკუთხა ქუდად იქცა. ოუენ ანდერჰილის კარიერასაც იგივე ელოდა. მას, ალბათ, ეგონა, რომ კურცი დისციპლინარულ სასჯელს აკმარებდა, რადგან ეს საიდუმლო მისია იყო, და ერთ შანსს კიდევ მისცემდა. მაგრამ ვერ ხვდებოდა (და ეს, შესაძლოა, კარგიც იყო – ვინც გაფრთხილებული არაა, ის შეიარაღებულიც არ არის), რომ მეორე შანსით უკვე ისარგებლა. ეს ერთით მეტი იყო იმაზე, რასაც კურცი, ჩვეულებრივ, ჯარისკაცებს აძლევდა და რასაც, ახლა ნანობდა. მწარედ ნანობდა. რას წარმოიდგენდა, თუ გოსლინის ოფისში მათი საუბრის შემდეგ, იგი ასეთ რამეს იკისრებდა... განსაკუთრებით მკაცრი გაფრთხილების შემდეგ...

– ვინ გასცემს ბრძანებას? – ტკაცატკუცით შემოიჭრა ანდერჰილის ხმა კურცის პირად, სამეთაურო ხაზზე.

კურცი გააკვირვა და ცოტა შეაშფოთა კიდეც თავისმა მრისხანე-ბამ. უმეტესწილად, ეს მაინც გაცეებით – პირველი ბავშვური ემოციით უფრო იყო გამოწვეული. ხმამაღალი კავშირის ჩართვით ოუენმა მას კვანტი დაუდო. თურმე აინტერესებდა, რამე ხომ არ შეიცვალა. თავისი ახსნა-განმარტება კარგად დაახვიოს და უკან შეითხაროს.

ოუენი, შესაძლოა, იყო კიდეც საუკეთესო მეორე კურცის ხანგრძლივი და რთული კარიერის განმავლობაში, რომელიც სამოცდაათიანი წლების პირველ ნახევარში კამბოჯაში დაიწყო, მაგრამ კურცი მაინც აპირებდა მის განადგურებას, რადიოსთან დაკავშირებული ხრიკის გამო. ვინაიდან ოუენმა ჭკუა ვერ ისწავლა. საქმე მხოლოდ ბოსანსკინოველ ბავშვებს, მობურტყუნე ხმებს ან შეხედულებებს კი არ ეხებოდა, არამედ ბრძანებების შეუსრულებლობას. ხაზს. მის ხაზს. კურცის ხაზს.

და კიდეც, ეს სიტყვა, „სერ“.

ეს დაწყევლილი გამალიზიანებელი „სერ“.

– ბოს! – ოუენს ხმაზე ეტყობოდა, რომ ცოტათი ნერვიულობდა, და სწორიც იყო, რომ ნერვიულობდა, ღმერთს ის უყვარდა, – ვინ გასცემს...

– საერთო არხი, ფრედი, – ბრძანა კურცმა, – იქით გადამრთე.

სამხედრო ვერტიფრენებზე მსუბუქ „კაიოვას“ ქარი ეძგერა და მთვრალივით შეაბარბაცა. კურცმა და ფრედიმ ამას ყურადღება არ მიაქციეს. ფრედიმ კურცი საერთო არხზე გადართო.

– მომისმინეთ, ბიჭებო, – დაიწყო კურცმა და ღრუბლებქვეშ დიდი, შუშის ნემსიკლაპიებივით დაკიდებულ ვერტიფრენებს გახედა. წინ ჭაობი და მასში ჩავარდნილი ქაშანურისფერი, უზარმაზარი, აყირავებული თევზი მოჩანდა, რომლის ჩრდილშიც ეკიპაჟის გადარჩენილ წევრებს – თუ ვინც იყვნენ – შეეფარებინათ თავი, – მომისმინეთ, ბიჭებო. ახლა მამამ უნდა გიქადაგოთ. მისმინეთ? მიპასუხეთ.

– დიახ... დიახ... გიდასტურებთ... გისმენთ, – გაისმა ყოველი

მხრიდან. შიგადაშიგ, შემთხვევით, „სერ“-იც გაისმა, მაგრამ კურცმა ამას ყურადღება არ მიაქცია, რადგან წამოცდენასა და თავხედობას შორის დიდი განსხვავება იყო.

– ბიჭებო, მე ორატორი არ ვარ, ლაქლაქი საჩემო საქმე არაა, მაგრამ მინდა გაგაფრთხილოთ, რომ ბრმად ნუ ენდობით საკუთარ თვალსა და ყურს. თქვენ წინაშე სამოცდაათამდე რუხი ფერის, როგორც ჩანს, უსქესო ჰუმანოიდია, რომელიც ჭაობში დედიშობილა დგას, და თქვენ, ანუ ზოგიერთ თქვენგანს, შეუძლია თქვას: „ისინი ხომ საცოდავი, უიარალო, შიშველი არსებები არიან, არც სასქესო ორგანოები აქვთ, გალაქტიკათა შორის მფრინავი, ჩამოვარდნილი ხომალდის ქვეშ შეყუჟულან და შეწყალებას გვთხოვენ. როგორი ძალთაპირი, როგორი ურჩხული უნდა იყოს ადამიანი, რომ ამ საწყალობელი ვედრების მოსმენის შემდეგ ბრძანება შეასრულოს?“ პირდაპირ გეტყვით, ბიჭებო, რომ მე ვარ ეს ძალღი, მე ვარ ეს ურჩხული, მე ვარ ეს პოსტინდუსტრიული, პოსტმოდერნისტული, საიდუმლო, ფაშისტური, პოლიტიკურად არაკორექტული, საზიზღარი ღორი, ომების დამქაში და საძაგელი ტიპი. მადლობა უფალს, მაგრამ ყველასთვის, ვინც მისმენს, მე აბრაჰამ პიტერ კურცი ვარ, აშშ-ის სამხედრო-საჰაერო ძალების გადამდგარი ოფიცერი, პირადი ნომრით 241 771 699, და ოპერაციას ვხელმძღვანელობ, მე ვარ ამ სასაკლავოს ლეიტენანტი კელი<sup>102</sup>, – სული მოითქვა, თან თვალს არ აცილებდა უძრავად დაკიდებულ ვერტიფერენებს, – მაგრამ, ბიჭებო, აქ იმიტომ ვარ, რომ გითხრათ: ეს რუხი კაცუნები ორმოციანი წლების ბოლოდან ცდილობენ ჩვენთან შემოღწევას. მე მათ სამოცდაათიანი წლების დასასრულიდან ვაკვირდები. იცოდეთ, თუ ვინმე ხელბაწეული მოდის და გეუბნებათ, რომ გნებდებათ, ეს სულაც არ ნიშნავს, მადლობა უფალს, რომ უკანალში მთელი პინტა ნიტროგლიცერინი არა აქვს შეტენილი. ჩვენი ხანდაზმული ბრძენი ოქროს

---

<sup>102</sup> ამერიკის არმიის ოფიცერი, 1968 წელს, ვიეტნამის ომის დროს, სოფელ მილაიში მშვიდობიანი მოსახლეობის ულტრაში მონაწილეობდა.



თევზები, რომლებიც საგანგებოდ შექმნილ სააზროვნო აკვარიუმებში დაცურავენ, ამტკიცებენ, რომ ისინი მას შემდეგ გამოჩნდნენ, რაც ატომური და წყალბადის ბომბების აფეთქება დავიწყეთ, და ისე გვეტანებიან, როგორც პეპლები – შუქს. მე მოაზროვნე არ ვარ, ეს არ ვიცი, მაგრამ დაე, სხვებმა იფიქრონ, როგორც ამბობენ, დაე, ბუმ იფიქროს, მას დიდი თავი აქვს. სამაგიეროდ, მხედველობას არ ვუჩივი, ბიჭებო, და გეტყვით, რომ ეს რუხი კაცუნები ნამდვილი ჩათლახები არიან. და ისეთივე უხიფათოები, როგორიც მგელი – ცხვრის ფარაში. ამ წლების განმავლობაში რამდენიმე მათგანი ვიგდეთ ხელთ, მაგრამ ყველა მოკვდა. სიკვდილის შემდეგ ისინი იხრწნებიან და იმ სისაძაგლედ გარდაიქმნებიან, რომელსაც ხედავთ, რასაც რიპლის სოკოს უწოდებენ. ზოგჯერ ფეთქდებიან კიდეც. გესმით? ფეთქდებიან! სოკო კი, რომელიც გადააქვთ, – შესაძლოა, ეს მხოლოდ სოკოს შესაფუთია, ყოველ შემთხვევაში, სააზროვნო აკვარიუმში მოცურავე ზოგიერთი ოქროს თევზი ასე ფიქრობს, – სწრაფად იღუპება, თუ ცოცხალ ორგანიზმზე, გიმეორებთ, თუ ცოცხალ ორგანიზმზე არ მოხვდა. ამისათვის კი საუკეთესო მასალა, მადლობა უფალს, ყველასთვის კარგად ნაცნობი ჰომო საპიენსია. თუკი ერთი ნამცეციც კი შეგეხოთ კანზე, ველარაფერი გიშველით და სულ მალე საიქიოში მოხვდებით.

მთლად ასეც არ იყო საქმე. უფრო სწორად, ნათქვამს სიმართლესთან საერთო არაფერი ჰქონდა, მაგრამ არავინ იბრძვის შეშინებულ ჯარისკაცზე მეტი გაშმაგებით. ეს კურცმა საკუთარი გამოცდილებით იცოდა.

– ბიჭებო, ჩვენი პატარა რუხი ნაცნობები ტელეპათები არიან და, როგორც ჩანს, ამ უნარს ჰაერით გადასცემენ. თუკი სოკოს გადავურჩებით, ტელეპათიას ვერსად გავექცევით. შესაძლოა, სხვისი აზრების წაკითხვა გართობად მოგეჩვენოთ და იფიქროთ, რომ ამ უნარს წარმატებით გამოიყენებთ წვეულებებზე, მაგრამ არც იმას დაგიმა-

ლავთ, საით მიდის ეს გზა – შიზოფრენიისკენ, პარანოიისკენ, რე-  
ალობიდან გაქცევისკენ და სრული, ვიმეორებ, სრული შეშლილო-  
ბისკენ, მაგის დედაც! .. სააზროვნო ცენტრის თევზები – ღმერთმა  
დალოცოს ისინი – დარწმუნებული არიან, რომ ეს ტელეპათია ხან-  
მოკლე დროით მოქმედებს, მაგრამ წარმოიდგინეთ, რა მოხდება, თუ  
ისინი დედამიწაზე ფეხს მოიკიდებენ და სასათბურე პირობებს შეიქ-  
მნიან. ახლა კი, ბიჭებო, ყურადღებით მოისმინეთ, რასაც გეტყვით.  
ისე, თითქოს ამაზე თქვენი სიკვდილ-სიცოცხლე იყოს დამოკიდებუ-  
ლი. როცა ისინი შეგვიპყრობენ, გიმეორებთ, როდესაც ისინი ჩვენ  
შეგვიპყრობენ, – ყველას კარგად მოგესხენებათ გატაცებების შესა-  
ხებ, თუმცა უმრავლესობა, ვინც ამტკიცებს, რომ მათი მსხვერპლი  
გახდა, უკანასკნელი მატყუარაა და მეტი არაფერი, მაგრამ ზოგიერ-  
თი მათგანი სიმართლეს ამბობს, – გადანერგვას გაგვიკეთებენ. შე-  
საძლოა, რაიმე ხელსაწყო ჩაგვინერგონ: გადამცემი ან მონიტორი.  
ზოგჯერ კი ისეც ხდება, რომ ადამიანის სხეულში ცოცხალი არსება  
იბუდებს, ის მას შიგნიდან ჭამს და იზრდება, მერე კი გზას გათხრის  
და გარეთ გამოდის. და ამ ყველაფერს ეს შიშველი, უმანკო ქმნილე-  
ბები სჩადიან, რომლებიც ქვემოთ შეგროვილან. ამტკიცებენ, ჩვენ-  
თან ინფექციის მსგავსი არაფერიაო, მაგრამ ჩვენ ხომ ვიცით, რომ  
ფეხის ფრჩხილიდან თმის ღერამდე სოკო აქვთ მოდებული. მეტი რა  
მინახავს ბოლო ოცდახუთი წლის განმავლობაში. გეუბნებით, ეს  
სწორედ ისაა, შემოსევაა, სუპერთასების სუპერთასია და თქვენ, ბი-  
ჭებო, თავი უნდა დაიცვათ. ისინი სულაც არ არიან უმწეო პატარა  
უცხოპლანეტელები, ბავშვები, რომლებიც ელოდებიან, რომ ვინმე  
„ნიუ-ინგლანდ-ტელის“ სატელეფონო რუკას აჩუქებს, რათა შინ და-  
რეკვა შეძლონ. ისინი – სასიკვდილო დაავადებაა, კიბოა, ღმერთო,  
დაგვიფარე, ჩვენ კი, ბიჭებო – ქიმიოთერაპიის ერთი დიდი რადიაქ-  
ტიული ინიექცია. გესმით ჩემი?

ამჯერად დადასტურება არ მოსულა. არც ერთი „მიღებულია“,

„დიახ, სერ“ და სხვა ამგვარი. მხოლოდ ნერვიული, ადგზნებული, სიძულვილით აღსავსე მოწონების შეძახილები, მოუთმენლობისგან ათრთოლებული ხმები. ეთერი დაძაბულობისგან ლამის გამსკდარიყო.

– კიბო, ბიჭებო, ისინი კიბოა. უკეთესად ვერ აგისხნით. ხომ იცით, ორატორი არ ვარ. ოუენ, თქვენ თუ მიიღეთ შეტყობინება?

– მივიღე, ბოს.

უსიცოცხლოდ. უსიცოცხლოდ და მშვიდად, დალახვროს ეშმაკმა. რა გაეწყობა, ითამაშოს მაგარი ბიჭის როლი. იყოს მაგარი, სანამ შეუძლია. წასულია ოუენ ანდერჰილის საქმე.

კურცმა გაზეთისგან გაკეთებული ქუდი ასწია და აღტაცებით შეათვალიერა. ოუენ ანდერჰილს ველარაფერი გადაარჩინდა.

– რა ხდება ქვევით, ოუენ? რა ტრიალებს ხომალდის გარშემო? რას დაავიწყდა დილით, სახლიდან გამოსვლის წინ, შარვლისა და ფეხსაცმლის ჩაცმა?

– კიბოს, ბოს.

– სწორია. ახლა კი გაეცით ბრძანება – ვიწყებთ. თქვენი სიმღერა ჩართეთ, ოუენ.

კურცმა იცოდა, რომ ვერტმფრენებში მყოფნი მას აკვირდებოდნენ (ცხოვრებაში არასდროს უქადაგია ასე, არასდროს, თანაც ყველაფერი ექსპრომტად თქვა, წინასწარი მომზადების გარეშე), ამიტომ ხაზგასმით ნელა შეიტრიალა კეპი უკან.

## 7

ოუენმა დაინახა, როგორ შეიტრიალა ტონი ედვარდსმა კეპი წინაფრით უკან, გაიგონა, როგორ იღებდნენ ბრაისონი და ბერნიტელი შალითებიდან მსხვილკალიბრიან ტყვიამფრქვევებს, და მიხვდა, რაც ხდებოდა. ცეცხლის გასახსნელად ემზადებოდნენ. შეეძლო, მანქანაში შემხტარიყო და წასულიყო, ან დარჩენილიყო და დალოდებო-

და, როდის ჩამოაგდებდნენ. კურცმა მხოლოდ ეს ორი შესაძლებლობა დაუტოვა.

და ისევ აეკვიატა რაღაც. რაღაც ცუდი, წარსულიდან, ბავშვობიდან, როცა... რამდენი წლის იყო? რვის? შვიდის? იქნებ ნაკლების? თავისი სახლის გაზონზე იდგა, პადუკაში. მამა სამსახურში იყო, დედა სადღაც წასულიყო, შესაძლოა, ბაპტისტების სამლოცველოში, სადაც მუდამ ღვებელების საქველმოქმედო გაყიდვისთვის ემზადებოდნენ (კურცისგან განსხვავებით, რენდი ანდერჰილი ღმერთს გულწრფელად აღიღებდა). მეზობლების, რეიპლოუების კართან სასწრაფო დახმარების მანქანა გაჩერდა. უსირენოდ. მხოლოდ ლურჯი შუქი ციმციმებდა შეშფოთებით. ორი მამაკაცი, ისეთივე კომბინებონებში გამოწყობილი როგორც ახლა ოუენს ეცვა, სახლისკენ გაიქცა და სირბილშივე გაშალა მოელვარე საკაცე. ეს ჯადოსნურ ფოკუსს ჰგავდა.

ათიოდე წუთის შემდეგ ისინი კვლავ გამოჩნდნენ. საკაცეზე მისი რეიპლოუ დაეწვინათ, რომელსაც თვალები დახუჭული ჰქონდა. მათ მისტერ რეიპლოუ გამოჰყვა, კარის დაკეტვა არც კი გახსენებია. იგი ოუენის მამის თანატოლი იყო, მაგრამ მოულოდნელად თვალსა და ხელს შუა დაბერდა. კიდევ ერთი ჯადოსნური ფოკუსი. სანამ კომბინებონიანი მამაკაცები მის ცოლს მანქანაში ათავსებდნენ, მისტერ რეიპლოუმ თავი მიაბრუნა და გაზონზე ბურთით მოთამაშე, მოკლესწარვლიანი ოუენი შეამჩნია. „ასე თქვეს, ინსულტიაო, – დაიყვირა მან, – წმინდა მარიამის საავადმყოფო! დედას გადაეცი, ოუენ!“ იგი მანქანაში ჩაჯდა და მალე „სასწრაფო დახმარება“ თვალს მიეფარა. ამის შემდეგ, კიდევ ხუთი წუთის განმავლობაში, ოუენი თამაშს განაგრძობდა. ბურთს მალლა აგდებდა და იჭერდა, სროლებს შორის კი იმ კარისკენ იყურებოდა, მისტერ რეიპლოუს ღია რომ დარჩა. ალბათ უნდა წასულიყო და დაეკეტა. დედა ასეთ საქციელს ქრისტიანული გულმორწყალების აქტად მონათლავდა.

ბოლოს, რეიპლოუების გაზონი გადაჭრა. ისინი მისდამი ყოველთვის სითბოს იჩენდნენ. განსაკუთრებულს არაფერს აკეთებდნენ (ისეთს არაფერს, რომ, როგორც დედამისი იტყოდა ხოლმე, ღამე წამომხტარიყო და მადლობის სათქმელად გავარდნილიყო). მისის რეიპლოუ ხშირად აცხობდა გემრიელ ნამცხვრებს და ოუენის გამასპინძლება არასდროს ავიწყდებოდა, მინანქრიანი და კრემიანი ჯამების ამოტლექის უფლებასაც აძლევდა. მისტერ რეიპლოუ კი ქალაქის თვითმფრინავების გაკეთებას ასწავლიდა, თანაც ერთის კი არა, სამნაირის. ისინი მართლა დაფრინავდა ამიტომ რეიპლოუები გულმოწყალებას, ქრისტიანულ გულმოწყალებას იმსახურებდნენ, მაგრამ ოუენმა მშვენივრად იცოდა, რომ მათ კართან ამის გამო არ მისულა. ქრისტიანული გულმოწყალება ასოს არ ამაგრებს.

გავიდა ხუთი წუთი, – იქნებ თხუთმეტი ან ოცდაათი, დრო ისე მიქროდა, როგორც სიზმარში, – ოუენი რეიპლოუების სახლში დაბორიანებდა, არაფერს აკეთებდა, არაფერს ეხებოდა, მაგრამ მთელი ამ ხნის განმავლობაში ასო ქვასავით მაგარი ჰქონდა და გულივით უფეთქავდა, და თუ გგონიათ, რომ ეს მას ტკივილს აყენებდა, შეცდით – ოუენი თავს კარგად გრძნობდა და მხოლოდ მრავალი წლის შემდეგ მიხვდა, რას ნიშნავდა მისი უსიტყვო ხეტიალი უცხო სახლში – სექსუალური აქტის პრელუდიას, სასიყვარულო თამაშს. ის ფაქტი, რომ რეიპლოუების საწინააღმდეგო არაფერი ჰქონდა, პირიქით, უყვარდა კიდევ ისინი, შეგრძნებებს უფრო მეტად უმძაფრებდა. რომ წაესწროთ (არ წაუსწრიათ) და ეკითხათ, რატომ მოიქცა ასე, გულწრფელად უპასუხებდა, – არ ვიციო, და ღმერთის წინაშე მართალიც იქნებოდა.

ბევრი არაფერი დაუშავებია. პირველ სართულზე მდებარე სააბაზანოში კბილის ჯაგრისი იპოვა, წარწერით „დიკი“. დიკს მისტერ რეიპლოუს ეძახდნენ. ოუენმა ზედ მოშარდვა სცადა, რატომღაც მოუნდა, მაგრამ ასო ისე გამაგრებოდა, რომ წვეთიც ვერ გამოადინა. იძულებული გახდა, დაეფურთხებინა – ისე, რომ ღერებს შორის კარგად

ჩასულიყო – და შემდეგ ისევ თავის ადგილზე დაებრუნებინა. სამზარეულოში ყოფნისას ელექტროქურას ერთი ჭიქა წყალი გადაასხა. ბოლოს ჭურჭლის კარადიდან ფაიფურის დიდი თეფში გადმოიღო.

– მათ თქვეს, რომ ეს წერო იყო, – ჩაილაპარაკა მან და თეფში თავს ზემოთ ასწია, – რახან წერო ახსენა, მაშასადამე ბავშვი გაჩნდება.

ამ სიტყვებით თეფში კუთხეში მოისროლა და ნამსხვრევებად აქცია. ეს რომ გააკეთა, მაშინვე გაიქცა სახლიდან. ის, რამაც ასე ააფორიაქა, ასო გაუმაგრა და ლამის თვალები გადმოაკარკვლინა, ფაიფურის მტვრევის ხმამ გაუქრო, ჩირქგროვასავით გაუხეთქა, და მისის რეიპლოუს გამო წუხილი რომ არა, მისი მშობლები აუცილებლად მიხვდებოდნენ, რომ მათ შვილს რაღაც სჭირდა. ასე კი, უბრალოდ, ჩათვალეს, რომ მეზობლის მდგომარეობას განიცდიდა.

მომდევნო კვირის განმავლობაში თითქმის არ ეძინა და თუ თვალს მოატყუებდა, კოშმარები ესიზმრებოდა. ერთ-ერთში მისის რეიპლოუ საავადმყოფოდან სახლში წეროს მიერ მოყვანილ ბავშვთან ერთად დაბრუნდა, ოღონდ პატარა გაშავებული და მკვდარი იყო. ოუენი სირცხვილით იწურებოდა, სინდისი ქენჯნიდა. სიმართლე ითქვას, იმაზე არც კი დაფიქრებულა, რომ დედას, ღვთისმოსავ ბაპტისტს, რომ ეკითხა, – რა გემართებაო, აღსარებისას ღვთის წინაშე არაფერს დამალავდა. სამუდამოდ დაამახსოვრდა გაუცნობიერებელი სიამოვნების შეგრძნება, როდესაც შარვალჩაწეული მუხლებზე იდგა და ამაოდ ცდილობდა მისტერ რეიპლოუს კბილის ჯაგრისზე მოშარდვას, ან საოცარი აღგზნება, რომელიც თეფშის გატეხის მომენტში დაეუფლა. მოზრდილი რომ ყოფილიყო, ოუენი შარვალშივე გაათავებდა. უბიწოება გაუაზრებელ საქციელში იმალებოდა, სიხარული – ნამსხვრევების წკარუნში, სიამოვნება – ჩადენილი საქციელის გამოაშკარავების შიშსა და მონანიებით ტკობის შესაძლებლობაში. მისტერ რეიპლოუმ წერო ახსენა, მაგრამ სამსახური-

დან დაბრუნებულმა მამამ აუხსნა, რომ მან არასწორად გაიგო და მეზობელი ინსულტს<sup>103</sup>, მისის რეიპლოუს ტვინში სისხლძარღვის გასკდომას გულისხმობდა.

ახლა კი, როგორც ჩანს, ყველაფერი გამეორდა.

იქნებ, ამჯერად მაინც გავათავო, – გაიფიქრა მან, – ეს მისტერ რეიპლოუს კბილის ჯაგრისზე მოშარდვასთან შედარებით, გაცილებით მაღალი კლასია.

შემდეგ კეპი შეატრიალა და გაუელვა, რომ პრინციპი, არსებითად, იგივე იყო.

– ოუენ! – გაისმა კურცის ხმა, – აქ ხარ, შვილო? თუ დაუყოვნებლივ არ მიპასუხე, ვიფიქრებ, რომ არ შეგიძლია, ან არ გინდა...

– ბოს, აქ ვარ, – მშვიდი ხმა ჰქონდა. თვალწინ გაოფლილი პატარა ბიჭი ედგა თავს ზემოთ აღმართული ფაიფურის თევზით.

– ბიჭებო, მზად ხართ პანლურებით გაუმასპინძლდეთ უცხოპლანეტელის პატარა უკანალს?

შეკითხვას მოწონების გამომხატველი ღრიალი მოჰყვა.

– თავბედს ვაწყევლინებთ... სეირს ვუჩვენებთ... – გაჰყვიროდნენ მებრძოლები.

– ჯერ რა გინდათ, ბიჭებო?

„გუნდის ჰიმნი“ და „სტოუნზი“<sup>104</sup>, ახლავე!

– თუ ვინმეს საქმიდან გასვლა სურს, დაიძახოს.

რადიო დუმდა. ამ დროს მეორე სისშირეზე, რომელზეც ოუენი აღარასდროს გაიფიქრებს გადართვას, რუხი კაცუნები ათობით ნაცნობი ხმით ევედრებოდნენ. ქვემოთ და ოდნავ მარჯვნივ პატარა „კაიოვა-OH-58“ ეკიდა. ოუენს სულაც არ სჭირდებოდა დურბინდი იმის დასანახავად, რომ კურცს კეპი, სხვების მსგავსად, შეეტრიალებინა და მას აკვირდებოდა. მუხლებზე რატომღაც სამკუთხედად და-

<sup>103</sup> სიტყვების თამაში: Stork – წერო, Stroke – ინსულტი.

<sup>104</sup> „როლინგ სტოუნზი“ – ბრიტანული როკჯგუფი.

კეცილი გაზეთი ედო. ოუენ ანდერჰილს ზედიზედ ექვსი წლის განმავლობაში არ დასჭირვებია კიდევ ერთი შანსი და ეს კარგი იყო, რადგან კურცი მას არავის აძლევდა. თავში გაუელვა, რომ მან ეს ყოველთვის იცოდა. მოგვიანებით ამაზე იფიქრებს კიდეც. თუკი ამის გაკეთებამ მოუწია. საბოლოოდ, თავში კიდევ ერთი ლოგიკური აზრი გაუჩნდება: „შენ ხარ კიბო, კურც, შენ“... და მაშინვე გაუქრება. მის ადგილს სრული, აბსოლუტური წყვილი დაიკავებს.

– „ცისფერო ჯგუფო“, მე „ცისფერი ლიდერბიჭი ვარ“, მომისმინეთ. ცეცხლი ორასი იარდიდან. შეეცადეთ, „ცისფერ ბიჭს“ არ მოარტყათ, მაგრამ ის დედანატირლები პირწმინდად მოხვეტეთ. კონკ, „ჰიმნი“ ჩართეთ.

ჯინ კონკლინმა გადამრთველი გაატკაცუნა და „ცისფერი ბიჭი ორის“ წინ, იატაკზე დადებულ ფლეიერში კომპაქტდისკი ჩადო. ოუენი მოგონებებისგან გამოერკვა, წინ გადაიხარა და ხმას აუწია.

ყურსასმენებში მიკ ჯაგერის<sup>105</sup>, „როლინგ სტოუნზის“ ხმა შემოიჭრა. ოუენმა ხელი ასწია, დაინახა, როგორ მიესალმა კურცი, – არ იცოდა და არც აინტერესებდა, მან ეს დაცინვით გააკეთა თუ გულწრფელად, – და ხელი მკვეთრად ჩამოუშვა ძირს. და სანამ ჯაგერი „ჰიმნს“ წარმოთქვამდა და მღეროდა, იმ „ჰიმნს“, რომლის მელოდიზზეც ისინი ჯოჯოხეთისკენ მიემართებოდნენ ხოლმე, ვერტმფრენები ქვემოთ დაეშვნენ, წამით გაშეშდნენ და მიზნისკენ გაფრინდნენ.

## 8

გადარჩენილი რუხი კაცუნები განაკაფი ზოლის ბოლოში, ხომალდის ჩრდილში შეყუჟულიყვნენ, რომლის ორივე მხარეს ხომალდის ჩამოვარდნისას დაღეწილი ხეები ეყარა. კაცუნებს გაქცევა ან დამალვა არც უცდიათ. პირიქით, ბევრი მათგანი წინ გამოვიდა, უთითებო შიშველ ფეხებზე იდგა და ტოკავდა. ალბათ, ითომებოდნენ კიდეც თოვლჭყაპში, რომელსაც აქა-იქ მოწითალო ოქროსფერი ხავსი

---

<sup>105</sup> „როლინგ სტოუნზის“ ვოკალისტი.



მოსდებოდა. „როლინგ სტოუნზი“. ნაცრისფერი სახეები მოახლოებულ ვერტიკალურ ნივთებზე მიემართათ, გრძელთითება ხელები ცისკენ აღეპყროთ, რათა დაენახვებინათ, რომ შეუიარაღებელი იყვნენ. უზარმაზარი შავი თვალები მოღრუბლული დღის შუქზე უბრწყინავდათ.

ვერტიკალურებს სიჩქარე არ შეუმცირებიათ, თუმცა ყველას კარგად ახსოვდა ბოლო ჩანაწერის სიტყვები: „გთხოვთ, შეგვიბრალეთ, უმწეონი ვართ, ვკვდებით...“ ეს ამას ვედრება სოლივით გააპო მიკ ჯაგერის ხმამ: „ნება მიბოძეთ, გაგეცნოთ, მე მდიდარი და გემოვნებიანი კაცი გახლავართ, არც გამოცდილება მაკლია, ბევრისთვის მომიპარავს სული და რწმენა“...

ვერტიკალურები წინ საბრძოლო მწყობრით მიიწევდნენ, როგორც მარშით მიმავალი ორკესტრი ფეხბურთის სტადიონზე „ვარდისფერი თასის“ მატჩის დაწყებამდე. გაისმა მსხვილკალიბრიანი ტყვიამფრქვევების კაკანი. ტყვიები თოვლში ეფლობოდა, უსიცოცხლო ხეების უსიცოცხლო ტოტებს ამტვრევდა, უცხოპლანეტელთა ხომალდს ნაპერწკლებს აყრევინებდა, მოკუნტულ, კვლავაც ხელებაწეულ რუხ კაცუნებს ნაფლეთებად აქცევდა. ხელები ტანის მსგავს ნაწილებს სწყდებოდა, ჭრილობებიდან ვარდისფერი ლორწო მოედინებოდა. თავები გოგრაასავით სკდებოდა და იქიდან მოწითალო შადრევანი იფრქვეოდა, არა სისხლის, არამედ იმ დაწყევლილი სოკოს სპორებისა, რითაც ასე გავსებოდათ ის თავები – სპეციალური პაკეტები. ზოგიერთი მათგანი შუაზე გადახლეჩილიც კი აწეული ხელებით ეცემოდა ძირს. რუხი სხეულები მაშინვე უთეთრდებოდათ და თითქოს დუღილს იწყებდა.

„მე იქვე ვტრიალებდი, როდესაც იესო ქრისტე ეჭვითა და ტკივილით“... – განაგრძობდა მიკ ჯაგერი.

ხომალდის ჩრდილში მდგარმა რამდენიმე კაცუნამ პირი იბრუნა და თითქოს გასაქცევად მოემზადა, მაგრამ გზა არსად ჩანდა. უმრავლესობა მაშინვე დაიღუპა, ოთხნი კი ჩრდილის სიღრმეში შევიდნენ

და იქ რაღაცას ხლაფორთობდნენ. ოუენს საშინელი წინათგრძნობა ეწვია.

– მე მათ მივწვდები, – დაიზრიალა რადიომ. ეს დეფორესტი იყო „ცისფერი ბიჭი ოთხიდან“. ზედმეტი მონდომებისგან ქოშინებდა. ბრძანებას არ დაელოდა, დაემვა და „ჩინუკი“ ლამის მიწაზე დასვა. პროპელერები სველ თოვლს მალლა იტაცებდნენ და ამღვრეულ წყალში ისროდნენ ჭუჭყიან გუნდებად.

– არა, ნებას არ გრთავთ, ძველ პოზიციას დაუბრუნდით, პლუს კიდევ ორმოცდაათი იარდი! – შესძახა ოუენმა და ტონის ხელი დაჰკრა მხარზე. ტონიმ, რომელსაც სახეს სანახევროდ გამჭვირვალე ნიღაბი უფარავდა, მაგრამ მაინც ადვილად ამოსაცნობი იყო, მართვის ბერკეტი უკან გადასწია. „ცისფერი ლიდერბიჭი“ ღრუბლებამდე აფრინდა. ოუენმა ეკიპაჟის უკმაყოფილო ბუზღუნნი მუსიკის ხმაურშიც კი გაარჩია (ბონგოს გიჟური რიტმი, კივილი-მისამღერი, „თანაგრძნობა ეშმაკის მიმართ“<sup>106</sup> ბოლომდე ერთხელაც ვერ გაემვათ). „კაიოვამ“, როგორც კი შეამჩნია, მოასწრო და „ლიდერის“ მაგალითს მიჰბაძა. უცნაური აზროვნებისა და აშკარა გონებრივი აშლილობის მიუხედავად, კურცს სულელი ნამდვილად არ ეთქმოდა, ინტუიცია არასდროს ღალატობდა.

– კარგი რა, ბოს... – დაიწყო აღშფოთებულმა დეფორესტმა, რომელსაც ბრაზი ახრჩობდა.

– გიმეორებთ, გიმეორებთ, დაუბრუნდით ძველ პოზიციას, „ცისფერო ჯგუფო“, დაუბრუნდით...

აფეთქებამ იგი სავარძელს მიაღწერს, „ჩინუკი“ კი სათამაშოსავით აისროლა ზევით. საშინელ ღრიალში ტონი ედვარდის გინება გაარჩია, გაშმაგებით რომ ცდილობდა მართვის ბერკეტის დამორჩილებას. უკნიდან ყვირილი ისმოდა და, თუმცა დაშავებას თითქმის ვერავინ გადაურჩა, მხოლოდ პინკი ბრაისონი გამოაკლდათ, რომელმაც თავი გარეთ გაჰყო, რათა უკეთ დაენახა, რაც ქვევით ხდებოდა,

---

<sup>106</sup> „როლინგ სტოუნზის“ სიმღერა.

და აფეთქების ტალღამ იმსხვერპლა.

– გავიგე, გავიგე, გავიგე, – იმეორებდა ტონი, მაგრამ, ოუენის ვარაუდით, ოცდაათი წამი მაინც გავიდა, სანამ ის რამეს მიხვდებოდა, ამასობაში ყოველი წამი საათივით გაიწელა. ყურსასმენებში მიკ ჯაგერის „ჰიმნი“ აღარ ისმოდა, ეს კონკისა და „ცისფერი ბიჭი 2“ – ის წევრებს კარგს არაფერს უქადდა.

ტონიმ ვერტიკალური მოაზრუნა და ოუენმა შეამჩნია, რომ საქარე მინა გაბზარული იყო. უკნიდან ყვირილი არ წყდებოდა – აღმოჩნდა, რომ მაკავანოს ორი თითი აკლდა.

– ჯანდაბა! – ჩაიბურტყუნა ტონიმ, – თქვენ ჩვენი უკანალები იხსენით, ბოს. გმადლობთ.

ოუენი თითქმის არ უსმენდა. იგი სამ თუ მეტ ნაწილად დაშლილ ხომალდს მისჩერებოდა. ეს საკმაოდ ძნელი დასანახი იყო, რადგან იქიდან ამოტყორცნილ ათასგვარ ნაგავს ჰაერი წითლად და ნარინჯისფრად შეეღება. დეფოსტერის ვერტიკალური ნარჩენები კი გაცილებით უკეთ მოჩანდა. იგი გვერდულად ეგდო ტალახსა და ყლარტში, მის გარშემო ბუმბუტუკები ჩნდებოდა და სკდებოდა. მოტეხილი პროპელერი წყალში გიგანტური ნიჩაბივით ტივტივებდა. ორმოცდაათი იარდის დაშორებით შავი, დაგრეხილი ხრახნები ეყარა, შორიანხლოს მოყვითალო-მოთეთრო ალი ბრიალებდა – ეს კონკლინი და „ცისფერი ბიჭი 2“ იწვოდნენ.

რადიოდან შემფოთებული წრიპინი გაისმა. ბლეიკი იყო „ცისფერი ბიჭი 3“ – დან.

– ბოს, ჰეი, ბოს, ვხედავ...

– მესამე, მე ლიდერი ვარ. გიბრძანებთ...

– ლიდერო, მე მესამე ვარ. ვხედავ გადარჩენილებს, ვიმეორებ, ვხედავ გადარჩენილებს „ცისფერი ბიჭი ოთხიდან“... სამნი არიან, არა, ოთხნი, ვეშვები...

– ვუკრძალავ „ცისფერ ბიჭ სამს“, არავითარ შემთხვევაში, პირვანდელ სიმაღლეს დაუბრუნდით, პლუს ორმოცდაათი, არა, პლუს

ას ორმოცდაათი იარღი... ერთი, ხუთი, ნული... დაუყოვნებლივ!

– მაგრამ, სერ... ანუ ბოს... ფრიდმანს ვხედავ, ცოცხლად იწვის...

– მომისმინე, ჯო ბლეიკი.

ეს კურცის ხრინწიანი ხმა იყო, კურცისა, რომელსაც მოესწრო და ამ წითელი განავლისთვის თავი დაეღწია. თითქოს წინასწარ იცოდა, რაც მოხდებოდა, – გაიფიქრა ოუენმა.

– დაუყოვნებლივ მოუსვი, თუ არ გინდა, აქლემის ნეხვით სავსე ორმოები ამოგასუფთავებინო ცხელ-ცხელ ადგილებში, სადაც სმა კანონით არის აკრძალული. გაინძერი.

„ცისფერმა ბიჭმა 3“–მა არაფერი უპასუხა. ორივე გადარჩენილი ვერტიფრენი პირვანდელ სიმაღლეზე აფრინდა. პლუს ას ორმოცდაათი იარღი. ოუენი უსიტყვოდ აკვირდებოდა რიპლის სოკოს ცაში ატყორცნილ სპირალებს, თან იმის გამოცნობას ცდილობდა, კურცმა ეს იცოდა თუ ინტუიციამ უკარნახა. ისიც აინტერესებდა, მან და ბლეიკიმ იქაურობა დროულად თუ დატოვეს. რადგან, რაც უნდა ეთქვათ იმ რუხ კაცუნებს, ისინი უდავოდ ინფექციის მატარებლები იყვნენ. ოუენმა არ იცოდა, ამართლებდა თუ არა ეს მათ საქციელს – მასობრივ ჟლეტას, მაგრამ იმას კი ფიქრობდა, რომ რეი დეფოსტერის „ცისფერი ბიჭი 4“–ის გადარჩენილი წევრები მოხეტიალე მიცვალებულები იქნებოდნენ. ან უარესი – მუტანტები, ღმერთმა იცის, რად გადაქცეული მუტანტები.

– ოუენ! – ეს რადიო იყო.

ტონიმ წარბები ასწია და მას მიაჩერდა.

ოუენმა ღრმად ამოისუნთქა და ტუმბლერი კურცის პირად არხზე ნიკაპით გადართო.

– აქ ვარ, ბოს.

## 9

კურცი „კაიოვაში“ იჯდა. მუხლებზე გაზეთი ედო. მას და ფრედის, ისევე, როგორც რაზმის სხვა წევრებს, სახეზე ნიღბები ეკეთათ. მათი

მოხსნა, ალბათ, იმ საცოდავებმაც ვერ მოასწრეს, ახლა ცივ მიწაზე სულს რომ ღაფავდნენ. ნიღბები, შესაძლოა, სრულიად უსარგებლოც იყო, მაგრამ კურცს რიპლის აკიდების იოტისოდენა სურვილიც კი არ ჰქონდა. რატომ უნდა გაერისკა? მნიშვნელოვანი პერსონა იყო, სხვებისთვის მაგალითი უნდა მიეცა. გარდა ამისა, უპირატესობასაც ფლობდა. რაც შეეხება ფრედი ჯონსონს... ფრედისთან დაკავშირებით მას საკუთარი გეგმა ჰქონდა.

– აქ ვარ, ბოს, – თქვა ანდერჰილმა.

– კარგი სროლა, უკეთესი ფრენა და ბრწყინვალე აზროვნება. თქვენ სხვების სიცოცხლე გადაარჩინეთ. ახლა კი იქ დავბრუნდეთ, სადაც ვიყავით. ზუსტად პირველ კვადრატში. გასაგებია?

– დიახ, ბოს. გასაგებია და ვაფასებ.

და თუ გჯერა კიდევ, – გაიფიქრა კურცმა, – იმაზე სულელი ყოფილხარ, ვიდრე გამოიყურები.

## 10

კავანო კვლავაც კვნესოდა ოუენის ზურგს უკან, ოღონდ გაცილებით ჩუმად. ჯო ბლეიკი დუმდა – ალბათ გააცნობიერა მოწითალო ოქროსფერი ქარბორბალადან წამოსული საფრთხე, რომელიც თავიდან აიცილეს. ან ვერ აიცილეს.

– ყველაფერი კარგადაა, ჯარისკაცო? – ჰკითხა კურცმა.

– რამდენიმე დაჭრილია, – მიუგო ოუენმა, – მაგრამ, ძირითადად, ხუთიანზე შევასრულეთ. თუმცა დამლაგებლებს გვარიანი საქმე გავუჩინეთ – ქვემოთ საშინელი დომხალია.

ოუენის ყურსასმენებში კურცის სიცილი გაისმა, ის ყვავის ჩხავილს უფრო ჰგავდა.

## 11

– ფრედი!

– დიახ, ბოს.

- ოუენ ანდერჰილს თვალი არ მოაცილო.
- გასაგებია.
- თუ მოულოდნელად წასვლა მოგვიწევს, „იმპერიალის ხეობა-ში“, ანდერჰილი აქ დარჩება.

ფრედი ჯონსონს აღარაფერი უთქვამს, მხოლოდ თავი დააქნია და ვერტმფრენის მართვა განაგრძო. კარგი ბიჭი იყო. იცოდა თავისი ადგილი, ზოგიერთს კი არ ჰგავდა.

კურცი კვლავ მიუბრუნდა მას:

- ფრედი, იმ ღვთისგან მივიწყებულ მაღაზიაში ვბრუნდებით. ცხენები არ დაგენანოს. მინდა, რომ იქ ოუენსა და ჯო ბლეიკის თხუთმეტი წუთით მივასწრო. თუ შესაძლებელია, ოციოთაც.

- დიახ, ბოს.

- კიდევ, საიმედო თანამგზავრული კავშირი მჭირდება „შაინის მთასთან“.

- გექნებათ. დაახლოებით ხუთისთვის.

- სამისთვის აჯობებს, ჯარისკაცო, სამისთვის მომიხერხე.

კურცი სავარძელში გადაწვა და მის ქვემოთ მცურავ ნაძვებს თვალი შეავლო. უამრავი ხეა, ველური ბუნება, რამდენიმე ადამიანიც, ძირითადად, ნარინჯისფერ ტანსაცმელში გამოწყობილი მონადირეები, და ერთ კვირაში, შესაძლოა, სამოცდათორმეტ საათშიც კი, ეს ყველაფერი მთვარეზე მდებარე მთებივით მკვდარი იქნება. სამწუხაროა, მაგრამ კიდევ კარგი, რომ მენში ტყე მაინცაა ბევრი.

კურცმა ქალაქის ქუდი თითზე დაატრიალა. თუ გაუმართლა, ამ ქუდს ოუენ ანდერჰილის თავზე იხილავს, მას შემდეგ, რაც იგი სუნთქვას შეწყვეტს.

- მას მხოლოდ იმის გაგება უნდოდა, რამე ხომ არ შეიცვალა, - ჩაილაპარაკა ჩუმად.

ფრედი ჯონსონს, რომელიც მშვენივრად ხვდებოდა, რომელი მხრიდან ესვა პურს კარაქი, არაფერი უთქვამს.

გოსლინის მალაზიისკენ ნახევარი გზა რომ დაფარეს, მკვირცხლი „კაიოვა“ ნამცეცა ლაქასავით მოჩანდა. ოუენმა შემთხვევით დახედა ტონი ედვარდის მარჯვენა ხელს, რომელიც მას მართვის ბერკეტზე ედო, და ცერის ნუნის ქვეშ წვრილი მოწითალო ოქროსფერი ზოლი შენიშნა. მზერა საკუთარ ხელებზე გადაიტანა და ყურადღებით შეათვალიერა, როგორც ამას მისის იანკოვსკი აკეთებდა ხოლმე პირადი ჰიგიენის გაკვეთილებზე იმ შორეულ წლებში, როდესაც რეიპლოუები მათ მეზობლად ცხოვრობდნენ. ჯერ არაფერი ემჩნეოდა, მაგრამ ტონის უკვე ჰქონდა დამლა და, სავარაუდოდ, მას ვერც თვითონ ასცდებოდა.

ანდერჰილები ბაპტისტები იყვნენ და ოუენმა კარგად იცოდა კაენისა და აბელის ამბავი. „შენი ძმის სისხლი მიწიდან შემომღალადებს“, – თქვა ღმერთმა და კაენი ედემის აღმოსავლეთით, ნოდის ქვეყანაში გაგზავნა უბადრუკ ხალხთან ერთად, დედის სურვილით, მაგრამ მანამდე ნიშანი დაადო, ასე რომ, ნოდის ყველაზე მდაბიო მოსახლემაც კი იცოდა, ვინ იდგა მის წინ. და ახლა, როდესაც ტონის თითზე მოწითალო ოქროსფერ ზოლს ხედავდა და ასეთივეს საკუთარ ხელებზე ეძებდა, ოუენი მიხვდა, რომ იცოდა, რა ფერის ნიშანი ედო კაენს.

# თავი მეთერთმეტე ეგმენის<sup>107</sup> მოგზაურობა

## 1

ჰენრიმ აღმოაჩინა, რომ თვითმკვლევლობას ხმა ჰქონდა, და ამ ხმას მისთვის ყველაფრის ახსნა სურდა. მაგრამ საქმეს ის აფერხებდა, რომ იგი ინგლისურად ვერ ლაპარაკობდა, ზოგჯერ თავის ენაზე ბორძიკობდა რალაცას. თუმცა ამას დიდი მნიშვნელობა არც ჰქონდა, საუბრის მცდელობაც საკმარისი იყო. როგორც კი ჰენრიმ თვითმკვლევლობას სიტყვის თქმის უფლება მისცა, მისი ცხოვრება საგრძნობლად შეიცვალა. ზოგჯერ ღამითაც კი ახერხებდა დაძინებას (მართალია, არცთუ ისე ხშირად, მაგრამ მაინც), და დღეებიც არ იყო მაინცდამაინც ცუდი.

ოღონდ დღევანდელ დღემდე.

---

<sup>107</sup> ა) კვერცხის კაცი. ბ) multiserial Sonic the Hedgehog-ის მთავარი გმირი. ბოროტი, სუპერგენიალური დამნაშავე, რომელსაც მსოფლიოს დაპყრობა და ახალი ქვეყნის, ეგმენლენდის შექმნა სურს, ეგმენლენდი მისი მორჩილი რობოტებით იქნება დასახლებული (ინგ).



Arctic Cat-ს ჯოუნსის სხეული მართავდა, მაგრამ ახლა მის ძველ მეგობარში უცხო არსებების წარმოდგენები და მისწრაფებები ჩასახლებულიყო. მას იქნებ შემორჩენოდა კიდევ ჯოუნსის რაიმე ნაწილი, – ჰენრი ამის იმედს არ კარგავდა, – მაგრამ ამ შემთხვევაშიც კი იგი ძალზე ღრმად ჩამალული, პატარა და უმწეო იქნებოდა. ჰენრის ეშინოდა, ვაითუ, ქმნილებამ, ჯოუნსი რომ დაიმორჩილა, ჩემი აქ ყოფნა იგრძნოსო, მაგრამ თოვლმავალმა სიჩქარის დაუგდებლად ჩაუქროლა. პიტის მიმართულებით. მერე რა იქნებოდა? მერე საით წავიდოდა? ჰენრის ამაზე ფიქრი და ამის გამო აფორიაქება არ სურდა.

ბოლოს ისევ „კედელში გაკეთებული ხვრელისკენ“ გაქანდა, ოღონდ არა იმიტომ, რომ იქ რაღაც დარჩა. უბრალოდ, სხვაგან ვერსად წავიდოდა. როდესაც ჭიშკარს მიადგა, სადაც ერთადერთი სიტყვა – კლარენდონი ეწერა, ხელისგულზე კიდევ ერთი კბილი გადმოაფურთხა, დახედა და გადააგდო. აღარ თოვდა, მაგრამ ცა ძველებურად პირქუშად გამოიყურებოდა და ქარიც თითქოს გაძლიერებას აპირებდა. ჰენრიმ ვერ გაიხსენა, გადმოსცა თუ არა რადიომ რამე მოსალოდნელი ქარიშხლის შესახებ, მაგრამ არც იმაში იყო დარწმუნებული, რომ ეს საკითხი ძლიერ აინტერესებდა.

სადაც, მისგან დასავლეთით, საშინელმა აფეთქებამ არემარე შეაზანზარა. ჰენრიმ უაზროდ გაიხედა იქით, მაგრამ ვერაფერი დაინახა. რაღაც ჩამოინგრა ან აფეთქდა, სამაგიეროდ, ყველა ხმა დადუმდა, აქამდე მოსვენებას რომ არ აძლევდა. ჰენრიმ არ იცოდა, ჰქონდა თუ არა ამ ორ მოვლენას ერთმანეთთან კავშირი; არც ის იცოდა, შეშფოთება მართებდა თუ სიმშვიდის შენარჩუნება. ღია ჭიშკარში შევიდა, თოვლმავლის მიერ გატკეპნილ გზას გაუყვა და სახლს მიუახლოვდა.

გენერატორი თანაბრად გუგუნებდა, კარი ფართოდ იყო ღია. ჰენრი გრანიტის ფილასთან შეჩერდა, რომელიც ზღურბლის მოვალეობას ასრულებდა და მიიხედ-მოიხედა. თავდაპირველად ზედ სისხლის კვალი მოეჩვენა, მაგრამ არც გამხმარ და არც ახალ სისხლს

ასეთი უჩვეულო, მოწითალო ოქროსფერი შეფერილობა არ ახასიათებდა. რაღაც ორგანულ მცენარეს უფრო ჰგავდა. ხავსს ან სოკოს. და კიდევ...

მან თავი უკან გადასწია, ნესტოები გაბერა და ჰაერი ფრთხილად შეისუნთქა. მეხსიერებაში მაშინვე მკაფიო, მაგრამ აბსურდული მოგონება ამოუტივტივდა – სულ რაღაც ერთი თვის წინ ყოფილ ცოლთან ერთად კუნძულ მავრიკიაზე მოგზაურობა. მაშინ მაგიდასთან იჯდა, სომელიეს მიერ დასხმულ ღვინოს გემოს უსინჯავდა, რონდას შესცქეროდა და ფიქრობდა: ჩვენ ღვინის არომატით ვტკბებით, ძაღლები ერთმანეთის ანალურ ხვრელებს ყნოსავენ, ყველაფერი კი ერთსა და იმავეს უკავშირდება. წამით თვალწინ მამის სახეც დაუდგა, ნიკაპზე რძე რომ ჩამოსდიოდა. მან რონდას გაუღიმა, საპასუხო ღიმილიც მიიღო და თავში ახალი აზრი მოუვიდა: როგორი შვებაა იმის ცოდნა, რომ ყველაფერი ოდესღაც მაინც დასრულდება. და თუ ასეა, აჯობებს, რაც შეიძლება სწრაფად დასრულდეს.

მაგრამ ახლა ღვინის კი არა, რაღაც დაჭაობებულის, გოგირდოვნის სუნი სცემდა. მალე გაახსენდა, რომ ასე ის ქალი ყარდა, მისი დაავადებული შიგნეულობა, ვის გამოც ავარია შეემთხვათ.

ჰენრიმ ფეხი გრანიტის ფილაზე შედგა, აცნობიერებდა, რომ უკანასკნელად შედიოდა ამ სახლში, გრძნობდა წარსული წლების სიმძიმეს: სიცილს, საუბრებს, ლუდის უთვალავ ბოთლს, შემთხვევით მოსაწევს, ღორმუცელების შეჯიბრებას 96-ში (ან 97-ში), იარაღიდან გასროლას, თოფისწამლისა და სისხლის ნაზავის მწარე გემოს, ნადირობის სეზონის დაწყებას რომ მოასწავებდა, სიკვდილის, მეგობრობისა და ბავშვური აღტაცების სუნს.

მან კვლავ შეიყნოსა ჰაერი. ორგანულს არ ჰგავდა. უფრო მძაფრი, ქიმიური ნივთიერების სუნი იგრძნობოდა. ალბათ, აქაურობა გაჯერებული იყო იმ ნივთიერებით. შიგნით შეიხედა. იატაკს ბუსუსიანი ობი მოსდებოდა, მხოლოდ აქა-იქ თუ მოჩანდა ხე. ნავაჰოს ხალი-

ჩაზე კი იმსისქე ფენად იდო, რომ ქსოვილის სახე მთლიანად დაეფარა. როგორც ჩანს, ობს სითბო უყვარდა, მაგრამ მაინც საოცრად სწრაფად იზრდებოდა.

ჰენრიმ შესვლა დააპირა, მაგრამ გადაიფიქრა, ორი ნაბიჯით უკან დაიხია და თოვლში აღმოჩნდა. ენით წამდაუწუმ იმ ხვრელებს ისინჯავდა, სადაც ჯერ კიდევ დილით სრულიად ჯანსაღი კბილები ჰქონდა. ცხვირიდან ისევ წასკდა სისხლი. რასაკვირველია, სააბაზანოში იყო პატარა აფთიაქი, მაგრამ ღირდა კი გარისკვად? თუ ეს ხავსი, ჰაერწვეთოვანი გზით, ებოლას ან ჰანტას მსგავს გადამდებ ინფექციას ავრცელებდა, მაშ, უკვე დასნებოვნებული იყო და სიფრთხილეს აზრი აღარ ჰქონდა. როცა ცხენს მოგპარავენ, თავლის ჩაკეცივით უკან ვერ დაიბრუნებ. მაგრამ არც უაზროდ გარისკვა იყო გონივრული საქციელი.

ჰენრიმ სახლს შემოუარა, ცდილობდა, არცტიც ჩატ-ის მიერ დატოვებულ ნაკვალევში ევლო.

## 2

ფარდულის კარი ღია აღმოჩნდა. და ჰენრიმ ჯოუნსი დაინახა, აშკარად, გარკვევით, თოვლმავლის გამოსაყვანად მისული და ზღურბლზე გაშეშებული ჯოუნსი, აგდებულად რომ ჩაევლო ხელი წირთხლისთვის და უსმენდა... რას უსმენდა?

არაფერს. არც ყვავების ჩხავილს, არც კოდალების კაკუნს, არც ციყვების ჩხუბს. მხოლოდ ქარის ხმაურსა და ფიჭვის ან ნაძვის ტოტიდან ჩამოცურებული თოვლის მსუბუქ ტყაპანს. ცხოველებმა აქაურობა მიატოვეს და ისე წავიდნენ, როგორც მხეცები გარი ლარსონის<sup>108</sup> მულტფილმში.

წუთით ერთ ადგილას გაუნძრევლად იდგა და ყველაფრის წარმოდგენას ცდილობდა, რაც კი ფარდულში იდო. პიტს ეს უკეთესად გამოუვიდოდა, – დახუჭავდა თვალებს, დააქნევდა საჩვენებელ

<sup>108</sup> ამერიკელი მულტიპლიკატორი.

თითს და ქანჩებიანი პატარა კოლოფის ადგილმდებარეობაც კი არ შეეშლებოდა, – მაგრამ ჰენრი პიტის ნიჭიერების გარეშეც ადვილად გავიდოდა ფონს. იგი ხომ აქ გუშინ საღამოსაც იყო, ეძებდა, რით შეძლებდა სამზარეულოს კარადის გაღებას. მაშასადამე, იმასაც დაინახავდა, რაც ახლა სჭირდებოდა.

ჰენრიმ რამდენჯერმე სწრაფად ჩაისუნთქა და ამოისუნთქა, ფილტვები გაინიავა, ხელთათმნიანი ხელი ცხვირ-პირზე მიიფარა და შიგნით შევიდა. ცოტა ხანს დაელოდა, რათა თვალი სიბნელეს შესჩვეოდა. არ სჭირდებოდა უსიამოვნო სიურპრიზები.

როდესაც მხედველობა გამოუკეთდა, ჰენრიმ ცარიელი სივრცე გადაჭრა, იქ ადრე თოვლმავალი იდგა. იატაკზე არაფერი მოჩანდა ზეთოვანი ლაქებისგან მიღებული უცნაური სურათის გარდა, აი, მწვანე ბრეზენტს კი, რომელსაც თოვლმავლის შალითად იყენებდნენ და ახლა კუთხეში ეგდო, მოწითალო ოქროსფერი ბილიკები აჩნდა.

დაზგაზე რა აღარ ეყარა – საგულდაგულოდ დახარისხებული ლურსმნებითა და ქანჩებით სავსე კოლოფები გადმოეპირქვავებინათ, უჯრები გამოწეული დაეტოვებინათ, ლამარ კლარენდონის ძველი მუნდშტუკი გაეტეხათ. ვილაცას, ბივერს ან ჯოუნსის, რაღაცის ძებნაში იქაურობისთვის ქარიშხალივით გადაეველო.

ეს ჯოუნსი იყო.

ღიახ. ჰენრის, შესაძლოა, ვერასდროს გაეგო, რა მოხდა, მაგრამ იცოდა, რომ ეს ჯოუნსი იყო და მისთვის ან იქნებ ბივერისთვისაც, ძალზე მნიშვნელოვან ნივთს ეძებდა. საინტერესოა, იპოვა თუ არა? ჰენრი, ალბათ, ვერც ამას გაიგებდა. მას თვითონ სჭირდებოდა ის, რაც ლურსმანზე ეკიდა ოთახის შორეულ კუთხეში, დახვავებული საღებავის ქილებისა და პულვერიზატორების თავზე.

კვლავაც ცხვირ-პირზე ხელაფარებულმა სასურველ ლურსმნამდე მიაღწია, რომელზეც სამი-ოთხი რესპირატორი ეკიდა, რესპირატო-

რებს, ჩვეულებრივ, სამღებრო სამუშაოების დროს იყენებენ. გაყვითლებულ ნიღბებს ელასტიკურობა დაჰკარგოდა. მან ყველა ერთდროულად ჩამოხსნა და სწორედ რომ დროულად შემოტრიალდა – მოეჩვენა, თითქოს კარს უკან რაღაც გაფაჩუნდა. ჰენრიმ თავი ძლივს შეიკავა, რომ არ დაეყვირა, გული ლამის საგულედან ამოუხტა, საშინლად დასცხა და სუნთქვა შეეკრა. ვერაფერი დაინახა. თავიდან, ეს საკუთარ ფანტაზიას დააბრალა, მაგრამ – არა. იქ ნამდვილად რაღაც იყო. ღია კარიდან და მაგიდის თავზე მდებარე ერთადერთი ჭუჭყიანი ფანჯრიდან შემოსულ შუქზე ყველაფერს არჩევდა, მაგრამ საკუთარი ჩრდილის დანახვაზეც კი კרתოდა.

ოთხი მოზრდილი ნახტომი გააკეთა და ფარდულიდან გავარდა. რესპირატორები ხელში ეჭირა. სუნთქვაშეკრულმა თოვლში კიდევ რამდენიმე ნაბიჯი გადადგა და მხოლოდ ახლავა მისცა თავს სუფთა ჰაერის შესუნთქვის უფლება. დაიხარა, ხელისგულებით მუხლისთავებს დაეყრდნო და მის თვალწინ აციმციმებული უამრავი შავი წერტილის გაქრობას დაელოდა.

აღმოსავლეთიდან შორეული სროლის ხმა გაისმა. თოფისას არ ჰგავდა – ძალზე ხმამალლა და სწრაფად ისროდნენ. უფრო ავტომატი ან ტყვიამფრქვევი უნდა ყოფილიყო. ჰენრის ისეთივე მკაფიო სურათი წარმოუდგა, როგორც მამის ნიკაპზე ჩამოღვრილი რძის ან მისი ოფისიდან რაკეტასავით გავარდნილი ბარი ნიუმენის შესახებ მოგონება იყო. მან დაინახა ირმები, ენოტები, კაკბები, გარეული ძაღლები და კურდღლები, რომლებიც უბედურების ზონად ქცეულ საცხოვრებელ ადგილებს ტოვებდნენ და რომლებსაც ათობით და ასობით ხოცავდნენ. შეამჩნია, როგორ შეიღება თოვლი მათი უდანაშაულო, თუმცა, შესაძლებელია, დაინფიცირებული სისხლით. ნანახმა, წარმოუდგენელი ტკივილი მიაყენა და სიღრმისკენ დაიძრა, იმ ადგილისკენ, რომელიც ჯერ არ მომკვდარიყო, და, როგორც აღმოჩნდა, მხოლოდ თვლემდა; იმ ადგილისკენ, რომელიც ისე მხურვალედ და მძაფრად გამოეხმაურა დადიტის ტირილს, რომ ეგონა, საცაა თავი

გამისკდებო.

ჰენრი გაიმართა, მარცხენა ხელთათმანზე ახალი სისხლი შეამჩნია და გაშმაგებითა და გაოცებით ასძახა ცას, – ამის დედაცო! შემდეგ ცხვირ-პირზე ხელი აიფარა, რესპირატორები მოსინჯა და გადაწყვიტა, „კედელში გაკეთებულ ხვრელში“ შესვლისას ორი ცალი ერთად გაეკეთებინა. ამასობაში, სრულიად გადაავიწყდა სკაუტის ავარიის დროს დაშავებული თეძო. თუ სოკო, როგორც ინფექცია, მართლა ვრცელდებოდა, ის უკვე ჰენრის სხეულში იქნებოდა და სიფრთხილის ზომები აღარაფერში გამოადგებოდა. ჰენრიმ წარმოიდგინა ფირფიტა, რომელზეც დიდი წითელი ასოებით ეწერა:

ბიოლოგიური დაბინძურების ზონა! გთხოვთ, შეიკავოთ სუნთქვა და ხელით დაიფაროთ ნებისმიერი განაკაწრი!

უნებურად გაეცინა და სახლისკენ გაემართა. ვერაფერს გააწყობდა, თუმცა ღმერთმა ხომ იცოდა, რომ დიდხანს სიცოცხლეს ისედაც არ აპირებდა.

აღმოსავლეთიდან კვლავ ისმოდა სროლის ხმა.

### 3

ღია კართან მდგარმა ჰენრიმ უიმედოდ მოსინჯა ჯიბეები ცხვირსახოცის ძებნაში... ვერ აღმოაჩინა. ტყეში ცხოვრებას ორი უპირატესობა ჰქონდა: შეგეძლოთ, ცხვირი ცხვირსახოცით არ მოგეხოცათ და სადაც მოგესურვებოდათ, იქ მოგეშარდათ. კაცებს ეს, რატომღაც, განსაკუთრებით მოსწონდათ. ამის შემდეგ თითქოს წარმოუდგენელია, როგორ შეეძლოთ ქალებს იმ მამაკაცებიდან თუნდაც საუკეთესო ჰყვარებოდათ, დანარჩენებზე რომ აღარაფერი ვთქვათ.

ჰენრიმ პალტო და თბილი თეთრეული გაიხადა და მხოლოდ მაისური დაიტოვა, ბოსტონის ბეისბოლის გუნდის, „წითელი გეტრების“ ემბლემითა და ზურგზე წარწერით GAღჩIAPAღღA 5. შემდეგ ისიც გაიხადა, გრძლად დაკეცა და მარცხენა ფეხზე შემოიხვია – იქ, სადაც ჯინსი გახვრეტოდა და სისხლი შეხმოებოდა. თან გაიფიქრა,

რომ თავლას ცხენის მოპარვის შემდეგ კეტავდა.

ხვრელები, ჩვეულებრივ, ამოავსე, არა? დიახ, აკურატულად, საფუძვლიანად ამოავსე. ჯერაც არსებობდა გარკვეული ზოგადი მოსაზრებები, რომლებსაც ცხოვრება ემორჩილებოდა. მაშინაც კი, როცა სიცოცხლე დასასრულს უახლოვდებოდა.

მან კვლავ გადაიცვა ტანსაცმელი დახორკლილ მხრებზე და ერთდროულად ორი რესპირატორი გაიკეთა. ორის მიმაგრებას ყურებზე აპირებდა, მაგრამ წარმოიდგინა, როგორ გადაიხლართებოდა თასმები ტანზე დასამაგრებელი პისტოლეტის ბუდესავით, და გაეცინა. კიდევ რა გააკეთოს? მეხუთე ნილაბი ცალ თვალზე აიკრას?

– თუ ჩემამდე მოაღწევს, ჩემამდე მოაღწევს, – ჩაილაპარაკა ხმა-მალლა და მაშინვე შეახსენა საკუთარ თავს, რომ ზედმეტი სიფრთხილე არაფერს ავნებდა, როგორც უყვარდა ხოლმე თქმა მოხუც ლამარს.

იმ მოკლე დროის განმავლობაშიც კი, რომელიც ფარდულში გაატარა, სოკო (თუ ობი – ვინ იცის, რა იყო) „კედელში გაკეთებულ ხვრელს“ მთლიანად მოედო. ნავაჰოს ხალიჩა აღარ ჩანდა. დივანზე, სამზარეულოსა და სასტუმრო ოთახებს შორის, დახლზე და იქვე მდგარ სკამებზე მოწითალო ოქროსფერი ლაქები მოჩანდა. ბუსუსებიანი დაკლაკნილი კაპილარები მაგიდის ფეხს დაღვრილ სითხესავით მიუყვებოდა. ჰენრის გაახსენდა, როგორ გროვდებოდნენ ხოლმე ჭიანჭველები დაბნეული შაქრის ნამცეცებზე. ყველაზე უსიამოვნო სანახავი ჭერიდან ხალიჩამდე ჩამოშვებული, მოწითალო ოქროსფერი ხავსით დაფარული აბლაბუდა იყო. ჰენრი რამდენიმე წამის განმავლობაში ყურადღებით აკვირდებოდა მას, სანამ არ მიხვდა, რომ ლამარ კლარენდონის სიზმართმჭერს ხედავდა. ჰენრი არ ფიქრობდა, ოდესმე მაინც თუ გაიგებდა იმას, რაც იქ მოხდა, მაგრამ იმაში კი ეჭვი არ ეპარებოდა, რომ სიზმართმჭერმა თავის ბადეში ნამდვილი კოშმარი გააბა.

შენ რა, შიგნით შესვლას აპირებ? განსაკუთრებით ახლა, როდესაც ნახე, რა სწრაფად იზრდება? ჯოუნსი გარეგნულად კარგად გამოიყურებოდა, როდესაც გვერდით ჩაუქროლა. სინამდვილეში ასე არაა და შენ ეს იცი. უკვე მოასწარი ამის შეგრძნება. მამასადამე... შენ ხომ სინამდვილეში იქ შესვლას არ აპირებ?

– ვაპირებ, – თქვა ჰენრიმ. მის ყოველ სიტყვაზე რესპირატორის ორმაგი კუბი იბერებოდა და იფუშებოდა, – თუ მომიხელთებს... თავს მოვიკლავ... დაგეგმილზე უფრო ადრე.

მან ისე გაიცინა, როგორც სტაბმა „მოზი დიკში“<sup>109</sup>, და ზღურბლს გადააბიჯა.

#### 4

ერთი გამონაკლისის გარდა, სოკოს კოლონიები თხელ საფენებსა და ბელტებს მოგაგონებდათ. ეს გამონაკლისი ჰენრიმ სააბაზანოს კარის წინ შეამჩნია, სადაც პატარა ბორცვი წამოზრდილიყო, კარს აჰყოლოდა და დაახლოებით ოთხი ფუტის სიმაღლემდე დაეფიფქა. ეს კოლბოხისებრი გროვა, როგორც ჩანს, რალაც მონაცრისფრო, ღრუბლოვან ნივთიერებაზე იდო. უცნაური ღრუბელი სასტუმრო ოთახისკენ ორად იყოფოდა და ასო V-ს ჰგავდა, რაც ჰენრიში გაჩაჩხული ფეხების უსიამოვნო ასოციაციას იწვევდა. თითქოს სოკო სააბაზანოს კართან ვილაც გარდაცვლილის გვამზე იზრდებოდა.

ჰენრის კოლეჯში ნაჩქარევად გავლილი სასამართლო მედიცინის კურსი და დანაშაულის ადგილებზე გადაღებული პირქუში, ხშირად გულის ამრევი ფოტოსურათებით სავსე სქელი სახელმძღვანელო გაახსენდა. ერთი მათგანი დიდხანს ვერ ამოიგდო თავიდან: მსხვერპლი მოკლეს და ტყეში დააგდეს, ოღონდ შიშველი სხეული ოთხი დღის შემდეგ აღმოაჩინეს. კეფაზე, მუხლებს უკან და დუნდულებს შორის სოკო გასჩენოდა.

ოთხი დღე. ისევ ოთხი დღე. მაგრამ ჯერ კიდევ დილით სახლში

---

<sup>109</sup> ამერიკელი მწერლის, ჰერმან მელვილის რომანი



ამ სისადაგლის ნასახიც კი არ იყო, მხოლოდ...

ჰენრიმ საათს დახედა და დაინახა, რომ მაშინ გაჩერებულიყო, როცა თორმეტს ოცი აკლდა. ახლა კი, აღმოსავლეთის სტანდარტით, დრო აღარ არსებობდა.

მიტრიალდა და კარს უკან შეიხედა, რადგან მოეჩვენა, რომ იქ რაღაც იმალებოდა.

არა. არაფერი იყო, კედელზე მიყუდებული ჯოუნსის „გარანდის“ გარდა.

ჰენრი უკვე გამობრუნებას აპირებდა, როდესაც გააცნობიერა, რომ თოფს სოკო არ მოსდებოდა. მან იარაღს ხელი დაავლო. დატენილი ვინჩესტერი დამცველზე ეყენა, ლულაში ერთი ტყვია იდო. ჰენრიმ „გარანდი“ მხარზე გადაიკიდა და სააბაზანოს კართან გაჩენილი საზიზღარი, წითელი, ბუმტუკებიანი ამობურცულობისკენ შეტრიალდა. აქ უფრო მძაფრად იგრძნობოდა ეთეროვან-გოგირდოვნისა და რაღაც უარესი სისადაგლის მყრალი სუნი. მან ნელა გადაჭრა ოთახი სააბაზანოს მიმართულებით, ნაბიჯებს ფრთხილად დგამდა, შიშობდა (და სულ უფრო მეტად რწმუნდებოდა), რომ წითელი კუზი და მისი დანამატი, გაფარჩხული ფეხების სახით, ის იყო, რაც მეგობარ ბივერისგან დარჩა. კიდევ წუთიც და, ბივის აწეწილ, გრძელ, შავ თმასაც დაინახავდა, ან მის ფეხსაცმელს, სახელწოდებით „დოქტორი მარტენსი“, თუმცა ბივერი მას „ლესბოსელებთან სოლიდარობის დეკლარაციას“ ეძახდა. რატომღაც აიკვიატა, – და ამაში ვერავინ გადაარწმუნებდა, – რომ „დოქტორი მარტენსი“ რაღაც საიდუმლო ნიშანი იყო, რომლითაც ლესბოსელები ერთმანეთს ცნობდნენ. გარდა ამისა, სჯეროდა, რომ მსოფლიოს როტმილდები<sup>110</sup> და გოლდფარბები<sup>111</sup> მართავდნენ და ბრძანებებს, სავარაუდოდ, კოლორადოს კლდეებში ამოკვეთილი კონსპირაციული ბუნკერიდან იძლეოდნენ.

---

<sup>110</sup> ბანკირების დინასტია ევროპაში.

<sup>111</sup> ერთ-ერთი გავლენიანი გვარი აშშ-ში.

ბივერი, რომელსაც გაოცების გამომხატველი გამოთქმებიდან ყველაზე მეტად ბარემ-მიხმარე-ფრედი მოსწონდა.

მაგრამ განა შეიძლებოდა დარწმუნებით თქმა, რომ სააბაზანოს კართან დაგდებული სიმახინჯე ოდესღაც ბივერი იყო? ან – საერთოდ ვინმე? ჯერჯერობით მხოლოდ ვარაუდი არსებობდა. ღრუბლოვან მასაში რაღაცამ გაიბრწყინა. ჰენრი დაიხარა, თან საკუთარ თავს ეკითხებოდა, – სოკოს მიკროსკოპულმა სპორებმა დაუცველ თვალებზე ხომ არ იბარტყაო.

მბრწყინავი საგანი კარის სახელური აღმოჩნდა. იქვე მოწითალო ოქროსფერი ბუსუსებით დაფარული საიზოლაციო ლენტის გორგალი ეგდო. ჰენრის გაახსენდა არეულ-დარეული ფარდული, გადმოპირქევავებული კოლოფები, გამოწეული უჯრები. ამას ხომ არ ეძებდა ჯოუნსი? ამ დაწყევლილ საიზოლაციო ლენტს? რაღაცამ – შესაძლოა, მორიგმა გატკაცუნებამ, თუმცა ვინ იცის – უკარნახა, რომ ასეც იყო. მაგრამ რატომ? რატომ, ღვთის გულისთვის?

ბოლო ხუთი წლის განმავლობაში ხშირად სტუმრობდა ფიქრები თვითმკვლევლობაზე და სულ უფრო დიდხანს რჩებოდა მასთან, მოსვენებას არ აძლევდა. ჰენრის თითქმის დავიწყებოდა, რა იყო ცნობისმოყვარეობა. ახლა კი ამ ვნებამ მთელი ძალით იფეთქა, თითქოს კარგა ხნის ნაშიმშილევს გაეღვიძა და წამდაუწუმ საჭმელს ითხოვდა. მაგრამ რა ეჭმია, რაც არ ჰქონდა? იქნებ, ჯოუნსის ამ ლენტით უნდოდა კარის აკვრა? თუ ასეა, რისგან ცდილობდა თავის დაცვას? მან და ბივმა დანამდვილებით იცოდნენ, რომ ეს სოკოსგან ვერ დაიცავდათ, რადგან სოკო, უბრალოდ, კარის ქვეშ გაძვრებოდა.

ჰენრიმ სააბაზანოში შეიხედა, უცნაურად შეჰყვირა და უკან დაიხია. რა უბედურებაც უნდა მომხდარიყო, ეჭვი არ ეპარებოდა, რომ ყველაფერი სააბაზანოში დაიწყო და დასრულდა. ოთახი წითელ მღვიმეს დამსგავსებოდა, ცისფერი კაფელი ერთიანად ხავსს დაეფარა. შემოსევას ვერც პირსაბანის ძირი და უნიტაზი გადაურჩა. უნი-

ტაზი თავახდელი იყო, თუმცა ჰენრის დაზუსტებით არ შეეძლო, ეთქვა, რადგან ყველაფერს სოკოს სქელი ფენა ედო. მოეჩვენა, რომ დასაჯდომი შიგა მხრიდან გაეტეხათ. საშხაპის ჩამოსაფარებელი თეატრის ხავერდის ფარდას დამსგავსებოდა, ფარდა ყველა რგოლიდან ჩამოეხიათ (რგოლებსაც გრძელი, ბანჯგვლიანი წვერი გაზრდოდა) და აბაზანაში დაეგდოთ.

აბაზანაში „დოქტორ მარტენის“ ყელიანი ფეხსაცმლით შემოსილი ფეხი მოჩანდა. დამატებითი შემოწმება დროის კარგვად მიიჩნია. მან, როგორც იქნა, მიაგნო ბივერს.

უეცრად მოგონებები ეწვია იმ დღის შესახებ, როდესაც დადიტსი გადაარჩინეს – ისე მკაფიოდ და ცოცხლად, თითქოს ყველაფერი წინააღმდეგ მოხდა. ბივერი თავისი გაცვეთილი ტყავის ქურთუკით, ბივერი დადიტსის საუზმის ყუთით, ბივერი, რომელიც ღიმილით ამბობს: „მოგწონს ეს მულტფილმი? ისინი ხომ არასდროს იცვლიან ტანსაცმელს!“ შემდეგ კი ამატებს...

– ბარემ მიხმარე, ფრედი, – შესძანა ჰენრიმ შებილწულ სახლს, – ეს მან თქვა, ის ყოველთვის ასე ამბობდა.

თვალეზიდან ცრემლები გადმოსცვივდა და ლოყებზე ჩამოუგორდა – სწორედ ის სისველე, რაც სოკოს სჭირდებოდა. უნიტაზში ამოსული ჯუნგლის მიხედვით, ეს მისი საყვარელი გარემო იყო. ასე რომ, ახლა ის ბარაქიან ნიადაგს ეღირსა. თუმცა ჰენრის ეს აღარ ადარდებდა. მას ჯოუნსის თოფი ჰქონდა. და თუ სოკო მის სხეულზე მოლხენას გადაწყვეტდა, იქამდე გაეცლებოდა წუთისოფელს, სანამ დესერტის დრო დადგებოდა. თუ საქმე აქამდე მივიდოდა.

შესაძლოა, მისულიყო კიდეც.

## 5

დარწმუნებული იყო, რომ ფარდულის კუთხეში ძველი ხალიჩის ნარჩენებს მოჰკრა თვალი. ფიქრობდა, იქნებ ღირს, მივბრუნდე, წა-

მოვილო, სააბაზანოს იატაკზე დავაგდო, ახლოს მივიდე და აბაზანაში ჩავიხედო. მაგრამ განა, ეს რამეს შეცვლიდა? იცოდა, რომ იქ ბივერი იწვა. სულაც არ უნდოდა, რომ ძველი მეგობარი, დახვეწილი უხამსობების – თუნდაც „მაკოცე ტაკოშის“ – ავტორი, წითელი სოკოთი დაფარული ენახა. მსგავსი კოლონიით მოფენილი, სისხლისგან დაცლილი სხეული ხომ მედიცინის სახელმძღვანელოშიც ენატა. ეს რომ მომხდარის ახსნაში დახმარებოდა, ამ ნაბიჯსაც გადადგამდა. მაგრამ ჰენრის ამგვარი რამ ძალზე საეჭვოდ მიაჩნდა.

ყველაზე მეტად იქიდან წასვლა სურდა. სოკოს დანახვაზე აჟრიალებდა, მაგრამ მხოლოდ ამიტომ როდი ეშინოდა, – მას უსიამოვნო შეგრძნება დაუფლებოდა, თითქოს მარტო არ იყო.

ჰენრი სააბაზანოს კარს მოშორდა. სასადილოს მაგიდაზე რბილყდიანი წიგნი იდო, რომელზეც ფიწლებით მოცეკვავე ეშმაკები ენატა. ეს, ალბათ, ჯოუნსის ეკუთვნოდა, მაგრამ ვერც ჯოჯოხეთის მოციქულებს შეეშინებინათ საზიზღარი სოკო.

მოულოდნელად გააცნობიერა, რომ დასავლეთიდან თანაბარი გუგუნი ისმოდა, თანდათანობით ის საშინელ გრუზუნად იქცა. ვერტიმფრენები. ბევრი, დიდი ვერტიმფრენი. თითქოს ძალიან დაბლა, სახურავის სიმაღლეზე დაფრინავდნენ.

ჰენრიმ უნებურად თავი დახარა. თვალწინ ურიცხვმა კადრმა ჩაუქროლა ვიეტნამის ომზე გადაღებული ფილმებიდან. მაშინვე გაიფიქრა, რომ ახლა ტყვიამფრქვევებს შალითებს მოხსნიდნენ და სახლს ტყვიებს დაუშენდნენ. ან – ნაპალმს. (ლაბისებური საწვავი პროდუქტი, მზადდება საწვავის ქიმიური დამუშავებით, გამოიყენება ცეცხლგამჩენ ბობმებსა და ცეცხლსატყორცნებში.)

მაგრამ მათ ისე ჩაუფრინეს, მსგავსი არაფერი მომხდარა, თუმცა, იმდენად დაბლა მიფრინავდნენ, რომ სამზარეულოს თაროებზე ჭიქები და თეფშები აზრიალდა. როდესაც ხმაურმა იკლო და შორეულ ზუზუნად იქცა, ჰენრი წელში გაიმართა. იქნებ აღმოსავლეთით, ჯეფერსონტრექტის ბოლოსკენ მიეშურებიან ცხოველების მასობრივ

ჟღერებაში მონაწილეობის მისაღებად? რაც უნდათ, ის უქნიათ. თვითონ კი აქაურობას სასწრაფოდ უნდა გაეცალოს და...

და რა? მერე რა მოხდება?

სანამ ამაზე ფიქრობდა, ქვემოთ მდებარე ორი საძინებლიდან ერთ-ერთში რაღაც ხმა გაისმა. ფაჩუნს უფრო ჰგავდა. მაგრამ მაშინვე ყველაფერი მიჩუმდა, თანაც ისე დიდი ხნით, რომ ჰენრიმ გაკიცხა კიდევ საკუთარი თავი ზედმეტი ფანტაზიორობისთვის. შემდეგ სინამდის ტკაცუნმა და ჭრიჭინმა დაარღვია, თითქოს სადღაც მექანიკური სათამაშო დაქოქეს – თუნუქის მაიმუნი თუ თუთიყუში. ჰენრის თავიდან ფეხებამდე ჟრუანტელმა დაუარა. პირი წამსვე გაუშრა. თმა ყალყზე დაუდგა.

აქედან მოუსვი, გაიქეცი!

მაგრამ სანამ ამ ხმას მოუსმენდა და ნათქვამს ჩასწვდებოდა, ჰენრი რამდენიმე ნახტომში საძინებლის კართან გაჩნდა და „გარანდი“ მოიმარჯვა. ადრენალინმა სისხლი აურჩქროლა, სამყარო ხასხასა ფერებად შეიღება. შერჩევითი ალქმა, უსაფრთხოებისა და სიმშვიდის მომტანი აუღიარებელი მოკრძალებული საჩუქარი, სადღაც გაქრა და ყოველი დეტალი დაინახა: საძინებლიდან სააბაზანოსკენ მიმავალი სისხლიანი ბილიკი, მიგდებული ფლოსტი, ხელისგულის ფორმის იდუმალი წითელი ნაფიფქი კედელზე. კარი გამოაღო.

ის რაღაც საწოლზე იყო. გაუგებარი ქმნილება ჰენრიმ სინდიოფალას თუ ვირზაზუნას მიაშვავსა მოკვეთილი ფეხებითა და გრძელი, გასისხლიანებული კუდით, მომყოლივით რომ დასთრევდა. ამგვარი ცხოველი ცხოვრებაში არ ენახა – მხოლოდ ბოსტონის ოკეანერიუმში მცურავ მურენას ჰქონდა ასეთივე არაბუნებრივად დიდი შავი თვალელები. და კიდევ ერთი მსგავსება: როდესაც ქმნილებამ პირის მოვალეობის შემსრულებელი რუდიმენტული ნაპრალი გააღო, საშინელი, თხელი, გრძელი ფოლადის ნემსებივით ეშვები გამოუჩნდა. მის უკან, სისხლით გაჟღენთილ ზეწარზე, ასე თუ უფრო მეტი მონარინჯისფრო და მოყავისფრო ბილიარდის ბურთის ზომის, მომწვანო მღვრიე

ლორწოთი დაფარული კვერცხი იდო. ყოველ მათგანში თმის ღერის მსგავსი დაცურავდა თუ ირხეოდა.

სინდიოფალას მსგავსი ქმნილება კუდზე ისე წამოიძარტა, როგორც გველი – შემლოცველის კალათადან, და საწოლზე – ჯოუნსის საწოლზე – შეირხა, მაგრამ ეტყობოდა, რომ მოძრაობის თავი არ ჰქონდა. მბრწყინავი შავი თვალები სიძულვილით ენთო. კუდი (ჰენრის აზრით, ის საცეცს უფრო ჰგავდა) ნერვიულად დასცხო ზეწარს, შემდეგ კი, რამდენადაც შეეძლო, კვერცხებს გადაეფარა, თითქოსდა შთამომავლობის დასაცავად.

მოულოდნელად, ჰენრიმ გააცნობიერა, რომ ტორაზინით გაჭყეპილი უმწეო ფსიქოპათივით მონოტონურად იმეორებს სიტყვა „არა“-ს. კონდახი მხარზე მიიკრა, თვალი მოჭუტა და რეპტილიის მოუსვენარი თავი მიზანში ამოიღო. მან იცის, ეს რა არის, ეს მანც იცის კარგად, – ცივად გაიფიქრა ჰენრიმ და სასხლეტს თითი გამოჰკრა.

ახლოდან ისროდა და ქმნილებას ტყვიის აცილების შესაძლებლობა არ ჰქონდა – ან ძალა გამოლეოდა კვერცხების დადების შემდეგ, ან სიცივეს ვერ უმკლავდებოდა: ღია კარიდან ქარი უბერავდა და „კედელში გაკეთებულ ხვრელში“ საკმაოდ ციოდა. ოთახში გამაყრუებელი სროლის ხმა გაისმა, ქმნილების წამოწეული თავი ნაფლეთებად იქცა, იქიდან გამოტყორცნილი მოწითალო სითხე კი კედელს შეეშხეფა და ჩამოიღვენთა. სისხლს იგივე შეფერილობა ჰქონდა, რაც სოკოს, თავწაცლილი სხეული საწოლიდან ჩამოცურდა და ტანსაცმლის გროვაზე დაეცა, რომელიც ჰენრიმ ვერ იცნო: ყავისფერი ქურთუკი, ნარინჯისფერი ყილეტი, აკეცილი ჯინსის შარვალი (სკოლაში ასეთ ჩაცმულობას სამარცხვინოდ მიიჩნევდნენ და მას, ვინც დანარჩენებს ანგარიშს არ უწევდა, „სოფლელებს“ ეძახდნენ). საწოლიდან რამდენიმე კვერცხიც ჩამოვარდა და ჯოუნსის ტანსაცმელსა და წიგნებზე დაეცა, გადარჩა. მაგრამ ზოგიერთი იატაკზე დავარდა და გატყდა. მათგან ნელა გადმოდინდა მღვრიე, ლაყე კვერცხის

მსგავსი სითხე – დაახლოებით ერთი სუფრის კოვზი თითოეულიდან. შიგნით ბეწვები იზნიქებოდნენ და იგრიხებოდნენ და ციცქნა შავი, გაბოროტებით მომზირალი თვალებით ლამის შეეჭამათ ჰენრი, რომელსაც იმათ შემხედვარეს, ყვირილი უნდოდა.

შეტრიალდა და ბარბაცით გავიდა ოთახიდან. ფეხების მოხრა უჭირდა – თითქოს გაშეშებოდა. თავს იმ მარიონეტად გრძნობდა, ძაფების მეშვეობით რომ ამოძრავებს ვილაც, უეჭველად ახალბედა.

ჰენრიმ არ იცოდა, სად მიდიოდა, სანამ სამზარეულოს არ მიაღწია და პატარა კარადის კარი არ გამოაღო.

– მე ეგმენი ვარ, ეგმენი ვარ. ლომვეშაპი ვარ! ჰუ-ჰუ-ჰუ!

კი არ მღეროდა, ხმამაღლა, საზეიმო, თეატრალური ტონით კითხულობდა, მეცხრამეტე საუკუნის უნიჭო მსახიობის ხმით. რეპერტუარში ეს არასდროს ჰქონია. თვალწინ – ღმერთმა იცის, რატომ – ედვინ ბუტი<sup>112</sup> წარმოუდგა დ'არტანიანის სამოსით, პლუმაჟიანი შლაპითა და მისთანებით, ჯონ ლენონის ლირიკას დეკლამირებდა. ჰენრის ორი მკაფიო შეძახილი აღმოხდა:

– ჰა! ჰა!

მგონი, ვგიჟდები, – გაიფიქრა მან... მაგრამ ეს კარგიც იყო. ისევ დ'არტანიანის პირით წარმოთქმული „მე ლომვეშაპი ვარ“ ჯობდა, ვიდრე იმ საზიზღარი ქმნილების სისხლით მორწყული კედელი, აბაზანიდან გადმოკიდებული, სოკოთი დაფარული „დოქტორი მარტენსი“ და ყველაზე საძაგელი – გატეხილი კვერცხები, საიდანაც რხევარხევით გამოდიოდნენ თვალებიანი ბეწვები. და ყველა თვალი მას მისჩერებოდა.

გვერდზე გასწია ჭურჭლის სარეცხი სითხით სავსე ფლაკონი, ნავვის ვედროც, და იპოვა, რასაც ეძებდა: „სპარქსი“ – ყვითელი ქილა ცეცხლგამჩენი ნარევით, მაყალისთვის. მარიონეტების თეატრის გამოუცდელმა მსახიობმა, რომლის ხელშიც ის ჩავარდა, ჰენრის ხელი კონვულსიურად ააძაგძაგა, შემდეგ კი ქილაზე თითების შემოჭერის

<sup>112</sup> XIX ს-ის ამერიკელი მსახიობი.

ნება მისცა. ჰენრიმ ის სასტუმრო ოთახში გაიტანა, გზად კი, ბუხრის თავზე ჩამოკიდებული თაროდან, ასანთის კოლოფი აიღო.

– მე ვარ ის და შენ ხარ მე და ჩვენ ვართ ყველანი, – განაცხადა მან და სწრაფად დაბრუნდა ჯოუნსის საძინებელ ოთახში, სანამ მის თავში მყოფი შეშინებული არსება მის გაკონტროლებას მოასწრებდა, შემოაბრუნებდა და გაქცევას აიძულებდა. პიროვნება, რომელიც აიძულებდა, გაქცეულიყო, და იქამდე ერბინა, სანამ გონებას არ დაკარგავდა. ან არ მოკვდებოდა.

საწოლზე კი კვერცხები ერთიმეორის მიყოლებით სკდებოდა. ოცდახუთი თუ მეტი ბეწვი სისხლით გაჟღენთილ ზეწარზე დახობავდა და ჯოუნსის ბალიშზე იკლაკნებოდა. ერთმა მათგანმა გირჩივით თავი ასწია და გაბრაზებით დასჭყვივლა ჰენრის. მაღალი და გამკვივანი ხმა ჰქონდა, მაგრამ ჰემრიმ ძლივს გაიგონა.

საკუთარ თავს შეყოვნების უფლებას არ აძლევდა. რომ შეჩერებულყო, ყველაფრის ხელმეორედ დასაწყებად ძალა აღარ ეყოფოდა (გასვლა მხოლოდ ერთი კარიდან შეეძლო). ჰენრიმ საწოლისკენ ორი ნაბიჯი გადადგა. ერთი ბეწვი იატაკზე ჩამოსრილდა და მიკროსკოპში მოთავსებული კუდზე შემდგარი სპერმატოზოიდივით მისკენ გაცოცდა. ჰენრიმ ფეხი დააბიჯა, იმავდროულად ქილას წითელი პლასტმასის თავსახური მიახრახნა. ცეცხლგამჩენი სითხე უხვად მოასხა საწოლზე, კედლებსა და იატაკზე. მასთან შეხებისთანავე ძაფისებური ქმნილებები ახალდაბადებული კნუტებივით საწყალობლად აკნავლდნენ.

– ეგმენი... ეგმენი... ლომვეშაპა!

ჰენრიმ მორიგ ბეწვს დააბიჯა და შეამჩნია, რომ ერთი არსება შარვლის მარჯვენა ტოტზე ჩაებლაუჭა და კუდზე შემდგარი ჯინსის სქელი ქსოვილის გაგლეჯას ცდილობდა ჯერ კიდევ რბილი კბილებით.

– ეგმენი, – ჩაილაპარაკა ჰენრიმ და ქმნილება მარცხენა ფეხით



მოიცილა. იატაკზე მიასრისა და მოულოდნელად იგრძნო, რომ ოფ-  
ლში იწურებოდა. გარეთ რომ ასეთ მდგომარეობაში გასულიყო  
(არადა, გასვლა მოუწევდა, იქ ვეღარ დარჩებოდა), ფილტვების ან-  
თება და სიკვდილი გარანტირებული ჰქონდა.

– აქ ვერ დავრჩები, ვერ მოვისვენებ! – წარმოთქვა ჰენრიმ ახალ-  
შექმნილი მაღალფარდოვნებით და ასანთის კოლოფი გახსნა, მაგრამ  
ხელები ისე უკანკალებდა, რომ ნახევარი იატაკზე დაუცვივდა. სულ  
უფრო მეტი ძაფისებური მატლი მოიწევდა მისკენ. შესაძლოა, ბევრი  
არაფერი გაეგებოდათ, მაგრამ ის კი იცოდნენ, რომ მათ წინაშე მტე-  
რი იდგა. ეს კარგად იცოდნენ.

ჰენრიმ, როგორც იქნა, ასანთის ღერი აიღო და ცერი თავზე მი-  
აჭირა. ეს ფოკუსი პიტმა ასწავლა დიდი ხნის წინ. აბა, მეგობარი რის  
მეგობარია, თუ ასეთი გართობა არ გასწავლა! ახლა მისი რიგია,  
ძველ მეგობარს, ბივერს, ვიკინგების შესაფერისი დაკრძალვა უნდა  
მოუწყოს და ამასთან, ეს საზიზღარი, მომაბეზრებელი პატარა არსე-  
ბებიც მოსპოს.

– ეგმენ!

მან ასანთს გაკრა და ცეცხლიც გაჩნდა. დამწვარ გოგირდს ისე-  
თივე სუნი ჰქონდა, სახლში შემოსვლისას რომ იგრძნო. ზორბა, მძი-  
მეწონიანი ქალის გაზების მყრალი სუნი.

– ლომვეშაპავ!

ასანთი საწოლთან დააგდო, სადაც ცეცხლგამჩენი სითხით გაჟ-  
ღენთილი საბანი ეგდო. ღერის გარშემო ცოტა ხანს პატარა ცისფერი  
ალი კიაფობდა და ჰენრის ეგონა, რომ ჩაქრებოდა, მაგრამ ამ დროს  
ჩუმად იფეთქა და საბანქვეშ მოზრდილი ყვითელი ცეცხლი გაჩნდა.

– Hუ-ჰუ-ჰუ!

ცეცხლის ენები ზეწარს მოედო და წითელი შავად აქცია, შემდეგ  
ლორწოთი დაფარულ კვერცხებსაც გადასწვდა, გემო გაუსინჯა და  
მოეწონა. კვერცხები ტკაცატკუცით სკდებოდა ცეცხლში გახვეული  
მატლების კნავილის ფონზე. მღვრიე სითხე საწოლზე იღვრებოდა

და ცეცხლთან შეხებისთანავე შიშინს იწყებდა.

ჰენრი ზურგით წავიდა კარისკენ, თან ოთახში სითხის მოსხმას განაგრძობდა. ნავაჰოს ხალიჩის შუამდე მისულს ქილა დაუცარიელდა. მოისროლა, ასანთის მეორე ღერი აანთო და იატაკზე დააგდო. ამჯერად აფეთქება ტაშივით გაისმა და ნარინჯისფერი ალი ავარდა. ჰენრის ოფლისგან ალაპლაპებულ სახეში სიმხურვალე ეცა და მოულოდნელად საოცრად მოუნდა, რესპირატორები მოეშორებინა და ცეცხლში ამაყად შეებიჯებინა. სალამი, სიცხევე. სალამი, გაზაფხულო, გამარჯობა, წყვილიალო, ჩემო ძველო მეგობარო!

იგი მარტივმა და გონივრულმა აზრმა შეაჩერა. თუ თავს არ შეიკავებდა, მასში მთვლემარე ყველა ემოცია გაიღვიძებდა და წამოჰყოფდა თავს. დაე, დაწვრილებით ვერასდროს გაეგო, რა მოხდა იქ, მაგრამ იმის პასუხს ხომ მაინც მიიღებდა, ვინ მართავდა ვერტიმფრენებს და ვინ ხოცავდა ცხოველებს. თუ, რასაკვირველია, მასაც იგივე ბედი არ ელოდა.

კართან მისულ ჰენრის ისეთი მკაფიო მოგონება ეწვია, რომ გული აუკვნესდა: ბივერი მუხლებზე დგას დადიტსის წინ, რომელიც ბოტასის უკუღმა ჩაცმას ცდილობს. „არ გინდა, ბოტასი მოგარგო?“, ეუბნება ბივერი. დადიტსი მას გულის ამარწყებელი გაოცებით, ფართოდ გახელილი თვალებით, სიყვარულით შესცქერის და ეკითხება: „ასი მარგო?“

ჰენრი კვლავ ატირდა.

– მშვიდობით, ბივ, – ჩაიჩურჩულა მან, – მთელი გულით მიყვარხარ, მეგობარო.

თქვა და სიცივეში გავიდა.

## 6

იგი „კედელში გაკეთებული ხვრელის“ შორეული კუთხისკენ გაემართა, სადაც შეშა ეწყო. იქვე ეგდო ბრეზენტის ძველი, გახუნებუ-

ლი, მოთეთრო ნაჭერი, რომელიც მიწას მიჰყინოდა. ჰენრიმ მას ორივე ხელი ჩაავლო და მოქაჩა, დიდხანს იწვალა მის გამოსათავისუფლებლად. ბრეზენტის ქვეშ თოვლში სასიარულო მრგვალი თუ გრძელი თხილამურები, ციგურები და ყინულის წარღვნის დროინდელი საბურღიც კი აღმოაჩინა.

ჰენრი კარგად მივიწყებულ, ზამთრის ამ მოწყობილობებს დააცქერდა და მოულოდნელად საშინელი დაღლილობა იგრძნო... არა, დაღლილობა კიდევ მსუბუქი ნათქვამია. მან ათი მილი გაირბინა, თანაც საკმაოდ სწრაფად, ავარიაშიც მოყვა და ბავშვობის მეგობრის სხეულსაც მიაგნო. დანარჩენი ორიც სამუდამოდ დაკარგულად მიაჩნდა.

თვითმკვლევლობა ასე რომ არ ამკვიატებოდა, ახალ გაგიჟებული ვიქნებოდი, – გაიფიქრა მან და გაეცინა. სიცილი კარგია, მაგრამ დაღლილობას ვერ შველის. იქაურობას უნდა გასცლოდა. ხელისუფლების წარმომადგენელი ეპოვა და მომხდარის შესახებ ეცნობებინა. შესაძლოა, ყველაფერი უკვე ისედაც იცოდნენ, – სროლა მოწმობდა, რომ ნამდვილად იცოდნენ, თუმცა პრობლემის გადაწყვეტის მათეული მეთოდები ჰენრის გულზე არ ეხატებოდა, – იქნებ, სინდიოფალასა და მისი კვერცხების შესახებ ჯერ არავის შეეტყობინებინა? ჰენრი დელვინი შეატყობინებს. მასზე უკეთ ამას ვერავინ გააკეთებს. ბოლოს და ბოლოს, ეგმენია, რაც უნდა იყოს.

თოვლში სასიარულო მრგვალი თხილამურის ტყავის თასმები თაგვებს ისეთ დღეში ჩაეგდოთ, რომ ხელის შეხებაზეც კი ნაწილებად იშლებოდა. მაგრამ გულმოდგინედ გადარჩევის შემდეგ მანაც მიაგნო იმ ადგილებში სასიარულოდ გამოსადეგ მოკლე თხილამურს, რომელიც ისე გამოიყურებოდა, თითქოს უკანასკნელად ორმოცდაათი წლის წინ გამოიყენეს. სამაგრებს ჟანგი მოსდებოდა, მაგრამ როდესაც ორივე ცერით მიაწვა, ადვილად დაჰყვა. მათში ჩექმების ჩასმაც მოახერხა.

ქოხიდან მსუბუქი ტკაცატკუცი გაისმა. ჰენრიმ ხელისგული კედელს მიადო და სითბო იგრძნო. მანსარდის კარნიზთან დაყრილ თხილამურის ჯოხებს აბლაბუდა მოსდებოდა. ჰენრის არ უნდოდა მათზე შეხება, – ჯერაც თვალწინ ედგა საზიზღარი ქმნილებების დაკლაკნილი სხეულები, – მაგრამ რადგან ხელთათმანი ეცვა, გაბედა, ქსელი მოაცილა და სასწრაფოდ შეუდგა გადარჩევას. ფანჯარაში, ზედ მის თავთან, ნაპერწკლები ცეკვავდა.

როგორც იქნა, შეარჩია ორი ცალი, რომელიც ცოტათი მოკლე აღმოაჩნდა. ძველი თხილამურითა და მხარზე გადაკიდებული თოფით უხერხულად გაემართა სახლის კუთხისკენ, საკუთარი თავი ნაცისტ დესანტს მიაშვავდა ალისტერ მაკლინის<sup>113</sup> რომანიდან. ჰენრიმ უკან სწორედ მაშინ მიიხედა, როდესაც ფანჯარა, სადაც ის იდგა, ისეთი ხმაურით ჩაიმსხვრა, თითქოს ვილაცამ მეორე სართულიდან ქაშანურის დიდი ჯამი ჩამოაგდო. ჰენრი მოიხარა, იგრძნო, როგორ შეესო ნამსხვრევები მის ქურთუკს. ზოგიერთი თმაშიც გაეჩხირა. მიხვდა, რომ ღროზე გაასწრო, თორემ გახურებული შუშა მთელ სახეს დაუსისხლიანებდა, იქნებ დაბრმავებულიყო კიდევ.

ჰენრიმ ცას ახედა, მოხრილი ხელისგულები პირთან მიიტანა და ელ ჯოლსონივით<sup>114</sup> შესძახა:

– მანდ, ზევით, ვილაცას ვუყვარვარ! ალილუია!

ცეცხლის ენები ფანჯრიდან შემოიჭრა და უკვე კარნიზებს ლოკავდა. ჰენრის სკდომისა და მსხვრევის ხმა ესმოდა. ლამარ კლარენდონის მონადირის სახლი, რომელიც მამამისს მეორე მსოფლიო ომის დამთავრებისთანავე აეშენებინა, ახლა მხიარულად იწვოდა. ცხადია, ეს სიზმარი იყო.

ჰენრიმ სახლს საკმაოდ შორიდან შემოუარა, ხედავდა, საკვამურიდან როგორ ბლუჯებად ისროდა ნაპერწკლებს ღრუბლებისკენ. ჯერ – აღმოსავლეთით, სადღაც, კვლავ ტყვიამფრქვევი კაკანებდა,

---

<sup>113</sup> მძაფრსიუჟეტიანი რომანების ავტორი.

<sup>114</sup> ამერიკელი მომღერალი და მსახიობი.

შემდეგ დასავლეთით აფეთქდა რაღაც... ნეტა რა ხდებოდა ღვთის სახელით? ვერაფერს ხვდებოდა. მაგრამ თუ ადამიანებამდე სალ-სა-ლამათი მიაღწევდა, ალბათ, ყველაფერს უამბობდნენ.

– თუ მეც მონადირის ჩანთაში არ გადამიძახეს, – თქვა მან. მისი ხმა ყვავის ჩხავილივით გაისმა და მიხვდა, რომ წყურვილით იხრჩობოდა. იგი ფრთხილად დაიხარა (ათ წელზე მეტი გასულიყო, რაც თხილამურებზე არ მდგარა), ორივე ხელით თოვლი აიღო, პირში ჩაიტენა და დაელოდა, როდის გადნებოდა და ყელს ჩაუსველებდა. ამას ვერაფერი შეედრებოდა! ჰენრი დელვინი, ფსიქიატრი და „ჰემინგუეის გამოსავლის“ შესახებ სტატიის ავტორი, ჭალარაშერეული მამაკაცი, რომელიც ოდესღაც ყმაწვილი იყო, მოგვიანებით კი მალალ, გამხდარ, სათვალთან ჭაბუკად იქცა (სათვალე ყოველთვის ცხვირის წვერზე უტურდებოდა), მამაკაცი, რომლის მეგობრებიც ან დაიღუპნენ, ან გაიქცნენ, ან ისე შეიცვალნენ, რომ ველარავინ იცნობდა, სწორედ ეს მამაკაცი იდგა ახლა თხილამურზე იმ სახლის კართან, სადაც აღარასოდეს დაბრუნდებოდა, ხარბად ჭამდა თოვლს, როგორც „შრაინის“ ცირკის წარმოდგენაზე მოხვედრილი ბიჭი – „ბამბის ნაყინს“; იდგა და უყურებდა, როგორ იწვოდა დედამიწაზე უკანასკნელი ადგილი, სადაც იგი თავს კარგად და მყუდროდ გრძნობდა. ალს უკვე კედრის ყავარში გაელწია. სახურავზე თოვლი დნებოდა და ცხელი წყალი შიშინით მიექანებოდა წყალსადინარი მილებისკენ. ცეცხლის ენები სტუმართმოყვარე მასპინძელივით უხმობდნენ და ეპატიუებოდნენ ახალმოსულებს, – იჩქარეთ, დროზე მოდით, სანამ ყველაფერი ფერფლად ქცეულაო. გრანიტის ფილაზე დაგებული მოწითალო ოქროსფერი საფენი დაიწვა და ნაცრისფრად იქცა.

– კარგია, – ჩაიბურტყუნა ჰენრიმ, რომელიც გაუცნობიერებლად უჭერდა ხელებს თხილამურის ჯოხებს, – ძალიან კარგია.

კიდევ თხუთმეტიოდე წუთი იდგა, მერე ველარ გაუძლო, ცეცხლს ზურგი აქცია და იმ გზას გაუყვა, რომლითაც მოვიდა.

სადღა იყო ძველებური სისწრაფე. ოცი მილი უნდა გაეცლო (უფრო ზუსტად, 22, 02 შეუსწორა საკუთარ თავს) და თუ გარკვეული სიჩქარით არ იმოძრაებდა, მიზანს ვერასდროს მიაღწევდა. ცდილობდა, თოვლმავლის ნაკვალევს გაჰყოლოდა, მაგრამ იმაზე გაცილებით ხშირად ისვენებდა, ვიდრე აქეთობას.

ეჰ, მაშინ ხომ უფრო ახალგაზრდა ვიყავი, – გაიფიქრა ჰენრიმ ოდნავ ირონიულად.

მას დაავიწყდა, რომ ჯეფერსონტრექტზე დრო გაჩერდა, ამიტომ ორჯერ დახედა საათს. ცა თანდათან მოიქუფრა და დროის განსაზღვრა შეუძლებელი გახდა. ცხადია, ჯერაც დღე იყო, მაგრამ არ იცოდა, მალე მოსაღამოვდებოდა თუ არა. ჩვეულებრივ, ამას შიმშილის გრძნობა კარნახობდა ხოლმე, მაგრამ რა მადა შერჩებოდა მას შემდეგ, რაც იხილა? საზიზღარი ქმნილება ჯოუნსის საწოლზე, კვერცხები და ბეწვები შავი, გადმოკარკლული თვალებით, აბაზანიდან გადმოკიდებული ფენსაცმელი. გრძნობდა, რომ პირში ლუკმასაც ვერ ჩაიდებდა... რომც ჩაედო, ყველაფერს ზიზლით შეხედავდა, ყველაფერს – ოდნავ მოწითალო შეფერილობით. და სოკო? არა, გმადლობთ.

მალე აღმოაჩინა, რომ თხილამურით სრიალი, განსაკუთრებით ასეთ ადგილებში, ველოსიპედის ტარებას ჰგავდა: ერთხელ შეძენილ უნარს არასდროს დაკარგავდით. პირველ გორაკზე ასვლისას ჰენრი დაეცა – თხილამურები დაუცურდა და ცხვირით თოვლში ჩაეფლო. სამაგიეროდ, თამამად დაეშვა ფერდობზე. მართალია, კოლბოხებზე კინალამ წონასწორობა დაკარგა, მაგრამ თავი შეიმაგრა. გაახსენდა, რომ თხილამურები არაქისის პრეზიდენტის<sup>115</sup> დროიდან არ შეეზეთათ. მაგრამ თუ თოვლმავლის მიერ გატკეპნილ გზაზე ივლიდა, მიზანს მიაღწევდა. იქაურობა მხეცების ნაკვალევით იყო მოფენილი – დიფქათროუდზე ამდენი კვალი ცხოვრებაში არ ენახა. რამდენიმე

<sup>115</sup> იგულისხმება ჯიმი კარტერი, აშშ-ის პრეზიდენტი 1977-1981 წწ-ში.

საცოდავ ცხოველს გზაზე ევლო, დანარჩენები დასავლეთიდან აღმოსავლეთით გადასულიყვნენ. დიფქათი ზარმაცად მიიზღაზნებოდა ჩრდილო-დასავლეთისკენ, დასავლეთი კი ცალსახად ის მხარე იყო, რომელსაც ცხოველთა ადგილობრივი პოპულაციები გაუბრუნდნენ.

ვმოგზაურობ, – გაიფიქრა მან, – იქნებ, ოდესმე ვინმემ დაწეროს კიდევ ეპიკური პოემა „ჰენრის მოგზაურობა“.

– დიახ, – თქვა მან ხმამაღლა, – დრო თანდათან შენელდა, რეალობა გამრუდდა, ეგემნი წინ წავიდა, უკან აღარ დაბრუნდა.

მერე გაეცინა, მაგრამ სიცილი ხველაში გადაეზარდა. ჰენრი გზიდან გადავიდა, თოვლი აიღო, პირში ჩაიღო და სიამოვნებით გადაყლაპა.

– გემრიელია... და სასარგებლოც! – განაცხადა მან, – თოვლი! ამიერიდან არავითარი საუზმე!

მან ზევით აიხედა, რაც შეცდომა იყო. წამით თვალთ დაუბნელდა. თავბრუ დაესხა და კინალამ წაიქცა. მაგრამ შეტევა ისევე სწრაფად გაქრა, როგორც დაიწყო. ცა უფრო საშინლად მოიქუფრა. თოვას აპირებდა? ღამდებოდა? თუ ორივე ერთად?

დაძაბულობისგან მუხლებსა და კოჭებში სისუსტეს გრძნობდა, ხელები, რომლებითაც თხილამურის ჯოხებს აწვეებოდა, სტკიოდა. უკვე შეეგუა აზრს, რომ გოსლინის მალაზიას დაბნელებამდე ვერ მიადწევდა, მაგრამ ახლა, როდესაც პირში თოვლის გუნდას ატრიალებდა, მიხვდა, რომ შეიძლებოდა, საერთოდაც ვერ მიეღწია იქამდე.

ჰენრიმ თეძოზე შემოხვეული მაისური მოიხსნა და თავზარი დაეცა, როდესაც ლურჯ ჯინსზე ხასხასა წითელ ძაფს მოჰკრა თვალი. გულმა ისეთი ბაგაბუგი აუტეხა, რომ თვალწინ კვლავ შავი წერტილები აუთამაშდა. აკანკალებული ხელი იქით წაიღო.

რის გაკეთებას აპირებ? – გაუბრაზდა საკუთარ თავს, – გინდა ისე მოიცილო, როგორც უბრალო ძაფი?

მაგრამ სწორედ ასე მოიქცა, რადგან ეს მართლაც „წითელი გეტრების“ ემბლემიანი მაისურიდან გამომდგრალი, უბრალო ძაფი აღმოჩნდა. ხელი გაუშვა და შეჰყურებდა, როგორ ეშვებოდა ის თოვლზე. შემდეგ თეძო კვლავ მაისურით შეიხვია. იმ ადამიანის კვალობაზე, რომელსაც სულ რაღაც ოთხი საათის წინ ვერ გადაეწყვიტა, რა აერჩია: თოკი და მარყუჟი, აბაზანა და პოლიეთილენის პაკეტი, მაღალი ხიდი თუ მუდამ პოპულარული „ჰემინგუეის გამოსავალი“, ზოგიერთ წრეებში „მშვიდობით, პოლიციელოს“ „სახელით რომ იცნობდნენ, ზედმეტად დაშინდა, თუმცა მხოლოდ ერთი-ორი წამით.

ვინაიდან არ მინდა, რომ ასე წავიდე, – უთხრა საკუთარ თავს, – არ მინდა, რომ ცოცხლად შემჭამონ...

– პლანეტა X-დან მოსულმა საზიზღარმა სოკოებმა, – დააზუსტა. ეგემენმა გზა განაგრძო.

## 8

სამყარო დაპატარავდა, როგორც ყოველთვის ხდება, როდესაც დაუძღურების ზღვარზე ვართ, სამუშაო კი არ დაგვისრულებია, მეტიც, დასრულების პირიც კი არ უჩანს. ჰენრის ცხოვრება ოთხ მარტივ მონოტონურ მოძრაობამდე – ხელებითა და ფეხებით თოვლში ორი თხილამურისა და ორი ჯოხის გადაადგილებამდე დავიდა. ტკივილი გაქრა, დროებით მაინც, თითქოს სხვა ზონაში შეაბიჯა.

გაახსენდა, რომ მსგავსი რამ საშუალო სკოლაშიც შეემთხვა, როდესაც „დერელი ვეფხვების“ კალათბურთის გუნდის ძირითად ხუთეულში ცენტრალურ თავდამსხმელად გაამწესეს. ნახევარფინალის გადამწყვეტ საპლეიოფო მატჩში, მესამე ტაიმის დამთავრებამდე სამი წუთით ადრე, ოთხიდან სამი საუკეთესო მოთამაშე მოედნიდან გავიდა. მწვრთნელმა ჰენრი დატოვა და მარტო უმკლავდებოდა. სულის მოთქმას მხოლოდ ტაიმაუტების ან საჯარიმოების დროს თუ ახერხებდა. ბოლომდე გაუძლო, მაგრამ იმ დროისთვის, როდესაც



მატჩის დამთავრების მაუწყებელი სასტვენის ხმა გაისმა (“ვეფხვებმა” სამარცხვინოდ წააგეს), იგი თითქოს ბედნიერების ნისლში ცურავდა. მამაკაცების გასახდელისკენ მიმავალს ფეხები ეკეცებოდა, ის კი მაინც სულელურად იღიმებოდა. სამაგიეროდ, გაოფლილმა, წითელმაისურიანმა თანაგუნდელებმა მოწონების შეძახილით, სტვენითა და ტაშით დააჯილდოეს.

აქ ვერავინ დაუკრავდა ტაშს, ვერავინ დაუსტვენდა, მხოლოდ აღმოსავლეთიდან ისმოდა ტყვიამფრქვევების კაკანი, შესაძლოა, ოდნავ შენელებული, მაგრამ კვლავინდებურად მკვეთრი.

უფრო შემადრწუნებელი კი ცალკეული გასროლის ექო იყო, სადღაც, წინიდან. გოსლინის მალაზიიდან? ამას დაზუსტებით ვერ იტყვოდა.

უეცრად გააცნობიერა, რომ „ემმაკისადმი თანაგრძნობას“ მღეროდა (“დარწმუნდით, დალახვროს ეშმაკმა, რომ პილატემ ხელები დაიბანა და მისი ბედი გადაწყვიტა, გმადლობთ, თქვენ შესანიშნავი მსმენელები იყავით, ღამე მშვიდობისა”) – სიმღერას, რომელიც „როლინგ სტოუნზის“ შემოქმედებიდან ყველაზე ნაკლებად მოსწონდა. თავს ძალა დაატანა და გაჩერდა, როდესაც მიხვდა, რომ ამ სიმღერის სიტყვები და საავადმყოფოში მყოფ ჯოუნსიზე მოგონებები ერთმანეთში ერეოდა; ჯოუნსი გასული წლის მარტში რომ ნახა, არა ღონემიხდილი, არამედ რალაცნაირად დაპატარავებული იყო, თითქოს მისი რაობა გარეთ გამოსულიყო, რათა დამცავ გარსში მოექცია ძალადობისგან დასახიჩრებული და აღშფოთებული სხეული. ჰენრის ეგონა, რომ ჯოუნსი მოკვდებოდა და თუმცა ის გადარჩა, ჰენრი მიხვდა, რომ სწორედ მას შემდეგ დაფიქრდა თვითმკვლელობაზე. სახეების გალერეას, ღამლამობით რომ არ ასვენებდა, – მამის ნიკაპზე ჩამოღვრილ მოთეთრო-მოცისფრო რძეს, გასასვლელისკენ გაქცეულ ბარი ნიუმენის ათრთოლებულ დუნდულებს და რიჩი გრენადოს, რომელიც ატირებულ, თითქმის შიშველ დადიტსს ძაღლის განავალს აძალებდა, ახლა ჯოუნსის გამხდარი სახე და ჩაცვნილი თვალები

დაემატა, მანქანის მიერ ყოვლად უმიზეზოდ და უსაფუძვლოდ გატანილი, ქვაფენილზე გაშხლართული ჯოუნსი, მოუსაველეთში წასასვლელად გამზადებული ჯოუნსი. ექიმების მტკიცებით, მდგომარეობა სტაბილური იყო, თუმცა მეგობრის თვალეზში ჰენრი მოახლოებულ აღსასრულს ხედავდა. თანაგრძნობა ეშმაკისადმი? კარგი, რა. არც ღმერთი იყო, არც ეშმაკი და არც თანაგრძნობა. და თუ ამას მიხვდით, ცუდად წაგვლიათ საქმე. თქვენ – „ახალი ამერიკის კულტურად“ წოდებული სიცილის დარბაზის მოყვარულ, გადახდისუნარიან მნახველს თითებზე ჩამოსათვლელი ღლეები დაგრჩენიათ.

მას კვლავ მოესმა საკუთარი სიმღერა – „როგორც ჩანს, ჩემი თამაშის ხასიათი უხერხულობის განცდას ალგიძრავს...“ – და ისევ დაატანა თავს ძალა და გაჩუმდა. მერე რა? რაღაც აბდაუბდა, უაზრობა. სულელური, მაგრამ გემრიელი, „ახალი ამერიკის კულტურით“ გაჟღენთილი ბოდვა. „ღები პოინტერების“ სიმღერაზე რის თქმა შეიძლებოდა? ცუდი იდეა ნამდვილად არ იყო.

ჰენრი მოშარიშურე თხილამურებსა და თოვლმავლის მიერ გაყვანილ სწორ ჰორიზონტალურ ნაკვალევს დაჰყურებდა. მან სიმღერა წამოიწყო, მაგრამ მალე მელოდია მონოტონური, უმოტივო ზუზუნჩურჩულისკენ გაექცა, პერანგი ერთიანად ოფლით გაეჟღინთა, ცხვირიდან წამოსული წვინტილი ზედა ტურზე მიეყინა, მაგრამ კვლავაც ჯიუტად იმეორებდა:

– ვიცი, რომ შევძლებთ, ვიცი, რომ შევძლებთ, ვიცი, რომ ამას შევძლებთ, დიახ, ჩვენ შევძლებთ, შევძლებთ, დიახ, ჩვენ შევძლებთ, დიახ, შევძლებთ...

უკეთესი იყო. გაცილებით უკეთესი. და ეს ყველაფერი ისევე მიეკუთვნებოდა „ახალი ამერიკის კულტურას“ როგორც „ფორდის“ პიკაპის გაჩერება ბოულინგის ცენტრის პარკინგზე, როგორც ქალის საცვლების ფასდაკლებით გაყიდვა ჟრPენნეყ-ში, როგორც მკვდარი როკვარსკვლავი აბაზანაში.

როგორც იქნა, ქოხს მიაღწია, სადაც პიტი და ქალი დატოვა. პიტი არსად ჩანდა. კვალიც კი არ დაეტოვებინა.

ჩარდახის დაჟანგული თუნუქის სახურავი ჩამოქცეული დახვდა. ჰენრიმ ასწია და შეიხედა დასარწმუნებლად, რომ პიტი იქ არ იყო. პიტი იქ მართლაც არ იყო, სამაგიეროდ, ქალი ნახა. როგორც ჩანს, იგი ან თვითონ მიფოფხდა იმ ადგილამდე, ან ვილაცამ გადააადგილა იქიდან, სადაც ჰენრიმ წასვლამდე დატოვა. დაახლოებით იმ დროს უწია სიკვდილმა. ტანსაცემელსა და სახეზე ისეთივე ჟანგისფერი ობი მოსდებოდა, მონადირეების სახლს რომ მოულო ბოლო, მაგრამ ჰენრიმ ერთი საინტერესო განსხვავება შეამჩნია: მართალია, ქალზე ამონაყარი ყვაოდა (განსაკუთრებით ნესტოებსა და გახელილ თვალში, საიდანაც ნამდვილი ჯუნგლი ამოსულიყო), არათანაბრად განაწილებული კოლონიები მისი სხეულის უკანა ნაწილში თვალსა და ხელს შუა სუსტდებოდა, ფერმკრთალდებოდა, ნაცრისფრდებოდა და გავრცელებას წყვეტდა. არც წინა მხარეს მოდებული ხავსი იყო უკეთეს მდგომარეობაში: როგორც ჩანს, კოცონი ავრცელებდა სითბოს და ნიადაგი თოვლისგან გაწმენდილიყო. ბუსუსების დაბოლოებებს უკვე ვულკანური ფერფლის ელფერი დასდებოდა.

ჰენრის ეჭვი არ ეპარებოდა, რომ სოკო ილუპებოდა.

დღეც დასასრულს უახლოვდებოდა – ესეც აშკარად ჩანდა. ჰენრიმ დაჟანგული თუნუქის ფურცელი კვლავ ბეკი შუს სხეულსა და მინავლულ ნაკვერჩხალზე დაუშვა, მერე თოვლმავლის დატოვებულ ნაკვალევს გახედა და ძალიან მოუნდა, ისევე, როგორც მაშინ, გვერდით ჰყოლოდა რომელიმე ნატი ბამპო<sup>116</sup>, რომელიც კვალის წაკითხვას თვალდახუჭული შეძლებდა, ან, თუნდაც, ძველი მეგობარი ერკიულ პუარო<sup>117</sup> თავისი პატარა რუხი უჯრულებით.

<sup>116</sup> ფენიმორ კუპერის მოთხრობების გმირი, მონადირე.

<sup>117</sup> აგატა კრისტის ლიტერატურული პერსონაჟი, დეტექტივი.

კვალი ჯერ დანგრეული ქოხისკენ უხვევდა, შემდეგ ჩრდილო-დასავლეთით, გოსლინის მალაზიისკენ მიემართებოდა. იქვე, თოვლზე, მოჩანდა ადამიანის სხეულის მკაფიო ანაბეჭდი და მომრგვალებული ბუსნო მის ორივე მხარეს.

– აბა, რას იტყვი, ერკიულ? – იკითხა ჰენრიმ, – რას უნდა ნიშნავდეს ეს, მონ ამი?<sup>118</sup>

მაგრამ ერკიული დუმდა.

ჰენრი კვლავ აღიღინდა ცხვირში და ბუსნოსკენ დაიხარა. ვერც კი შეამჩნია, როგორ გადაერთო „ღები პოინტერებისგან“ „როლინგ სტოუნზზე“.

საკმარისი შუქი იყო, რათა სხეულის ანაბეჭდის მარცხნივ, სამი ღრმული შეემჩნია. პიტმა უცნაური სიამაყით წაიტრაბახა, – მეგობარმა გოგომ ტანსაცმელი დამიბეჭკა, მაგ ძონძებით სანადიროდ ვერ გაგიშვებო. ჰენრის ისიც გაახსენდა, როგორ თავშესაქცევად, თუმცა ოდნავ სევდიანად მოეჩვენა, რომ პიტმა ბედნიერ მომავალზე ოცნება სიკეთის ამ ერთ უბრალო ფაქტზე ააგო... ფაქტზე, რომელიც იმ გარემოს უკავშირდებოდა, რომელშიც ის ქალბატონი აღიზარდა და ლუდით გაჟღენთილი მეგობრისადმი მის გრძნობებს.

მაგრამ ამას მნიშვნელობა არ ჰქონდა. რაც მთავარია, ჰენრის, ბოლოს და ბოლოს, დედუქციური მეთოდის ამუშავების შესაძლებლობა მიეცა. პიტი ჩამოვარდნილი სახურავის ქვეშიდან გამოძვრა. ჯოუნსი – ან ის, რაც მასში იჯდა, ღრუბელი – გზაზე თოვლმავლით მიდიოდა. მან ჩამოქცეული ქოხისკენ გადმოუხვია და პიტი წაიყვანა.

რატომ?

ჰენრიმ ეს არ იცოდა.

პიტმა ნანგრევებიდან გამოსაძრომად იდაყვები და ჯანმრთელი ფეხი აამუშავა. მაგრამ ჰენრის გატანჯული მეგობრის მიერ თოვლში დატოვებული ყველა ლაქა სოკო როდი იყო. ზოგიერთი გამხმარი

---

<sup>118</sup> ჩემო მეგობარო (ფრ).

სისხლი აღმოჩნდა. მაშასადამე, პიტი დაიჭრა. სახურავის ჩამოვარდნისას? თუ კიდევ მოხდა რამე?

უეცრად ჰენრიმ დაკლაკნილი კვალი შეამჩნია, რომელიც იმ ღრმულს შორდებოდა, რომელშიც პიტი იწვა. ბოლოში რალაც მოჩანდა. თავდაპირველად დამწვარი ტოტი ეგონა. ახლოს მისულმა აზრი შეიცვალა – ის კიდევ ერთი საზიზღარი ქმნილება აღმოჩნდა, ოღონდ მკვდარი, დანახშირებული. ცეცხლისგან გადარჩენილ ნაწილებს ნაცრისფერი დასდებოდა. ჰენრიმ მას ჩექმის ჭვინტი გაჰკრა. ქვეშ პატარა გაყინულ მასას მოჰკრა თვალი. კიდევ კვერცხები. როგორც ჩანს, ეს ქმნილება სიკვდილის წინაც განაგრძობდა კვერცხების დებას.

ჰენრიმ კვერცხებსაც და პატარა ურჩხულის სხეულსაც თოვლი მიაყარა. შემდეგ კვლავ შეიხსნა იმპროვიზებული სახვევი, რათა ჭრილობისთვის შეეხედა, და სწორედ მაშინ მიხვდა, რას მღეროდა. მაშინვე კბილები ერთმანეთს დააჭირა და სიმღერა შეწყვიტა. ჰაერში ახალი, უწყინარი თოვლის ფანტელები დაფარფატებდა.

– რატომ ვმღერი ამას, – ჰკითხა ჰენრიმ თავის თავს, – რატომ ამეკვიატა ეს წყეული სიმღერა?

დასმულ შეკითხვაზე პასუხს არც ელოდა; უბრალოდ, საკუთარი ხმის გაგონება (იმ სიკვდილის სავანეში თუ მოჩვენებების სამყოფელში) ყოფნას უადვილებდა. მაგრამ სრულიად მოულოდნელად მოესმა:

– იმიტომ, რომ ეს ჩვენი სიმღერაა. ეს „გუნდის ჰიმნია, რომელსაც ბრძოლაში წასვლის წინ ვუკრავთ. ჩვენ კრუზის ბიჭები ვართ.

კრუზის? ასე თქვეს? ტომ კრუზის? ხომ არ მოესმა?

აღმოსავლეთით სროლის ხმა თანდათან მიყუჩდა. ცხოველების ხოცვა-ჟლეტა დასრულდა, მაგრამ იქ იყვნენ კაცები, რომლებსაც შეეძლოთ შეუბრალებლად ესროლათ ტყვიამფრქვევიდან, მწვანე ან შავ, და არა ნარინჯისფერ ტანსაცმელში გამოწყობილი ეს მონადი-

რეები, ამ სიმღერას თავისი მოვალეობის შესრულების დროსაც უსმენდნენ და ყასბის შემადრწუნებელ თვლას აგრძელებდნენ:

„ვიჯექი ტანკში გენერლის რანგში, ბლიცკრიგი გახურდა, გვამები აყროლდა... მიხარია თქვენი გაცნობა, ბატონებო, ვიმედოვნებ, მიხვდით, ვინც ვარ“.

ნეტავ, რა ჯანდაბა ხდება აქ? არა ველურ, შესანიშნავ, გადარეულ გარე სამყაროში, არამედ მის საკუთარ თავში? თავის ცხოვრების – დადიტსის გაცნობის შემდგომი ცხოვრების აღქმაში ზოგჯერ კი ჰქონდა გამონათება, მაგრამ მსგავსი არასდროს უგრძნია.

რა იყო ეს? ნუთუ დადგა დრო, ახლოდან დაკვირვებოდა ხაზის ხილვის ახალ, უფრო მძლავრ მეთოდს?

არა. არა, არა, არა.

თავში ისევ ის დამცინავი სიმღერა ჩაესმა:

„გენერლის რანგში... გვამები აყროლდა...“

– დადიტს! – გასძახა ნაცრისფერ, მომაკვდავ სივრცეს. ზარმაცი ფიფქები გახეული ბალიშიდან გადმოყრილი ბუმბულივით ეშვებოდა მიწაზე. რომელიღაც აზრი გარეთ გამოსვლას ცდილობდა, მაგრამ დიდი, ძალიან დიდი იყო და ამას ვერ ახერხებდა.

– დადიტს! – შესძახა ჰენრიმ ეგმენის შთამაგონებელი ხმით და ერთ რამეს მაინც მიხვდა: ამიერიდან თვითმკვლელობის ფუფუნებას უნდა დამშვიდობებოდა. ეს მისთვის ყველაზე დიდი საშინელება იყო, რადგან უცნაური აზრებისგან – ყველას ჩამოვთვლი, ვინც კენედების მკვლელობაში მონაწილეობდა“ – ლამის თავი გასკდომოდა. მან კვლავ ამოისლუკუნა თავგზააზნეულმა, შეშინებულმა, ტყეში მარტოდ დარჩენილმა. ყველა მეგობარი მოუკვდა, ჯოუნსის გარდა. ჯოუნსი კი საავადმყოფოში იწვა. კინოვარსკვლავი საავადმყოფოში იყო მისტერ გრეისთან ერთად.

– ეს რას უნდა ნიშნავდეს? – ამოიკვნესა ჰენრიმ და ხელისგულეები საფეთქლებზე მიიჭირა (თავი თითქოს თვალსა და ხელს შუა უსივდებოდა). თხილამურების ძველი საყრდენი ჯოხები უმწეოდ,

დამტკრეული პროპელერებით ჩამოკონწიალებოდა მაჯებზე, –  
ღმერთო ჩემო, ეს ყველაფერი რას უნდა ნიშნავდეს?

პასუხად მხოლოდ სიმღერა მოესმა:

– „მიხარია თქვენი გაცნობა, ბატონებო! ვიმედოვნებ, მიხვდით,  
ვინც ვარ!“

მხოლოდ თოვლი, ირგვლივ მიმოფანტული ცხოველების სის-  
ხლისგან გაწითლებული – ირმების, ენოტების, კურდღლების, სინ-  
დიოფალების, დათვებისა და ვირზაზუნების დაჰაუ...<sup>119</sup>

ჰენრიმ შეჰყვირა, თავში ხელები წაიშინა და ხმამაღლა და სასო  
წარკვეთით შეჰყვირა, მოეჩვენა, რომ გონებას კარგავდა. შემდეგ  
თავბრუ სხვევამ გაუარა და გონება ისევ დაეწმინდა. მხოლოდ და-  
დიტსის საო ცრად მკაფიო სახე დარჩა მასთან – ის, პირველი შეხ-  
ვედრის დრო ინდელი, არა ზამთრის ბლიცკრიგით განათებული,  
როგორც „სტოუნზის“ სიმღერაშია, არამედ ოქტომბრის მოღრუბლუ-  
ლი დღის დამამშვიდებელი შუქით; დადიტსი თავისი ელამი, ჩინე-  
ლისთვის დამახასიათებელი თვალებით, საიდანაც, უცნაურია, მაგ-  
რამ ერთგვარი სიბრძნე გამოსჭვიოდა. „დადიტსი ჩვენი ცხოვრების  
ყველაზე ნათელი წერტილი იყო“, – უთხრა მან პიტს.

– ას აგებ? – ხმამაღლა თქვა ჰენრიმ, – ოტას აგებ?

„ჰო, ოტას აგებ. შეატრიალე და ისე ჩაიცვი ოტასი“.

მან ოდნავ გაიღიმა (ლოყები ჯერაც ცრემლიანი ჰქონდა და საცაა  
მოეყინებოდა კიდევ), შემდეგ კი თხილამურებით ისევ თოვლმავლის  
გაკვალულ გზას დაადგა.

## 10

გავიდა ათი წუთი და ჰენრი ნაავარიებ სკაუტს მიადგა. უეცრად  
იგრძნო, რომ საშინლად შიოდა, მანქანაში კი საჭმელი უნდა ყოფი-  
ლიყო. მანქანასთან ორ კვალს მოჰკრა თვალი. არც ნანტი ბამპო  
სჭირდებოდა იმის მისახვედრად, რომ პიტს ქალი მიეტოვებინა და

<sup>119</sup> ერთ-ერთი პირველი საკონცენტრაციო ბანაკი გერმანიის ტერიტორიაზე.

აქ მოსულიყო და არც ერკიულ პუარო იმის დასადგენად, რომ მაღაზიაში შექცენილი პროდუქტი – უმეტესი ნაწილი მაინც – ჯერაც აქ იყო. ჰენრიმ კარგად იცოდა პიტის მოსვლის მიზეზი. მეგობრის კვალს მიჰყვა, მანქანას შემოუარა, თხილამურის სამაგრის შესახსნელად დაიხარა და გახევდა. ამ მხარეს ქარი ნაკლებად ქროდა და სიტყვები, რომლებიც პიტს თოვლზე დაეწერა, სანამ იჯდა და ორ ბოთლ ლუდს შეექცეოდა, შენახულიყო. ორივე სიტყვა ტყუპისცალივით ჰგავდა ერთმანეთს. ესენი იყო... დადიტსი.

ამ სახელის წაკითხვისას ჰენრი კანკალმა აიტანა. თითქოს საყვა-რელი ადამიანის საფლავზე მისულს მიწიდან მისი ხმა გაეგონა.

## 11

მანქანაში შუშის ნამსხვრევები ეყარა. იქაურობა, ძირითადად, უკანა დასაჯდომი, სისხლით იყო მოთხვრილი, რის გამოც ჰენრიმ დაასკვნა, რომ პიტი ავარიის დროს კი არ დაიჭრა, მოგვიანებით, როცა დაბრუნდა. გაოცდა, როდესაც შიგნით მოწითალო ოქროსფერი ობის ნასახიც ვერ აღმოაჩინა. ის საკმაოდ სწრაფად იზრდებოდა, რაც ლოგიკურად ნიშნავდა, რომ აქეთობისას პიტი დაინფიცირებული არ იყო. შესაძლოა, ეს მოგვიანებით მოხდა, ოღონდ არა მაშინ.

ჰენრიმ პური, არაქისის კარაქი, რძე და ფორთოხლის წვენი პაკეტი აიღო. შემდეგ სკაუტიდან გადმოვიდა, დაჯდა, ზურგით ძარას მიეყრდნო, ახალმოსულ თოვლს მიაჩერდა და პურის ღეჭვას შეუდგა, საჩვენებელი თითით კარაქს უსვამდა, მერე კი თითს იტლევდა. არაქისის კარაქი ეგემრიელა, წვენი კი ორ მოყუდებაზე გამოსცალა. არ იყო.

– რასაც შენ ფიქრობ, – განუცხადა ბინდბუნდს, – სისულელეა და მეტი არაფერი, წითელზე რომ აღარაფერი ვთქვათ, წითელ საჭმელზე.

წითელი იყო თუ არა, მაინც მასზე ფიქრობდა და მერე მოეჩვენა,



რომ ამაში სულელურს ვერაფერს ხედავდა. ბოლოს და ბოლოს, ტყუილად ხომ არ ათენებდა და აღამებდა იარაღზე, თოქსა და სამართებელზე ფიქრში. ეს უკვე ბავშვურობად მიაჩნდა, მაგრამ ასეთი იყო და ვერაფერს გააწყობდა. ახლა კი...

– ახლა კი, ქალბატონებო და ბატონებო, ამერიკის ფსიქიატრთა ასოციაციის წევრებო, ნება მომეცით, გამოსვლა განსვენებული ჯოზეფ „ბივერ“ კლარენდონის გამონათქვამით დავასრულო: „თქვი: ამის დედაც! და ათცენტნიანი „ხსნის არმიის“ ყულაბაში ჩააგდე. და თუ არ მოგწონს, სტაცე ხელი ჩემს ასოს და მომწუწნე“. გმადლობთ ყურადღებისთვის.

ამერიკის ფსიქიატრთა ასოციაციის წევრებისთვის ამ ლექციის წაკითხვის შემდეგ, ჰენრი ისევ სკაუტში შეძვრა, კიდევ ერთხელ აიცილა შუშის ნამსხვრევები, მისწვდა მკვრივ ქალღმერთში გახვეულ პაკეტს (ზედ \$2.79 ეწერა მოხუცი გოსლინის აკანკალებული ხელით), ჯიბეში ჩაიღო, მანქანიდან გადმოვიდა და გახსნა. შიგნით ცხრა ცალი მსხვილი სოსისი იღო. წითელი ფერის.

წამით გონებამ შეწინააღმდეგება სცადა, უფეხო რეპტილია გაახსენა, ჯოუნსის საწოლზე რომ იკლაკნებოდა და მშიერი შავი თვალეზით შესცქეროდა. ჰენრიმ მეამბოხე ფიქრები იმ ადამიანის სისწრაფითა და სიმტკიცით განდევნა, რომელსაც თვითგადარჩენის ინსტინქტი არასდროს ღალატობს.

სოსისი მოხარული იყო, მაგრამ მან მაინც შეათბო სანთებელას ცეცხლზე, პურში ჩაიღო და თვალის დახამხამებაში გადასანსლა. გაელიმა, როდესაც წარმოიდგინა, რა იდიოტივით გამოიყურებოდა გვერდიდან. თავი იმით დაიმშვიდა, რომ, გავრცელებული აზრის თანახმად, ადრე თუ გვიან ფსიქიატრები პაციენტებივით ჭკუაზე იშლებოდნენ, შესაძლოა, მათზე მეტადაც კი.

მუცელი რომ ამოიყორა, ეს ყველაზე მნიშვნელოვანი იყო, იმდენად მნიშვნელოვანი, რომ ყველა შემაწუხებელი ფიქრი და ფრაგმენ-

ტული სახე თავიდან ამოუვარდა. სიმღერასთან ერთად. იმედოვნებდა, რომ ეს ნაგავი აღარ დაუბრუნდებოდა. ამაში ღმერთსაც კი სთხოვა დახმარება.

რძე მოსვა, დააბოყინა, თავი სკაუტს მიაყრდნო და თვალები დახუჭა. არა, დაძინებას არ აპირებდა – აქაური ტყეები მშვენიერი, ბნელი და უღრანი კი იყო, მაგრამ კიდევ თორმეტი-წერტილი-შვიდი-მილი უნდა გაეგლო, სანამ ძილის უფლებას მოიპოვებდა.

ჰენრის ისიც გაახსენდა, როგორ ჰყვებოდა პიტი გოსლინის მალაზიაში გაგონილ ჭორებს, იქნებოდა ეს დაკარგული მონადირეები თუ ცაში გაჩენილი ნათება. როგორ დაუდევრად აუქნია მას ხელი უდიდესმა ამერიკელმა ფსიქიატრმა და დამრიგებლური ტონით აუწყა ვაშინგტონის შტატში სატანიზმის გავრცელებისა და დელავერში ატეხილი ისტერიის შესახებ. თავი მაგარ ფსიქიატრად მოჰქონდა, ენას არ აჩერებდა, ცნობიერების სიღრმეში საკუთარი თვითმკვლელობის სცენებს ისე არხეინად დგამდა, როგორც პატარა ბავშვი ეთამაშება ხოლმე ფეხის თითებს აბაზანაში ჭყუმპალაობისას. ამასთან, დამაჯერებლად ორატორობდა, მზად იყო სატელევიზიო შოუც კი წაეყვანა იმ მაცურებლებისთვის, ცნობიერისა და შეუცნობლის ზღვარზე რომ სურთ სამოცი წუთის გატარება, მაგრამ რამდენიმე საათის შემდეგ ყველაფერი შეიცვალა. ამჯერად თვითონ იქცა ერთერთ დაკარგულ მონადირედ, რომელსაც ინტერნეტის ყველაზე მძლავრი საძიებო სისტემაც კი ვერ მიაგნებდა.

იჯდა მუცელამოყორილი, თავი უკან გადაეგდო და თვალები დაეხუჭა. ჯოუნსის „გარანდი“ სკაუტის საბურავზე მიეყუდებინა. ფიფქები კატის თათებივით ნაზად ეხებოდა შუბლსა და ლოყებზე.

– ეს ის არის, რასაც ასე მოუთმენლად ელოდა ყველა ვიგინდარა: მესამე ხარისხის ახლო კონტაქტი. დალახვროს ეშმაკმა, იქნებ მეოთხე ან მეხუთე ხარისხისაც კი. მაპატიე, რომ დაგცინოდი, პიტ. მართალი ყოფილხარ. მე ვცდებოდი. ჯანდაბა! კიდევ უარესი – ბებერი

გოსლინი მართალი იყო, მე კი – არა. ესეც შენი ჰარვარდის განათლება!

როგორც კი ეს სიტყვები ხმამაღლა წარმოთქვა, ყველაფერი თავის ადგილზე დადგა. თუ დაეშვა, თუ ჩამოვარდა. და ახლა შეერთებული შტატების შეიარაღებული ძალები მთავრობის დავალებით ამ შემოჭრას პასუხობდა. შეატყობინეს თუ არა დანარჩენ სამყაროს ამის შესახებ? სავარაუდოდ, არა, ეს მათი სტილი არაა. მაგრამ ჰენრიმ რატომღაც გაიფიქრა, რომ ამის გაკეთება საკმაოდ მალე მოუწევდათ. მთელ ჯეფერსონტრექტს 57-ე ანგარში ხომ ვერ გადაამალავდნენ.

კიდევ თუ იცოდა რამე? შესაძლებელია. იქნებ, მფრინავებსა და მსროლელებზე მეტიც. აშკარაა, მათ ეგონათ, რომ საქმე ინფექციასთან ჰქონდათ, მაგრამ ჰენრი არ ფიქრობდა, რომ ყველაფერი ისე საშიში იყო, როგორც ერთი შეხედვით ჩანდა. სოკო ახალ ადგილს ითვისებდა, ხარობდა და... იღუპებოდა. იმ ქალში მყოფი პარაზიტიც კი მოკვდა. უცხოპლანეტელებმა ძალზე შეუფერებელი წელიწადის დრო და ადგილი შეარჩიეს ვარსკვლავთმორისი მცენარეულობის კულტივირებისა და ახალ პლანეტაზე დამკვიდრებისთვის. ცხადია, თუ ეს მართლაც ასე იყო. ეს არგუმენტები იმაზე მიუთითებდა, რომ მათმა ხომალდმა კატასტროფა განიცადა და ჩამოვარდა... მაგრამ ცაში გაჩენილი ნათება? იმპლანტები? ცალკეული ადამიანები მრავალი წლის განმავლობაში აცხადებდნენ, რომ უცხოპლანეტელებმა გაიტაცეს... რომ გახადეს... შეისწავლეს... ძალით ჩაუტარეს იმპლანტაცია... ეს იმდენად ფროიდულ აზრებად მიაჩნდათ, რომ სასაცილოდ იგდებდნენ...

ჰენრი მიხვდა, რომ ყვინთავდა და თავი ისე მკვეთრად ასწია, რომ სოსისებიანი გახსნილი პაკეტი მუხლებიდან ჩამოუცურდა და თოვლში ჩავარდა. არა, კი არ ყვინთავს, თვლემს. დღის სინათლე თითქმის გაქრა და სამყარომ უსიცოცხლო, ასფალტის შეფერილობა მი-

ილო, ჯინსის შარვალზე თოვლი დაჰყროდა. ცოტაც და, ჰენრი ხვრინ-  
ვას ამოუშვებდა.

შეირხა, წამოდგა და როდესაც კუნთებმა პროტესტი გამოთქვეს, ტკივილისგან დაიღრიალა. ერთგვარი ზიზღით დახედა ძირს დაყრილ სოსისებს, მაგრამ მაინც დაიხარა, საიმედოდ შეახვია და ქურთუკის ჯიბეში ჩაიღო – მოგვიანებით, იქნებ შესცვლოდა დამოკიდებულება. გულწრფელად იმედოვნებდა, რომ ეს არ მოხდებოდა, მაგრამ ამას ახლა ვერავინ იტყვოდა.

– ჯოუნსი საავადმყოფოშია, – თქვა მან გადაჭრით. გაუგებარი იყო, რას გულისხმობდა, – ჯოუნსი საავადმყოფოშია მისტერ გრეისთან ერთად. და იქ, ინტენსიური თერაპიის ბლოკში დარჩება.

სიგიჟე. სრული სიგიჟე. კვლავ მოირგო თხილამური, ღმერთს შეევედრა, რომ მორიგ ფერდობზე ხერხემალში არ გადამტყდარიყო და საბიჯგების დახმარებით დაიძრა. ბინდბუნდი საოცარი სისწრაფით ვრცელდებოდა, ბარდნიდა.

როდესაც გარკვეული ხნის შემდეგ თავში დაჰკრა, რომ ჰოთდოგი კი გაახსენდა, მაგრამ ჯოუნსის თოფი დაავიწყდა (საკუთარს აღარ ჩიოდა), უკან მიბრუნებას აზრი აღარ ჰქონდა – ძალზე შორს იყო.

## 12

საათის სამი მეოთხედის თუ უფრო მეტის სიარულის შემდეგ ჰენრი შეჩერდა და უაზროდ ჩააშტერდა Aრცტიც-ჩატ-ის ძლივს შესამჩნევ კვალს სიბნელეში. უბადრუკი სინათლე საკმარისი აღმოჩნდა იმის დასადგენად, რომ ნაკვალევი, ანუ ის, რაც მისგან დარჩა, მკვეთრად უხვევდა მარჯვნივ და ტყისკენ მიდიოდა. რამ წამოუარა ჯოუნსის (და პიტსაც, თუ ერთად იყვნენ), რომ გეზი ტყისკენ აეღოთ? რა აზრი ჰქონდა ამას, როცა დიფქათი სწორი და მკაფიო ზოლი იყო სიბნელეში მოქცეულ ხეებს შორის?

– დიფქათი ჩრდილო-დასავლეთისკენ მიდის, – და თავი დაბნეუ-

ლად გადააქნია, – გოსლინის მაღაზიისკენ მიმავალი გზა მოასფალტებულია, აქედან არა უმეტეს სამი მილითაა დაშორებული და ჯოუნსიმ ეს იცის. პიტმაც. და მაინც... თოვლმავალი მიდის... – მან ხელები ასწია და მიმართულება წარმოიდგინა, – მიდის... პირდაპირ ჩრდილოეთისკენ. რატომ?

იქნებ, ამას ლოგიკური ახსნა ჰქონდა? გოსლინის მაღაზიისკენ ცა უფრო ნათელი იყო, თითქოს მძლავრი პროექტორები დაუყენებიათ. თავზემთ განუწყვეტლივ ისმოდა ვერტიფრენების ტკაცატკუცი. მათი ხმა მატულობდა და იკლებდა, ოღონდ მხოლოდ ერთი მხრიდან. ახლოს მისული, ალბათ, სხვა მანქანების გუგუნსაც გაიგებდა: სატვირთოებისას. იქნებ, გენერატორებისასაც. აღმოსავლეთით ისევ გაისმოდა ერთეული გასროლის ხმა, მაგრამ მთავარი მოქმედება სწორედ იმ მიმართულებით ვითარდებოდა, საითკენაც თვითონ ჰქონდა გეზი.

– ბაზა გოსლინის მაღაზიაში მოაწყვეს, – თქვა ჰენრიმ, – ჯოუნსი კი მისთვის გვერდის ავლას ცდილობს.

იგრძნო, რომ ათიანში მოარტყა. მაგრამ... ჯოუნსი ხომ აღარ არსებობდა. მის ნაცვლად მხოლოდ ღრუბელი იყო შავ-წითელი სარჩულით.

– ტყუილია! – შესძახა მან, – ჯოუნსი ჯერაც იქ არის, საავადმყოფოში. მისტერ გრეისთან ერთად. ეს ღრუბელი... არის კიდევ მისტერ გრეი, – და სასხვათაშორისოდ დაამატა, – ას აგებ? ოტას აგებ?

ჰენრიმ შეამჩნია, რომ თოვა გაძლიერდა (ისე არა, როგორც დღისით, მაგრამ გადაღებას არ აპირებდა). იგი ცას მიაშტერდა, თითქოს სჯეროდა, რომ იქ, სადღაც მაღლა, ღმერთი იყო და მას გულწრფელი, მაგრამ ოდნავ გულგრილი ინტერესით აკვირდებოდა, როგორც მეცნიერი – მიკროსკოპში მოთავსებულ პარამეციას<sup>120</sup>.

– იქნებ ამიხსნას ვინმემ, რა სისულელეს ვროშავ?

პასუხს, ცხადია, ვერ ეღირსა, მაგრამ, სამაგიეროდ, უცნაურმა

---

<sup>120</sup> ინფუზორიის სახეობა.

მოგონებამ შეაკრთო. ის, პიტი, ბივერი და კარლა – ჯოუნსის ცოლი, გასული წლის მარტიდან ერთ საიდუმლოს ინახავდნენ. კარლას აზრით, ჯობდა ჯოუნსის არ სცოდნოდა, რომ გული ორჯერ გაუჩერდა: ერთხელ მაშინ, როდესაც სასწრაფო დახმარების მანქანაში მოათავსეს, მეორედ კი საავადმყოფოში მიყვანისთანავე. ჯოუნსი გრძნობდა საიქიოს სიახლოვეს, მაგრამ არ იცოდა (ყოველ შემთხვევაში, ჰენრი ასე ფიქრობდა), რამდენად ახლოს იყო მასთან. და თუ მას ჰქონდა კიდევ კუბლერ როსის<sup>121</sup> მსგავსი გამოცდილება გვირაბის ბოლოს სინათლის დანახვასთან დაკავშირებით, – ან არ ისურვა, მოეყოლა, ან გადაავიწყდა ანესთეზიისა და ტკივილგამაყუჩებლების დიდი დოზის წყალობით.

სამხრეთიდან გუგუნი საშინელი სისწრაფით მოახლოვდა. ჰენრი მოიხარა და ყურებზე ხელები აიფარა, თითქოს გადარჩენას ცდილობდა იმისგან, რაც ღრუბლებიდან გამოვარდნილი რეაქტიული გამანადგურებლების ესკადრილიას მიამსგავსა. მართალია, ვერაფერი დაინახა, მაგრამ როდესაც ძრავების ხმაური მიწყდა, წელში გასწორდა და აფართხალებულ გულზე ხელი მიიდო. ღმერთო ჩემო! ალბათ ასეთივე გრუხუნი ისმოდა ერაყის მახლობლად მდებარე ავიაბაზებზე ოპერაციის „ქარიშხალი უდაბნოში“ დაწყების წინ.

საშინელი ალიაქოთი. ეს იმას ხომ არ ნიშნავდა, რომ ამერიკის შეერთებული შტატები ომში ჩაება უცხოპლანეტელთა წინააღმდეგ? იქნებ ჰერბერტ უელსის<sup>122</sup> რომანში აღმოჩნდა? ჰენრიმ კვლავ იგრძნო უმწეო ფართხალი მკერდის მარცხენა ნაწილში. თუ ასეა, როგორც ჩანს, მტერს ბიძია სემისთვის საბჭოელების რამდენიმე ასეულ, დაჟანგულ, რაკეტებად წოდებულ თუნუქის კოლოფებზე უკეთესი რამ ჰქონდა მომზადებული.

---

<sup>121</sup> შვეიცარიული წარმოშობის ამერიკელი ფსიქოლოგი, შეიმუშავა მომაკვდავი ავადმყოფებისთვის ფსიქოლოგიური დახმარების კონცეფცია, იკვლევდა სიკვდილისწინა განცდებს.

<sup>122</sup> ბრიტანელი ფანტასტი და პუბლიცისტი.

თუნდაც ასე იყოს. ვერაფერს გააწყობ. მაგრამ შენ რა გელის, საკითხავი აი, ეს არის. შენ რა გელის?

ძრავების ღმუილი შორეულ ბურღულუნად იქცა. იცოდა, რომ ისინი აუცილებლად დაბრუნდებოდნენ. შესაძლოა, მეგობრებთან ერთადაც.

„დათოვლილ ტყეში ორი ბილიკი მიდის“ – ასე არ მღეროიან იმ სიმღერაში?<sup>123</sup> დაახლოებით.

მაგრამ გამორიცხული იყო, თოვლმავლის კვალს გაჰყოლოდა. სიბნელეში მას ზუსტად ნახევარ საათში დაკარგავდა, თუკი მანამდე თოვლი არ დაფარავდა. მერე კი ტყეში იხეტიალებდა... როგორც ალბათ, ახლა დაბოდიხალებდა ჯოუნსი.

ჰენრიმ ერთი კი ამოიოხრა, თოვლში დატოვებულ ნაკვალევს ზურგი აქცია და კვლავ გზის გასწვრივ განაგრძო თხილამურებით სვლა.

## 13

იმ დროისთვის, როდესაც დიფქათის გადასახვევს მიადგა, საიდანაც სუონიფონდროუდად წოდებული ორრიგიანი გზატკეცილი იწყებოდა, ჰენრი ისე დაიღალა, რომ თხილამურებით სრიალი კი არა, ფეხზე დგომაც კი უჭირდა. თედო წყლით გაჟღენთილი ჩაის პაკეტივით გაუსივდა. ჩრდილო-დასავლეთით, ჰორიზონტზე უფრო კაშკაშა ნათება მოჩანდა, ძრავებისა და ვერტიკალური ხმაურიც ისმოდა, მაგრამ ამან ხასიათი ვერ გამოუსწორა. ციცაბო გორაკს გადაივლიდა და მთავრდებოდა კიდევ დიფქათი. შემდეგ სუონიფონდი იწყებოდა. ალბათ, იქ უფრო გაცნოველებული მოძრაობა იყო, განსაკუთრებით იმ შემთხვევაში, თუ ჯარის ნაწილების გადასროლა ხდებოდა.

– აბა, ჰე, – თქვა ჰენრიმ, – მიდი, მიდი.

მაგრამ დიდხანს ვერ დაიდრა ადგილიდან. იმ გორაკზე ასვლა არ

---

<sup>123</sup> ბობ დილანის სიმღერა, ცნობილია ჯონ ბალზის შესრულებით.

უნდოდა.

– დაღმართი უკეთესია, – ამოიხვნეშა მან.

შესაძლოა, ეს რაიმეს ნიშნავდა. ან მორიგი იდიოტური აბდაუბდა იყო. სხვა გზა ისედაც არ ჩანდა.

დაიხარა და ხელით თოვლი აიღო – სიბნელეში ის ფუმფულა ბალიშს მიაშვავსა. პირში ჩაიდო, ოღონდ წყურვილის მოსაკლავად კი არა, ღროის გასაყვანად. მართალია, გოსლინის მაღაზიის მიმართულეებით სინათლე გაცილებით მკვეთრი იყო, ვიდრე ის მოცეკვავე ცეცხლოვანი რგოლები, რომლებიც მან და პიტმა ცაში დაინახეს (“ისინი დაბრუნდნენ!” – შესძახა ბეკიმ ტელევიზორის წინ მჯდომ იმ პატარა გოგოსავით, რომელიც სტივენ სპილბერგის<sup>124</sup> ძველ ფილმს უყურებდა), მაგრამ ჰენრის ის რატომღაც ნაკლებად მოსწონდა. ძრავები და გენერატორები მშვიერი მხეცებივით ღრიალებდნენ.

– ამაში კი არ ცდები, ბაჭიავ, – ჩაილაპარაკა მან.

შემდეგ კი, რადგან სხვა აღარაფერი დარჩენოდა, ნამდვილ გზასთან მისასვლელი უკანასკნელი დაბრკოლების გადალახვას შეუდგა.

## 14

მწვერვალზე ცოტა ხნით შეეყოვნდა, თხილამურის ჯოხებს დაეყრდნო და სული მოითქვა. აქ ქარი ძლიერად უბერავდა და ტანსაცმელშიც კი აღწევდა. დაჭრილი ფეხი მტკივნეულად უფეთქავდა. თავში ისევ გაუელვა უსიამოვნო აზრმა, – ჩემი იმპროვიზებული სახვევის ქვეშ მოწითალო ოქროსფერმა კოლონიამ ხომ არ იბარტყაო, მაგრამ ძალიან ბნელოდა და ვერაფერს გაარჩევდა. იქნებ ასე ჯობდა კიდევ, რადგან სიახლის არარსებობა უკვე კარგი სიახლე იყო.

– დრო თანდათან შენელდა, რეალობა გამრუდდა, ეგმენი წინ წავიდა, უკან აღარ დაბრუნდა.

სხვა რაღა ექნა. დაშვებას შეუდგა, დიფქათროუდი გორაკის ძირში მთავრდებოდა. ფერდობი გაცილებით ციცაბო აღმოჩნდა და თავს

<sup>124</sup> ამერიკელი რეჟისორი და სცენარისტი.



ძლივს იკავებდა, რომ არ ჩაგორებულყო. სიჩქარის მომატებისას არც კი იცოდა, რას განიცდიდა: შიშს, აღელვებას თუ ორივეს ერთად, არაჯანსაღად. ძალზე სწრაფად მიქროდა თითქმის ნულოვანი ხილვადობის პირობებში, მოთხილამურის ჩვევები კი ისევე დაჟანგოდა, როგორც თხილამურის სამაგრები. ორივე მხარეს ხეების მწკრივი მოჩანდა და ჰენრის უეცრად თავში გაუელვა, რომ ყველა პრობლემის გადაჭრა ხელის ერთი მოსმით შეეძლო. ოლონდ ეს „ჰემინგუეის გამოსავალი“ კი არა, „ბონოს გამოსავალი“ უფრო იქნებოდა.

ქარმა კეპი მოხადა. ერთი ხელი ავტომატურად მისკენ გაიწვდინა, ჯოხი თოვლიდან ამოიღო, წონასწორობა დაკარგა და კინალამ დაეცა. ესლა აკლდა. თუმცა, ვინ იცის, იქნებ ჯობდა კიდეც. ცხადია, თუ ფეხს არ მოიტეხდა, წაქცევა შეაჩერებდა. წამოდგებოდა და...

უეცრად უზარმაზარი სატვირთო მანქანის ფარებმა თვალეში მიანათა და სანამ ცოტა ხნით დააბრმავებდა, ჰენრიმ დაინახა ის, რაც დიფქათროუდის ბოლოში მდგარ, ცელულოზის გადამტან სატვირთო პლატფორმად მოეჩვენა. მანქანაში, როგორც ჩანს, მგრძნობიარე ფარები დაემონტაჟებინათ მოძრავი საგნების დასაფიქსირებლად. მის წინ კი შეიარაღებული ადამიანები ჩამწკრივებულიყვნენ.

– შესდექ! – დაიგრგვინა ვილაცამ. ალბათ, ღმერთი თუ იყო, – შეჩერდი, თორემ გესვრით!

ჰენრი უხერხულად შეტრიალდა და თოვლზე მოწყვეტით დაჯდა, თხილამურები გასძვრა. კოჭი ისე ძლიერ გადაუბრუნდა, რომ ტკივილისგან შეჰყვირა. ცალი ჯოხი დაკარგა, მეორე შუაზე გადაუტყდა. დარტყმისგან ფილტვებიდან ჰაერი ორთქლის ღრუბელივით ამოუშვა. უკანალით ჩასრიალდა და უცნაურ პოზაში გაშეშდა. ფეხები უმწეოდ გადაეხლართა, სვასტიკასავით.

მხედველობა თანდათან დაუბრუნდა. ვილაცის ჩექმებქვეშ თოვლმა გაიჭრაჭუნა. ჰენრიმ მოახერხა და წამოჯდა. იმის გარკვევას მერეც მოასწრებდა, გადარჩა თუ დაშავდა.

გორაკის ძირში ექვსნი იდგნენ. მათი უჩვეულოდ გრძელი ჩრდილები ბრილიანტივით მბზინავ ახალ თოვლზე გაწოლილიყო. კომბინეზონები ეცვათ. ჰენრის მიერ ფარდულში ნაპოვნ ძველ რესპირატორებზე გაცილებით საიმედო, გამჭვირვალე პლასტიკური ნიღბები ცხვირ-პირზე აეფარებინათ, მაგრამ, როგორც ხვდებოდა და, ალბათ, არ ცდებოდა, ნიღბებს იმავე დანიშნულებით იყენებდნენ. ხელში ყველას ავტომატი ეჭირა და მას უმიზნებდა. ჰენრის ნამდვილად გაუმართლა, რომ ჯოუნსის „გარანდი“ და თავისი ვინჩესტერი სკაუტთან დარჩა. რომ წამოელო, სხეულში, შესაძლოა, ათობით ახალი ხვრელი გასჩენოდა.

– არა მგონია, ამას ვიმსახურებდე, – თქვა მან ხრინწიანი ხმით, – რაც უნდა გაღელვებდეთ, ვფიქრობ...

– ადექით!

ისევ ღმერთის ხმა. სატვირთო მანქანიდან მოდიოდა. მის წინ მდგარი ხალხი ფარებს ჩრდილავდა და ჰენრიმ გზაჯვარედინთან რამდენიმე კაცი შეამჩნია. ყველა შეიარაღებული იყო, მხოლოდ ერთს, იარაღის ნაცვლად, მეგაფონი ეჭირა.

– არ ვიცი, შევძლებ თუ არა...

– ახლავე ადექით! – ბრძანა ღმერთმა და ერთ-ერთმა წინ მდგომმა სწრაფი მოძრაობით ლულა მიუშვირა.

ჰენრი ბარბაციით წამოდგა. ფეხები უკანკალებდა, კოჭი საშინლად ეწვოდა, თუმცა სხვა მხრივ, თითქოს, ყველაფერი რიგზე ჰქონდა.

ასე დასრულდა ეგმენის მოგზაურობა, – გაიფიქრა და სიცილი აუტყდა. შეცბუნებულმა მამაკაცებმა ერთმანეთს გადახედეს. მართალია, მათ ავტომატები ისევ შემართული ჰქონდათ, მაგრამ ჰენრის, თუნდაც მცირედი ადამიანური ემოციის გამოვლენით, გულზე მოეშვა.

სატვირთო პლატფორმაზე დამაგრებული პროექტორების შუქში ჰენრიმ რალაც მუქი საგანი შენიშნა თოვლში. ჩანს, დაცემისას

ამოუვარდა. ნელა დაიხარა, იცოდა, რომ შეიძლებოდა ყოველ წამს თავში ტყვია მიეღო.

– არ შეეხოთ! – შესძახა ღმერთმა თავისი მეგაფონიდან და ჯარისკაცები მაშინვე სროლისთვის მოემზადნენ. „გამარჯობა, წყვილადო, ჩემო ძველო მეგობარო, ყოველი ლულიდან რომ მომშტერებიხარ“.

– შეჭამე განავალი და ჩაძაღღდი, – გაიმეორა ჰენრიმ ბივერის ერთ-ერთი საუკეთესო გამონათქვამი, პაკეტი აიღო და ღიმილით გაუწოდა მის წინ მდგომ შეიარაღებულ ნიღბიან მამაკაცებს, – მშვიდობით მოვსულვარ, – თქვა მან, – ვინმეს ჰოთლოგი ხომ არ უნდა?

# თავი მეთორმეტე

## ჯოუნსი საავადმყოფოში

1

ეს სიზმარი იყო.

არ ჰგავდა, მაგრამ მაინც სიზმარი უნდა ყოფილიყო. თუნდაც იმიტომ, რომ ერთხელ უკვე გაველო თხუთმეტი მარტი და ამის ხელმეორედ გადატანა საშინელ უსამართლობად მიაჩნდა. მეორე მხრივ, კარგად ახსოვდა, ბოლო რვა თვეში – მარტის შუა რიცხვებიდან ნოემბრის შუა რიცხვებამდე – მომხდარი მოვლენები: ბავშვები და მათი დახმარება საშინაო დავალებების მომზადებაში, კარლას გაუთავებელი სატელეფონო საუბრები მეგობრებთან (უმრავლესობა „ანონიმური ნარკომანების“ პროგრამაში მონაწილეობდა), ლექციები ჰარვარდში და, რა თქმა უნდა, ფიზიოთერაპიის მოსაწყენი სეანსები. დაუსრულებელი ბუქნები და გაზარმაცებული მყესების დაჭიმვისას წარმოქმნილი აუტანელი ტკივილი – თავის ფიზიოთერაპევტს, ჯოან მორინს, უმტკიცებდა, რომ მეტი აღარ შეეძლო, მას კი გაგონებაც არ უნდოდა, – ლოყებზე ჩამოგორებული ცრემლი და საპასუხოდ ექიმის

გაბადრული სახე (ეს საძაგელი, სილამაზის კონკურსის დედოფლის მოუშორებელი ღიმილი). საბოლოოდ, ჯოანი მართალი აღმოჩნდა. ჯოუნსიმ შეძლო, ნებისყოფით დამუხტული ამ პატარა ძრავის დახმარებით, გამოჯანმრთელება. თუმცა, საკითხავია, რის ფასად!

ყველაფერი ეს და უფრო მეტიც ახსოვდა: საწოლიდან პირველი წამოდგომა, ქალაღის პირველად ხმარება ტუალეტში, ის ღამე მათის დასაწყისში, როდესაც დასაძინებლად დაწვა და თავში გაუელვა, მგონი გამოვძვერიო, ღამე მათის მიწურულს, როდესაც იმ უბედური შემთხვევის შემდეგ პირველად ჰქონდა სექსი კლარასთან, რასაც ძველებური ხუმრობა მოაყოლა: „თუ იცი, როგორ ჟიმაობენ მაჩვზღარბები? ძალიან ფრთხილად“.

ახსოვდა, როგორ შესცქეროდა ფეიერვერკს ხსოვნის დღეს, როდესაც თეძო და მთელი ფეხი საშინლად სტკიოდა; როგორ მიირთმევდა საზამთროს ოთხ ივლისს, კურკებს ბალახში ისროდა და ბადმინტონის თამაშით გართულ კლარასა და მის დებს აკვირდებოდა – თეძო და ფეხი ტენდა, მაგრამ გაცილებით ნაკლებად; როგორ დაურეკა ჰენრიმ სექტემბერში (“მხოლოდ კავშირის შესამოწმებლად”, – თქვა მან) და რაზე აღარ ელაპარაკა, მათ შორის, ყოველწლიურ ნადირობაზე ნოემბერში. „რა თქმა უნდა, წამოვალ“, – დაარწმუნა ჯოუნსიმ. მაშინ ვერც კი წარმოიდგენდა, ასე თუ არ ესიამოვნებოდა „გარანდის“ ხელში ალება. გაკვრით ყველაფერს შეეხნენ: სამსახურს (მეორე სემესტრის სამი კვირის განმავლობაში ჯოუნსი ლექციებს კითხულობდა და საკმაოდ მარჯვედ გადაადგილდებოდა ყავარჯნებით), ოჯახს, წაკითხულ წიგნებსა და ნანახ ფილმებს; ისევე, როგორც იანვარში, ჰენრიმ მაშინაც აღნიშნა, პიტი ბევრს სვამსო. ჯოუნსიმ, რომელსაც გაუთავებელი ომი ჰქონდა ცოლთან იმავე საკითხზე, თემის განვრცობა არ ისურვა, მაგრამ როდესაც ჰენრიმ ბივერის შემოთავაზება ახსენა, – უკანა გზაზე დერიში დადიტს ქვევლი მოვინახულთო, – დაუყოვნებლივ დაეთანხმა. საკმაოდ დიდი დრო გასულიყო, რაც ერთმანეთი არ ენახათ. თანაც ადამიანის გასამხიარულებლად

დადიტის ინიექციაზე უკეთესი ამქვეყნად არაფერი იყო. მხოლოდ...

– ჰენრი, – ჰკითხა მაშინ მეგობარს, – ჩვენ ხომ დადიტსთან ვაპირებდით წასვლას, არა? წმინდა პატრიკის დღეს. თარიღი არ მახსოვს, მაგრამ კალენდარში წერია.

– მართალია, – მიუგო ჰენრიმ, – ვაპირებდით.

– ესეც შენი ირლანდიური ილბალი, არა?

ეს ყველაფერი რომ გადაფურცლა, ჯოუნსი საბოლოოდ დარწმუნდა, რომ მის ცხოვრებაში თხუთმეტი მარტი ერთხელ უკვე იყო. მტკიცებულებაც ბევრი ჰქონდა – თუნდაც, ოფისში გამოკრული კალენდარი. მაგრამ კვლავ დადგა ის დრო. უსიამოვნების მომტანი ეს იდები.<sup>125</sup> დალახვროს ეშმაკმა! ასეთი უსამართლობა?! .. ეს თხუთმეტი რიცხვი იმაზე უფრო საშინელი აღმოჩნდა, ვიდრე ოდესმე ყოფილა.

იმ დღის მოგონებები, ჩვეულებრივ, სადღაც დილის ათი საათისთვის ქრებოდა. ის თავის კაბინეტში იჯდა, ყავას სვამდა და წიგნებს აწყობდა, რათა ქვემოთ, ისტორიის ფაკულტეტის ბიბლიოთეკაში ჩაეტანა, სადაც სტუდენტების მიერ შემოწირული ლიტერატურისთვის სპეციალური მაგიდა იდგა. უხასიათოდ იყო, მაგრამ შუბლზე იარალი რომ მიეზღინათ, მიზეზის ახსნას ვერ შეძლებდა. იმავე კალენდრის თანახმად, რომელზეც დაუდევრად მიაწერა დადიტსთან გამგზავრების თარიღი – ჩვიდმეტი მარტი – იმ დღეს, თხუთმეტი მარტს, სტუდენტ დევიდ დეფანიაკთანაც ჰქონდა შეხვედრა. საუბრის შინაარსს ვერაფრით იხსენებდა, მაგრამ მოგვიანებით ერთ-ერთმა ასისტენტმა შეატყობინა, რომ დეფანიაკს ნორმან დამპყრობლებზე ესე დაეწერა და ჩაებარებინა; ჰოდა დაასკვნა, ალბათ ამ საკითხთან დაკავშირებით დავიბარეო. მაგრამ მაინც რით გაუფუჭა ასე ძლიერ ხასიათი სტუდენტთან ჩვეულებრივმა შეხვედრამ ასოცირებულ პროფესორ გარი ჯოუნსის?

---

<sup>125</sup> ლათინურად Idus (გაყოფა); რომაულ კალენდარში ასე ეწოდებოდა თვის შუა რიცხვს. მარტში, მაისში, ივლისსა და ოქტომბერში ეს იყო რიცხვი 15.

ცუდმა განწყობამაც ვერ შეუშალა ხელი, რომ თავისთვის ელილინა, ელილინა გაუგებარი, უაზრობამდე მისული სიტყვები: „დიახ, ჩვენ შეგვიძლია, დიახ, ჩვენ შეგვიძლია, შეგვიძლია, ღმერთო დიდებულო, დიახ, ჩვენ შეგვიძლია, შეგვიძლია“. შემდეგ კიდევ იყო რაღაც... კოლინს, ფაკულტეტის მდივანს, წმინდა პედის დღე მიულოცა, უნივერსიტეტთან მდებარე გაზეთების დახლიდან „ბოსტონ ფენიქსი“ შეიძინა, თხუთმეტი ცენტი კემბრიჯის მხრიდან ხიდზე მჯდომ ვილაც სკინჰედს ჩაუყარა საქსოფონის ბუდეში, თხელ სვიტერში გამოწყობილი თავგადაპარსული ჭაბუკიც შეეცოდა, რადგან სუსხიანი ქარი ქროდა. მოგონებები საჩუქრად გამზადებული წიგნების შეკვრით მთავრდებოდა, რომლის იქითაც სიბნელე იყო. გონზე საავადმყოფოში მოვიდა, მეზობელი პალატიდან მონოტონური ხმა ჩაესმოდა: „შეწყვიტეთ, გთხოვთ, ამას ვერ გაუძლებ, ნემსი გამიკეთეთ, სად არის მარსი, მარსი მინდა“. იქნებ, ეს ასე ისმოდა: „სად არის ჯოუნსი, ჯოუნსი მინდა“... ფეხაკრეფით მომავალი ბებერი სიკვდილი. სიკვდილს თავი მოეკატუნებინა და პაციენტის სახე მიეღო. სიკვდილს მისი კვალი დაჰკარგოდა – ეს არც იყო გასაკვირი უზარმაზარ საავადმყოფოში, სადაც ყოველ ნაბიჯზე ტკივილებისგან გატანჯული, აგონიაში მყოფი ადამიანები კვნესოდნენ – და ახლა შეუძინევლად მოიპარებოდა მის მოსაძებნად. ცდილობდა, ეშმაკობაში ეჯობნა, ცდილობდა ეიძულეებინა, საკუთარი თავი გაეცა.

დრო დაბრუნდა, თუმცა დალოცვილი წყვილიადაი გაქრა. და თუმცა დრო დაბრუნდა, იგი არა მარტო ულოცავს კოლინს წმინდა პედის დღეს, არამედ ანეკდოტსაც კი უყვება იამაიკელ პროქტოლოგზე. იგი გადის, მისი მომავალი „მე“ – ნოემბრის „მე“ – მარტის თავში მოკალათებულა უბილეთო მგზავრივით. მის მომავალ „მეს“ ესმის, თურას ფიქრობს მარტის „მე“: რა მშვენიერი დღე დადგაო. ამასობაში კი თვითონ კემბრიჯისკენ მიიჩქარის ბედისწერასთან შესახვედრად. ცდილობს, აუხსნას მარტის „მეს“, რომ ეს ცუდი, საშინელი იდეაა, რომ შეუძლია, ავტობუსში ან ტაქსიში ჩაჯდეს და თავიდან აიცილოს

აგონია, რომელიც თვეების განმავლობაში გაგრძელდება, მაგრამ ამას ვერ ახერხებს. შესაძლოა, სიმართლე ეწერა თინეიჯერობისას წაკითხულ ფანტასტიკურ მოთხრობებში დროში მოგზაურობის შესახებ: „როგორც უნდა ეცადო, წარსულს ვერ შეცვლი“.

იგი ხილზე გადადის და თუმცა საკმაოდ ცივი ქარი ქრის, მაინც ტკბება გაზაფხულის მზითა და მდინარე ჩარლზის წყლის ზედაპირზე აბრჭყვიალებული ათინათებით. შემდეგ ნაწყვეტს მღერის სიმღერიდან „აი, მზემაც გამოანათა“ და ისევ „დები პონტერების“ სიმღერაზე გადადის: „ღიახ, ჩვენ შეგვიძლი-შეგვიძლია, ღმერთო დიდებულო, ჩვენ...“ თან პორტფელს მიიქნევს. შიგნით სენდვიჩი უდევს. კვერცხის სალათა. „იფ-იფ-იფ“, – თქვა ჰენრიმ. „აღინ“, – თქვა ჰენრიმ.

აი, საქსოფონისტიც. და სიურპრიზიც: იგი მასაჩუსეტსის ნიუბრიჯის ბოლოში კი არ დგას, არამედ უფრო შორს, MIT-ს<sup>126</sup> კამპუსთან, ერთ-ერთი აყროლებული პატარა ინდური რესტორნის წინ. თავგადაპარსული სიცივისგან კანკალებს, სკალპზე არსებული ნაკაწრები მიუთითებს, რომ უვარგისი პარიკმახერია. „ეს ამდენი სისულელე“-ს<sup>127</sup> შესრულების სტილით იმასაც მიხვდება კაცი, რომ არც საქსოფონისტად უქნია ღმერთს. ჯობდა ღურგალი, მსახიობი ან თუნდაც ტერორისტი გამოსულიყო, ოღონდ არა – მუსიკოსი. ჯოუნსის იგი ისე ებრალება, რომ ფუტლარში, რომელშიც გაცვეთილი იისფერი ხავერდი აფენია, თხუთმეტი ცენტის ჩაგდების ნაცვლად, როგორც ამას ადრე აკეთებდა, მთელ მუჭა ხურდას ყრის – მართლაც რომ „სისულელეა“. საკუთარ სენტიმენტალობას გაწელილი ზამთრის შემდეგ დამდგარ პირველ თბილ დღესა და დეფანიაკთან წარმატებულ საუბარს აბრალებს.

საქსოფონისტი მადლობის ნიშნად თვალეხს ატრიალებს და გამკივანი ხმების გამოცემას განაგრძობს. ჯოუნსის მორიგი ხუმრობა ახსენდება: „რას უწოდებდით საქსოფონისტს, რომელსაც ჯიბეში

<sup>126</sup> მასაჩუსეტსის ტექნოლოგიური ინსტიტუტი.

<sup>127</sup> მუსიკალური ნაწარმოები.



საკრედიტო ბარათი უდევს? ოპტიმისტს“.

იგი მხნედ მიაბიჯებს პორტფელის ქნევით და სულ არ უსმენს შიგნით მყოფ ჯოუნსის, ნოემბრიდან რომ მოცურდა ალმა დინებით დროში მოგზაური ორაგულივით. „ეი, ჯოუნსი, რამდენიმე წამით შეჩერდი, ესეც საკმარისი იქნება. ფეხსაცმლის ზონარი შეიკარი ან სხვა რამ გააკეთე (არ გამოვა – მოკასინებით დადის. მალე თაბაშირით ივლის.) ეს მომდევნო გზაჯვარედინზე მოხდება, იქ, სადაც ავტობუსი „რედ ლაინი“ ჩერდება, მასაჩუსეტსავენიუსა და პროსპექტის კვეთის ადგილზე. იქიდან გამოჩნდება ბებერი სულელი, ისტორიის პროფესორი, მუქი ლურჯი „ლინკოლნი“ და ქვაფენილზე გაგაგორებს“.

არ გამოდის. როგორ ხმამალლადაც უნდა იყვიროს, არაფერი გამოდის. ტელეფონი გათიშულია. შენ ვერ დაბრუნდები უკან, ვერ მოკლავ საკუთარ პაპას, ვერ ესვრი ლი ჰარვი ოსვალდს<sup>128</sup>, რომელიც დალასის, სკოლის სახელმძღვანელოების საწყობის მეექვსე სართულის ფანჯარასთან მოკალათებულა, გვერდით, ქალაქის თეფშზე, გაცივებული შემწვარი წიწილა უდევს, ფოსტით გამოწერილი შაშხანა დამიზნებულია; ვერ აუკრძალავ საკუთარ თავს, მასაჩუსეტსავენიუსა და პროსპექტსტრიტის გადაკვეთისკენ არ წახვიდე პორტფელით ხელში და ილღიაში ამოდებული გაზეთით, რომელსაც არასდროს წაიკითხავ. „ვწუხვარ, სერ, მთელ ჯეფერსონტრექტზე არც ერთი გამართული ტელეფონი, ნამდვილი უბედურებაა, ვერ დაუკავშირდებით...“

და ამ დროს, ღმერთო ჩემო, ეს რაღაც სიახლეა – გაფრთხილება მაინც მიდის ადრესატამდე! სწორედ მაშინ, როდესაც ის კუთხემდე აღწევს, როდესაც ტროტუარის კიდეზე დგას და გზაჯვარედინზე გადასვლას აპირებს, გაფრთხილება მაინც მიდის!

---

<sup>128</sup> ერთადერთი ოფიციალური ექვმიტანილი ამერიკის პრეზიდენტ ჯონ კენედის მკვლელობაში.

– რა? – ამბობს იგი და მის გვერდით მდგომი კაცი, პირველი, რომელიც მის თავზე დაიხრება, რომელმაც, მადლობა ღმერთს, უკვე ჩაიარა – ეჭვის თვალთ შიშველებს მას და პასუხობს:

– მე არაფერი მითქვამს, – თითქოს მათთან ერთად კიდე ვიღაც იმყოფებოდეს. ჯოუნსის მისი თითქმის არ ესმის, რადგან მესამეც არის მათთან, ეს მის თავში არსებული ხმაა, რომელიც უცნაურია, მაგრამ ძალიან ჰგავს მისას და გაჰკვივის, უბრძანებს, ადგილზე დარჩეს და არავითარ შემთხვევაში ქუჩაზე არ გადავიდეს...

ამ დროს მას ვიღაცის ტირილი ესმის. პროსპექტის მეორე მხარეს იყურება და ოჰ, ღმერთო ჩემო, დადიტს ხედავს! დადიტს ქვევლი დგას შიშველი, თუ მის ტრუსს არ ჩავთვლით, პირი რაღაც შოკოლადის მსგავსით მოსთუპნია, მაგრამ ჯოუნსიმ იცის, ეს რაც არის – ძალის განავალია. იმ ნაძირალა რიჩიმ მაინც აჭამა მას ის საზიზღრობა. იქვე გამვლელები მიდი-მოდიან, თუმცა დადიტს ზედაც არ უყურებენ, ყურადღებას არ აქცევენ, თითქოს იგი არც კი არსებობდეს.

– დადიტს! – ეძახის ჯოუნსი, – დადიტს, გამაგრდი, მეგობარო, მოვდივარ!

აქეთ-იქით არ იყურება, ტროტუარიდან ჩადის და მისკენ მიექანება. მასში მყოფი მგზავრი ვერაფერს აკეთებს, მხოლოდ უმწოდ მიჰყვება და ბოლოს და ბოლოს, ხვდება, თუ როგორ მოხდა ყველაფერი. მოხუცი კი, მოხუცი კაცი, რომელსაც ალცჰეიმერის დაავადება სჭირს, – პირველი სტადია, – საჭეს არ უნდა მისჯდომოდა, გასაგებია, მაგრამ მთავარი ის მოხუცი როდია. ავარიის მეორე, უმთავრესი მიზეზი, აქამდე რომ არავინ იცოდა, სწორედ ესაა: მან დადიტსი დაინახა და მისკენ ისე გაქანდა, რომ აქეთ-იქით არ გაუხედავს.

იგი კიდევ რაღაცას ამჩნევს: სიზმართმჭერის მსგავს უშველებელ ნახჭს, რომელიც 1978 წელს დადიტს ქვევლთან პირველი შეხვედრიდან მოყოლებული, ყველა წელს ერთმანეთთან აკავშირებს – ინდიელების ავგარობს, რომელიც მომავალსაც ისევე შეაღუღაბებს.

მზის სხივები საქარე შუშაზე ირეკლება. იგი ამას მარცხენა თვალის კუთხით ხედავს. მანქანა უახლოვდება, თანაც ძალიან სწრაფად. ნაცნობი მამაკაცი, მისტერ მე-არაფერი-მითქვამს, რომელიც გზის პირას მის გვერდით დგას, ყვირის:

– ფრთხილად, ახალგაზრდავ, ფრთხილად!

მაგრამ ჯოუნსის კვლავაც თითქმის არ ესმის. რადგან ტროტუარზე, დადიტისის უკან, ირემი მოჩანს, დიდი და ლამაზი, ადამიანისხელა ხარირემი. მანქანის დაჯახებამდე წამით ადრე იგი ხედავს, რომ ირემი კაცია, მამაკაცი ნარინჯისფერი კეპითა და ნარინჯისფერი ყილეტიტით. მხარზე მახინჯ თილისმასავით მიჰკვრია უფეხო, სინდიოფალას მსგავსი ქმნილება უშველებელი შავი თვალებით. კუდი თუ საცეცი კაცისთვის კისერზე შემოუხვევია.

არ ვიცი, ღმერთმანი, როგორ მივამსგავსე ირემს! – ფიქრობს ჯოუნსი და სწორედ ამ დროს ეჯახება მას „ლინკოლნი“. ქვაფენილზე ეცემა და მოტეხილი თეძოს ძვლის ჩუმი, ყრუ ტკაცუნი ესმის.

## 2

ამჯერად აღარ ბნელა; არავინ იცის, კარგია თუ ცუდი, მაგრამ ხსოვნის ქუჩაზე რკალური განათების ფარნები დაუდგამთ. არეულ-დარეული ფილმია, თითქოს მემონტაჟემ ლანჩზე ერთი-ორი ჭიქა გადაკრა და კადრების თანამიმდევრობა აერია. ეს, ნაწილობრივ, იმიტომ ხდება, რომ დრო უცნაურად აირია და ჯოუნსი ახლა, ერთდროულად, წარსულშიც ცხოვრობს, აწმყოშიც და მომავალშიც.

„ჩვენ სწორედ ასე ვმოგზაურობთ, – ამბობს ხმა და ჯოუნსი ხვდება, რომ ეს ისაა, ვინც მარსის გამო ქვითინებდა და ნემსის გაკეთებას ითხოვდა, – როგორც კი აჩქარება გარკვეულ ნიშნულს მიაღწევს, ყველა მოგზაურობა დროში მოგზაურობად გადაიქცევა ხოლმე. და მათი საფუძველი მესხიერება ხდება“.

კუთხეში მდგარი კაცი, მისტერ მე-არაფერი-მითქვამს, მის თავზე იხრება, ეკითხება, კარგად არის თუ არა, და როდესაც ხედავს, რომ

საქმე ცუდადაა, თავს მაღლა სწევს და ამბობს:

– ვინმეს მობილური ხომ არ აქვს? სასწრაფოს გამოძახებაა საჭირო.

ამ დროს ჯოუნსი მის ნიკაპქვეშ პატარა ნაკაწრს ხედავს – როგორც ჩანს, მისტერ მე-არაფერი-მითქვამს გაპარსვის დროს ჩაფიქრდა და ისე გაიჭრა, რომ ვერც კი შეამჩნია.

რა გულის ამაჩუყებელია, – ფიქრობს ჯოუნსი. ამ დროს ფირი წინ მიხტის და აი, ისიც, დამტვერილ შავ პალტოსა და ფეტრის რბილ შლაპაში გამოწყობილი ბებერი პიჟონი – ამ პატივცემულ ბებერს სირს მისტერ ეს-რა-ჩავიდინე დავარქვათ. იგი წინ და უკან დადის და ყველას ამ ფრაზას ეუბნება. ბურტყუნებს, რომ მხოლოდ წამით მოადუნა ყურადღება და ბიძგი იგრძნო... ეს რა ჩავიდინე? ამბობს, რომ არასდროს მოსწონდა დიდი მანქანები... ეს რა ჩავიდინე? აცხადებს, რომ არ ახსოვს სადაზღვევო კომპანიის სახელი, მაგრამ მათი წარმომადგენლები საკუთარ თავს სუფთახელებიან ადამიანებს უწოდებენ... ეს რა ჩავიდინე? შარვლის ბარტყზე სველი ლაქა ჩნდება. ქვაფენილზე გაწოლილი ჯოუნსი ამ ხანდაზმული უცნაური ტიპის მიმართ გამაღიზიანებელ სიბრაღულს გრძნობს და ერთი სული აქვს, უთხრას:

„გინდა, გაიგო, რა ჩავიდინე? დახედე საკუთარ შარვალს. ჩაისველე, QED.<sup>129</sup>“

კადრი კვლავ წინ მიხტის. ახლა მის ირგვლივ უფრო მეტი ხალხია. ყველა არაბუნებრივად მაღალი ჩანს და ჯოუნსი ფიქრობს, რომ, კუბოში ჩაწოლილი მიცვალებულის თვალთ, ეს დაკრძალვას წააგავს. რეი ბრედბერის<sup>130</sup> მოთხრობა ახსენდება, სავარაუდოდ, „ბრბო“, რომელშიც ადამიანები – ყოველთვის ერთი და იგივე სახეები – უბედური შემთხვევების ადგილებში იკრიბებიან და თავიანთი გამონათქვა-

<sup>129</sup> ლათ. „რაც უნდა დაგვემტკიცებინა“.

<sup>130</sup> ამერიკელი მწერალი.

მებით დაზარალებულების ბედს განსაზღვრავენ. თუ ჩურჩულით იტყვიან, რომ საქმე არც ისე ცუდადაა, რომ კაცს გაუმართლა და მძლოლმა საქის მოტრიალება მოასწრო, მაშასადამე, ყველაფერი კარგად იქნება. ხოლო თუ იტყვიან, – ცუდად გამოიყურება ან ალბათ ვერ გამოძვრებაო, – ჩათვალეთ, რომ კაცს ველარაფერი უშველის. მუდამ ერთი და იგივე ხალხი. ერთი და იგივე არაფრის მთქმელი, ხარბი სახეები. უსაქმოდ მოყიალენი, რომელთაც სისხლის დანახვა სწყურიათ და ალტაცებით ისმენენ დაჭრილების კვნესას.

ბრბოში კვლავ მოჩანს ნაცნობი მისტერ მე-არაფერი-მითქვამს. ზუსტად მის უკან ჯოუნსი დადიტს ქეველს ხედავს. ამჯერად მას არც ტანსაცმელი აკლია და კარგადაც გამოიყურება – არავითარი ძალის განავლის უღვაში. მაკარტიც იქვეა. მას შენს-კართან-ვდგა ვარ– და-ვაკაკუნებ-ს შევარქმევ, – ფიქრობს ჯოუნსი. კიდევ არის ვიღაც. ნაცრისფერი ადამიანი. ოღონდ ის მთლად ადამიანიც არ არის – უცხოპლანეტელია, რომელიც მის უკან იდგა, სანამ თვითონ სააბაზანოს კარს ეჯაჯგურებოდა. თითქმის უგრძობელ სახეზე უზარმაზარი შავი თვალები მოუჩანს. სპილოსავით მომჩვარული კანი თანდათანობით ეჭიმება – ბებერი მისტერ უცხოპლანეტელო-შინდარეკე გარემოს გავლენას ჯერ არ ემორჩილება. მაგრამ დაემორჩილება. ბოლოს და ბოლოს, ეს სამყარო მას მჟავასავით შეჭამს.

„შენ თავი აგიფეთქდა“ – უხსნის ჯოუნსი ნაცრისფერ ადამიანს, მაგრამ ენა არ ემორჩილება, პირსაც კი ვერ აღებს. თუმცა მისტერ უცხოპლანეტელო-შინდარეკე-ს, როგორც ჩანს, ესმის მისი, რადგან ნაცრისფერ თავს ოდნავ მისკენ ხრის.

„გონებას კარგავს“, – ამბობს ვიღაც და სანამ კადრი კვლავ გადახტება, ჯოუნსის ესმის, მისტერ ეს-რა-ჩავიდინე, ის, ვინც დაეჯახა და თეძო ტირის სამიზნე ფაიფურის თეფშივით დაუმსხვრია, გვერდით მდგომს ეუბნება:

– ყველა ამტკიცებს, რომ ლორენს უელკს<sup>131</sup> ვგავარ.

<sup>131</sup> ამერიკელი მუსიკოსი, აკორდეონისტი, იმპრესარიო.

სასწრაფო დახმარების მანქანაში ჯოუნსი გონზე ვერ მოდის, თუმცა გამუდმებით აკვირდება საკუთარ თავს სხეულს გარეთ გასული სულივით, თუმცა, არის კიდევ რაღაც, რასაც შემდეგ არავინ ეტყვის: გული გაუჩერდა, როდესაც ექიმებმა შარვალი გაუჭრეს და თედო გაუშიშვლეს, რომელიც ისე გამოიყურებოდა, თითქოს კანში ორი დიდი, უშნოდ გამოჩორკნილი კარის სახელური ჩაუკერებიათ. ჯოუნსიმ კარგად იცის, თუ რა არის გულის გაჩერება, რადგან მას და კლარას „სასწრაფო დახმარების“<sup>132</sup> ერთი სერიაც არ გაუცდენიათ, ის კი არა, განმეორებითაც ნახეს. ამ დროს ალიაქოთი იწყება. ერთ-ერთ ფერშალს კისერზე ჯვარი ჰკიდია, რომელიც განუწყვეტლივ ჯოუნსის ცხვირზე ედება, განსაკუთრებით მაშინ, როდესაც მოხუცი მისტერ ფერშალი, ფაქტობრივად, მიცვალებულის სხეულზე იხრება და... დალახვროს ეშმაკმა, „იგი სასწრაფო დახმარების მანქანაში მოკვდა!“ რატომ არავინ უთხრა, რომ იმ დაწყევლილ სასწრაფო დახმარების მანქანაში მოკვდა? ნუთუ მიიჩნიეს, რომ ეს მას არ დააინტერესებდა, და თუ გაიგებდა კიდევ, ერთს დაამთქნარებდა, ხელს ჩაიქნევდა და იტყოდა, – ეგ რა სათქმელი იყოო.

– გაიწიეთ! – ყვირის მეორე ფერშალი და მანამ, სანამ ჯოუნსის დეფიბრილატორს დაადებენ მკერდზე, მძლოლი უკან მოიხედავს და დადიტის დედას ხედავს. მაგრამ ამ დროს მასში დენს გაუშვებენ, სხეული შეხტება. როგორც პიტი იტყოდა, თეთრი ხორცი ძვალზე ცახცახებს. და თუმცა ჯოუნსი-დამკვირვებელს სხეული არ აქვს, იგი მაინც გრძნობს დენის დარტყმას, უზარმაზარ მძლავრ „ბუჰ“-ს, რომელიც მისი ნერვების ხეს სასიგნალო მამხალასავით გაანათებს. ღმერთს მადლობა შესწირე და ძირს დაეშვი. ალილუია!

საკაცებზე გართხმული სხეული წყლიდან ამოყვანილი თევზივით ფართხალებს და კვლავ შემდებია. რობერტა ქეველის ზურგს უკან

<sup>132</sup> ამერიკული ტელესერიალი ექიმების შესახებ.

მდგარი ფერშალი იხრება, პანელს დასცქერის და დანანებით ამბობს:

– ოჰ, არა, ჯანდაბა! სწორი ხაზია, ერთხელაც გავიმეოროთ.

ისინი მეორედ უშვებენ მუხტს, კადრი ამოძრავდება და ჯოუნსი უკვე საოპერაციოშია.

თუმცა, მთლად ასეც არ არის. საოპერაციოში მხოლოდ მისი ნაწილია, დანარჩენი კი ფანჯრის მიღმაა და იქიდან იყურება. გვერდით ორი ექიმი დგას, მაგრამ ისინი კარტს თამაშობენ და ყურადღებას არ აქცევენ ქირურგებს, რომლებიც დაშლილი ჯოუნსის აწყობას ცდილობენ. მათ ზემოთ, ვენტილატორებიდან წამოსული ჰაერის ნაკადი „კედელში გაკეთებული ხვრელის“ ავგაროზ სიზმართმჭერს აქანავებს.

ჯოუნსის, რატომღაც, არ უნდა იმის ყურება, რაც შუშის მიღმა ხდება – არ სიამოვნებს თედოს ადგილზე გაჩენილი სისხლიანი კრატერისა და იმ ნამსხვრევების დანახვა, რასაც ადრე ძვალი ერქვა. და თუმცა კუჭი არა აქვს და უსხეულოდ დარჩენილს პირლებინებაც არ უნდა შეეძლოს, მაინც ერევა გული.

ზურგს უკან კარტის მოთამაშე ერთ-ერთი ექიმი ამბობს:

– საკუთარ თავს დადიტსის საშუალებით ვაფასებდით. დადიტსი ჩვენი საუკეთესი ხანა იყო.

მეორე პასუხობს:

– ასე გგონია?

და ჯოუნსი ხვდება, რომ ეს ექიმები ჰენრი და პიტი არიან.

მათკენ ტრიალდება და, როგორც აღმოჩნდება, არცთუ უსხეულო ყოფილა, რადგან საოპერაციოს ფანჯარაში მოჩვენების ანარეკლს ხედავს. ის ჯოუნსი აღარ არის. უფრო სწორად, ადამიანი აღარ არის. კანი გაუნაცრისფრდა, თვალები უცხვირო სახიდან წინ წამოწეულ შავ ბოლქვებს მიუგავს. ერთ-ერთი იმათგანი გახდა, ერთ-ერთი...

ერთ-ერთი რუხი კაცუნა, – ფიქრობს იგი, – ისინი ასე, რუხ კაცუნებს გვიწოდებენ. ზოგი მათგანი კოსმოსურ ზანგებს გვეძახის.

პირს ალებს, რათა ეს ყველაფერი თქვას ან მეგობრებს დახმარება სთხოვოს, – ისინი ყოველთვის ეხმარებიან ერთმანეთს, თუკი შეუძლიათ, – მაგრამ ამ დროს კადრი ისევ წინ მიხტის (ეშმაკმა დალაზვროს ეს ლოთი მემონტაჟე) და იგი თავის თავს საავადმყოფოს პალატაში, მწოლიარეს ხედავს, ვილაც კი იძახის: „სად არის ჯოუნსი, ჯოუნსის ვეძებ“.

აჰა, – ფიქრობს იგი სიმწარენარევი კმაყოფილებით, – ყოველთვის ვიცოდი, რომ მარსის კი არა, ჯოუნსის ეძახდნენ. ეს სიკვდილი მეძახის, იქნებ სიკვდილის ანგელოზი, ამიტომ ჩუმად უნდა ვიწვე, რომ ვერ მომაგნოს. ბრბოში ხომ დამკარგა, შემდეგ სასწრაფო დახმარების მანქანაში სცადა ხელის ჩავლება, მაგრამ არ გამოუვიდა, ახლა კი საავადმყოფოში დაძრწის პაციენტად გადაცემული.

„შეწყვიტეთ, გთხოვთ, – კვენესის ბებერი მისტერ სიკვდილი საშინელი, მავედრებელი, მონოტონური ხმით, – ამას ვერ გაუძლებ, ნემსი გამიკეთეთ, სად არის ჯოუნსი, ჯოუნსის ვეძებ“.

ჩუმად ვიწვები, სანამ არ გაჩერდება, – ფიქრობს ჯოუნსი, – ისედაც ვერ ვდგები. ახლახან ორი გირვანქა ლითონი ჩამიდეს თედოში და ვინ იცის, რამდენ დღეში შევძლებ ადგომას. იქნებ, ერთი კვირაც კი გავიდეს.

მაგრამ ამ დროს შეძრწუნებული აღმოაჩენს, რომ უკვე დგება, საბანს გადასწევს და საწოლიდან გადმოდის, თუმცა გრძნობს, რომ თედოსა და მუცელზე ნაკერები იჭიმება და იხსნება, დონორის სისხლი ფეხზე ჩამოსდის და ბოქვენზე ამოსულ თმას ასველებს, მაგრამ იგი მაინც მიდის, არ კოჭლობს, გაივლის სინათლის სხივს, რომელიც იატაკზე ადამიანურ ჩრდილს მაშინვე აჩენს (მაღლობა ღმერთს, რომ რუხი კაცუნა აღარ არის, იმიტომ, რომ რუხი კაცუნები დაიბრაწნენ), და კარისკენ მიემართება. ყველასგან უხილავი დერეფანში დაეხეტება. ჩაუვლის საგორილოზე მოთავსებულ ლამის ქოთანს, ექთანების წყვილს, რომლებიც საუბრობენ, იცინიან, სურათებს ათვალეერებენ და ერთმანეთს უჩვენებენ. ისიც მონოტონური ხმის მიმართულებით



მიიწევს. შეჩერებას ვერ ახერხებს და ხვდება, რომ ღრუბელშია. ოღონდ არა – წითელში, როგორც მას პიტი და ჰენრი აღიქვამდნენ; ეს ნაცრისფერი ღრუბელია და იგი მასში დაცურავს, ერთადერთი ნამცეცი, რომელიც ღრუბელმა არ შეცვალა. და ჯოუნსი ფიქრობს:

მე ვარ ის, რასაც ისინი ეძებენ. არ ვიცი, ეს როგორ შეიძლება მოხდეს, მაგრამ ისინი მეძებენ. რადგან... ღრუბელმა არ შემცვალა? დიახ, ასე უნდა იყოს.

იგი სამ ღია კარს ჩაუვლის. მეოთხე დაკეტილია. მასზე წარწერაა: „შემოდით, აქ ინფექციის მსგავსი არაფერია, IL N°Y PAS D'INFECTION ICI

ცრუობ, – ფიქრობს ჯოუნსი, – კრუზია, კურტისი თუ ვინმე სხვა, შესაძლოა, გიჟია, მაგრამ ერთ რამეში არ ცდება: აქ ინფექციაა.

ფეხებზე სისხლი ჩამოსდის, საავადმყოფოს პერანგის კალთა კაშკაშა ალისფერი ხდება (კლარეტი წამოვიდა, როგორც ძველად, მოკრივეთა ასპარეზობისას კომენტატორი ამბობდა ხოლმე), მაგრამ ტკივილს ვერ გრძნობს. არც ინფექციის ეშინია. იგი განსაკუთრებულია, უნიკალური და ღრუბელს მხოლოდ მისი ტარება შეუძლია, შეცვლით კი ვერ შეცვლის. იგი კარს აღებს და შედის.

#### 4

უკვირს თუ არა საავადმყოფოს საწოლზე დიდი, შავი თვალების მქონე ნაცრისფერი კაცის დანახვა? სულაც არა. როდესაც ჯოუნსი „კედელში გაკეთებულ ხვრელში“ შეტრიალდა და მის უკან მდგომი ეს ტიპი აღმოაჩინა, პარაზიტს თავი გაუსკდა. მაგარი შაკიკი კი ჰქონია. ასეთი თავის ტკივილი ვის არ ჩააგდებდა ლოგინად. ახლა კი ამ ტიპს თავი თითქოს აღარ აწუხებს – თანამედროვე მედიცინა სასწაულებს ახდენს.

ოთახი წითელ სოკოს დაუფარავს, ყველაფერს მოწითალო ოქროსფერი ხავსი მოსდებია – იატაკს, ფანჯრის რაფას, ჟალუზის თამასებს წვრილ-წვრილ ნაკადულებს პლაფონებამდე და გლუკოზის

ბოთლამდე მიულწევია (ჯოუნსის აზრით, ეს გლუკოზაა), სააბაზანოს სახელურიდან და საწოლის სასათუმლიდან მოკლე-მოკლე მოწითალო ოქროსფერი კავები ეშვება.

როდესაც ჯოუნსი რუხ არსებას უახლოვდება, რომელსაც ზეწარი უთმო მკერდამდე აუწევია, ტუმბოზე ერთადერთ მოკითხვის ბართს ხედავს. „მალე გამოჯანმრთელდით!“ – დაბეჭდილია სალბუნდადებული სევდიანი კუს გაშარჟებული გამოსახულების ზემოთ. ქვემოთ კი წერია: „სტივენ სპილბერგისა და შენი ყველა ჰოლივუდელი მეგობრისგან“.

ეს სიზმარია, ჩვეულებრივი, არეულ-დარეული სიზმარი, – ფიქრობს ჯოუნსი, თუმცა კარგად იცის, რომ ეს ასე არაა. მისი გონება ნანახს აქუცმაცებს, ასუფთავებს, რათა მოინელოს, როგორც ეს სიზმარს ახასიათებს; წარსული, აწმყო და მომავალი ერთმანეთშია გადახლართული – ესეც სიზმრის თვისებაა. მაგრამ ჯოუნსიმ იცის, რა სახიფათოა მასზე უარის თქმა, თითქოს ის ქვეცნობიერიდან გამოსული უცნაური ზღაპარი ყოფილიყოს. ყოველ შემთხვევაში, მისი ნაწილი მაინც შეესაბამება რეალობას.

მას გადმოკარკლული შავი თვალები აკვირდება. საწოლზე მოთავსებული არსების გვერდით, ზეწარი კოლბოხებად ზევით იწევა. იქიდან მოჩანს მოწითალო, სინდიოფალას მსგავსი ქმნილება, რომელმაც ბივს ბოლო მოუღო. ისეთივე შუშის შავი თვალებით მისჩერებია მას, კუდის დახმარებით ბალიშზე ადის და ვიწრო, ნაცრისფერი თავის გვერდით იგორგლება. რა გასაკვირია, რომ მაკარტი შეუძლოდ იყო, – ფიქრობს ჯოუნსი.

სისხლი კვლავ მოედინება ჯოუნსის ფეხებზე. თაფლივით ბლანტია და ცხელებასავით მხურვალე. იატაკზე უცნაურ ფიგურებს ხატავს და მალე წითელი ობის ან ხავსის საკუთარ კოლონიას შექმნის, ნამდვილ ჯუნგლსაც კი. მაგრამ ჯოუნსიმ უკეთ იცის. იგი ხომ უნიკალურია. ღრუბელს შეუძლია მისი ტარება, მაგრამ შეცვლა არ ძალუძს.

არ არის მოძრაობა, არ არის თამაში, – გაიფიქრებს და მაშინვე ამატებს, – ჩუ-უ-უ, ჩ-უ-უ, შენთვის შეინახე.

ნაცრისფერი არსება (ნეტა რა სქესისაა?) დუნედ სწევს ხელს მისალმების ნიშნად. მხოლოდ სამი თითი აქვს და ვარდისფერი ფრჩხილები. ფრჩხილებიდან სქლად მოედინება ყვითელი ჩირქი. ისეთივე, როგორიც კანის ნაკეცებსა და თვალის კუთხეებში მოუჩანს.

მართალი ხარ, ნემსის გაკეთება გჭირდება, – ფიქრობს ჯოუნსი, – ცოტა კარბოლმჟავა ან ლიზოლი, რალაც მათი მსგავსი. ოღონდ კი ჭკუაზე...

თავში საშინელი აზრი მოსდის, თანაც ისეთი ძლიერი, რომ ვერ ეწინააღმდეგება ძალას, რომელიც საწოლისკენ უბიძგებს. შემდეგ ფეხები მოძრაობას იწყებს და იატაკზე გადღაბნილ წითელ კვალს ტოვებს.

ჩემი სისხლის დაღვევას ხომ არ აპირებ? ვამპირივით?

საწოლზე მოთავსებული არსება გაქვავებული სახით იღიმის:

„ჩვენ, თქვენი ტერმინოლოგიით რომ ვთქვა, ვეგეტარიანელები ვართ“.

„ბაუსერზე რას იტყვი? – ჯოუნსი უფეხო სინდიოფალაზე მიუთითებს, რომელსაც წვეტიანი კბილები გროტესკულად დაუკრეჭია, – ისიც ვეგეტარიანელია?“

„კარგად მოგეხსენება, რომ – არა, – პასუხობს ნაცრისფერი არსება პირის გაუღებლად. ვერაფერს იტყვი, ნამდვილი მუცელმოგვია. გვარიან წარმატებას მიაღწევდა კეტსკილის მთებში<sup>133</sup>, – ისიც იცი, რომ მისი არ უნდა გეშინოდეს“.

„რატომ? სხვებისგან განვსხვავდები?“

მომაკვდავი ნაცრისფერი არსება (ის, ცხადია, კვდება, მისი სხეული შიგნიდან იხრწნება) არ პასუხობს და ჯოუნსი კვლავ ფიქრობს:

---

<sup>133</sup> მთები ნიუ-იორკის სიახლოვეს. ქალაქელების საყვარელი დასასვენებელი ადგილი.

არ არის მოძრაობა, არ არის თამაში. რატომღაც ჰგონია, რომ ნაცრისფერი არსება ბევრს გაიღებდა სწორედ ამ აზრის წასაკითხავად, მაგრამ ვერ მიართვეს! საკუთარი აზრების დაცვა კიდევ ერთი მიზეზია მისი მოუწყვლევლობის და უნიკალურობისა. *vive la difference*<sup>134</sup>, სულ ესაა, რისი თქმაც ჯოუნსის შეუძლია (იმიტომ არა, რომ ენა ექავება).

„მაშ, რით განვსხვავდები დანარჩენებისგან?“

„ვინ არის დადიტის? – ეკითხება ნაცრისფერი არსება და როცა ჯოუნსი არ პასუხობს, კვლავ სახეგაშეშებული ილიმის, – ხომ ხედავ, ორივეს გვაქვს ისეთი შეკითხვა, რომელზეც პასუხის გაცემა არ გვსურს. მოდი, ისინი დროებით დავივიწყოთ. რას უწოდებთ იმას? იმას, თამაშის დროს?“

„ქრიბს“, – ამბობს ჯოუნსი. მას ხრწნის სუნი სცემს, სწორედ ისეთი, მაკარტიმ რომ მოიტანა მონადირეთა სახლში, ეთეროვან-გოგირდოვანი სიმყრალე. ოჰ, ღმერთო, მერამდენედ ნანობს, ტყვია რომ არ დაახალა იმ ბოზიშვილს, სანამ სითბოს თავს შეაფარებდა. ეგდებოდა იმ სიცივეში ნეკერჩხლის ხეზე მოწყობილი პლატფორმის გვერდით და ფეხებს გაფშეკდა.

„ჰო, ქრიბი, – იმეორებს ნაცრისფერი არსება. სიზმართმჭერი ავგაროზი უკვე აქ არის, ჭერზე ჰკიდია და ნელა ტრიალებს ნაცრისფერი არსების თავზემოდ, – ყველაფერი, რისი გამხელაც ერთმანეთისთვის არ გვსურს, გვერდზე გადავდოთ და მოგვიანებით დავთვალოთ. ქრიბში ჩავდოთ“.

„რა გინდა ჩემგან?“

ნაცრისფერი არსება თვალდაუხამხამებლად შეჰყურებს ჯოუნსის. თუმცა, ჯოუნსის აზრით, მას ამის გაკეთება არც შეუძლია, რადგან არც ქუთუთოები აქვს და არც – წამწამები.

„არც ქუთუთოები და არც წამწამები, – იმეორებს არსება, მაგრამ

---

<sup>134</sup> გაუმარჯოს განსხვავებას (ფრ).

ჯოუნსის ამჯერად პიტის ხმა ჩაცემის, – ყოველთვის არაფერი, არასდროს არაფერი. ვინ არის დადიტსი?”

ჯოუნსი ისეა გაოცებული, რომ კინალამ პასუხობს... სწორედ ეს სურს არსებას – მოულოდნელობის ეფექტის გამოყენება. ეშმაკობას სიკვდილის წინაც არ იშლის. ჯოუნსის მეტი სიფრთხილე მართებს. ის ნაცრისფერ არსებას დიდი ყავისფერი ძროხის სურათს უგზავნის, რომელსაც კისერზე ფირფიტა ჰკიდია. ფირფიტაზე წერია: დადიტსი ძროხაა.

ნაცრისფერი არსება კვლავ სახეგაშეშებული ილიმის, იგი ჯოუნსის თავში ილიმის.

„დადიტსი ძროხაა? არა მგონია“, – ამბობს იგი.

„საიდან ხარ?“ – ეკითხება ჯოუნსი.

„პლანეტა X-დან. ჩვენ მომაკვდავი პლანეტიდან მოვფრინდით „დომინოსთან“<sup>135</sup> პიცის საჭმელად, რაღაც-რაღაცების კრედიტით შესაძენად და ბერლიცის მეთოდით იტალიური ენის შესასწავლად“.

ახლა ეს ჰენრის ხმაა. შემდეგ მისტერ უცხოპლანეტელო-შინ-დარეკე საკუთარ ხმას უბრუნდება... ოღონდ დაღლილი ჯოუნსი ხვდება და არც უკვირს, რომ ეს მისი, ჯოუნსის ხმაა. მან იცის, რას ეტყოდა ჰენრი, აქ რომ ყოფილიყო, ბივერის დალუპვის გამო ჰალუცინაციები დაგეწყო.

არავითარ შემთხვევაში, – ფიქრობს ჯოუნსი, – ეს აღარასოდეს მოხდება. ამიერიდან ის ეგმენია, ეგმენს კი უკეთ მოეხსენება.

„ჰენრი? ის მალე მოკვდება“, – ინდიფერენტულად ამბობს ნაცრისფერი ტიპი. იგი ხელს გადასაფარებლის გასწვრივ აპარებს და სამი გრძელი რუხი თითით ჯოუნსის ხელისგულზე სწვდება. თბილი და მშრალი კანი აქვს.

„რას გულისხმობ? – ეკითხება ჰენრის გამო შეშინებული ჯოუნსი, მაგრამ მომაკვდავი არსება არ პასუხობს. კიდევ ერთი კარტი ქრიბში. ამიტომ ჯოუნსი კიდევ ერთს კარტს ჩადის, – რატომ დამიძახე?“

---

<sup>135</sup> კაფე ნიუ-იორკში.

ნაცრისფერი ქმნილება აშკარად გაოცებულია, თუმცა სახე კვლავ გაშეშებული აქვს.

„არავის უნდა მარტოობაში სიკვდილი, – პასუხობს იგი, – მინდოდა, ვინმე ყოფილიყო ჩემ გვერდით. ყველას უნდა. ეს კარგად ვიცი – ტელევიზორს ხომ ჩვენც ვუყურებთ“.

„მე არ მინდა...“

„არის ერთი ფილმი, რომლის ნახვაც განსაკუთრებით ველოდი. ის შენც მოგეწონება. მას „თანაგრძნობა რუხი კაცუნებისადმი“ ჰქვია. ბაუსერი! პულტი!“

ბაუსერი ჯოუნსის უბოროტეს მზერას ჩუქნის და ბალიშიდან ჩასრიალდება. მოქნილი კუდი ქსოვილზე ისე ფაჩუნებს, როგორც გველი ქვაზე ხოხვისას. ტელევიზორის პულტი მაგიდაზე დევს. ისიც სოკოთია დაფარული. ბაუსერი მას კბილებს სტაცებს, დატრიალდება და ნაცრისფერი არსებისკენ მიიპარება. ნაცრისფერი არსება ჯოუნსის ხელს უშვებს (შეხება სულ არ შეზიზღებია, მაგრამ გათავისუფლება მაინც შვებას ჰგვრის), პულტს იღებს და თითს ჩართვის ღილაკს აჭერს. ეკრანი ნათდება. სურათი ოდნავ ბუნდოვანია, ბუსუსებს იგი მთლიანად არ დაუფარავს. ეს ხომ „ხვრელის“ უკან მდებარე ფარდულია! ეკრანის ცენტრში მწვანე ბრეზენტი რალაცას ეფარება. სანამ კარი გაიღება და დაინახავს საკუთარ თავს, თუ როგორ შედის შიგნით, ჯოუნსი ხვდება, ეს ყველაფერი რასაც ნიშნავს. ვარსკვლავი ფილმისა „რუხი კაცუნებისადმი თანაგრძნობა“ თავად გარი ჯოუნსია.

„კარგი, – ამბობს მომაკვდავი არსება, რომელიც მყუდროდ მოკალათებულა ჯოუნსის ტვინის ცენტრში, – ჩვენ ნდობა გვაკლია, მაგრამ ფილმი ხომ ახლა იწყება“.

სწორედ ამის ეშინია ჯოუნსის.

ფარდულის კარი იღება და ჯოუნსი შემოდის. ნამდვილი კლოუნია. თავისი პალტო აცვია, ბივერის ხელთათმანები უკეთია და ლამარის ძველი ნარინჯისფერი ქუდი ახურავს. წამით ის ჯოუნსი, რომელიც საავადმყოფოს ერთ-ერთ პალატაში ტელევიზორს უყურებს (მნახველებისთვის განკუთვნილ სავარძელში მისტერ გრეის საწოლის გვერდით რომ ზის), გაიფიქრებს, რომ „კედელში გაკეთებული ხვრელის“ ფარდულში მდგარი ჯოუნსი უკვე დაინფიცირებულია და თავიდან ფხვებამდე სოკოთია დაფარული, მაგრამ შემდეგ ახსენდება, რომ მისტერ გრეი მის ცხვირწინ აფეთქდა, – ყოველ შემთხვევაში, თავი მაინც აუფეთქდა, – ჯოუნსი მის ნარჩენებს უახლოვდება.

„მაგრამ შენ არ აფეთქებულხარ, – ამბობს იგი, – შენ... შენ რა? დასათესად მოხვედი?“

„ჩუ-უ-უ! – ამბობს მისტერ გრეი, მრისხანე ბაუსერი კი გაფრთხილების ნიშნად, კბილებს კრეჭს, თითქოს ჯოუნსის თავაზიანობისკენ მოუწოდებს, – მე მიყვარს ეს სიმღერა, შენ?“

საუნდტრეკი კარგადაა შერჩეული – „როლინგ სტოუნზის“ „თანაგრძნობა ეშმაკისადმი“ თითქმის თანხვედება ფილმის სახელწოდებას (ჩემი საეკრანო დებიუტი, – ფიქრობს ჯოუნსი, – მოიცადეთ, ჯერ კარლამ და ბავშვებმა ნახონ!), მას მართლაც მოსწონს ეს სიმღერა, რომელიც მსუბუქ სევდას ჰგვრის.

„როგორ შეიძლება, გიყვარდეს? – ეკითხება იგი და ბაუსერის დაკრეჭილ კბილებს ყურადღებას არ აქცევს: ბაუსერი მისთვის საფრთხეს არ წარმოადგენს და ეს ორივემ კარგად იცის, – ეს როგორ შეიძლება? ისინი ხომ ამ მუსიკის ფონზე გხოცავენ!“

„ისინი ყოველთვის გვკლავენ, – პასუხობს მისტერ გრეი, – ახლა კი გაჩუმდი და ფილმს უყურე. ეს ნაწილი ცოტა გაწელილია, მაგრამ მერე უკეთესი იქნება“.

ჯოუნსი ხელებს წითელ მუხლებზე იწყობს – როგორც ჩანს, სისხლდენა შეუჩერდა – და „რუხი კაცუნებისადმი თანაგრძნობას“ უყუ-

რებს, მთავარ როლში ერთადერთი და განუმეორებელი გარი ჯოუნსია.

## 6

ერთადერთი და განუმეორებელი გარი ჯოუნსი თოვლმავალს ბრეზენტს გადახდის, მიიხედ-მოიხედავს, დაზგაზე მუყაოს ყუთში ჩადებულ აკუმულატორს შეამჩნევს, მანქანაში ჩააყენებს და სადენებს შესაბამისად მიუერთებს. მისი, როგორც მექანიკოსის ცოდნა ამით ამოიწურება – ბოლოს და ბოლოს, ის ხომ ისტორიის მასწავლებელია, ამას წინათ კი გადაწყვიტა, ბავშვების აღზრდის საქმეში წვლილი შეეტანა და დაავალა, რომ კვირაში ერთხელ, „ზენას“<sup>136</sup> ნაცვლად, ისტორიის არხს უყურონ. როგორც კი ჯოუნსი გასაღებს ატრიალებს, პანელზე ინდიკატორები ინთება. მასსადამე, აკუმულატორი სწორად მიუერთებია, მაგრამ ძრავა არ იქოქება. ხმასაც არ იღებს. სტარტერი რაღაცას ცდილობს მაინც. ეგ არის და ეგ.

– ო-ო, ღმერთო, ო-ო, ღმერთო! ამის დედაც! .. – ამბობს თანაბარი ხმით. დარწმუნებული არაა, რამდენად ღირს ზედმეტი ემოციის გამოვლენა, ან აქვს თუ არა ამის სურვილი. მას, საშინელებათა ფილმების მოყვარულს, სულ ცოტა, ოცჯერ მაინც ექნება ნანახი „სხეულის დამპყრობთა შემოსევა“ (ყოვლად უვარგისი რიმეიკიც კი დონალდ საზერლენდის<sup>137</sup> მონაწილეობით) და იცის, რაც მოხდა. მას მთელი სხეული უცერემონიოდ წაართვეს. თუმცა ამ შემთხვევაში, ზომბების არმიის გამოჩენა მოსალოდნელი არ არის. ის უნიკალურია. გრძნობს, რომ პიტი, ჰენრი და ბივიც უნიკალურები არიან (ანუ ბივი უნიკალური იყო), მაგრამ ამ ოთხეულიდან თვითონაა გამორჩეული. რა თქმა უნდა, საკუთარ თავზე ასე არ უნდა ლაპარაკობდეს, მაგრამ ეს განსაკუთრებული შემთხვევაა. პიტიც უნიკალური იყო და ბივერიც, ჰენრი – მათზე მეტად უნიკალური, თვითონ კი, ჯოუნსი,

<sup>136</sup> ამერიკულ-ახალზელანდიური სერიალი, ფენტეზის ჟანრში.

<sup>137</sup> კანადელი მსახიობი



უნიკალურესია. იგი ხომ საკუთარ ფილმში ვარსკვლავად იქცა. „ეს იშვიათობაა“, – როგორც მისი უფროსი შვილი იტყოდა.

საავადმყოფოს საწოლზე მყოფ ნაცრისფერ კაცს ტელევიზორიდან, სადაც ჯოუნსი I Arctic Cat-ზე შემომჯდარა, მზერა ჯოუნსი II-ზე გადააქვს, რომელიც სავარძელში მოკალათებულა და პერანგი გასისხლიანებია.

„რას მალავ?“ – ეკითხება მისტერ გრეი.

„არაფერს“.

„რატომ ხედავ გამუდმებით აგურის კედელს? რას ნიშნავს 19, გარდა იმისა, რომ რიცხვია? ვინ თქვა, ვეფხვების დედაცო? ეს რაღას ნიშნავს? რა არის აგურის კედელი? როდის არის ხოლმე აგურის კედელი? რას ნიშნავს, რატომ ხედავ მას გამუდმებით?“

ჯოუნსი გრძნობს, როგორ ცდილობს მისტერ გრეი მისგან სიმართლის გაგებას, მაგრამ ახლა, თუნდაც გარკვეული ხნით, ჭეშმარიტების მარცვალი უსაფრთხოდაა. ჯოუნსი შესაძლოა წაიყვანონ, მაგრამ ვერ შეცვლიან, ვერც ბოლომდე გახსნიან, როგორც ჩანს. ჯერ-ჯერობით მაინც.

ჯოუნსი საჩვენებელ თითს ტუჩებზე იდებს და ნაცრისფერ ტიპს მისსავე სიტყვებს უბრუნებს:

„გაჩუმდი და ფილმს უყურე“.

არსება მას შავი თვალბურთულებით აკვირდება (მწერივით აქვს, ფიქრობს ჯოუნსი, ღვთისმლოცველასავით<sup>138</sup>), მაგრამ უსიამოვნო შეგრძნება თანდათან ქრება. ანდა რა ეჩქარება. ადრე თუ გვიან ჭეშმარიტებას ბოლომდე გამოსტყუებს ჯოუნსის სხეულის დაუმორჩილებელ ნაწილს და ყველაფერი ეცოდინება.

ახლა კი ფილმს უყურებენ. და როდესაც ჯოუნსის მუხლებზე ბაუსერი მოკალათდება და დაეხვევა, – ბასრკბილებიანი, ანტიფრიზის ეთერის სუნად აყოლებული ბაუსერი, – იგი მას თითქმის ვერ ამჩნევს.

---

<sup>138</sup> მწერის სახეობა.

ჯოუნსი , ფარდულის მეფე ჯოუნსი (სინამდვილეში ახლა ის მისტერ გრეია) საცეცებს აჩენს. მან მრავალთა ტვინში უნდა შეაღწიოს. უცხო აზრები ერთმანეთში ირევა, ერთმანეთს ღამის რადიოტალღებით ედება, მაგრამ იგი საკმაოდ სწრაფად პოულობს იმას, რასაც ეძებს. ეს იგივეა, რაც პერსონალურ კომპიუტერში ფაილის გახსნა და სიტყვების ნაცვლად შესანიშნავი, 3-D ფორმატის ფილმის ნახვა, რომელშიც ყველა დეტალია აღწერილი.

მისტერ გრეის წყარო ემილ „დოგ“ ბროდსკია ნიუ-ჯერსის შტატის ქალაქ მენლოპარკიდან. ბროდსკი ტექნიკური ჯარის სერჟანტია, მანქანების პარკის პატარა ხრახნი. მაგრამ აქ, ოპერატიული რეაგირების ჯგუფში, რომელსაც კურცი ხელმძღვანელობს, წოდება არავის აქვს. არც მას. რანგით მასზე მაღლა მდგომებს „ბოსს“ უწოდებს, დანარჩენებს (ასეთები ამ ხორცსაკეპში ცოტანი არიან) – „ეი, შენს“. უცნობებისთვის „მეგობარო“ ან „მოხუცოც“ გამოდგება.

აქაურობის თავზე მცირე რაოდენობის რეაქტიული თვითმფრინავები დაფრინავენ (მათ მიწის სიახლოვეს მდებარე ორბიტაზე ყველა აუცილებელი სურათის გადაღება შეუძლიათ, თუ ეს ღრუბლები ოდესმე გაიფანტება), მაგრამ ბროდსკის ეს არ ეხება. თვითმფრინავები აფრენას ბანგორის ეროვნული გვარდიის ავიაბაზიდან ახორციელებენ, ის კი აქ არის, ჯეფერსონტრექტზე. ბროდსკის სამუშაო ვერტიმფრენები და სატვირთო მანქანები სწრაფად მზარდ გაერთიანებულ ავტოპარკშია (შუადღის შემდეგ შტატის ამ ნაწილში ყველა გზა გადაკეტილია და ერთადერთი ტრანსპორტი ზეთისხილისფერი სატვირთო მანქანებია საგულდაგულოდ გადაღებილი ნომრებითა და წარწერებით). მან აგრეთვე, სულ ცოტა, ოთხი გენერატორი უნდა დააყენოს, რათა გოსლინის მაღაზიის ირგვლივ განთავსებული ბანაკი დენით მოამარაგოს. ამისათვის მთელ პერიმეტრზე მოძრაობის დამაფიქსირებელი დიდი ფარები, პროექტორები და ფარნები სჭირდება, აგრეთვე ნათურები მოძრავი ჰოსპიტლისთვის, რომელიც ფირმა „უინდსთარის“ ბორბლებზე შეყენებულ სახლშია მოწყობილი.

კურცმა გარკვევით აუხსნა, რომ განათებას განსაკუთრებულ მნიშვნელობას ანიჭებს და აქაურობა დღისითაც და ღამითაც გაჩახჩახებული უნდა იყოს. ყველაზე მეტი პროექტორი ცხენების სადგომად რომ გამოიყენებოდა, იმ შენობასა და მის უკან მდებარე საძოვართან დააყენეს. მინდორში, სადაც ადრე ბებერი რეჯი გოსლინის ორმოცი მეწველი ძროხა ძოვდა, ორი კარავი გაშალეს. უფრო მობრდილს მწვანე სახურავზე „სასადილო“ აწერია, მეორე კი, თეთრი, უწარწეროდაა დატოვებული. მასში არც ნავთზე მომუშავე გამათბობლები დგას, როგორც – პირველში, რადგან საჭირო არ არის. ჯოუნსი ხვდება, რომ იქ ღრობითი მორგია მოწყობილი. ჯერჯერობით, მხოლოდ სამი გვამია მოთავსებული (ერთ-ერთი – უტვინო ბანკირის, რომელმაც გაქცევა სცადა), მაგრამ მალე უფრო მეტი იქნება, თუ, რა თქმა უნდა, უბედური შემთხვევა არ მოხდა, რაც გვამების მოძებნასა და გადმოტანას შეაფერხებს. ისიც სათქმელია, რომ ამგვარი რამ კურცს, ბოსს, უამრავ პრობლემას მოუგვარებდა.

ეს ისე, სხვათა შორის. ახლა კი ჯოუნსი I-მა მენლოპარკელ ემილ ბროდსკის უნდა მიხედოს.

ბროდსკი სწრაფად გადაადგილდება დათოვლილ, ჭენჭყოიან, ატალახებულ მიწაზე ვერტიფერების დასაჯდომ მოედანსა და საძოვარს შორის, სადაც „რიპლის სოკოთი“ დაავადებული ადამიანები ჰყავთ თავმოყრილი (უკვე საკმაოდ ბევრნი არიან, გაცელებული სახით წინ და უკან დადიან ქვეყნის ყოველი კუთხიდან ჩამოყვანილი ტყვეებით, დროდადრო გუშაგებს ეძახიან, სიგარეტსა და ინფორმაციას ითხოვენ, უაზროდ იმუქრებიან). ემილ ბროდსკი ჯმუხი, მოკლედ თმაშეკრეჭილი კაცია, ბულდოგის სახით, რომელიც თითქოს იაფი სიგარებისთვისაა შექმნილი (ჯოუნსიმ დანამდვილებით იცის, რომ ბროდსკი ღვთისმოსავი კათოლიკეა და სიგარეტი ცხოვრებაში არ მოუწევია), მათ ყვირილს ყურადღებას არ აქცევს, რადგან ძალზე დაკავებულია – ცალხელა მღებავივით უამრავი რამ უნდა მოასწროს. ყურსასმენები უკეთია, მიკროფონი პირთან აქვს. საწვავით

სავსე ავტოკოლონას უკავშირდება, კოლონა საცაა გამოჩნდება – ეს სწორედ რომ დროული იქნება, რადგან ბაზაზე მალე საბრძოლო დავალებების შესასრულებლად წასული ვერტიმფრენები დაბრუნდებიან. იმავდროულად, მის გვერდით მიმავალ კემბრისთანაც ახერხებს საუბარს მართვისა და კონტროლის ცენტრთან დაკავშირებით, რომლის ორგანიზებაც, კურცის ბრძანებით, სალამოს ცხრა საათისთვის, უკიდურეს შემთხვევაში, შუალამისთვის უნდა მოასწრონ.

გავრცელებული ხმების თანახმად, ოპერაციისთვის ორმოცდარვა საათია გამოყოფილი, მაგრამ ზუსტად არავინ იცის. იმასაც ამბობენ, რომ ძირითადი სამიზნე, „ცისფერი ბიჭი“ უკვე განადგურებულია, თუმცა ბროდსკი დანამდვილებით ვერაფერს ამბობს, რადგან დიდი საბრძოლო ვერტიმფრენები ჯერ არ დაბრუნებულან. სხვათა შორის, ამ უკანასკნელებს ბევრი არაფერი მოეთხოვებათ: მიზანში ამოღება და ბერკეტზე ხელის დაუფიქრებლად დაჭერა.

ღმერთო ჩემო, მესამე ჯოუნსი საიდანღა გაჩნდა? თანაც – სამივე ერთდროულად. ერთი საავადმყოფოს სოკოთი დაფარულ პალატაში ტელევიზორს უყურებს, მეორე ფარდულშია, მესამე კი... ჯოუნსი III როგორღაც ემილ ბროდსკის თმაშეკრეჭილ კათოლიკურ თავში ჩასახლებულა. ბროდსკი ჩერდება და თეთრ ცას აშტერდება.

კემბრი სამ-ოთხ ნაბიჯს კიდევ დგამს, სანამ მიხვდება, რომ დოგი ატალახებული საძოვრის შუაგულში დგას და არ იძვრის. ირგვლივ საშინელი ალიაქოთია – ხალხი აქეთ-იქით დარბის, ვერტიმფრენები ეშვება, ძრავები ღმუის, დოგი კი ბატარეადამჯდარი რობოტივით გაშეშებულა.

– ბოს! ყველაფერი კარგადაა? – ეკითხება კემბრი.

ბროდსკი არ პასუხობს... კემბრის არ პასუხობს. სამაგიეროდ, ჯოუნსი I-ს – ფარდულში მყოფს – არიგებს: „ძრავას კაპოტი ახადე და სანთლები დამანახვე“.

ჯოუნსი დიდხანს წვალობს, არ იცის, კაპოტი როგორ ახადოს,

მაგრამ ბროდსკი მითითებებს აძლევს. ბოლოს ჯოუნსი პატარა ძრავის თავზე იხრება, მასში გარკვევას არც კი ცდილობს, კამერის საჭვრეტში იყურება და გამოსახულებას ბროდსკის გადასცემს.

– ბოს! – ამბობს შეშფოთებული კემბრი, – რა მოხდა, ბოს?

– ისეთი არაფერი, – ნელა, მაგრამ მკაფიოდ პასუხობს ბროდსკი და ყურსასმენს იხსნის: გაუთავებელი ტკაცატკუცი ყურადღებას უფანტავს, –

ერთი წუთი მაფიქრე.

მერე ჯოუნსის მიმართავს: „ვილაცას სანთლები ამოულია. მიიხედ-მოიხედე... აი, იქ არის. დაზგის კიდებზე“.

დაზგის კიდებზე საწვავით ნახევრად სავსე მაიონზობის ქილა დევს. თავსახურზე სახრახნისით ორი ხვრელი აქვს გაკეთებული, რათა აირი არ დაგროვდეს. ქილაში „ჩემპიონის“ ფირმის ორი სანთელი დევს ფორმალდეჰიდში<sup>139</sup> მოთავსებული ლაბორატორიული ექსპონატებით. ბროდსკი ხმამაღლა ამბობს:

– კარგად გაწმინდე.

როდესაც კემბრი ეკითხება, – რა გავწმინდო კარგადო, – დაბნეულად პასუხობს:

– მოკეტე.

ჯოუნსი სანთლებს იღებს, გულმოდგინედ წმენდს და, ბროდსკის მითითებით, საჭირო ადგილას ათავსებს.

„ახლა ხელახლა სცადე, – ამბობს იგი ტუჩების მოძრაობის გარეშე და მაშინვე ძრავის ღრიალი ისმის, – საწვავი შეამოწმე, არ დაგავიწყდეს“.

ჯოუნსი ასეც იქცევა და ბროდსკის მადლობას უხდის.

– რა პრობლემაა, ბოს, – ეუბნება იგი და გზას განაგრძობს. კემბრი ნაბიჯს აჩქარებს, ცდილობს, თანამოსაუბრეს არ ჩამორჩეს. იგი ხედავს დოგის გაოცებულ სახეს, როდესაც ეს უკანასკნელი აღმოაჩინს, რომ ყურსასმენი მოხსნილი აქვს.

---

<sup>139</sup> უფერო, მძაფრი სუნის მქონე, ტოქსიკური, კარგად ხსნადი აირი.

– რა ჯანდაბას ნიშნავს ყოველივე ეს? – ეკითხება ბროდსკის.

– არაფერია, – თავიდან იცილებს ბროდსკი. მაგრამ რაღაც ნამდვილად იყო. რაღაც ცუდი. ლაპარაკი, საუბარი, კონსულტაცია? ჰო, სწორედ ეს. მაგრამ ვერაფრით იხსენებს, კონკრეტულად რის შესახებ. კარგად ახსოვს დილანდელი ბრიფინგი ოპერაციის დაწყების წინ. კურცის ერთ-ერთი დირექტივის მიხედვით, რაიმე უჩვეულოს შემჩნევისთანავე მისთვის უნდა ეცნობებინათ. მაგრამ იყო კი ეს უჩვეულო? და იყო კი საერთოდ?

– ალბათ, წამით გონება დამეზინდა, – ამბობს ბროდსკი, – საქმე ბევრია, დრო კი ცოტა. აბა, არ ჩამომჩრჩე, ფეხი ამიწყვე.

კემბრი ასეც იქცევა. ბროდსკი შეწყვეტილ საუბარს ორივესთან განაგრძობს – ბენზინის მანქანების კოლონა იქაა, კემბრი – აქ. ახსოვს, რომ კიდევ იყო რაღაც, მესამე საუბარი, რომელიც უკვე დასრულდა. უჩვეულოა? სულაც არა, ასკვნის ბროდსკი. რასაკვირველია, ისეთი არაფერი მომხდარა, რომ გული გადაუშალოს იმ უცოდინარ ნაძირალა პერლმუტერს, რომელსაც მხოლოდ ის სჯერა, რაც პლანშეტზეა. მისთვის სხვა არაფერი არსებობს. კურცს ხომ არ უთხრას? არასოდეს. იგი პატივს სცემს ამ ბებერ კაკაჩას, მაგრამ კიდევ უფრო მეტად ეშინია მისი. კურცის ყველას ეშინია. კურცი ჭკვი ანია, მამაცი, თუმცა, იმავდროულად, მასზე გადარეული მთელ ჯუნგლში არავინ ეგულება. ბროდსკის კურცის ჩრდილზე დაბიჯებაც კი არ სურს.

ანდერჰილი? იქნებ ოუენ ანდერჰილთან დალაპარაკება ღირდეს?

შესაძლოა... შესაძლოა, არც ღირდეს. ამგვარ საქმეებში შეიძლება ისე გაება, რომ ველარაფერმა გიშველოს. თანაც არაფრის გულისთვის. მას ხომ რაღაც ხმები, უფრო სწორად, ხმა, სულ ერთი-ორი წუთის განმავლობაში ესმოდა. ახლა ყველაფერმა გაიარა. თითქოს...

ისევე „კედელში გაკეთებული ხვრელი“. აღმუვლებულ თოვლმა-

ვალზე შემჯდარი ჯოუნსი ფარდულიდან გამოდის და დიფქათროუ-დისკენ მიქრის. ის გრძნობს ჰენრის სიახლოვეს, როდესაც მას ჩაუქროლებს, – ჰენრი ხის უკან იმალება, სახე ხავსში ჩაურგავს ყვირილის შესაკავებლად, – მაგრამ უმაღლავს იმ ღრუბელს, მას რომ დაუფლებია და მისგან დაფარული ინფორმაციის სრულად გაგება სურს. ჯოუნსი თითქმის დარწმუნებულია, რომ უკანასკნელად იდგა ძველი მეგობრის გვერდით, რომელიც ამ ტყეებიდან ცოცხალი ვერასდროს გამოვა.

გული სწყდება, რომ ვერ დაემშვიდობა.

## 7

„არ ვიცი, ვინ გადაიღო ეს ფილმი, – ამბობს ჯოუნსი, – არა მგონია, სმოკინგის გაუთოებამ მოუწიოთ „ოსკარით“ დაჯილდოების ცერემონიის წინ. აშკარაა, რომ...“

აქეთ-იქით იხედება და მხოლოდ დათოვლილ ხეებს ხედავს. წინაც მხოლოდ ხეებია და მეტი არაფერი, გარდა უსასრულოდ დაკლაკნილი დიფქათროუდის და თეძოებს შორის მოცახცახე თოვლმავლისა. არავითარი საავადმყოფო, არავითარი მისტერ გრეი. ყველაფერი სიზმარი იყო.

თუმცა არა, ასე არ ყოფილა. აგერ, ოთახი. თუმცა, ეს საავადმყოფოს პალატა არაა. შიგ არც საწოლი დგას, არც – ტელევიზორი და არც – საწვეთელა. საერთოდ არაფერი. მხოლოდ განცხადებების დაფაა, რომელზეც ორი რამ არის გაკრული: ახალი ინგლისის რუკა „ძმები თრექერების“ სატვირთო მანქანების მარშრუტით და პოლაროიდის სურათი კაბაწამოხდილი თინეიჯერი გოგოსი, რომელსაც წელს ქვემოთ ოქროსფერი პატარა ბუჩქი მოუჩანს. ჯოუნსი ფანჯრიდან დიფქათროუდს გასცქერის და დარწმუნებულია, რომ საავადმყოფოს პალატაში იმყოფება. მაგრამ იქ რაღაც ისე ვერ არის. დაუყოვნებლივ უნდა დატოვოს იქაურობა, რადგან...

პალატა სახიფათოა, – ფიქრობს ჯოუნსი, – ისევე, როგორც ნებისმიერი სხვა ადგილი. მაგრამ იქნებ, იქ საფრთხე ნაკლებადაა მოსალოდნელი. ეს მისი უკანასკნელი თავშესაფარია, რომელიც იმ ფოტოსურათით შეამკო, რომლის სანახავადაც მათი ოთხეული შორეულ 1978 წელს მიდიოდა. თინა ჯინ სლოპინგერი თუ რაღაც ამგვარი ერქვა.

„ზოგიერთი რამ, რაც ვნახე, სინამდვილეში... გაცოცხლებული მოგონებები იყო, იტყოდა ალბათ ჰენრი. მე მართლაც ვფიქრობ, რომ იმ დღეს დადიტსი დავინახე. ამიტომაც გადავედი ქუჩაზე ისე, რომ აქეთ-იქით არ გამიხედავს. რაც შეეხება მისტერ გრეის... მე ახლა სწორედ ის ვარ, ასე არაა? თუ იმას არ გავითვალისწინებთ, რომ ჩემი არსების ნაწილი იმ მტვრიან, დაცარიელებულ, უინტერესო ოთახში დარჩა, რომლის იატაკზეც ნახმარი პრეზერვატივები, განცხადებების დაფაზე კი გოგონას სურათია, მე მისტერ გრეი ვარ. ხომ ასეა?“

არანაირი პასუხი. რაც თავისთავად იყო ის პასუხი, რომელიც სჭირდებოდა.

„მაგრამ ეს როგორ მოხდა? აქ როგორ მოვხვდი? და რატომ? რისთვის?“ –

კვლავ არანაირი პასუხი. თვითონ კი ვერაფერი მოუსაზრებია. მხოლოდ ის უხარია, რომ არსებობს ადგილი, სადაც შეუძლია ის იყოს, ვინც არის. გული სწყდება, დანარჩენი ცხოვრება ასე ადვილად რომ წაართვის. ნანობს, მწარედ, გულწრფელად ნანობს, რომ მაკარტის ტყვია არ დაახალა.

## 8

გაისმა საშინელი აფეთქების ხმა და, თუმცა ეს რამდენიმე მილის დაშორებით მოხდა, ისეთი მძლავრი იყო, რომ ხეებიდან თოვლი ჩამოცვივდა. თუმცა, თოვლმძვლის მძლოლს თავიც არ აუწევია. ეს ხომალდი იყო, რომელიც ჯარისკაცებმა ააფეთქეს. ბაირუსს ბოლო მოეღო.



რამდენიმე წუთის შემდეგ მისგან მარჯვნივ სახურავჩაქცეული ჩარდახი გამოჩნდა. თოვლზე პიტი იწვა, რომელსაც ერთი ფეხი თუნუქის ფურცლის ქვეშ მოჰყოლოდა. მკვდარი გეგონებოდა, მაგრამ სინამდვილეში ცოცხალი იყო. როდესაც ჯოუნსიმ იქით გადაუხვია და ძრავა გამორთო, პიტმა თავი ასწია, უხალისოდ გაიღიმა და დარჩენილი კბილები გამოაჩინა. ქურთუკის მარცხენა სახელო გაშავებოდა და საგრძნობლად დამოკლებოდა. მარჯვენა ხელზე მხოლოდ ერთი ჯანმრთელი თითი შერჩენოდა. კანი მოწითალო-ოქროსფერ ხავსს დაეფარა.

– შენ ჯოუნსი არა ხარ, – თქვა პიტმა, – ჯოუნსის რა დამართე?

– დაჯექი, პიტ, – უთხრა მისტერ გრეიმ.

– შენთან ერთად არსად წამოვალ, – პიტმა მარჯვენა ხელი ასწია – მყესებზე ჩამოკიდებული თითები, მოწითალო ოქროსფერი ხავსი – და შუბლი მოიწმინდა, – აქედან წადი, შენი... დაქოქე შენი პონი და გააჭენე.

მისტერ გრეიმ თავი დახარა, ის თავი ოდესღაც ჯოუნსის ეკუთვნოდა (ჯოუნსი ყველაფერს „ძმები თრექერების“ მიტოვებული ოფისის სათვალთვალ პუნქტის ფანჯრიდან ხედავს, მაგრამ არც დახმარება შეუძლია და არც – რაიმეს შეცვლა) და პიტს დაჟინებით მიაჩერდა. პიტმა საშინელი ხმით დაიყვირა – როგორც ჩანს, სოკო, რომელიც მთელ სხეულზე მოსდებოდა, სულ უფრო ღრმად იდგამდა ფესვებს, კუნთებსა და სისხლძარღვებში აღწევდა. მან მთელი ძალით გამოსწია სახურავქვეშ მოყოლილი ფეხი და, როგორც იქნა, გაითავისუფლა, შემდეგ კი ტკივილისგან მოიკუნტა და ლანძღვა-გინებას მოჰყვა. ცხვირ-პირიდან სისხლი წასკდა. როდესაც პირი კვლავ გააღო, კიდევ ორი კბილი გადმოუვარდა.

– დაჯექი, პიტ.

პიტმა სლუკუნით მიიკრა დასახიჩრებული ხელი მკერდზე და წამოდგომა სცადა. პირველი ცდა წარუმატებელი გამოდგა – იგი კვლავ თოვლზე გაიშოტა. მისტერ გრეი არაფერს ამბობდა, იჯდა

თავის არცტიც ჩატ-ზე და პიტს შეჰყურებდა.

ჯოუნსი მეგობრის ტკივილსაც გრძნობდა, სასოწარკვეთილება-საც და მტანჯველ შიშსაც. ყველაფერზე ცუდი ეს შიში იყო, ამიტომ მან გარისკვა გადაწყვიტა.

„პიტ“.

ჯოუნსიმ მხოლოდ ჩაიჩურჩულა, მაგრამ პიტმა გაიგონა. თავი ასწია – ლოყები ჩასცვივნოდა, სახეზე სოკოს წინწკლები გასჩენოდა, რასაც მისტერ გრეი ბაირუსს უწოდებდა. როდესაც პიტმა ტუჩები მოილოკა, ჯოუნსიმ დაინახა, რომ ენაზე თითქოს ობი მოსდებოდა. კოსმოსური რძიანა. ოდესღაც პიტ მურს კოსმონავტობა სურდა. ერთხელ იგი რამდენიმე მასზე დიდ ბიჭს არ შეეპუა და პატარა და სუსტ ბავშვს გამოესარჩლა. იგი უკეთეს ბედს იმსახურებდა.

„არ არის მოძრაობა, არ არის თამაში“.

პიტმა თითქმის გაიღიმა. ეს შესანიშნავიც იყო და გულის ამარყელებელიც. ამჯერად წამოდგა და თოვლმავლისკენ წაჩანჩალდა.

მიყრუებულ ოფისში, სადაც ის გადაასახლეს, ჯოუნსიმ დაინახა, რომ კარის სახელური შეჯანჯლარდა.

„ეს რას ნიშნავს? – იკითხა მისტერ გრეიმ, – რას ნიშნავს „არ არის მოძრაობა, არ არის თამაში?“ იქ რას აკეთებ? დაბრუნდი საავადმყოფოში და ჩემთან ერთად ტელევიზორს უყურე. რატომ არ მოდიხარ? და საერთოდ, მანდ როგორ მოხვდი?“

ახლა ჯოუნსის მიეცა შესაძლებლობა, შეკითხვაზე არ ეპასუხა. და მან ეს დიდი სიამოვნებით გააკეთა.

„მე შემოვალ, – თქვა მისტერ გრეიმ, – როცა მზად ვიქნები. შეგიძლია თავი ინუგეშო, რომ კარს ჩაკეტავ და აღარ შემომიშვებ, მაგრამ ცდები“.

ჯოუნსი კვლავ დუმდა, – არაფრად ესაჭიროებოდა მის სხეულს დაუფლებული არსების გაღიზიანება, – მაგრამ სულაც არ ფიქრობდა, რომ ცდებოდა. მეორე მხრივ, იქაურობის მიტოვებასაც ვერ ბედავდა: ეშინოდა, არ გადამყლაპონო. ის ხომ ერთი ციციქნა ნაწილაკი

იყო ღრუბელში, უცხოპლანეტელის კუჭში მოხვედრილი საჭმლის ნამცეცი.

ჯობდა, თავშეკავება გამოეჩინა.

## 9

პიტი მისტერ გრეის უკან მოუჯდა და ჯოუნსის წელზე ხელები მოხვია. ათი წუთის შემდეგ მათ გადაბრუნებულ სკაუტს ჩაუქროლეს და ჯოუნსი მიხვდა, რატომ შეაგვიანდათ პიტსა და ჰენრის მალაზიიდან დაბრუნება. საოცრება იყო, რომ არ დაიღუპნენ. უნდოდა, უკეთ დაჰკვირვებოდა, მაგრამ მისტერ გრეიმ სვლა არ შეანელა, მხოლოდ ჩატ-ის თხილამურები გადაიყვანა თოვლმიყრილ, ღრმა, პარალელურ ნაკვალევში.

სკაუტს სამი მილით გასცდნენ, გორაკზე ავიდნენ და ჯოუნსიმ გზიდან, ფუტზე ნაკლებ სიმაღლეზე, კაშკაშა, მოყვითალო-მოთეთრო ბურთი დაინახა, მათ რომ ელოდებოდა. აირშემდუღებელი აპარატის ალს ჰგავდა, ოღონდ, რასაკვირველია, ის არ იყო – მის ქვემოთ თოვლი არც კი დნებოდა. ძალიან ჰგავდა ღრუბლებში მოთამაშე შუქს, რომელიც მან და ბივერმა ხეობიდან გამოქცეული ცხოველების თავზე დაინახეს.

„მართალია, – თქვა მისტერ გრეიმ, – ეს ისაა, რასაც შენი ხალხი სასიგნალო შუქს ეძახის. ეს ერთ-ერთი უკანასკნელია. შესაძლოა, უკანასკნელიც კი“.

ჯოუნსიმ არაფერი თქვა. დაჟინებით იყურებოდა კამერის ფანჯრიდან. გრძნობდა, რომ პიტი მექანიკურად და ინსტინქტურად უჭერდა ხელებს წელზე, იმ დამარცხებულ მოკრივესავით, რომელიც ცდილობს კლინჩში<sup>140</sup> შესვლას, რათა ნოკაუტში არ ჩავარდეს. თავი, რომელიც მხარზე ედო, ქვასავით მძიმე ეჩვენებოდა. პიტი საბოლო-

---

<sup>140</sup> კრივში მოწინააღმდეგისთვის ხელების დაჭერა ან მის სხეულზე შემოჭობა.

ოდ იქცა ნოყიერ გარემოდ ბაირუსისთვის და, როგორც ჩანს, მოეწონა კიდევ: ირგვლივ ყველაფერი ცივი იყო, პიტის კი – თბილი. მისტერ გრეის ის რაღაცისთვის დასჭირდა, მაგრამ რისთვის?

სასიგნალო შუქი მათ დაახლოებით ნახევარ მილზე გაჰყვა, შემდეგ ტყეში გადაუხვია, ორ მსხვილ ფიჭვს შორის გასრიალდა და დაელოდა, თან ციბრუტივით ტრიალებდა ზედ თოვლზე. ჯოუნსიმ გაიგონა, როგორ უბრძანა მისტერ გრეიმ პიტს, უფრო მაგრად ჩასჭიდებოდა.

არცტიც ჩატ-ი ხტუნვა-ხტუნვითა და ღმუილით მიქროდა არცთუ ციცაბო ფერდობზე. თხილამურები თოვლს მიარღვევდა და აქეთ-იქით ყრიდა. ტყის თეთრი საფარი ნაკლებად სქელი იყო, ზოგან სულაც ქრებოდა. იმგვარ ლილოებში თოვლმავალი გაბრაზებული ზრიალებდა მოხრეშილ, გაყინულ მიწაზე, რომელსაც ლპობაშეპარული წიწვების თხელი ფენა გადაჰკვროდა. გეზი ჩრდილოეთისკენ ეჭირათ.

ათი წუთის შემდეგ ისინი გრანიტის შვერილს გამოედვნენ. პიტმა თავი ვერ შეიკავა, გადმოვარდა და ჩუმად შეჰყვირა. მისტერ გრეიმ თოვლმავალი დაამუხრუჭა. სასიგნალო შუქიც გაიყინა. ჯოუნსის ის უფრო მქრქალი მოეჩვენა.

- ადექი, – თქვა მისტერ გრეიმ. შემობრუნდა და პიტს მიაჩერდა.
- არ შემოძლია, – მიუგო პიტმა, – წასულია ჩემი საქმე, მეგობარო. მე...

პიტმა იყვირა და თოვლზე კოტრიალს მოჰყვა, ფეხებს იქნევდა, ერთი დამწვარი, მეორე კი დასახიჩრებული ხელი ნერვიულად უცახცახებდა.

„შეწყვიტე! – შესძახა ჯოუნსიმ, – შენ მოკლავ მას!“

მაგრამ მისტერ გრეიმ მის სიტყვებს ყურადღება არ მიაქცია. კორპუსს ოდნავ აქანავებდა და უსიცოცხლო თვალებით, უემოციო სახით შეჰყურებდა, როგორ ნთქავდა ბაირუსი პიტის ხორცს. ბო-

ლოს ჯოუნსიმ იგრძნო, რომ მისტერ გრეი პიტს შეეშვა. ეს უკანას-  
კნელი რის ვაი-ვაგლახით წამოდგა. თავს მთვრალივით აქნევდა,  
ლოყაზე ახალი ჭრილობა წითლად უხასხასებდა, ჭრილობას უკვე  
შესეოდა ბაირუსი. გაშტერებული და დაღლილი თვალები ცრემლე-  
ბით ავსებოდა. იგი კოჭლობით მივიდა თოვლმავალთან, დაჯდა და  
ხელები ჯოუნსის წელზე შემოაჭლო.

„ჩემს ქურთუკს ჩაეჭიდე“, – ჩაიჩურჩულა ჯოუნსიმ და როდესაც  
მისტერ გრეიმ თოვლმავალი დაქოქა, მან იგრძნო, რომ პიტი ქურ-  
თუკში ჩააფრინდა.

„არ არის მოძრაობა, არ არის თამაში, ასე არაა?“

„არ არის თამაში“, – ძლივს გასაგონად დაეთანხმა პიტი.

ამჯერად მისტერ გრეიმ მათი სიტყვები უყურადღებოდ დატოვა.  
არცთუ ისე კაშკაშა, მაგრამ ძველებურად სწრაფი სასიგნალო შუქი  
კვლავ ჩრდილოეთისკენ გაქანდა... ყოველ შემთხვევაში, ჯოუნსის  
ასე ეჩვენებოდა. სანამ თოვლმავალი ხეებს, ბუჩქებსა და ლოდებს  
შორის მანევრირებდა, მას თავგზა აებნა და ორიენტაცია დაკარგა.  
უკან განუწყვეტლივ ისმოდა ტყვიამფრქვევების კაკანი, თითქოს ვი-  
ლაცას მსროლელთა ასპარეზობა მოეწყო.

## 10

გავიდა კიდევ ერთი საათი და ჯოუნსი მიხვდა, რატომ აიტკივა  
მისტერ გრეიმ თავი პიტის თრევით. სწორედ მაშინ სასიგნალო შუქი  
მბჟუტავ სანთლად გადაიქცა და მალე ჩაქრა კიდევ. მსუბუქი ტკა-  
ცუნით გაქრა, თითქოს ვილაცამ ქალაღდის პარკი გაბერა და ხელით  
გახეთქაო. გაფანტული ნამცეცები მიწაზე ნელა დაეშვა.

ისინი თხემზე იდგნენ. ეშმაკმა თუ იცოდა, სად იყვნენ. წინ თოვ-  
ლით დაფარული ტყიანი ხეობა გადაჭიმულიყო, რომლის იქითაც  
დროის მიერ გამოჭმული გორაკები და ხშირი ბუჩქნარი მოჩანდა. სი-  
ნათლის ნაპერწკალიც არსად ჩანდა. ამას ისიც ემატებოდა, რომ დღე  
აშკარად დასასრულს უახლოვდებოდა.

კიდევ ერთ ხათაბალას გადაგვკიდე, – გაიფიქრა ჯოუნსიმ, მაგრამ მისტერ გრეის მხრიდან ოდნავი გაღიზიანებაც ვერ იგრძნო. მან თოვლმავალი გააჩერა, თუმცა არ ჩამოსულა.

„ჩრდილოეთი“, – თქვა მისტერ გრემი, ოღონდ არა ჯოუნსის მისამართით.

პიტმა ხმამაღლა, მაგრამ უხალისოდ და ძალიან ნელა უპასუხა:

– მე საიდან უნდა ვიცოდე? ღმერთო ჩემო, ისიც კი არ ჩანს, მზე საით ჩადის.

მისტერ გრემი ჯოუნსის თავი მიატრიალა და ჯოუნსიმ დაინახა, რომ პიტს მარცხენა თვალი თითქმის აღარ ჰქონდა. ქუთუთო ასწეოდა, თვალში ბაირუსის ბუჩქი ამოზრდოდა, რომლის გრძელი ღეროები გაუპარსავ ლოყებს ეხებოდა, რამდენიმე კი თხელ თმაში მოწითალო ოქროსფერ ლენტებად ჩაწნოდა.

„შენ იცი“.

– შესაძლოა, ვიცო კიდევ, – თქვა პიტმა, – და, შესაძლოა, არ მინდა, რომ გითხრა.

„რატომ?“

– იმიტომ, რომ ეჭვი მეპარება შენს კეთილ ზრახვებში ჩვენ მიმართ, შენი დედაც! .. – მიუგო პიტმა და შეეცრად ჯოუნსიმ მეგობრის გამო სულელური სიამაყე იგრძნო.

ჯოუნსიმ დაინახა, რომ მარცხენა თვალის ფოსოში ამოსული ბუჩქი მოულოდნელად შეირხა. პიტმა შეჰყვირა და ხელები სახეზე იტაცა. წამით, რაც უსაშველოდ გაიწელა, ჯოუნსიმ იგრძნო, როგორ შედიოდა მოწითალო ოქროსფერი ძაფები პიტის ტვინში, იქ უღმობელ თითებად გრძელდებოდა და რუხ ნივთიერებას შეუბრალებლად ჭყლეტდა.

„მიდი, პიტ, უთხარი! – შესძახა ჯოუნსიმ, – უთხარი, ღვთის გულისთვის!“

ბაირუსი კვლავ გაიზარდა. პიტს სახეზე აფარებული ხელები ჩა-

მოუცვივდა – გაფითრებული ჩანდა იმ ადგილებში, სადაც მოწითალო ოქროსფერი ჯერ არ მოსდებოდა.

– სად ხარ, ჯოუნსი? – იკითხა მან, – ოთახში კიდევ ერთი არ დაეტევა?

პასუხი მოკლე იყო:

– ცხადია, არა.

ჯოუნსი ვერ ხვდებოდა, რა ემართებოდა, მაგრამ იმას კი გრძნობდა, რომ საკუთარი თავის გადარჩენა – მისი დამოუკიდებლობის უკანასკნელი მარცვალი – როგორღაც ამ ოთახში ყოფნაზე იყო დამოკიდებული. თუ კარს ოდნავ მაინც შეაღებდა, ყველაფერი დასრულდებოდა.

პიტმა თავი დააქნია.

– ასეც ვფიქრობდი, – თქვა მან და ახლა მეორეს მიმართა:

– ოღონდ აღარ მატკინო, მეგობარო.

მისტერ გრეი იჯდა, პიტს ჯოუნსის თვალებით შესცქეროდა და არაფერს ჰპირდებოდა.

პიტმა ამოიოხრა, დამწვარი ხელი ასწია, თვალები დახუჭა, ერთი თითი გაშალა და უკან და წინ, უკან და წინ აამოძრავა. უეცრად ჯოუნსის თითქოს თვალი აეხილა და ყველაფერს მიხვდა. რა ერქვა იმ პატარა გოგოს? რინკენჰაუერი, არა? ჰო. სახელი არ ახსოვდა, მაგრამ კეთილხმოვანებას მოკლებულ „რინკენჰაუერს“ რა დაავიწყებდა. ისიც მერი მ. სნოუს სკოლაში, ანუ დებილების აკადემიაში დადიოდა, თუმცა იმ დროისთვის დადიტსი უკვე პროფესიულ სასწავლებელში სწავლობდა. პიტი? პიტს ყოველთვის ჰქონდა დამახსოვრების სასაცილო მანერა, მაგრამ დადიტსის შემდეგ...

ჭუჭყიანი პატარა კამერის ფანჯარასთან მოკუნტულ ჯოუნსის უამრავი სიტყვა ეწვია. იმ ფანჯრიდან სამყაროს უყურებდა, მას რომ მოჰარეს... სინამდვილეში სიტყვებს თანხმობენები აკლდა და მხოლოდ მათი შემადგენელი, უცნაური სილამაზის მქონე ხმოვნები ისმოდა:

„ეა ა ა, იტი? ხედავ ამ ხაზს, პიტ?“

პიტმა მეოცნებე, მოკრძალებული აღტაცების გამომხატველი სახით მიუგო, რომ ხედავდა. შემდეგ კი თითი წინ და უკან ქანქარასავით ამოძრავა, ზუსტად ისე, როგორც ახლა.

თითი გაჩერდა, თუმცა მისი წვერი ისევ თრთოდა, როგორც ვენახის გასაშენებელი ადგილის შესარჩევი ბიოსალოკაციო ღერო წყალთან მიახლოებისას. შემდეგ პიტმა თოვლმავლის ოდნავ მარჯვნივ მდებარე გორაკის თხემისკენ მიუთითა.

– იქ, – თქვა მან და ხელი დაუშვა, – იქ არის ჩრდილოეთი. ზუსტად იმ კლდისკენ, რომლის შუაშიც ფიჭვი ამოსულა. ხედავ?

„ჰო, ვხედავ“.

მისტერ გრეი შეტრიალდა და მანქანა დაქოქა. ნეტა ბენზინი თუ ეყოფაო, – გაიფიქრა ჯოუნსიმ.

– შეიძლება, აქ დავრჩე? – იკითხა პიტმა, რაც, ცხადია, ნიშნავდა, – შეიძლება, მოვკვდეთ?

„არა“.

გზა განაგრძეს. პიტი სუსტად ჩაეჭიდა ჯოუნსის ქურთუკს.

## 11

კლდეს რომ შემოუარეს და მის გვერდით მდებარე ყველაზე მაღალ გორაკზე ავიდნენ, მისტერ გრეი კვლავ შეჩერდა თავისი ცოცხალი სუროგატული სასიგნალო შუქიდან ახალი მითითებების მისაღებად. პიტმა ისევ გამოთვალა მიმართულება და ისევ განაგრძეს გზა, უფრო და უფრო შორს, ჩრდილოეთიდან ოდნავ დასავლეთისკენ მიდიოდნენ. დღე თანდათან ილეოდა.

ერთხელ ვერტიკალურების ხმა შემოესმათ, სულ ცოტა, ორი იქნებოდა. შესაძლოა, ოთხიც ყოფილიყო. მათკენ მოფრინავდნენ. მისტერ გრეიმ თოვლმავალი ხშირ ბურქებში შეიყვანა, ყურადღებას არ აქცევდა, ჯოუნსის სახეში რომ სცემდა ტოტები, შუბლი და ლოყები



რომ დაუკაწრა. პიტი კვლავ გადმოვარდა. მისტერ გრეიმ მანქანა გამოართო და აკვნესებული, თითქმის გონწასული პიტი ყველაზე ფართო ბუჩქის ქვეშ შეათრია. იქ დაელოდნენ, სანამ ვერტიმფრენების ხმაური არ მიწყდა. ჯოუნსიმ იგრძნო, რომ მისტერ გრეიმ სასწრაფოდ ეკიპაჟის ერთ-ერთი წევრის ტვინში შეაღწია და დაასკანერა – ალბათ პიტის შეტყობინებასთან შედარება სურდა. როდესაც ვერტიმფრენები სამხრეთ-დასავლეთისკენ გაფრინდნენ, მისტერ გრეიმ თოვლმავალი დაქოქა და ძველ მარშრუტს მიჰყვა. თოვა განახლდა.

ერთი საათის შემდეგ ისინი მორიგი გორაკის თხემზე შეჩერდნენ. პიტი ისევ გადმოვარდა თოვლმავლიდან, თუმცა ამჯერად გვერდზე დაეცა. მან თავი ასწია. სახე აღარ მოუჩანდა – რალაცის სქელ ფენას დაეფარა. ლაპარაკი უნდოდა, მაგრამ ვერ ახერხებდა, რადგან პირიც იმ ნაგვით ჰქონდა სავსე და ენაზეც ბაირუსის ხალიჩა გადაჰკვროდა.

„არ შემიძლია, მეტი აღარ შემიძლია. თავი დამანებე. გთხოვ“.

– ჰო, – თქვა მისტერ გრეიმ, – შენ შენი საქმე გააკეთე.

„პიტ! – შესძახა ჯოუნსიმ, შემდეგ კი მისტერ გრეის შეევედრა, – არა, არა, არ გინდა! “

მისტერ გრეიმ მის ნათქვამს, ცხადია, ყურადღება არ მიაქცია. წამით ჯოუნსიმ პიტის ერთადერთ თვალში უსიტყვო თანხმობა ამოიკითხა. და – შვებაც. იმ ერთი წამის განმავლობაში ჯოუნსის კიდეც შეეძლო პიტის გონებასთან შეხება. ის ხომ მისი ბავშვობის მეგობარი იყო, რომელიც მათ ყოველთვის სკოლის ჭიშკართან ელოდა და ხელით მაღავდა წარმოსახვით სიგარეტს; ის კოსმონავტობაზე ოცნებობდა და სურდა, სამყარო კოსმოსური ხომალდიდან დაენახა; ერთ-ერთი იყო იმ ოთხეულიდან, რომელმაც დადიტსი დიდი ბიჭების ხელიდან დაიხსნა.

მაგრამ მხოლოდ წამით. შემდეგ იგრძნო, რომ მისტერ გრეის ტვინიდან რალაც გამოვარდა და პიტის სხეულზე არსებული სისაძაგლე

კი არ შეირხა, – შეიკუმშა. პიტის თავის ქალა ათობით ადგილას ტკაცატკუცით გაიბზარა. სახე – ის, რაც მისგან დარჩა – ბუშტივით ჩაიფუშა და მიხრწნილი ბებრისას დაემსგავსა. პიტი წინ გადავარდა და თოვლი წვრილად მიეყარა მის პარკას.

„ნაძირალა ხარ“.

მისტერ გრეიმ არაფერი უპასუხა, ყურადღება არ მიაქცია ჯოუნსის ლანძღვასა და გაშმაგებას. კვლავ წინ გაიხედა. აბორგებულ ქარი მაშინვე ჩაცხრა და თოვლის ფარდაში ხვრელი გაჩნდა. დაახლოებით ხუთი მილის მანძილზე იმ ადგილიდან ჩრდილო-დასავლეთით, სადაც თოვლმავალი იდგა, ჯოუნსიმ აქეთ-იქით მოძრავ შუქს მოჰკრა თვალი. ამჯერად ეს სასიგნალო კი არა, მანქანის ფარების შუქი იყო. ურიცხვი მანქანის ფარებისგან. გზატკეცილზე კოლონებად მიდიოდა სატვირთო მანქანები. სატვირთო მანქანები და სხვა არაფერი. მენის შტატის ეს ნაწილი სამხედრო მოქმედებების ზონად ქცეულიყო.

„ყველა შენ გეძებს, შე არამზადავ“, – ჩაიჩურჩულა მან, როდესაც თოვლმავალი გზას გაუდგა. თოვა კვლავ გახშირდა და სატვირთო მანქანებს ფარდად ჩამოეფარა, მაგრამ ჯოუნსიმ იცოდა, რომ მისტერ გრეის გზატკეცილამდე მისვლა არ გაუჭირდებოდა. პიტმა იგი აქამდე მოიყვანა, საკარანტინო ზონის იმ ნაწილამდე, სადაც, ჯოუნსის აზრით, მხოლოდ მცირე უსიამოვნებები თუ იყო მოსალოდნელი. ახლა მისტერ გრეი იმედოვნებდა, რომ დარჩენილი გზის გავლაში ჯოუნსი დაეხმარებოდა, რადგან ამჟამინდელი ჯოუნსი ძველისგან მნიშვნელოვნად განსხვავდებოდა. მთავარია, რომ ბაირუსისგან საფრთხე არ ელოდა. ბაირუსს იგი, რატომღაც, არ მოსწონდა.

„აქაურობას თავს ვერასდროს დააღწევ“, – თქვა ჯოუნსიმ.

„დავალწევ, – მიუგო მისტერ გრეიმ, – ჩვენ ყოველთვის ვკვდებით და ყოველთვის ვცოცხლდებით. ყოველთვის ვმარცხდებით და ყოველთვის ვიმარჯვებთ. მოგწონს თუ არა, ჯოუნსი, მომავალი – ჩვენს ხელთაა“.

„თუკი ასეა, არასდროს მსმენია უკეთესი მიზეზი წარსულში საც-ხოვრებლად“, – მიახალა ჯოუნსიმ, მაგრამ მისტერ გრეიმ დუმილი არჩია. მისტერ გრეი, როგორც არსება, როგორც ცნობიერება, სად-ღაც გაქრა, ღრუბელს შეერწყა. ის, რაც მისგან დარჩა, მხოლოდ იმისთვის ვარგოდა, რომ თოვლმავალი ემართა და გზატკეცილამდე მიეღწია. ჯოუნსი კი, რომელიც უმწეოდ მიიწევდა იმისკენ, რაც ამ რუხ ქმნილებას მოემზადებინა, ორი უდავო ფაქტით ინუგეშებდა თავს. ჯერ ერთი, ის, რომ მისტერ გრეისთვის მიუღწეველი დარჩა მისი, ჯოუნსის, თვითმყოფადობის უკანასკნელი ნამცეცი, რაც მის მოგონებებში „ძმები თრექერების“ ოფისის სახით არსებობდა. და მეორე: მისტერ გრეიმ არაფერი იცოდა დადიტსისა და გამონათქვამის – „არ არის მოძრაობა, არ არის თამაში“ – შესახებ.

ჯოუნსის განზრახული ჰქონდა, ყველაფერი გაეკეთებინა, რათა მისტერ გრეის ეს ვერ შეეტყო.

ჯერჯერობით მაინც.

# თავი მეცამეტე

## გოსლინის მაღაზიაში

### 1

არჩი პერლმუტერის – ფრიადოსნის, რომელსაც სკოლის გამო-საშვებ საღამოზე სიტყვით გამოსვლის პატივი ერგო (თემა: „დემოკრატიის შუქრდილი“), ყოფილი „არწივის სკაუტის“<sup>141</sup>, ჭეშმარიტი პრესვიტერიანელის, უესტ-პოინტის კურსდამთავრებულის – აზრით, „გოსლინის სოფლის მარკეტს“ რეალობასთან საერთო არაფერი ჰქონდა. ურიცხვი ფართა და პროექტორით განათებული (რაც პატარა ქალაქს თავზე გადაუვიდოდა) მაღაზია ფილმის დეკორაციას უფრო ჰგავდა. ოღონდ, ჩვეულებრივი ფილმისას – არა. თითქოს ჯეიმზ კამერონის<sup>142</sup> მსგავს, რომელიღაც ექსტრავაგანტურ რეჟისორს ისეთი ფილმის გადაღება ჩაეფიქრებინა, რომელშიც მხოლოდ სასმელ-საჭმელზე დახარჯული თანხა ჰაიტის მოსახლეობას ორი წლის განმავლობაში თავს გაატანინებდა. გახშირებული თოვაც კი

---

<sup>141</sup> უმაღლესი რანგი ბოისკაუტებში.

<sup>142</sup> კანადელი რეჟისორი, პროდიუსერი.

ვერ ჩრდილავდა უღმობლად მოკაშკაშე ნათებას და ვერ ფანტავდა ილუზიას, რომ ეს მდარე მორთულობა, დაწყებული თუნუქის ორი მრუდე საკვამურიდან, დამთავრებული შენობის წინ აღმართული ერთადერთი დაჟანგული ბენზინგასამართი სვეტით, – გადასაღები მოედნის პავილიონი იყო და სხვა არაფერი.

იწყება პირველი აქტი, – ფიქრობდა ბილიკზე ენერგიულად მოსიარულე პერლი, რომელსაც ილღიაში თავისი განუყრელი პლანშეტი ამოეჩარა (არჩი პერლმუტერს თავი ყოველთვის ძალზე არტისტიულ პიროვნებად მიაჩნდა... და საქმიანადაც), – დავყუდებულვართ ამ მიყრუებულ სოფლის მაღაზიაში. მოხუცები ლუმელს უსხედან, პატარას კი არა, გოსლინის ოფისში რომ დგას, არამედ დიდს, შიგ მაღაზიაში. გარეთ კი ბარდნის. საუბრობენ ცაში ცეცხლოვანი ნათების... დაკარგული მონადირეების... ტყეში დასახლებული რუხი კაცუნების შესახებ. მაღაზიის მეპატრონე – ვუწოდოთ მას ბებერი როსიტერი – ზიზლით ფრუტუნებს, – ოჰ, ღმერთო ჩემო, რა სისულელეა, გადარძუებული დედაბრებივით ლაქლაქებთო! და სწორედ ამ დროს შენობა თვალისმომჭრელად ნათდება (როგორც „მესამე ხარისხის ახლო კონტაქტში“) და მიწაზე ამო ეშვება. იქიდან სისხლმოწყურებული უცხოტომელები გადმოდიან და თავიანთი საშინელი, მომაკვდინებელი იარაღიდან ისვრიან! ეს ყველაფერი დამოუკიდებლობის დღის ზეიმს ჰგავს, ოღონდ იმ განსხვავებით, რომ მოქმედება ტყეში ხდება!

მის გვერდით მონდომებით მიაბიჯებდა მერლოუზი, მზარეულის მესამე თანაშემწე (ერთ-ერთი იშვიათი ოფიციალური თანამდებობა ამ პატარა ავანტიურაში), ცდილობდა, არ ჩამორჩენოდა. ყელიანი ფეხსაცმლის ან ჩექმის ნაცვლად ბოტასი ეცვა – პერლმუტერმა ის „სპაგოდან“ (ასე უწოდებდნენ ჯარისკაცები მზარეულის კარავს) გამოიყვანა და ახლა მას წამდაუწუმ ფეხი უსხლტოდა. ირგვლივ მამაკაცები (და რამდენიმე ქალი) დაფუსფუსებდნენ. ძირითადად, რა-

ტომლაც, წყვილ-წყვილად დადიოდნენ. ზოგიერთები მინიატიურული მიკროფონებით ან რაციებით ლაპარაკობდნენ. კინოპავილიონში ყოფნის განწყობას ძრავებისა და გენერატორების გაუთავებელი ღმუილი, სატვირთო მანქანებისა და ტრაილერების სიმრავლე და შორიანლოს მდგარი ვერტიფერენები (ამინდის გაუარესების გამო იძულებით მობრუნებულები) აძლიერებდა.

– ნეტავ, რაში დავჭირდი? – ხელმეორედ იკითხა აქოშინებულმა მერლოუზმა და მის ხმაში ჩვეულებრივზე მეტი უკმაყოფილება გაისმა. გოსლინის ბოსელთან მდებარე საქონლის ბაკსა და საძოვრამდე უკვე მიეღწიათ. ძველი, დაცერებული მესერი (ათ წელზე მეტი გავიდა მას შემდეგ, რაც აქ პირუტყვს აბამდნენ, ასეირნებდნენ და აძოვებდნენ) გაემაგრებინათ, მავთულხლართი შემოევლოთ და სადენები გაეტარებინათ – ძაბვა მომაკვდინებელი არა, მაგრამ საკმარისად მაღალი იყო იმისთვის, რომ გაქცეული ძირს დავარდნილიყო და კრუნჩხვა დაწყებოდა... ადგილობრივების გააქტიურების შემთხვევაში კი ძაბვის სასიკვდილო დოზამდე გაზრდა ყოველთვის მოესწრებოდა. ღობის მეორე მხრიდან მათ ოცი-ოცდაათი კაცი შესცქეროდა, მათ შორის – ბებერი გოსლინიც (ჯეიმს კამერონის ვერსიაში გოსლინს ბრიუს დერნის<sup>143</sup> მსგავსი რომელიმე გამობრძმედილი ვეტერანი შეასრულებდა). სულ ცოტა ხნით ადრე მავთულხლართებს მიღმა მყოფნი ახმაურდებოდნენ, ხმამაღალ მუქარასა და ლანძღვაგინებას არ დაიშურებდნენ, მოთხოვნებს წამოაყენებდნენ, მაგრამ მას შემდეგ, რაც საკუთარი თვალთ იხილეს, რა დაემართა მასაჩუსეტსელ ბანკირს გაქცევის მცდელობისას, მათი სიფიცხე საგრძნობლად დაცხრა. საბრალო ადამიანები. ადვილი გადასატანი როდია იმის ნახვა, როგორ ესვრიან ვილაცას თავში. მათ ადგილას ბევრი გატყდებოდა. ამას ისიც დაემატა, რომ ოპერაციის ყველა მონაწილეს გამჭვირვალე ნილაბი ეკეთა ცხვირ-პირზე. მოდი და ნუ გატყდები!

---

<sup>143</sup> ამერიკელი მსახიობი.

– ბოს! – ეს უკვე წუწუნს კი არა, საწყალობელ წკმუტუნს ჰგავდა. მავთულხლართების მიღმა მყოფი ამერიკელი მოქალაქეების შესახედაობამ მერლოუზს გამბედაობა ვერ შემატა, – ბოს, მითხარით, რატომ უნდა უფროსობას ჩემი ნახვა? ბობოლებს ჩემნაირი პატარა კაცი, მზარეულის მესამე თანაშემწე არ უნდა აინტერესებდეთ.

– ვერაფერს გეტყვი, – მიუგო პერლმუტერმა და არც მოუტყუებია.

წინ, ნაკვეთის დასაწყისში, რომელიც „ეგზიტერ ალის“ სახელით იყო ცნობილი, ოუენ ანდერჰილი გაერთიანებული ავტოპარკის რომელიღაც თანამშრომელთან ერთად იდგა. ეს ავტოპარკელი კაცი რალაცას ჩაჰყვიროდა ყურში ანდერჰილს, რათა ვერტმფრენების გუგუნის გადაეფარა. არა უშავს, – ფიქრობდა პერლმუტერი, – მალე დადუმდებიან. ასეთ სიბინძურეში ფრენას არავინ მოისურვებს. თანაც ეს ნაადრევი, სეზონისთვის შეუფერებელი ქარბუქი, რომელსაც კურცმა „ღვთის საჩუქარი“ უწოდა.

როდესაც ასეთ მარგალიტებს აფრქვევდა, კაცი ვერ გაიგებდა, ხუმრობდა თუ სერიოზულად ლაპარაკობდა. ჩანდა, რომ ხუმრობა მისი სტიქია არ იყო, თუმცა ზოგჯერ მაინც იცინოდა. მსგავსი სიცილი არჩი პერლმუტერს აღიზიანებდა. ფილმში კურცის როლს, ალბათ, ჯეიმს ვუდსი შეასრულებდა. ან ქრისტოფერ უოლკენი. მართალია კურცს არც ერთი ჰგავდა და არც – მეორე, მაგრამ განა იგივე არ შეიძლება ითქვას ჯორჯ კ. სკოტისა<sup>144</sup> და პატონის<sup>145</sup> შესახებ? დიახ, დიახ, სწორედაც რომ.

პერლმუტერი მკვეთრად მიბრუნდა ანდერჰილისკენ. მერლოუზმა სცადა, არ ჩამორჩენოდა, ფეხი დაუსხლტა, საჯდომით დაეცა და ლანძღვა-გინებას მოჰყვა. პერლმუტერი ანდერჰილს მხარზე შეეხო და გულწრფელად ისურვა, რომ ნილაბს ნაწილობრივ მაინც დაეფარა მისი გაოცებული სახე: ანდერჰილი ათი წლით მაინც დაბერებულიყო

<sup>144</sup> ამერიკელი მსახიობი, რეჟისორი.

<sup>145</sup> აშშ-ის არმიის გენერალი (1885-1945)

მას შემდეგ, რაც დილით მილინოკეტის სასკოლო დეპარტამენტის ავტობუსიდან ჩამოვიდა.

პერლი წინ გადაიხარა და მთელი ძალით შესძახა, რათა ქარის ხმა ჩაეხშო:

– კურცი მეთხუთმეტეშია! არ დაგავიწყდეთ!

ანდერჰილმა ხელი მოუთმენლად აუქნია, გააგებინა, არ დამავიწყდებაო, და ავტოპარკელ ტიპს მიუბრუნდა. ახლა კი იცნო იგი პერლმუტერმა – ეს ბროდსკი იყო, მეტსახელად „ლოგი“.

კურცის საკომანდო პოსტი უზარმაზარ „ვინებაგოში“ (ფილმში მას აუცილებლად რომელიმე ვარსკვლავის ან ჯიმი კამერონის საცხოვრებლად გამოიყენებდნენ), ამ ადგილიდან ხელის გაწვდენაზე მდებარეობდა. პერლიმ ნაბიჯს მოუჩქარა. ვაჟკაცურად უმკლავდებოდა ძლიერ ქარს, რომელიც სახეში თოვლის ფიფქებს აყრიდა. მერლოუზი მის გვერდით მირბოდა და გზადაგზა კომბინეზონიდან თოვლს იფერთხავდა.

– მიდით, უფროსო, – იხვეწებოდა იგი, – ნუთუ, თავში არაფერი მოგდით?

– არა, – მოუჭრა პერლმუტერმა. მან მართლაც არ იცოდა, რატომ დასჭირდა კურცს ეს საცოდავი მზარეული, თანაც ასეთ ალიაქოთში. მაგრამ ისიც და მერლოუზიც გრძნობდნენ, რომ კარგი არაფერი ელოდათ.

## 2

ოუენმა ემილ ბროდსკის თავი მოუტრიალა, ნიღაბი ყურისკენ აუწია და უთხრა:

– აბა, კიდევ ერთხელ მომიყევი, ყველაფერი არა, მხოლოდ ის, რასაც „ტვინის გამოლაყება“ უწოდებ.

ბროდსკი არ შეწინააღმდეგებია, თუმცა ათიოდე წამი მაინც იდგა, სანამ გონებას მოიკრებდა. ოუენი არ აჩქარებდა, წინ კურცთან



შეხვედრა ელოდა, იმის შემდეგ კი – რაზმის ანგარიშის მოსმენა, ქალღმერთებში ქექვა და ვინ იცის, კიდევ რამდენი რამ, მაგრამ ალლო კარნახობდა, რომ ეს რაღაც მნიშვნელოვანი უნდა ყოფილიყო.

აი, კურცს თუ უამბობდა ამ ყველაფერს, ჯერ არ იცოდა. დრო უჩვენებდა.

როგორც იქნა, ბროდსკიმ ოუენის თავი მოატრიალა, თავისი ნიღაბი ყურზე მიაღო და თხრობას შეუდგა. იმავს ჰყვებოდა, ოღონდ უფრო დაწვრილებით. იგი ფეხით მიუყვებოდა მინდორს მალაზიის სიახლოვეს, თან ერთდროულად კემბრისა და საწვავით დატვირთული სატვირთო მანქანების კოლონას ესაუბრებოდა, როდესაც ვილაცამ მის თავში შეაღწია. მოულოდნელად ძველ, ათასგვარი ხარახურით სავსე ფარდულში აღმოჩნდა ვილაცასთან ერთად, ვისი სახის გარჩევაც ვერ შეძლო. მამაკაცს თოვლმავალი ვერაფრით დაექოქა და დოგს სთხოვა, მიზეზის დადგენაში დახმარებოდა.

– ვუთხარი, რომ კაპოტი აეხადა! – ჩაჰყვიროდა ბროდსკი ოუენს ყურში, – ასეც მოიქცა. მომეჩვენა, რომ მისი თვალებით ვხედავდი, ოღონდ, ჩემი ტვინით. გასაგებად ვამბობ?

ოუენმა თავი დაუქნია.

– მაშინვე მივხვდი, რაც ხდებოდა – ვილაცას სანთლები ამოეღო. იმ კაცს ვუთხარი, რომ მოეძებნა. დაიწყო კიდევ ძებნა. ორივემ დავიწყეთ. მართალი აღმოვჩნდი. ისინი დაზგაზე მოთავსებულ ბენზინიან ქილაში აღმოჩნდა. მამაჩემიც ასე ინახავდა თავისი „ლონბონისა“<sup>146</sup> და „როტოტილერის“<sup>147</sup> სანთლებს, აცივებამდე.

ბროდსკი გაჩუმდა. ან საკუთარმა მონაყოლმა შეაცბუნა, ან იმან, თუ როგორ ჟღერდა ეს უცხო ყურისთვის. დაინტერესებულმა ოუენმა ხელით ანიშნა, გაეგრძელებინა.

– თითქმის ეს არის. ვუთხარი, რომ სანთლები ქილიდან ამოეღო,

<sup>146</sup> გაზონსაკრეჭის მწარმოებელი ერთ-ერთი ფირმა.

<sup>147</sup> მიწის დამამუშავებელი ძრავიანი მოწყობილობა.

გაემშრალეზინა და მანქანაში ჩაეყენებინა. ასე ათასჯერ მაინც მოვქცეულვარ, როცა ბიჭებს მანქანების შეკეთებაში ვეხმარებოდი. თუ ამ შემთხვევას არ ჩავთვლით, როდესაც იქ კი არა, აქ ვიყავი. და სინამდვილეში არც არაფერი მომხდარა.

– მერე? – შესძახა ოუენმა.

ორივენი მთელი ძალით გაჰყვიროდნენ, რათა მანქანების ხმაური გადაეფარათ, თუმცა მათი არავის ესმოდა და თავს ისე გრძნობდნენ, როგორც მღვდელი და აღმსარებელი.

– ძრავა პირველივე ცდაზე დაიქოქა. ვურჩიე, ბენზინი შეემოწმებინა. ბაკი სავსე აღმოჩნდა. იმ კაცმა მადლობა გადამიხადა, – ბროდსკიმ თავი დაბნეულად დააქნია, – ვუპასუხე, პრობლემა არაა, ბოსმეთქი. ამ დროს თითქოს საკუთარ თავში დავებერტყე და ჩემ გარშემო ყველაფერი ძველებურად აღმოჩნდა. მე და კემბრი მინდორში გვერდიგვერდ მივდიოდით. გიჟი გგონივართ?

– არა. მაგრამ მინდა, რომ ეს ჯერ არავის გაუმხილოთ.

ნილაბაფარებულმა ბროდსკიმ გალიმება სცადა.

– ოჰ, რა პრობლემაა. მე მხოლოდ... ნაბრძანები გვექონდა, ყოველივე უჩვეულოს შესახებ შეგვეტყობინებინა და ვიფიქრე...

ოუენმა ბროდსკის მოფიქრება არ აცალა და მიახალა:

– რა ერქვა?

– ჯოუნსი მესამე, – მიუგო ღოგმა და მაშინვე თვალეზი დააჭყიტა.

– დალახვროს ეშმაკმა! – წამოიძახა გაოცებით, – არც კი ვიცი, მისი სახელი საიდან გავიგე.

– როგორ ფიქრობთ, ინდიელების მეტსახელს ხომ არ ჰგავს? როგორც სონი სიქსილერი ან რონი ცხრამთვარე?

– შესაძლებელია, თუმცა...

ბროდსკი შეჩერდა, შუბლი შეიჭმუნა და აბლუყუნდა:

– საშინელებაა! როდესაც ეს მოხდა, მაშინ კი არა, მოგვიანე-

ბით... იმის გაფიქრებაც კი... ეს იგივეა... – მან ხმას დაუწია, – იგივეა, რაც გაუპატიურება, სერ.

– გეყოფა, – უთხრა ოუენმა, – შეეცადე, რომ დაივიწყო. ბევრი საქმე გაქვს?

– არც ისე, – გაელიმა ბროდსკის, – მხოლოდ რამდენიმე ათასი.

– მაშინ წინ!

– კარგი.

ბროდსკი დაიძრა, მაგრამ მაშინვე შემოტრიალდა. ოუენი ბაკს შესცქეროდა, სადაც ადრე ცხენებს ამწყვდევდნენ, ახლა კი ადამიანები შეეყარათ. დაკავებულთა უმრავლესობა ფარდულში დაემწყვდიათ, თხუთმეტი-ოცი კაცი კი საძოვარზე შეეკრიბათ, თითქოს ასე თავს უკეთ იგრძნობდნენ. ნება დართეს, რომ ერთმანეთი ენუგეშებინათ? ერთი მაღალი ახალგაზრდა კაცი შორიახლოს იდგა – გამხდარი, თავჩაქინდრული, უშველებელი სათვალე ზარნაშოს ამსგავსებდა. ბროდსკიმ მზერა განწირული ზარნაშოდან ანდერჰილზე გადაიტანა.

– საგიჟეთში ხომ არ მიპირებთ გაგზავნას? ან ფსიქიატრთან?

ცხადია, არც ერთმა მათგანმა არ იცოდა, რომ ის გამხდარი კაცი ძველმოდური რქისჩარჩოიანი სათვალით, სწორედ რომ ფსიქიატრი იყო.

– არავითარ... – დაიწყო ოუენმა, მაგრამ დამთავრება ვერ მოასწრო, რომ კურცის „ვინებაგოდან“ გაისმა გასროლის ხმა, რომელსაც სასოწარკვეთილი ყვირილი მოჰყვა.

– ბოს! – წაიჩურჩულა ბროდსკიმ.

ოუენმა ძრავების ღრიალში ვერაფერი გაიგონა. მხოლოდ ტუჩების მოძრაობაზე მიხვდა და გაიმეორა:

– ოჰ, ამის დედაც! ..

– წადი, დოგ, – თქვა ოუენმა, – ეს შენი საქმე არ არის.

ბროდსკი კვლავ მას მისჩერებოდა და ტუჩებს ნერვიულად ილო-

კავდა. ოუენმა თავი დაუქნია. ცდილობდა, თავდაჯერებული, მტკიცე, ნამდვილი მეთაურის შესაფერისი გამომეტყველება ჰქონოდა, რომელიც ყველაფერს აკონტროლებს. შესაძლოა, ეს გამოუვიდა კიდევ, რადგან ბროდსკი შეტრიალდა და წავიდა.

„ვინებაგოდან“, რომლის კარზეც ფირფიტა ეკიდა, გაკრული ხელით მიწერილი ტექსტით „შესვლა მხოლოდ გამოძახებით“, კვლავაც მოისმოდა ყვირილი. ოუენმა იქით წასვლა დააპირა, მაგრამ ამ დროს სხვა პატიმრებისგან მოშორებით მდგარმა კაცმა დაუძახა:

– ეი! ეი, თქვენ! ერთი წუთით! რაღაც უნდა გითხრათ!

აბა რა, – გაიფიქრა ანდერჰილმა და ნაბიჯი არ შეუწელებია, – დაგენაძლევები, რომ ზღაპარიც გექნება მომზადებული და ათასი მიზეზიც, თუ რატომ უნდა გაგათავისუფლო დაუყოვნებლივ.

– ოვერჰილ? არა, ანდერჰილ. ასე გქვიათ, არა? რასაკვირველია, ასე გქვიათ. უნდა დაგელაპარაკოთ – ეს ორივე ჩვენგანისთვის მნიშვნელოვანია!

ოუენი შეჩერდა. „ვინებაგოდან ” ისევ ისმოდა ყვირილი, რომელიც თანდათანობით ტირილში გადაიზარდა. იქ, ცხადია, რაღაც ხდებოდა, მაგრამ ჯერჯერობით არავინ მოეკლათ, რაც, თავისთავად, უკვე კარგი იყო. იგი ყურადღებით მიაჩერდა სათვალთან, ჯოხივით გამხდარ კაცს, რომელსაც პარკა ეცვა, მაგრამ სიცივისგან მაინც კანკალებდა.

– ეს რიტასთვისაა მნიშვნელოვანი, – ხმამაღლა თქვა გამხდარმა კაცმა ხმაურის გადასაფარავად, – კეტრინისთვისაც.

ეს რომ თქვა, კაცი ღონემიხდილივით მოეშვა, თითქოს მძიმე ლოდები ეთრია ღრმა ქიდან, მაგრამ ოუენი ისე განაცვიფრა ცოლისა და ქალიშვილის სახელების ხსენებამ, რომ ეს არც შეუძინევია. საიდან უნდა სცოდნოდა უცხო ადამიანს ასეთი რამ? თავდაპირველად მასთან მისვლა და ყველაფრის გამოკითხვა დააპირა, მაგრამ ისედაც აგვიანდებოდა... კურცთან შეხვედრაზე. და თუ ჯერ არავინ მოეკლათ, ამის გაკეთება კიდევ მოესწრებოდა.

ოუენმა ერთხელაც შეავლო თვალი მავთულხლართის იქით მყოფ კაცს, რათა მისი სახე დაემახსოვრებინა და „ვინებაგოსკენ“ გაეშურა, რომლის კარზეც ფირფიტა ეკიდა.

### 3

პერლმუტერს „წყვდიადის გულიც“<sup>148</sup> წაეკითხა, „აპოკალიფსი ახლაც“<sup>149</sup> ენახა და იმაზეც ხშირად ეფიქრა, რომ სახელი „კურცი“ საგანგებოდ შეერჩიათ მსგავსი ვითარებისთვის. მზად იყო, ას დოლარსაც ჩამოსულიყო (ეს მნიშვნელოვანი თანხა იყო მისნაირი არტისტული ბუნების ადამიანისთვის) იმის სასარგებლოდ, რომ სინამდვილეში, ბოსს სხვა სახელი ერქვა, შესაძლოა, არტურ ჰოლსეფლი ან დავუდ ელგარტი, იქნებ, პედი მელონიც კი. მაგრამ კურცი? ეჭვი ეპარებოდა. ეს ნამდვილად ფსევდონიმს ჰგავდა, ისეთივე თეატრალურ რეკვიზიტს, როგორიც ჯორჯ პატონის სადაფისსახელურიანი, ორმოცდახუთკალიბრიანი რევოლვერი იყო. ჯარისკაცები, რომლებიც კურცს ჯერ კიდევ „ქარიშხალი უდაბნოში“ ოპერაციის დროიდან იცნობდნენ (არჩი პერლმუტერს მის სიახლოვეს დგომაც კი არ ხვდა წილად), მას გადარეულ, დედანატირებ მებრძოლად მოიხსენიებდნენ. არჩიც ასე ეფიქრობდა და ბებერ შემოიღო პატონს ამსგავსებდა. არც იმას გამორიცხვდა, რომ დილაობით, პარსვისას, საკუთარ თავს სარკეში უყურებდა და მარლონ ბრანდოსავით<sup>150</sup> ჩურჩულით იმეორებდა: „საშინელებაა, საშინელებაა“.

ამიტომ, როცა მზარეულის მესამე თანაშემწე მერლოუზს ზედმეტად თბილი სამეთაურო ტრაილერისკენ მიაცილებდა, არჩი ცოტათი მოუსვენრობდა, ოღონდ ზომიერად. კურცი მშვენივრად გამოიყურებოდა. შკიპერი მოქანავე დაწულ სკამზე იჯდა იმ პატარა სივრცეში, რომელსაც სასტუმრო ოთახს ეძახდნენ. მას კომბინეზონი გაეხადა –

<sup>148</sup> ინგლისელ მწერალ ჯორჯ კონრადის სათავგადასავლო მოთხრობა

<sup>149</sup> ამერიკელ რეჟისორ ფრენსის ფორდ კოპოლას ფილმი.

<sup>150</sup> ამერიკელი მსახიობი.

ის იმ კარზე ეკიდა, რომლიდანაც პერლმუტერი და მერლოუზი შევიდნენ – და გრძელი საცვლის ამარა დარჩენილიყო. მოქანავე სკამის ცალ მხარეს ბუდეში მოთავსებული პისტოლეტი ეკიდა – ავტომატური ცხრამილიმეტრიანი და არა სადაფისსახელურიანი ორმოცდახუთკალიბრიანი.

ოფისი ტექნიკით უკვე აღეჭურვათ. კურცის მაგიდაზე მოთავსებული ფაქსი შეუსვენებლივ მუშაობდა და დაუსრულებლად ბეჭდავდა ქალაღდის ლენტს. ყოველ თხუთმეტ წუთში ერთხელ კომპიუტერი რობოტის მხიარული ხმით „ფოსტას“ წამოიძახებდა ხოლმე. დაბალ ხმაზე ჩართული სამი რადიომიმღები ტკაცუნებდა და ერთი სიხშირიდან მეორეზე დახტოდა. მაგიდის უკან, ხელოვნურ ფიჭვზე, ორი სურათი ეკიდა. ისევე, როგორც კარზე ჩამოკიდებული ფირფიტა, კურცს ისინი მუდამ თან დაჰქონდა. მარცხენას „ინვესტიცია“ ეწერა და ზედ ანგელოზისსახიანი, სკაუტის ფორმაში გამოწყობილი ბიჭი ეხატა, რომელსაც მარჯვენა ხელი მისალმების ნიშნად აეწია, მარჯვენას კი – „დივიდენდები“, 1945 წლის გაზაფხულზე თვითმფრინავიდან გადაღებული ბერლინის ფოტოსურათით. ორი შენობა გადარჩენილიყო, ირგვლივ ნანგრევები ჩანდა.

კურცმა მათ მაგიდის მეორე მხრიდან ხელი დაუქნია.

– არ იფიქროთ, ბიჭებო, რომ ეს ჩვეულებრივი ხმაურია. ფრედი ჯონსონს უკვე დავავალე ამაში გარკვევა, მაგრამ ჯერ სასაღილოში გავგზავნე დასანაყრებლად. ვუბრძანე, რომ არ იჩქაროს, მშვიდად მიირთვას ოთხივე კერძი, სუპიც, თევზიც, დესერტიცა და კომპოტიც, რადგან ვითარება აქ... ბიჭებო, ვითარება აქ თითქმის... დასტაბილურდა!

იგი საშინლად, FDR-ვით<sup>151</sup> გაიკრიჭა, და სკამზე რწევას მოჰყვა. მასთან ერთად, ქამარზე ჩამოკიდებული პისტოლეტის ბუდეც ქანაობდა ქანქარასავით.

---

<sup>151</sup> ფრანკლინ დელანო რუზველტი, აშშ-ის 32-ე პრეზიდენტი 1933-1945 წლებში.

პასუხად მელროუზმა გაუბედავად გაიღიმა. პერლმუტერმაც იგივე გააკეთა, ოღონდ უფრო თავშეკავებულად. ის, როგორც იქნა, ჩასწვდა კურცის ბუნებას: ბოსი ეგზისტენციარული ტიპი იყო და ძლიერი პიროვნებების წამბაძველობა ახასიათებდა. სხვა რა გზა ჰქონდა – უნდა ერწმუნა, რომ უკანასკნელი განცხადება კარგს მოასწავებდა. ძალიან კარგს. ჰუმანიტარული განათლება სამხედრო კარიერის კუთხით ბევრს არაფერს ნიშნავდა, მაგრამ რაღაცაში მაინც უწყობდა ხელს. მაგალითად, შესაფერისი ფრაზის დროულად მოყვანაში.

– მე ერთადერთი რამ ვუბრძანე ლეიტენანტ ჯონსონს... ოჰ, ბოდიშს ვიხდი, არავითარი წოდებები, მინდოდა მეთქვა, ჩემს ძველ მეგობარ ფრედი ჯონსონს-მეთქი – რომ ჭამის წინ ელოცა. თქვენ თუ ლოცულობთ, ბიჭებო?

მელროუზმა კვლავ დარცხვენით დაუქნია თავი, პერლმუტერმა – მოწყალედ. ამ უკანასკნელს სჯეროდა, რომ კურცის ხაზგასმული ღვთისმოსაობა მოჩვენებითი იყო, ისეთივე – როგორც მისი სახელი.

კურცი კი ქანაობას განაგრძობდა და მხიარულად შეჰყურებდა მამაკაცებს, რომლების ჩექმებიდან ჩამომდნარი წყლის გუბებში იდგნენ.

– საუკეთესო ლოცვა ბავშვის ლოცვაა, – თქვა კურცმა, – მარტივი, ხომ გესმით? „ღმერთი დიდია, ღმერთი კარგია. მოდით, მაღლობა ვუთხრათ მას იმისთვის, რომ საჭმელი მოგვცა“. ამის გაკეთება ძალზე მარტივია და, იმავდროულად – შესანიშნავი. არ მეთანხმები?

– დიახ, მაგრამ... – დაიწყო პერლიმ.

– მოკეტე, ნუ იყეფები, – მხიარულად უთხრა კურცმა. იგი კვლავინდებურად ირწეოდა, პისტოლეტიც ისევე ქანაობდა ყაწიმზე. კურცმა ახლა მერლოუზს შეხედა და ჰკითხა:

– შენ რაღას ფიქრობ, ტანდაბალო რიგითო? ეს შესანიშნავი პატარა ლოცვაა თუ შესანიშნავი პატარა მლოცველი?

– დიახ, ს...

– ან ალაჰ-აკბარ, როგორც ჩვენი მეგობარი არაბები ამბობენ, „არ არის ღმერთი თვინიერ ალაჰისა“, რა შეიძლება იყოს ამაზე მარტივი? პიცას ზუსტად შუაზე ქრის, თუ გესმით, რას ვლაპარაკობ.

მათ არაფერი უპასუხეს. კურცი სულ უფრო სწრაფად ირწეოდა, ასევე, პისტოლეტიც, პერლმუტერს თვალთ დაუბნელდა, როგორც დილით, სანამ ანდერჰილი მოვიდოდა და კურცს ცოტათი დააცხრობდა. შესაძლოა, ეს ყველაფერი მორიგი სპექტაკლი იყო, მაგრამ...

– ან მოსე ცეცხმოკიდებული ბუჩქის წინ! – შესძახა კურცმა და ცხენივით წაგრძელებული სახე შეშლილის ღიმილმა გაუნათა, – „ვის ველაპარაკები?“, ეკითხება მოსე, ღმერთი კი პასუხობს: „მე ვარ ის, ვინც ვარ და სულ ეს ვარ, ვინც ვარ, კუ-კუ-კუ“. მხიარული ვინმე კი ყოფილა ეს ღმერთი, არა, მისტერ მერლოუზ? ერთი ის მითხარი, გარე სამყაროდან მოსულთ „კოსმოსურ ზანგებს“ მართლა ეძახდი?

მერლოუზს კინალამ ყბა ჩამოუვარდა.

– მიპასუხე, რიგითო.

– სერ, მე...

– კიდევ ერთხელ მიწოდებ „სერ“-ს, როცა ჯგუფი დავალებაზეა წასული, მისტერ მერლოუზ, და ორ მომდევნო დაბადების დღეს ციხეში აღნიშნავ, გასაგებია? მიხვდი, საით გიკაკუნებ?

– დიახ, ბოს! – მერლოუზი გაიჯგვიმა. ლოყებზე სიცივისგან გაჩენილ წითელ ლაქებს თუ არ ჩავთვლით, სახე მკვდარივით გაჰფითრებოდა, – აბა, რას იტყვი? ეძახდი თუ არა უდიდესი გარე სამყაროდან მოსულებს „კოსმოსურ ზანგებს“?

– სერ, იქნებ წამომცდა კიდევ...

პერლმუტერი ვერაფრით დაიჯერებდა, რომ კურცს ასე სწრაფად შეეძლო მოქმედება (თვითონ რომ არ შესწრებოდა, იფიქრებდა, რომ ეს სპეცეფექტი იყო, როგორც ჯეიმს კამერონის ფილმში). იგი შემოტრიალდა, ბუდიდან ცხრამილიმეტრიანი პისტოლეტი ამოაფრინა



და თითქოს ბრმად, ელვისებურად გაისროლა. მერლოუზის მარცხენა ბოტასის ზედა ნაწილი აფეთქდა და ნაფლეთები გაიფანტა. სისხლი და კანის ნაგლეჯები პერლმუტერს შარვალზეც მოხვდა.

მე ეს არ დამინახავს, – გაიფიქრა პერლიმ, – ეს არ მომხდარა.

მაგრამ მერლოუზმა საშინელი ხმით იყვირა, გაოგნებული დააჯექერდა თავის დასახიჩრებულ ფეხს და როგორც ჩანს, საბოლოოდ დაკარგა აზროვნების უნარი. პერლმუტერმა ამოჩრილ ძვალს მოჰკრა თვალი და კინალამ შიგნეულობა ამოუტრიალდა.

კურცი წამოხტა. ამჯერად იმაზე ნელა, ვიდრე პისტოლეტი ამოიღო, მაგრამ – მაინც სწრაფად, შემაძრწუნებლად სწრაფად. მერლოუზს ხელი მხარში ჩაავლო და დაღრეჯილ სახეში ჩააშტერდა.

– მორჩი წუწუნს, ტანდაბალო რიგითო!

მაგრამ მერლოუზს აღარაფერი ესმოდა. მას სისხლი სდიოდა და პერლის მოეჩვენა, რომ ტერფის თითებიანი ნაწილი ქუსლისგან გამოცალკევებას აპირებდა. პერლისთვის სამყარო განაცრისფრდა და გაბუნდოვნდა. მთელი ძალით ეცადა ყურადღების მოკრებას. გული რომ წასვლოდა, ღმერთმა იცის, კურცს რა წამოუვლიდა და რას დამართებდა მას. პერლმუტერს მსგავსი შემთხვევების შესახებ ბევრჯერ სმენოდა, მაგრამ არ სჯეროდა, სიცრუედ ან ჭორად მიაჩნდა, რომელსაც კურცი თვითონ ავრცელებდა სხვების დასაშინებლად.

ახლა ყველაფერი ვიცი, – გაიფიქრა პერლმუტერმა, – ეს ზღაპარი არ არის, ეს მითია.

კურცმა მკაფიოდ, თითქმის ქირურგიული სიზუსტით მიაღო პისტოლეტის ლულა მერლოუზს მოთაფლისფრო-მოთეთრო შუბლზე, წარბებშუა.

– მორჩი-მეთქი ამ ქალურ წივილ-კივილს, რიგითო, თორემ მე თვითონ გაგაჩუმებ. ეს ის შემთხვევაა, როდესაც შენნაირმა ერთუჯრედიანმა ამერიკელმაც კი უნდა იცოდეს, როგორ მოიქცეს.

მერლოუზმა როგორღაც მოახერხა ყვირილის ყელში ჩაბრუნება

და ხმადაბალ, საწყალობელ სლუკუნზე გადავიდა. ამან კურცი, როგორც ჩანს, დააკმაყოფილა.

– ახლა კი მომისმინე, რიგითო. უნდა მომისმინო, თუნდაც იმიტომ, რომ სხვებს გადასცე. ვფიქრობ, შენი ფეხი, უფრო სწორად ის, რაც მისგან დარჩა, საკმარისად დამაჯერებელი არგუმენტი იქნება, მაგრამ შენს წმინდა პირს წვრილმანების მოყოლა მოუწევს. აბა, მისმენ, ყმაწვილო? ისმენ დეტალებს?

მოსლუკუნე მერლოუზმა, რომელსაც თვალები – ორი ცისფერი შუშის ბურთულა – გადმოეკარკლა, თავი დაუქნია.

კურცმა სწრაფად, საკბენად მომზადებული გველივით თავი გვერდზე გასწია და პერლმუტერმა ბოსის სახე დაინახა. ყოველ ნაკვეთში ინდიელის საბრძოლო მონატულობასავით მკაფიოდ აღჰბეჭდოდა სიგიჟე. სწორედ ამ დროს ყველაფერი, რასაც პერლმუტერი თავის მეთაურზე მანამდე ფიქრობდა, ერთიანად გაცამტვერდა.

– შენ, ყმაწვილო? შენც მისმენ? იმიტომ, რომ შენც მაცნე ხარ. ორივენი მაცნეები ხართ.

პერლიმ თავი დაუქნია. ამ დროს კარი გაიღო და ახალმოსულში ოუენ ანდერჰილი რომ შეიცნო, შვებით ამოისუნთქა. კურცმაც იქით გაიხედა.

– ოუენ! მეგობარო! @კიდევ ერთი მოწმე! კიდევ ერთი მაცნე, მადლობა ღმერთს! მისმენ? წაიღებ სიტყვას ამ ბედნიერი ადგილიდან?

ანდერჰილმა თავი აუღელვებლად, პოკერში დიდ თანხებზე მოთამაშესავით დაუქნია.

– კარგია! შესანიშნავია!

კურცმა ყურადღება კვლავ მერლოუზზე გადაიტანა.

– ახლა კი, მზარეულის მესამე თანაშემწევ, სამხედრო წესდების ნაწილს გაგაცნობ. თავი მე-16, მუხლი მე-4, პარაგრაფი მე-3. „რასის, ეთნიკური წარმოშობისა და აგრეთვე, სქესის მიმანიშნებელი უად-

გილო ეპითეტების გამოყენება, ეწინააღმდეგება სამხედრო მოსამსახურეთა მორალსა და ქცევის წესებს. ამგვარი საქციელის დამტკიცების შემთხვევაში, დამნაშავეს სჯის სამხედრო ტრიბუნალი ან საველე სასამართლო, შესაბამისი სამეთაურო შემაღგენლობის სახით. ციტატის დასასრული. შესაბამისი სამეთაურო შემაღგენლობა მე ვარ, წესდების დამრღვევი, უადგილო ეპითეტების მთქმელი – შენ. გასაგებია მერლოუზ? მიხვდი, საით გიკაკუნებ?

მერლოუზმა რაღაც ჩაიბურტყუნა, მაგრამ კურცმა გააწყვეტინა. ოუენ ანდერჰილი კარში გაუნძრევლად იდგა, ვერც კი გრძობდა, როგორ დნებოდა მის თავზე დაყრილი თოვლი და გამჭვირვალე ნიღაბზე ოფლივით ჩამოსდიოდა. იდგა და კურცს თვალებით ბურღავდა.

– ახლა კი, მზარეულის მესამე თანაშემწე მერლოუზ, დავამატებ: იმას, რაც აქ ღვთის მიერ გამოგზავნილი მოწმეების თანდასწრებით წაგიკითხეთ, ქცევის წესები ჰქვია და ნიშნავს – არავითარი სპიკი<sup>152</sup>, მოკი<sup>153</sup>, ფრიცი<sup>154</sup> ან წითელკანიანი. არსებული ვითარებიდან გამომდინარე, იმავე ჯგუფს მიეკუთვნება „კოსმოსური ზანგებიც“. გასაგებია?

მელროუზმა თავის დაქნევა სცადა, მაგრამ უკვე გონებას კარგავდა და შებარბაცდა. პერლიმ ხელი წაავლო და შეაკავა, თან გულში ღმერთს ევედრებოდა, მერლოუზი დროზე ადრე არ გაშოტილიყო, თორემ „თავხედური“ გათიშვისა და ბოსის ქადაგების არმოსმენის გამო, ვინ იცის, კურცი კიდევ რას დამართებდა.

– ჩვენ აღვგვით პირისაგან მიწისა აქ შემოჭრილ დაუპატიუებელ სტუმრებს, მეგობარო. თუ ისინი ოდესმე კვლავ დაბრუნდებიან ჩვენს მიწა-წყალზე, მოვადრობთ კოლექტიურ ნაცრისფერ თავს და

---

<sup>152</sup> ლათინოსი

<sup>153</sup> მამაკაცის სასქესო ორგანო.

<sup>154</sup> გერმანელების მეტსახელი მეორე მსოფლიო ომის დროს.

ნაცრისფერ კისერსაც ზედ მივაყოლებთ. თუ გაჯიუტდებიან, გამოვიყენებთ მათ მეთოდს, რომელიც თითქმის ავითვისეთ, საკუთარ საბრძანებელში ვეწვევით მათივე, ან „ჯენერალ ელექტრიკის“, „დიუპონისა“ და უფალი „მაიკროსოფტის“ მიერ აგებული, მსგავსი ხომალდებით და ცეცხლს მივცემთ მათ ქალაქებს, სკებსა თუ ჭიანჭველების ბუდეებს, ნაპალმით მოვურწყავთ პურის ქარვისფერ ყანებს, მიწასთან გავასწორებთ მათ დიად მეწამულ მთებს, დიდება უფალს, ალაჰ-აკბარ, ამერიკის შარდით გავავსებთ მათ ტბებსა და ოკეანეებს... მაგრამ ამას ღირსეულად, წესიერად გავაკეთებთ, არავის გამოვარჩევთ სქესის, რელიგიის, რასისა და ეთნიკური ნიშნის მიხედვით. ჩვენ ამას გავაკეთებთ, რადგან მათ ეყოთ თავხედობა და იმ მეზობელთან მივიდნენ, რომელთანაც არ უნდა მისულიყვნენ, იმ კარზე დააკაკუნეს, რომელზეც არ უნდა დაეკაკუნებინათ. ეს არც 1938 წლის გერმანია და არც 1963 წლის მასაჩუსეტსის შტატის ქალაქი ოქსფორდია. აბა, მისტერ მერლოუზ, გადასცემთ ჩემს სიტყვებს დანარჩენებს?

მერლოუზმა თვალები გადაატრიალა, მუხლები მოეკეცა. პერლმუტერი კვლავ ჩააფრინდა, რათა წაქცევისგან გადაერჩინა, მაგრამ აღარ გამოუვიდა და მერლოუზი დაეცა.

– პერლი, – წაიჩურჩულა კურცმა და როდესაც ცეცხლისმფრქვეველი ცისფერი თვალებით მიაჩერდა, პერლის ისე შეეშინდა, ცხოვრებაში რომ არ შეშინებია. შარდის ბუშტი გავარვარებულ და მძიმე ტომრად გადაექცა, ტომარას ერთი სული ჰქონდა, გამსკდარიყო და კომბინეზონში ჩაღვროდა. გრძნობდა, რომ თუ კურცი ადიუტანტის საზარდულთან მუქ ლაქას დაინახავდა, შეუბრალებლად დაახლიდა ტყვიას, განსაკუთრებით ამჟამინდელ მდგომარეობაში... მაგრამ ამგვარი ფიქრები ვერაფრით ეხმარებოდა. პირიქით, უფრო ცუდად ხდიდა.

– დიახ, ს... ბოს?

– როგორ ფიქრობთ, მიიტანს ის შეტყობინებას? მოახერხებს ჩემი

სიტყვების გადაცემას? საკმარისად შეიწოვა მისთვის ნათქვამი სიბრძნე, თუ იმ დაწყევლილი ბებერი ფეხის გამო წუხს?

– მე... მე... – პერლიმ დაინახა, რომ კარში მდგარმა ანდერჰილმა თავი ძლივს შესამჩნევად დაუქნია და მაშინვე გული მიეცა, – დიახ, ბოს, ვფიქრობ, ყურადღებით გისმენდათ.

კურცი ადიუტანტის მგზნებარებამ ცოტათი კი გააოცა, მაგრამ მაინც დაცხრა და ანდერჰილს მიუბრუნდა:

– თქვენ რას იტყვით, ანდერჰილ? შეძლებს შეტყობინების გადაცემას?

– აჰა, – ჩაიბურტყუნა ანდერჰილმა, – თუ ლაზარეთამდე მიყვანას მოვასწრებთ, სანამ თქვენს ნოხზე სისხლისგან არ დაცლილა.

კურცს პირის კუთხეები ოდნავ მაღლა აეწია.

– მიხედე, პერლი. მიხედავ?

– დაუყოვნებლივ, – თქვა პერლმუტერმა, კარისკენ გავარდა და ანდერჰილი უსაზღვრო მადლიერებით აღსავსე მზერით დააჯილდოვა, ოღონდ, იმ უკანასკნელმა ეს ან არ, ან ვერ შეამჩნია.

– სწრაფად, მისტერ პერლმუტერ. ოუენ, თქვენთან, როგორც ირლანდიელები იტყვიან, *mano a mano*<sup>155</sup> მსურს საუბარი.

ძირს არ დაუხედავს, ისე გადააბიჯა მერლოუზს და მკვირცხლად გაემართა ციციქნა სამზარეულოსკენ.

– ყავას ხომ არ მიირთმევთ? ფრედიმ მოამზადა, თუმცა თავს ვერ დავდებ, რომ ისმება... ამას ვერ დაგპირდებით, მაგრამ...

– კარგი ყავა უნდა იყოს, – თქვა ოუენმა, – დამისხით, მე კი შევცდები, ამ ბიჭს სისხლდენა შევუჩერო.

ყავადნის ასაღებად ხელგაწვდილი კურცი შეჩერდა და ანდერჰილს ეჭვით აღსავსე მზერა მიაპყრო:

– ფიქრობთ, ეგ აუცილებელია?

ამ დროს პერლმუტერმა კარს მიაღწია და გარეთ გავიდა. ასე

---

<sup>155</sup> პირისპირ (ირლ)

არასდროს გახარებია ქარბუქში დგომა. უკან მოუხედავად უნდა მოესვა იქიდან.

#### 4

ჰენრი ლობესთან იდგა (ცდილობდა, მავთულს არ შეხებოდა; უკვე ნახა, რა მოჰყვა გაუფრთხილებლობას) და სამეთაურო პოსტიდან ანდერჰილის – დიახ, მას ასე ერქვა – დაბრუნებას ელოდებოდა. თუმცა, კარი რომ გაიღო, იქიდან სხვა სამხედრო გამოვიდა, სწრაფად ჩაირბინა კიბე და იქაურობას სირბილით გაშორდა. ამ მაღალსა და მოუქნელ კაცს, ჰენრის აზრით, საშუალო დონის მენეჯერებისთვის დამახასიათებელი სერიოზული სახე ჰქონდა. ამჯერად კი ძალზე შეშინებული ჩანდა. ჰენრიმ თვალი გააყოლა.

საშუალო დონის მენეჯერი რამდენჯერმე წაბორძიკდა. თავიდან, წონასწორობა შეინარჩუნა, მაგრამ გვერდიგვერდ მდგარი ორი ტრაილერისკენ რომ მიდიოდა, ფეხი დაუსხლტა, თავი ვედარ შეიკავა და დაეცა. პლანშეტი ხელიდან გაუვარდა და გნომების ციგასავით გასრიალდა.

ჰენრიმ ხელი ხელს მთელი ძალით შემოჰკრა, მაგრამ გამაყრუებელ ხმაურში მისი ტაში არავის გაუგონია, ამიტომ ხელისგულები პირთან მიიტანა, რუპორივით გააკეთა და შესძახა:

– ეს უსამართლობაა! ფავორიტს გზაზე განავალი დაუგდეს. ვიდეოჩანაწერს მოვითხოვთ!

მენეჯერი წამოდგა, მისკენ არც კი გაუხედავს, პლანშეტი აიღო და ტრაილერებისკენ იმავე ტემპით მოუსვა.

ლობესთან, ჰენრისგან ოციოდე იარდში, რვა-ათი კაცი შეჯგუფულიყო. მათ ერთი ზორბა ჯეელი გამოეყო, რომელიც ნარინჯისფერი პარკათი „პილზბერის“<sup>156</sup> ცომის კაცუნას ჰგავდა და მისკენ გაემართა.

---

<sup>156</sup> ნახევარფაბრიკატების მწარმოებელი სასურსათო კომპანია, რომლის ემბლემაც ცომისგან გაკეთებული კაცუნაა.

– ვფიქრობ, ეს არ უნდა გაგეკეთებინათ, მეგობარო, – უთხრა მან ჰენრის, შემდეგ კი ხმას დაუწია, – მათ ჩემს სიძეს ესროლეს.

დიახ. ჰენრიმ წაიკითხა მისი აზრები. იმ ზორბას სიძე, ისიც მოსული კაცი, ადვოკატზე, უფლებებზე, ბოსტონის საინვესტიციო კომპანიაში მუშაობაზე ლაპარაკობდა. ჯარისკაცები თავს უქნევდნენ, უხსნიდნენ, რომ ეს დროებითი ღონისძიება იყო. ვითარება გამოსწორდებოდა, სალამოსთვის ყველაფერი გაირკვეოდა. ამ დროს ორი მძიმეწონიანი მონადირე შემოიყვანეს და ჯიკავ-ჯიკავით წაიყვანეს ბელლისკენ, სადაც სხვაც ბევრი იმყოფებოდა. მოულოდნელად, სიძე ადგილიდან მოწყდა და ავტოპარკისკენ გაიქცა. გაისმა „ბახ-ბახ!“ და ყველაფერი ჩაქრა.

ზორბა კაცი გაფითრებული, დაღმეჭილი სახით უყვებოდა ჰენრის, მაგრამ მან შეაწყვეტინა:

– როგორ ფიქრობთ, დანარჩენებს რას უპირებენ?

შოკირებული ბრგე მამაკაცი ჰენრის მიაშტერდა და უკან ისე დაიხია, თითქოს შეეშინდა, რამე არ გადასდებოდა. სასაცილო იყო მსგავსი ფიქრები, რადგან ინფექცია უკვე ყველას შეჰყროდა, ყოველ შემთხვევაში, მთავრობის მიერ დაქირავებულ მწმენდავებს ასე მიანდათ. მათაც იგივე ბედი ელოდათ.

– ალბათ, ხუმრობთ, – თქვა ზორბამ, შემდეგ კი თითქმის ვედრებით დაამატა, – მაღლობა ღმერთს, ამერიკაში ვართ.

– მართლა? და თქვენ, რა თქმა უნდა, კანონიერად გექცევინან?

– ისინი მხოლოდ... დარწმუნებული ვარ, ისინი მხოლოდ... – ჰენრი ინტერესით ელოდა გაგრძელებას, მაგრამ მსგავსი არაფერი მომხდარა, ამბის თხრობა არ გაუგრძელებია, – თქვენ ხომ გაიგონეთ გასროლა, არა? – ჰკითხა ზორბამ, – მგონი, ყვირილიც შემომესმა.

წყვილად მდგარი ტრაილერიდან ორი სანიტარი გადმოვიდა საკაცით ხელში. უკან უხალისოდ მოჰყვებოდათ საშუალო ღონის მენეჯერი, რომელსაც ილლიაში თავისი განუყრელი პლანშეტი ამოეჩარა.

– მგონი, მართალი იყავით.

ჰენრი და ზორბა კაცი ერთად აკვირდებოდნენ, როგორ მიიჩქაროდა საკაციანი სამეული „ვინებაგოსკენ“. როგორც კი საშუალო დონის მენეჯერი ღობეს მიუახლოვდა, ჰენრიმ ხმამაღლა დაუყვირა:

– როგორ არის საქმე, გაცურებულო? კარგად გაერთე?

ზორბა კაცი მოიბუზა. პლანშეტიანმა კი ჰენრი ისეთი მზერით დაასაჩუქრა, რომ ახალმოწველილი რძეც კი ამჟავდებოდა, და „ვინებაგოსკენ“ წაჩანჩალდა.

– ეს მხოლოდ... ეს განსაკუთრებულ მდგომარეობას წააგავს, – თქვა ზორბამ, – დარწმუნებული ვარ, ხვალ დილისთვის ყველაფერი მოგვარდება.

– ოღონდ, არა თქვენი სიძისთვის, – შეახსენა ჰენრიმ.

სქელომ შეხედა, ტურები ოდნავ აუცახცახდა. შემდეგ სიტყვის უთქმელად ძველ კომპანიას დაუბრუნდა, სადაც უმრავლესობა, ალბათ, მისნაირად აფასებდა მომხდარს. ჰენრი კვლავ „ვინებაგოს“ მიაჩერდა – ანდერჰილის გამოჩენას ელოდებოდა. რატომღაც მოეჩვენა, რომ ანდერჰილი მისი ერთადერთი იმედი იყო... მიუხედავად იმისა, რომ ამ უკანასკნელს, ოპერაციასთან დაკავშირებით, ეჭვი უღრღნიდა გულს, იმედი მაინც იყო, ოღონდ, ძალიან მცირე. ჰენრის ხელში ერთადერთი კარტი ეჭირა. მას ჯოუნსი ერქვა. მათ ჯოუნსის შესახებ არ იცოდნენ.

ახლა ის უნდა გადაეწყვიტა, ეცნობებინა თუ არა ანდერჰილისთვის ჯოუნსის თაობაზე. ჰენრის საშინლად ეშინოდა, რომ ამის თქმა კარგს არაფერს მოიტანდა.

## 5

მას შემდეგ, რაც საშუალო დონის მენეჯერი სანიტრებს „ბაგოში“ შეჰყვა, ხუთი წუთი გავიდა. მანქანის კარი გაიღო და ისევ ძველი სამეული გამოჩნდა, საკაცებზე კი ვიღაც მეოთხე იწვა. გაჩანჩახებულ



შუქში დაჭრილის ფერმკრთალი სახე იისფრად მოჩანდა. ჰენრიმ შვე-  
ბით ამოისუნთქა, როდესაც მასში ანდერჰილი ვერ შეიძინო, ანდერ-  
ჰილი იმ მანიაკებს არ ჰგავდა.

გავიდა კიდევ ათი წუთი. ანდერჰილი სამეთაურო პოსტიდან  
კვლავ არ გამოდიოდა. ჰენრი მოთმინებით ელოდა. ირგვლივ ნამქე-  
რები იდო. ლობის გასწვრივ ჩამწკრივებული ჯარისკაცები პატიმ-  
რებს დარაჯობდნენ (დიახ, ისინი პატიმრები იყვნენ. თავის მოტყუე-  
ბა არ ღირდა). ერთ-ერთი მათგანი, შემთხვევით, მათ მიუახლოვდა.  
გუშაგებმა, რომლებიც დიფქათისა და სუონიფონდროულის გადაკ-  
ვეთაზე იდგნენ, ფარნები მიანათეს, დამაბრმავებელ შუქში ჰენრიმ  
მისი სახე ვერ გაარჩია, მაგრამ ძალიან გაუხარდა და, იმავდრო-  
ულად, განცვიფრდა კიდევ, როდესაც მიხვდა, რომ გონებასაც ჰქონ-  
და ისეთივე ნიშნები, როგორც სხეულს – ლამაზი პირი, გატეხილი  
ცხვირი ან დაელმებული თვალი. ეს სწორედ ის კაცი აღმოჩნდა, რო-  
მელმაც ჰენრის ავტომატის კონდახი ამოჰკრა უკანალში, როდესაც  
ჩათვალა, რომ სატვირთო მანქანისკენ საკმაოდ სწრაფად არ მიდი-  
ოდა. ჰენრის ტვინს რაღაც სჭირდა – ვერაფრით წაეკითხა იმ კაცის  
სახელი, თუმცა იცოდა, რომ მის ძმას ფრენკი ერქვა და ის ფრენკი  
ჯერ კიდევ სკოლაში სწავლისას დაეპატიმრებინათ და გაესამარ-  
თლებინათ გაუპატიურებისთვის. არა, რაღაც-რაღაც ცნობები კი მი-  
იღო, მაგრამ ნაწყვეტ-ნაწყვეტი და ერთმანეთთან დაუკავშირებე-  
ლი, როგორც ყუთში ჩაყრილი ნაგავი. ჰენრი ხვდებოდა, რომ გონე-  
ბის მდინარეში შესვლას ცდილობდა, დინებას კი ნაფოტები და ათა-  
სი ნაგავი მოჰქონდა. სწყინდა, რომ უმეტესობას საოცრად პროზაუ-  
ლი დატვირთვა ჰქონდა.

– ეი, შენ! – მეგობრულად გამოსძახა ჯარისკაცმა, – ეს ხომ ჩვენი  
ჭკუისკოლოფაა! ჰოთდოგი ხომ არ გინდა, ჭკუისკოლოფო?

– უკვე მივირთვი, – გაულიმა ჰენრიმ, მაგრამ ამ დროს ენაზე  
თითქოს ბივერმა დაქაჩა, როგორც იცოდა ხოლმე, – აქედან დაახვიე,  
ფრელი.

ჯარისკაცმა სიცილი შეწყვიტა.

– ენახოთ, როგორ ჭკუაზე დადგები თორმეტი საათის შემდეგ, – დაიქადნა მან. მის ყურებს შორის მოთავსებულ გონებაში მცურავი გამოსახულება მკაფიოდ მოჩანდა, ეს გვამებით, ერთმანეთში გადახლართული კიდურებით სავსე სატვირთო მანქანა იყო, – „რიპლით“ ჯერ არ შემოსილხარ, ჭკუისკოლოფო?

ბაირუსი, – გაიფიქრა ჰენრიმ, – აი, რას გულისხმობს. მას ბაირუსი ჰქვია. ჯოუნსიმ იცის ეს.

ჰენრიმ არაფერი უპასუხა და ჯარისკაცი, თითქოს კამათში გაემარჯვოს, კმაყოფილი მოსცილდა იქაურობას. ცნობისმოყვარეობით შეპყრობილმა ჰენრიმ ყურადღება მოიკრიბა და თოფი დაინახა – ჯოუნსის „გარანდი“. მეც მაქვს იარაღი და როგორც კი ზურგს შემაქცევ, მაშინვე მოგკლავ, შე ვირო, – გაივლო გულში.

ჯარისკაცი მოულოდნელად შეხტა, შემოტრიალდა და ისევ ღობისკენ წამოვიდა. მხიარული თავხედობა პირქუში ეჭვით ჩაენაცვლებინა.

– რა თქვი, ჭკუისკოლოფო? რამე მითხარი?

– მხოლოდ იმის კითხვა მინდოდა, იმ გოგოსგან თუ გერგო რამე, ფრედიმ რომ იხმარა. შენც გიწილადა შესასხმელად?

ჯარისკაცმა გაოცებისგან თვალები დაჭყიტა და გამოთაყვანდა. შემდეგ კი განრისხდა და ავტომატი შემართა. მისი სამიზნე ჰენრი ილიმოდა. ქურთუკი შეიხსნა და მკერდი ლულას მიუშვია.

– მიდი, – თქვა მან სიცილით, – მიდი, რემბო, გააკეთე შენი გასაკეთებელი.

ფრენკის ძმას წუთის განმავლობაში მიზანში ჰყავდა ამოღებული. შემდეგ ჰენრიმ იგრძნო, რომ კაცი დაცხრა. ჰენრიმ ბეწვის ხიდზე გაიარა – ხედავდა, რომ ჯარისკაცი უკვე სარწმუნო ვერსიას თხზავდა, მკვლელობის მიზეზთან დაკავშირებით, მაგრამ ძალზე დააყოვნა და წითელ მხეცს გონებამ აჯობა. ყველაფერი მეორდებოდა. რიჩი

გრენადო არასდროს მოკვდებოდა. იგი ყოველ მათგანში იჯდა. ყველანი ამ სამყაროს დრაკონის კბილები იყვნენ.

– ხვალ, – მიუგდო ჯარისკაცმა, – შენთვის ხვალ მოვიცლი, ჭკუ-ისკოლოფო.

ამჯერად ჰენრის აღარაფერი უთქვამს – წითელი მხეცის გაღიზიანება არ ღირდა, თუმცა ღმერთი ხომ ხედავდა, რომ ეს არც ისე ძნელი იყო. მან რაღაც მაინც შეიტყო... უფრო სწორად, საკუთარ ეჭვებში დარწმუნდა. ჯარისკაცმა გაიგონა მისი აზრები, მაგრამ არცთუ მკაფიოდ, წინააღმდეგ შემთხვევაში, გაცილებით სწრაფად შემობრუნდებოდა. გარდა ამისა, მან არ ჰკითხა ჰენრის, თუ საიდან იცოდა მისი ძმის, ფრენკის შესახებ. მაშასადამე, ჯარისკაცმაც იცოდა ის, რაც ჰენრიმ: ყველანი ტელეპათიით იყვნენ დაინფიცირებულები. მთელმა საძმომ აიკიდა მომაბეზრებელი ნელა მოქმედი ვირუსი.

– ოღონდ მე უფრო მძიმე ფორმა მაქვს, – ჩაიბურტყუნა მან და ქურთუკი შეიკრა. ასეთივე ჰქონდათ პიტს, ბივერსა და ჯოუნსის. პიტი და ბივერი დაიხოცნენ, ჯოუნსი კი... ჯოუნსი...

– ჯოუნსი ყველაზე უბედური აღმოჩნდა, – თქვა მან ხმამაღლა. სად არის ახლა?

სამხრეთი... ჯოუნსი უკან, სამხრეთისკენ გაბრუნდა. გაირღვა კარანტინის ზონა, რომელსაც ასე იცავდნენ ის ბიჭები. მაგრამ ისინი თითქმის არ შეწუხებულან. წინასწარ იცოდნენ, რომ ასეთი რამ მოხდებოდა.

და მიიჩნიეს, რომ ერთი-ორი გაქცეული საერთო სურათს ვერ შეცვლიდა.

ჰენრის ეჭვი ეპარებოდა მათ სიმართლეში.

## 6

ოუენს ხელში ყავის ჭიქა ეჭირა და ელოდებოდა, როდის გაიყვანდნენ სანიტრები დაჭრილს. საბედნიეროდ, მორფის ზემოქმედებით,

მერლოუზის მოთქმა ბურტყუნმა და ჩუმმა კვენესამ შეცვალა. პერლი სანიტრებთან ერთად წავიდა, ოუენი კი კურცის პირისპირ დარჩა.

კურცი სარწეველაში იჯდა და ოუენ ანდერჰილს დამცინავი ცნობისმოყვარეობით შესცქეროდა. შეშლილის სახე სადღაც გაქრა, ჰელოუინის ნილაბივით გაუჩინარდა.

– ციფრებზე ვფიქრობ, – თქვა კურცმა, – რა რიცხვია?

– ჩვიდმეტი, – მიუგო ოუენმა, – თქვენ მას წითლად ხედავთ – ისე, როგორც სახანძრო მანქანაზე წერია.

კმაყოფილმა კურცმა თავი დაუქნია.

– ახლა თქვენ სცადეთ ჩემთვის შეტყობინების გადმოცემა.

ოუენმა სიჩქარის შემზღულდავი ნიშანი წარმოიდგინა: 60 მ/სთ.

– ექვსი, – თქვა კურცმა ცოტაოდენი ფიქრის შემდეგ, – შავი თეთრზე.

– თითქმის მოარტყით, ბოს.

კურცმა ყავა მოსვა ჭიქიდან, რომელსაც ეწერა „მე მიყვარს პაპა“. ოუენმა სიამოვნებით მიჰბაძა. ბინძური ღამე იყო, ბინძური სამუშაო და ფრედის ყავა ეგემრიელა კიდეც.

კურცმა ხელი კომბინეზონის ჯიბეში ჩაიყო და იქიდან დიდი თავსაფარი ამოიღო, ყოველი მხრიდან შეათვალიერა, გაჭირვებით ჩაიმუხლა (ყველამ იცოდა, რომ ამ ხანდაზმულ კაცს ართრიტი აწუხებდა) და მერლოუზის დაღვრილი სისხლის წმენდას შეუდგა. ოუენი, რომელიც ფიქრობდა, რომ ამქვეყნად ველარაფერი გააკვირვებდა, სახტად დარჩა.

– სერ... – ოჰ, ამის დედაც! .. – ბოს...

– მოკეტეთ! – თავაუღებლივ მიუგდო კურცმა და გამოცდილი დამლაგებლის გულმოდგინებით განაგრძო ლაქების წმენდა, – მამაჩემი ყოველთვის მეუბნებოდა, ყველამ საკუთარ ნაგავს უნდა მიხედოსო. ამას რომ დაეჩვევი, უნებურად ყოველთვის გაჩერდები და დაფიქრდები, სანამ რამეს მოიმოქმედებ. სხვათა შორის, რა ერქვა მამაჩემს, ყმაწვილო?

ოუენმა ყურადღება მოიკრიბა და მხოლოდ ნაწყვეტი მოიხელთა, თითქოს შემთხვევით, ქარისგან აფრიალებული კაბის ქვეშ შეეხედოს.

– პოლი?

– სინამდვილეში – პატრიკი... მაგრამ საკმაოდ ახლოს იყავით. ანდერსონს მიაჩნია, რომ ეს ტალღაა და ენერგიას გასცემს. ტელეპათიური ტალღა. საკმაოდ ლოგიკური კონცეფციაა, არა, ოუენ?

– დიახ.

დასუფთავებით გართულმა კურცმა თავი ისე დაუქნია, მისკენ არც გაუხედავს.

– გაცილებით ლოგიკურია თეორიულად, ვიდრე პრაქტიკულად, მეთანხმებით?

ოუენს გაეცინა. მოხუცს ჯერაც არ დაეკარგა სხვების გაოცების უნარი. „ყველა კარტს არასდროს ხსნის“, – იტყვიან ხოლმე კურცისნაირ ადამიანზე. ეს კიდევ არაფერი. ოუენის აზრით, კურცს სახელოში ყოველთვის ჰქონდა გადამალული რამდენიმე ზედმეტი ტუზი. აგრეთვე ორიანიც. ყველას კარგად მოეხსენება, რომ ორიანი საშიში, ვერაგული კარტია.

– დაჯექით, ოუენ. ყავა ნორმალური ადამიანივით მიირთვით. მე ყურადღებას ნუ მომაქცევთ. ეს საქმე უნდა დავამთავრო.

ოუენი სკამზე მოკალათდა და ყავა დალია. ხუთი წუთის შემდეგ კურცი მიძიმედ წამოდგა, თავსაფარი ზიზლით აიღო, სამზარეულოში გაიტანა, ნაგვის ურნაში ჩააგდო და კვლავ სარწეველას დაუბრუნდა. შემდეგ ყავა მოსვა, დაიღრიჯა და ჭიქა გადადგა.

– გაცივდა.

ოუენი წამოდგა.

– ახლავე ახალს მოვიტან...

– არა. დაჯექით. სალაპარაკო გვაქვს.

ოუენი დაჯდა.

– ჩვენ ცოტა წავკამათდით იქ, ხომალდთან, ასეა, არა?

– ასე არ ვიტყვოდი...

– ვიცი, რომ არ იტყოდით, მაგრამ ორივენი ვხვდებით, რაც მოხდა. რა არ ხდება ექსტრემალურ ვითარებაში. ახლა ყველაფერი უნდა დავივიწყოთ. მოგვიწევს, ვინაიდან მე მეთაური ვარ, თქვენ – ჩემი მოადგილე, საქმე კი ბოლომდე უნდა მივიყვანოთ. შევძლებთ ერთად მუშაობას მიზნის მისაღწევად?

– დიახ, სერ, – ისევ, ამის დედაც! .. – ანუ ბოს.

კურცმა ცივად გაუღიმა.

– სამწუხაროდ, საკუთარ თავზე კონტროლი დავკარგე, – როგორი მომხიბლავი, გულწრფელი, გულლია და პატიოსანი გახდა. ოუენს წლების განმავლობაში ასულელებდა. მაგრამ ეს აღარ გამოუვა, – ჩვეულებრივ, ვაპირებდი სიტყვით გამოსვლას – როგორც „პატონის“ ორი ნაწილი, ერთი ნაწილია „რასპუტინი“, დაამატებ ცოტაოდენ წყალს, მოურევ და მიირთმევ, – და უცებ... ბახ! თვითონაც არ ვიცი, რა დამემართა. ალბათ იფიქრეთ, გააფრინაო, არა?

ფრთხილად, ფრთხილად. ამ ოთახში ტელეპათია, ნამდვილი ტელეპათია. ოუენმა არაფერი იცოდა იმის შესახებ, თუ რამდენად ღრმად შეეძლო კურცს მის აზრებში შეღწევა.

– დიახ, სერ. ცოტათი, სერ.

კურცმა თავი საქმიანად დააქნია.

– დიახ. ცოტათი. ძალზე ზუსტი განსაზღვრებაა. დიდი ხანია, ასეთი ვარ – ჩემნაირი ხალხი აუცილებელია, თუმცა იშვიათობაა და ძნელად მოსაძებნი. ცოტათი გიჟი უნდა იყო, მსგავსი დავალება სრულად და ღირსეულად რომ შეასრულო. ეს ბეწვის ხიდია, სახელგანთქმული ბეწვის ხიდი, როგორც კაბინეტებში გამოკეტილ ფსიქოლოგებს უყვართ თქმა. არადა, ასეთი გრანდიოზული წმენდა ისტორიას არ ახსოვს... თუ, რა თქმა უნდა, ჰერაკლესა და ავგეას თავლას<sup>157</sup> მითად მივიჩნევთ. მე თანაგრძნობა კი არა, გაგება მჭირდება. თუ

---

<sup>157</sup> ბერძნული მითოლოგიის მიხედვით, ღვთაებრივი გმირის, ჰერაკლეს საგმირო საქმეებიდან ერთ-ერთია მეფე ავგეას თავლის გაწმენდა.

ერთმანეთს გაგუგებთ, ჩვენს კარიერაში ურთულეს სამუშაოს წარმატებით დავძლევთ. თუ არადა... – კურცმა მხრები აიჩეჩა, – თუ არადა, ამის გაკეთება უთქვენოდ მომიწევს. აბა, რას იტყვით, ჩემთან ხართ?

ოუენს ამაში ეჭვი ეპარებოდა, მაგრამ იცოდა, რა პასუხს ელოდა კურცი მისგან და თავი დაუქნია. სადღაც წაეკითხა იმ ჩიტის შესახებ, რომელიც ნიანგის ხახაში ცხოვრობდა, ამ უკანასკნელის უტყვი თანხმობით. ახლა საკუთარ თავს იმ ჩიტთან აიგივებდა. კურცი არწმუნებდა, რომ აპატია წინანდელი საქციელი რადიოსთან დაკავშირებით. ყველაფერს სტრესულ სიტუაციას აბრალებდა. თითქოს, ოუენმა ეს გაცხარებულ გულზე გააკეთა, კურცივით, რომელმაც მერლოუზი დაასახიჩრა. გაცხარებულ გულზე. თავი ველარ შეიკავა. თითქოს. მაშ, ბოსნიაში რაღა მოხდა ექვსი წლის წინ? მაგრამ ეს ახლა მნიშვნელოვანი აღარ იყო. შესაძლოა, კურცი არ ცრუობდა. იქნებ, ნიანგი დაღალა ჩიტის გულის გამაწვრილებელმა ფუსფუსმა მის კბილებში და პირის დასახურად ემზადებოდა? ოუენი დიდხანს იჩიჩქნებოდა კურცის ტვინში, მაგრამ სიმართლეს ვერ მიაგნო. მით უმეტეს განსაკუთრებული სიფრთხილე მართებდა. სიფრთხილე და ყოველ წამს ასაფრენად მზადყოფნა.

კურცი კვლავ კომბინებონში ჩაძვრა და შელახულკორპუსიანი ჯიბის საათი ამოიღო.

– ბაბუაჩემისაა, – თქვა მან, – ჯერაც ახალივით მუშაობს. ვინაიდან მექანიკურია. არავითარი ელექტრონიკა. მაჯის საათი კი გამიჩერდა.

– მეც.

კურცმა ღიმილის მაგვარი გამობატა.

– თუ დროს მოიხელთებთ, პერლმუტერს შეუარეთ, ცხადია, თუ მისი ატანა შეგიძლიათ. უამრავი მოვალეობა და საქმე აქვს, მაგრამ მაინც მოახერხა და სამასამდე მექანიკური საათი სწორედ თოვის დაწყებისა და ფრენის შეწყვეტის წინ მოიტანა პერლი საუკეთესო

შემსრულებელია. მხოლოდ ისაა საწყენი, რომ თავი მუდამ გადასადებ მოედანზე ჰგონია.

– შესაძლოა, დღეს პირველი ნაბიჯები გადადგა საჭირო მიმართულებით, ბოს.

– შესაძლოა, ასეც იყოს.

კურცი ჭვრეტდა. ანდერჰილი ელოდა.

– ეჰ, მეგობარო, ჯობდა, ვისკი დაგველია. დღეს, შეიძლება ითქვას, მომაკვდავის საწოლთან ირლანდიური სიფხიზლე არ აგვცდებდა.

– ნუთუ?

– დიახ. ჩემი საყვარელი პუუკა საცაა, სულს განუტევებს.

ოუენმა წარბები აზიდა.

– დიახ. საცაა, უჩინმაჩინის მოსასხამი შემოეცლება და ერთ ჩვეულებრივ ჯაგლაგად წარმოდგება მდაბიო ხალხის გასახარად, განსაკუთრებით, პოლიტიკოსების სასიხარულოდ.

– რალაც ვერ გავიგე.

კურცმა კვლავ დახედა წლებისგან გამუქებულ, შესაძლოა, ლომბარდიდან მოპარულ, ან სულაც... მიცვალებულისთვის ამოცლილ საათს. ანდერჰილს ეჭვი არ ეპარებოდა, რომ კურცი ყველაფერზე იყო წამსვლელი.

– ახლა შვიდი საათია. დაახლოებით ორმოცი საათის შემდეგ პრეზიდენტი გაერთიანებული ერების ორგანიზაციის გენერალურ ასამბლეაზე სიტყვით გამოსვლას აპირებს. ტელევიზორებთან და რადიომიმღებებთან ურიცხვი ხალხი მოიყრის თავს. ეს კაცობრიობის ისტორიაში უდიდესი მოვლენა და თვალეში ნაცრის შეყრა იქნება მას შემდეგ, რაც ღმერთმა, ყოვლისშემძლე უფალმა, კოსმოსი შექმნა და პლანეტები ორბიტებზე განალაგა, რათა დაუსრულებლად ებრუნათ მისი თითის გარშემო.

– რა არის თვალეში ნაცრის შეყრა?

– ლამაზ ზღაპარში, ოუენ, ისევე, როგორც საუკეთესო ტყუილში,



სიმართლის მარცვალ დევს. წარმოიდგინე, ქიშიში გამხმარ ფუნ-  
თუშაში. პრეზიდენტი მონუსხულ სამყაროს, სუნთქვაშეკრულ  
ხალხს, რომელიც მის ყოველ სიტყვას ღრუბელივით ისრუტავს, ეტ-  
ყვის, რომ სხვა გალაქტიკიდან მოფრენილ უცხოტომელთა ხომალ-  
დმა, მადლობა უფალს, კატასტროფა განიცადა და მენის შტატის  
ჩრდილოეთ ნაწილში ჩამოვარდა ამა წლის ექვს თუ შვიდ ნოემბერს.  
ეს სიმართლეა. ის იტყვის, რომ ჩვენ არცთუ ძლიერ გავოცდით, რად-  
გან, გაეროს უსაფრთხოების საბჭოს წევრი სხვა ქვეყნების მსგავ-  
სად, უკვე ათი წელია, ვიცით, რომ უცხოპლანეტელები დედამიწას  
სტუმრობენ. ისიც სიმართლეა, რომ სიცარიელიდან ჩვენი მეგობრე-  
ბის ვიზიტები ოცდაათიანი წლების მიწურულიდან დაიწყო და ამის  
შესახებ ამერიკაში ადამიანთა მხოლოდ მცირე ჯგუფმა უწყის. ისიც  
ვიცით, რომ 1974-ში რუსულმა გამანადგურებლებმა რუხი კაცუნე-  
ბის ხომალდი ციმბირის თავზე ჩამოაგდეს... თუმცა, რუსებს დღემდე  
ჰგონიათ, რომ ეს ამბავი დაგვიმალეს. ის ხომალდი, სავარაუდოდ,  
უპილოტო იყო, ერთგვარი მოსინჯვა გახლდათ. იქიდან მოყოლებუ-  
ლი, ისინი ძალიან მომრავლდნენ. რუხებმა პირველი კონტაქტი დიდი  
სიფრთხილით განახორციელეს, რაც საშუალებას გვაძლევს, დავას-  
კვნათ, რომ ჩვენ მათი დაშინება შევძელით.

ოუენი არაჯანსაღი აღტაცებით უსმენდა და იმედოვნებდა, რომ  
არაფერი ეტყობოდა არც სახეზე და არც ზედაპირულ ფიქრებში, სა-  
დაც კურცს შელწევა შეეძლო.

ამჯერად კურცმა ჯიბიდან „მალბოროს“ შელახული კოლოფი  
ამოაძვრინა და ოუენს გაუწოდა. მან თავი გააქნია, მაგრამ მაინც აი-  
ლო დარჩენილი ოთხი ღერიდან ერთი. კურცმაც იგივე გააკეთა და  
გააბოლეს.

– სიმართლისა და სიცრუის ნაზავი ვახსენე, – განაგრძო კურცმა,  
ღრმა ნაფაზი დაარტყა და პირიდან კვამლი გამოუშვა, – შესაძლოა,  
ეს არ იყოს საუკეთესო საშუალება ვითარების წარმოსაჩენად. მო-  
დით, თვალეში ნაცრის შეყრას მივდიოთ, კარგი?

ოუენმა არაფერი უპასუხა. ბოლო დროს იშვიათად ეწეოდა და პირველმა ნაფაზმა თავბრუ დაასხა. სამაგიეროდ, შესანიშნავი გემო ჰქონდა.

– პრეზიდენტი იტყვის, რომ აშშ-ის მთავრობამ კატასტროფის ადგილას კარანტინი სამი მიზეზით გამოაცხადა. პირველი პრაქტიკული მიზეზია: ჯეფერსონტრექტი შორეული და მცირედ დასახლებული ტერიტორიაა, იქ საგუშაგო პოსტების განთავსება ადვილად მოხერხდა. ეს რომ ბრუკლინში ან ლონგაილენდში მომხდარიყო, უდიდეს სიძნელეებს წავაწყდებოდით. მეორე მიზეზი: ჩვენთვის უცნობია უცხოტომელთა განზრახვა. მესამე და ყველაზე დამაჯერებელი მიზეზი: უცხოპლანეტელებს მოაქვთ ინფექცია, რომელსაც ოპერაციის მონაწილეები „რიპლის სოკოს“ ვუწოდებთ. ჩამოსულები გვარწმუნებენ, რომ მსგავსი არაფერი სჭირთ, მაგრამ სინამდვილეში, მომაკვდინებელი ვირუსი გადააქვთ. შეძრწუნებულ მსოფლიოს პრეზიდენტი იმასაც შეატყობინებს, რომ შესაძლოა, სოკო გონების მაკონტროლებელიც აღმოჩნდეს, რუხი კაცუნები კი მხოლოდ მასაზრდოებელი გარემო. აჩვენებს ვიდეოჩანაწერსაც, რომელშიც რუხი არსებები აფეთქებისას სპორებს აფრქვევენ. მეტი ეფექტისთვის ფირი ოდნავ შესწორებული იქნება, მაგრამ გაუყალბებელი... ძირითადად.

ცრუობ, – გაიფიქრა ოუენმა, – თავიდან ბოლომდე ყალბი კადრებია, როგორც უცხოტომელთა აუტოფსიის<sup>158</sup> შედეგად მიღებული ნაგავი. მაგრამ რატომ ცრუობ? იმიტომ, რომ გეხერხება. ეს ხომ გაცილებით მარტივია: სიმართლეზე მეტად ტყუილის თქმა გეადვილება.

– დიახ, ვცრუობ, – თქვა კურცმა, რომელსაც არაფერი გამორჩენია, თვალეხი დააკვესა და სიგარეტს ყურადღებით მიაჩერდა, – მაგრამ ფაქტები ზუსტი და გადამოწმებულია. ზოგიერთი მართლაც ფეთქდება და უამრავ წითელ ბაბუაწვერად იფანტება. მას რიპლი ჰქვია. როგორც კი შეისუნთქავ, გარკვეული დროის შემდეგ – ერთი

<sup>158</sup> პათოლოგანატომიური ან სასამართლო-სამედიცინო პროცედურა.

საათიდან ორ დღემდე – შენი ტვინი და ფილტვები რიპლის სალათად იქცევა. მომწამვლელი თუთუბოს მოსიარულე ბუჩქს დაემსგავსები. შემდეგ კი მოკვდები. ჩვენს დღევანდელ პატარა თავგადასავლზე სიტყვაც არ ითქმება. პრეზიდენტის ვერსიით, ჩამოვარდნის შედეგად ძალზე დაზიანებული ხომალდი ან მისსავე ეკიპაჟმა ააფეთქა, ან თვითონ აფეთქდა. ყველა რუხი კაცუნა დაიღუპა. თავდაპირველად რიპლი პატარა ფართობზე გავრცელდა, ახლა კი თანდათან იღუპება, როგორც ჩანს, სიცივის გამო. ამას, სხვათა შორის, რუსებიც ადასტურებენ. გარდა ამისა, ცხოველების – ინფექციის გადამტანების – განადგურებაც მოგვიხდა.

– ჯეფერსონტრექტის მოსახლეობა?

– აშშ-ის პრეზიდენტი აპირებს გამოაცხადოს, რომ დაახლოებით სამას ადამიანს, რომელთაგანაც სამოცდათხუთმეტი ადგილობრივი მოსახლეა, დანარჩენები კი მონადირეები, „რიპლის სოკოზე“ ამოწმებენ. ის იმასაც იტყვის, რომ თუმცა ზოგიერთი დაინფიცირებულია, მისი დამარცხება ადვილად შეიძლება „ცეფტინისა“ და „აუგმენტინის“ მსგავსი ანტიბიოტიკებით.

– ახლა კი სიტყვა სპონსორს გადაეცემა, – თქვა ოუენმა.

კურცმა კმაყოფილებით გაიღიმა.

– გარკვეული ხნის შემდეგ გამოვაცხადებთ, რომ რიპლი ანტიბიოტიკების მიმართ მოსალოდნელზე უფრო გამძლე აღმოჩნდა და რამდენიმე პაციენტის სიცოცხლე შეიწირა. გაზეთები მათ გვარებს გამოაქვეყნებენ, ვინც მართლა დაიღუპა, ან რიპლისგან, ან იმ დაწყველილი იმპლანტებისგან. თუ იცით, ხალხი მათ რას უწოდებს?

– დიახ. ტრაწიან სინდიოფალებს. პრეზიდენტი მათაც ახსენებს?

– არავითარ შემთხვევაში. ხელმძღვანელობას მიაჩნია, რომ „ტრაწიანი სინდიოფალები“ უბრალო მოქალაქეებს გააღიზიანებს. ისევე, როგორც ინფორმაცია პრობლემის გადაჭრის ჩვენეული მეთოდის შესახებ აქ, გოსლინის მაღაზიაში, ამ უძველეს სილამაზის სალონში.

– საბოლოო გადაჭრის შესახებ, როგორც თქვენ იტყობით, – და-  
აზუსტა ოუენმა. სიგარეტი ფილტრამდე დაიყვანა და ნამწვი ცარიე-  
ლი ჭიქის კიდეს მიასრისა.

კურცი თვალის დაუნამხამებლად მიაჩერდა ოუენს.

– დიახ, ასეც შეიძლება თქმა. ჩვენ დაახლოებით სამას ორმოც-  
დაათი ადამიანის, ძირითადად, მამაკაცების ლიკვიდაცია უნდა მო-  
ვანდინოთ, მაგრამ ვერც იმას ავუვლი გვერდს, რომ წმენდაში ქალე-  
ბისა და ბავშვების გარკვეული რაოდენობა მოხვდება. ეს სამწუხა-  
რო, მაგრამ ერთადერთი გზაა, რათა მსოფლიო არა მარტო პანდემი-  
ას, დაპყრობასაც რომ გადაურჩეს. დამეთანხმებით, ეს სამწუხარო  
აუცილებლობაა.

დარწმუნებული ვარ, ჰიტლერს ამგვარი „თვალეში ნაცრის შეყ-  
რა“ მოეწონებოდა, – გაიფიქრა ოუენმა. მართალია, ვერ მოახერხა ამ  
სახიფათო აზრის შეჩერება, მაგრამ, როგორც შეეძლო, სასწრაფოდ  
შენიღბა ათასგვარი სისულელით. თუმცა არ იცოდა, მოასწრო, თუ  
არა მისი წაკითხვა კურცმა – ძალზე ეშმაკი იყო და იქნებ, ეს არც კი  
გაემხილა.

– დაკავებული რამდენია? – დაინტერესდა კურცი.

– სამოცდაათამდე. ორჯერ მეტი კინეოდან მოჰყავთ. თუ ამინდი  
არ გაუარესდა, ცხრისთვის აქ იქნებიან.

ამინდის გაუარესება შეუალამის შემდეგ იყო ნავარაუდები.

– აჰა, – თქვა კურცმა და თავი დააქნია, – ამას დაუმატეთ ორ-  
მოცდაათი, რომლებსაც ჩრდილოეთიდან ჩამოიყვანენ, სამოცდაა-  
თამდე ან მეტი – სენკევიდან და სამხრეთის სოფლებიდან, და... ჩვენი  
ბიჭები. არც ისინი დაგავიწყდეთ. ნიღბებმა, შესაძლოა, უშველა,  
მაგრამ სამედიცინო ანგარიშებში რიპლის ოთხი შემთხვევაა უკვე  
აღწერილი. ამის შესახებ თვითონ, ცხადია, არაფერი იციან.

– ვითომ?

– ნება მომეცით, უფრო ზუსტად ჩამოვაყალიბო. მათი ქცევის მი-  
ხედვით, საფუძველი არ მაქვს დავასკვნა, რომ ეს იციან. გასაგებია?

ოუენმა მხრები აიჩეჩა.

– მაშასადამე, – შეაჯამა კურცმა, – ოფიციალური მოხსენების მიხედვით, დაკავებულები გადაიგზავნებიან ზესაიდუმლო, 51-ე ზონის მსგავს, სამედიცინო დაწესებულებაში, სადაც მათ გამოკვლევას განაგრძობენ, აუცილებლობის შემთხვევაში კი ხანგრძლივად უმკურნალებენ. თუ ყველაფერი გეგმის მიხედვით წარიმართა, განცხადება აღარ გაკეთდება. მაგრამ მომდევნო ორი წლის განმავლობაში საინფორმაციო წყაროებში გაჟონავს ხოლმე ინფორმაცია: „შემოჭრილი ვირუსის შეჩერება, მიუხედავად ექიმების არნახული ძალისხმევისა“... „სიგიჟე... ენით აუწერელი საზარელი სიმახინჯის მაგალითები... ბოლოს კი სიკვდილი, როგორც უდიდესი წყალობა“. საზოგადოება კი, აღშფოთების ნაცვლად, შვებით ამოისუნთქებს.

– სინამდვილეში კი...?

უნდოდა, კურცს ეს ეთქვა, მაგრამ კარგად არ იცნობდა მას. მოსამენი აპარატურა იქ არ იდგა (იმას თუ არ ჩავთვლით, რაც, სავარაუდოდ, კურცის ყურებს შორის იყო მოთავსებული), არც ბოსს უღალატა ჩვეულმა სიფრთხილემ. ხელი ასწია, ცერითა და საჩვენებელი თითით პისტოლეტი გააკეთა და „სასხლეტს“ სამჯერ ისე გამოჰკრა, რომ ოუენისთვის თვალი არ მოუცილებია.

ნიანგის თვალები, – გაიფიქრა ოუენმა.

– ყველას? – იკითხა ხმამაღლა, – განურჩევლად იმისა, აქვს თუ არა „რიპლი“? ჩვენ რა ბედი გველის? სრულიად ჯანმრთელ ჯარისკაცებს?

– ვინც კარგადაა, ბაზაზე დაბრუნდება, – თქვა კურცმა, – ისინი კი, ვინც უპატივებელი გაუფრთხილებლობა გამოიჩინა... ერთ-ერთმა... აქ ოთხიოდე წლის პატარა გოგონაა, ნამდვილი ემმაკის ფენია. ისეთია, კაცი იფიქრებს, ახლა აცეკვდება და ზედ სიმღერასაც მოაყოლებსო: „იყო ერთი ხომალდი, სახელად ლოლიპოპი“.

კურცს საკუთარი თავი, როგორც ჩანს, გონებამახვილ ადამიანად მიაჩნდა, და იქნებ ეს, ნაწილობრივ, ასეც იყო, ოუენი კი შეძრწუნდა.

ოთხი წლის გოგონა, – გაიფიქრა მან, – ოთხიოდე წლის.

– ძალიან საყვარელია და თამამი, – დაამატა კურცმა, – რიპლი მხოლოდ ცალ მაჯაზე ემჩნევა, შუბლზე, თმის ძირებსა და თვალის კუთხეში. კლასიკური შემთხვევაა. სხვათა შორის, როდესაც ჯარისკაცმა კანფეტი მისცა, თითქოს დამშეული და ჩამოძონძილი კოსოვოელი ბავშვი ყოფილიყო, აკოცა. გულის ამაჩუყებელი სანახაობა იყო, სურათს გადაუღებდა კაცი. ახლა იმ კაცს ლოყაზე გოგონას ტუჩების წარუშლელი კვალი ემჩნევა, ოღონდ ეს პომადა არ არის, – კურცი შეიჭმუნა, – დილით, პარსვისას, ლოყა ოდნავ გაეკაწრა და ეს საკმარისი აღმოჩნდა. რიპლი სხვებსაც მსგავსი გაუფრთხილებლობით გადაედოთ. წესები არ იცვლება, ოუენ. დაუდევრობა დამლუპველია. დროებით, შესაძლოა, ბედმა გაგიღიმოს, მაგრამ ბოლოს მაინც კისერს მოიტეხ. დაუდევრობა დამლუპველია. კმაყოფილებით აღვნიშნავ, რომ ჩვენი ბიჭების უმრავლესობა მათ სათოფეზეც არ ეკარება. სიცოცხლის ბოლომდე ექიმების მეთვალყურეობის ქვეშ მოგვიწევს ყოფნა, მოულოდნელ შემოწმებებზე რომ აღარაფერი ვთქვათ, მაგრამ ისიც სათქმელია, რომ ისინი აპირებენ ძალზე ადრეულ სტადიაზე აღმოაჩინონ თქვენი უკანა ტანის კიბო.

– ერთი შეხედვით ჯანმრთელი სამოქალაქო პირები? მათზე რას იტყვით?

კურცი წინ მომხიბლავი და საოცრად დამაჯერებელი სახით გადმოიხარა. ყველა, ვისაც ერთხელ მაინც ღირსებია კურცის ნახვა მისი საყვარელი ნიღბის გარეშე (“ორი ნაწილისგან შემდგარი „პატონი“, ერთი – „რასპუტინი“, ვამატებთ წყალს, ვურევთ და მზადაა”), კმაყოფილებით უნდა აღვსილიყო და თავი რჩეულად ეგრძნო. ადრე ოუენზე ეს შეუმცდარად მოქმედებდა. ოღონდ ახლა აღარ. ნიღაბი „რასპუტინი“ კი არა, სწორედ ეს იყო.

მაგრამ ახლაც კი ვერ იტყოდა, რომ თავზარს სცემდა.

– ოუენ, ოუენ, ოუენ! თავი აამუშავეთ – ღმერთმა საკმარისი ჭკუა გიბოძათ. ჩვენ შეგვიძლია, ისე ჩავაცხროთ ეს აურზაური, რომ

არც ეჭვი აღფუძრათ ვინმეს და არც საყოველთაო პანიკა გამოვიწვიოთ. ისედაც ყველაფერი საკმარისად ამძაღდება, განსაკუთრებით მას შემდეგ, რაც ხმების მინიმალური უპირატესობით არჩეული ჩვენნი პრეზიდენტი პუუკა-ცხენს ბოლოს მოუღებს. სამას სამოქალაქო პირს ამას ვერ გაფუკეთებთ. იქნებ, მართლა გავგზავნოთ ისინი ნიუმექსიკოში და გადასახადის გადამხდელთა ფულით, რომელიმე სოფელში ორმოცდაათი-სამოცდაათი წლით მოვათავსოთ? რა მოხდება, იქიდან ერთი-ორი კაცი რომ გაიქცეს? ან – ვფიქრობ, სწორედ ამის ეშინიათ ზევით მოკალათებულ ჭკვიან ბიჭებს – დროთა განმავლობაში, რიპლიმ მუტაცია რომ განიცადოს? იმის ნაცვლად, რომ მშვიდად მოკვდეს, იგი ახალ ფორმას მიიღებს, უფრო გამძლე გახდება. გაცილებით დიდი საფრთხის წინაშე აღმოვიჩნდებით, თუკი რიპლი გონიერია. ასეც რომ არ იყოს, ვაითუ რუხი კაცუნებისთვის მათ ერთგვარი შუქურის, საგზაო ნიშნის როლი შეასრულონ და ჩვენნი სამყაროსკენ მომავალი გზა მიუთითონ, – იფ-იფ, მოდით და მიერთვით, ძალიან გემრიელი ხალხია, თანაც ყველას გეყოფათო.

– იმის თქმა გსურთ, რომ ჯობს თავი დავიზღვიოთ, ვიდრე მერე ვინანოთ?

კურცი სავარძლის საზურგეზე გადაწვა და სახე გაუნათდა:

– დიახ! დიახ! როგორც იქნა, ძირისძირობამდე ჩასწვდით.

ჰო, – გაიფიქრა ოუენმა, – შესაძლოა, ძირამდე ჩავწვდით, მაგრამ მთავარი ეს არაა. ჩვენთვის ჩვენიანების ბედი სულერთი არაა. ზოგჯერ უღმობლად, სასტიკად ვიქცევით, მაგრამ თავისი ხელქვეითების ბედი კურცსაც კი აღელვებს. სამოქალაქო პირები კი... მხოლოდ და მხოლოდ სამოქალაქო პირები არიან. და თუ მათი დაწვა გახდება საჭირო, ამასაც მშვენივრად მოვახერხებთ.

– თუ კიდევ გეპარებათ ეჭვი, რომ ღმერთი არსებობს, რომელიც თავისი დროის ნაწილს მაინც ყველასთვის საყვარელ ჰომო საპიენსზე ზრუნვას უთმობს, გაიხსენეთ, როგორ წარმოუდგენლად გაგიმართლათ, – თქვა კურცმა, – სასიგნალო შუქი ცაში აღრე გამოჩნდა

და ისინი მაშინვე შეამჩნიეს. ერთ-ერთი შეტყობინება მაღაზიის მე-პატრონე რეჯინალდ გოსლინისგან მოვიდა. შემდეგ რუხი კაცუნები გვეწვივნენ. თანაც წელიწადის იმ ერთადერთ დროს, როდესაც ამ გადაკარგულში ადამიანები ჩამოდიან, და ორი მათგანი საკუთარი თვალით ხედავს, რომ ხომალდი მიწაზე ეცემა.

– გაგვიმართლა.

– ეს გამართლება კი არა, ღვთის წყალობაა. ხომალდი იმსხვრევა, მასში მყოფი არსებების შესახებ ვიგებთ, სიცივე მათაც კლავს და მათ მიერ მოტანილ გალაქტიკურ ქერტლსაც, – კურცი ითვლიდა და თან გრძელ თითებს კეცავდა, თეთრ წამწამებს ხშირ-ხშირად ახამ-ხამებდა, – მაგრამ ეს ყველაფერი არაა. მათმა დაწყევლილმა იმ-პლანტებმაც ვერ იმუშავეს – ნაცვლად იმისა, რომ ორგანიზმში მოხ-ვედრილებს მასპინძლებთან ერთად ჰარმონიულად ეცხოვრათ, კანი-ბალებად ქცეულნი მათ მუსრს ავლებენ.

– ცხოველების განადგურება წარმატებით დასრულდა: ასი ათა-სამდე არსება გავანადგურეთ და ახლა ქასლის ოლქის საზღვართან გრანდიოზული ბარბეკიუა მოწყობილი. ეს რომ გაზაფხულზე ან ზაფხულში მომხდარიყო, ზონის გარეთ რიპლის გადამტანი მწერე-ბისთვისაც უნდა მიგვეხედა. ახლა კი ნოემბერია და ეს არ გვჭირდე-ბა.

– შესაძლოა, რამდენიმე ცხოველმა მაინც გააღწია.

– ცხოველებმაც და ადამიანებმაც. მაგრამ რიპლი ნელა ვრცელ-დება. ამ მხრივ საშიში არაფერია, რადგან ვირუსის მატარებელთა დიდი უმრავლესობა დავაკავეთ. გარდა ამისა, ხომალდიც განადგურ-ებულა. ის, რაც ჩამოიტანეს, კი არ იწვის, იხრწნება. ჩვენ მათ მკა-ფიო შეტყობინება გაუზგზვენეთ: „მშვიდობით მოდი, უიარალოდ, აქ შემოპარვას ნულარ ეცდებით თქვენს სისაძაგლესთან ერთად, რადგან ჩვენ ამას აღარ მოვითმენთ“. არა მგონია, კიდეც გვესტუმ-რონ, ყოველ შემთხვევაში, უახლოეს მომავალში. ისინი ორმოცდაა-თი წლის განმავლობაში ნაბიჯ-ნაბიჯ მოიწევდნენ ჩვენკენ, სანამ არ



მოაღწიეს. დასანანია, რომ მეცნიერებისა და ექსპერტებისთვის მათი ხომალდის შენარჩუნება ვერ შეეძელით... თუმცა, სხვათა შორის, შესაძლოა, ისიც რიპლით ყოფილიყო დაინფიცირებული. იცით, ყველაზე მეტად რის გვეშინოდა? რუხ კაცუნებს ან თვითონ რიპლის „ტიფიანი მერის“<sup>159</sup> მსგავსი ადამიანი არ გამოეძებნათ, ანუ ის, ვინც სოკოს გაავრცელებდა, თვითონ კი არაფერი დაემართებოდა.

– დარწმუნებული ხართ, რომ ვერ შეძლეს?

– თითქმის. თუ... თუმცა ამისთვის კორდონები გვაქვს, – გაელიმა კურცს, – ილბლიანები გამოვდექით, ჯარისკაცო. ბედის რჩეულები. ყველაფერი იმაზე მეტყველებს, რომ „ტიფიანი მერი“ არ არსებობს, რომ რუხი კაცუნები დაილუპნენ და რიპლი ჯეფერსონტრექტზეა „თავმოყრილი“. თავად გადაწყვიტეთ, ეს ილბალია თუ ღვთის წყალობა.

კურცმა თავი დახარა და ცხვირის ძგიდე სურდოთი გატანჯული ადამიანივით მოისრისა. როდესაც თავი კვლავ ასწია, თვალეში ცრემლი უბრწყინავდა. ნიანგის ცრემლები, – გაიფიქრა ოუენმა, თუმცა ამაში ბოლომდე დარწმუნებული არ იყო. კურცის აზრებს ვერ სწვდებოდა – ტელეპათიის ტალღას ან იქამდე არ მიეღწია, ან კურცს მისი იზოლირების ხერხისთვის მიეგნო. მაგრამ როდესაც კურცი ისევ ალაპარაკდა, ოუენს ეჭვი თითქმის აღარ ეპარებოდა, რომ ნამდვილი კურცის, ადამიანის ხმა ესმოდა, და არა რომელიღაც ტიკ-ტოკ-კროკის.

– ეს ჩემი ბოლო ოპერაციაა, ოუენ. როგორც კი სამუშაოს დავასრულებთ, წასვლას ვაპირებ. ჩემი გათვლით, თუ მართლაც ისეთი ქარიშხალი ამოვარდება, როგორსაც ვარაუდობენ, ამ ადგილებში კი ამინდს ხუმრობა არ უყვარს, მაშინ აქ ოთხი დღის, დიდი-დიდი, ერთი კვირის საქმე დაგვრჩენია, მაგრამ ნამდვილი კომმარი ხვალ დილით გველოდება, ვფიქრობ, ბოლომდე გავუძლებ და ჩემს მოვალეობას

---

<sup>159</sup> მერი პალონი (1869-1938 წწ.) – პირველი ადამიანი აშშ-ში, რომელიც ჯანმრთელად ცნეს, თუმცა მუცლის ტიფის ვირუსს ატარებდა.

პირნათლად შევასრულე, მერე კი... უფლება მაქვს გადავდგე და სრული პენსია მოვიტხოვო. არჩევანს შევთავაზებ: ან გადამიხადონ, ან მომკლან. ასე მგონია, გადახდას ამჯობინებენ, რადგან ვიცი, სად არიან ჩამარხული ადამიანები – ეს გაკვეთილი ჯ. ედგარ გუგერისგან<sup>160</sup> ვისწავლე. ისიც უნდა ითქვას, რომ რატომღაც, საკუთარი ბედი თითქმის აღარ მალეღვებს. ამაზე უარეს ხათაბალაშიც გავბმულვარ – 1989 წელს ჰაიტიში ვიყავი. იქ ერთ საათში რვაასი კაცი მივაწვინეთ. ისინი დღემდე მესიზმრებიან. მაგრამ აქ... აქ სულ სხვაა. უარესი. გაცილებით უარესი. ვინაიდან ეს საცოდავი არარაობები – ფარდულშიც, ბაკშიც და მინდორშიც – ამერიკელები არიან. ბიჭები, რომლებიც „შევის“ ატარებენ, საყიდლებზე „KMart“-ში დადიან და „სასწრაფოს“ ერთ სერიასაც არ აცდენენ. ამერიკელების დახვრეტის, ამერიკელების გულგრილად მოკვლის გაფიქრებაზე ლამის მთელი შიგნეულობა ამომიტრიალდეს. ამას მხოლოდ სასტიკი აუცილებლობის გამო ვაკეთებ, რათა ერთხელ და სამუდამოდ გამოვრიცხო საფრთხე ჩვენი ქვეყნისთვის, ასევე – იმიტომ, რომ მათი უმრავლესობა მაინც მოკვდება და თანაც გაცილებით უარესი სიკვდილით. გესმით?

ოუენ ანდერჰილი დუმდა. ფიქრობდა, რომ ბოლომდე შეძლებდა გაქვავებული სახის შენარჩუნებას, მაგრამ თუ ალაპარაკდებოდა, კურცი მიხვდებოდა, რამდენად შეძრწუნებული იყო იგი. დიახ, ძრწოდა. მან იცოდა, საქმე რით დასრულდებოდა, მაგრამ ერთია ცოდნა და სულ სხვაა ამის მოსმენა...

ფიქრებში ის უკვე ხედავდა თოვლში ღობისკენ მიმავალ ჯარისკაცებს. ყურში მეგაფონების ღრიალი ჩაესმოდა, რომელიც დაკავებულიებს ბოსელში შესვლას მოუწოდებდა. მას არასდროს მიეღო მონაწილეობა მსგავს ოპერაციებში და არც ჰაიტიში ყოფილა, მაგრამ დაახლოებით წარმოედგინა, ეს როგორ მოხდებოდა. როგორ უნდა მომხდარიყო.

---

<sup>160</sup> აშშ-ის გამოძიების ფედერალური ბიუროს პირველი დირექტორი 1924 წლიდან სიცოცხლის ბოლომდე.

კურცი გაფაციცებულ მზერას არ აშორებდა.

– იმას არ ვიტყვი, რომ საბოლოოდ გაპატივით დღევანდელი საქციელი, რომ ყველაფერი წარსულს ჩაჰბარდა, მაგრამ თქვენ ჩემთან ვალში ხართ, მეგობარო. ტელეპათია არ არის საჭირო იმის გასაგებად, თუ როგორ მიიღეთ ჩემი ნათქვამი. დროსა და ენერგიას ტყუილუბრალოდ არ დავხარჯავ რჩევის მოსაცემად, დროულად დავაჟაკაცება და ღრუბლებიდან მიწაზე დაშვება გმართებთ-მეთქი, მხოლოდ ერთს გეტყვით: თქვენ მე მჭირდებით. ამჯერად სწორედ თქვენ უნდა დამეხმაროთ.

აცრემლებული თვალები. ძლივს შესამჩნევი თრთოლა ტუჩის კუთხეებში. რა ადვილი ყოფილა იმის დავიწყება, რომ სულ რაღაც ათი წუთის წინ კურცმა გულგრილად დაახალა ტყვია კაცს ფეხში.

ამ საქმეში რომ დავეხმარო, – გაიფიქრა ოუენმა, – მნიშვნელობა არ აქვს, მე თვითონ გამოვკრავ თითს სასხლეტს თუ არა, მაინც მკვლელად ვიქცევი და იმ ადამიანებივით შემაჩვენებენ, ებრაელებს გაზის კამერებში რომ ერეკებოდნენ.

– თერთმეტზე დავიწყებთ და თორმეტის ნახევრისთვის დავასრულებთ, – თქვა კურცმა, – ყველაზე გვიან – შუალამისთვის. და ყველაფერი უკან დარჩება.

– სიზმრების გარდა.

– დიახ. სიზმრების გარდა. დამეხმარებით, ოუენ?

ოუენმა თავი დაუქნია. ისედაც ღრმად შეტოპა და ეშმაკმა დალახვროს, თუ უკან დაიხევს. ერთადერთი, რის გაკეთებაც შეუძლია, ის არის, რომ გულმოწყალება გამოიჩინოს და – თუ მასობრივ ხოცვა-ჟლეტას გულმოწყალება შეიძლება ეწოდოს – სწრაფი სიკვდილი აჩუქოს.... მოგვიანებით ამგვარი, მომაკვდინებლად აბსურდული აზრი ოუენს შეაძრწუნებს, მაგრამ ახლა, როდესაც კურცი გვერდით, სულ ახლოსაა და თვალს არ აცილებს, სხვა გზა არ აქვს. მისი სიგიჟე, შესაძლოა, ნებისმიერ რიპლიზე გადამდები იყო.

– შესანიშნავია, – კურცმა შვებით ამოისუნთქა და მოდუნებული

სავარძელში გადაწვა. სული რომ მოითქვა, კვლავ სიგარეტის კოლოფი ამოიღო, შიგ ჩაიხედა და ოუენს გაუწოდა.

– ორი ცალია დარჩენილი. ხომ არ შემომიერთდებით?

– ახლა არა, ბოს, – თავი გააქნია ოუენმა.

– მაშ, წადით აქედან. თუ ასე აუცილებელია, მიდით ლაზარეთში და ძილის წამალი სთხოვეთ.

– არა მგონია, რომ დამჭირდეს, – თქვა ოუენმა.

სჭირდებოდა, როგორ არ სჭირდებოდა, მაგრამ ამას არ გააკეთებდა. უძილობა ერჩია.

– როგორც გინდათ. წადით.

კურცმა იგი კარამდე მიაცილა, შემდეგ კი მოულოდნელად დაუდასხა:

– ოუენ! – ანდერჰილი შემოტრიალდა, თან ქურთუკს იკრავდა. ესმოდა, როგორ ზუზუნებდა და ყოველ წუთს ძლიერდებოდა ქარი, დილას მოვარდნილ „ალბერტა კლიპერს“ კი არ ჰგავდა. – გმადლობთ, – თქვა კურცმა. მარცხენა თვალიდან ერთი მოზრდილი ძუნწი ცრემლი ლოყაზე ჩამოუგორდა, მაგრამ თითქოს ვერც შეამჩნია. იმწამს ოუენს კურცი უყვარდა და

ეცოდებოდა. ყველაფრის მიუხედავად. იმისდა მიუხედავად, რომ მისთვის დაფარული არაფერი იყო, – გმადლობთ, მეგობარო.

## 7

ჰენრი თოვლში იდგა. თავზე გახშირებული ფანტელები ეცემოდა. ქარისთვის ზურგი შეექცია და ანდერჰილის გამოჩენის მოლოდინში შიგადაშიგ „ვინებაგოსკენ“ იყურებოდა. მარტო დარჩენილიყო – უამინდობას ყველა ბოსელში გაჰქცეოდა, იქ გამათბობელი იდგა. მისი აზრით, სითბოში ჭორები გაცილებით სწრაფად ვრცელდებოდა. შიშველ სიმართლეს ისევ ჭორი და ვარაუდი სჯობდა.

ფეხით თოვლი მოჩიჩქნა, მიხვდა, რასაც აკეთებდა და მიიხედ-

მოიხედა. არავინ იყო: არც პატიმრები, არც გუშაგები. ძლიერი თოვის მიუხედავად, ბანაკი დღესავით გაეჩახჩახებინათ და ყველაფერი ჩანდა.

ჰენრი დაიხარა, გაკვანძული მაისური შეიხსნა, თედოზე ჭრილობისთვის რომ შემოეხვია, და ჯინსის შარვალზე გაჩენილი ხვრელი გააფართოვა. მისი დამკავებელი ჯარისკაცებიც ასე მოიქცნენ მანქანის ძარაზე, სადაც, მის გარდა, კიდევ ხუთი ტყვე იმყოფებოდა (გოლდინის მალაზიისკენ მიმავალ გზაზე კიდევ სამი კაცი შემოხვდათ). მაშინ სუფთა იყო. ახლა კი...

ჭრილობის ცენტრიდან ქვემოთ დაძენძილი წვრილი წითელი ზოლი მიემართებოდა. რომ არ სცოდნოდა, რა იყო, სისხლი ეგონებოდა.

ბაირუსი, – გაიფიქრა მან, – ოჰ, ამის დედაც! .. მშვიდობით, მეგობრებო, სადაც უნდა იყოთ.

უეცრად შუქმა იფეთქა. ჰენრი წელში გაიმართა და დაინახა, რომ ანდერჰილი „ვინებაგოს“ კარს ხურავდა. ჰენრიმ სასწრაფოდ შეიხვია ფეხი და ლობისკენ გაემართა. თავში რაღაც ხმა ეკითხებოდა, როგორ მოიქცეოდა, თუ ანდერჰილი მის დაძახილზე არ შეჩერდებოდა და გზას გააგრძელებდა. ხმას ისიც აინტერესებდა, მართლა აპირებდა თუ არა ჰენრი ჯოუნსის გაცემას.

ყურადღებით აკვირდებოდა, როგორ დახარა თავი ანდერჰილმა ქარისა და თოვლის ასარიდებლად და პროექტორების დამაბრმავებელ შუქში მისკენ წამოვიდა.

## 8

კარი მიიხურა. კურცი დიდხანს იყურებოდა იქით, ნელა ირწეოდა და სიგარეტს აბოლებდა. მოახერხა თუ არა ოუენის გაცურება? რა დაიჯერა მისი ნათქვამიდან? ოუენი კარგად აზროვნებდა, თვითგადარჩენის ნიჭი დაბადებიდან დაჰყოლოდა, თუმცა იდეალიზმიც ახასიათებდა... კურცი ფიქრობდა, რომ ოუენი ანკესზე წამოაგო, ყველაფერში დაარწმუნა. რადგან, ბოლოს და ბოლოს, ყველას იმისი

სჯერა, რისი დაჯერებაც სურს. ჯონ დილინჯერი, ოცდაათიანი წლების თავზე ხელაღებული, ეშმაკი და თვითგადარჩენის იშვიათი ნიჭით დაჯილდოებული ბანდიტიც კი წავიდა თეატრში (კერძოდ, Biograph Theater-ში), ანა სეიჯთან ერთად, „მანჰეტენის მელოდრამის“ სანახავად. მისი დასრულების შემდეგ ფედერალებმა დილინჯერი თეატრის სიახლოვეს, ერთ-ერთ ჩიხში მოკლეს ცოფიანი ძაღლივით. და იყო კიდევ ასეთი. ანა სეიჯსაც სჯეროდა ის, რისი დაჯერებაც სურდა, მაგრამ თვალის დახამხამებაში მოახდინეს მისი დეპორტაცია უკან, პოლონეთში.

ხვალ ვერავინ გააღწევს გოსლინის მალაზიიდან რამდენიმე რჩეულის, „იმპერიალის ხეობის“ ელიტურ ჯგუფში შემავალი თორმეტი მამაკაცისა და ორი ქალის გარდა. ოუენ ანდერჰილი მათ შორის არ იქნება, არადა, ყველაფერი სხვაგვარად შეიძლებოდა ყოფილიყო. სანამ ოუენი საერთო არხით რუხი კაცუნების ხმების ტრანსლირებას მოახდენდა, კურცი დარწმუნებული იყო, რომ მას თავისთან წაიყვანდა. თუმცა, ყველაფერი იცვლება, – თქვა ბუდამ და ამ შემთხვევაში, იმ წვრილთვალემა წარმართმა ჭეშმარიტება წარმოთქვა.

– შენ მე ფეხი დამიდე, – თქვა კურცმა. მოწვევის დროს ნილაბი ჩამოიხსნა და ახლა ყოველი სიტყვის წარმოთქმისას ის დანაოჭებულ კისერზე ეხეთქებოდა, – შენ მე ფეხი დამიდე.

კურცმა ოუენ ანდერჰილის პირველ შეცდომაზე თვალი დახუჭა. მეორედაც ეპატიებინა?

– არასდროს, – ჩაილაპარაკა კურცმა, – ასე არასდროს მოვიქცევი.

# თავი მეთოთხმეტე

## სამხრეთისაკენ

### 1

მისტერ გრეი თოვლმავლით ხევში შევიდა, რომლის ძირშიც პატარა ნაკადული მიედინებოდა, მის გაყოლებაზე I-95-გზატკეცილამდე დარჩენილი ბოლო მილი გაიარა და სამხედრო სატვირთო მანქანებიდან (ასეთი სულ რამდენიმე იყო და ისინი ძლივს მილოლავდნენ) ორასი-სამასი იარდის დაშორებით შეჩერდა – ზუსტად იმდენი ხნით, რამდენიც ჯოუნსის გონების იმ ნაწილის შესასწავლად ეყოფოდა, რომელში შედწევაც მოახერხა. ინფორმაციის მილიონობით ფაილი ჯოუნსის ნამცეცა ოფისის ციხესიმაგრეში ვერ ჩატეულიყო და მისტერ გრეიმ საკმაოდ ადვილად მიაგნო იმას, რასაც ეძებდა. არცტიც ჩატ-ის ფარებს გამომრთველი არ ჰქონდა, ამიტომ მან ჯოუნსის ფეხები მიწაზე დაუშვა, ქვა მოძებნა, ჯოუნსის მარჯვენა ხელით აიღო და შუშა ჩაამტვრია. შუქი ჩაქრა. შემდეგ მისტერ გრეი კვლავ მოაჯდა „უნაგირს“ და გზა განაგრძო. საწვავი თითქმის გათავებულიყო,

მაგრამ ამას მნიშვნელობა აღარ ჰქონდა – მანქანას თავისი საქმე შესრულებინა. გზატკეცილის გასწვრივ გამავალი მილი, რომელშიც ნაკადული მოექციათ, საკმაოდ დიდი აღმოჩნდა თოვლმავლისთვის, მაგრამ არა თოვლმავლისა და მისი მძღოლისთვის. მისტერ გრეი კვლავ ჩამოქვეითდა, ძრავა ასე დაქოქა და თოვლმავალს მიაწვა. მან ათიოდე მეტრი გაიარა და ჩაქრა, მაგრამ ეს საკმარისზე მეტი იყო. ახლა თოვა რომც შეწყვეტილიყო, ჰაერიდან დაბალ სიმაღლეზე დაზვერვისას ველარ შეამჩნევდნენ.

მისტერ გრეიმ ჯოუნსი აიძულა, ყრილზე ასულიყო. შლაგბაუმის ბოძებთან გაჩერდა და ზურგზე დაწვა. აქ ქარი შედარებით სუსტად უბერავდა. ფიზიკურ ძალისხმევას ენდორფინები გამოემუშავებინა და ჯოუნსი გრძნობდა, რომ გამტაცებელი გემოს უსინჯავდა და ისე ტკბებოდა, როგორც ჯოუნსი ტკბებოდა ხოლმე კოქტეილით ან ცხელი ყავით ფეხბურთის მატჩის შემდეგ ოქტომბრის ცივ დღეს.

მან გააცნობიერა, მაგრამ არ გაჰკვირვებია, რომ მისტერ გრეი ეზიზღებოდა.

ამ დროს მისტერ გრეი, როგორც არსება – რომლის შეზიზღებაც, რეალურად, შეიძლებოდა – კვლავ გაქრა. იგი იმ ღრუბელმა გადააადგილა, პირველად მონადირის ქონში რომ ნახა, როცა რუხ ქმნილებას თავი აუფეთქდა. ის სადღაც წავიდა, როგორც მაშინ, ემილი დოგის ძებნისას. მაშინ მას ბროდსკი სჭირდებოდა, რადგან ჯოუნსის მესხიერების ფაილებში თოვლმავლის დაქოქვის შესახებ ინფორმაცია არ ინახებოდა. ახლა კიდევ რაღაც დასჭირდა. ალბათ, იმას ელოდებოდა, ვინც დანიშნულების ადგილამდე მის მიყვანას შეძლებდა. სავარაუდოდ, ასე იყო.

მაგრამ რა ან ვინ დარჩა? რა ან ვინ დარჩა იმ ოფისის დასაცავად, სადაც ჯოუნსის უკანასკნელი ნაფლეთები იკრუნჩხებოდა – ჯოუნსისა, რომელიც საკუთარი სხეულიდან ჯიბიდან ამოღებული ნაგავით მოისროლეს? ცხადია, ღრუბელი; ის სუბსტანცია, ჯოუნსიმ რომ შეისუნთქა, ის, რასაც ჯოუნსი უნდა მოეკლა, მაგრამ რატომღაც არ



მოკლა.

მაგრამ, მისტერ გრეისგან განსხვავებით, ღრუბელს ფიქრი არ შეეძლო. სახლის პატრონი (ამჯერად უკვე მისტერ გრეი მისტერ ჯოუნსის ნაცვლად) წავიდა და სახლი თერმოსტატებს, მაცივარსა და ღუმელს დაუტოვა გასაკონტროლებლად. განსაკუთრებულ შემთხვევაში კვამლის დეტექტორი ჩაირთვებოდა და სიგნალიზაცია ავტომატურად აკრეფდა უბნის პოლიციის ნომერს.

მაგრამ მისტერ გრეის წასვლის შემდეგ ჯოუნსის ოფისიდან გამოსვლა მაინც შეეძლო. ოლონდ, – არა ძალაუფლების დასაბრუნებლად, რადგან ამის მცდელობისთანავე წითელი ღრუბელი ერთ ამბავს ატეხდა და მისტერ გრეიც დაუყოვნებლივ დაბრუნდებოდა სადაზვერვო ექსპედიციიდან. ჯოუნსის აუცილებლად შეიპყრობდნენ, სანამ „ძმები თრექერების“ ოფისს შეაფარებდა თავს, ოფისს, სადაც განცხადებების დაფა, დამტვერილი იატაკი და სამყაროში გასახედი ერთადერთი ჭუჭყიანი ფანჯარა იყო... ოლონდ მას ახლაც მკაფიოდ აჩნდა ნახევარმთვარის ფორმის ოთხი კვალი – ბიჭების ოთხეული შუბლებით რომ მიეყრდნო ფანჯარას, რათა თვალი მოეკრა დაფაზე ჭიკარტით მიკრული ფოტოსურათისთვის, რომელზეც თინა ჯინ შლოსინგერი წამოხდილი კაბით იყო გამოსახული.

არა, ძალაუფლებას ვერაფრით დაიბრუნებდა, სამწუხაროდ, ამას უნდა შეჰგუებოდა.

თუმცა, შეეძლო, ფაილებამდე მიღწევა ეცადა.

– გამართლებული იქნებოდა ასეთი რისკი? სარგებელს მოუტანდა? იქნებ, მოეტანა კიდევ – ვინ იცის, რა უნდოდა მისტერ გრეის. ცხადია, იმის გარდა, რომ სასწრაფოდ სადღაც უნდა წასულიყო. ჰო, მართლა, სად?

პასუხი მოულოდნელად დადიტსის ხმით მოვიდა:

„აეთი. იერ ეის აეთისენ უა ალა“.

სამხრეთი. მისტერ გრეის სამხრეთისკენ უნდა წასვლა.

ჯოუნსი სამყაროში გამავალ ჭუჭყიან ფანჯარას მოშორდა. საყურებელი ისედაც არაფერი იყო: თოვლი, წყვდიადი და პირქუში ხეები. დილანდელი ქარბუქი ამას სად შეედრებოდა! ?

მისტერ გრეის სამხრეთისკენ უნდა წასვლა.

რამდენად შორს? და რატომ? სად არის ძალის თავი დამარხული?

ამჯერად დადიტსი დუმდა.

ჯოუნსი შეტრიალდა და გაოცებულმა აღმოაჩინა, რომ განცხადებების დაფაზე აღარც მარშრუტების რუკა იყო და აღარც – გოგონას ფოტოსურათი. მათ ნაცვლად ოთხი ბიჭის ოთხი ფერადი სურათი მიემაგრებინათ. ყველა მათგანი ერთსა და იმავე ფონზე გადაეღოთ: დერის საშუალო სკოლა, ქვეშ კი წარწერა: სკოლა, 1978. ჯოუნსის ფოტო მარცხნივ იყო მიკრული. ჩვეულებრივ, გულუბრყვილოდ იღიმებოდა. ახლა გულს უკლავდა ის ღიმილი. გვერდით უკბილო ბივი იდგა, რომელსაც წინა კბილი საციგურაო მოედანზე დაცემის შედეგად მოსტყდომოდა. ერთი-ორი წლის შემდეგ ხვრელი პროთეზმა ამოავსო... პიტი მრგვალი, შავგვრემანი ბიჭი იყო, წენგოსფერი სახითა და უმოკლესად შეკრეჭილი თმით, ეს მამამისის ხუმტური იყო, ამბობდა, იმიტომ არ ვიბრძოდი კორეაში, რომ ჩემი შვილი ჰიპად გაიზარდოსო. დაბოლოს, ჰენრი – სქელი სათვალით. ჯოუნსის იგი ყოველთვის დენი დანს აგონებდა, დეტექტივ ბიჭს, მოთხრობათა სერიიდან, რომელთაც ბავშვობაში ხშირად კითხულობდა.

ბივერი, პიტი და ჰენრი. როგორ უყვარდა ისინი და როგორ უსამართლოდ, მოულოდნელად შეწყდა მათი ხანგრძლივი მეგობრობა. ძალიან უსამართლოდ...

ამ დროს ბივერ კლარენდონის სურათი გაცოცხლდა და ჯოუნსი გვარიანად შეაშინა. ბივმა თვალეები გააფართოვა და ხმადაბლა წარმოთქვა:

– მას თავი არ ჰქონდა, გახსოვს? არხში იწვა და თვალეები ტალა-

ხით მოსვროდა. რა ჯანდაბა იყო! ანუ დალახვროს ეშმაკმა – ბანანები!

ღმერთო ჩემო, – გაიფიქრა ჯოუნსიმ, როდესაც მოულოდნელად გაახსენდა ის, რაც „კედელში გაკეთებულ ხვრელში“ მათ პირველ წასვლასა და ნადირობას უკავშირდებოდა და დავიწყებოდა... ან ძალით დაევიწყებინა. ყველაფრის დავიწყება გადაწყვიტა? შესაძლოა. ჰო, ნამდვილად ასე იქნება, რადგან შორეულ ბავშვობაზე საუბრისას, ბიჭები რას აღარ იხსენებდნენ, ერთმანეთს შთაბეჭდილებებს უზიარებდნენ, მხოლოდ იმ ერთ ამბავს არ ეხებოდნენ.

მას თავი არ ჰქონდა... თვალები ტალახით მოსვროდა.

რალაც შეემთხვათ მაშინ, ეს იმას უკავშირდებოდა, რაც ახლა ემართებოდათ.

ნეტავ, ვიცოდე, რა იყო ეს, – გაიფიქრა ჯოუნსიმ, – ნეტავ, ვიცოდე.

## 2

ენდი ჯანასმა მათი პატარა ესკადრონის სამ სატვირთო მანქანას გადაასწრო და ჩამოიტოვა, რადგან, სხვა მძღოლებს, მისგან განსხვავებით, ასეთ ღიდთოვლობაში მგზავრობის გამოცდილება არ ჰქონდათ. თვითონ კი, ჩრდილოეთ კაროლინაში გაზრდილს, რა არ ენახა. მათ შორის, ასეთი ქარბუქიც. გარდა ამისა, ერთ-ერთი საუკეთესო სამხედრო მანქანის – მოდიფიცირებული „შევროლეს“, სრულამძრავიანი პიკაპის საჭესთან იჯდა და ყველა ამძრავი აემოქმედებინა. საზრიან ენდის ბევრი რამ ეხერხებოდა, რასაც მამას უმადლიდა.

გზაზე თოვლი თითქმის არ იღო. დაახლოებით ერთი საათის წინ ორ სამხედრო თოვლსაწმენდ მანქანას ჩაველო (მაღე მათ დაეწეოდა, სიჩქარეს შეამცირებდა და დამჯერი ბიჭივით გაჰყვებოდა უკან) და მას შემდეგ ბეტონზე ორი-სამი ღუიმის სიმაღლემდე დაეღო. ცუდი ის იყო, რომ ძლიერ ქარს თოვლი ჰაერში აჰქონდა და გზა

თეთრ მოჩვენებას ემსგავსებოდა. მაშინ შუქამრეკლავი ნიშნები ერთადერთ იმედად რჩებოდა. გამუდმებით მათი ყურება იოლი საქმე როდი იყო. სხვებმა ეს, შესაძლოა, არც კი იცოდნენ. ან მათ მანქანებზე ფარები ძალზე მალლა ეყენა და გადათეთრებულ სივრცეში შუქამრეკლი ფირფიტების ნათებას ვერ ხედავდნენ. როდესაც ქარის სიჩქარე პიკს აღწევდა, მაჩვენებლებიც ქრებოდა და იქაურობა ერთ დიდ თეთრ უფსკრულს ემსგავსებოდა. ასეთ დროს პედლიდან ფეხს იღებდა და ელოდებოდა, როდის გადაივლიდა ქარბუქი, თან გზაც არ უნდა არეოდა. ჯერჯერობით, ყველაფერი რიგზე იყო, გაუთვალისწინებელი შემთხვევისთვის რაცია ჰქონდა. გარდა ამისა, უკან რამდენიმე თოვლსაწმენდი მოჰყვებოდა, ისინი სამხრეთისკენ მიმავალი, პრესქაილიდან მილინოკეტამდე არსებული გზის მონაკვეთზე აგებდნენ პასუხს.

ენდის სატვირთო მანქანით სამმაგად შეფუთული ორი ტვირთი გადაჰქონდა. ერთი – რიპლის სოკოსგან მკვდარი ორი ირემი, მეორე – ჯანასს მისი დარდი უფრო ჰქონდა – რუხი კაცუნას სხეული, რომელიც თანდათანობით მოწითალო ნარინჯისფერ ბულიონს ემსგავსებოდა. ორივე ფუთა ექიმებთან მიჰქონდათ „ცისფერ ბაზაში“, რომელიც მდებარეობდა...

ჯანასმა დამცავ წინაფრას შეხედა, იქ, რეზინის ქვეშ, ფურცელი და კალმისტარი მოჩანდა. ფურცელზე ეწერა: გოსლინის მალაზია. ჩასასვლელი 16, შესახვევი.

იქ სამ საათში იქნებოდა. იქნებ უფრო ადრეც. ექიმები განაცხადებდნენ, რომ უკვე მიიღეს ყველა საჭირო ნიმუში და სინჯი, ამიტომ ირმებს დაწვავდნენ. სამაგიეროდ, რუხი კაცუნა დაინტერესებდათ, თუ, რა თქმა უნდა, ის იქამდე პიურედ არ იქცეოდა. სიცივეს ეს პროცესი, შესაძლოა, ცოტათი შეენელებინა, მაგრამ ასე იქნებოდა თუ ისე, ენდის ეს არ ეხებოდა. მისი საქმე დანიშნულების ადგილამდე მისვლა და ნიმუშების გადაცემა იყო. შემდეგ უფროსობას საკარან-

ტინო ზონის ჩრდილოეთით, ყველაზე მშვიდ ადგილზე არსებულ ვითარებას მოახსენებდა და ვისაც შეკითხვების დასმის უფლება ჰქონდა, მათ უპასუხებდა. სანამ დაიბარებდნენ, მანამდე მოზრდილი ქიქით ყავის დაღვევასაც მოასწრებდა და მთელი თეფში ერბოკვერცხის შეჭმასაც. თუ გაუმართლებდა, ყავაში ჩასამატებელ სასმელსაც იშოვიდა. ცუდი ნამდვილად არ იქნებოდა. ცეცხლს შეუკეთებდა, მერე კი მიწვებოდა და...

გზის პირზე გადადი და გააჩერე

ჯანასი მოიღუშა, თავი შეარხია და ყური მოიფხანა, თითქოს იქ რალაც რწყილის მსგავსი შეუძვრა. ქარი ისე გამძვინვარდა, რომ სატვირთო მანქანა კინალამ გადააყირავა. გზა ისევ გაქრა. მასთან ერთად – საგზაო ნიშნებიც. ყველაფერი თეთრ სუდარაში გაეხვია. სხვა მძღოლებმა შიშისგან ალბათ ჩაისვარეს, მაგრამ მას ეს არ ემუქრებოდა, ის ხომ მისტერ-მინესოტას-სიამაყე იყო. მთავარია, ეს დაწყველილი ფეხი პედლიდან აეღო (და მუხრუჭი არ დავიწყდებოდა, ქარბუქის დროს მუხრუჭი საუკეთესო საშუალებაა იმისთვის, რომ კარგი მგზავრობა გააფუჭო), მანქანა გზის პირზე მიეყენებინა და დალოდებოდა...

გზის პირზე გადადი და გააჩერე

– რაო? – რაცინას დახედა, მაგრამ იქიდან მხოლოდ სტატიკური მუხტები და გაუგებარი ბურტყუნი ისმოდა.

გზის პირზე გადადი და გააჩერე

– ვაი! – შესძახა ჯანასმა და ხელები თავში წაივლო. თავი უეცრად ისე ასტკივდა, რომ კინალამ გაუსკდა. მომწვანო ზეთისხილისფერი მანქანა ზიგზაგებით წავიდა, მაგრამ მაშინვე გასწორდა, როგორც კი ენდის ხელებმა ყველა საჭირო მანიპულაცია მექანიკურად შეასრულა. მძღოლის ფეხი პედალს კვლავაც არ ეხებოდა და სპიდომეტრის ისარი სწრაფად გადაქანდა მარცხნივ.

თოვლსაწმენდ მანქანებს სამხრეთის მიმართულების ორ ზოლს

შუა ვიწრო ბილიკი გაეყვანათ. ჯანასმა ამ ბილიკიდან თოვლში, მარჯვნივ გადაუხვია. მანქანის საბურავებმა ფიფქების კორიანტელი დააყენა. საგზაო შუქამრეკლი ბოძები სიბნელეში კატის თვალებივით ანათებდა.

გზის პირზე გადადი და აქ გააჩერე

ჯანასმა ტკივილისგან დაიღრიალა და საიდანღაც საკუთარი ყვირილი მოესმა:

– კარგი, კარგი, ახლავე! ოღონდ თავი დამანებე!

იგი აცრემლებული თვალებით მიაჩერდა მუქ ფიგურას, რომელიც დამცავი ზღუდის ბოძების თავზე, დაახლოებით, ორმოცდაათი ფუტის სიმაღლეზე აღმართულიყო. ფარების შუქში მამაკაცი გააჩნია, რომელსაც პარკა ეცვა.

ენდი ჯანასს თითქოს ხელები წაერთვა. ისინი სხვის ხელებზე წამოცმულ ხელთათმანებად იქცა. ეს ძალზე უცნაური და უაღრესად უსიამოვნო შეგრძნება იყო. მან, საკუთარი ნების საწინააღმდეგოდ, საჭე მკვეთრად მარცხნივ აიღო და პიკაპი პარკაში გამოწყობილი კაცის წინ გააჩერა.

### 3

ეს მისი შანსი იყო, მით უმეტეს, რომ მისტერ გრეის მისთვის არ ეცალა. ჯოუნსი გრძნობდა, რომ თუ ფიქრს დაიწყებდა, გამბედაობას საბოლოოდ დაკარგავდა, ამიტომ ფიქრის ნაცვლად მოქმედებას შეუდგა, ურდული მკვეთრად გასწია და ოფისის კარი გამოაღო.

ბავშვობაში ერთხელაც არ შესულა „ძმები თრექერების“ შენობაში (მათ საქმიანობა 1985 წლის საშინელი ქარიშხლის შემდეგ შეწყვიტეს), მაგრამ დარწმუნებული იყო, რომ სინამდვილეში ის სულ სხვაგვარად გამოიყურებოდა, ვიდრე ახლა ხედავდა. უბადრუკი ოფისის მიღმა, უზარმაზარ ოთახში, ჭერზე ურიცხვი ლუმინესცენციური ლამპა ეკიდა. მათ ქვეშ კი გიგანტურ სვეტებად ეწყო ერთიმეორეზე შემოდებული მილიონობით მუყაოს ყუთი.

არა, – გაიფიქრა ჯოუნსიმ, – მილიონობით კი არა, მილიარდობით.

დიახ, სწორედ რომ მილიარდობით. მათ შორის ათასობით ვიწრო გასასვლელი მოჩანდა. თვითონ მარადიულობის საწყობის თავში იდგა და იქ რაიმეს პოვნაზე ფიქრიც კი სისულელედ მიაჩნდა. თუ თავშესაფრის კარს მოსცილდებოდა, წამსვე დაიკარგებოდა. მისტერ გრეის წვალემა არც კი მოუწევდა – ჯოუნსი ისე იხეტიალებდა, როგორც ჯუნგლში და ბოლოს, მუყაოს ყუთების თვალუწვდენელ უდაბნოში მოკვდებოდა.

ტყუილია. აქ ჩემი დაკარგვის შანსი ისეთივეა, როგორც საკუთარ საძინებელში. და რაც მინდა, იმაზე ნადირობაც არ მჭირდება. ეს ჩემი სახლია. კეთილი იყოს შენი მობრძანება საკუთარ თავში, დიდო ბიჭო.

ეს ისეთი განსაცვიფრებელი იდეა იყო, რომ ჯოუნსი ერთბაშად დასუსტდა... მაგრამ ახლა თავს ოდნავი სისუსტის თუ ყოყმანის უფლებასაც ვერ მისცემდა. მისტერ გრეი – ყველასთვის საყვარელი დამპყრობელი დიდებული იმქვეყნიურობიდან, სატვირთო მანქანის მძღოლთან ბევრ დროს არ დაკარგავდა. თუ ჯოუნსის ზოგიერთი ფაილის უსაფრთხო ადგილას დამალვა უნდოდა, ეს დაუყოვნებლივ უნდა გაეკეთებინა. მაგრამ რომელი დაემალა?

დადიტსი, – ჩასჩურჩულა გონებამ, – ეს, როგორღაც, დადიტსს უკავშირდება. ეს თვითონაც კარგად იცი. ის გამუდმებით შენს ფიქრებშია. მასზე სხვებიც ფიქრობდნენ. დადიტსი ის არის, ვინც შენ, ჰენრის, ბივსა და პიტს გაერთიანებდათ. ეს ყოველთვის იცოდი, მაგრამ ახლა სხვა რამეც იცი. ასე არ არის?

დიახ. ის მიხვდა, რატომ მოყვა ავარიში მარტის თვეში. მოეჩვენა, რომ რიჩი გრენადო და მისი მეგობრები დადიტსს ისევ აბუჩად იგდებდნენ. ოლონდ „აბუჩად აგდება“ ძალიან რბილი ნათქვამი იყო იმასთან შედარებით, რაც „ძმები თრექერების“ შენობის ეზოში იმ დღეს ხდებოდა, არა? უფრო ზუსტი იქნებოდა, ეთქვა, აწამებდნენო.

და როდესაც დაინახა, რომ წამება მეორდებოდა, დაუფიქრებლად გადაჭრა ქურჩა მის დასახმარებლად...

„მას თავი არ ჰქონდა, – გაისმა უეცრად ბივერის ხმა უზარმაზარი საწყობის ქერზე ჩამოკიდებული დინამიკებიდან, თანაც ისე ხმამაღლა და მოულოდნელად, რომ ჯოუნსი შეკრთა, – იგი არხში იწვა, თვალები კი ტალახით მოსვროდა. ადრე თუ გვიან, ნებისმიერი მკვლელი ჩადენილი დანაშაულის გამო პასუხს აგებს და ამას ვერავინ გაექცევა“.

რიჩის თავი. რიჩი გრენადოს თავი. ახლა ჯოუნსის ამის დრო არ ჰქონდა, საზღვარს არღვევდა საკუთარ თავში და სწრაფად უნდა ემოქმედა.

როდესაც ეს უზარმაზარი საცავი პირველად ნახა, ყველა ყუთი ერთნაირი იყო და – მოუნიშნავი, ახლა კი, აღმოაჩინა, რომ უახლოეს რიგში, ზემოთ შემოდებულებს შავი მარკერით ეწერა დადიტსი.

დამთხვევა? ილბალი? სულაც არა. მისი მოგონებები აკურატულად ჩაეწყობოთ მილიარდობით ყუთში, გახსენებისას გონება დაუყოვნებლივ იღებდა ყუთიდან, რაც სჭირდებოდა და ზედაპირზე დებდა.

„რაიმე მჭირდება მათ გადასატანად“, – დაასკვნა ჯოუნსიმ, მიიხედ-მოიხედა და ხასხასა წითელი ურიკა დაინახა. გაიფიქრა, რომ ჯადოსნურ სამყაროში მოხვდა, სურვილების ასრულების სამყაროში. ყველაზე საოცარი კი ის იყო, რომ, მისი აზრით, ასეთი სამყარო ყველას უნდა ჰქონოდა.

მან ურიკაში რამდენიმე ყუთი მოათავსა, წარწერით დადიტსი, და „ძმები თრექერების“ ოფისისკენ გავარდა. იქ ურიკა სწრაფად გადააყირავა. ყუთები იატაკზე დაცვივდა, ეს არ აღარდებდა – როგორც საუკეთესო მეურნე, ატესტატს მოგვიანებითაც მიიღებდა.

უკან გაქანდა. უნდა გაეგო, მისტერ გრეი ხომ არ დაბრუნდა, მაგრამ ის ჯერაც სატვირთო ავტომანქანის მძღოლ ჯანასთან არკვევდა საქმეს... გვარად ჯანასი იყო. ღრუბელი ისევ იქ იდგა, მაგრამ მას ვერ გრძნობდა. ისეთივე შტერი ჩანდა, როგორიც სოკო.



ჯოუნსიმ დადიტსის დანარჩენი ყუთებიც მოაგროვა და შეამჩნია, რომ წარწერა შემდეგ მწკრივში მოთავსებულ ყუთებსაც ჰქონდა. დერი, – ამოიკითხა მან, ასეთი ძალიან ბევრი იყო. უნდა გადაეწყვიტა, სულ წაეღო თუ ზოგიერთი ამოერჩია.

ცოტა ფიქრის შემდეგ მეორე პარტიაც ოფისში წაიღო. რა თქმა უნდა, მოგონებები დერისა და დადიტსის შესახებ ერთმანეთს გადაეჯაჭვა, მეხსიერებას კი ასოციაციურობა ახასიათებდა. რამდენად მნიშვნელოვანი იყო დერისთან დაკავშირებული ყველა მოგონება? ამაზე პასუხი იმიტომ არ ჰქონდა, რომ მისტერ გრეის გეგმებზე არაფერი იცოდა.

სამაგიეროდ, მან იცოდა.

მისტერ გრეი სამხრეთისკენ იჩქაროდა.

დერი სამხრეთით მდებარეობდა.

ჯოუნსი ისევ მეხსიერების საცავისკენ გავარდა, წინ ურიკას მიავორებდა. იმდენი ყუთის წაღებას აპირებდა, რამდენსაც შეძლებდა, იმედოვნებდა, რომ ის საჭირო ყუთები იყო. იმისიც სჯეროდა, რომ მისტერ გრეის დაბრუნებასაც იგრძნობდა. წინააღმდეგ შემთხვევაში, თუ კარს მიღმა დააკავებდნენ, ბუზივით გასრესდნენ.

#### 4

ჯანასი შეძრწუნებული აკვირდებოდა, როგორ გაიწვდინა მარცხენა ხელი, კარი მძღოლის მხრიდან როგორ გააღო და სიცივე, თოვლი და დაუდგრომელი ქარი შემოუშვა.

– ნუ მაწამებთ, მისტერ, გთხოვთ. დაბრძანდით, სადაც გნებავთ, წაგიყვანთ, ოღონდ აღარ გამაწამოთ. ჩემი თავი...

უეცრად რაღაც ეძგერა ენდი ჯანასის გონებას. ეს თვალების ქარბორბალას ჰგავდა. გრძნობდა, როგორ გამოითხოვდა მისგან უკანასკნელ ინფორმაციას, „ცისფერ ბაზაზე“ მისვლის სავარაუდოდროს, ყველაფერს, რაც კი დერიზე იცოდა – ენდი არასდროს ყოფილა დერიში და, შესაბამისად, ვერც ვერაფერს შეატყობინებდა.

შემდეგ ქარბუქი შესუსტდა და წამით ენით აუწერელი შვება იგრძნო, – მე არა მაქვს ის, რაც მას სჭირდება, ამიტომ გამიშვებს, – თუმცა მაშინვე მიხვდა, რომ გონებაში არსებულ რაღაცას მისი სატვირთო მანქანა სჭირდებოდა და ამიტომ გაშვებას არ აპირებდა; და კიდევ: უნდა ეიძულებინა ჯანასი, არაფერი წამოსცდენოდა.

ჯანასი უცნობ ძალას ენერგიულად შეებრძოლა. სწორედ ამ მოულოდნელმა შეწინააღმდეგებამ მისცა ჯოუნსის შესაძლებლობა, რომ „დერიტი“ მონიშნული ყუთების ერთი წყება მაინც ოფისში გადაეტანა. შემდეგ კი მისტერ გრეი სატვირთო მანქანის საჭეს დაეუფლა.

ჯანასმა დაინახა, როგორ შეეხო მისი საკუთარი ხელი დამცავ წინაფრას, კალმისტარი ამოაძრო, ხანჯალივით შემართა და თვალში შეირჭო.

„არა!“ – შესძახა ჯანასმა, მაგრამ გვიან იყო. გაისმა მსუბუქი ტკაცუნის და მძლოლი ისე აფართხალდა, როგორც მარიონეტი – გამოუცდელი მსახიობის ხელში. მძლავრად მომუჭულ ხელს კალმისტარი სულ უფრო ღრმად შეჰყავდა – ჯერ ნახევრამდე, შემდეგ ბოლომდე. გამსკდარი თვალი ნელა ჩამოედინა სახეზე უშნო, გროტესკული ცრემლივით. ბოლოს, კალმის წვერი ხრტილამდე შევიდა და წამით გაიჭედა, მაგრამ მაშინვე შეაღწია ტვინში.

რას აკეთებ, შე დამპალო, – გაიფიქრა ენდიმ, – რას...

თავში სინათლის თეთრი ბუშტი გასკდა და სრული წყვედიადი ჩამოწვა. ჯანასი ნელა დაემხო საჭეს. პიკაპის კლაქსონი აპიპინდა.

## 5

მისტერ გრეიმ ჯანასთან ბევრს ვერაფერს მიაღწია, – ამას ბოლოს ძალაუფლებისთვის მოულოდნელი ბრძოლაც დაემატა, – მაგრამ ის მაინც შეიტყო, რომ აქეთ საკუთარი ნებით არ წამოსულა. ტრანსპორტის კოლონა, რომელშიც ჯანასი შედიოდა, ქარბუქმა შე-

აფერხა, ყველა ერთსა და იმავე დანიშნულების ადგილამდე უნდა მი-  
სულიყო. ის მას „ცისფერ ბაზასაც“ ეძახდა და „გოსლინის მაღაზი-  
ასაც“. იქ ერთი კაცი იყო, რომლისაც ჯანასს ეწინოდა – მეთაური.  
თუმცა, საშინელი კურცი/ბოსი/შეშლილი ეიბი მისტერ გრეის სულ  
არ ანალვლებდა. ან რა საქმე უნდა ჰქონოდა კურცთან, როდესაც  
გოსლინის მაღაზიასთან მიახლოებასაც კი არ აპირებდა. ეს სრული-  
ად სხვა ადგილი იყო და იქ მყოფნიც სხვანაირები იყვნენ თავიანთი  
განუვითარებელი, ძირითადად, ემოციებისგან შემდგარი გონებე-  
ბით. ისინი იბრძოდნენ, თუმცა მისტერ გრეის ამის მიზეზი ვერაფ-  
რით გაეგო.

ჯობდა, საქმე სწრაფად დაემთავრებინა. საგანგებოდ ამ შემ-  
თხვევისთვის მან იდეალური სისტემა მოიფიქრა.

მისტერ გრეიმ ჯანასს ილღიაში ჯოუნსის ხელები ამოსდო, გზის  
გასწვრივ ჩარჭობილ ბოძებთან მიათრია და ქვევით გადააგდო, თვა-  
ლი არც კი გაუყოლებია, როცა ის კოტრიალით დაეშვა გაყინული  
ნაკადულისკენ. ამის ნაცვლად, მანქანასთან დაბრუნდა, ორი საგულ-  
დაგულოდ შეფუთული ტვირთი ყურადღებით შეათვალიერა და თა-  
ვი დააქნია. ცხოველთა ლეში უსარგებლო იყო, აი, მეორე კი... გამო-  
ადგებოდა. მასში ბევრი რამ სჭირდებოდა.

უეცრად, თავი ასწია და ჯოუნსის დაბნეული თვალებით თოვლის  
ფიფქებს მიაჩერდა. ამ სხეულის პატრონი სამალავიდან გამოსული-  
ყო. მოწყვლადი. უმწეო. ეს აწყობდა კიდევ, რადგან მისი ცნობიერე-  
ბა უკვე აღიზიანებდა: განუწყვეტელი ბურტყუნი (ზოგჯერ პანიკურ  
ყვირილში რომ გადაიზრდებოდა ხოლმე) სააზროვნო პროცესის ქვე-  
და დონეზე მუშაობაში ხელს უშლიდა.

მისტერ გრეი წამით კიდევ შეყოვნდა, რათა საკუთარი გონება  
ისეთი ფიქრებისგან გაეწმინდა, რომლებიც ჯოუნსის დააფრთხობ-  
და... და გადახტა.

თვითონაც არ იცოდა, რას ელოდა, ოღონდ ამას არა.

ოღონდ არა დამაბრმავებელ თეთრ შუქს.

ჯოუნსი კინალამ ჩავარდა. ჩავარდებოდა კიდეც, რომ არა მის მიერ მეხსიერების საცავში ანთებული ლუმინესცენციური ლამპები. შესაძლოა, სინამდვილეში ეს ადგილი არც არსებობდა, მაგრამ მისთვის სრულიად რეალური იყო, ასევე მისტერ გრეისთვის, როდესაც მან თავდასხმა გადაწყვიტა.

ჯოუნსი დერით მონიშნული ყუთებით დატვირთულ ურიკას მიაგორებდა, როდესაც მაღალ სვეტებად დაწყობილ ყუთებს შორის, ერთ-ერთ გასასვლელში, თითქოს ჯადოსნური ჯოხი აიქნიესო, მისტერ გრეი გაჩნდა. ეს სწორედ ის რუდიმენტული ჰუმანოიდი იყო, „კედელში გაკეთებულ ხვრელში“ მის ზურგს უკან რომ იდგა, ქმნილება, რომელიც საავადმყოფოში მოინახულა. მქრქალი შავი თვალები, როგორც იქნა, გამოცოცხლებოდა და ხარბად იყურებოდა. მისკენ მოიპარებოდა, რათა საბოლოოდ დაუფლებოდა ნადავლს.

მაგრამ უეცრად მისი მახინჯი, თოვლის გუნდასავით თავი შეიზნა და სანამ სამთითა ხელი თვალებს (უქუთუთოსა და უწამწამოს) დაიჩრდილა, ვედა, ჯოუნსიმ ნაცრისფერ სახეზე გაოცების მსგავსი რამ – შესაძლოა ტკივილიც კი – შეამჩნია. ქმნილება ჯერაც იქ, თოვლიან წყვილიაღში იყო და მძლოლის სხეულს თავიდან იცილებდა. აქ რომ შემოიჭრა, სავაჭრო ცენტრის მსგავსმა მოულოდნელმა სიკაშკაშემ თვალი მოსჭრა. ჯოუნსის არც ის გამორჩენია, რომ დამპყრობელმა მასპინძლის გაოცებული გამომეტყველება გადაიღო და ახლა მისტერ გრეი ჯოუნსის საშინელ კარიკატურას ჰგავდა.

ჯოუნსი იმწამიერმა შეყოვნებამ გადაარჩინა. მან ურიკა მთელი ძალით გააგორა წინ – თავს რომელიღაც ზღაპრიდან გატაცებული პრინცესასავით გრძნობდა – და ოფისისკენ გაქანდა. უფრო იგრძნო, ვიდრე დაინახა, როგორ გაიწვდინა მისტერ გრეიმ მისკენ სამთითა ხელები (ამჯერად ნაცრისფერი კანი, დიდი ხნის დადებული უმი

ხორცივით, მეწამული და გამომშრალი მოეჩვენა), მაგრამ კარის დაკეტვა მანამ მოასწრო, სანამ მარწუხები ჩააფრინდებოდა. ჯოუნსიმ ურიკას თეძო გაჰკრა, შემოტრიალდა – აცნობიერებდა, რომ ეს ყველაფერი როგორც მის თავში, ასევე სინამდვილეშიც ხდებოდა – და წამით დაასწრო მისტერ გრეის, რომელსაც შიგნით შემოვარდნა სურდა. თავის დაზღვევისთვის, ურდულის გარდა, დამატებითი საკეტიც გადაატრიალა. ველარ გაიხსენა, ეს ძველი იყო თუ ახლა დააყენა.

ოფლში გაწურულმა ჯოუნსიმ უკან დაიხია და ურიკას შეეჯახა. მისტერ გრეი, რომელიც მის სხეულსა და დანარჩენ გონებას დაუფლებოდა, კარის სახელურს აწვალებდა, აქეთ-იქით ატრიალებდა, მაგრამ ამაოდ ცდილობდა შესვლას. კარის შესანგრევად არც ძალა ჰყოფნიდა, არც – წონა, გამღების წამოღება კი დავიწყებოდა.

რატომ? ეს როგორ მოხდა?

– დადიტს, – ჩაიჩურჩულა მან, – არ არის მოძრაობა, არ არის თამაში.

კარის სახელური შეჯანჯღარდა.

– შემომიშვი! – დაიღრინა მისტერ გრეიმ და ახლა ჯოუნსიმ მასში სხვა გალაქტიკიდან მოფრენილი არსება კი არა, ჩვეულებრივი ბერიკაცი დაინახა, რომელმაც სასურველს ვერ მიაღწია და ამის გამო ჭირვეულობდა. იქნებ, მისტერ გრეის საქციელს საკუთარი, ჯოუნსის საზომით ზომავდა? უცხოტომელს აადამიანურებდა? მის ნათქვამს დედამიწის მკვიდრთათვის გასაგებ ენაზე თარგმნიდა?

– შემომიშვი!

– სწორედ მაგის ხასიათზე ვარ ახლა, – დაუფიქრებლად მიუგო ჯოუნსიმ, გუნებაში კი დაამატა: ამაზე ასე უნდა გეპასუხა: მაშინ სახლს სულს შევუბერავ, შევუბერავ და დავანგრევ.

მისტერ გრეი კვლავაც კარის სახელურს აწვალებდა. როგორც ჩანს, ასეთ დამარცხებას მიჩვეული არ იყო (ჯოუნსის აზრით, არც

ასეთს და არც სხვაგვარს) და გაშმაგებისგან ადგილს ველარ პო-  
ულობდა. ჯანასის წინააღმდეგობამ ოდნავ კი დააფრთხო, მაგრამ აქ  
სრულიად სხვა დონეს წააწყდა.

– სად ხარ? – შესძახა მისტერ გრეიმ გაბრაზებული ხმით, – რო-  
გორ ახერხებ მანდ ყოფნას? გამოდი!

ჯოუნსიმ არაფერი უპასუხა, ძირს დაყრილ ყუთებს მიუახლოვდა  
და სმენად იქცა. თითქმის დარწმუნებული იყო, რომ მისტერ გრეი  
მასთან ვერ შეაღწევდა, მაგრამ ზედმეტი გაღიზიანება არაფერში  
სჭირდებოდა.

კარის სახელურმა ცოტა ხანს კიდევ იჩხაკუნა, შემდეგ კი ჯოუნ-  
სიმ იგრძნო, რომ მისტერ გრეიმ მას ხელი გაუშვა.

ჯოუნსიმ გვერდი აუარა ყუთებს, რომლებსაც დერი და დადიტსი  
ეწერა, ფანჯარასთან მივიდა და თოვლიან ლამეს ჩააშტერდა.

## 7

მისტერ გრეიმ ჯოუნსის სხეული კაბინაში აიყვანა, საჭესთან დას-  
ვა, კარი მიხურა და აქსელერატორს დააწვა. მანქანა წინ გაქანდა,  
მაგრამ მაშინვე მოცურდა და გამაყრუებელი ხმაურით შეეჯახა ღამ-  
ცავ ბოძებს.

– შენი დედაც! .. – შესძახა მისტერ გრეიმ და გაუცნობიერებლად,  
ჯოუნსის სიტყვებით მოჰყვა ლანძღვა-გინებას, – დალახვროს ეშმაკ-  
მა – ბანანები! მაკოცე ტაკოში! ტრაწიანო! აქ მიკბინე!

შემდეგ შეჩერდა და კვლავ საჭეს ჩააფრინდა. ჯოუნსის ამგვარ  
ამინდში მანქანის ტარების შესახებ ბევრი რამ სმენოდა, ცოტაოდენი  
გამოცდილებაც ჰქონდა, მაგრამ ჯანასს ვერ შეედრებოდა. ჯანასი კი  
ცოცხალი აღარ იყო და აღარც მისი ფაილები არსებობდა. ისევ ჯო-  
უნსის ცოდნა უნდა გამოეყენებინა. ყველაზე მნიშვნელოვნად იმ ად-  
გილის შეუძინევლად გავლა მიაჩნდა, რომელსაც ჯანასის ტვინში  
„საკარანტინო ზონა“ ერქვა. თუ გაივლიდა, უსაფრთხოდ იქნებოდა.  
ჯანასი აშკარად ასე ფიქრობდა.

ჯოუნსის ფეხი კვლავ დააწვა გაზის პედალს, მაგრამ ამჯერად გაცილებით ფრთხილად. სატვირთო მანქანა დაიძრა და ჯოუნსის ხელებმა „შევროლეს“ კვლავ თოვლსაწმენდის მიერ გაკვალულ, სანახევროდ დათოვლილ ბილიკზე გადაიყვანა.

ამ დროს ხელსაწყოთა დაფის ქვეშ მოთავსებული რაცია ატკაცუნდა და გამოცოცხლდა.

– „ტაბი ერთი“, მე „ტაბი ოთხი“ ვარ. მანქანა მოსრიალდა და შუა გზაზე ამოტრიალდა. დამიდასტურეთ მიღება.

მისტერ გრეიმ სასწრაფოდ გადაავლო თვალი ფაილებს. ჯოუნსის სამხედრო კომუნიკაციების მწირი ცოდნა ჰქონდა, ძირითადად, წიგნებიდან და ფილმებიდან. რაც იცოდა, იმით უნდა გასულიყო ფონს. მიკროფონი მოიმარჯვა, მოძებნა ლილაკი, რომელიც, ჯოუნსის აზრით, მარჯვნივ უნდა ყოფილიყო, და თითი დააჭირა.

– შეტყობინება მიღებულია, – თქვა მან.

ვაითუ, „ტაბი ოთხმა“ სიყალბე იგრძნოს? მიხვდეს, რომ ენდი ჯანასი არ ელაპარაკება? ჯოუნსის მიერ ნანახი ფაილების მიხედვით, ეს ნაკლებად სავარაუდო იყო.

– ვაპირებთ, ყველამ ერთად ავწიოთ და ბორბლებზე დავაყენოთ. მას ის წყეული საკვები მიჰქონდა. მიღება.

მისტერ გრეი ლილაკს დააწვა.

– ის წყეული საკვები მიჰქონდა. მიღებულია.

ამას საკმაოდ ხანგრძლივი პაუზა მოჰყვა, სრულიად საკმარისი იმისთვის, რომ კვლავ დაეჭვებულყო, შეცდომა ხომ არ დაუშვა და მახეში ხომ არ გაება, მაგრამ ამ დროს რაცია კვლავ გამოცოცხლდა.

– თოვლსაწმენდების მორიგ მანქანებს უნდა დაველოდოთ, შენ კი შეგიძლია სვლა განაგრძო. კავშირის დასასრული. ვიმეორებ, კავშირის დასასრული.

„ტაბი ოთხის“ ხმაში უკიდურესი ზიზღი იგრძნობოდა. ფაილების გაანალიზებით ჯოუნსიმ დაასკვნა, რომ ამის მიზეზი ჯანასი იყო. ამ

საუცხოო მძღოლმა იმდენად გაუსწრო კოლონას, რომ დასახმარებლად უკან მიბრუნებას აზრი არ ჰქონდა. ეს კარგი იყო. გაჩერებას ისედაც არ აპირებდა, თანაც „ტაბი ოთხის“ ოფიციალური სანქციაც, თუ ის ოფიციალურ სანქციად ჩაითვლებოდა, ხელს აძლევდა.

მისტერ გრეიმ ჯოუნსის ფაილები შეამოწმა (ყუთები უზარმაზარ დარბაზში, რომლებსაც ახლა ჯოუნსის თვალით ხედავდა) და უპასუხა:

– მიღებულია. „ტაბი ერთი“ მიღებას ამთავრებს და კავშირს წყვეტს.

შემდეგ კი, თითქოს რაღაც გაახსენდაო, დაამატა:

– ღამე მშვიდობისა.

თეთრი მასა თავზარდამცემად გამოიყურებოდა. მუხანათურად. მისტერ გრეიმ მაინც გარისკა და სისწრაფეს მოუმატა. სანამ სასტიკი კურცის შეიარაღებული ძალების კონტროლირებად ტერიტორიაზე იმყოფებოდა, საფრთხე ყოველი მხრიდან ელოდა. სამაგიეროდ, თუ თავს დააღწევდა, საქმეს სწრაფად მოამთავრებდა.

ის, რაც სჭირდებოდა, დერად წოდებულ ადგილს უკავშირდებოდა. დიდ საწყობში მისტერ გრეიმ საოცარი რამ აღმოაჩინა: მისმა არასტუმართმოყვარე მასპინძელმა ეს ან იცოდა, ან იგრძნო. ამიტომ, როდესაც მისტერ გრეიმ დაბრუნდა და კინალამ ხელი ჩაავლო, ის სწორედ დერის ყუთებს ეზიდებოდა.

შეშფოთებულმა მისტერ გრეიმ სასწრაფოდ გადაათვალიერა დარჩენილი ყუთები და ცოტათი დამშვიდდა.

რაც სჭირდებოდა, ყველაფერი იქ იყო.

ყუთის გვერდით, რომელიც უმნიშვნელოვანეს ინფორმაციას შეიცავდა, გადაყირავებული, პატარა, მტვრიანი კოლოფი ეგდო. მასზე შავი მარკერით გაკვრით ეწერა: დადიტსი. თუ ასეთები კიდევ იყო, ჯოუნსის უკვე გადაემალა, ეს კი დარჩენოდა.

მისტერ გრეიმ იგი მხოლოდ ცნობისმოყვარეობის გამო გახსნა



(ცნობისმოყვარეობაც ჯოუნსის ემოციების საცავიდან ისესხა). შიგნით პლასტმასის კაშკაშა ყვითელი კონტეინერი იდო, რომელზეც უცნაური ფიგურები დახტოდა და, ჯოუნსის ფაილების მიხედვით, „მულტფილმები“ და „სკუბი-დუ“ ერქვა. ერთ გვერდზე მიკრულ სტიკერზე იკითხებოდა: „მე ვეკუთვნი დადიტს ქვევლს, მენის შტატი, დერი, მეიპლენის 19. თუ ბიჭი, ვისაც ვეკუთვნი, დაიკარგება, დარეკეთ...“

ბოლოში ნახევრად წაშლილი და გაურკვეველი ციფრები ეწერა, შესაძლოა, კავშირის კოდი, რომელიც ჯოუნსის აღარ ახსოვდა. პლასტმასის ყვითელი კონტეინერი, როგორც ჩანს, საჭმლისთვის გამოიყენებოდა და მისტერ გრეიმ იგი შორს მოისროლა. ეს ყველაფერი, ალბათ, არაფერს ნიშნავდა... თუმცა, თუ ასეა, რატომ ჩაიგდო ჯოუნსიმ თავი საფრთხეში, როდესაც დადიტსით მონიშნული ყველა და დერით მონიშნული ზოგიერთი ყუთი უსაფრთხო ადგილას გადაიტანა?

დადიტსი-ბავშვობის მეგობარს. მისტერ გრეიმ ეს ჯერ კიდევ ჯოუნსისთან „საავადმყოფოში“ პირველი შეხვედრისას შეიტყო, მაშინ რომ სცოდნოდა, რამდენ უსიამოვნებას მიაყენებდა ჯოუნსი, მასპინძლის მეხსიერებას მთლიანად წაშლიდა. სიტყვებს: „ბავშვობასა“ და „მეგობარს“ ემოციური დატვირთვა არ ჰქონდა, მაგრამ მისტერ გრეიმ ხვდებოდა, ეს რასაც ნიშნავდა. მას მხოლოდ ერთი რამ ვერ გაეგო: რით უკავშირდებოდა ჯოუნსის ბავშვობის მეგობარი დღეს მომხდარ ამბებს.

ამას მხოლოდ ერთადერთი ახსნა მოეძებნებოდა: მისი მასპინძელი ქკუაზე შეიშალა. საკუთარი სხეულიდან გამოძევებამ გააგიჟა. რაც კი თვალში მოხვდა, ყველა ყუთს ხელი სტაცა და გააქანა საკუთარ გაუგებარ ციხესიმაგრეში, რომელსაც გადამეტებულ მნიშვნელობას ანიჭებდა.

– ჯოუნსი, – დაიწყო მისტერ გრეიმ ჯოუნსის ხმით. ამ მიწიერ

არსებებს გამომგონებლობის საოცარი ნიჭი ჰქონდათ (აბა რა, ხუმრობა ხომ არ იყო, ასეთ ცივ სამყაროში ცხოვრება), მაგრამ მათი აზროვნების პროცესი, სულ მცირე, უცნაურად და არასრულყოფილად ერგებოდა: დახავსებული, ემოციების ქაობში ჩაფლული გონება, არავითარი ტელეპათია. ტელეპათიის დროებითი უნარი კი, რაც ბაირუსისა და კიმის (ისინი რატომღაც „სასიგნალო შუქს“ უწოდებდნენ) წყალობით მიიღეს, აცბუნებდა და აშინებდა მათ. მისტერ გრეის უკვირდა, ამ არსებებმა აქამდე რომ მოაღწიეს და არ გადაშენდნენ. არსებებმა, რომელთაც რეალურად აზროვნება არ შეეძლოთ – მანიაკებმა – ამას ბევრი მტკიცება აღარ სჭირდებოდა.

ამასობაში უცნაურ, მიუვალ ოთახში მყოფ არსებას საუბარი არ სურდა.

– ჯოუნსი.

დუმილი. მაგრამ ჯოუნსი უსმენდა. ამაში მისტერ გრეის ეჭვი არ ეპარებოდა.

– ტყუილუბრალოდ იტანჯები, ჯოუნსი. ეცადე, ყველაფერს ისე შეხედო, როგორც სინამდვილეშია: ჩვენ დამპყრობლები კი არა, მხსნელები ვართ.

მისტერ გრეიმ უცებ გამოთვალა, რამდენი ყუთი იყო საწყობში. ჯოუნსის, აზროვნების უნარს მოკლებული არსებას, უჩვეულოდ დიდი მოცულობის მეხსიერება ჰქონდა. შეკითხვა სამომავლოდ: რატომ იყო, რომ შეზღუდული აზროვნების მქონე არსებებს ინფორმაციის მოძიებისა და დაბრუნების საოცარი ნიჭი ჰქონდათ? უკავშირდებოდა თუ არა ეს უჩვეულოდ გაფართოებულ ემოციურ სტრუქტურას? ემოციურობა წონასწორობას უკარგავდა, აშფოთებდა. განსაკუთრებით, ჯოუნსის ემოციურობა. იგი ყოველთვის აქ იყო. ყოველთვის გვერდით. და დიდი რაოდენობით.

– ომი... შიმშილი... ეთნიკური წმენდა... მკვლელობა მშვიდობის დასამყარებლად... წარმართთა ამოწყვეტა იესოს გულისთვის... ჰო-

მოსექსუალისტები ცემით სიკვდილის პირას მიიყვანეს... ბაქტერიები სინჯარებში, სინჯარები მსოფლიოს ყველა ქალაქზე დამიზნებულ ფრთოსან რაკეტებში... კმარა, ჯოუნსი, რა არის პატარა ბაირუსი მეოთხე სახეობის ციმბირულ წყლულთან შედარებით? დალახვროს ეშმაკმა – ბანანები! ორმოცდაათი წლის შემდეგ თქვენ ისედაც ამოწყდებით! და ეს შესანიშნავია! აჯობებს, მოდუნდე და ისიამოვნო!

– შენ ის ბიჭი აიძულე, საკუთარ თვალში კალმისტარი ჩაერჭო. გაბრაზებითაა ნათქვამი, მაგრამ ღუმილს ისევ ეს სჯობია.

ქარმა დალუპა, პიკაპი მოცურდა და მისტერ გრეი მასთან ერთად დაბზრილდა. ჯოუნსის ხელებით საჭეს ჩაჰფრენოდა. ხილვადობა თითქმის ნულის ტოლი იყო და იძულებული გახდა, სისწრაფე საათში ოც მილამდე შეემცირებინა. უკეთესი იქნებოდა, თუ გაჩერდებოდა და ცოტას მოიცდიდა, მაგრამ ასე მას შემდეგ მოიქცეოდა, რაც კურცის ხაფანგს თავს დააღწევდა. მანამდე კი მასპინძელთან საუბრით შეიქცევდა თავს. მისტერ გრეის ეეჭვებოდა, რომ ოთახიდან ჯოუნსის გამოტყუებას მოახერხებდა, თუმცა, გულახდილ საუბარს წინ არაფერი ედგა.

– იძულებული ვიყავი, მეგობარო, სატვირთო ავტომანქანა მჭირდებოდა. მე ხომ უკანასკნელი ვარ.

– და არასდროს აგებ.

– მართალია, – დაეთანხმა მისტერ გრეი.

– მაგრამ ასეთ ვითარებაში არასდროს ყოფილხარ, ხომ ასეა? პირველად ხდება, რომ ვიღაც არ გიშვებს.

ნუთუ ჯოუნსი დასცინის? მისტერ გრეი აღშფოთდა. ამ დროს ჯოუნსიმ ის თქვა, რაზეც მას უკვე ეფიქრა.

– იქნებ ჯობდა, საავადმყოფოში ყოფნისას მოგეკალი. თუ ეს მხოლოდ სიზმარი იყო?

მისტერ გრეიმ კარგად არ იცოდა, რა იყო სიზმარი და პასუხისთვის თავი აღარ შეიწუხა. მისი გაშმაგება ისედაც პიკს აღწევდა.

გვერდით მეამბოხე ჰყავდა, რომელსაც ბარიკადებით ჩაეხერგა ის ადგილი, რომელიც ამ დროისთვის მხოლოდ და მხოლოდ მისტერ გრეის გონება უნდა ყოფილიყო. არც ეს სახელი – მისტერ გრეი მოსწონდა. ვერ წარმოედგინა თავი იმ არსებად, რომლის გონების ნაწილიც გახდა. ისიც ეზიზღებოდა, რომ საკუთარი თავისთვის მამრობითი „ის“ უნდა ეწოდებინა, რადგან ორსქესიანი და, იმავდროულად, უსქესო იყო. ჯერაც ამ ორი სახელის ტყვეობაში რჩებოდა და ასე იქნებოდა მანამ, სანამ ჯოუნსის გონების დარჩენილ ნაწილსაც არ დაიმორჩილებდა. უეცრად, მისტერ გრეის თავში საშინელმა აზრმა გაუელვა: ვაითუ, მისი შეხედულებები სამყაროს შესახებ უაზრობაა?

– ვინ არის დადიტსი, ჯოუნსი?

დუმილი.

– რიჩი ვინლაა? რატომ იყო ის ნაგავი? რატომ მოკალი?

– ჩვენ არ მოგვიკლავს!

მცირეოდენი თრთოლა გონებრივ ხმაში. აჰა! გასროლა მიზანში! და კიდევ ერთი საინტერესო რამ: მისტერ გრეიმ შენობით მიმართა, ჯოუნსიმ კი, – ჩვენო, – უპასუხა.

– როგორ არა, მოკალი. ან ფიქრობ, რომ მოკალი.

– ტყუილია.

– სისულელეა ყველაფრის უარყოფა, მე ხომ შენი მოგონებები მაქვს. აი ისინი, ამ ყუთებიდან ერთ-ერთშია. მასში თოვლია. თოვლი და მოკასინი. ყავისფერი ნატი. გამოდი და შეხედე.

ერთი წამით წარმოიდგინა კიდევც, რომ ჯოუნსი ანკესზე წამოაგო. მაშინ მისტერ გრეი მას დაუყოვნებლივ საავადმყოფოში დააბრუნებდა და ჯოუნსის შეეძლო, საკუთარი სიკვდილი ტელევიზორში ენახა. ბედნიერი დასასრული იმ ფილმისა, რომელსაც ერთად უყურებდნენ. შემდეგ კი, არავითარი მისტერ გრეი. მხოლოდ ის, რაც ჯოუნსის „ღრუბლად“ მიაჩნდა.

მისტერ გრეი მოუთმენლად მიაჩერდა კარის სახელურს, გონებით

უბრძანებდა, მ გადატრიალებულიყო. მაგრამ ასე არ მოხდა.

– გამოდი!

დუმილი.

– რიჩი შენ მოკალი, მშიშარავ! შენ და შენმა მეგობრებმა. თქვენ... თქვენ ის მოსაკლავად დაისიზმრეთ.

და თუმცა მისტერ გრეიმ არ იცოდა, რა იყო სიზმარი და მით უმეტეს – რას ნიშნავდა სიტყვა „დაისიზმრეთ“, გრძნობდა, რომ სიმართლეს ამბობდა. ან იმას, რაც, ჯოუნსის აზრით, სიმართლე იყო.

კვლავ დუმილი.

– გამოდი! გამოდი და... – გამალებით ფურცლავდა ჯოუნსის მოგონებებს. ბევრი მათგანი იმ ყუთებში ეწყო, რომლებსაც „ფილმები“ ეწერა. როგორც ჩანს, ჯოუნსის ყველაზე მეტად სწორედ ისინი მოსწონდა. მისტერ გრეიმ ის ფრაზა შეარჩია, რომელიც, პოტენციურად, სხვებზე უფრო ქმედითი მოეჩვენა, – ვაჟკაცურად შემებრძოლე!

ისევ არაფერი.

ოჰ, შე ნაძირალავ, – გაიფიქრა მისტერ გრეიმ და ერთხელ კიდევ ჩაუშვა ანკესი მასპინძლის ემოციებით სავსე მაცდურ ტბაში, – ბოზიშვილო! ჯიუტო ვირიშვილო! მაკოცე ასობე, ჯიუტო ვირიშვილო!

ჯერ კიდევ მაშინ, როდესაც ჯოუნსი ჯოუნსი, ანუ საკუთარი თავი იყო, ის გაბრაზებას რაიმე მყარ საგანზე მუშტის დარტყმით გამოხატავდა. მისტერ გრეიც ასე მოიქცა და ჯოუნსის მუშტი საჭის ცენტრს დასცხო, საკმარისად ძლიერად, რომ კლაქსონს ხმა გამოეცა.

– მომიყვებ! რიჩიზე არა, დადიტსზე, შენზე! იმაზე, რითაც სხვებისგან გამოირჩევი. ძალიან მინდა ამის გაგება.

სიჩუმე.

– ეს ქრიბია, არა?

პასუხი კვლავ არ ისმოდა, მაგრამ ამჯერად მისტერ გრეიმ ფეხების ფაჩუნი და ამოხვრის მსგავსი რამ გაიგონა. მან ჯოუნსის ტურებით გაიღიმა.

- დამელაპარაკე, ჯოუნსი - ვითამაშოთ, დრო გავიყვანოთ. ვინ იყო რიჩი, გარდა იმისა, რომ ზურგზე ცხრამეტი ნომერი ეწერა? რატომ გაგაბრაზათ? იმიტომ, რომ „ვეფხვს“ ეძახდნენ? „დერელი ვეფხვები“ - ვინ იყვნენ ისინი? ვინ იყო დადიტსი?

სრული სიჩუმე.

სატვირთო მანქანა უწინდელზე უფრო ნელა მიიპარებოდა ქარბუქში. ფარების შუქი თოვლის სქელ ფარდაში თითქმის ვერ ატანდა. მისტერ გრეის ხმა ჩუმად, ძილისპირულივით ისმოდა.

- მინდა გითხრა, რომ შენ დადიტსის ერთი ყუთი ვერ შენიშნე, მეგობარო. მასში კიდევ ერთი იდო - ყვითელი. სკუბი-დუთი. რა არის სკუბი-დუ? ეს ნამდვილი ადამიანი არ არის, ხომ ასეა? ფილმიდან არის? ტელევიზიიდან? გინდა კოლოფი? გამოდი, ჯოუნსი. გამოდი და მოგცემ.

მისტერ გრეიმ გაზის სატერფულიდან ფეხი აიღო და სატვირთო მანქანა მარცხნივ, ნამქერებში გადაიყვანა. იქ რალაც ხდებოდა და უნდოდა, მთელი ყურადღება იქით მიემართა. ჯოუნსის ძალით ვერ გამოიტყუებდა, მაგრამ ძალა ერთადერთი საშუალება როდია ორთაბრძოლის ან ომის მოსაგებად.

სატვირთო მანქანა ზედ დამცავ ბოძებთან გაჩერდა, გამძვინვარებული ქარბუქის შუაგულში. მისტერ გრეიმ თვალეხი დახუჭა და მაშინვე ჯოუნსის მოგონებების გაჩახჩახებულ საცავში აღმოჩნდა. ზურგს უკან, ლუმინესცენციური ლამპების ქვეშ, ვინ იცის, რამდენი მილის სიგრძეზე, შტაბელეზად ეწყო ყუთები. მის წინ კი დაკეტილი კარი იყო, ჭუჭყიანი და ძველი, მაგრამ რატომღაც ძალიან მყარი და გამძლე. მისტერ გრეი მას სამითითა ხელებით მიეყრდნო და ხმადაბლა და დაჟინებით განაგრძო გულწრფელი საუბარი.

- ვინ არის დადიტსი? რატომ დაუძახე რიჩის მოკვლის შემდეგ? შემომიშვი, უნდა დავილაპარაკოთ. რატომ წაიღე ყუთები, რომლებზეც დერი ეწერა? ეს მეორეხარისხოვანია, რადგან ყველაფერი მაქვს, რაც აუცილებელია. შემომიშვი, ჯოუნსი. სჯობს ახლა, ვიდრე

მოგვიანებით.

ამას თითქოს უნდა ემუშავა. იგი ხედავდა ჯოუნსის უსიცოცხლო თვალებს და კარის სახელურისკენ გაწვდილ ხელს.

– ჩვენ ყოველთვის ვიგებთ, – თქვა მისტერ გრემი. მერე საჭესთან მოკალათდა და ჯოუნსის თვალები დახუჭა. სადღაც, სხვა სამყაროში, ქარმა დაიბუზუნა და სატვირთო მანქანა რესორებზე შეახტუნა, – გააღე კარი, ჯოუნსი, ახლა გააღე.

დუმილი. შემდეგ კი სამი დუიმის მანძილიდან გახურებულ სახეში თითქოს ცივი წყალი შეასხესო:

– ჩახეთქე განავალი და ჩაძალღდი.

მისტერ გრეი გაშმაგდა და ისე შეხტა, რომ ჯოუნსის კეფა სატვირთო მანქანის უკანა ფანჯარას მიარტყა. ამას მოულოდნელი და მწვავე ტკივილი მოჰყვა – მეორე უსიამოვნო სიურპრიზი.

მან კვლავ დასცხო მუშტი საჭეს, კიდევ და კიდევ... კლაქსონს კი ეს გაშმაგება მაშინვე გადაჰყავდა მორზეს კოდებში. გულგრილი, უგრძნობი ქმნილება, გულგრილი და უგრძნობი რასის წარმომადგენელი, საკუთარი მასპინძლის ემოციის ტალღებში აღმოჩნდა და იქიდან თავს ვეღარ აღწევდა. მისტერ გრეი გრძნობდა, რომ ეს ყველაფერი ჯოუნსის გამო ხდებოდა. ამ მფეთქავი უცხო სიმსივნის გამო, სადაც უშფოთველ და ფოკუსირებულ გონებას უნდა დაედო ბინა.

მისტერ გრემი კიდევ რამდენჯერმე დაარტყა ხელი საჭეს. ეზიზღებოდა ეს ემოციური ეაკულაცია, რომელიც ჯოუნსის გონებამ ისტერიკად მონათლა, მაგრამ, იმავდროულად, მოსწონდა კიდევ იგი. სიამოვნებდა კლაქსონის ქყვიტინი, როდესაც მას ჯოუნსის მუშტებს ურტყამდა, ჯოუნსის საფეთქლებში სისხლის ჩაქურჩვით ცემა, ტკებობდა ჯოუნსის აჩქარებული მაჯისცემითა და ხრინწიანი ხმით, ერთსა და იმავეს რომ იმეორებდა:

– შე დამპალო ნაბიჭვარო! შე დამპალო ნაბიჭვარო!

მაგრამ ამ საშინელი აღშფოთების მიუხედავად, მისი გონების უგ-

რძნობი ნაწილი მაინც ხვდებოდა, სად იმალებოდა ნამდვილი საფრთხე. ისინი განუწყვეტლივ მიდიოდნენ სხვა სამყაროში და იქ ყველაფერს საკუთარი შეხედულებებისამებრ ცვლიდნენ. ამ დაუწერელ კანონს ყოველთვის იცავდნენ წარსულში და მომავალშიც ასე იქნებოდა.

მაგრამ ახლა...

რალაც მემართება, – გაიფიქრა მისტერ გრეიმ და თავში გაუელვა, რომ ეს აზრიც ჯოუნსის ეკუთვნოდა, – თანდათან ადამიანს ვემსგავსები.

იმის გაცნობიერებამ, რომ ეს აზრი თავისებურად მიმზიდველი იყო, მისტერ გრეის თავზარი დასცა.

## 8

ჯოუნსიმ თავს ძალა დაატანა, მისტერ გრეის ძილისპირულივით დამამშვიდებელ ხმას თავი დააღწია, გამოფხიზლდა და დაინახა, რომ ხელები კარის სახელურსა და ურდულზე დაედო და მის გაღებას აპირებდა. ის ბოზიშვილი მისთვის ჰიპნოზის გაკეთებას ცდილობდა და მიზნისთვის თითქმის მიეღწია კიდეც.

– ჩვენ ყოველთვის ვიგებთ, – თქვა კარის მეორე მხრიდან ნაზმა და ალერსიანმა ხმამ. დაძაბული დღის შემდეგ მისი მოსმენა ერთ რამედ ღირდა, მაგრამ ეს მზაკვრული მახე იყო, დამპყრობელი მანამ არ მოისვენებდა, სანამ თავისას არ გაიტანდა. იგი ყოველთვის ეპოტინებოდა სხვისას, რაც თავისად მიაჩნდა, – გააღე კარი, ჯოუნსი, ახლავე გააღე.

რალაც მომენტში ჯოუნსი კინალამ ასეც მოიქცა, მიუხედავად იმისა, რომ სრულად გამოფხიზლებულიყო, მაგრამ, ბედად, ორი ხმა ჩაესმა: წითელი ობისგან პიტის თავის ქალის საშინელი ტკაცატკუცი და ჯანასის კალმისტრით წამოთხრილი თვალის გაჭყაპუნება.

ჯოუნსი მიხვდა, რომ აქამდე ეძინა და მხოლოდ ახლა გაღვიძებოდა.



ხელები კარს მოაცილა, პირი გასაღების ჭუჭრუტანასთან მიიტანა და მკაფიოდ წარმოთქვა:

– ჩახეთქე განავალი და ჩაძაღლდი.

მაშინვე იგრძნო, რომ მისტერ გრეი უკან გადაქანდა. მისი ტკივილიც გაითავისა, როდესაც მან თავი უკანა ფანჯარას მიარტყა. რატომაც არა? ბოლოს და ბოლოს, ეს ხომ მისი ნერვები იყო. და თავიც, რა თქმა უნდა. მისტერ გრეის გაბოროტებამ და გაოცებამ აქამდე უცხო სიამოვნება მიანიჭა. ჯოუნსიმ ბუნდოვნად გააცნობიერა ის, რაც მისტერ გრეის არ გამოჰპარვია: მის გონებაში მყოფი არსება თანდათან ადამიანურდებოდა.

„თუ შენს ფიზიკურ არსს დაუბრუნდები, კვლავაც მისტერ გრეი იქნები?“ – დაინტერესდა ჯოუნსი. თვითონ ასე არ ფიქრობდა. უფრო მისტერ პინკისკენ<sup>161</sup> იხრებოდა.

არ იცოდა, ისევ მოუნდებოდა თუ არა ამ ტიპს მესიე მესმერის<sup>162</sup> როლის თამაში, მაგრამ გადაწყვიტა, არ გაერისკა. ამიტომ შებრუნდა და ოფისის ფანჯარას მიუახლოვდა. ყუთები ფეხებში ედებოდა, ერთი-ორჯერ წაიბორძიკა კიდეც. ღმერთო ჩემო, როგორ სტეხდა თედო. საშინელება იყო ამის ატანა საკუთარ თავში ჩაკეტილისთვის (ჰენრის მტკიცებით, მას ნერვის ნასახიც არ უნდა ჰქონოდა, ყოველ შემთხვევაში, რუხ ნივთიერებას მაინც). ტკივილი არ ცხრებოდა. ჯოუნსის სადღაც წაეკითხა, რომ ინვალიდები ზოგჯერ აუტანელ ტკივილსა და ქავილს გრძნობენ არარსებულ, მოკვეთილ კიდურებში. შესაძლოა, თვითონაც იგივე ემართებოდა.

ფანჯრიდან მომაბეზრებელი პეიზაჟი მოჩანდა: ორზოლიანი გზა „ძმები თრექერების“ დეპოს გასწვრივ შორეულ 1978-ში. ცა თეთრ ღრუბლებს დაეფარა. წარსულში დრო, როგორც ჩანს, შუადღებზე გაჩერებულიყო. გულს მხოლოდ ის უმშვიდებდა, რომ ფანჯარა მისტერ გრეისგან უშორეს მანძილზე მდებარეობდა.

---

<sup>161</sup> ვარდისფერი

<sup>162</sup> გერმანელი ექიმი, „ცოცხალი მაგნეტიზმის“ სწავლების შემქმნელი.

გრძნობდა, რომ მოენდომებინა, პეიზაჟის შეცვლასაც მოახერხებდა. შეეძლო, გაეხედა და ის დაენახა, რასაც მისტერ გრეი, გარი ჯოუნსის თვალებით ხედავდა. მაგრამ რატომღაც ამის სურვილი ნაკლებად ჰქონდა. ან რა უნდა დაენახა, ქარბუქის გარდა. ვერც ვერაფერს იგრძნობდა – მხოლოდ მისტერ გრეის მოპარულ გააფთრებას.

„სხვა რამეზე იფიქრე“, – უთხრა საკუთარ თავს.

„რაზე?“

„არ ვიცი – რაზეც გინდა. თუნდაც“...

საწერ მაგიდაზე ტელეფონმა დარეკა. ეს იმ ზღაპრის საზომითაც კი უცნაურად მოეჩვენა, როგორცაა „აღლისა საოცრებათა ქვეყანაში“, რადგან ჯერ კიდევ რამდენიმე წუთის წინ იქ არც ტელეფონი ჩანდა და არც – მაგიდა. ველარც მიმოფანტულ ნახმარ პრეზერვატივებს მოჰკრა თვალი. იატაკი ძველებურად ჭუჭყს დაეფარა, ოღონდ კაფელს მტვერი აღარ ემჩნეოდა. ჩანს, მის თავში მოკალათებულ სისუფთავის მოყვარულს თუ დამლაგებელს გადაეწყვიტა, რომ, რადგან ჯოუნსის აქ მოუწევდა ყოფნა, სისუფთავე და ელემენტარული პირობები მაინც ჰქონოდა. ეს იდეა საშინელებად მოეჩვენა, დაფარული აზრი კი – დამთრგუნველად.

მაგიდაზე ტელეფონი კვლავ აწკარუნდა. ჯოუნსიმ ყურმილი აიღო და ჩასძახა:

– ალო!

ბივერის ხმის გაგონებაზე ტანში ჟრუანტელმა დაუარა. მიცვალებულის ზარი... როგორც იმ ფილმებშია, მას რომ მოსწონს. უფრო სწორად, მოსწონდა.

– მას თავი არ ჰქონდა, ჯოუნსი. ის არხში ეგდო, თვალები კი ტალახით მოსვროდა.

გაწკაპუნება და სამარისებური სიჩუმე. ჯოუნსიმ ყურმილი დაკიდა და ფანჯარასთან დაბრუნდა. გზა გამქრალიყო. დერიც. იგი „კედელში გაკეთებულ ხვრელს“ შესცქეროდა განთიადის მქრქალი, მოწმენდილი ცის ქვეშ. სახურავი შავი იყო და არა მწვანე, რაც იმას

ნიშნავდა, რომ ეს 1982 წლამდე ხდებოდა, როდესაც მათი ოთხეული, მაშინ ჯერ კიდევ ჯან-ლონით სავსე, ცელქი მოსწავლე ბიჭები (თუმცა ჰენრის „ჯან-ლონით სავსეს“ ვერ უწოდებდი), ბივის მამას მწვანე კრამიტის დაწყობაში ეხმარებოდნენ. შემდგომში ის აღარასდროს შეუცვლიათ.

მაგრამ ჯოუნსის მსგავსი მინიშნებები არ სჭირდებოდა. ისევე, როგორც შეტყობინება იმის შესახებ, რომ მწვანე კრამიტი აღარ არსებობს. აღარც – „კედელში გაკეთებული ხვრელი“. ჰენრიმ მას ცეცხლი წაუკიდა და გადაწვა. ერთი წამის შემდეგ კარი გაიღებოდა და იქიდან ბივი გამოვარდებოდა. 1978 წელი იდგა. წელი, როდესაც ეს ყველაფერი დაიწყო. წამის შემდეგ ბივი გამოვარდებოდა ტრუსითა და ელვით გაწყობილი მოტოციკლეტისტის ქურთუკით. ნარინჯისფერი ბენდენის ბოლოები მხიარულად შეირხეოდა ქარში. 1978 წელი იდგა, ისინი ახალგაზრდები იყვნენ... და შეიცვალნენ. გაქრა „ახალი დღე, იგივე ნაგავი“. დღე, როდესაც იმის გაცნობიერება დაიწყეს, თუ როგორ შეიცვალნენ.

ჯოუნსი მონუსხულივით იყურებოდა ფანჯარაში.

კარი გაიღო.

იქიდან თოთხმეტი წლის ბივერ კლარენდონი გამოვარდა.

# თავი მეთხუთმეტე

## ჰენრი და ოუენი

### 1

ჰენრი აკვირდებოდა, თუ როგორ მოაბიჯებდა მისკენ თავდახრილი ანდერჰილი პროჟექტორების დამაბრმავებელ შუქში. ჰენრიმ პირი დაალო და ის იყო, მისთვის უნდა დაეძახა, რომ უეცრად ჯოუნსის საოცარი სიახლოვე იგრძნო, რამაც განაცვიფრა და კინალამ მიწას მიასრისა. შემდეგ თავს მოგონებები დაატყდა, რომლებმაც ანდერჰილიც გააქრო და გაჩახჩახებული დათოვლილი სამყაროც. მოულოდნელად იგი კვლავ 1978 წელში აღმოჩნდა, ოღონდ არა ოქტომბერში, არამედ ნოემბერში. იქ იყო სისხლი, სისხლი ლაქაშზე<sup>163</sup>, შუშის ნამტვრევები ჭაობიან წყალში და კარზე ბრახუნი.

### 2

ჰენრის საშინელი სიზმარი აღვიძებს – სისხლი, გატეხილი შუშა,

---

<sup>163</sup> ჭაობის მრავალწლოვანი მცენარე.

საწვავისა და დამწვარი რეზინის მახრჩობელა სუნი, უხეშად გაღებული კარის ხმაური – ღია კარიდან ცივი ჰაერი შემოიჭრა. წამოხტება და გვერდით მჯდომ პიტს ხედავს, რომელსაც უთმო მკერდი დახორკლია. ჰენრისა და პიტს იატაკზე სძინავთ საძილე ტომრებში, რადგან ოთხმა მეგობარმა მონეტა ააგდო და მათ არ გაუმართლათ. ბივი და ჯოუნსი საწოლზე წვანან (მოგვიანებით „კედელში გაკეთებულ ხვრელში“ მესამე საწოლსაც დაამატებენ, მაგრამ ამჟამად მხოლოდ ორი დგას და ერთ-ერთი, უფროსებისთვის ღმერთისგან მინიჭებული უფლებით, ლამარისაა), ოლონდ, ჯოუნსი ახლა მარტოა, წამომჯდარა და აქეთ-იქით გაოცებული და შეშინებული იყურება.

სკუბი-უბი-დუ, სად ხართ, – რატომღაც ასე ფიქრობს ჰენრი და ფანჯრის რაფაზე ხელის ცეცებით სათვალეს ეძებს. ცხვირში ჯერაც ბენზინისა და დამწვარი ბენზინის სუნი სცემს, – სამუშაო გველოდება...

– დაილუპა, – ხრინწიანი ხმით ამბობს საძილე ტომრიდან გამომძვრალი ჯოუნსი. წელს ზემოთ ისიც შიშველია, მაგრამ ჰენრისა და პიტის მსგავსად, ღამით წინდებითა და გრძელი საცვლით წვება.

– ჰო, წყალში ჩავარდა, – ამბობს პიტი. სახეზე ეტყობა, რომ არც კი იცის, რაზე ლაპარაკობს.

– მოკასინი... – ერთვება ჰენრი. მანაც არაფერი იცის, თუმცა არც უნდა რაიმეს ცოდნა.

– ბივი, – ხვნეშის ჯოუნსი, საწოლიდან უხერხულად ჩამოდის და პიტს ხელზე აბიჯებს.

– ვაი! – ყვირის პიტი, – ხელზე დამაბიჯე, ვირო, თვალი გაახილე, სად...

– გაჩუმდი, მოკეცე, – სისინებს ჰენრი და პიტს მხარზე ხელს ადებს, – მისტერ კლარენდონი არ გააღვიძო!

ეს სავსებით შესაძლებელია, რადგან ბიჭების საძინებელი ოთახის კარი ღიაა. ისევე, როგორც მთავარი ოთახისა, ბოლოში. გარეთ

გასასვლელის. ორპირია და სულაც არაა გასაკვირი, რომ ცივა. ახლა, როდესაც ჰენრიმ თვალები დაიბრუნა (ამაზე ახლა ასე ფიქრობს), ჩანს, როგორ ქანაობს სიზმართმჭერი ავგაროზი სუსხიანი ნოემბრის ქარის დინებებში.

– სად არის დადიტსი? – ნამძინარევი ხმით კითხულობს ჯოუნსი, – ბივერთან ერთად გავიდა?

– ის დერიშია, სულელო, – პასუხობს ჰენრი, დგება და თბილ საცვალს იცვამს. სხვათა შორის, მას სულაც არ მიაჩნია ჯოუნსი სულელად, რადგან თვითონაც გრძნობს, რომ დადიტსი ახლახან მათ გვერდით იდგა.

ეს სიზმარი იყო, – ფიქრობს იგი, – დადიტსი დამესიზმრა. მდინარის ნაპირზე იჯდა და ტიროდა. რალაცას გაენაწყენებინა. ოღონდ ეს მას კი არა, ჩვენ გვეხებოდა.

ახლა ღვიძავს, მაგრამ ტირილი მაინც ესმის. ქარს გაღებული კარიდან შემოაქვს. ეს დადიტსი კი არა, ბივია.

სამივენი მწყობრად გადიან სახლიდან, ტანსაცმელს გზადაგზა იცვამენ, ფეხსაცმლის ჩაცმაზე კი დროს აღარ კარგავენ.

კიდევ კარგი, რომ სამზარეულოს მაგიდაზე დახვავებული, მთელი ქალაქის (პატარა მაგიდაზე კი გარეუბნის) სამყოფი ცარიელი ლუდის ქილების გათვალისწინებით, წვრილმანები – გაღებული კარი, ორპირი ქარი და აღელვებული ბიჭები – ბივერის მამას ვერაფრით გააღვიძებდა.

გრანიტის დიდი ფილა, იგივე პარმალი, ჰენრის ფეხებს უცივებს, მაგრამ ამას თითქმის ვერ ამჩნევს.

ის მაშინვე დაინახავს ბივერს, რომელიც მუხლებზე დგას ნეკერჩხლის ფესვებთან (ზემოთ საფარია მოწყობილი) და თითქოს ლოცულობს. ფეხშიშველია, უხელთათმნოდ. მოტოციკლეტისტი ქურთუკი აცვია, მეკობრესავით უფრიალებს ნარინჯისფერი ბენდენების ბოლოები, მკლავებზე მამის დაჟინებული მოთხოვნით რომ დაუმაგ-

რებია, თუმცა თვითონ ამტკიცებდა, ნამდვილ მონადირეს ასეთი სულელური ატრიბუტების ტარება არ შეეძლოს. საკმაოდ სასაცილოდ გამოიყურება, მაგრამ გაწამებულ სახეზე, თითქმის შიშველი ტოტებისკენ რომ მიუმართავს, მსგავსი არაფერი ეტყობა. ბივს ლოყებზე ცრემლები ჩამოსდის.

ჰენრი მისკენ გარბის. პიტი და ჯოუნსი ძლივს ეწევიან. პირიდან ორთქლი ამოსდით. ჰენრის ფეხებქვეშ წიწვებით დაფარული მიწა გრანიტის ფილასავით მყარი და ცივია.

ჰენრი ბივერის გვერდით მუხლებზე ეცემა. შეშინებულია და მის მიმართ ერთგვარ მოკრძალებასაც გრძნობს, რადგან ბივს თვალები ოდნავ სველი კი არ აქვს, კინოგმირივით, რომელმაც მამაკაცური ძუნწი ცრემლი უნდა გადმოაგდოს დაღუპული შეყვარებულის ან ერთგული ძაღლის თავთან, – მისი თვალებიდან ნიაგარას ჩანჩქერი მოჩქეფს. ნესტოებიდან თოკივით ჩამოშვებია გამჭვირვალე მბრწყინავი წვინტლი.

– მაგარია, – ამბობს პიტი.

ჰენრი გაცხარებული მიუბრუნდება, მაგრამ ხედავს, რომ პიტი ბივერს კი არ უყურებს, არამედ იქვე ოხშივარასულ ნარწყევს გუბებს მისჩერებია, რომელშიც მოუნელებელი სიმინდის მარცვლები (ლამარ კლარენდონს მტკიცედ სწამს კონსერვირებული საკვების უპირატესობა ლაშქრობებისა და სხვა მსგავსი ღონისძიებების დროს) და შემწვარი წიწილის ძაფები დაცურავს. ეს წუხანდელი ვახშმის ნარჩენებია. ჰენრის ლამის შიგნეული ამოუტრიალდეს. ბოლოს, მშვიდდება, მაგრამ ამ დროს ჯოუნსის რაღაც აწვება ყელში და აბოყინებს. საზიზლარი ხმაა. იქვე კიდევ ერთი ყავისფერი ნარწყევს მასა ჩნდება.

– მაგარია! – თითქმის ღრიალებს პიტი. მაგრამ ბივერს, როგორც ჩანს, არაფერი ესმის.

– ჰენრი, – ჩურჩულებს ის. თვალები, რომლებიც ძლივს მოუჩანს

ცრემლები სქელი ლინზეებიდან, გაჰფართოებულია. ჰენრის სახეს თითქმის ვერ ამჩნევს, სამაგიეროდ, შეშინებული მისჩერებია მის შუბლს უკან წარმოსახვით ფარულ ოთახებს.

- ბივ, ყველაფერი კარგადაა. უბრალოდ, კომმარი დაგესიზმრა.
- ცხადია, ცუდი სიზმარი ნახა.

ჯოუნსის ხრინწიანი ხმა აქვს: პირში ნარწყვეი ჩარჩენია. ამოხველებას ცდილობს, ყელში რაღაც დაძაბულად, უცნაურად ღმუის, რაც იმაზე უფრო საზიზღარ შთაბეჭდილებას ახდენს, ვიდრე ახლახან ამონთხეული მასა, შემდეგ იგი იხრება და დიდხანს იფურთხება. თითებით საცვალი ჩაუბლუჯავს, გამხდარი ზურგი სიცივისგან გალურჯებია.

მაგრამ ბივი ვერც ჯოუნსის ამჩნევს და ვერც პიტს, რომელიც მის გვერდით მუხლებზე დგას და ხელს გაუბედავად ხვევს მხარზე. ბივი ჰენრის თვალს არ აშორებს.

- მას თავი არ ჰქონდა, - ჩურჩულებს ის.

მუხლებზე ჯოუნსიც ეშვება და ახლა სამივენი მის გარშემო არიან. ჰენრი და პიტი - აქეთ-იქიდან, ჯოუნსი პირდაპირ უდგას. ჯოუნსის ნიკაპზე ნარწყვეის კვალი ემჩნევა. იგი მის მოწმენდას ცდილობს, მაგრამ ბივი ხელზე ხელს სტაცებს. ნეკერჩხლის ქვეშ დარჩილი ბიჭები თითქოს ერთ არსებად ქცეულან, ერთიანობის შეგრძნება ხანმოკლეა, მაგრამ მათი სიზმრებივით კაშკაშა და ცოცხალი. ეს არის კიდევ სიზმარი, მაგრამ ახლა ისინი ფხიზლობენ, ყველა აზრი რაციონალურია, სამყარო კი რეალური.

ბივი შეშინებულ თვალებს, ამჯერად, ჯოუნსის მიაპყრობს და ხელზე ხელს მოუჭერს.

- ის არხში ეგდო და თვალები ტალახით მოსვროდა.
- ჰო, - ამბობს ჯოუნსი ათრთოლებული ხმით, - ოჰ, ღმერთო ჩემო, ეს მართლაც ასე იყო.
- ასე თქვა, კიდევ შევხვდებითო, ხომ გახსოვთ? - კითხულობს პიტი, - ცალ-ცალკე ან ყველა ერთად. ასე თქვა.



ჰენრის ეს ყველაფერი შორიდან ესმის, რადგან ის კვლავ სიზმარში დაბრუნდა. იქ, სადაც ეს მოხდა. დანაგვიანებულ მიწაყრილთან, გაჭედილი სადრენაჟო მილის წყლისგან დამდგარ პატარა აყროლებულ ჭაობთან. მან იცის ის ადგილი, მეშვიდე გზატკეცილზეა, დერინიუპორტის ძველ გზაზე. სიბნელეში, ლემნით დაფარულ წყალში ცეცხლმოკიდებული ამოყირავებული მანქანა გდია. ქარი ბენზინისა და დამწვარი საბურავების სუნს ფანტავს. დადიტსი ტირის. დადიტსი დანაგვიანებულ ფერდობზე ზის, გულში სკუბი-დუს ყვითელი კოლოფი ჩაუკრავს და გულის მომკვლელად ქვითინებს.

გადაყირავებული მანქანის ერთ-ერთი ფანჯრიდან ხელია გადმოკიდებული – გამხდარი, მკვეთრი წითელი ფრჩხილებით. ორი კაცი გარეთ გდია. ერთ-ერთი, თითქმის ოცდაათი ფუტის დაშორებით, პირქვეა დამხობილი, მაგრამ ჰენრი მას გასისხლიანებული ქერა თმით ცნობს.

ეს დუნკანია, სწორედ ის, რომელმაც თქვა, ვერავის ვერაფერს მოუყვებით, რადგან მიცვალებულები არ ლაპარაკობენო. ოღონდ სიკვდილმა თვითონ დუნკანს უწია.

რალაც მიცურავს ჰენრის ფეხთან.

– ხელი არ ახლო! – ყვირის პიტი, მაგრამ ჰენრი არ უსმენს. მას თვალეზთან მიაქვს ყავისფერი ნატის მოკასინი და ხედავს, რაც არის. სწორედ ამ დროს შეშინებული ბივერი და ჯოუნსი ბავშვურად ხმა-შეწყობილად გაჰკვივიან. ისინი კოჭებამდე სიბინძურეში დგანან. ორივეს მონადირის ტანსაცმელი აცვია: ჯოუნსის – „სირსის“ მაღაზიაში ამ მგზავრობისთვის საგანგებოდ შექმნილი ხასხასა ნარინჯისფერი კაპიუშონიანი ქურთუკი (მისის ჯოუნსი კვლავინდებურად მოთქვამს, რატომღაც დარწმუნებულია, რომ მის შვილს შემთხვევითი ტყვია მოხვდება და გაფურჩქნის ასაკში მოკლავს), ბივერს – მოტოციკლეტისტის საკმაოდ დაძენძილი ქურთუკი („ოჰ, რამდენი ელვაშესაკრავია!“ – შესძახა აღფრთოვანებულმა დადიტსის დეიამ,

რითაც სამუდამოდ დაიმსახურა ბივერის სიყვარული და აღფრთოვანება), რომლის სახელოებზეც ნარინჯისფერი ბენდენები შემოუხვევია. ისინი თვალს არიდებენ მძლოლის მხრიდან კართან გაწოლილ მესამე სხეულს, მხოლოდ ჰენრი (მას ხელში ისევ მოკასინი, ეს პატარა ნახევრად ჩაძირული კანოე უჭირავს) გახედავს მას სწრაფად. დანარჩენები თვალს არიდებენ, რადგან მისი საქმე ცუდადაა, გამოუწვრებლად, ტრაგიკულად, იმდენად ცუდად, რომ ჰენრი თავდაპირველად ვერც კი აცნობიერებს მიზეზს. შემდეგ ხვდება, რომ სასკოლო ქურთუკის მაღალი საყელოს ზევით არაფერი მოჩანს. ბივერი და ჯოუნსი ყვირიან, რადგან ყველაზე ადრე შეამჩნევენ იმას, რაც იქ უნდა ყოფილიყო – მათ რიჩი გრენადოს თავი დაინახეს, რომელიც სახით ზემოთ ეგდო. გაყინული თვალეები ცას მისჩერებოდა. იქვე სისხლით მოთხვრილი ლაქაშის ღეროები ირხევა. ჰენრი მაშინვე ცნობს რიჩის, მისი ცხვირის ძგიდეს სალბუნი აღარ ამშვენებს, მაგრამ განა, შეიძლება იმ ბიჭის დავიწყება, რომელიც „თრექერების“ მიტოვებული შენობის უკან დადიტს განავლის ჭამას აძალებდა?

დადიტსი კი შემალღებულ ადგილას ზის და გულდათუთქული ტირის. ეს ტირილი გრიპოზული თავის ტკივილივით შემოიჭრება, ჰენრის ტვინს უბურღავს და აგიჟებს. ის ხელს უშვებს მოკასინს, რომელიც წყალში ტყაპანით ეცემა, და იქით მიდის, საითაც ერთმანეთს ჩაბლაუჭებული ბივერი და ჯოუნსი დგანან.

– ბივერ! ბივ! – ღრიალებს ჰენრი, სანამ ახლოს არ მივა და ბივს არ შეანჯღრევს. ბივი გათიშულივით მისჩერებია მოგლეჯილ თავს.

ბოლოს შეამცივნებს, მოიბუზება და განაცხადებს:

– მას თავი არ აქვს, – თითქოს ამას მის გარდა ვერავინ ხედავდეს, – ჰენრი, მას არ აქვს...

– შეეშვი მის თავს, დადიტსს მიხედე! როგორმე შეაწყვეტინე ეს საშინელი ტირილი!

– ჰო, – თავს უქნევს პიტი, უკანასკნელად შეხედავს თავს, ზედ

აღბეჭდილ სასიკვდილო გამომეტყველებას და ზურგს შეაქცევს. ტუჩები ნერვიულად უცახცახებს, – საშინლად გამაღიზიანებელია!

– დაფაზე ცარცის წრიპინს ჰგავს, – ბურტყუნებს ჯოუნსი. მოელვარე ნარინჯისფერ ფონზე მის კანს დამძაღებული ყველის საეჭვო სიყვითლე დაჰკრავს, – იქნებ გააჩუმო, ბივ.

– ჩუ-უ-უ...

– რამ გამოგათაყვანა! ის დაწყევლილი სიმღერა უმღერე! – ყვირის ჰენრი და ფეხის თითებს შორის ჭაობის ტალახს გრძნობს, – იავნანა, დალახვროს ეშმაკმა, იავნანა!

წამით ბივერი გაოგნებული იყურება. შემდეგ თანდათანობით სახე უნათდება, ხვდება, მისგან რასაც მოითხოვენ, თავს უქნევს და მიწაყრილისკენ მიემართება, სადაც დადიტსი ზის. მკერდზე ყვითელი კოლოფი მიუკრავს და გულამოსკვნილი ტირის, როგორც მათი შეხვედრის პირველ დღეს. ჰენრი მხოლოდ ახლა ხედავს იმას, რაც თავდაპირველად მხედველობიდან გამორჩათ: დადიტსის ცხვირქვეშ შემხმარ სისხლსა და მკლავზე გაკეთებულ სახვევს, საიდანაც თეთრი პლასტმასის მსგავსი რაღაც ამოჩრილა.

– დადიტს, – ამბობს ბივი და უახლოვდება, – დადი, ნუ სტირი, ჩემო კარგო. აღარ იტირო და ამას ნულარ შეხედავ, ეს საშენო არაა, შენ ისედაც...

თავიდან დადიტსი ყურადღებას არ აქცევს და ტირილს განაგრძობს. იმდენი უტირია, რომ ცხვირიდან სისხლი წამოსვლია, ეს ამკარაა, მაგრამ რა მოუჩანს მხარზე თეთრად? – ფიქრობს ჰენრი.

ჯოუნსიმ ყურებზე ხელები მიიფარა. პიტს ერთი ხელი კინკრიხობზე დაუდევს, თითქოს ეშინია, რომ ქარმა არ წაართვას. ამ დროს ბივერი დადიტსს მოეხვევა, როგორც ეს რამდენიმე კვირის წინ მოხდა, და მაღალი სუფთა ხმით იწყებს სიმღერას, რაც ბივის მსგავსი მუტრუკისგან უცნაური მოსასმენია.

– პატარის ნავი ვერცხლისფერი სიზმარია, რომელიც ახლოსაც დაცურავს და შორსაც...

და, ოჰ, ღმერთო ჩემო, სასწაულია! დადიტსი მშვიდდება.

– სად ვართ, ჰენრი? – ამბობს პიტი ტურჩების გაუნძრევლად, – სად ჯანდაბაში ვართ?

– სიზმარში, – პასუხობს ჰენრი და ოთხივენი მაშინვე „კედელში გაკეთებული ხვრელის“ გვერდით, ნეკერჩხლის ხის ძირში დაჩოქილნი აღმოჩნდებიან. საცვლების ამარა და სიცივისგან აკანკალებულუები.

– რა? – ჯოუნსი ხელს გამოსტაცებს და პირს იწმენდს. ერთიანობის გრძნობა ქრება და გარინდებას რეალობა ცვლის, – რა თქვი, ჰენრი?

ჰენრი გრძნობს, როგორ სცილდება მათი ფიქრები ერთმანეთს და ფიქრობს: ეს არაფერში გვეჭირდებოდა. არ შეიძლება ჩვენი ერთად ყოფნა. ზოგჯერ მარტო ყოფნა ჯობს. მოწმეების გარეშე.

დიახ, მარტო. საკუთარ ფიქრებთან.

– ცუდი სიზმარი ვნახე, – ამბობს ბივერი, თითქოს მეგობრებს კი არა, საკუთარ თავს უხსნიდეს. ქურთუკის ჯიბეს ნელა, დაჰიპნოზებულივით იხსნის, ჯოხზე წამოცმულ შაქარყინულს იღებს, ქალაქის მოუცლელად იღებს პირში ჯოხის მხრიდან და ღეჭავს, – დამე-სიზმრა...

– მაგას მნიშვნელობა არა აქვს, – აწყვეტილებს ჰენრი და სათვალეს ისწორებს, – ისედაც ვიცი, რა დაგესიზმრა.

აბა რა იქნება, ყველანი იქ ვიყავით, – ენის წვერზე ადგას ეს ფრაზა, მაგრამ თქმისგან თავს იკავებს. თოთხმეტი წლისა საკმაოდ ჭკვიანია და იცის, რომ სიმართლეს ყოველთვის არ მოაქვს სარგებლობა, – ჩამოხვალ, ნათამაშებია, როგორც „რამის“ ან „შეშლილი რვიანების“ თამაშის დროს ამბობენ, როცა ვიღაც სულელი დაუფიქრებლად ჩამოდის კარტს. თუ ამას ხმამაღლა იტყვის, მასთან ერთად მთელი ცხოვრების გატარება მოუწევს. თუ არა და... იქნებ ყველაფერი თავისით მოგვარდეს.

– არა მგონია, ეგ შენი სიზმარი იყოს, – თავს აქნევს პიტი, – ჩემი

აზრით, დადიტის სიზმარია და ჩვენ, ყველანი...

– ფეხებზე მკიდია, რას ფიქრობ! – ისე უხეშად ამბობს ჯოუნსი, რომ დანარჩენები იბნევიან, – ეს სიზმარი იყო და მისი თავიდან ამოგდება მსურს. ჩვენ ის თავიდან უნდა ამოვიგდოთ, არა, ჰენრი?

ჰენრი სასწრაფოდ ეთანხმება თავის დაქნევით.

– სახლში შევიდეთ, – ამბობს პიტი, – ფეხები გამე...

– აი, რას გეტყვით, – ამბობს ჰენრი და სამივენი მოუსვენრად მი-  
აჩერდებიან, რადგან იმ შემთხვევებში, როდესაც ლიდერი სჭირდებ-  
ათ, ამ ფუნქციას ჰენრი საკუთარ თავზე იღებს.

და თუ ეს არ მოგეწონათ, – ფიქრობს აღშფოთებული, – ისე მო-  
იქეცით, როგორც გინებოთ. ვნახოთ, რას გააკეთებთ. დამიჯერეთ,  
ეს უბრალო თამაში არაა.

– რას? – ეკითხება ბივერი და გულისხმობს: კიდევ რას?

– როდესაც გოსლინთან შევივლით, დადს დაფურეკოთ. იქნებ,  
ცუდ ხასიათზეა.

ხმას არავინ იღებს. ჭკუასუსტ მეგობართან დარეკვის იდეა ყვე-  
ლას აცვიფრებს. ჰენრის დროზე ახსენდება, რომ დადიტისთვის  
ცხოვრებაში, შესაძლოა, ჯერ არავის დაურეკავს. ეს პირველი შემ-  
თხვევა იქნება.

– ვფიქრობ, სწორს ამბობს, – ეთანხმება პიტი და მაშინვე პირზე  
ხელს იფარებს, თითქოს რაღაც აკრძალული წამოსცდაო.

თითქმის შიშველი ბივერი, თუ მის სულელურ ტრუსსა და სრუ-  
ლიად შეუფერებელ ქურთუკს არ ჩავთვლით, სიცივისგან კანკა-  
ლებს. შაქარყინულის ბურთი დაღეჭილი ჯოხის ბოლოზეა ჩამოკი-  
დებული.

– ოდესმე ეგ ჯოხები ყელში გაგეჩხირება, – ეუბნება ჰენრი.

– დედაჩემიც მაგას მეუბნება. წავედით? სულ გავიყინე.

ისინი იმ სახლისკენ მიემართებიან, სადაც ოცდასამი წლის შემ-  
დეგ მათ მეგობრობას ბოლო მოეღება.

– როგორ გგონიათ, რიჩი გრენადო მართლა მოკვდა? – კითხულობს ბივერი.

– არ ვიცი და არც მაინტერესებს, – ამბობს ჯოუნსი და ჰენრის მიმართავს:

– კარგი, დავურეკოთ დადიტს. ტელეფონი მაქვს. ასე რომ, ხარჯიც ჩემია.

– საკუთარი ტელეფონი? – შურს პიტს, – აი, ილბლიანი! შენები უსინდისოდ განებივრებენ, გარი.

ეს ყველაზე სწორი გზაა ჯოუნსის გასალიზიანებლად, ამ სახელის გაგონებაზე წამსვე იფეთქებს ხოლმე. მაგრამ არა დღეს. ამისთვის არ სცხელა.

– ჯერ ერთი, დაბადების დღეზე მაჩუქეს. მეორეც – საქალაქთაშორისო ზარების საფასურს ჩემი ჯიბიდან ვიხდი, ასე რომ, ენა დაიმოკლე. თანაც ეს არასოდეს მომხდარა – არასოდეს მომხდარა, გასაგებია?

ყველანი თავს უქნევენ. არასდროს მომხდარა, არასდროს, ამის დედაც! ..

### 3

მონაქროლმა ქარმა ჰენრი შეატორტმანა და კინალამ მავთულ ხლართზე მიაგდო. გამოერკვა, მოგონებები მტვერივით ჩამოიფერთხა. ამათაც იპოვეს დრო თავში შესაძრომად (ამგვარი მოგონებებისთვის შესაფერისი დროის გამონახვა ყოველთვის ჭირს). ამდენი ხანი ელოდა ანდერჰილს, კინალამ გაიყინა, რათა აქედან თავის დაღწევის ერთადერთი შანსი ხელიდან არ გაეშვა, და, აჰა! სანამ ყეყერივით იდგა ფიქრებში ჩაძირული, ანდერჰილს შეეძლო, წასულიყო და ამ ნეხვის ორმოში დაეტოვებინა.

მაგრამ ანდერჰილი არ წავიდა. ლობის მეორე მხარეს ჯიბეებში ხელჩაწყობილი იდგა და ჰენრის შესცქეროდა. ფიფქები ნილბის გამ-

ჭვირვალე საფარზე ეფინებოდა, მაშინვე დნებოდა და ქვევით მიემართებოდა, როგორც...

ბივერის ცრემლები იმ დღეს, – გაიფიქრა ჰენრიმ.

– აჯობებს, ბოსელში დაბრუნდეთ, სხვებთან, – უთხრა ანდერჰილმა, – სანამ თოვლის პაპად არ ქცეულხართ.

ჰენრის ენა კბილებზე მიეყინა. გადაუჭარბებლად შეიძლება ითქვას, მისი სიცოცხლე იმაზე იყო დამოკიდებული, თუ რას ეტყოდა ამ კაცს, არადა, ვერაფრით მოეფიქრებინა, საუბარი რით დაეწყო. სიტყვაც კი ვერ ეთქვა.

„რატომ წვალობ? – მზაკვრულად შეაპარა შინაგანმა, წყვილადის, მისი ძველი მეგობრის ხმამ, – თავს რად იტანჯავ? რატომ არ აკეთებ იმას, რაზეც ამდენი ხანია, ოცნებობ?“

იმიტომ, რომ ეს მხოლოდ მას არ შეეხებოდა. იმიტომ, რომ ახლა მხოლოდ საკუთარ თავზე არ უნდა ეფიქრა. და მაინც ვერ ლაპარაკობდა.

ანდერჰილი ცოტა ხანს კიდევ იდგა მასზე მიჩერებული. ხელები ჯიბეებში ჩაეწყო. გადაწეული კაპიუშონიდან მოკლედ შეკრეჭილი ქერა თმა მოუჩანდა. თოვლი სწრაფად აღნებოდა ნილაბზე, რომელსაც ახლა მხოლოდ ჯარისკაცები ატარებდნენ და არა დაკავებულები, რადგან პატიმრებს ის არ დასჭირდებოდათ: მათთვის, ისევე, როგორც რუხი კაცუნებისთვის, განაჩენი გამოტანილი იყო.

ჰენრი ვერა და ვერ ახერხებდა საუბრის დაწყებას. ოჰ, ღმერთო ჩემო, მის ადგილზე ახლა ჯოუნსი უნდა ყოფილიყო – გატლექილი. ანდერჰილი წავიდოდა და მარტო დატოვებდა უამრავ „იქნებ“-თან და „რომ“-თან ერთად.

მაგრამ ანდერჰილი შეეყოვნდა.

– არაფერია საოცარი იმაში, რომ ჩემი სახელი იცით, მისტერ... ჰენრეიდ? ასე გქვიათ, არა?

– დევლინი. თქვენ ჩემი სახელის გამოცნობა სცადეთ. მე გარი დევლინი ვარ.

ჰენრიმ ფრთხილად გაუწოდა ხელი მავთულებს შორის, მაგრამ ანდერჰილი ცივად მისჩერებოდა და ჰენრიმ ხელი უკანვე წაიღო, თავის ახალშეძენილ სამყაროში, თან საკუთარ თავს უკანასკნელი სიტყვებით ლანძღავდა, – რა იდიოტი ხარ, წვეულებაზე მისული ადამიანივით იქცევით.

ანდერჰილმა თავი ზრდილობიანად დაუკრა, თითქოს მართლაც წვეულებაზე იყვნენ და არა თვალისმომჭრელი შუქით გაჩახჩახებულ მინდორში, სადაც საშინელი ქარბუქი მძვინვარებდა.

– თქვენ ჩემი სახელი იმიტომ იცით, რომ ჯეფერსონტრექტზე უცხოპლანეტელთა ყოფნამ დაბალი დონის ტელეპათიური ეფექტი გამოიწვია, – გაელიმა ანდერჰილს, – სულელურად ჟღერს, არა? თუმცა ამას ვერსად გავექცევით. თუმცა, ეს ზემოქმედება წარმავალია, სრულიად უვნებელი და ძალზე სუსტი საიმისოდ, რომ კაცმა რამეში გამოიყენოს, კარტის თამაშის გარდა, ჩვენ კი დღეს ძალზე ბევრი საქმე გვაქვს და მსგავს სისულელეებზე დროს ვერ დავკარგავთ.

ჰენრი, ბოლოს და ბოლოს, ცოტათი გამოცოცხლდა.

– ასეთ ქარბუქში მხოლოდ იმისთვის არ მოხვიდოდით, რომ თქვენი სახელი ვიცოდით, – თქვა ჰენრიმ, – მიზეზი უფრო ის უნდა იყოს, რომ თქვენი მეუღლისა და ქალიშვილის სახელები გითხარით.

ანდერჰილი კვლავ იღიმებოდა.

– შესაძლოა, ასეც იყოს. ნებისმიერ შემთხვევაში გთავაზობთ, რომ ჩვენ-ჩვენს გზას ვეწიოთ. ხანგრძლივი და რთული დღე გვექონდა.

იგი ღობეს ტრიალერებისა და მისაბმელების მიმართულებით გაუყვა. ჰენრი ძლივს ეწეოდა, თუმცა ძალ-ღონეს არ ზოგავდა: გზაზე დაახლოებით ერთი ფუტი სიმაღლის თოვლი იდო, რომელიც მისი მხრიდან – მიცვალებულების მხრიდან – გაკვალული არ იყო.

– მისტერ ანდერჰილ! ოუენ! ერთი წუთით გაჩერდით და მომისმინეთ. მნიშვნელოვანი რამ უნდა გითხრათ.



ანდერჰილი ღობეს თავის ნახევარზე მიუყვებოდა (ესეც მიცვალებულების მხარე იყო, ნუთუ, ანდერჰილმა არ იცოდა?), თავი დაეხარა, კვლავაც თავაზიანად იღიმებოდა. სიმართლე ითქვას, შეჩერება უნდოდა, მაგრამ ჰენრი ჯერჯერობით ხელმოსაჭიდს ვერაფერს სთავაზობდა.

– კურცი შეშლილია, – თქვა ჰენრიმ. იგი კვლავაც კვალში ედგა ანდერჰილს, მაგრამ სუნთქვა უჭირდა. გაწამებული ფეხები შესვენებას სთხოვდა, – მაგრამ მელასავით ეშმაკი.

ანდერჰილი სიარულს განაგრძობდა, თავი დაეხარა, იდიოტური ნიღბის ქვეშ ღიმილს არ იშორებდა. სისწრაფეს მოუმატა კიდევ. თუ ასე გააგრძელებდა, ჰენრის სირბილზე გადასვლა მოუწევდა. შეძლებდა კი სირბილს?

– ტყვიამფრქვევს მოგვიშვერთ, – ამბობდა სუნთქვაშეკრული ჰენრი, – გვამებს ბოსელში დაყრით, ბენზინს გადაასხამთ, ალბათ ბებერი გოსლინის ბენზინის სვეტიდან, რათა სახელმწიფო მარაგი არ დაიხარჯოს, შემდეგ კი – ბუჰ! და ყველაფერი ცეცხლსა და კვამლში გაეხვევა... ორასი... ოთხასი ადამიანი... შემწვარი ხორცის ჯოჯოხეთური სუნი.

ანდერჰილს სახიდან ღიმილი გაუქრა და წინ გავარდა. ჰენრიმ ღონე მოიკრიბა და მიჰყვა. ჰაერს ხარბად ისუნთქავდა, მუხლებამდე თოვლს მიარღვევდა. ქარი სახეში მათრახივით სცემდა.

– მაგრამ, ოუენ... ეს ხომ თქვენ ხართ?.. ოუენ... ხომ გახსოვთ ძველი სიმღერა – დიდ რწყილებს პატარა რწყილები ჰყავთ, იმათ კიდევ უფრო პატარები, და ყველანი ერთმანეთს კბენენ... და ასე შემდეგ და ასე შემდეგ... და ასე შემდეგ უსასრულობამდე?.. ეს ჩვენც გვხება, რადგან კურცს თავისი დამხმარე ჰყავს, გვარად ჯონსონი, თუ არ ვცდები, არა?

ანდერჰილმა მას გამგმირავი მზერა ესროლა, თუმცა ნაბიჯი არ შეუწუნებია. ჰენრი ჯიუტად მისდევდა. გრძნობდა, რომ ველარ გა-

უძლებდა. გვერდში რალაც ჩხვლეტდა. ოფლში იწურებოდა და სიცხისგან სული ეხუთებოდა.

- ამის გაკეთება, წესით... თქვენთვის უნდა დაევალებინათ... წმენდის მეორე ნაწილი... „იმპერიალის ხეობისა“, რაც... კოდური სახელწოდებაა... ეს რამეს გეუბნებათ?

არა, არაფერს ეუბნებოდა. როგორც ჩანს, კურცმა ანდერჰილს არაფერი უთხრა იმ ოპერაციის შესახებ, რომლის მიზანიც „ცისფერი ჯგუფის“ მთლიანად განადგურება იყო. ოუენს არაფერი გაეგონა „იმპერიალის ხეობის“ შესახებ. ჰენრიმ იგრძნო, რომ გვერდში ჩხვლეტას ახლა მკერდზე შემოჭერილი ფოლადის სარტყელიც დაემატა, რომელიც სულ უფრო უჭერდა.

- შეჩერდით... ღვთის გულისთვის... ანდერჰილ... ხომ არ შეგიძლიათ...

მაგრამ ანდერჰილი კვლავ დიდი ნაბიჯებით მიიჩქაროდა. მას უკანასკნელი ილუზიების შენარჩუნება სურდა და ეს არც გაემტყუნებოდა.

- ჯონსონი... კიდევ რამდენიმე ადამიანი... ერთი ქალი მაინც... შესაძლოა, თქვენც ყოფილიყავით, მაგრამ შეგეშალათ... ზღვარს გადახვედით... ის ასე ფიქრობს... და ეს პირველად არ მომხდარა... ადრეც შეგემთხვათ ბოსა ნოვაში...

კიდევ ერთი გამგვირავი მზერა. პროგრესი? შესაძლოა.

- ვფიქრობ, ბოლოს... ჯონსონსაც მოკლავენ... მხოლოდ კურცი გადარჩება... დანარჩენები... მხოლოდ ფერფლისა და ძვლების გროვა დარჩება... თქვენმა აკვიატებულმა ტელეპათიამ... არ გიკარნახათ ეს... პატარა სალონური ტრიუკი... აზრების წაკითხვა... გამოგორჩათ... გამოგეპარათ...

ტკივილმა გვერდიდან ილლიამდე დაუარა, ფეხქვეშ მიწა გამოეცალა, ჰენრიმ ხელები აიქნია და თოვლში პირქვე დაეცა. ჰაერის უკმარისობისგან ფილტვები გასკდომაზე ჰქონდა. ხარბად შეისუნთქა ჰაერი და პირში ხელით თოვლი ჩაიყარა.

ჰენრი მუხლებზე ფურთხებითა და თავის ქნევით წამოდგა – სწორედ რომ დროულად, რათა დაენახა, რომ ანდერჰილის ზურგი სადაცაა ჩამოშვებული თეთრი ფარდის უკან გაუჩინარდებოდა. არ იცოდა, რა ეთქვა, მაგრამ ხვდებოდა, რომ ეს უკანასკნელი შანსი იყო და შესძახა:

– თქვენ მისტერ რეიპლოუს კბილის ჯაგრისზე მოშარდვა სცადეთ და როდესაც ეს ვერ მოახერხეთ, თეფში გატეხეთ! გატეხეთ თეფში და იქიდან მოუსვით! როგორც ახლა აპირებთ, დამპალო მშიშარავ!

თითქმის გაუჩინარებული ოუენ ანდერჰილი შეჩერდა.

#### 4

ორიოდე წამის განმავლობაში ზურგშექცევით იდგა, ჰენრი კი სუნთქვაშეკრული თოვლში მუხლებზე დაეცა. გაწითლებულ სახეზე თოვლი აღნებოდა. გონების რომელიღაც ნაწილით აღნიშნა, რომ ნაკაწრი, რომელშიც ბაირუსი იზრდებოდა, ექავებოდა.

ბოლოს ანდერჰილი შემოტრიალდა და მისკენ წამოვიდა.

– საიდან იცით რეიპლოუს შესახებ? ტელეპათია სუსტდება და ასე ღრმად შელწევას ვერ შეძლებდით.

– მე ბევრი რამ ვიცი, – თქვა ჰენრიმ და წამოდგა, მაგრამ სუნთქვაშეკრულს ხველა აუტყდა, – რადგან ჩემში ბევრი რამ არის ჩადებული. მე სხვანაირი ვარ. ისევე, როგორც ჩემი მეგობრები. ოთხნი ვიყავით. ორი მოკვდა. მე აქ ვარ. მეოთხე... მისტერ ანდერჰილ, თქვენი პრობლემა ის მეოთხეა და არა ბოსელში გამომწყვდეული ხალხი, თქვენი „ცისფერი ჯგუფი“, კურცის თანაშემწე ან „იმპერიის ხეობა“. მხოლოდ ის.

ჰენრი საკუთარ თავს ებრძოდა – სახელის წარმოთქმა არ სურდა. ჯოუნსისთან ყველაზე ახლოს იყო. ბივერი და პიტი შესანიშნავი ბიჭები იყვნენ, მაგრამ მხოლოდ ის და ჯოუნსი აზროვნებდნენ ერთი და იმავე კატეგორიებით. ერთი მიმართულებით. მხოლოდ მასთან

შეეძლო უსიტყვოდ საუბარი. მხოლოდ ჯოუნსის შეეძლო ხაზის დანახვა და იმავდროულად ოცნებებში ნებისმიერ ზღვარს მიღმა წასვლა. თუმცა ჯოუნსი აღარ იყო. ჰენრის ამაში ეჭვი არ ეპარებოდა. იმ დროს, როდესაც შავ-წითელმა ღრუბელმა ჩაუქროლა, ის ჯერ კიდევ არსებობდა, უფრო სწორად, თვითონ კი არა, მისი პატარა ნაწილი, მაგრამ ახლა მის მეგობარს მთლიანად დაუფლებოდნენ. მართალია, გული უცემდა და თვალებითაც ხედავდა, მაგრამ ნამდვილი ჯოუნსი ისევე დაღუპულიყო, როგორც პიტი და ბივი.

– თქვენი პრობლემა – ჯოუნსია. გარი ჯოუნსი მასაჩუსეტსის ქალაქ ბრუკლინიდან.

– არა მარტო ჩემი, არამედ კურცისაც, – ანდერჰილი ძალზე ჩუმად ლაპარაკობდა და ქარის ხმაურში მისი სიტყვების გაგება შეუძლებელი იყო, მაგრამ ჰენრიმ მაინც გაიგონა... თავით, ტვინით გაიგონა.

ანდერჰილმა მიიხედ-მოიხედა. მას ჰენრიმაც მიჰბაძა და თვალი მოჰკრა ხალხს, რომლებიც ლობიდან საკმაოდ შორს, ტრაილერებსა და მისაბმელებს შორის, ბილიკზე დარბოდნენ. მაგრამ მალაზიისა და ბოსლის გარშემო ყველაფერი გაჩახჩახებული იყო და ქარის ზუზუნშიც კი ესმოდა ძრავების ღმუილი, გენერატორების დაძაბული გუგუნი და ჯარისკაცების შეძახილი. ვიღაც ბრძანებებს მეგაფონით გასცემდა. ისეთი შთაბეჭდილება რჩებოდა, თითქოს ორივე მათგანისთვის შტორმს მოჩვენებათა სამყოფელში მოესწრო. აქეთ-იქით მორბენალი ადამიანები თოვლის სქელ საბურველში ერთმანეთის მიყოლებით ქრებოდნენ და მართლაც მოჩვენებებს ჰგავდნენ.

– აქ ვერ ვილაპარაკებთ, – თქვა ანდერჰილმა, – ყურადღებით მომისმინეთ და ერთი სიტყვაც არ გამამეორებინოთ, მეგობარო.

ჰენრის თავში, სადაც უამრავი ინფორმაცია და სხვათა აზრები დაშლილი ფაზლივით ერთმანეთში არეულიყო, საიდანღაც ოუენ ანდერჰილის მკაფიო და ნათელი აზრი გაჩნდა: „მეგობარი“ მისი სიტყვაა. ვერ დამიჯერებია, რომ მისი სიტყვა გამოვიყენე!

– გისმენთ, – მიუგო ჰენრიმ.

## 5

ფარდული ბოსლის მოპირდაპირე მხარეს მდებარეობდა და თუმცა, კარს იქით სივრცე ისევე გაჩახჩახებული იყო, როგორც მთელი ის ჯოჯოხეთური საკონცენტრაციო ბანაკი, შიგნით ბინდბუნდი იდგა და თივის სასიამოვნო სუნი იგრძნობოდა. და კიდევ რაღაცის სუნი, ოდნავ უფრო მძაფრი.

მეორე ბოლოში გვერდიგვერდ ნარინჯისფერ ყილეტებში გამოწყობილი ოთხი მამაკაცი და ერთი ქალი იჯდა. ზურგით კედელს მიყრდნობოდნენ და ერთმანეთს მოსაწევს აწვდიდნენ. ფარდულს სულ ორი ფანჯარა ჰქონდა. ერთი ბაკს გაჰყურებდა, მეორე – ლობესა და ტყეს. ჭუჭყიანი შუშა ოდნავ არბილებდა თვალისმომჭრელ შუქს. განწირულებს სახეზე ნაცრისფერი, მკვდრისფერი დასდებოდათ.

– გინდა? – დაძაბული ხმით, თითქმის ვედრებით ჰკითხა ერთერთმა და ხელი, რომელშიც მოსაწევი ეჭირა, მზადყოფნით გაუშვირა. ჰენრიმ დაინახა, რომ ეს მარიხუანა იყო, გრძელი, წვრილი სიგარეტი.

– არა. მინდა, რომ აქედან ყველანი წახვიდეთ, – თქვა ჰენრიმ.

ისინი გაოცებით მიაჩერდნენ. ქალი იმ კაცზე იყო დაქორწინებული, რომელსაც ხელში მოსაწევი ეჭირა, მარცხნივ მჯდომი მაზლად ეკუთვნოდა. დანარჩენი ორნი კი მხოლოდ თავის რიგს ელოდნენ.

– ბოსელში დაბრუნდით, – გაიმეორა ჰენრიმ.

– არ გამოვა, – გაისმა ვიღაცის ხმა, – იქაურობა გადატენილია.. აქ უფრო ხალვათად ვართ. და ვინაიდან ეს ადგილი პირველად ჩვენ დავიკავეთ, თქვენ კი, როგორც ჩანს, თავაზიანობის გამოჩენა არ გსურთ, გთავაზობთ...

– გასაგებია, – გააწყვეტინა ჰენრიმ და ხელი მაისურშემოხვეულ ფეხზე დაიდო, – ბაირუსი. ისინი „რიპლის“ ეძახიან. ზოგიერთმა თქვენგანმა, შესაძლოა, უკვე მოასწრო მისი აკიდება. მაგალითად,

თქვენ, ჩარლზ... – მან ხელი მეხუთე, პარკაში გამოწყობილი, ზორბა და მელოტი კაცისკენ გაიშვირა.

– არა! – შესძახა ჩარლზმა, მაგრამ დანარჩენები მაშინვე შემოეცალნენ და მარტო დატოვეს. კაცმა, რომელსაც ხელში კამბოჯური სიგარა ეჭირა, ნერვიულად შეისუნთქა კვამლი.

– დიახ, – თავი დაუქნია ჰენრიმ, – თანაც ის უკვე უმაღლეს ლიგაშია. თქვენც გაქვთ, მონა. მონა? არა, მარშა, მარშა გქვიათ.

– მე არაფერი მჭირს, – მიუგო ქალმა, წამოდგა, ზურგით კედელს აეკრა და ჰენრის გაფართოებული, შეშინებული თვალებით შეხედა. ფურირმის თვალებით. მალე ყოველი მათგანი მოკვდებოდა, მათ შორის მარშაც. ჰენრი იმედოვნებდა, რომ ქალი ამ აზრის წაკითხვას ვერ შეძლებდა, – სუფთა ვარ, მისტერ. ყველანი სუფთები ვართ, თქვენგან განსხვავებით!

მან ქმარს გადახედა, რომელსაც გოლიათობას ბევრი აკლდა, მაგრამ ჰენრიზე ჩასკვნილი მაინც ჩანდა, ისევე, როგორც სხვები. უფრო მოსული იყო, მაგრამ არა მაღალი.

– აქედან მოაშორე, დეირ.

– რიპლი ორი სახისაა, – დაიწყო ჰენრიმ. ეს მისი ვარაუდი იყო... მაგრამ რაც უფრო მეტს ფიქრობდა, სულ უფრო მეტად რწმუნდებოდა, – მათ პირველადი და მეორადი რიპლი ვუწოდოთ. ეჭვი არ მეპარება, რომ, თუ ცოცხალი სპორების დოზა საკვების ან ჰაერის გზით არ მიგიღიათ და არც ღია ჭრილობები გაქვთ, ბედი გქონიათ. თქვენ მის დამარცხებას შეძლებთ.

ახლა ყველანი ფურირმის დიდი თვალებით მისჩერებოდნენ მას და ჰენრიმ წამით საშინელი სასოწარკვეთილება იგრძნო. ნეტავ, რას იქაჩებოდა, რატომ წყნარად და მშვიდად არ მოიკლა თავი?

– მე პირველადი რიპლი მაქვს, – განაცხადა მან და მაისური შეიხსნა. მიახლოება და შეხედვა ვერავინ გაბედა, ამიტომ ეს თვითონ გააკეთა. გრძელ ჭრილობას ბაირუსი მოსდებოდა. სამიოდე ფუტი სიგრძის რამდენიმე ბეწვი სუსტად ირხეოდა, როგორც ყავისფერი

წყალმცენარეები მოქცევისას. გრძობდა, როგორ შედიოდა სოკოს ფესვები სულ უფრო ღრმად, ქავილს იწვევდა და ორგანიზმს ანგრევდა. თანაც, ცდილობდა, რომ ეფიქრა. ყველაზე ცუდი სწორედ ეს იყო – ცდილობდა, რომ ეფიქრა.

იქ მყოფნი ნელ-ნელა კარისკენ მიიწევდნენ. როგორც ჩანს, შესაფერის მომენტს ეძებდნენ, რათა უკანმოუხედავად მოესვათ, მაგრამ ამის მაგივრად უეცრად შეჩერდნენ.

– მისტერ, შეგიძლიათ, დაგვეხმაროთ? – ათრთოლებული, ბავშვური ხმით ჰკითხა მარშამ. დარენმა, მისმა ქმარმა, მას ხელები მოხვია.

– არ ვიცი, – აღიარა ჰენრიმ, – ალბათ, არა, თუმცა... შესაძლოა. ახლა კი წადით. მე ნახევარი საათის შემდეგ წავალ, იქნებ უფრო ადრეც. აჯობებს, ბოსელში იყოთ სხვებთან ერთად.

– რატომ? – ჰკითხა დარენ ჩაილზმა ნიუტონიდან.

და ჰენრიმ, რომელსაც თავში რაღაც იდეა გაუჩნდა, იდეა და არა გეგმა, გულწრფელად მიუგო:

– ეს თვითონაც არ ვიცი. უბრალოდ, ვგრძნობ.

ყველანი გავიდნენ და ფარდული ჰენრის დაუტოვეს.

## 6

ფანჯრის ქვეშ, საიდანაც ღობე მოჩანდა, ნახევრად დამპალი თივის ბულული ეგდო. ზედ დარენი იჯდა (მოსაწევის მფლობელს კარგი ადგილი ეკუთვნოდა). ჰენრი შევიდა და მისი ადგილი დაიკავა. დაჯდა და ხელები მუხლებზე დაიწყო. თავში ხმების ნაირ-ნაირი გუგუნისა და მარცხენა ფეხში ძლიერი ქავილის მიუხედავად, – სოკო პირშიც გაუჩნდა, ამოვარდნილი კბილის ადგილას, – მაინც საშინლად ეძინებოდა.

ანდერჰილის გამოჩენა მანამ იგრძნო, სანამ ფანჯარას მოუახლოვდებოდა და დაილაპარაკებდა.

– შენობის ჩრდილში ვდგავარ ქარის მხრიდან, – თქვა ანდერჰილმა, – სიგარეტს ვეწევი. თუ ვინმე გამოივლის, შენ აქ არა ხარ.

– კარგი.

– მოტყუება არ გაბედო, თორემ მაშინვე წავალ და მთელი შენი ხანმოკლე სიცოცხლის განმავლობაში სიტყვასაც ველარ მეტყვი, ვერც ხმამაღლა და ვერც... სხვაგვარად.

– კარგი.

– როგორ მოიცილე თავიდან მანდ მყოფი ხალხი?

– როგორ? – წუთის წინ ჰენრი ისეთი დაღლილი იყო, რომ გაბრაზებაც კი აღარ შეეძლო, მაგრამ ახლა... – შენ მე ტესტი ხომ არ ჩამიტარე?

– ნუ სულელობ.

– ვუთხარი, პირველადი რიპლი მაქვს-მეთქი, რაც სიმართლეა. ჰოდა, ფაცხაფუცხით მოუსვენს, – თქვა ჰენრიმ და პაუზის შემდეგ დაამატა, – შენც აიკიდე, არა?

– ასე რატომ ფიქრობ?

ანდერჰილს ხმა თითქოს არ შესცვლია, მშვიდად და აუღელვებლად განაგრძობდა ლაპარაკს, მაგრამ ჰენრის ფსიქიატრად მუშაობის საკმაო გამოცდილება ჰქონდა და მის თვალს არაფერი გამოეპარებოდა. ყველაფრის მიუხედავად, იგი ხვდებოდა, რომ ანდერჰილი სალად მოაზროვნე და გონებადამჯდარი კაცი იყო და პირველი ნაბიჯიც გადაედგა სწორი მიმართულებით. გარდა ამისა, – გაიფიქრა ჰენრიმ, – ცუდი არ იქნება, თუკი ოუენი გაიაზრებს, რომ მას დასაკარგი არაფერი აქვს.

– წითელი ზოლები ხელის ნუნებზე, არა? და ცოტაოდენიც – ცალ ყურზე.

– შენ ახლა ლას-ვეგასში უნდა იყო, მეგობარო. ყველა კაზინოს გააკოტრებდი.

ჰენრიმ ანდერჰილის მაღლა აწეულ, ხელთათმანწამოცმულ ხელში სიგარეტი დაინახა. გაიფიქრა, ქარმა არ ჩაუქროსო.



– შენ პირველადი რიპლი, უშუალოდ, ინფექციის წყაროდან გად-  
მოგედო. დარწმუნებული ვარ, რომ მეორადით დაინფიცირება იმის  
შეხებით ხდება, რაზეც ის იზრდება, მაგალითად, ხის, ხავსის, ირმის,  
ძაღლის ან სხვა ადამიანის შეხებით. ეს იგივეა, რაც მომწამვლელი  
თუთუბოს შეხება. არ გეგონოს, რომ თქვენმა ექიმებმა ეგ არ იციან.  
ინფორმაცია უშუალოდ მათგან მივიღე. ჩემი თავი სატელიტურ ან-  
ტენასავით მუშაობს, რომელიც ყველაფერს იჭერს. არ ვიცი, საიდან  
ჩნდება ამ ცნობების თუნდაც ნახევარი, მაგრამ ამას მნიშვნელობა  
არა აქვს. თუმცა ექიმებმა რაღაც მაინც არ იციან. რუხი კაცუნები  
წითელ მცენარეულობას „ბაირუსს“ უწოდებენ, რაც სიცოცხლის შე-  
მადგენლობას ნიშნავს და გარკვეულ პირობებში პირველად სოკოს  
იმპლანტატების გამოზრდაც შეუძლია.

– ანუ ტრაწიანი სინდიოფალების.

– ტრაწიანი სინდიოფალები – კარგი ნათქვამია. მომწონს. ისინი  
ბაირუსიდან ჩნდებიან, შემდეგ კვერცხებს დებენ, რომლებიდანაც  
ახალი სინდიოფალები იჩეკებიან და ასე შემდეგ. მგონი, ასე ხდება.  
ისიც სათქმელია, რომ კვერცხების უმრავლესობა იღუპება. მიზეზი  
ძნელი დასადგენია: სიცივე, ატმოსფერო თუ სხვა რამ. მაგრამ ახლა  
ბაირუსზე ვსაუბრობთ. უცხოპლანეტელებს სხვა არაფერი გააჩნი-  
ათ, რაც მუშაობს.

– სიცოცხლის შემადგენლობა.

– ჰო, მაგრამ მომისმინე: რუხებს დიდი გასაჭირი ადგათ. შესაძ-  
ლოა, იმიტომ, რომ აქ დიდხანს იყვნენ, თითქმის ნახევარი საუკუნე,  
სანამ პირველ ნაბიჯს გადადგამდნენ. თუნდაც სინდიოფალები ავი-  
ლოთ. ვარაუდობდნენ, რომ ისინი საპროფიტებად გადაიქცეოდნენ.  
იცი, ეს რას ნიშნავს?

– ჰენრი... შენ ასე გქვია, არა? ჰენრი?... ჰენრი, რა კავშირი აქვს  
ამას ჩვენს სინამდვილესთან?

– პირდაპირი. და თუ არ გინდა, რომ კოსმოსურ ხომალდ დედა-

მიწაზე სიცოცხლის მოსპობის გამო (ვარსკვლავთშორის ურიცხვ კუძუს<sup>164</sup> მხედველობაში ნუ მივიღებთ) პასუხისმგებლობის დიდი ნაწილი შენ დაგეკისროს, გირჩევ მოკეტო და მომისმინო.

პაუზა. შემდეგ:

– გისმენ.

– საპროფიტები კეთილთვისებიანი პარაზიტი ბაქტერიებია. ისინი ჩვენს ნაწლავებში ცხოვრობენ და მათ ყოველდღიურად ვცლაპავთ საკვებთან ერთად, მაგალითად, აციდოფალური რძესთან, იოგურტთან. საცხოვრებელი ადგილის სანაცვლოდ, ისინი გარკვეულ დანმარებას გვიწვევენ. ლაქტობაქტერიები საჭმლის მონელებას აუმჯობესებს. სინდიოფალები ნორმალურ პირობებში – სხვა სამყაროებისთვის ნორმალურ პირობებში, სადაც ეკოლოგიაც წარმოუდგენლად განსხვავდება ჩვენისგან – ორიოდ დუიმის სიგრძეს აღწევენ. როგორც ვხვდები, ქალის ორგანიზმში მოხვედრისას, მათ შეუძლიათ რეპროდუქციაზე გარკვეული ზემოქმედება, ოღონდ, არავის კლავენ. როგორც წესი. მხოლოდ ნაწლავებში ცხოვრობენ. ჩვენ მათ ვკვებავთ, ისინი კი ტელეპათიური უნარით გვაჯილდოებენ. ეს პატიოსანი გაცვლაა. მაგრამ, ამასთან ერთად, ისინი ტელეარხებად გვაქცევენ. ჩვენ რუხი კაცუნების ტელევიზია ვართ.

– ამდენი რამე იმიტომ იცი, რომ შენში ასეთი ქმნილება ცხოვრობს? – ანდერჰილს ხმაში ზიზლი არ ემჩნეოდა, მაგრამ ჰენრიმ აშკარად იგრძნო, როგორ ფეთქავდა იგი რვაფუნას საცეცივით თანამოსაუბრის გონებაში, – ერთ-ერთი ეგრეთ წოდებული „ნორმალური სინდიოფალა“?

– არა.

ჯერჯერობით მაინც, – გაიფიქრა მან.

– მაშ, საიდან იცი ამდენი? იქნებ, უბრალოდ, იგონებ? იქნებ, შენი წარმოსახვის ნაყოფია? ან ფიქრობ, რომ ეს აქედან თავის დაღწევაში დაგეხმარება?

---

<sup>164</sup> ბალახოვანი მცენარე.

– მნიშვნელობა არა აქვს, საიდან ვიცი, ოუენ, მაგრამ კარგად მოგეხსენება, რომ არ ვცრუობ. შენ ხომ ჩემი აზრების წაკითხვა შეგიძლია.

– მე მხოლოდ ერთი რამ ვიცი – შენ ფიქრობ, რომ არ იტყუები. მე ხომ ნათელმხილველი არ ვარ. როგორ გგონია, რამდენად ღრმად შემიძლია შენს ტვინში შეღწევა?

– არ ვიცი. ალბათ უფრო ღრმად, სადამდეც ბაირუსი გავრცელდება, მაგრამ ჩემამდე ბევრი გიკვლია.

– იმიტომ, რომ შენ სხვა ხარ, – ანდერჰილის ხმაშიც და გონებაშიც სკეპტიციზმი გაჩნდა.

– მეგობარო, დღევანდლამდე არაფერი ვიცოდი ჩემი განსხვავებულობის შესახებ. ამას ყურადღებას ნუ მიაქცევ. მინდა, რომ მთავარი გაიგო: რუხმა კაცუნებმა ძალიან ღრმად შეტოპეს. ალბათ, ისტორიაში პირველად ძალაუფლებისთვის ნამდვილ ბრძოლაში ჩაერთნენ. იმიტომ, რომ, ჯერ ერთი, ადამიანის ორგანიზმში მოხვედრილი სინდიოფალები საპროფიტებიდან ავთვისებიან პარაზიტებად იქცევიან, განუწყვეტლივ იკვებებიან და იზრდებიან. ეს კიბოა, ანდერჰილ, კიბოს განსაკუთრებული ფორმა. მეორეც – თვითონ ბაირუსი. სხვა პლანეტებისგან განსხვავებით, დედამიწაზე მას გადარჩენა უჭირს. მეცნიერები და ექსპერტები, რომლებიც ამ როდესო ხელმძღვანელობენ, ფიქრობენ, რომ სიცივე მათ განვითარებას აფერხებს, მაგრამ მე ასე არ მგონია. უფრო სწორად, ვფიქრობ, მიზეზი მხოლოდ ეს არაა. დარწმუნებით ვერ ვიტყვი, რადგან თვითონაც არაფერი იციან, მაგრამ...

– მოიცა, მოიცა... – სიბნელეში რაღაცამ გაიელვა – ანდერჰილმა მორიგ სიგარეტს მოუკიდა, რომელსაც ისევ ქარი შეუჭამდა, – შენ ახლა მედიკოსებს არ გულისხმობდი, ხომ ასეა?

– ასეა.

– გგონია, რომ რუხ კაცუნებთან გაქვს კავშირი. ტელეპათიურად.

– ჩემი აზრით... ერთ-ერთ მათგანთან. უწყვეტი კავშირი მაქვს.

– იმ ჯგუფისთვის ხომ არა, შენ რომ ახსენე?

– არ ვიცი, ოუენ. დარწმუნებული არ ვარ. მთავარია, რომ ისინი აგებენ. მე, შენ და ის ადამიანები, რომლებიც „ცისფერი ბიჭის“ ბაზიდან დღეს შენთან ერთად გამოვიდნენ და ხომალდთან იყვნენ, შესაძლოა, შობის დღესასწაულს ველარ შევხვდეთ. არ დაგიმაღავ. ჩვენ ძალიან მაღალი კონცენტრაციის დოზა მივიღეთ. მაგრამ...

– მე მივიღე, რაც მართალია, მართალია, – გააწყვეტინა ოუენმა, – ედვარდსაც მაშინვე გამოაჩნდა.

– ბაირუსმა მართლაც რომ დაგრიოს ხელი, არა მგონია, შენ ის გაავრცელო. ასე საშიშიც არაა. ბოსელში საკმაოდ არიან ისეთები, რომლებსაც, რამდენი დაინფიცირებულიც უნდა აღმოჩნდეს, ეს ვირუსი არ შეხვდებათ. და თუ შეხვდათ, მხოლოდ – მეორადი ბაირუსი, ანუ რიპლი, რაც გინდა, უწოდე.

– ბაირუსი სჯობია.

– კარგი. თავის მხრივ, ისინიც ვინმეს გადასცემენ, ოღონდ ძალიან სუსტი ფორმით, რომელსაც შეგვიძლია ბაირუსი სამი დავარქვათ. სავსებით შესაძლებელია, რომ საქმე ამით არ დასრულდეს, მაგრამ ბაირუსი ოთხის დასანახავად უკვე მიკროსკოპი და სისხლის ანალიზი გახდება საჭირო, შემდეგ ის გაქრება.

– ფრთხილად, მყისიერი რეპროდუქცია არ დაგავიწყდეს.

– პირველი: რუხი კაცუნები, რომლებიც, შესაძლოა, მხოლოდ ბაირუსის გადმომტანი სისტემა იყო, უკვე განადგურებულია. ისინი, რომლებიც გარემომ არ მოსპო, როგორც მიკრობებმა – მარსელები „სამყაროთა ომში“<sup>165</sup>, ტყვიამფრქვევებით ამოხოცეს. ყველა, გარდა ერთისა... ეს იქნებ ისაა, რომელიც ინფორმაციას მაწვდის, მაგრამ ფიზიკურად აღარც ის არის ცოცხალი. მეორე: სინდიოფალებმა არ გაამართლეს. კიბოს მსგავსად, საბოლოოდ, ისინიც საკუთარ თავს ჭამენ. ისინი, რომლებიც გზას სწორი ნაწლავიდან იკვალავენ და გა-

<sup>165</sup> ჰერბერტ უელსის მოთხრობა.

რეთ გამოდიან, მალევე ილუპებიან მათთვის არახელსაყრელ გარემოში. მესამე: ბაირუსი არც იმდენად ქმედითია, მაგრამ თუ სადმე დამკვიდრებისა და ზრდის საშუალება მიეცა, შესაძლოა, მუტაცია განიცადოს და მბრძანებლობაც კი ისწავლოს.

– ჩვენ ვაპირებთ პირისაგან მიწისა აღვგავოთ ეს ადგილი, – თქვა ანდერჰილმა, – და ჯეფერსონტრექტი გადამწვარ-გადაბუგულ ზონად ვაქციოთ.

ბრაზმორეულმა ჰენრიმ კინალამ შეჰყვირა და ამ ბრაზის ნაწილმა, შესაძლოა, გარეთაც გამოხეთქა. გაისმა ყრუ კაკუნის და ანდერჰილის ფარდულის ფიცრულ კედელს მიენარცხა.

– რასაც აქ აკეთებთ, უაზრობაა, – გამოსცრა ჰენრიმ, – სოკოს თქვენ მიერ დამწყვდეული ხალხი ვერ გაავრცელებს, ვერც სინდიოფალები, დამოუკიდებლად ვერც ბაირუსი გავრცელდება. თუ თქვენი ბიჭები ბარგი-ბარხანას შეკრავენ და აქედან წავლენ, ბუნება საკუთარ თავზე თვითონ იზრუნებს და ამ სისულელეს არასწორად შედგენილ განტოლებასავით წაშლის. ვფიქრობ, რუხ კაცუნებს მოუწიათ, დაგნახვებოდნენ, რადგან არ სჯერათ იმისა, რაც აქ ხდება. როგორც ჩანს, ეს უბრალოდ თვითმკვლელობის აქტი იყო, რომელსაც მისტერ კურცის რაღაც ნაცრისფერი ვერსია დაემთხვა. მათ საკუთარი მარცხის გააზრების უნარი არ შესწევთ და ერთადერთი დევიზი აქვთ: „ჩვენ ყოველთვის ვიმარჯვებით“.

– ეგ საიდან...

– მაგრამ ბოლო წუთს, ანდერჰილ, შესაძლოა, ბოლო წამს, ერთერთმა მათგანმა სხვებისგან საოცრად განსხვავებულ ადამიანს მიაგნო. ისეთს, რომელთან კონტაქტზე გასვლაც არა მარტო რუხ კაცუნებს შეუძლიათ, არამედ სინდიოფალებსაც და ბაირუსსაც. ის თქვენი „ტიფიანი მერია“. მან უკვე გააღწია საკარანტინო ზონიდან და წყალში ჩაგიყარათ ყველაფერი, რაც კი გაგიკეთებიათ.

– გარი ჯოუნსი.

– მართალია, ეს ჯოუნსია.

– რა განასხვავებს მას სხვებისგან?

ჰენრის ამ თემაზე საუბარი არ სიამოვნებდა, მაგრამ მიხვდა, რომ ანდერჰილისთვის რამე მაინც უნდა გაემხილა.

– მან, მე და კიდევ ორმა მეგობარმა – ისინი მოკვდნენ – ერთხელ ერთი ადამიანი გავიცანით, რომელიც სხვებისგან სრულიად განსხვავდებოდა. ნამდვილი ტელეპათი იყო, ყოველგვარი ბაირუსის გარეშე. მან ჩვენზე რალაცნაირად იმოქმედა. მას რომ მოგვიანებით, ზრდასრულ ასაკში შევხვედროდით, მსგავსი რამ, ალბათ, არ მოხდებოდა. მაგრამ, მაშინ ძალიან... ასე ვთქვათ, მგრძნობიარენი ვიყავით იმისადმი, რაც მან მოგვცა. წლების შემდეგ ჯოუნსის რალაც შეემთხვა, მაგრამ ეს იმ არაჩვეულებრივ ბიჭს არაფრით უკავშირდებოდა.

ჰენრის ეჭვი ეპარებოდა, რომ ეს სიმართლე იყო. თუმცა, ჯოუნსი კინალამ მანქანამ გაიტანა კემბრიჯში, დადიტსი კი, როგორც ჰენრიმ იცოდა, მენის გარეთ არასდროს გასულა, იგი რალაცნაირად მაინც მონაწილეობდა ჯოუნსიში მომხდარ საბედისწერო ცვლილებებში. და იმ ყველაფერში, რაც ხდებოდა. მან იცოდა ეს.

– მითხარი, ჩემგან რა გინდა? ეს ყველაფერი დავიჯერო? ხველების საწინააღმდეგო სიროფივით გადავყლაპო?

იგი ვერ ხედავდა, რომ ჩაბნელებულ, მაგრამ სურნელოვან ფარდულში მყოფ ჰენრის სახეზე სევდიანი ღიმილი აღებეჭდა.

– ოუენ, – თქვა მან, – შენ ეს ისედაც გჯერა. მე ტელეპათი ვარ, ხომ არ დაგავიწყდა? ყველაზე საშინელი ჯუნგლი. მაგრამ საკითხავი ისაა... საკითხავი ისაა...

ჰენრიმ შეკითხვა გონებით გადასცა.

## 7

ოუენი ღობის იქით მდებარე ძველი ფარდულის უკანა კედელთან იდგა, ნილაბი ჩამოეწია, რათა სიგარეტი მოეწია, რომელსაც ვერ

იტანდა (გარნიზონის მაღაზიაში ახალი კოლოფი იშოვა), ვაჟკაცურად იტანდა ყინვას და აქეთ-იქით დაბნეულად იყურებოდა. მიუხედავად იმისა, რომ მის მდგომარეობაში მყოფ ადამიანს სამხიარულო არაფერი ჰქონდა. როდესაც ფარდულში მყოფმა კაცმა სავსებით ბუნებრივ შეკითხვაზე მოუთმენელი პირდაპირობით მოუჭრა, – შენ ეს ისედაც გჯერა, მე ტელეპათი ვარ, ხომ არ დაგავიწყდაო, – სახეზე გაოცების ღიმილი აღებეჭდა. კურცის თქმით, თუ ტელეპათია ადამიანის ტვინის მუდმივი თვისება გახდებოდა, ახლანდელ საზოგადოებას დალუპვა ელოდა. ოუენის გონება კურცს ეთანხმებოდა, ახლა კი მან ეს შინაგანად იგრძნო.

– მაგრამ საკითხავი ისაა... საკითხავი ისაა...

რის გაკეთებას ვაპირებთ.

გაწამებულ ოუენს მხოლოდ ერთი პასუხი აღმოაჩნდა:

– ვფიქრობ, ჯოუნსის მდევარი უნდა დავადევნოთ, მაგრამ მოგვცემს კი ეს რამეს? დრო თუ გვაქვს?

– გვაქვს, მაგრამ ძალიან ცოტა.

ოუენი შეეცადა, ჰენრის პასუხს ჩასწვდომოდა, მაგრამ ვერ შეძლო. ეჭვი არ ეპარებოდა, რომ ამ კაცის ყოველი სიტყვა სიმართლე იყო. ანდა მტკიცედ სწამს, რომ სიმართლეს ამბობს, – გაიფიქრა ოუენმა, – ღმერთია მოწმე, ყველაფრის დაჯერება მინდა და მზად ვარ, ნებისმიერი საბაბით მოვუსვა აქედან სასაკლავოს დაწყებამდე.

– არა, – თქვა ჰენრიმ და ოუენმა პირველად შეამჩნია, რომ მის ხმას სიმტკიცე აკლდა – როგორც ჩანს, რაღაცას გაელიზიანებინა, – სასაკლავო არ იქნება. კურცი ვერ შეძლებს თითქმის სამასი ადამიანის მოკვლას. იმათ მოკვლას, რომელთაც ბრალი არაფერში მიუძღვით. ისინი მხოლოდ... ო-ო, ღმერთო ჩემო! ეს ხალხი მხოლოდ უდანაშაულო მსხვერპლია! კატასტროფის შემთხვევითი მოწმე!

ოუენს არ გაჰკვირვებია, როდესაც აღმოაჩინა, რომ ჰენრის შეცბუნება გულწრფელ სიამოვნებას ანიჭებდა. ღმერთმა ხომ იცოდა,

რომ ჰენრიმაც საკმაოდ იშრომა მისი სულიერი წონასწორობის დასარღვევად.

– რას მთავაზობთ? განსაკუთრებით იმის გათვალისწინებით, რომ ახლა მთავარი – თქვენი მეგობარი ჯოუნსია.

– დიან, მაგრამ... – ჰენრის ენა დაება. ახლა მისი შინაგანი ხმა ოდნავ უფრო ხმამაღლა ისმოდა. არ მეგონა, თუ წავიდოდით და მათ სიკვდილის პირისპირ დავტოვებდით.

– ჩვენ არ წავალთ. მოგკურცხლავთ, როგორც კუდზე ცეცხლმოკიდებული ვირთხები, – განუმარტა ოუენმა, ბოლო ნაფაზი დაარტყა და მესამე სიგარეტი გადააგდო. შემდეგ თვალი გააყოლა, როგორ მიაქროლებდა მას ქარი თოვლში. იმ დროისთვის ფარდულის ორივე მხარე ნამქერს უკვე დაეფარა. მოშიშვლებულ საძოვარზე მიწისპირა თოვლიანი ქარი ქროდა, ისევ ბარდნიდა. ასეთ ამინდში სადმე წასვლა სიგიჟე იყო.

შნო-ჩატ-ის შოვნა მოგვიწევს, – გაიფიქრა ოუენმა, – შუალამისთვის სრულამძრავიანი სატვირთო მანქანაც კი ვერ გადალახავს ასეთ ნამქერებს.

– მოკალი კურცი, – წყნარად თქვა ჰენრიმ, – ეს ერთადერთი გამოსავალია. თუ ბრძანების გამცემი არავინ იქნება, მიმალვა გავკვიადვილდება. გარდა ამისა, ბიოლოგიური... წმენდაც გაურკვეველი დროით გადაიდება.

– ადვილი სათქმელია, – ცივად ჩაიცინა ოუენმა, – ანდერჰილი, აგენტი 007 მკვლელობის ლიცენზიით.

მან სანთებელას ხელი მოაფარა და მეოთხე სიგარეტს მოუკიდა. ხელთათმანწამოცმულ თითებს სიცივისგან თითქმის ველარ გრძნობდა.

თუ დაუყოვნებლივ არ შევთანხმდებით რამეზე, გავიყინები, – გაიფიქრა მან.

– რა დიდი ამბავი ეს არის? – გაუკვირდა ჰენრის, თუმცა ხვდებოდა, როგორ უძძიმდა ოუენს ამგვარი გადაწყვეტილების მიღება.



თვითონ ოუენი გრძნობდა (და თითქმის ესმოდა), როგორ ცდილობდა იგი, არაფერი დაენახა და არაფერი სცოდნოდა, რათა ისედაც უიმედო მდგომარეობა კიდევ უფრო არ დაემძიმებინა, – უბრალოდ, შედი და ტყვია დაახალე.

– არ გამოვა, – ოუენმა ჰენრის შემდეგი წარმოსახვითი სურათი გაუგზავნა: ფრედი ჯონსონი და ეგრეთ წოდებული „იმპერიალის ხეობის“ სხვა წევრები კურცის „ვინებაგოს“ თვალს არ აცილებენ, – გარდა ამისა, ფურგონში დინამიკების სისტემაა დაყენებული. თუ რამე მოხდება, წამში მოვარდებიან მაგარი ბიჭები. შესაძლოა, მოვახერხო კიდევ რამე, თუმცა არა მგონია, რადგან ისეთი დაცვა ჰყავს, განსაკუთრებით აქტიური საბრძოლო ოპერაციების დროს, კოლუმბიელ კოკაინის ბარონსაც კი შეშურდება. არა, მოსინჯვა შეიძლება. არც მე ვარ ხელწამოსაკრავი კაცი. მაგრამ ეს ნამდვილი თვითმკვლელობა იქნება. რადგან მის განკარგულებაში ფრედი ჯონსონია, მაშასადამე, სადღაც ახლოს სხვებიც არიან: კეიტ გალაჰერი... მარველ რიჩარდსონი... კარლ ფრიდმანი... ჯონსონ მაკევი. ერთი სიტყვით, მაგარი გოგო-ბიჭები. ჰენრი, კურცს თუ მოვკლავ, ისინი მე მომკლავენ, ამ შოუს ხელმძღვანელები ახალ მწმენდავს გამოგზავნიან – კურცის რომელიღაც კლონს, რომელიც დალუპული თანამზრახველის ხელიდან გავარდნილ სადავეებს აიტაცებს. მის ადგილას, შესაძლოა, კეიტიც დანიშნონ. ის კი ამ საქმისთვის საკმაოდ შეშლილია. პატიმრებს დამატებით თორმეტ საათს მისცემენ საკუთარ წვენიში კარგად მოსახარშავად, ბოლოს კი მაინც შებრაწავენ. ერთადერთი განსხვავება ის იქნება, რომ ჩემთან ერთად, ქარსა და თოვლში მხიარული ხეტიალის ნაცვლად, სხვებთან ერთად დაიხრუკები. ამასობაში კი შენი მეგობარი ჯოუნსი მოასწრებს და იმ ადგილს მიაღწევს... რა ჰქვია?

– ვფიქრობ, გონივრული იქნება, თუ დანიშნულების ადგილს ჯერჯერობით არ გავამხელთ.

მიუხედავად ამისა, ოუენმა მაინც სცადა საკუთარი ტელეპათიური უნარის გამოყენება და წამით ბუნდოვან და უცნაურ გამოსახულებას მოჰკრა თვალი: ეს იყო მაღალი თეთრი შენობა თოვლში, სასილოსე კოშკივით ცილინდრული... მაგრამ ყველაფერი მაშინვე გაქრა და ახლა თეთრი ცხენი გამოჩნდა, რომელიც რაღაცით მარტორქას წააგავდა. მან გვერდით ჩაურბინა ბოძზე მიკრულ ფირფიტას, რომელზეც ისარი ეხატა და წითელი ასოებით ეწერა: ბენბერი-კროსისკენ.

– შენ ჩემს ფიქრებს ახშობ! – თქვა გაღიზიანებულმა ოუენმა.

– შეგიძლია, ასე იფიქრო. თუმცა ეს უფრო მეთოდური სწავლებაა და გიჯობს აითვისო, თუ გსურს, რომ ჩვენი საუბრის შესახებ ვერავინ გაიგოს.

– კარგი.

სინამდვილეში ოუენს არაფერი სწყენია. ცხადია, კარგი იქნებოდა მისი ჩახშობა, ვინც უცერემონიოდ დააპირებდა ფიქრებში შემოდრომას. გარდა ამისა, ჰენრიმ, რასაკვირველია, იცოდა, საით მიემართებოდა მისი მეგობარი, ტიფიანი ჯოუნსი. ტყუილუბრალოდ ხომ არ უნახავს ოუენს ბუნდოვანი სურათები ჰენრის თავში.

– ჰენრი, მინდა, რომ ახლა შენ მომისმინო.

– დაიწყე.

– ყველაზე მარტივ და უსაფრთხო გეგმას გთავაზობ. პირველი: თუ დრო გვაქვს, უნდა გამოვიძინოთ.

– გეთანხმები. მიკვირს, აქამდე ფეხზე როგორ ვდგავარ.

– მოქმედებას ღამის სამი საათისთვის დავიწყებ. კურცმა ბრძანება გასცა, უბრალო გაფაჩუნებაც არ გამოგეპაროთო და დაცვა ფხიზლად იქნება. „უფროსი ძმა“ თვალს ოთხი საათისთვის მოხუჭავს. ამ დროისთვის ხალხიც დაილლება და ყურადღებას მოადუნებს. ჩვენ ოთხიდან ექვს საათამდე უნდა ვიმოქმედოთ. მე გუშაგებს ყურადღებას სხვა რამეზე გადავატანინებ – მავთულხლართებში

მოკლე ჩართვას მოვახდენ. როდესაც ალიაქოთი ატყდება, ხუთ წუთში აქ თოვლმავალს მოვაყენებ და... – ოუენმა აღმოაჩინა, რომ, სიტყვიერ ურთიერთობასთან შედარებით, ტელეპათიას მნიშვნელოვანი უპირატესობა ჰქონდა და ლაპარაკის შეუწყვეტლად, ჰენრის ცეცხლმოკიდებული ვერტმფრენის, „ჩიტუნია“ MH-26-სა და მისკენ სირბილით მიმავალი ჯარისკაცების გამოსახულება გაუგზავნა, – აქედან მოვუსვამთ.

– უდანაშაულო მოქალაქეებს კი კურცს დავუტოვებთ, რათა Aდაანახშიროს ისინი? „ცისფერ ჯგუფზე“ აღარაფერს ვამბობ. რამდენი არიან? სამას კაცამდე?

ოუენმა, რომელიც ჯარში ცხრამეტი წლიდან მსახურობდა და ბოლო რვა წლის განმავლობაში კურცის ერთ-ერთი მწმენდავი იყო, მათ შორის არსებული მენტალური არხით, ორი სასტიკი სიტყვა გაგზავნა: „დასაშვები დანაკარგია“.

ჭუჭყიანი სათვალის მიღმა ჰენრი დევლინის ჩრდილი შეირხა და წამოდგა.

„არა“, – უპასუხა მან.

## 8

„არა? როგორ თუ არა?“

„არა. სწორედ ამას ვგულისხმობ“.

„უკეთესი იდეა გაქვს?“

უეცრად ოუენი ელდანაცემივით შეკრთა, მიხვდა – ჰენრის ჰქონდა ასეთი იდეა და სჯეროდა კიდევ მისი. ამ იდეის (მას გეგმასაც კი ვერ უწოდებდა კაცი) ცალკეულმა ფრაგმენტებმა ოუენის თავში კომეტის კუდივით ჩაიქროლა. მოულოდნელობისგან კინალამ სუნთქვა შეეკრა და ვერც კი შეამჩნია, როგორ გაუვარდა ხელიდან სიგარეტი, რომელიც მაშინვე ქარმა გაიტაცა.

„გიჟი ხარ“.

„გეშლება. ჩვენ მათი ყურადღება სხვა რამეზე უნდა გადავიტანოთ, რათა გაქცევა შევძლოთ. ეს უკვე იცი. ეს ყურადღების გადასატანი მანევრი იქნება“.

„მათ მაინც მოკლავენ! “

„ზოგიერთს. იქნებ, უმრავლესობაც დაიღუპოს. მაგრამ ეს შანსია. ცეცხლმოდებულ ბოსელში რა შანსი ექნებათ? “

– კურცი არ დაგავიწყდეს, – დაამატა ჰენრიმ ხმამაღლა, – ორასი პატიმარი თუ გაექცევა და მათგან ზოგიერთი სიამოვნებით მოუყვება პირველივე შემხვედრ რეპორტიორს იმის შესახებ, თუ როგორ გასცა შიშისგან დამფრთხალმა შეერთებული შტატების მთავრობამ მასობრივი მკვლელობის ნებართვა აქ, ამერიკის მიწაზე, მას ჩვენთვის აღარ ეცლება. მღელვარების საბაზი ისედაც თავზე საყრელი ექნება.

შენ არ იცნობ ეიბ კურცს, – გაიფიქრა ოუენმა, – და არ იცი, რაზეა წამსვლელი.

არც თვითონ იცოდა. თითქმის არაფერი იცოდა. დღევანდელ დღემდე.

მაგრამ იყო ჰენრის ჩანაფიქრში რაღაც გიჟური. და მონანიების მარცვალიც. თოთხმეტი ნოემბრის ეს დაუსრულებელი დღე შუალამეს სულ უფრო უახლოვდებოდა, თუნდაც კვირის ბოლომდე სიცოცხლის შენარჩუნების შანსი იზრდებოდა. ოუენი მიხვდა, რომ მონანიების იდეას გარკვეული მიმზიდველობაც გააჩნდა. მიხვდა და არც გაოცებულა.

– ჰენრი!

– დიახ, ოუენ, აქ ვარ.

– ყოველთვის ცუდად ვგრძნობდი თავს იმის გახსენებისას, რაც რეიპლოუმების სახლში გავაკეთე.

– ვიცი.

– და მაინც, ამას ხელმეორედაც გავაკეთებდი. რატომ, რა უბედურებაა?

მართალია, ჰენრი ბოლო დროს თვითმკვლელობაზე ფიქრობდა, მაგრამ კვლავაც შესანიშნავი ფსიქიატრი იყო და ამიტომ აღარაფერი თქვა. ან რა უნდა ეთქვა? გარკვეული გაუკუღმართება ადამიანს ყოველთვის ახასიათებდა. ეს ნორმალურ საქციელად მიიჩნეოდა. სამწუხარო მოსასმენი იყო, მაგრამ სიმართლე გახლდათ.

– კარგი, – გადაწყვიტა ბოლოს ოუენმა, – შენ სახლს ყიდულობ, მისი მოწყობა კი ჩემზე იყოს. შევთანხმდით?

– შევთანხმდით, – წამსვე უპასუხა ჰენრიმ.

– მართლა შეგიძლია, რომ დაუპატიჟებელი სტუმრების ჩახშობა მასწავლო? ვფიქრობ, გამომადგება.

– შემიძლია. დარწმუნებული ვარ.

– მაშ, კარგი, მომისმინე.

შემდეგი სამი წუთის განმავლობაში ოუენი ლაპარაკობდა – ზოგჯერ ხმამაღლა, ზოგჯერ ტელეპათიის დახმარებით. ორივე მათგანს იმ წერტილამდე მიეღწია, სადაც ერთმანეთთან კავშირის დამყარების მეთოდებს შორის განსხვავება აღარ არსებობდა: სიტყვები და ფიქრები ერთმანეთს შეერია.

# თავი მეთექვსმეტე დერი

## 1

გოსლინის მაღაზიაში ცხელა – საშინლად ცხელა! ჯოუნსი შესვლისთანავე ოფლიანდება და იმ ღროისთვის, როდესაც ოთხივენი ტელეფონის აპარატთან მიდიან (რომელიც ღუმლის თავზე ეკიდა, ხომ განსოვთ?), ოფლის მსხვილი წვეთები შუბლიდან ლოყებზე ეცემა, ილღიებქვეშ კი ნამდვილი ჯუნგლია წვიმიან ამინდში... თუმცა არც ისე ბევრი თმა აქვს. რაც უნდა იყოს, ჯერ მხოლოდ თოთხმეტი წლისაა. „მაგასაც მოესწრები“, – როგორც პიტს უყვარს ხოლმე თქმა.

ასე რომ, გოსლინთან ცხელა, ის კი ჯერაც სიზმრის მარწუხებშია, რომელიც სულაც არ აპირებს გაფერმკრთალებასა და გაქრობას, სხვა ცუდი სიზმრების მსგავსად (ჯერაც გრძნობს ბენზინისა და დამწვარი რეზინის სუნს, ხედავს ჰენრის, რომელსაც ხელში მოკასინი უჭირავს... და მოგლეჯილ თავს. ჯერაც ხედავს რიჩი გრენადოს მოგლეჯილ, საშინელ თავს), მეორე მხრიდან კი ოპერატორი ქალი კაპა-

სობს. როდესაც ჯოუნსი ქვევლები ნომერს ეუბნება. ბიჭებმა ნომერი ზეპირად იციან, რადგან თითქმის ყოველდღე რეკავენ და მისვლის ნებართვას ითხოვენ (რობერტა და ელფი უარს არასდროს ეუბნებიან, მაგრამ ამას თავაზიანობის წესები მოითხოვს, შინ რომ ასწავლეს), იგი ეკითხება:

– თქვენმა მშობლებმა თუ იციან, რომ სხვა ქალაქში რეკავთ?

მისი ხმა არაფრით ჰგავს იანკის გაწელილ კილოს: სიტყვებს მსუბუქი აქცენტით წარმოთქვამს, რაც დამახასიათებელია ამ ადგილებისთვის, სადაც ლეტურნო და ბისონეტი უფრო გავრცელებული გვარებია, ვიდრე სმიტი ან ჯოუნსი. „წუწურაქი ფრანგები“ – ასე უწოდებს მათ პიტის მამა. ო-ო, ღმერთო, დაეხმარე ჯოუნსის – როგორც ჩანს, იგი სწორედ ასეთს გადააწყდა.

– ისინი სხვა ქალაქში დარეკვის უფლებას მაძლევენ, იმ პირობით, თუ მე თვითონ გადავიხდი, – პასუხობს ჯოუნსი. აჰა! ასეც იცოდა, რომ საბოლოოდ მას მოუწევდა არა მარტო ოპერატორ ქალთან თავის მართლება, არამედ ფულის გადახდაც. ქურთუკის ელვაშესაკრავს იხსნის. რა სულის ხუთვაა! ვერაფრით მიმხვდარა, როგორ შეუძლიათ ბებრებს ღუმელთან ასე ახლოს ჯდომა. მეგობრები ავიწროებენ, ყოველი მხრიდან აწვეებიან, რაც სავსებით ბუნებრივია – მათაც ერთი სული აქვთ, გაიგონ, რა ხდება, მაგრამ ჯოუნსის უნდა, რომ ცოტა უკან დაიხიონ და სუნთქვის საშუალება მისცენ. ისეთი შეგრძნება აქვს, თითქოს მდულარეში იხარშება.

– მე თუ დავურეკავ მათ, Mon fils<sup>166</sup>, Mère<sup>167</sup>-ს და Père<sup>168</sup>-ს, ისინიც იმავეს მეტყვიან?

– რა თქმა უნდა, – ამბობს ჯოუნსი. ოფლი თვალებს უწვავს და ისე იწმენდს, როგორც ცრემლებს, – მამა სამსახურშია, დედა კი შინ იქნება. ცხრა-ოთხი-ცხრა– ექვსი-ექვსი-ხუთი-რვა. ოღონდ სწრაფად,

---

<sup>166</sup> ჩემო ბიჭუნო (ფრ)

<sup>167</sup> დედას (ფრ)

<sup>168</sup> მამას (ფრ)

თუ შეიძლება, რადგან...

– აბონენტთან გაერთობით, – აწყვეტინებს იმედგაცრუებული ოპერატორი. ჯოუნსი მხრის სწრაფი მოძრაობით ქურთუკს იატაკზე აგდება. დანარჩენებს არც გაუხდიათ. ბივს თავისი ფონზი-ქურთუკი არც კი შეუხსნია. წარმოუდგენელია, როგორ არ აწუხებთ. ჯოუნსის სუნიც კი აღიზიანებს – ბარდის, ყავის, იატაკის საწმენდი მასტიკისა და კიტრის მწნილის. ჩვეულებრივ, სიამოვნებს ხოლმე გოსლინის მაღაზიის სუნი, მაგრამ დღეს ლამის გული აერიოს.

ტელეფონში რალაც ტკაცუნებს. ღმერთო ჩემო, რა ნელა გადის დრო. მეგობრები თანდათან კედლისკენ აწვებიან, კედელზე აპარატი ჰკიდია. შორეულ გასასვლელში ლამარი დგას, ყურადღებით ათვალიერებს თაროებზე შემოწყობილ ბურღულეულს და შუბლს იმ ადამიანივით ისრესს, ტკივილისგან თავი რომ უსკდება. იმის გათვალისწინებით, თუ რამდენი ლუდი ჩაისხა მუცელში წუხელ, ეს სავესებით მოსალოდნელია. ჯოუნსისაც ეწყება რალაც შაკიკის მსგავსი, რაც ლუდს არაფრით უკავშირდება. უბრალოდ, აქ ისე საშინლად ცხელა, როგორც...

წელში იმართება.

– ზარის ხმა ისმის, – ეუბნება მეგობრებს და მაშინვე ენაზე იკბენს, რომ თავი ვერ შეიკავა. ახლა სამივენი უფრო ახლოს მიდიან მასთან. პიტის პირი ყარს და ჯოუნსი ფიქრობს: კარგი რა, პიტ! რა გემართება? კბილებს წელიწადში ერთხელ იხეხავ?

მესამე ზარზე ყურმილს იღებენ.

– ალო?

ეს რობერტაა და რადგან მის ხმაში ჩვეული ხალისი არ იგრძნობა, მაშასადამე, ცუდ ხასიათზეა. მიზეზის დადგენა ძნელი არ არის: აქაც კი ესმით დადიტის საცოდავი ტირილი. ჯოუნსიმ იცის, რომ ელფი და რობერტა შვილის ტირილს მათი ოთხეულისგან განსხვავებულად აღიქვამენ – ისინი ხომ დიდები არიან. თანაც, – მშობლები. აშკარად



გრძნობენ რაღაცას. ამიტომაც ეპარება ჯოუნსის ეჭვი, რომ დღევანდელი დილა მისის ქვეელისთვის განსაკუთრებით სასიხარულო არ უნდა იყოს.

ღმერთო ჩემო, რა აუტანელი სიცხეა! საინტერესოა, რით გაახურეს ეს დაწყევლილი ღუმელი ამ დილით, პლუტონიუმით ხომ არა?

– ხმა ამოიღეთ, ვინ არის? – მოუთმენლად ამბობს ყურმილში მისის ქვეელი. როგორ არ ჰგავს ეს მისთვის ჩვეულ, მუდამ გულღია მისაღმებას. ხშირად უმეორებდა ბიჭებს, – დადიტისისნაირი არარვეულებრივი ქმნილების დედისთვის მთავარი მოთმინება არისო. დადიტისის გვერდით იგი მთელი ცხოვრების განმავლობაში სწავლობდა ამას, მაგრამ დღეს საკუთარ თავს არ ჰგავს. სიტყვებს გაბოროტებული ადამიანივით ისვრის, რაც წარმოუდგენელია, – თუ რამის გაყიდვა გასურთ, დროს ტყუილად ჰკარგავთ. ძალიან დაკავებული ვარ და...

მის ლაპარაკს ფონად დადიტისის დაუსრულებელი ღრიალი გასდევს.

დაკავებული იქნები, აბა რა, – ფიქრობს ჯოუნსი, – ის ხომ დილიდან არ გასვენებს და ახლა უკვე კივილზე გადავიდა.

ჰენრი ჯოუნსის გვერდში მუჯლუგუნს ურტყამს და მუშტს უღერებს, რაც ნიშნავს: მიდი, დაიწყე! და თუმცა ჯოუნსი ტკივილისგან იმანჭება, მუჯლუგუნი სასარგებლო რამ არის. თუ ქალი ყურმილს დაკიდებს, მას ისევ იმ კაპას ოპერატორ ქალთან მოუწევს კამათი.

– მის ქვეელ... რობერტა? ეს მე ვარ, ჯოუნსი.

– ჯოუნსი?

ბიჭი წამსვე გრძნობს ქალში მომხდარ შეცარ ცვლილებას. რობერტას გულზე საოცრად მოეშვა: მას ხომ ძალიან უნდოდა, რომ დადიტისის მეგობრებს დაერეკათ და ახლა ეს საკუთარი წარმოსახვის ნაყოფი ჰგონია.

– დიახ. და ბიჭები.

იგი ყურმილს მეგობრებს უწვდის.

– გამარჯობა, მისის ქეველ, – ამბობს ჰენრი.

– ჰეი, როგორ ხართ? – ეს პიტია.

– სალამი, ლამაზო, – წარმოთქვამს ბივი სულელური ღიმილით. შეიძლება ითქვას, რომ მას რობერტა მათი გაცნობის დღიდან უყვარს.

შვილის ხმის გაგონებაზე ლამარ კლარენდონი მისკენ იყურება, შუბლს იჭმუხნის და კვლავ „ჩირიოზისა“ და „შრედიტ უიტის“ ღირსებებს სწავლობს. „კი ბატონო, – მიუგო ბივს, როდესაც შვილმა უთხრა, რომ დადიტსთან დარეკვა სურდათ, – ვერ გამიგია, რამ წამოგიარათ თავში, იმ ათქვეფილთავიანთან რომ რეკავთ? თუმცა, თქვენი საქმისა თქვენ იცით“.

ჯოუნსის ყურმილი კვლავ ყურთან მიაქვს და რობერტა ქეველის სიტყვები ესმის:

– დერიში დაბრუნდით? მეგონა, კინეოს მიდამოებში ნადირობდით.

– არა, ჯერ ისევ აქ ვართ, – პასუხობს ჯოუნსი, მეგობრებისკენ ტრიალდება და გაოცებული აღმოაჩენს, რომ ისინი თითქმის არ გაოფლიანებულან. მხოლოდ ჰენრის აქვს ოდნავ ნამიანი შუბლი, პიტს კი ზედა ტუჩზე ოფლის რამდენიმე წვეთი მოუჩანს. სულ ეს არის. ნამდვილი საოცრებათა ქვეყანაა, – ვიფიქრეთ... რომ... აჯობებდა, თუ დავრეკავდით.

– თქვენ იცოდით, – ამბობს ქალი მშვიდად და აუღელვებლად. არ ბრაზობს, არც ზედმეტ შეკითხვას უსვამს. ფაქტს აფიქსირებს.

– მ-მ-მ... – ჯოუნსი ფლანელის პერანგის აპრეხილ საყელოს ისწორებს, – დიახ.

რობერტას ნაცვლად სხვა ქალი რომ ყოფილიყო, შეკითხვებს დააყრიდა: როგორ მიხვდით? ღმერთო ჩემო, რა ემართება? და ასე შემდეგ, მაგრამ რობერტა სხვას არ ჰგავს, გარდა ამისა, თითქმის მთელი თვე აკვირდებოდა მათ თავისი შვილის გვერდით. ამიტომ ამბობს:

– მოიცადე, ჯოუნსი. ახლავე დავუძახებ.

ჯოუნსი ელოდება. შორიდან დადიტსის ტირილი და რობერტას ხმადაბალი ლაპარაკი ისმის – იგი მის დაყოლიებას ცდილობს. უხსნის, ანუგეშებს, ცდილობს, ტელეფონთან მიიტყუოს და ქვევლების ოჯახისთვის ჯადოსნურ სიტყვებად ქცეულ სახელებს იმეორებს: „ჯოუნსი, ბივერი, პიტი, ჰენრი“.

ქვითინი ახლოვდება და ჯოუნსი გრძნობს, თუ როგორ ესობა იგი თავში ბლაგვ დანასავით, რომელიც, დაჭრის ნაცვლად, მხოლოდ თხრის და აქუცმაცებს.

– უ-უ-უ...

ჯოუნსის ჰენრის მუჯღუგუნი დადიტსის ტირილთან შედარებით ალერსად ეჩვენება. ამასობაში კისერზე ოფლი ტროპიკულ წვიმასავით დასდის. მზერა აპარატის თავზე მიმაგრებული ორი წარწერისკენ მიუმართავს. „თუ შეიძლება, ხუთ წუთზე მეტხანს არ ისაუბროთ“, – იუწყება პირველი. მეორე თხოვს: „გთხოვთ, უწმაწური სიტყვები არ გამოიყენოთ“. ქვემოთ კი ვილაცას მიუწერია: „ეს რომელმა სულელმა მოიფიქრა“.

ამ დროს ყურმილს დადიტსი იღებს და ჯოუნსის ყურში საშინელი ღრიალი ჩაესმის. ჯოუნსი იჭმუხნება, მაგრამ, ტკივილის მიუხედავად, დადს ვერაფრით გაუბრაზდება. მეგობრები აქ ერთად არიან, ის კი იქ მარტოა, სრულიად მარტო. რა უცნაური არსებაა! ღმერთმა დასაჯა და, იმავდროულად, დალოცა კიდევ. ამის გაფიქრებისას ჯოუნსის თავბრუ ესმის.

– დადიტს, – ამბობს ის, – დადიტს, ეს ჩვენ ვართ. ჯოუნსი ვარ. იგი ყურმილს ჰენრის აწვდის.

– გამარჯობა, დადიტს, ჰენრი ვარ.  
ახლა პიტის ჯერი დგება.

– დადიტსს გაუმარჯოს. პიტი ვარ. ნუ ტირი, ყველაფერი კარგადაა...

პიტი ყურმილს ბივს აჩეჩებს, რომელიც აქეთ-იქით ფრთხილად

იყურება, კუთხეში იკუნჭება, შნურს მთელ სიგრძეზე წელავს, მიკროფონს ხელს აფარებს, რათა ღუმელთან მოკალათებულმა მოხუცებმა ვერაფერი გაიგონ (საკუთარმა მამამაც, ცხადია) და იავნანას პირველ ორ სტროფს მღერის. შემდეგ ჩუმდება, მიაყურადებს, ცერთა და საჩვენებელი თითით წრეს შეკრავს და ამაყად მიუტანს მეგობრებს ცხვირთან. ბოლოს ყურმილს ჰენრის გადასცემს.

– დადს? – ამბობს ჰენრი, – ეს მხოლოდ სიზმარი იყო, დადიტს. სინამდვილეში არაფერი მომხდარა. კარგი? არაფერი მომხდარა და ყველაფერმა ჩაიარა. მხოლოდ...

ჰენრი უსმენს. ჯოუნსი დროს იხელთებს და ფლანელის პერანგს იხდის. მაისური გასაწური აქვს.

მსოფლიოში უამრავი რამ არის, რაც ჯოუნსიმ არ იცის, – მაგალითად, რა კავშირია მათ ოთხეულსა და დადიტსს შორის, – მაგრამ იმაში კი დარწმუნებულია, რომ გოსლინის მაღაზიაში დარჩენა აღარ შეუძლია. ეჩვენება, რომ იმ წყეული ღუმლის შიგნით აღმოჩნდა. ბერიკაცებს კი, შაშს რომ თამაშობენ, ძვლების მაგივრად, ალბათ, ყინული აქვთ.

ჰენრი გულმოდგინედ აქნევს თავს:

– ჰო, როგორც საშინელ ფილმში.

შემდეგ ყურს უგდებს და იჭმუხნება:

– სულაც არა. არც ჩვენ. თითიც არ დაგვიკარებია. არც ერთი მათგანისთვის.

ამ დროს ჯოუნსის გონება უნათდება. ტყუილია. შეეხნენ. ცხადია, არ უნდოდათ, მაგრამ შეეხნენ. ეშინოდათ, რიჩის მუქარა არ შეესრულებინა – მერე გაგისწორდებითო, რომ დაჰპირდა – და დაასწრეს.

პიტი ხელს იწვდის, ამიტომ ჰენრი ამბობს:

– დადს, შენთან პიტს უნდა ლაპარაკი.

იგი ყურმილს პიტს აძლევს. პიტი დადიტსს ურჩევს, ყველაფერი

დაივიწყოს, ფეხებზე დაიკიდოს, ნებისყოფა მოიკრიბოს და დამ-  
შვიდდეს. ეუბნება, რომ მალე ინახულებენ და ერთად ითამაშებენ,  
ისე იხალისებენ, რომ მეტი არ შეიძლება, იქამდე კი...

ჯოუნსი იმ წარწერას შეჰყურებს, რომელზეც თხოვნაა, რომ ხუთ  
წუთზე მეტი არ ილაპარაკონ. და იქვე მეორე წარწერა ჩნდება: „რა-  
ტომ გარეთ არ გახვალთ, იქ უფრო გრილა“. ეს კარგი აზრია, შესა-  
ნიშნავი აზრი! ისედაც ცხადია, რომ დადიტსთან დაკავშირებით ვი-  
თარება კონტროლს ექვემდებარება.

მაგრამ ჩარევას ვერ ასწრებს, რომ პიტი ყურმილს გადასცემს.

– შენთან უნდა ლაპარაკი, ჯოუნსი.

ჯოუნსი კარისკენ გაქცევას აპირებს. ჯანდაბას დადიტსი, ჯანდა-  
ბას ყველა! მაგრამ ისინი მისი მეგობრები არიან, ყველამ ერთი და  
იგივე საშინელი სიზმარი ნახა, რომელშიც ის გააკეთეს, რაც არ უნ-  
დოდათ.

(მატყუარა! მატყუარა! თვითონაც კარგად იცი, რომ გინდო-  
დათ!)

მათ თვალებს ვერსად გაექცევა, მიუხედავად საშინელი სიცხისა,  
სულს რომ უხუთავს. ეს თვალეები აცხადებს, რომ იგი ამ ყველაფრის  
ნაწილია და არ უნდა წავიდეს, სანამ ტელეფონთან დადიტსია. ასე-  
თია წესები. ასეთია მათი თამაშის წესები.

„ეს ჩვენი სიზმარია და ის ჯერ არ დამთავრებულა, – გაიძახის მა-  
თი თვალეები, განსაკუთრებით კი ჰენრისა, – ის იმ დღეს დაიწყო,  
როდესაც „ძმები თრექერების“ შენობის უკან მუხლებზე დარქილი  
და თითქმის შიშველი ვიპოვეთ. ის ხედავს ხაზს და ახლა ჩვენც ვხე-  
დავთ. თუნდაც სხვანაირად, მაგრამ შინაგანი თვალით მუდმივად  
ვხედავთ იმ ხაზს. და ყოველთვის დავინახავთ, სანამ არ მოვკვდე-  
ბით“.

მათ თვალეებში დაჟინებით ანათებს რაღაც, რაც სიცოცხლის ბო-  
ლომდე არ მოასვენებთ და ყველაზე ბედნიერ დღეებსაც კი გაუმწა-  
რებთ. ეს ძრწოლაა იმის გამო, რაც ჩაიდინეს – მათი ერთობლივი

ძილის იმ ნაწილში ჩაიდინეს, რომელიც არ დაამახსოვრდათ.

ეს ყველაფერი ჯოუნსის მაღაზიიდან გასვლის საშუალებას არ აძლევს და ყურმილის აღებას აიძულებს. სიცხისგან მოთენთილია, იხრუკება, დნება, ამის დედაც! ..

– დადიტს, – ამბობს იგი. ხმაც კი გასცხელებია, – დამიჯერე, ყველაფერი კარგადაა. ახლა ყურმილს ჰენრის გადავცემ და სუფთა ჰაერზე გავალ, თორემ აქ სუნთქვა აღარ შეიძლება.

მაგრამ დადიტსი აწყვეტინებს და ხმამაღლა და დაჟინებით იმეორებს:

– აეთ-ა-აიდე! ოუი, აეთ-ა-აიდე! ეი! ეი! იერ ეი!

ყოველთვის, პირველი დღიდანვე ესმოდათ მისი ლულლული, ჯოუნსი ახლაც ადვილად შიფრავს სიტყვებს: „გარეთ არ გახვიდე! ჯოუნსი, გარეთ არ გახვიდე! გრეი! გრეი! მისტერ გრეი!“

ჯოუნსი პირს აღებს. იგი გახურებული ღუმლის მიღმა, თაროებს შორის იყურება, სადაც ბივის ნაბახუსევი მამა კონსერვირებული ბარდის ქილებს მიშტერებია. მისი მზერა მისის გოსლინსაც გასცდება, რომელიც ძველ, შელახულ სალაროს აპარატს მისჯდომია, და ერთგვარ ვიტრინად ქცეულ ფანჯარას მიადგება. საშინლად ჭუჭყიან შუშაზე უამრავი სარეკლამო პლაკატია – დაწყებული სიგარეტ „უინსტონითა“ და ლუდი „მუსჰედით“, დამთავრებული საეკლესიო საქველმოქმედო სადილებითა და ოთხ ივლისთან დაკავშირებული პიკნიკებით, რაც ჯერ კიდევ არაქისის მეფის დროს იმართებოდა. თუმცა, შუშაზე კიდევ რჩება გარეთ გასახედი ადგილი იმ არსების დასანახად, ახლა ებოში რომ ელოდება. ეს ისაა, უკნიდან რომ მიეპარა, როცა ჯოუნსი მთელი ძალით ჩაჰფრენოდა სააბაზანოს კარს. სწორედ ისაა, მრავალი წლის შემდეგ სხეული რომ მოჰპარა. შიშველი ნაცრისფერი სხეული ბენზინის სვეტის გვერდით უთითებო ფხებზე დგას და ჯოუნსის შავი თვალებით მისჩერებია. და ჯოუნსი ფიქრობს: ეს მათი ნამდვილი სახე არ არის. ასეთებად მათ ჩვენ ვხედავთ.

თითქოს ამის დასტურად, მისტერ გრეი ხელს მაღლა ასწევს და დაუშვებს. მისი თითების წვერებიდან – ასეთი სულ სამი აქვს – ჰაერში ნამცეცა მოწითალო ოქროსფერი, ბაბუაწვერას მსგავსი ბეწვები ჩნდება.

ბაირუსი, – ფიქრობს ჯოუნსი.

და თითქოს ჯადოსნური სიტყვა წარმოთქვაო, ყველაფერი ჩერდება. გოსლინის მაღაზია ნატიურმორტად გადაიქცევა. შემდეგ ძველი ფერები ქრება და ახლა მოწითალო-მოყავისფრო ფოტოსურათი მოჩანს. მეგობრები გამჭვირვალენი ხდებიან და თვალსა და ხელს შუა უფერულდებიან. რეალური მხოლოდ ორი რამ არის: ტელეფონის მძიმე შავი ყურმილი და სიცხე. სულის შემხუთველი სიცხე.

– აექი! – ჩაჰყვირის დადიტის ყურში. ჯოუნსის ღრმა, კარგად ნაცნობი შესუნთქვის ხმა ესმის. დადიტის ფილტვებში ჰაერს იგუბებს, რათა შეძლებისდაგვარად მკაფიოდ წარმოთქვას: – ოუსი, ოუსი, აექი! აექი! ა...

## 2

...დექი! ადექი, ჯოუნსი, ადექი!

ჯოუნსიმ თავი ასწია, მაგრამ თავდაპირველად ვერაფერი დაინახა. აწეწილი, ოფლიანი თმა თვალებზე ჩამოჰფხატოდა. მოუთმენლად გადაიწია, ელოდა, რომ თავის საძინებელში, „კედელში გაკეთებულ ხვრელში“ ან, უფრო უკეთეს ადგილას, ბრუკლინში აღმოჩნდებოდა, მაგრამ იმედი გაუცრუვდა. კვლავაც „ძმები თრექერების“ ოფისში იყო. საწერ მაგიდაზე ეძინა და სიზმარში ხედავდა, როგორ დაურეკეს დადიტს მრავალი წლის წინ. ყველაფერი მართლაც ასე იყო, სულის შემძვრელი სიცხის გარდა. სიმართლე ითქვას, მაღაზიაში ყოველთვის გრილოდა, ბებერი გოსლინი ამაზე ყოველთვის ზრუნავდა. სიცხე სიზმარში შეჰპაროდა, რადგან აქ ჰაერი არ იძროდა. ღმერთო ჩემო, ასი<sup>169</sup> ან ას ათი გრადუსი მაინც იქნებოდა.

---

<sup>169</sup> ფარენჰეიტით

გათბობის სისტემა გაფუჭდა, – გაიფიქრა მან და წამოდგა, – იქნებ, ხანძარი გაჩნდა. ასეა თუ ისე, აქედან უნდა მოვუსვა, სანამ არ შევბრაწულვარ.

ჯოუნსიმ მაგიდას შემოუარა, ვერც კი შეამჩნია, რომ შეცვლილიყო; ვერც – ის, რომ კარისკენ აჩქარებით წასული თავით რაღაცას გაედო. ერთი ხელი ურდულისკენ წაიღო, მეორე – სახელურისკენ, მაგრამ ამ დროს დადიტსის ყვირილი გაახსენდა, რომელიც სთხოვდა, გარეთ არ გახვიდო, რადგან იქ მისტერ გრეი ელოდებოდა.

ის მართლაც იქ იყო. ზღურბლთან იდგა, ჯოუნსის მოგონებათა საცავთან, რომელიც ადრე იგდო ხელთ.

ჯოუნსი გაფარჩხული თითებით ჩააფრინდა კარის ლირსს. გაოფლილი თმა ისევ ჩამოეფხატა თვალებზე, მაგრამ ყურადღება აღარ მიუქცევია.

– მისტერ გრეი – ჩაიჩურჩულა მან, – აქ ხართ? აქ ხართ, არა?

არავინ უპასუხა, მაგრამ მისტერ გრეი, ცხადია, იქ იყო. იდგა, მელოტი თავის მსგავსი გუნდა წინ გადაეხარა და უსიცოცხლო შავი თვალებით კარის სახელურს მისჩერებოდა. სახელური საცაა გადატრიალდებოდა. ელოდა, როდის გამოვარდებოდა იმ ხუთვიდან ჯოუნსი. მაშინ კი...

მშვიდობით, მომაბეზრებელი ადამიანური ფიქრებო. მშვიდობით გამაღიზიანებელი და შემაწუხებელი ადამიანური ემოციაგ.

მშვიდობით, ჯოუნსი.

– მისტერ გრეი, გსურთ, რომ აქედან გამომავდეთ?

პასუხი კვლავ ვერ მიიღო. არც სჭირდებოდა. მისტერ გრეი ისედაც წარმატებით უმკლავდებოდა მართვის ლილაკებს, მისი სხეულის ტემპერატურასაც კი აკონტროლებდა. ნეტავ, რამდენით მოუმატა? ჯოუნსიმ არ იცოდა, მაგრამ გრძნობდა, რომ უმატებდა და უმატებდა. მკერდზე შემოხვეული სალტე სულ უფრო ცხელდებოდა და ბოჭავდა. სუნთქვა უჭირდა. სისხლი ჩაქუჩივით ურტყამდა საფეთქლებში.



ფანჯარა. იქნებ ფანჯარამ მიშველოს.

ჯოუნსის იმედი მიეცა და კარიდან გატრიალდა. თუმცა, ფანჯარა ჩაბნელებული დახვდა, – როგორც 1978 წლის ოქტომბერში უმეტესად ხდებოდა ხოლმე, – „ძმები თრეკერების“ შენობასთან მისასვლელი გზა კი ნამქერს დაეფარა. არასდროს, ბავშვობაშიც კი არ მოხიბლულა ჯოუნსი ასე ძალიან თოვლით. წარმოიდგინა, როგორ გადახტა ფანჯრიდან, – ეროლ ფლინიც ასე გადაეშვა მეკობრეებზე გადაღებულ ძველ ფილმში, – თოვლში ჩაეფლო და გახურებული სახე დალოცვილ თეთრ სუსხში დურთა...

დიახ, და მაშინვე იგრძნო, როგორ შემოეჭდო ყელზე მისტერ გრეის ხელები, მართალია, სამითითა, მაგრამ ისეთი ღონიერი, რომ წამსვე სულს გააფრთხოებინებდა. ვერც შუშას ჩაამტკვრევდა სუფთა ჰაერის შემოსაშვებად, რადგან მისტერ გრეი მაშინვე ვამპირივით ეძგერებოდა. ვინაიდან ჯოუნსის სამყაროს ეს ნაწილი სახიფათო, მტრის მიერ დაპყრობილი იყო.

„ჰობსონის არჩევანი<sup>170</sup>. ყველა გზა დაწყველილია“.

– გამოდი, – ენა ამოიდგა, ბოლოს და ბოლოს, მისტერ გრეიმ ჯოუნსის ხმით, – არ გავაჭიანურებ. მალე მოვრჩები. ხომ არ გინდა, რომ შეიბრაწო... იქნებ გინდა?

მოულოდნელად ჯოუნსიმ ფანჯარასთან მაგიდა დაინახა. მანამ ის ერთხელაც არ შეუმჩნევია, დაძინებამდე იქ ერთ-ერთი ფაბრიკის მიერ დამზადებული არაფრით გამორჩეული ავეჯი იდგა. ასეთებს, როგორც წესი, საშუალო ფირმები იძენდნენ. რაღაც მომენტში – ვერ იხსენებდა, ზუსტად როდის – მაგიდაზე ტელეფონიც გაჩნდა, უბრალო შავი აპარატი, მაგიდასავით უტილიტარული და სადა.

ახლა კი, ძველი ავეჯის ადგილას მუხის შვედური ძვირფასი საწერი მაგიდა იდგა, იმის ასლი, რაც შინ, ბრუკლინში, კაბინეტს უმშვე-

---

<sup>170</sup> ვითარება, როცა ალტერნატიული გამოსავალი არ არსებობს, არჩევანი არ არის.

ნებდა. ტელეფონიც შეცვლილიყო – ლურჯი „ტრიმლაინი“ იდგა, ისეთივე, როგორიც უნივერსიტეტის ოფისში. ჯოუნსიმ შუბლიდან შარდით თბილი ოფლი მოიწმინდა და მხოლოდ ახლა შეამჩნია, რაც ადგომისას თავზე შეეხო.

სიზმართმჭერი ავგაროზი.

სიზმართმჭერი ავგაროზი „კედელში გაკეთებული ხვრელიდან“.

– გაგიჟდება კაცი, – ჩაიჩურჩულა ჯოუნსიმ, – მგონი, აქ ცუდად არ მოვეწყვე.

ასეც იყო. რატომაც არა? სიკვდილმისჯილთა საკანში მყოფი პატიმრებიც კი ცდილობდნენ თავიანთი უკანასკნელი თავშესაფრის გალამაზებას. თუკი აქ საწერი მაგიდის, სიზმართმჭერი ავგაროზისა და ტელეფონის გადმოტანა მოახერხა, იქნებ...

ჯოუნსიმ თვალეები დახუჭა, ყურადღება მოიკრიბა და ბრუკლინში მდებარე კაბინეტის წარმოდგენა სცადა. თავდაპირველად გაუჭირდა, რადგან ერთი შეკითხვა აეკვიატა: როგორ უნდა მოხდეს ეს, თუკი ყველა მოგონება კარს მიღმა დარჩება? თუმცა, მაშინვე მოისაზრა პასუხი: მოგონებები კვლავ მასთან არის, მისგან ვერსად წავა. საწყობში მოთავსებული ყუთები კი მხოლოდ ის იყო, რასაც ჰენრი „ექსტერნალიზაციას“ უწოდებდა – იმ ყველაფრის წარმოდგენის ხერხი, რაც მისტერ გრეის ხელში ჩაუვარდა.

„არაფერია. ყურადღება იქით მიმართე, რის გაკეთებაც გმართებს. კაბინეტი ბრუკლინში. ბრუკლინში მდებარე კაბინეტის წარმოდგენა სცადე“.

– რას აკეთებ? – შეშფოთდა მისტერ გრეი. ნეტავ, სად გაქრა მისი დათაფლული და თავდაჯერებული ტონი? – რა ჯანდაბას აკეთებ?

„ჯანდაბას“ გაგონებაზე ჯოუნსის გაეცინა. თავი ვერ შეიკავა, თორემ მოდუნება არც უფიქრია. არა მარტო კაბინეტი, არამედ კაბინეტის კედლებიც... აი იქ, პატარა სააბაზანოში გამავალ კართან... დიახ, ის იყო. „ჰანიუელის“ ფირმის თერმოსტატი. და რა უნდა ეთქვა? რაღაც ჯადოსნური სიტყვა, „სეზამ, გაიღეს“ მსგავსი?

დიახ.

ჯოუნსის თვალი არ გაუხელია, გაოფლილ სახეზე ღიმილი მოეფინა.

– დადიტს... – წაიჩურჩულა მან, შემდეგ თვალი გაახილა და დამტკვერილ, შელახულ კედელს შეხედა.

კედელზე თერმოსტატი ეკიდა.

### 3

– შეწყვიტე! – შესძახა მისტერ გრემი. ჯოუნსიმ ოთახი გადაკვეთა. უკვე მერამდენედ განაცვიფრა ნაცნობმა ხმამ – თითქოს მაგნიტოფონზე ჩაწერილ საკუთარ, საკმაოდ იშვიათ ისტერიკულ გამოსდომას უსმენდა (ამას, ჩვეულებრივ, ბავშვთა ოთახებში წარმოუდგენელი არეულ-დარეულობა უწყობდა ხოლმე ხელს), – ახლავე შეწყვიტე! ეს უნდა შეწყდეს!

– მაკოცე ტაკოში, ლამაზო, – მიუგო ჯოუნსიმ. რამდენჯერ უოცნებიათ მის ბავშვებს მამისთვის ამგვარი სიტყვები ეთქვათ, როცა მათ ჭკუას არიგებდა.

მაგრამ ამ ღროს საძაგელი აზრი ეწვია. როგორც ჩანს, ველარასოდეს იხილავდა თავის დუპლექს ბრუკლინში, და თუ იხილავდა, მხოლოდ მისტერ გრეის თვალებით. ლოყა, რომელზეც შვილები კოცნიდნენ ("იჩხვლიტება, მამა!" – იტყოდა, ალბათ, მიშა), ამიერიდან მისტერ გრეის ლოყა იქნებოდა. ისევე, როგორც ტუჩები, რომელსაც კლარა კოცნიდა. საწოლში კი, როდესაც ცოლი მოეხვეოდა და...)

ჯოუნსი შეკრთა, ხელი თერმოსტატისკენ გაიწვდინა და გაოცებულმა აღმოაჩინა, რომ სკალის დანაყოფი 120-ს უჩვენებდა. ამაზე ძლიერი მსოფლიოში, ალბათ, არც არსებობდა. გადამრთველი ოდნავ მარცხნივ გადაატრიალა, გრილი ჰაერის ნაკადი იგრძნო, შვებით ამოისუნთქა და გახურებული სახე მიუშვირა. კედელზე, მაღლა, სა-

ვენტილაციო ცხაური შეამჩნია. კიდევ ერთი სასიამოვნო სიურპრიზი.

– ამას როგორ აკეთებ? – დაუყვირა მისტერ გრემი კარის მეორე მხრიდან, – რატომ არ იღებს შენი სხეული ბაირუსს? და საერთოდ, მანდ როგორ მოხვდი?

ჯოუნის გაეცინა. თავი ველარ შეიკავა.

– შეწყვიტე, – უთხრა მისტერ გრემი. ხმაში სიცივე შეჰპაროდა. თვითონაც ასე წაუყენა კლარას ულტიმატუმი: „ან მკურნალობა, ან გაყრა, ძვირფასო, აირჩიე“, – ხომ იცი, რომ მარტო ტემპერატურის აწევა კი არა, შენი დაწვაც შემიძლია. ან დაბრმავება.

ჯოუნის ენდი ჯანასის თვალიდან ამოჩრილი კალმისტარი გაახსენდა, თვალის კაკლის გასკდომის საშინელი ხმა... და შეკრთა. მაგრამ მიხვდა, რომ მისტერ გრეი თვალთმაქცობდა, მისი ანკესზე წამოგება სურდა.

შენ უკანასკნელი ხარ, – გაიფიქრა ჯოუნსიმ, – მე კი შენი გადამტანი. ვერ გამანადგურებ. ყოველ შემთხვევაში, იქამდე მაინც, სანამ მისია არ შეგისრულებია.

იგი ნელა მიუახლოვდა კარს, თან, საკუთარ თავს სიფრთხილისკენ მოუწოდებდა, რადგან როგორც გოლუმი ამბობდა ბილბო ბეგინსის<sup>171</sup> შესახებ, ეს არასაიმედო, მაცდუნებელი, საყვარელი, ძალზე არასაიმედო რამ იყო.

– მისტერ გრეი! – ხმადაბლა დაუძახა.

არანაირი პასუხი.

– მისტერ გრეი, ახლა როგორ გამოიყურებით? სინამდვილეში როგორი ხართ? ფერი ხომ არ შეგეცვალათ? ოდნავ გავარდისფრდით? ხელებზე ორ-ორი თითი მოგემატათ? თავზე თმა ამოგივიდათ? ფეხის თითებისა და გენიტალიების გაზრდასაც ხომ არ ცდილობთ?

---

<sup>171</sup> ჯონ ტოლკინის რომანების „ჰობიტისა“ და „ბეჭდების მბრძანებლის“ პერსონაჟები.

კვლავ დუმილი.

– თანდათან მე ხომ არ მემსგავსებით, მისტერ გრეი? ჩემსავით ფიქრობთ? და ეს არ მოგწონთ, არა? თუ უკვე მოგწონთ?

ჯოუნსი პასუხს ვერ ეღიროსა. მიხვდა, რომ მისტერ გრეი წასულიყო. შეტრიალდა და ფანჯრისკენ აჩქარებით გაემართა, თან, გზად რამდენიმე ცვლილებაც შენიშნა: ერთ კედელზე კარიერისა და აივზის ლითოგრაფია, მეორეზე – ვან გოგის „მზესუმზირების“ რეპროდუქცია, ჰენრის საშობაო საჩუქარი და მაგიური ბროლის სფერო, რომელიც შინ, მუდამ მაგიდაზე ედო. ჯოუნსიმ ნივთებს ყურადღება არ მიაქცია. სწყუროდა გაეგო, რა ჩაიფიქრა მისტერ გრეიმ და რამ აიძულა წასვლა.

#### 4

აღმოჩნდა, რომ ცვლილება სატვირთო მანქანასაც შეეხო. ხელი-სუფლების მიერ ენდი ჯანასისთვის ჩაბარებული, ჩვეულებრივი, უსიცოცხლო მოყავისფრო ზეთისხილისფერი პიკაპის ნაცვლად (ქალღმერთთა და ბლანკებით სავსე პლანშეტი მძღოლის გვერდითა სავარძელზე, მოტკაცუნე რაცია ხელსაწყოების დაფის ქვეშ) გზაზე მდიდრული „დოჯ-რემი“ იწონებდა თავს, დიდებული ძარით, ნაცრისფერი ვილურის სავარძლებითა და, რეაქტიული „ლირის“ მსგავსად, ლილაკებიანი და ბერკეტებიანი პანელით. უჯრაზე მიკრული სტიკერზე ეწერა: „მე მიყვარს ჩემი ბორდერ კოლი“. ეს უკანასკნელი მანქანაში, მგზავრის სავარძლის ქვეშ იწვა, კუდი მოეკეცა და ეძინა. ამ მამრს ლედი ერქვა. ჯოუნსი გრძნობდა, რომ მისი პატრონის ვინაობისა და ბედის გაგება შეეძლო, მაგრამ რაში სჭირდებოდა? სადღაც, ჩრდილოეთით, ჯანასის გზიდან გადაადებული სამხედრო სატვირთო მანქანა დარჩა, გვერდით კი მძღოლის გვამი ეგდო. ჯოუნსი ვერ მიმხვდარიყო, კოლი რატომ შეიცოდეს.

ამ დროს ლედმა კუდი ასწია, ხმამაღლა გააკუა და ჯოუნსი მიხვდა.

მან აღმოაჩინა, რომ თუ ყურადღებას მოიკრებდა, შეეძლო, საკუთარი თვალით დაენახა სამყარო „ძმები თრექერების“ ოფისის ფანჯრიდან. თოვამ იმატა, მაგრამ, სამხედრო პიკაპის მსგავსად, „დოჯიც“ სრულამძრავიანი იყო და ჯიუტად მიიწევდა წინ. შემხვედრ გზაზე ფარებანთებული სამხედრო მანქანები გრძელ ჯაჭვად ჩრდილოეთისკენ, ჯეფერსონტრექტისკენ მიემართებოდნენ. ჯოუნსიმ თვალი მოჰკრა, როგორ გაიელვა თოვლში შუქამრეკლმა ნიშანმა, რომელზეც მწვანეზე თეთრად ეწერა: დერი, მომდევნო 5 მოსახვევი.

ქალაქიდან გამოგზავნილ თოვლსაწმენდ მანქანებს უკვე ჩაეკლოთ და მიუხედავად იმისა, რომ გზაზე მოძრაობა თითქმის არ შეიმჩნეოდა (იქ კარგ ამინდშიც კი არავინ დადიოდა), ნამქერი უკვე აელოთ და მისტერ გრემი სიჩქარე საათში ორმოც მილამდე გაზარდა. ისინი სამ მოსახვევს გასცდნენ, ისინი ჯოუნსის ბავშვობიდან ახსოვდა (კანზასსტრიტი, აეროპორტი, აპმაილჰილი/სტროფორდპარკი), შემდეგ კი მანქანამ სვლა შეანელა.

მოულოდნელად, ჯოუნსიმ გაიფიქრა, რომ ყველაფერს მიხვდა.

მან იმ ყუთებს შეხედა, რომელთა გამოტანაც მოასწრო. უმრავლესობას დადიტსი ეწერა, დანარჩენებს კი, რომელთა გამოტანაც ბოლო წამს მოახერხა – დერი. მისტერ გრემი ფიქრობდა, რომ ყველა აუცილებელი მოგონება – ყველა საჭირო ინფორმაცია – მასთან დარჩა, მაგრამ თუ ჯოუნსი სწორად მიხვდა, საითაც მიემგზავრებოდნენ (ეს ლოგიკური იყო), მისტერ გრემის სიურპრიზი ელოდა. ჯოუნსიმ არ იცოდა, შეშინებოდა თუ გახარებოდა, ბოლოს გააცნობიერა, რომ შიშსაც და სიხარულსაც ერთდროულად განიცდიდა.

აგერ, მწვანე ფირფიტაც წარწერით: 25-ე გადასახვევი – უიჩემსტრიტი.

ჯოუნსიმ ციმციმა ჩართო, უიჩემსტრიტზე დაეშვა და მარცხნივ შეუხვია, ნახევარი მილი გაიარა და კარტერსტრიტზე აღმოჩნდა –

აპმაილჰილსა და კანზასტრიტისკენ მიმავალ აღმართზე, რომლის მეორე მხარეს ოდესღაც ტყიანი ბორცვი და მიკმაკის ტომის ინდიელთა აყვავებული დასახლება მდებარეობდა. ჩანდა, რომ ქუჩა რამდენიმე საათის გაუწმენდავი იყო, მაგრამ ბორბლები ჯიუტად ტკეპნიდა თოვლს. „რემი“ ჯიუტად მიქროდა ქუჩის ორივე მხარეს გაჩერებულ, გორაკებად ქცეულ თოვლმიყრილ მანქანებს შორის, არადა მერიას წინასწარ გამოეცხადებინა, რომ მოსალოდნელი ქარბუქის გამო ტრანსპორტი უნდა გაეყვანათ.

შუაგზაზე მისტერ გრემი კვლავ ვიწრო ქუჩაზე შეუხვია, რომელსაც კარტერლუკაუტი ერქვა. „რემი“ შეხტა და უკანა ბორბლები მოუცურდა. ლედმა თავი ასწია და დაიწკმუტუნა, მაგრამ უკანვე დადო, როცა საბურავები კვლავ მოეჭიდა თოვლს და მანქანა ღინჯად გამოძვრა ნამქერიდან. ჯოუნსი ფანჯარას არ სცილდებოდა და ელოდა, როგორ მოიქცეოდა მისტერ გრემი, როდესაც აღმოაჩენდა, რომ... ერთი სიტყვით, როდესაც აღმოაჩენდა.

თავდაპირველად, როდესაც ფარების შუქმა ბორცვი გაანათა და იქ ქარი თოვლს ატრიალებდა, მისტერ გრემი ოდნავაც არ აღელვებულა, დარწმუნებული იყო, რომ რამდენიმე წამში დაინახავდა... რამდენიმე წამში კანზასტრიტის თავზე გამოჩნდებოდა მაღალი თეთრი კოშკი, სახურავისკენ სპირალივით დახვეული ფანჯრებით. სულ რამდენიმე წამში...

მაგრამ ის რამდენიმე წამი აღარსად იყო. „რემმა“ იმ ადგილამდე მიაღწია, რომელსაც ოდესღაც სტენდფაიფი ერქვა. აქ კარტერლუკაუტი და კიდევ სამი პატარა ქუჩა მდებარეობდა. ისინი დერის ყველაზე მაღალ და გაშლილ ადგილას აღმოჩნდნენ. ქარი საჰაერო განგაშის მაუწყებელი სირენასავით კიოდა და საათში არანაკლებ ორმოცდაათი, შიგადაშიგ კი სამოცდაათი-ოთხმოცი მილის სიჩქარით ქროდა. „რემის“ ფარების შუქში ისე ჩანდა, თითქოს თოვლი ჰორიზონტალურად, ურიცხვი ნამცეცა ხანჯალივით ეცემოდა.

მისტერ გრეი გაუნძრევლად იჯდა. ჯოუნსის ხელები საჭეზე ჩამოცურდა და დაჭრილი ჩიტის მოტეხილ ფრთასავით ჩამოეკიდა. ბოლოს ჩაიბურტყუნა:

– სად არის?

მარცხენა ხელი ასწია, კარის სახელური მოძებნა და გააღო. მისტერ გრეი მანქანიდან გადავიდა და თოვლში ჯოუნსის მუხლებზე დაეცა. ბრაზიანმა ქარმა მაშინვე გამოსტაცა ხელიდან კალმისტარი. შემდეგ ის წამოდგა და მანქანას შემოუარა. ქურთუკის კალთები ფეხებზე სცემდა, შარვლის ტოტები იალქნებივით გაჰბეროდა. საშინლად ციოდა (“ძმები თრექერების” ოფისში სიგრილიდან სიცივემდე ტემპერატურის დაცემას სულ რამდენიმე წამი სჭირდებოდა), მაგრამ შავ-წითელ ღრუბელს, ჯოუნსის ტვინის უდიდესი ნაწილი რომ დაეკავებინა და მისი სხეულიც მოეპარა, ეს არ ანაღვლებდა.

– სად არის? – ჩასძახა მისტერ გრეიმ ქარიშხალს მოღრიალე პირში, – სად არის ის დაწყევლილი სტენდფაიფის კოშკი?

ჯოუნსის ყვირილი არაფერში სჭირდებოდა – ქარიშხლის მიუხედავად, მისტერ გრეი ჩურჩულსაც კი გაიგონებდა.

– ჰა-ჰა-ჰა, მისტერ გრეი, – თქვა მან, – დაგცინეს, მასხრად აგიგდეს! სტენდფაიფის კოშკი ჯერ კიდევ 1985 წელს დაანგრის.

## 6

ჯოუნსიმ გაიფიქრა, – მისტერ გრეი აქ რომ ყოფილიყო, ისტერიკა დაემართებოდა, ჭირვეული და განებივრებული ბავშვივით თოვლში იკოტრიალებდა, ფეხებს ააბაკუნებდა და ტირილს მორთავდაო. მიუხედავად მცდელობისა, რომ ჯოუნსის არ აჰყოლოდა, ის ისევე ვერ იკავებდა თავს ბრაზის ამონთხვევისგან, როგორც ლოთი – სასამლისგან.

თუმცა, გაშმაგებისა და განრისხების ნაცვლად, მისტერ გრეიმ ჯოუნსის სხეული, გორაკის მოშიშვლებული თხემის გავლით, ქვის



კვადრატული კვარცხლბეკისკენ წაიყვანა, იქით, საითაც შვიდასია-  
თასგალონიანი მტკნარი წყლის საცავი ეგულებოდა. მერე თოვლში  
დაეცა, გაჭირვებით წამოდგა, ჯოუნსის ნატკენი თედო მოისრისა,  
ისევ დაეცა და წამოდგა, თან ბივერივით, ბავშვურად ილანძღებო-  
და: ძაღლის ნაფსამო, მაკოცე ტაკოში, ეშმაკის კერძო, მოდი, აქ მიკ-  
ბინე, ქუდში ჩაატრაწე და თავზე ჩამოიფხატე.

ბივერის (ჰენრი ან პიტის) ნათქვამი ეს სიტყვები სასაცილოდ  
ჟღერდა, მობარბაცე, გაავებული მონსტრი-ადამიანისგან კი იმ  
უკაცრიელ გორაკზე, ქარბუქში, შემადრწუნებლად ისმოდა..

მან, ანუ მისტერ გრემი, როგორც იქნა, მიაღწია „რემის“ ფარებით  
გაჩახჩახებულ კვარცხლბეკს. ეს ხუთი ფუტის, დაახლოებით ბავშვის  
სიმაღლის, ახალი ინგლისისთვის დამახასიათებელი ქვის წყობა იყო.  
ზედ ედგა ბრინჯაოსგან ჩამოსხმული ხელჩაკიდებული ბიჭი და გო-  
გო, თავი ისე დაეხარათ, თითქოს ლოცულობდნენ ან გლოვობდნენ.

კვარცხლბეკი თითქმის მთლიანად თოვლს დაეფარა, მაგრამ ზე-  
და ნაწილზე მიმაგრებული ფირფიტა ჯერაც მოჩანდა. მისტერ გრეი  
ჯოუნსის მუხლებზე დადგა, თოვლი ხელით გადახვეტა და წაიკითხა:

ედღვნება 1985 წლის 31 მაისს

ქარბუქში დაღუპულებსა

და ბავშვებს

ყველა ბავშვს

სიყვარულით

ბილი, ბენი, ბევი, ედი, რიჩი, სტენი, მაიკი

უილბლოთა კლუბი

მანქანის ფარების შუქით განათებულ ფირფიტაზე შესაშხურებ-  
ლით უსწორმასწორო წითელი ასოები გამოეყვანათ:

პენიუაიზი ცოცხალია

მისტერ გრეი კიდევ ხუთი წუთის განმავლობაში იდგა გაუნძრევლად და არაფრად აგდებდა იმას, რომ ჯოუნსის ხელ-ფეხი თანდათან გაეყინა და გაუშეშდა (რაში ადარდებდა? ჯოუნსი მხოლოდ დაქირავებული მანქანა იყო, შეეძლოთ ისე ეტარებინა, როგორც მოესურვებოდა, სიგარეტის ნამწვი კი სავარძელზე ჩაექრო). იგი კვარცხლბეკზე მიმაგრებული წარწერის გაშიფვრას ცდილობდა. ქარბუქი? ბავშვები? უიღბლოები? ვინ ან რა იყო პენიუაიზი? და, რაც მთავარია, სად გაქრა სტენდფაიფის კოშკი, რომელიც, ჯოუნსის მოგონებების მიხედვით, აქ უნდა დახვედროდა?

ბოლოს წამოდგა, კოჭლობით მივიდა სატვირთო მანქანასთან, შიგ ჩაჯდა და გამათბობელი ჩართო. თბილი ჰაერის მოხვედრისთანავე ჯოუნსის ააკანკალა. მისტერ გრეი კი უკვე დაკეტილ კართან იდგა და ახსნა-განმარტებას ითხოვდა.

– ასე რატომ ბრაზობთ? – რბილად შეაპარა გაღიმებულმა ჯოუნსიმ. საინტერესოა, იგრძნობდა თუ არა მისტერ გრეი მის ღიმილს? – ჩემგან დახმარებას ელოდით? კარგი რა, მეგობარო. ცხადია, დეტალები არ ვიცი, მაგრამ მიახლოებითი გეგმა ასე წარმომიდგენია: ოცი წლის შემდეგ მთელი პლანეტა გავარვარებულ სფეროდ გადაიქცევა, ხომ ასეა? ყოველგვარი ოზონის ხვრელისა და ადამიანების გარეშე.

– ჭკუას ნუ მასწავლი! არ გაბედო!

ჯოუნსიმ მისტერ გრეის მორიგ ისტერიკამდე მიყვანის სურვილი ჩაიკლა. არ სჯეროდა, რომ დაუპატიჟებელი, თუნდაც განრისხებული სტუმარი კარის შემტვრევას შეეძლებდა, მაგრამ ღირდა კი ტყუილუბრალოდ გარისკვა? გარდა ამისა, ჯოუნსი ემოციურად და ფიზიკურად გამოფიტული იყო, ნერვები სიმეხვივით დასჭიმოდა, პირში კი სპილენძის საზიზღარ გემოს გრძნობდა.

– როგორ გაქრა? – შესძახა მისტერ გრეიმ და მუშტი საჭეს დაარტყა, ეს ახლახან ისწავლა. კლაქსონმა საცოდავად დაიყვირა. ლედმა, ბორდერ კოლიმ, თავი ასწია და დიდი, შეშფოთებული თვალები საჭესთან მჯდომ ადამიანს მიაპყრო, – შენ ვერ მომატყუებდი!

მე შენი მოგონებები მაქვს!

– ეგრეა... მაგრამ მე შენ რაღაც მოგიმზადე. გახსოვს?

– რას გულისხმობ? მითხარი.

– ვითომ, რატომ? – ჰკითხა ჯოუნსიმ, – სანაცვლოდ რას მომცემ? მისტერ გრეი დუმდა. ჯოუნსიმ იგრძნო, როგორ ათვალისწინებდა იგი ფაილებს. მოულოდნელად კარს ქვემოდან და სავენტილაციო ხვრელიდან სუნმა შემოაღწია – მისი საყვარელი პოპკორნის, ყავისა და დედამისის გაკეთებული თევზის სუპის სურნელმა. მუცელი მაშინვე აუმხედრდა და საჭმელი მოსთხოვა.

– ცხადია, დედის რძეს ვერ გაგიჩენ, – თქვა მისტერ გრეიმ, – მაგრამ დაგანაყრებ. ალბათ გვარიანად მოგშივდა, არა?

– აბა რა! შენ ჩემს სხეულს დასვენების საშუალებას არ აძლევ, შეუბრალებლად ფანტავ ჩემს ემოციას და გინდა, რომ უჭმელ-უსმელმა გავძლო?

– აქედან სამხრეთით ერთი ადგილია – „დაიზარტსი“ ჰქვია. თუ დაგიჯერებ, ის ოცდაოთხი საათის განმავლობაში – თქვენებურად, მუდმივად – ღიაა. თუ ამაშიც მომატყუე?

– არ მომიტყუებინარ, – მიუგო ჯოუნსიმ, – თვითონაც ამბობ, რომ ეს შეუძლებელია. მართვის ღილაკები შენს ხელთაა, ისევე, როგორც მენსიერების ბანკი. ყველაფერი მიიღე, გარდა იმისა, რაც აქ ჩავკეტე.

– სად აქ? როგორ შეიძლება, „აქ“ არსებობდეს?

– არ ვიცი, – გულწრფელად აღიარა ჯოუნსიმ, – არც ის ვიცი, მაჭმევ თუ არა საჭმელს.

– მომიწევს, – თქვა კარის მეორე მხრიდან მისტერ გრეიმ და ჯოუნსი მიხვდა, რომ ისიც სიმართლეს ამბობდა. – თუ მანქანაში დროდადრო საწვავს არ ჩაასხამ, გაჩერდება, მაგრამ თუ ჩემს ცნობისმოყვარეობას დააკმაყოფილებ, შენს საყვარელ საჭმელს გაჭმევ. თუ არა და... – ხვრელებიდან ახლა გადახარშული ბროკოლისა და ბრიუსელის კომბოსტოს სუნი შემოვიდა.

– ეგრე იყოს, – დაეთანხმა ჯოუნსი, – ყველაფერს მოგიყვები, რასაც შევძლებ, შენ კი „დაიზარტსში“ ჩემთვის ბლინებსა და ბეკონს აიღებ. საუზმე ოცდაოთხი საათის განმავლობაში, იცი, ეს სადაც არის. შევთანხმდით?

– შევთანხმდით. ახლა კი კარი გამიღე და ერთმანეთს ხელი ჩამოვართვათ.

ჯოუნსის სახეზე გაცეცხის ღიმილი ალებექდა – მისტერ გრემი პირველად სცადა გახუმრება და ეს არცთუ ცუდად გამოუვიდა. მან უკანა ხედვის სარკეში ჩაიხედა და ასეთივე ღიმილი დაინახა იმ სახეზე, რომელიც მას აღარ ეკუთვნოდა. ტანში ჟრუანტელმა დაუარა.

– იქნებ, ხელის ჩამორთმევის ნაწილს გადავახტეთ? – თქვა მან.

– მომიყევი.

– კარგი, ოღონდ გაფრთხილებ: თუ პირობას დაარღვევ, ჩემგან ველარაფერს ეღირსები.

– გავითვალისწინებ.

სატვირთო მანქანა სტენდფაიფის წვერზე იდგა და რესორებზე ოდნავ ქანაობდა. ფარების შუქი სიბნელეში სინათლის კონუსებს ქმნიდა, შიგ ფიფქები ცეკვავდა. ჯოუნსიმ, რაც იცოდა, ყველაფერი უამბო მისტერ გრემს. მისი აზრით, ეს იდალური ადგილი იყო საშინელი ამბების მოსაყოლად.

## 8

1984 და 1985 წლები ძალზე უიღბლო აღმოჩნდა დერისთვის. 1984 წლის ზაფხულში ადგილობრივმა მოზარდებმა არხში დაახრჩვეს ერთი „ცისფერი“. მომდევნო ათი თვის განმავლობაში უცნობმა მანიაკმა, რომელიც ზოგჯერ კლოუნით იცვამდა, რამდენიმე ბავშვი გამოასალმა სიცოცხლეს.

– ვინ არის ეს ჯონ უეინ გეისი? – იკითხა მისტერ გრემი, – ბავშვების მკვლელი?

– არა, ვილაც ტიპი შუა დასავლეთიდან, რომელიც მსგავსი მეთოდებით მოქმედებდა, – მიუგო ჯოუნსიმ, – თქვენ, ალბათ, არაფერი გესმით იმ ასოციაციური კავშირებისა, რომელსაც ჩემი გონება ქმნის, არა? თუმცა საიდან უნდა გესმოდეთ. დარწმუნებული ვარ, რომ იქ, საიდანაც გამოგვეცხადეთ, არც ისე ბევრი პოეტია.

მისტერ გრემი არაფერი უპასუხა. ჯოუნსის იმაშიც ეპარებოდა ეჭვი, რომ მან სიტყვა „პოეტის“ მნიშვნელობა იცოდა. არც აინტერესებდა.

– ასე იყო თუ ისე, – განაგრძო ჯოუნსიმ, დერის საშინელმა ქარიშხალმა გადაუარა. ეს 1985 წლის 31 მაისს მოხდა. სამოცზე მეტი ადამიანი დაიღუპა. სტენდფორდი მოჭრილ ხესავით წაიქცა და გორაკიდან კანზასსტრიტისკენ დაგორდა, – მან ხელი სატვირთო ავტომანქანის მარჯვნივ მდებარე, ბნელი ფლატესკენ გაიშვირა, – თითქმის სამი მეოთხედი მილიონი გალონი წყალი ქალაქის საქმიან ნაწილში შევარდა და საშინელი ნგრევა გამოიწვია. მაშინ კოლეჯში გამოსაშვებ გამოცდებს ვაბარებდი. მამამ დამირეკა და დეტალები შემატყობინა, მაგრამ მე ისედაც ყველაფერი ვიცოდი ტელევიზიიდან და გაზეთებიდან.

ჯოუნსი გაჩუმდა და ჩაფიქრდა. მის წინ ახლა შელანძღული და ჭუჭყიანი კი არა, შესანიშნავად მოწყობილი, მშვენიერი და კომფორტული ოფისი იყო (ქვეცნობიერად, სახლიდან ერთი დივანი და იმზის შესანიშნავი, უნივერსიტეტის მასწავლებლის ხელფასისთვის მიუწვდომელი სკამი დაამატა, რომელიც თანამედროვე ხელოვნების მუზეუმში ნახა), იმ ცივ სამყაროზე გაცილებით უკეთესი, სადაც მის დამპყრობელს უხდებოდა ყოფნა. – ჰენრიც უნივერსიტეტში იყო. ჰარვარდში. პიტი თავის მეგობარ ჰიპებთან ერთად დასავლეთის სანაპიროზე დაეხეტებოდა. ბივერი ორწლიან კოლეჯში, როგორც შემდგომში ჰყვებოდა, ჰაშიშის წევასა და ვიდეოთამაშებში ვარჯიშობდა.

როდესაც დერის ქარიშხალმა შეუტია, იქ მათგან მხოლოდ დადიტი იყო... მაგრამ ჯოუნსიმ აღმოაჩინა, რომ დადიტის სახელის ხსენება არ სურდა.

მისტერ გრეიმ არაფერი თქვა, მაგრამ ჯოუნსი აშკარად გრძობდა მის მოუთმენლობას. მისტერ გრეის მხოლოდ სტენდფაიფი და ის აინტერესებდა, თუ როგორ მოახერხა ჯოუნსიმ მისი გაცურება.

– მომისმინეთ, მისტერ გრეი. თუკი აქ ვინმე მოატყუეს, მე არაფერ შუაში ვარ. საკუთარ თავს დააბრალებთ. მხოლოდ რამდენიმე ყუთი მაქვს, წარწერით დერი. მაშინ მოვიტანე, როდესაც დაკავებულ იყავით – იმ საცოდავ ჯარისკაცს კლავდით.

– ის საცოდავი ჯარისკაცები ციდან ხომალდებით მოფრინდნენ და ყველა ჩემიანი მოკლეს, თუკი სადმე წააწყდნენ.

– რას მეუბნებით! ? კაცი იფიქრებს, თითქოს აქ იმიტომ ჩამოხვედით, რომ გალაქტიკურ საკვირაო სკოლაში მიგეწვიეთ.

– ასე რომ ყოფილიყო, სხვანაირად შეგვხვდებოდით?

– სულაც არ მინდა ჰიპოთეზების განხილვა, – თქვა ჯოუნსიმ, – განსაკუთრებით მას შემდეგ, რაც პიტსა და სატვირთო მანქანის მძღოლს დამართეთ. არც ინტელექტუალურ დისკუსიას ვაპირებ თქვენთან.

– ჩვენ იმას ვაკეთებთ, რაც უნდა გავაკეთოთ.

– შესაძლოა, მაგრამ გიჟი უნდა იყოთ, თუ ჩემი დახმარების იმედი გაქვთ.

ძალდი ჯოუნსის კიდევ უფრო შეცბუნებული მიაჩერდა. როგორც ჩანს, არ იყო ისეთ პატრონებს მიჩვეული, რომლებიც საკუთარ თავს გაცხოველებით ესაუბრებოდნენ.

– სტენდფაიფი თექვსმეტი წლის წინ, 1985 წელს წაიქცა, მაგრამ შენ ეს მოგონება მოიპარე?

– ასე ვთქვათ. თუმცა, არა მგონია, მოსამართლემ და ნაფიცმა მსაჯულებმა მხარი დაგიჭირონ, ვინაიდან, ეს ჩემი საკუთარი მოგონებებია.

– კიდევ რა მოიპარე?

– ეს ჩემი საქმეა, თქვენი კი – ფიქრი და გამოცნობა.

კარზე ხმამაღალი, მოუთმენელი ბრახუნი ატყდა და ჯოუნსის კვლავ გაახსენდა ზღაპარი სამ გოჭზე. „უბერეთ და უბერეთ სული, მისტერ გრეი. გაშმაგებისგან დატკბით“.

მაგრამ მისტერ გრეი, როგორც ჩანს, კარს მოსცილდა.

– მისტერ გრეი! – დაუძახა ჯოუნსიმ, – არ გაბრაზდეთ, კარგი?

მისტერ გრეი, სავარაუდოდ, კვლავ ინფორმაციის მოსაძიებლად წავიდა. სტენდფაიფი დაეცა, მაგრამ დერი ისევ თავის ადგილზე იდგა. აქედან გამომდინარე, წყალი მას საიდანღაც აუცილებლად მიეწოდებოდა. იცოდა კი ჯოუნსიმ – საიდან?

ჯოუნსიმ არ იცოდა. მხოლოდ ის ახსოვდა, ისიც ბუნდოვნად, რომ როდესაც კოლეჯიდან დაბრუნდა, წყალს ბოთლებით ყიდულობდნენ. დროთა განმავლობაში ონკანები კვლავ ამუშავდა, მაგრამ ოცდაერთი წლის ასაკში იმაზე უფრო მეტს ფიქრობ, თუ როგორ შეუძვრე მერი შრატს კაბის ქვეშ. წყალი მოდის, სვამ და მაშინვე ივიწყებ. იშვიათად თუ გაგახსენდება, ისიც მუცლის ტკივილის ან სლოკინის დროს.

მისტერ გრეისგან წამოსული ფრუსტრაციის იმპულსი? თუ ეს მხოლოდ მისი წარმოსახვის ნაყოფი იყო?

ჯოუნსი გულწრფელად იმედოვნებდა, რომ – არა.

კარგად კი გამოვიდა... ამაზე მათი ოთხეული, ყმაწვილკაცობაში, – დაგლიჯაო, – იტყოდა.

## 9

რობერტა ქვეელი ცუდმა სიზმარმა გამოაღვიძა. მიიხედ-მოიხედა. ეგონა, სიბნელეში აღმოჩნდებოდა, მაგრამ საათის ციფერბლატზე კვლავაც მეგობრულად ციმციმებდა ცისფერი ციფრები. მაშასადამე, დენი არ გამორთულა. გაუკვირდა, იმის გათვალისწინებით, თუ როგორ ზრიალებდა ქარისგან ფანჯრები.

საათი ორის ოთხ წუთს უჩვენებდა. რობერტამ ტუმბოზე მდგარი ლამპა აანთო, რათა სადენების გაწყვეტამდე ცოტა ხნით მაინც ჰქონოდა სინათლე. რამ გააღვიძა? ქარმა? ცუდმა სიზმარმა? სიზმარი მართლაც საშინელი იყო – უცხოპლანეტელებისა და სიკვდილის სხივების შესახებ, ყველა სადღაც გარბოდა... მაგრამ არა, სიზმარს არ ჰგავდა.

ამ დროს ქარი ოდნავ მიწყნარდა და რობერტა მიხვდა, რამ წამოაგდო ლოგინიდან – დადიტის ხმამ ქვედა სართულიდან. დადიტის... მღეროდა? ნუთუ ეს შესაძლებელი იყო? თანაც გუშინდელი მძიმე შუადღისა და საღამოს შემდეგ, კინალამ ჭკუიდან რომ გადავიდნენ.

– იერი არია! @ ყვიროდა იგი ორიდან ხუთ საათამდე, რაც ნიშნავდა: „ბივერი მკვდარია!“

ვერაფრით მოახერხა შვილის დაწყნარება. ბოლოს დადიტის ცხვირიდან სისხლი წასკდა. რობერტას ამის ძალიან ეშინოდა. ზოგჯერ სისხლს ვერ უჩერებდა ხოლმე და საავადმყოფოში მიჰყავდა. ამჯერად, რობერტამ მოახერხა გამკლავება. დადიტის ცხვირში ბამბის ტამპონები ჩასჩარა, თავი გადააწევინა და ძგიდებზე ხელი მოუჭირა. შემდეგ ექიმ ბრისკოს დაურეკა, რათა გაეგო, მიეცა თუ არა შვილისთვის ვალიუმის ტაბლეტი, მაგრამ ექიმი ბრისკო ნასაუში წასულიყო. უკაცრავადო, – უპასუხეს. სხვები გამოძახებაზე იმყოფებოდნენ. ერთი ახალგაზრდა ექიმიღა რჩებოდა, მაგრამ მას დადიტის არასდროს ენახა და ამიტომ, რობერტამ აღარ დაურეკა. გარისკა და დადიტის ვალიუმი დააღვეინა, ფერმკრთალ, გამშრალ ტუჩებსა და პირში ლიმონის არომატის მქონე გლიცერინიანი ტამპონი წაუსვა. დადიტის გამუდმებით აწუხებდა სტომატიტი და წყლულები, მიუხედავად იმისა, რომ ქიმიოთერაპია დიდი ხნის წინ დაასრულა. სამუდამოდ.

ექიმები – ბრისკოცა და სხვებიც – ცდილობდნენ, ეს აღარ ეხსენებინათ და კათეტერი აღარ მოუხსნიათ, მაგრამ ყველაფერი დასრულებული იყო. რობერტა აღარ დაუშვებდა, რომ მის შვილს ის ჯო-



ჯობნეთი კიდევ გაეგლო. როგორც კი დადიტსმა აბი გადაყლაპა, რობერტამ დააწვინა და გვერდით მიუწვა. ისე მოეხვია, რომ მის მარცხენა ხელს არ შეხებოდა, იქ კათეტერი გამოჩრილიყო – და სიმღერა წამოიწყო. ოღონდ – არა ბივერის იავნანა. იმ დღეს არ ღირდა.

მოგვიანებით, როდესაც შვილი ცოტათი დაწყნარდა და თითქოს ჩაეძინა, მან ფრთხილად ამოუღო ბამბა ნესტოებიდან. ერთი ცალი კანზე მიმხმარიყო და დადიტსმა მაშინვე თვალი გაახილა – ეს რაღაც მშვენიერ, მწვანე აფეთქებას ჰგავდა. რობერტას ხშირად უფიქრია, რომ სწორედ თვალები იყო დადიტსისთვის ნამდვილი საჩუქარი და არა ხაზის დანახვის უნარი და ყველაფერი, რაც მას უკავშირდებოდა.

– ეიკო.

– რა მოხდა, დადი?

– იერი აშია?

ამ სიტყვების გაგონებაზე რობერტას გული შეეკუმშა. გაახსენდა ბივერის სასაცილო ტყავის ქურთუკი, რომელიც ისე უყვარდა, რომ სანამ ბოლომდე არ გაცვითა, არ გაუხდია. სხვა ყოფილიყო, ნებისმიერი – მათი ოთხეულიდან, ქალი კიდევ დაეჭვდებოდა შვილის წინათგრძნობაში. მაგრამ თუ დადიტსმა თქვა, რომ ბივერი მოკვდა, მასასადამე, ეს თითქმის სიმართლე იყო.

– ჰო, საყვარელო, დარწმუნებული ვარ, ბივერი ცაშია. ახლა კი ძილის დროა.

რამდენიმე უსასრულო წამის განმავლობაში მწვანე თვალები მას თითქოს სულში ჩაჰყურებდა და რობერტას მოეჩვენა, რომ შვილი საცაა ატირდებოდა – მართლაც, ერთი მოზრდილი, იდეალური ფორმის ცრემლი გაუპარსავ ლოყაზე ჩამოგორდა. ბოლო დროს დადიტსი თითქმის ველარ იპარსავდა, „ფილიპსის“ ელექტროსამართებელიც კი მრავალრიცხოვან პატარ-პატარა ნაკაწრს უტოვებდა, საიდანაც შემდეგ საათობით სდიოდა ყუყუდი. მან თვალები დახუჭა და ქალი ფეხაკრეფით გავიდა ოთახიდან.

სალამოს, როდესაც შვილს შვრიის ფაფას უმზადებდა (ნებისმიერი საკვების მიღებისას, ყველაზე უგემურისა და წყალწყალას გარდა, პირღებინება ეწყებოდა – მოახლოებული აღსასრულის კიდევ ერთი ნიშანი), კოშმარი განახლდა. ჯეფერსონტრექტიდან მოსული უცნაური ახალი ამბებით შეშინებული რობერტა ქოშინით გავარდა დადიტის საძინებლისკენ. ის საწოლში წამომჯდარიყო, თავს ბავშვურად ჯიუტად აქნევდა და თითქოს ვილაცხას ეკამათებოდა. სისხლდენა განუახლდა და თავის ყოველ გაქნევაზე სისხლის წვეთები ყველაფერს ალაქავებდა: ბალიშს, ოსტინ პაუერსის<sup>172</sup> ავტოგრაფიან ფოტოსურათსა (ქვემოთ ეწერა „მშვენიერ ბავშვს“) და მაგიდაზე დადებულ კბილების სავლებს, „კომპაზინს“, „პერკოსეტს“, უსარგებლო მულტივიტამინებს, ლიმონისსუნიანი ტამპონების მაღალ კოლოფს.

ამჯერად, პიტის გამო განიცდიდა. განაცხადა, რომ ისიც მომკვდარიყო – საყვარელი (და ხშირად არცთუ საზრიანი) პიტერ მური. „ღმერთო ჩემო, ნუთუ ეს სიმართლეა? ყველაფერი სიმართლეა? თუ მხოლოდ ნაწილი?“

ისტერიკული ტირილის მეორე შეტევა დიდხანს არ გაგრძელებულა, შესაძლოა იმიტომ, რომ პირველმა ქანცი გააცალა. საბედნიეროდ, რობერტამ სისხლდენის შეჩერება მოახერხა, შემდეგ თეთრეული გამოცვალა, რისთვისაც დადიტის ფანჯარასთან მდგარ სავარძელში გადასვა. ისიც მორჩილად მიაჩერდა სიბნელეს, სადაც ქარი ზუზუნით მიაქროლებდა თოვლის ფანტელებს. ზოგჯერ სლუკუნით და ისე მწარედ ამოიოხრებდა, რომ რობერტას გულ-მუცელი ეწვოდა. გამხდარი, ფერმკრთალი და სრულიად გამელოტებული შვილის დანახვაზეც კი ტკივილს განიცდიდა. მან დადიტს კეპი მისცა „რედ სოქსის“ ემბლემითა და წინაფრაზე სახელგანთქმული პედრო მარტინესის ავტოგრაფით (რამდენი მშვენიერი ნივთი ეძლევა ადამიანს, როდესაც ცოტა ხნის სიცოცხლე დარჩა, – უკვირდა ხოლმე რობერტას), ეშინოდა, თავზე არ შესცივდესო, მაგრამ შვილმა მისი

---

<sup>172</sup> რამდენიმე მხატვრული კომედიური ფილმის პერსონაჟი, სუპერაგენტი.

დახურვა არ ისურვა, მუხლებზე დაიდო და ისევ სიბნელეს მიაჩერდა დიდრონი სევდიანი თვალებით.

ბოლოს, რობერტამ მოახერხა და საწოლში გადაიყვანა, სადაც კვლავ შეეჩხება მის მომაკვდავ, მწვანე ნათებას.

– იტიც აშია?

– ჰო, დადი, პიტიც ცაშია, დარწმუნებული ვარ.

არა, არ უნდა ვიტყვო, – გაიფიქრა რობერტამ, – არავითარ შემთხვევაში, თორემ ისიც იტირებს.

მაგრამ დაუპატიჟებელი ცრემლები თვალებზე ადგა. თავი მარილიანი სითხით სავსე ჭურჭელი ეგონა, ყოველ შესუნთქვაზე ზღვის სუნი სცემდა.

– აში იერთან ეადაა?

– ჰო, საყვარელო, ბივერთან ერთადაა.

– მე აავ იერს და იტს აში?

– ჰო, აუცილებლად ნახავ ცაში, ოლონდ დიდი ხნის შემდეგ.

დადიტსმა თვალები დახუჭა. რობერტა საწოლის კიდეზე ჩამოჯდა, ხელებზე დაიხედა და ენით აუწერელი მწუხარება და მარტოობა იგრძნო.

იგი სასწრაფოდ ჩავიდა ქვევით. დადიტსი მართლაც მღეროდა. რობერტას თავისუფლად შეეძლო შვილის ენაზე საუბარი (რატომაც არა? ბოლო ოცდაათზე მეტი წლის განმავლობაში ეს მისი მეორე მშობლიური ენა იყო), ამიტომაც ზედმეტი დაძაბვის გარეშე გაშიფრა თითქოსდა უაზრო ბგერები:

– სკუბი-დუბი-დუ, სად ხარ? ჩვენ რაღაც სამუშაო უნდა შევასრულოთ. მაგრამ, სკუბი-დუ, დახმარება გვჭირდება...

ქალმა ოთახში შეირბინა. არ იცოდა, იქ რა დახვდებოდა. ამას კი ნამდვილად არ ელოდა: ოთახი დღესავით გაჩახჩახებულიყო, ყველა ნათურა ენთო. დადიტსს ტანსაცმელი ჩაეცვა, პირველად მისი უკანასკნელი (და საბოლოო, ექიმ ბრისკოს აზრით) რემისიის შემდეგ: საყვარელი ველვეტის შარვალი, მაისური გრინჩის გამოსახულებით

და დაბამბული ჟილეტი. თავზე „რედ სოქსის“ ქუდი ეხურა. კვლავინდებურად ფანჯარასთან მდგარ სავარძელში იჯდა და ღამეს გასცქეროდა. არც დაღვრემილი გამომეტყველება, არც ცრემლი. ქარიშხალს სიხარულით გაბრწყინებული თვალებით მისჩერებოდა, ისევე, როგორც უწინ, ავადმყოფობამდე, რომელიც მას შეუმჩნევლად, ერთი შეხედვით უმნიშვნელო სიმპტომებით ეწვია: ებოში ფრისბის<sup>173</sup> მცირე ხნით თამაშიც საკმარისი იყო, რომ ძლიერი დაღლა ეგრძნო და სუნთქვა შეკვროდა, მსუბუქი მირტყმის დროსაც კი დიდი ჩალურჯებები უჩნდებოდა და ძალზე ნელა უქრებოდა. სწორედ ისე გამოიყურებოდა, როგორც...

რობერტას ამაზე ფიქრი არ შეეძლო, ნერვები არ ჰყოფნიდა.

– დადიტს! დადი, რა...

– ეიკო! ადაა ემი აუმის უთი? – „დედიკო, სადაა ჩემი საუზმის ყუთი?“

– სამზარეულოში, მაგრამ ახლა ღამეა, დადი. და თოვს. შენ ვერ...

„შენ ვერსად წახვალ“, – უნდოდა ეთქვა რობერტას, მაგრამ ამის სათქმელად ენა არ მოუბრუნდა. შვილს თვალები უბრწყინავდა. იქნებ, თვითონაც უნდა გახარებოდა დადიტსის ასეთი მოყოჩაღება, მაგრამ პირიქით, უფრო მეტად შეეშინდა.

– უთი იება! აუმე იება! – „ყუთი მჭირდება! საუზმე მჭირდება!“

– არა, დადიტს! – შესძახა რობერტამ, რომელიც ცდილობდა, სიმტკიცე გამოეჩინა, – შენ უნდა გაიხადო და დაწვე. მეტი არაფერი. მოდი, მოგეხმარები.

მაგრამ როგორც კი მიუახლოვდა, დადიტსმა ხელები ასწია, გულზე დაიკრიფა, მარცხენა ხელისგული მარჯვენა ლოყაზე მიიღო, მარჯვენა კი – მარცხენაზე. ადრეული ბავშვობიდან პროტესტს ამ ერთადერთი ფორმით გამოხატავდა. ეს საკმარისი იყო. ახლაც ასე მოხდა. რობერტას არ უნდოდა მისი წყენინება, რასაც, შესაძლოა, მორი-

---

<sup>173</sup> მფრინავი დისკებით თამაში.

გი სისხლდენა გამოეწვია. თუმცა, არც საუზმის მომზადებას აპირებდა ღამის ორის თხუთმეტ წუთზე. კატეგორიულად არ აპირებდა.

ქალი საწოლს მოშორდა და დაჯდა. ოთახში თბილოდა, მაგრამ რობერტას შესცივდა, მიუხედავად იმისა, რომ ფლანელის თბილი პერანგი ეცვა. დადიტსმა ხელები ნელა ჩამოუშვა, თან ყურადღებით მისჩერებოდა დედას.

– თუ გინდა, იჯექი, – თქვა ქალმა, – მაგრამ რა საჭიროა? სიზმარი ნახე, დადი? ცუდი სიზმარი?

შესაძლოა, სიზმარი ნახა, ოღონდ ცუდი არ უნდა ყოფილიყო. ამას მისი განათებული სახე მოწმობდა. რობერტას გაახსენდა ეს გამოცემული: ასე გამოიყურებოდა ის მშვენიერ ოთხმოციან წლებში, როდესაც ჰენრისთან, პიტთან, ბივერთან და ჯოუნსისთან მეგობრობდა. სანამ ისინი არ წამოიზარდნენ და ცხოვრების სხვადასხვა გზას არ დაადგნენ. მას შემდეგ იშვიათად ურეკავდნენ და კიდევ უფრო იშვიათად მოდიოდნენ სანახავად. თავიანთი საქმე და საზრუნავი ჰქონდათ და თანდათან დაივიწყეს ის, ვინც აქ, დერიში დარჩა.

სწორედ ასე იყურებოდა ხოლმე დადიტსი, როდესაც გრძნობდა, რომ მეგობრები მასთან სათამაშოდ მოსვლას აპირებდნენ. ზოგჯერ ერთად მიდიოდნენ სტროფორდ-პარკში ან ბარენსში (იქ სირბილი ეკრძალებოდათ, მაგრამ მაინც დარბოდნენ. ეს რობერტამაც იცოდა და ელფიმაც, ერთხელ ამის გამო გაზეთის პირველ გვერდზეც მოხვდნენ). შიგადაშიგ ელფის ან რომელიმე მშობელს ხუთივე მათგანი მინიგოლფის აეროპორტში ან ნიუპორტის გასართობ ცენტრში მიჰყავდა. ასეთ დღეებში რობერტა დადიტსის სკუბი-დუს საუზმის ყუთში სენდვიჩს, ნამცხვარსა და რძით სავსე თერმოსს დებდა.

იგი ფიქრობს, რომ ახლა მისი მეგობრები მოვლენ. ალბათ, ჰენრი და ჯოუნსი. რადგან ამბობს, რომ პიტი და ბივერი...

მოულოდნელად, რობერტას გონებაში საშინელი სურათი წარმოუდგა და ხელები ნერვიულად მომუშტა: დაინახა, როგორ გაალო კარი მას შემდეგ, რაც ღამის სამ საათზე კაკუნი მოესმა. არ უნდოდა

ამის გაკეთება, მაგრამ საკუთარი თავი ვერაფრით შეაჩერა. ზღურ-ბლზე ცოცხალი ადამიანების ნაცვლად მიცვალებულები იდგნენ – ბავშვობაში დაბრუნებული ბივერი და პიტი, როგორც იმ დღეს, როცა მათ პირველად შეხვდა; როცა მათ დადი საშინელ დამცირებას გადაარჩინეს და მშვიდობიანად მოიყვანეს სახლში. ბივერს კვლავაც მოტოციკლეტისტი ქურთუკი ეცვა ურიცხვი ელვაშესაკრავით, პიტს კი – სვიტერი ჭრილითა და მკერდის მარცხენა მხარეს გაკეთებული წარწერით NACA, რომლითაც ძალიან ამაყობდა. მათგან სიცივე მოდიოდა. გაფითრებულები მიცვალებულთა მოწყენილი, შავად მოელვარე თვალებით იყურებოდნენ. არც ღიმილი, არც მისალმება. ჯო ბივერ კლარენდონმა მისკენ ნაბიჯი გადადგა და საქმიანად გაიწვდინა მომწვანო-მოყვითალო ხელები, ზღვის ვარსკვლავასავით გაფარჩხული თითები: „დადიტსის წასაყვანად მოვედით, მისი ქვევლ. ჩვენ მოგკვდით, ახლა ისიც მკვდარია“.

რობერტას ტანში ჟრუანტელმა დაუარა; ხელი ხელს შემოჰკრა. დადიტსს არაფერი დაუნახავს – ფანჯარაში მოთმინებით იყურებოდა და ელოდა, შემდეგ ისევ ამღერდა, ოღონდ ძალიან ხმადაბლა:

– უბი-უბი-უ-უ, ად არ? ენ ააც აუშაო უდა ეააუულოოოთ...

## 10

– მისტერ გრეი?

ისევ დუმილი. ჯოუნსი ოფისის კართან იდგა, რომელიც ახლა აშკარად მას ეკუთვნოდა – „ძმები თრექერებისგან“ ჭუჭყიანი ფანჯრების გარდა აღარაფერი დარჩენილიყო (კაბაწამოხდილი გოგონას პორნოგრაფიული სურათიც კი ვან გოგის „მზესუმზირებს“ ჩაენაცვლებინა). სულ უფრო მოუსვენრად იყო. ნეტავ, რას ეძებდა ის ნაძირალა?

– მისტერ გრეი, სად ხართ?

პასუხს ვერც ამჯერად ეღირსა, მაგრამ იგრძნო, რომ მისტერ

გრეი ბრუნდებოდა... თანაც კმაყოფილი და ბედნიერი. ის ბოზიშვილი ბედნიერი იყო!

ჯოუნსი კიდევ უფრო შეშფოთდა.

– მომისმინეთ, – თქვა მან და შუბლითა და ხელებით თავშესაფრის კარს მიეყრდნო, – თქვენთან ერთი წინადადება მაქვს, მეგობარო: ისედაც, ნახევრად ადამიანი ხართ. ბარემ, მთლიანად გარდაიქმენით. მაშინ მშვიდობიან თანაარსებობასაც შევძლებთ. მე თქვენ აქაურობასთან შეგუებაში დაგეხმარებით, ყველაფერს აგიხსნით. ნაყინი მშვენიერი რამ არის, ლუდი – კიდევ უკეთესი. აბა, რას იტყვით?

მოეჩვენა, რომ მისტერ გრეი კინალამ აჰყვა ცდუნებას, თუკი იმ უფორმო არსებას ეს უნარი საერთოდ ჰქონდა, მაშინ ურთიერთხელსაყრელი გაცვლა შედგებოდა, როგორც ზღაპრებში ხდება ხოლმე.

მაგრამ მისტერ გრეიმ ცდუნებას გაუძლო.

შემდეგ კარი გაჯახუნდა, გაისმა სტარტერის ხმა და ძრავაც აღმუვლდა.

– საით გაგვიწევია, მეგობარო? გგონია, სტენდფაიფიდან დაშვებას შევძლებთ?

არანაირი პასუხი. მხოლოდ შემაშფოთებელი შეგრძნება, რომ მისტერ გრეი რალაცას ეძებდა... და იპოვა კიდევ.

ჯოუნსი სასწრაფოდ ფანჯრისკენ გაემართა და სწორედ იმ დროს გაიხედა გარეთ, როცა სატვირთო მანქანის ფარების შუქმა დაღუპულთა ძეგლის კვარცხლბეკი გაანათა. წარწერა კვლავ თოვლს დაეფარა. როგორც ჩანს, აქ გარკვეული ხანი მდგარან.

„დოჯ რემმა“ ნელა, ფრთხილად გაიარა ნამქერი, ბამპერამდე რომ სწვდებოდა და გორაკიდან დაეშვა.

ოცი წუთის შემდეგ ისინი კვლავ გზატკეცილზე აღმოჩნდნენ და სამხრეთისკენ გაემგზავრნენ.

# თავი მეჩვიდმეტე გმირები

## 1

ოუენი ხმამაღლა ეძახდა ჰენრის, მაგრამ ამოდ: დაღლილ-დაქანცულ კაცს ღრმად ეძინა. შემდეგ გონებით სცადა მასთან დაკავშირება. ახლა, როდესაც ბაირუსი საგრძნობლად მომძლავრებულიყო, ამის გაკეთება აღარ უჭირდა. სამწუხაროდ, მარჯვენა ხელის სამ თითზე სოკო მოსდებოდა. სოკოს მარცხენა ყურის ნიჟარაც მოწითალო, ქავილის გამომწვევი ფენით დაეფარა. ოუენს ორი კბილიც ჩამოსცვივდა, მაგრამ წარმოქმნილ ხვრელებში ჯერ არაფერი ეზრდებოდა.

კურცსა და ფრედის არაფერი სჭირდათ – ჩანს, კურცის თვითგადარჩენის ძლიერი ინსტინქტის წყალობით. ორი გადარჩენილი ვერტიმფრენის, ოუენისა და ჯო ბლეიკის ეკიპაჟების წევრები კი ბაირუსით უიმედოდ დაავადებულიყვნენ. ფარდულში ჰენრისთან პირველი საუბრისას ოუენს თანამემამულეების ხმამაღალი შეძახილი გონებაში ექოსავით ჩაესმოდა. ჯერჯერობით, ისინი ახერხებდნენ და მის



მსგავსად, თავიანთ უბედურებას, მასავით, ზამთრის ტანსაცმლის ქვეშ მაღავდნენ, მაგრამ ასე ვერ გაგრძელდებოდა და ფიქრობდნენ, რა ელონათ.

ოუენს მიაჩნდა, რომ მათთან შედარებით გაუმართლა, რადგან საქმე მაინც ჰქონდა.

იგი ფარდულის ფანჯარასთან იდგა, ცდილობდა, სადენებს არ შეხებოდა და მორიგ სიგარეტს ეწეოდა, ყოველგვარი სურვილის გარეშე. ბოლოს, გონებით ჰენრის მოსაძებნად გაემართა და დაინახა, როგორ ეშვებოდა ის ბალახით დაფარულ ციცაბო ფერდობზე. მწვერვალიდან სოფთბოლის თუ ბეისბოლის მოთამაშე ბავშვების ყრიაბული ისმოდა. ჰენრი მოზარდი იყო და ვილაცას ეძახდა – ჯეინის? ჯოლის? ამას რა მნიშვნელობა ჰქონდა? იგი სიზმარს ხედავდა და ოუენს რეალობაში უნდა დაებრუნებინა. ჰენრის ისედაც დიდხანს ეძინა (გათვალისწინებულზე საათით მეტი), მაგრამ თუ რამეს აპირებდნენ, სწორედ ახლა იყო დრო.

„ჰენრი“, – დაუძახა მან.

მოზარდმა დაბნეულად მიიხედ-მოიხედა. მის გვერდით სხვა ბიჭებიც იყვნენ... სამნი... არა, ოთხნი. ერთი მათგანი რაღაც მილის მსგავსში იყურებოდა. სახეების გარჩევა ჭირდა, მაგრამ ოუენს ეს არ ადარდებდა. ის ჰენრის ეძებდა და არა მუწუკებიან, შეშინებულ ორეულს. მას მამაკაცი სჭირდებოდა.

„ჰენრი, გაიღვიძე“.

„არა, ის გოგო იქაა. უნდა ამოვიყვანოთ. ჩვენ“...

„ვინც გინდა იყოს, ვირთხის კუდადაც არ მიღირს. გაიღვიძე“.

„მაგრამ მე“...

„დროა, ჰენრი, გაიღვიძე. ადექი, გაიღვიძე“...

## 2

„...შენი დედაც!“

ჰენრიმ შეჰყვირა, წამოჯდა და იქაურობა მოათვალიერა. ვერ გაეგო, ვინ იყო და სად იმყოფებოდა. ეს, ცხადია, არ მოეწონა, მაგრამ უფრო იმან შეაშფოთა, რომ არ იცოდა, რომელ დროში აღმოჩნდა. თვრამეტი წელი შესრულებოდა, ოცდათვრამეტი თუ რაღაც საშუალო? ბალახის სუნს გრძნობდა, ყურში ბურთზე საცემელას დარტყმის ხმა (სოფტბოლის საცემელასი, რომელსაც გოგონები თამაშობდნენ, ყვითელ ბლუზებში გამოწყობილი გოგონები) და პიტის შეძახილი ჩაესმოდა: „ის გოგო აქ არის, ბიჭებო, ვფიქრობ, ის აქ არის!“

– პიტმა დაინახა ის, ხაზი დაინახა, – ჩაიბურტყუნა ჰენრიმ, მაგრამ თვითონაც არ იცოდა, რაზე ლაპარაკობდა. სიზმარი თანდათან ქრებოდა. მკვეთრი გამოსახულებები რაღაც მუქმა შეცვალა – იმან, რაც უნდა გაეკეთებინა ან რისი გაკეთებაც უნდა ეცადა. თივისა და მარისუანის მომჟავო-მოტკბო სუნი შეისუნთქა.

„მისტერ, შეგიძლიათ, დაგვეხმაროთ?“

დიდი, ფურირმის თვალები. გოგონას მარშა ერქვა. ყველაფერი თავის ადგილზე დგებოდა. „ალბათ, არა, – მიუგო მან,– თუმცა, შესაძლოა“.

„ადექი, ჰენრი! ოთხს თხუთმეტი აკლია, ასოს შეეშვი და წინდებს მიხედე“.

ეს მძლავრი და მბრძანებლური შეძახილი იყო, ახშობდა კიდევ სხვა ხმებს. „სონიდან“ წამოსულს ჰგავდა, როცა ელემენტები ახალია და ხმაც ბოლომდეა აწეული. ოუენ ანდერჰილის ხმა. თვითონ კი ჰენრი დევლინი იყო. და თუ რაიმეს გაკეთება უნდოდათ, ახლავე უნდა ესინჯათ.

ჰენრი წამოდგა და დაბუყებული ფენებიდან, მხრებიდან, ზურგიდან და კისრიდან წამოსული ტკივილის გამო შეიჭმუნა. დანარჩენ ადგილებში ბაირუსი უტევდა. სანამ ფანჯრისკენ პირველ ნაბიჯს გადადგამდა, თავი ასი წლის ბერიკაცს შეადარა, ცოტა დაფიქრდა და ათი წელი კიდევ დაუმატა.

ოუენმა ფანჯარასთან ვილაციის სილუეტს მოჰკრა თვალი, შვებით ამოისუნთქა და თავი დაუქნია. ჰენრი მისთვის ყველაზე უიღბლო დღეს მათუსალასავით<sup>174</sup> გადაადგილდებოდა, საბედნიეროდ, ოუენს შეეძლო საქმის გამოსწორება, დროებით მაინც. მას ის ახალგაზსნილი იზოლატორიდან მოეპარა, სადაც ისეთი ალიაქოთი იყო, რომ მისთვის არავის ეცალა. მთელი ამ დროის განმავლობაში ტვინის წინა ნაწილს ჰენრის მიერ ნასწავლი ორი მახლოკირებელი მანტრათი იცავდა: „მოვახტეთ ცხენს და გავქუსლოთ საითკენ? ბენბერი-კროსისკენ, ბენბერი-კროსისკენ“ და „ღიახ, ჩვენ შეგვიძლია-შეგვიძლია, ღიახ, ჩვენ შეგვიძლია, ღიახ, ჩვენ შეგვიძლია-შეგვიძლია, ღვთის შეწევნით, შეგვიძლია“.

ჩამსშობების მუშაობის პროცესში მისკენ მომართული რამდენიმე უცნაური მზერა შეამჩნია, მაგრამ შეკითხვა არავის დაუსვამს. ამინდიც კი ცდილობდა მათ დახმარებას – ქარბუქი არ ცხრებოდა.

ახლა უკვე ხედავდა ფანჯარაში ჰენრის სახეს – ფერმკრთალი, ბუნდოვანი ოვალი შუშას მიჰკროდა.

„ამის შესახებ არაფერი ვიცი, – გამოუგზავნა ჰენრიმ, – რომ იცოდე, ძლივს დავდივარ“.

„ახლავე მოგეხმარები. ფანჯარას მოსცილდი“.

ჰენრი უსიტყვოდ დამორჩილდა.

პარკას ერთ ჯიბეში ოუენს მომცრო ლითონის კოლოფი ედო, რომელზეც USMC იყო ამოტვიფრული. დავალებზე წასვლის წინ შიგსხვადასხვა პირადობის მოწმობას ინახავდა. ეს კოლოფი თვით კურცს ერუქებინა შარშან სანტა-დომინგოში ჩატარებული ოპერაციის შემდეგ – ესეც ბედის ირონია! მეორე ჯიბეში კი სამი ქვა ეგდო, რომლებიც თავისი ვერტმფრენის ქვეშიდან გამოიღო, სადაც თოვლი თხლად იდო.

<sup>174</sup> ბიბლიური პერსონაჟი, რომელმაც 969 წელი იცოცხლა.

ერთ-ერთი – მენის გრანიტის მოზრდილი ნატეხი – აილო და შეჩერდა, რადგან თავზარდამცემი რამ დაინახა: მაკავანო, „ცისფერი ლიდერბიჭის“ წევრი, რომელსაც ორი თითი დაეკარგა, ტრაილერში ბაზაზე დაბრუნებული მეორე საბრძოლო ვერტმფრენის წევრის, ფრენკ ბელსონის, „ბლეიკის ცისფერი ბიჭი სამის“ გვერდით, ძირს იჯდა. ერთ-ერთ მათგანს მძლავრი, რვაელემენტიანი ფარანი ჩაერთო, სანთელივით დაეყენებინა და იქაურობა გაეჩახჩახებინა. ეს ყველაფერი იქვე, ხუთასიოდე ფუტში ხდებოდა იმ ადგილიდან, სადაც ოუენი იდგა, რომელსაც ცალ ხელში ქვა ეჭირა, მეორეში ლითონის კოლოფი. კავანოსა და ბელსონს სახეზე წითელი ხშირი წვერის მსგავსი რამ წამოზრდოდათ, კავანოს კი, დამატებით, ასეთივე ბეწვები გადაჭრილ თითებზე შემოხვეული ბინტიდანაც მოუჩანდა. ორივე მათგანს პირში პისტოლეტის ლულა ჩაედო, ერთმანეთს თვალს არ აცილებდნენ, ტვინებს შორის უხილავი მტკიცე ძაფი გაეჭიმათ. ბელსონი გუნებაში თვლას შეუდგა: ხუთი... ოთხი... სამი...

– ბიჭებო, არ გინდათ! – შესძახა ოუენმა, მაგრამ ვერ იგრძნო, რომ მისი ხმა გაიგონეს: ძალიან ძლიერი იყო მათი ურთიერთკავშირი, რასაც ამ ადამიანების მტკიცე გადაწყვეტილება ამყარებდა. ისინი პირველი მერცხლები იყვნენ კურცის რაზმიდან. ოუენს ეჭვი არ ეპარებოდა, რომ მათ სხვებიც მიჰბაძავდნენ.

„ოუენ? – ეს ჰენრი იყო, – ოუენ, რა“...

ამ დროს მანაც მიიღო ის სურათი, რასაც ოუენი ხედავდა და შეძრწუნებული დადუმდა.

...ორი... ერთი.

ორივე პისტოლეტი ერთდროულად გავარდა. მათი ხმა ქარის ღრიალმა და „ციმერის“ ოთხი ელექტროგენერატორის გუგუნმა ჩაახშო. კავანოსა და ბელსონის თავებიდან სისხლისა და ტვინის შადრევანმა ამოხეთქა. ოუენმა და ჰენრიმ დაინახეს, როგორ შეირხა ბელსონის მარჯვენა ფეხი სიკვდილისწინა კონვულსიაში და მოხვდა

ფარანს, რომელიც იატაკზე კუთხეში მიყრილ ყუთებს შორის შეგორდა. სურათი მაშინვე გამორთული ტელევიზორის ეკრანივით ჩაქრა.

– ღმერთო ჩემო, – ჩაიჩურჩულა ოუენმა, – ღმერთო ჩემო.

ფანჯარასთან კვლავ ჰენრი გამოჩნდა. ოუენმა ანიშნა, უკან დაეხია და ქვა ესროლა. მოკლე მანძილი იყო, მაგრამ მაინც ააცდინა. ქვა ფიცარს მოხვდა და თოვლში ჩავარდა. ოუენმა მეორე აიღო, დასამშვიდებლად ღრმად შეისუნთქა, ამოისუნთქა და ისროლა. ამჯერად, მიზანს მოარტყა და შუშა ჩაამსხვრია.

„შენთვის წერილია, ჰენრი. მიიღე“.

ქვას ლითონის კოლოფი მიჰყვა.

#### 4

იატაკზე რაღაც ბრტყელი საგანი გასრიალდა. ჰენრიმ კოლოფი აიღო და გახსნა. შიგნით ფოლგაში გახვეული ოთხი პაკეტი იდო.

„ეს რა არის?“

„ჯიბის რაკეტები, – მიუგო ოუენმა, – გული ხომ არ გაწუხებს?“

„როგორც ვიცი, არა“.

„შესანიშნავია, რადგან ამასთან შედარებით კოკაინი ვალიუმად მოგეჩვენება. ყოველ შეკვრაში ორი ცალია. სამი დალიე, დანარჩენი შეინახე. იქნებ დაგვჭირდეს“.

„წყალი არ მაქვს“.

პასუხად ოუენმა მკაფიო სურათი გაუგზავნა: ჩრდილოეთისკენ მავალი ცხენის სამხრეთი ბოლო.

„დაღეჭე ისინი, ლამაზო, – იმედია, რამდენიმე კბილი მაინც შეგერჩა, არა?“

გაბრაზებული ჩანდა. თავდაპირველად, ჰენრი მიზეზს ვერ მიხვდა, მაგრამ მალევე გაიაზრა – მეგობრები თვითონაც დაკარგა. ახლახან. ერთი დღეც არ იყო გასული.

თეთრი აბები იყო, პაკეტებზე არც სახელწოდება ეწერა და არც ფარმაცევტული კომპანიის შტამპი ერტყა. პირში საშინელი სიმწარე

იგრძნო. როცა გადაყლაპვა სცადა, ყელში სპაზმი დაეწყო.

სამაგიეროდ, მყისიერი ეფექტი მიიღო. ოუენის USMC კოლოფი ჯერ ჯიბეშიც არ ჩაედო, რომ გულისცემის სიხშირე გაუორმაგდა. ფანჯარასთან მისულს კი გაუსამმაგდა. ყოველ დარტყმაზე თვალები ლამის ბუდეებიდან ამოსცვენოდა, მაგრამ უსიამოვნო შეგრძნება არ ჰქონია. პირიქით. გამოფხიზლდა, ტკივილი და დაღლილობა გაუქრა.

– ოჰო! პოპის<sup>175</sup> რამდენიმე ქილა მსგავსი ნაგავი უნდა ეჭამა! – შესძახა და გაიცინა, რადგან სიტყვებით ახსნა უცნაურობად, არქაზმად ეჩვენებოდა, თანაც თავსაც მშვენივრად გრძნობდა.

„ჩუმად! რა თქვი?“

„კარგია! კარგია!“

მისმა აზრებმაც კი კრისტალური სიცხადე შეიძინა. ჰენრი სულაც არ ფიქრობდა, რომ ეს მხოლოდ წარმოსახვის გასამდიდრებლად იყო საჭირო. მიუხედავად იმისა, რომ იქაურობა, ბანაკის დანარჩენ ნაწილთან შედარებით, სუსტად იყო განათებული, მაინც შეამჩნია, რომ ოუენი შეიჭმუნა და ხელი საფეთქელზე მიიღო, თითქოს ვიღაცამ ყურში ჩაჰყვირაო.

„მაპატიე“, – გაგზავნა მან.

„არა უშავს, ყველაფერი რიგზეა. უბრალოდ, შენ ძლიერდები. ალბათ, მთლიანად იმ განავლით ხარ დაფარული“.

„სულაც არა“, – მიუგო ჰენრიმ და სიზმრის ნაწყვეტი გაახსენდა: მათი ოთხეული ბალახით დაფარულ ფერდობზე. არა, ხუთეული – დადიტსიც ხომ მათთან ერთად იყო.

„ჰენრი, გახსოვს, მე სად ვიქნები?“

„ბანაკის სამხრეთ-დასავლეთ კუთხეში, ბოსელთან დიაგონალზე. მაგრამ“...

---

<sup>175</sup> მულტფილმების სერიის მთავარი პერსონაჟი – მეზღვაური, რომელსაც ისპანახის ჭამა ძალას მატებდა.

„არავითარი მაგრამ. იქ ვიქნები. თუ გინდა, აქაურობას თავი და-  
აღწიო, აჩქარდი. ახლა... – ოუენი გაჩერდა და საათს დახედა. რაკი  
მუშაობს, მექანიკური ყოფილა, – გაიფიქრა ჰენრიმ, – ...ოთხს ორი  
წუთი აკლია. ნახევარ საათს გაძღვე. თუ ამ ხნის განმავლობაში ხალ-  
ხი არ ამოძრავდა, მოკლე ჩართვას მოვანდენ.

„ნახევარი საათი შესაძლოა, არ მეყოს“, – გააპროტესტა ჰენრიმ.  
უძრავად იდგა და თოვლში ჩაფლული ოუენის ფიგურას შეჰყურებ-  
და, მაგრამ ისე სწრაფად სუნთქავდა, როგორც სირბილის დროს. გუ-  
ლი დოლის ცხენივით უცემდა.

„უნდა გეყოს, – გამოუგზავნა ოუენმა, – ლობზე სიგნალიზაციაა  
დაყენებული. როგორც კი მავთულს შეეხები, მაშინვე სირენები ჩა-  
ირთვება. დამატებითი პროექტორებიც. საერთო განგაში ატყდება.  
არეულობის დაწყებიდან ხუთ წუთში – სამასამდე დავითვლი – თუ  
არ გამოჩნდები, მარტო მომიწევს გზის გაგრძელება“.

„უჩემოდ ჯოუნსის ვერასდროს მიაგნებ“.

„ჰენრი, ეს იმას არ ნიშნავს, რომ აქ უნდა დავრჩე და შენთან ერ-  
თად დავიღუპო, – მოთმინებით, თითქოს პატარა ბავშვს ელაპარა-  
კებაო, თქვა ოუენმა, – ასეა თუ ისე, ჩემამდე ხუთ წუთში თუ ვერ  
მოაღწევ, ერთი შანსიც კი აღარ დავგვრჩება“.

„ის ორნი, თავი რომ მოიკლეს... მათ გარდა სხვებიც დაიღუპნენ“.

„ვიცი“.

ჰენრის გონებაში ყვითელი სასკოლო ავტობუსი წარმოუდგა,  
წარწერით „მილინოკეტის სკოლების დეპარტამენტი“. ფანჯრებიდან  
ოცამდე სახედალრეჯილი თავის ქალა იყურებოდა. ჰენრი მიხვდა,  
რომ ისინი ოუენ ანდერჰილის ამხანაგები იყვნენ, რომლებიც აქ გუ-  
შინ ჩამოვიდნენ. ან უკვე დაღუპულიყვნენ, ან ახლა კვდებოდნენ.

„ნუ ფიქრობ მათზე, – უთხრა ოუენმა, – ახლა ჩვენი საბრუნავი  
კურცის ბიჭებია, განსაკუთრებით „იმპერიალის ხეობა“. თუ ისინი  
მართლაც არსებობენ, ეჭვი არ შეგეპაროს, რომ ბრძანებას შეასრუ-  
ლებენ. საკმაოდ კარგად არიან მომზადებულები და გაწვრთნილები.

ეს ეხმარება, ნებისმიერ არეულ-დარეულობას თავი წარმატებით გაართვან – წვრთნის დანიშნულება სწორედ ესაა. მაშასადამე, ხუთი წუთი სიგნალიზაციის ჩართვიდან. სამასამდე დავითვლი“.

ოუენის ლოგიკა სასტიკი, მაგრამ შეუვალი იყო.

„კარგი, – დაეთანხმა ჰენრი, – ხუთი წუთი“.

„შენთვის აუცილებელი არაა ამ საქმეში გარევა, – უთხრა ოუენმა. ჰენრის აზრი რამდენიმე გრძნობის საფუძველზე ჩამოუყალიბდა, კერძოდ, გაღიზიანების, დანაშაულისა და შიშის – ოუენ ანდერჰილის შემთხვევაში, არა სიკვდილის, არამედ საქმის ჩავარდნის შიშის – ფილიგრანული დამუშავებით, – თუ ის, რასაც შენ ამბობ, სიმართლეა, ჩვენს ღონისძიებას საფრთხის ქვეშ რამდენიმე ასეული დარტყმულის გამო აყენებ“.

„შენი ბოსი ასე არ მოიქცეოდა, არა?“

ოუენი ამ ფრაზას სიტყვებით კი არა, ჰენრის გონებისკენ გაგზავნილი სასაცილო ნახატების სერიით გამოეხმაურა. ჰენრის ქარის განუწყვეტელ ღრიალშიც კი ჩაესმა ოუენის სიცილი.

„აქ კი ბეჭებზე დამდე, ლამაზო“.

„ასეა თუ ისე, მე მათ შევანჯღრევ. მოტივაციის ოსტატი ვარ“.

„ვიცი, რომ შეეცდები მაინც“.

ჰენრი ოუენის სახეს ვერ ხედავდა, მაგრამ გრძნობდა, რომ ის ილიმებოდა.

– შემდეგ? – ხმამაღლა ჰკითხა ოუენმა, – ერთხელაც ამიხსენი.

„რატომ?“

– იმიტომ, რომ მოტივაცია ჯარისკაცებსაც სჭირდებათ, განსაკუთრებით დეტალების განხილვისას. შეეშვი რა, მაგ ტელეპათიას. მინდა, ყველაფერი სიტყვებით მითხრა.

ჰენრიმ ერთხელაც შეხედა სიცივისგან აკანკალებულ ადამიანს.

– ამ ყველაფრის შემდეგ ჩვენ გმირები გავხდებით. არა იმიტომ, რომ გვინდოდა. უბრალოდ, არჩევანი არ გვქონდა.

ოუენმა უსიტყვოდ დაუქნია თავი. კვლავაც ილიმებოდა.



– რატომაც არა? – თქვა მან, – რატომაც არა, ამის დედაც! ..

ჰენრის გონებაში პატარა ბიჭი წარმოუდგა, რომელსაც თავზე-  
მით თეფში ეჭირა. აი, თურმე რა სურს მამაკაცს – რომ ბიჭმა თა-  
როზე დადოს ის თეფში, რომელიც წლების განმავლობაში თან ატა-  
რა. თეფში სამუდამოდ გატეხილი დარჩება.

## 5

კურცს სიზმარი ბავშვობის შემდეგ აღარ ენახა, ამიტომ ელდანაკ-  
რავივით შეხტა და, როგორც ყოველთვის, წამში გამოფხიზლდა: სი-  
ცარიელეში იმყოფებოდა, ახლა გონს მოვიდა და სრულად გააცნო-  
ბიერა, სად იყო – კვლავაც სააქაოში, თანაც ცოცხალი, ალილია.

თავი მიატრიალა და საათს შეხედა, მაგრამ ის წყეული, მოღური  
ანტიმაგნიტური კორპუსის მიუხედავად, კვლავ არ მუშაობდა. ცი-  
ფერბლატზე 12-12-12 ციმციმებდა ენაბლუსავით, გაგრძელებას  
რომ ვერ ახერხებს. ლამპა აანთო და ტუმბოდან ჯიბის საათი აიღო.  
ხუთის რვა წუთი იყო.

კურცმა საათი ადგილზე დადო, შიშველი ფეხები საწოლიდან  
გადმოჰყო და წამოდგა. მაშინვე ქარის ხმა შემოესმა, ძალლივით  
ყმოდა. გააცნობიერა, რომ თავში გაუგებარი ბურტყუნის აღარ  
ჰქონდა. ტელეპათიამ გაუარა, რაც ძალზე გაუხარდა. იგი მას, ზოგი-  
ერთი სექსუალური მეთოდის მსგავსად, პირველყოფილ, პრიმიტი-  
ულ დონეზე შეურაცხყოფდა. იმის გაფიქრება, რომ ვილაცას და-  
უკითხავად შეეძლო შესვლა მის თავში და გონების ზედა ფენებში  
ფათური, მის უკიდურეს აღშფოთებას იწვევდა. ესეც საკმარისი იყო  
რუხი კაცუნების აღსაგველად პირისაგან მიწისა. ამ საზიზღარი სა-  
ჩუქრისთვის. მადლობა ღმერთს, რომ ის საკმაოდ ეფემერული აღ-  
მოჩნდა.

კურცმა ნაცრისფერი სავარჯიშო ტრუსი გაიხადა, სარკის წინ  
შიშველი დადგა და საკუთარი სხეული ფეხის ტერფიდან (სადაც უკ-  
ვე მოუჩანდა იისფერი ვენები) თმის წვერამდე, აწეწილ ჭაღარამდე,

საგულდაგულოდ შეამოწმა. სამოცი წლისა არცთუ ურიგოდ გამოიყურებოდა: ასაკს მხოლოდ ეს წყეული ვენები უმჟღავნებდა. მამაკაცობის მხრივაც არაფერს უჩიოდა, თუმცა ეს საკითხი ნაკლებად აინტერესებდა, რადგან, მისი აზრით, ქალები ბოროტი და ვერაგი არსებები იყვნენ და ერთგულება არ შეეძლოთ. ისინი მამაკაცს აცარიელებდნენ. თავისი არანორმალური გულის სიღრმეშიც კი, სადაც მისი სიგიჟე გახამებულ-გაუთოებელი იყო და ამიტომაც, არცთუ საინტერესოდ მოჩანდა, ფიქრობდა, რომ სექსს სარგებლობა არ მოაქვს და საჭიროა მისი აკრძალვა იმ შემთხვევაშიც კი, თუკი გვარის გასაგრძელებლად გამოიყენება, რადგან შედეგად ისეთი ქმნილება მიიღება, რომლის ტვინიც ტრაწიანი სინდიოფალების ტვინისგან ბევრით არ განსხვავდება.

თმიდან კურცი კვლავ ფეხებისკენ დაუყვა, აუჩქარებლად, ყურადღებით აკვირდებოდა სხეულს, მაგრამ რაიმე წვრილი წითელი ზოლი კი არა, ნამცეცა ლაქაც ვერსად აღმოაჩინა. მერე შეტრიალდა, კისერი გაიწვდინა და ზურგიც დაითვალიერა. იქაც არაფერი ჰქონდა. შემდეგ დუნდულები გასწია, მათ შორის მდებარე კანი მოისინჯა, ანუსშიც შეიყო თითი. ვერაფერი შეიგრძნო, ხორცის გარდა.

– სუფთა ვარ, – ჩაილაპარაკა ჩუმად და ხელები „ვინებაგოს“ პატარა აბაზანაში დაიბანა, – თოვლივით სუფთა.

მან ფეხები კვლავ ტრუსში გაჰყო, შემდეგ დაჯდა და წინდები ჩაიცვა. სუფთაა, მადლობა ღმერთს, სუფთა. კარგი სიტყვა იყო „სუფთა“. ტელეპათიის უსიამოვნო შეგრძნება – ერთმანეთზე მიკრული ოფლიანი კანის შეგრძნება – სრულიად გაქრა. რიპლის ნასახიც არ ემჩნეოდა – კბილები და ღრძილებიც კი შეიმოწმა.

მაშ, რამ გააღვიძა? რატომ ჩაესმოდა განგაშის ზარები?

იმიტომ, რომ ტელეპათია ექსტრასენსორული აღქმის ერთადერთი ფორმა არ იყო. იმიტომ, რომ დიდი ხნით ადრე, სანამ რუხი კაცუნები დედამიწის, უზარმაზარი ვარსკვლავთშორისი ბიბლიოთეკის ამ უშორესი და ყველაზე მტვრიანი კუთხის შესახებ შეიტყობდნენ,

არსებობდა რაღაც, სახელად „ინსტინქტი“ – სამხედრო მუნდირში გამოწყობილი კურცის მსგავსი ჰომო საპიენსის განმასხვავებელი ნიშანი.

– წინათგრძნობა, – თქვა კურცმა, – ეს ბებერი ამერიკული წინათგრძნობა.

შარვალი ამოიცვა და ნახევრად შიშველმა, ტუმბოზე საათის გვერდით დადებული რაცია აიღო (უკვე ხუთის თექვსმეტი წუთი იყო – დრო ისე მიქროდა, როგორც მიქრის ფერდობიდან დაშვებისას უმუხრუჭო მანქანა). რაციას სპეციალური საათის მექანიზმიც ჰქონდა, თანაც კოდირებული. ეს, გამომგონებლების აზრით, ყოველგვარ დაბლოკვას გამორიცხავდა... მაგრამ როგორც კი იმ ვითომდა მოუწყველ ციფერბლატს შეხედა, კურცი მიხვდა, რომ ის მწყობრიდან გამოსულიყო.

თითი გამოძახების ღილაკს დააჭირა. ფრედი ჯონსონი საკმაოდ სწრაფად გამოეხმაურა, არც ძალიან ნაძძინარევი ხმა ჰქონდა... ოჰ, როგორ უნდოდა კურცს (რომელსაც, სინამდვილეში, რობერტ კუნცი ერქვა, სახელი, სახელი, რა ყრია სახელში), რომ იმ კრიტიკულ ვითარებაში გვერდით ოუენ ანდერჰილი ჰყოლოდა!

ოუენ, ოუენ, – გაიფიქრა მან, – რატომ დაგიცდა ფეხი მაშინ, როცა ყველაზე მეტად მჭირდებოდი.

– ბოს?

– „იმპერიალის ხეობა“ ზევით გადამყავს, მეექვსეში. ყველას თავი მოუყარე, მერე კი მოდი და მომახსენე.

ფრედიმ Aაუხსნა, თუ რატომ იყო ეს შეუძლებელი – სისულელე, რაც ოუენს ბოდვაშიც კი არ წამოსცდებოდა. ფრედის დაახლოებით ორმოცი წამი მისცა თავის გასამართლებლად, შემდეგ უთხრა:

– ახლა კი მოკეტე, ნაბიჭვარო!

შოკირებულმა ფრედიმ ხმა გაკმინდა.

– აქ რაღაც მწიფდება. არ ვიცი, რა, მაგრამ ტყუილუბრალოდ რო-

დი წამოვხტი საწოლიდან შუალამეს, თავში განგაშის ზარები ჩამესმის. ამიტომაც ვაპირებ ყველას შეკრებას და თუ გინდა, ვახშობამდე სული მიატანო, აიძულე, ბრძანებები ცოცხლად შეასრულონ. გალაჰერს გადაეცი, ყველაფრისთვის მზად იყოს. გასაგებია, ფრედი?

– დიახ, ბოს. მინდა, რომ იცოდეთ: ჩვენთან უკვე ოთხი თვითმკვლელობა მოხდა. ეს, რაც ჩემთვისაა ცნობილი. შესაძლოა, მეტიც იყოს.

კურცი არც გაოცებულა და არც უკმაყოფილება გამოუხატავს. გარკვეულ ვითარებაში თვითმკვლელობა არათუ მისაღებ ფორმად, კეთილშობილურ საქციელადაც მიაჩნდა – ნამდვილი ჯენტლმენის ღირსეულ ბოლო ნაბიჯად.

– ვერტმფრენის ეკიპაჟის წევრები?

– დიახ.

– მაგრამ არა „იმპერიალის ხეობიდან“.

– არა, ბოს, „ხეობიდან“ არავინ.

– კარგი. თავისუფლად, რიგითო. პრობლემა გვაქვს. არ ვიცი, რა ხდება, მაგრამ ვგრძნობ, რომ უბედურება გვიახლოვდება, დიდი უბედურება.

კურცმა რაცია მაგიდაზე დააგდო და ჩაცმა განაგრძო. მოწევა მოუნდა, მაგრამ სიგარეტი გასთავებოდა.

## 6

ოდესღაც მოხუც გოსლინს ფერმაში ცოტა მეწველი ძროხა ჰყავდა და მართალია, ეს ნაგებობა გაჭირვებით აკმაყოფილებდა სოფლის მეურნეობის სტანდარტს, მაინც ნორმალურად გამოიყურებოდა. ჯარისკაცებმა დენი გაიყვანეს, მაღალვოლტიანი ნათურები დაკიდეს, რომლებიც ცივად ანათებდა ბაგებს, მოსაწველ ბაკებს, ზედა და ქვედა სათივეებს. გარდა ამისა, კუთხეებში რამდენიმე გამათბობელიც დააყენეს და ახლა იქ საშინლად ჩახუთული იყო. ჰენრიმ შესვლისთანავე შეიხსნა ქურთუკი, მაგრამ ამან ვერ უშველა, მაშინვე

ოფლმა დაასხა. გარკვეულწილად ოუენის მიცემულმა აბებმაც იმოქმედა – ბოსელში შესვლის წინ მან ერთი ცალიც გადაყლაპა.

ჰენრიმ მიიხედ-მოიხედა და თავი გააქნია. ბოსელი საოცრად ჰგავდა მის მიერ ნანახ ლტოლვილთა ბანაკებს, მათ შორის, ბოსნიელი სერბების – მაკედონიაში, ჰაიტელი მემამბოხეების – პორტოპრენსში, „ძია შუგარის“<sup>176</sup> საზღვაო ქვეითთა გადასხდომის შემდეგ, ასევე – აფრიკელი ემიგრანტების, რომელთაც სამშობლო ავადმყოფობების, შიმშილის, სამოქალაქო ომების, ანდა ერთდროულად ყველაფრის გამო მიეტოვებინათ. ამგვარ კადრებს ხშირად უჩვენებდნენ ტელევიზორში და მათ ადამიანის თვალი თანდათან მიეჩვია. თუმცა, სავარძელში მოკალათებული კაცისთვის ძნელი წარმოსადგენი იყო, რა ხდებოდა სინამდვილეში; ძრწოლა, რომელიც ძალადობის, სისხლისა და ტკივილის ნახვისას გეუფლებოდა, ასე თუ ისე განყენებული, თითქმის კლინიკური იყო. აღმოჩნდა, რომ ამგვარი ადგილების მოსანახულებლად არც პასპორტი გჭირდებოდა და არც – ვიზა. ეს ახალი ინგლისის მეცხოველეობის ფერმაში ხდებოდა. იქ მოხვედრილებს ძონძები და დაშიკები<sup>177</sup> კი არ ეცვათ, არამედ ძვირფასი მონადირის ქურთუკები, ღიდჯიბეებიანი შარვლები (ძალზე მოსახერხებელი სათადარიგო მჭიდვების შესანახავად) და თბილი საცვლები. ნანახი ზუსტად ისევე ზემოქმედებდა ადამიანზე, იმ განსხვავებით, რომ ამათ გაოცებული გამომეტყველება სახეებიდან არასდროს უქრებოდათ. ასეთ რამეს „სპრინტ ნიკელ ნაითსის“<sup>178</sup> ქვეყანაში ვერავინ წარმოიდგენდა. ინტერნირებულები დაყრილ თივის ძნებზე მოკალათებულიყვნენ (ზედ ქურთუკები დაეფინათ). უკვე მოესწროთ მცირერიცხოვან ოჯახურ და მეგობრულ ჯგუფებად დაყოფა და ახლა ძილისთვის მიეცათ თავი. სათივეებიცა და ბაკებიც დაკავებული ჰქონდათ. სხვადასხვა მხრიდან საშინელი სიზმრებით გატანჯულთა

---

<sup>176</sup> „ძია სემი“

<sup>177</sup> მამაკაცის აფრიკული სამოსი.

<sup>178</sup> ამერიკული საკომუნიკაციო კომპანია.

ხვრინვა, წუწუნი და კვნესა ისმოდა. სადღაც ბავშვი ტიროდა. სიურ-რეალისტურ კომმარს დინამიკებიდან გადმოდვრილი წყნარი მუსიკა აგვირგვინებდა. „ბებერი გოსლინის“ ბოსელში მყოფი მთვლემარე, სასიკვდილოდ განწირული ხალხი „მშვენიერ საღამოს“ უსმენდა, ფრედ უორინგის ორკესტრის შესრულებით.

ახლანდელ გაბრუებულ მდგომარეობაშიც კი ჰენრის ყოველი წვრილმანი უჩვეულო სიცხადით ებეჭდებოდა თავში. რამდენი ნარინჯისფერი ქურთუკი და კეპია! – გაიფიქრა მან, – ღმერთო ჩემო! ეს ხომ ჰელოუინია ჯოჯოხეთში!

აქაც უამრავი დაინფიცირებული იყო. ჰენრი ხედავდა მოწითალო ოქროსფერი ხავსის ბილიკებს ლოყებზე, ყურებზე, თითებს შორის, კოჭებსა და ელექტროსადენებზეც კი. ძირითადად, თივის სურნელი იდგა, მაგრამ ჰენრიმ მაშინვე იგრძნო გოგირდნარევი ეთილის სპირტის სუნი. გარდა ამისა, მძინარე ხალხი გაზებს უშვებდა, თანაც ისე ხმამაღლა, თითქოს ექვსი-შვიდი სრულიად უნიჭო მუსიკოსი ტუბასა და საქსოფონზე უკრავდა. სხვა ვითარებაში ეს სასაცილო იქნებოდა... შესაძლოა, აქაც გასცინებოდა ყველა იმ ადამიანს, ვისაც ჯოუნსის გასისხლიანებულ საწოლზე ასხმარტალეებული და კბილებდაკრეჭილი სინდიოფალა არ ენახა.

რამდენი ატარებს მუცლით იმ ქმნილებას? – ჰკითხა ჰენრიმ საკუთარ თავს. თუმცა, მისი აზრით, ამას გადამწყვეტი მნიშვნელობა არ ჰქონდა, რადგან ისინი საკმაოდ უწყინარნი იყვნენ. ბოსელში კი იარსებებდნენ თავიანთი მასპინძლების სხეულებიდან გამოსვლის შემდეგ, მაგრამ გარეთ, საღაც თოვლის კორიანტელი იდგა, ქარი მძვინვარებდა და ყინავდა, ორ საათსაც ვერ გაძლებდნენ.

ამ ხალხს უნდა დალაპარაკებოდა...

არა, კი არ უნდა დალაპარაკებოდა, უნდა დაეშინებინა ისინი, თავზარი დაეცა მათთვის. იძულებული გაეხადა, რომ წამომდგარიყვნენ და სითბოდან სიცივეში გასულიყვნენ. უწინ აქ ძროხები იყვნენ.

ახლაც ძროხებს ხედავდა. ოღონდ, ისინი ისევ ადამიანებად – შეშინებულ, გაბრაზებულ ადამიანებად უნდა ექცია. ჰენრის შეეძლო ამის გაკეთება, მაგრამ მარტოს გაუჭირდებოდა. დრო კი მიდიოდა. ოუენ ანდერჰილმა მას მხოლოდ ნახევარი საათი მისცა. ჰენრის გამოანგარიშებით, დროის მესამედი უკვე გასულიყო.

ნეტავ, მეგაფონი მქონდეს, – გაიფიქრა მან, – პირველ რიგში ეს მჭირდება.

მან მიიხედ-მოიხედა და კართან გვერდზე გადაბრუნებულ ზორბა, სიქაჩლეშეპარულ კაცს მოჰკრა თვალი, რომლის უკან ძროხების ბაკი მდებარეობდა. ერთ-ერთს იმათგანს მიაძმგავსა, ვინც ფარდულიდან გამოაბრძანა, მაგრამ დარწმუნებული არ იყო, რადგან სიქაჩლით მას სხვებიც ჰგავდნენ.

არა, ეს ნამდვილად ჩარლზი იყო, ბაირუსს წითელი „კრამიტით“ დაეფარა ის, რასაც ბებერი ჩარლი, ეჭვგარეშეა, თავის „მზიურ სექსპანელს“ უწოდებდა.

ვის რაში სჭირდება თმის გადანერგვა, როდესაც ეს ნაგავი შენამდე მოაღწევს? – გაიფიქრა ჰენრიმ და გუნებაში გაელიმა.

სწორედ ჩარლზი გამოადგებოდა. მარშასაც იქვე ეძინა – ხელი დარენზე გადაელო, „მისტერ მარიხუანაზე“, ნიუტონიდან. მარშას ოდესლაც გადატკეცილ ლოყაზე ბაირუსი მიცოცავდა. ქმარს ჯერ არაფერი ეტყობოდა, სამაგიეროდ, მაზლი – მას ბილი ერქვა – საშინლად გაბანჯგვლულიყო. შოუს საუკეთესო მონაწილე, – გაიფიქრა ჰენრიმ.

მან ბილის წინ ჩაიმუხლა, აიღო მისი ბაირუსით დაფარული ხელი და მის სიზმარში – კომმარების გაუვალ ჯუნგლში შეიჭრა.

„გაიღვიძე, ბილ. საყვირი გვიხმობს. აქაურობას უნდა გავეცალოთ. თუ მომეხმარები, შევძლებთ. გაიღვიძე, ბილ.

გაიღვიძე და გმირი გახდი“.

ყველაფერი თავბრუდამხვევი სისწრაფით განვითარდა.

ჰენრიმ იგრძნო, როგორ მოიწევდა ბილის გონება კომმარული სიზმრის სიღრმეებიდან მისკენ, როგორც დასახრჩობად განწირული კაცი – მხსნელისკენ.

„არ ილაპარაკო, სიტყვის თქმაც არ გაბედო, – უთხრა მას ჰენრიმ, – მხოლოდ მისმინე. ჩვენ მარშა და ჩარლზი გვჭირდება. ოთხნი ვეყოფით“.

„რა“...

„დრო არა გვაქვს, ბილი. ვიწყებთ“.

ბილიმ ხელი რძალს მოჰკიდა. თითქოს ამას ელოდაო, მარშამ თვალი მაშინვე გაახილა და ჰენრიმ თითქოს დაინახა, მათ თავებში არსებულ სკალაზე ისარმა ერთი დანაყოფით წინ რომ გადაიწია. მარშას სოკო ისე არ მოსდებოდა, როგორც ბილის, მაგრამ, როგორც ჩანს, ბუნებას მისთვის ნიჭი არ დაეშურებინა. ქალმა უსიტყვოდ ჩაჰკიდა ჩარლზს ხელი. ჰენრის მოეჩვენა, რომ ის ყველაფერს მიხვდა, საბედნიეროდ, იმასაც ჩასწვდა, რომ უნდა ეჩქარათ. უპირველეს ყოვლისა, მათთვის ცეცხლი უნდა შეენთოთ და აემოძრაებინათ.

ჩარლზი წამოჯდა და თვალეზი დააჭყიტა. შემდეგ, თითქოს, ვილაცამ უბრძანაო, სწრაფად წამოდგა. ერთმანეთს ხელი ჩაჰკიდეს და წრე შეკრეს სპირიტუალისტური სეანსის მსგავსად, რაც, ჰენრის აზრით, ნაწილობრივ, ასეც იყო.

„მომეცით ის მე“, – ბრძანა მან და სამივენი დამორჩილდნენ. ჰენრის მოეჩვენა, რომ ხელში ჯადოსნური ჯოხი ჩაუდეს.

– მომისმინეთ! – შესძახა მან.

აქა-იქ ხალხმა თავი წამოყო, ზოგიერთი დენდარტყმულივით წამოხტა.

– მომისმინეთ და ისე მოიქეცით, როგორც გეტყვით... ისე მოიქეცით, როგორც გეტყვით! გასაგებია? ისე მოიქეცით, როგორც გეტყვით! ეს თქვენი ერთადერთი შანსია, ასე რომ, ისე მოიქეცით, როგორც გეტყვით!



ისინი მექანიკურად დამორჩილდნენ. მათთვის მოსაფიქრებლად, დრო რომ მიეცა, ყველაფერი გაცილებით გართულდებოდა, მაგრამ ჰენრიმ ხალხს წუთიც არ დაუთმო. უმრავლესობას ეძინა და ინფიცირებულებს, სხვაგვარად რომ ვთქვათ, ტელეპათებს, თავს იმ დროს დააცხრა, როცა მათი გონება ყველაზე უფრო დაუცველი და გახსნილი იყო. ჰენრი გაუცნობიერებელ იმპულსებს დაემორჩილა და მათ გამოსახულებების მთელი სერია გაუგზავნა: ნილბიანი ჯარისკაცები, რომელთაც ბოსელი ალყაში მოაქცევს. ზოგს ხელში პისტოლეტი ეჭირა, ზოგსაც ზურგჩანთებთან მიერთებული გრძელი მილი. სახეზე კარიკატურული სისასტიკე აღჰბეჭდოდათ. დინამიკებიდან წამოსული ბრძანების მიხედვით, მილებიდან ცეცხლი – გამოიფრქვა და მყისვე მოედო ბოსლის კედლებსა და სახურავს.

ჰენრიმ ბოსელში შეაღწია და ახალი სურათები გაგზავნა: ხალხი ყვიროდა და აქეთ-იქით აწყდებოდა. აღმოდებული სახურავიდან ნაპერწკლები ცვიოდა და თივას ეკიდებოდა. აგერ თმააბრიალებული მამაკაცი; ქალი ცეცხლმოკიდებული სათხილამურო კოსტიუმით, რომელსაც ზამთრის კურორტების საბაგიროების ბილეთები ამშვენებს.

ახლა ყველანი ჰენრის შესცქეროდნენ. ჰენრისა და მისი მეგობრების წრეს. გამოსახულებებს მხოლოდ ტელეპათები იღებდნენ: პატიმართა მხოლოდ სამოცი პროცენტი იყო ინფიცირებული, მაგრამ გაუაზრებელი პანიკა დანარჩენებსაც გადაედო – მოქცევისას ხომ მეჩერზე შემჯდარი ყველა ნავი თავისუფლდება.

ჰენრიმ ბილისა და მარშას ხელები მაგრად ჩასჭიდა და გამოსახულება გარე პერსპექტივაზე გადართო: ხანძარი, ალყა, ჯარისკაცები, დინამიკებიდან ღრიალით წამოსული ბრძანება, – არავინ გაუშვან.

უკვე ყველა პატიმარი ფეხზე იდგა. ისმოდა ცალკეული შეძახილი (ტელეპათები დუმდნენ, ბაირუსით დამახინჯებული სახეები ჰენრისკენ მიექციათ და განაწამები თვალებით შესცქეროდნენ). ჰენრიმ

მათ ბოსელი უჩვენა, რომელიც ჩირალდანივით იწვოდა თოვლიან ღამეში, იქაურობა ნამდვილ ჯოჯოხეთს დაემსგავსა, ირგვლივ ცეცხლოვანი გრიგალი ქროდა, დინამიკებიდან წამოსული ხმა სულ უფრო ძლიერდებოდა:

– მიდით, ბიჭებო, დასცხეთ! ერთიც არ გაუშვათ! ისინი კიბოა, ჩვენ კი წამალი!

გამოსახულება გაცოცხლდა. ადამიანები თავიანთი შიშით კვებავდნენ მას. ჰენრიმ მათი სახეები გაგზავნა, ვინც გასასვლელს მიაგნო ან ფანჯრიდან გადაძვრა. ბევრი მათგანი ცოცხლად იწვოდა. ერთ ქალს ბავშვი აეტატებინა. ჯარისკაცებმა ყველა მოკლეს მათ გარდა, ისინი ცეცხლში სანთელივით დაიწვნენ.

– არა! – დაიყვირა ერთდროულად რამდენიმე ქალმა და ჰენრიმ ერთგვარი ავადმყოფური გაცეცხებით გააცნობიერა, რომ მათ, მიუხედავად იმისა, რომ ბავშვები არ ჰყავდათ, ცეცხლმოკიდებულ ქალი საკუთარ თავთან გააიგივეს.

ახლა ისინი ჭექა-ქუხილში მოხვედრილი საქონელივით ბორგავდნენ. კიდევ უნდა შეენთო მათთვის, სანამ ფიქრს დაიწყებდნენ.

ჰენრიმ წრეში ჩამდგარი ხალხის გონი გააერთიანა და დანარჩენებს მალაზიის გამოსახულება გაუგზავნა.

„შეიგნეთ! – გადასცა მათ გონებით, – ეს თქვენი ერთადერთი შანსია! თუ შეგიძლიათ, მალაზიაში შევიჭრათ, თუ კარი ბლოკირებულია, მავთულხლართი გავარღვიოთ! არ შეჩერდეთ! არ იყოყმანოთ! ტყისკენ გაიქეციეთ! იქ დაიმალეთ! ისინი მოდიან, რათა ბოსელი და შიგ მყოფი ყველა ადამიანი დაწვან! მხოლოდ ტყეში გადარჩებით! ახლავე, ახლავე!“

საკუთარი წარმოსახვის მორევში ჩაძირული და ოუენის აბებით შემართული ჰენრი მთელი ძალით გზავნიდა მათთან საბავშვო წიგნებისთვის დამახასიათებელ სადა და მარტივ სურათებს; ზედ ეხატა, თუ როგორ გადარჩებოდნენ ტყეში და როგორ დაილუპებოდნენ აქ,

ამ დაწყევლილ ადგილას. ჰენრი ველარ აცნობიერებდა, რომ ხმამალ-  
ლა ყვიროდა:

– ახლა, ახლა, ახლა!

თავდაპირველად, ბრძანება მარშა ჩაილზმა აიტაცა, მას მაზლი  
აჰყვა, შემდეგ – ჩარლზი და მამაკაცი, რომლის სექსპანელიც სოკოს  
დაეფარა.

ბაირუსშეუვალი და, შესაბამისად, ტელეპათიის ნიჭის არმქონე  
დარენმა მგრძნობიარედ აღიქვა ჰაერში მოფარფატე ფლუიდები და  
ისიც აყვირდა:

– ახლა, ახლა, ახლა!

ეს სიტყვა სოკოზე გაცილებით საშიში, პანიკის მზარდი ვირუსი-  
ვით გადაეცემოდა ადამიანიდან ადამიანს, ჯგუფიდან ჯგუფს და მა-  
ლე ბოსლის კედლები აზანზარდა. იქ მყოფნი მუშტებს მალლა ერ-  
თდროულად სწევდნენ, როგორც ეს როკკონცერტზე ხდება ხოლმე.

– ახლა, ახლა, ახლა!

ჰენრიმ მათ ინიციატივა შეგნებულად დაუთმო, რათა აღგზნების  
ტემპერატურა მაქსიმალურ ზღვრამდე აეწია. თვითონაც იქნევდა  
მუშტს და ვერც კი გრძნობდა, რომ ეს მტკივანი ხელი იყო. თუმცა,  
საკუთარ თავს გამუდმებით შეახსენებდა, რომ მის მიერვე გამოწვე-  
ულ საერთო ისტერიას არ აჰყოლოდა: სხვა რომ არაფერი, ამ ხალხს  
ჩრდილოეთისკენ უნდა აეღო გეზი, თვითონ კი – სამხრეთისკენ წა-  
სულიყო. იმ წუთს ელოდა, როცა უწინდელი მდგომარეობის დაბრუ-  
ნება შეუძლებელი იქნებოდა.

ის წუთიც დადგა.

– ახლა, – წაიჩურჩულა მან და კვლავ შეაერთა მარშას, ბილის,  
ჩარლზისა და გვერდით მდგომთა გონება. ყველაფერი ერთმანეთს  
შეურია, შეაჯანჯღარა და „ბებერი გოსლინის“ ბოსელში დამწყვდეუ-  
ლი სამას ჩვიდმეტი ადამიანის თავში ერთადერთი სიტყვა ვერცხლის  
ტყვიასავით გაისროლა:

– ახლა.

წამით სამარისებური სიჩუმე ჩამოწვა. შემდეგ კი ჯოჯოხეთის კარები გაიღო.

## 8

დაბინდებამდე, ღობის გასწვრივ თორმეტი თანაბრად დაშორებული ორადგილიანი საგუშაგო ჯიხური დადგეს (სხვა რომ არაფერი ჰქონდათ, გადასატან ტუალეტებს უნიტაზები მოხსნეს). თითოეულ მათგანში გამათბობელი შეიტანეს და ისე გაახურეს იქაურობა, რომ გუშაგებს გარეთ გასვლა აღარ უნდოდათ. დროდადრო კარს ალებდნენ და შიგნით სუსხიან ჰაერს უშვებდნენ. ამით ამოიწურებოდა მათი გუშაგობა. ჯარიკაცთა უმრავლესობას მხოლოდ მშვიდობის დროს უმსახურია ჯარში. მათ ვერც წარმოედგინათ, რამდენად მაღალი იყო ამ თამაშის ფსონი, ამიტომაც არხეინად საუბრობდნენ ქალებზე, სექსზე, მანქანებზე, უფროსობაზე, ისევ სექსზე. თავიანთ ოჯახებზე, მომავალზე, კვლავ სექსზე, სმაზე, ნარკოტიკებზე, წვეულებებზე და... ისევ სექსზე. ცხადია, ვერ შეამჩნიეს ოუენ ანდერჰილის ორი ვიზიტი ფარდულში (მისი დანახვა მე-9 და მე-10 საგუშაგოებიდან შეიძლებოდა). ბოლოსდა მიხვდნენ, რომ მათ დანჯღრეულ გემზე ნამდვილი ამბოხი მზადდებოდა.

შვიდი მათგანი, რომელიც კურცის რაზმში სხვებზე დიდხანს იმყოფებოდა და, შესაბამისად, უფრო გამოცდილი იყო, მაღაზიაში შეშის ღუმელთან მოკალათდა და კარტის თამაშს შეუდგა, სწორედ იმ ოფისში ისხდნენ, სადაც ოუენმა კურცის ჩანაწერებს – „შეგვიბრალეთ“ – დაახლოებით ორი საუკუნის წინ მოუსმინა. ექვსი გუშაგი იყო. მეშვიდე – დოგ ბროდსკის კოლეგა ჯინ კემბრი. კემბრის ძილი არ ეკარებოდა. უძილობის მიზეზი მაჯაზე შემოხვეული სახვევის ქვეშ იმალებოდა. არ იცოდა, რამდენ ხანს დამალავდა სნეულებას, რადგან წითელი საფარი სულ უფრო ფართოვდებოდა. რამეს თუ არ იღონებდა, ვიღაც აუცილებლად შეამჩნევდა და ოფისის ნაცვლად,

სადაც კარტს თამაშობდა, ბოსელში სამოქალაქო პირებთან ამოაყოფინებდნენ თავს.

მაგრამ განა მარტო მას? რეი პარსონს ყურში ბამბა ჩაეჩურთა. ასე თქვა, – მტკივაო, – მაგრამ ხომ არ მოიტყუა? ტედ ტრეზვესკის წინამხარი შეეხვია, – მავთულხლართს გამოვედევო. ვინ იცის, იქნებ სიმართლე თქვა. ჯორჯ ადელს, დოგის უშუალო უფროსს, მელოტ თავზე ნაქსოვი ქუდი დაეხურა და საოცრად დამსგავსებოდა გადაყრუებულ თეთრ რეპერს. ალბათ, მის ქვეშ ისეთი არაფერი იყო, მაგრამ იმ სიციხეში ქუდის ტარება უცნაურად ჩანდა.

– გაიჭრა, – თქვა ჰოუი ევერეტმა.

– ფერს ვაცხადებ, – გამოეხმაურა დენი ო'ბრაიენი.

პარსონსმა და ადელმა მას მიჰბაძეს. კემბრის თითქმის არაფერი გაუგია. თვალწინ ქალი წარმოუდგა ხელში ატატიებული ბავშვით. დათოვლილი საზღვრის გადარბენას ცდილობდა, ჯარისკაცები კი ცეცხლით უმასპინძლდებოდნენ. კემბრი შეძრწუნდა, მოიბუზა. გაიფიქრა, რომ ამის მიზეზი მისი ძველი ცოდვები იყო.

– ჯინ! – გასძახა ელ კოლმენმა, – აპირებ თუ არა...

– ეს რა არის? – მოიღუშა ჰოუი.

– რას გულისხმობ? – ჰკითხა ტედ ტრეზვესკიმ.

– ყური მიუგდე და მიხვდები, – უთხრა ჰოუიმ.

წყეული პოლონელი, – გაიფიქრა კემბრიმ, მაგრამ შეურაცხყოფას განსაკუთრებული მნიშვნელობა არ მიანიჭა. შეძახილი სულ უფრო ხმამაღლა ისმოდა, ძლიერდებოდა და უკვე ქარის ზუზუნსაც ახშობდა.

– ახლა ან არასდროს? ახლა ან არასდროს! ახლა ან არასდროს! ახლა!

ხმები მათ ზურგს უკან მდებარე ბოსლიდან გაისმოდა.

– რა ჯანდაბაა? – გაწელვით თქვა ადელმა და ჩაფიქრებით მიაჩერდა დასაკეც მაგიდას, რომელზეც კარტი, საფერფლეები, კოჭე-

ბი და ფული ეწყო, ჯინ კემბრი მოულოდნელად მიხვდა, რომ იმ სულელური ნაქსოვი ქუდის ქვეშ, მოლაპლაპე კანის გარდა, არაფერი იყო. მათ ჯგუფს ნომინალურად ადელი ხელმძღვანელობდა, მაგრამ სინამდვილეში ბევრი არაფერი გაეგებოდა. მას არც ზემოთ შემართული მუშტები დაუნახავს, არც ძლიერი გონების ხმა გაუგონია, გუნდში წამყვანი რომ იყო.

კემბრიმ შეამჩნია, რომ პარსონსს, ევერეტსა და კოლმენს სახე შეშფოთებოდათ. მათაც ყველაფერი დაენახათ. ამ ერთობლივმა ხილვამ ისინი გააერთიანა, მაშინ, როცა ჯანმრთელები ერთმანეთს გაოცებით შესცქეროდნენ.

– ის დამპლები ახლა შტურმზე გადმოვლენ, – თქვა კემბრიმ.  
– ნუ სულელობ, ჯინ, – ხელი აუქნია ჯორჯ ადელმა, – მათ ხომ არ იციან, რა ელით. თანაც სამოქალაქო პირები არიან. ცოტა ორთქლს გამო...

წინადადების დასასრული ერთადერთმა სიტყვამ ჩაახშო: „ახლა“. შეძახილმა ცირკულარული ხერხივით გადაჭრა კემბრის ტვინი. რეი პარსონსი და ელ კოლმენი შეიჭმუნნენ. ჰოუი ევერეტმა ტკივილისგან შეჰყვირა და ხელისგულები საფეთქლებზე მიიჭირა, დენდარტყმულივით შეხტა და მუხლები მაგიდას მიარტყა. კარტი, კოჭები და ფული გაიფანტა. ერთდოლარიანი კუპიურა ღუმელზე დაეცა და დნობა დაიწყო.

– ოჰ, ამის დედაც! .. შეხედე, რა... – დაძახა ტედმა.  
– მოდიან, – თქვა კემბრიმ, – ჩვენზე მოდიან.

პარსონსი, ევერეტი და კოლმენი „ბებერი გოსლინის“ საკიდრის სიახლოვეს, კედელზე მიყუდებულ M-4 კარაბინებს ეცნენ. დანარჩენები სამიოდე ნაბიჯის დაშორებით მოულოდნელობისგან გაშეშდნენ და გაოცებით მიაჩერდნენ მათ... ამ დროს ბოსლის კარმა, რომელსაც გარედან უშველებელი ფოლადის საკეტები ეყენა, საშინლად დაიგრუხუნა. დამპალმა ხის მასალამ სამოცზე მეტი პატიმრის მიწოლას ვერ გაუძლო და ჩამოვარდა. დაკავებულთა ბრბომ ახლა-ახლას

დახილით იხუვლა და გარეთ გამოვარდა, იმ საცოდავ თანამოძმეებს კი, რომლებმაც თავი ვერ შეიკავეს და წაიქცნენ, ზედ გადაუარა.

კემბრიც გავარდა კედლისკენ და ხელი კარაბინს დაავლო, მაგრამ ტედ ტრეზევესკიმ მაშინვე გამოსტაცა.

– ჩემია, ხელი გაუშვი, შენი... – დაიღრინა მან.

ბოსლის კარიდან ოფისამდე ოც იარღზე მეტი არ იქნებოდა. ბრბომ სწრაფად დაფარა ეს მანძილი, თან გაჰყვიროდა:

– ახლა! ახლა! ახლა!

პოკერის სათამაშო მაგიდა ხმაურით გადაყირავდა, კარტი მთელ ოთახში მოიფანტა. ამბოხის დაწყებისთანავე ლობეში ჩაყენებული სიგნალიზაცია ჩაირთო. ვინც პირველი მიაწყდა ორმაგ მავთულხლართს, ან დაიწვა, ან უზარმაზარი გაბერილი თევზივით ზედ გადაეკიდა. წამის შემდეგ განგაშის ზარი სირენების გამყინავმა კვილი-მა შეცვალა – საერთო განგაშმა, რომელსაც ზოგჯერ „სამ ექვსიანს“, ანუ სამყაროს აღსასრულს უწოდებდნენ. პლასტიკის ტუალეტების ჯიხურებიდან გაოცებული და შეშინებული გუშაგები იყურებოდნენ.

– ბოსელი! – შესძახა ვილაცამ, – ბოსელში არეულობა! გარბიან!

ნახევრად ჩაცმული, ფეხშიშველი გუშაგები თოვლში გამოცვივდნენ და ლობის გასწვრივ განლაგდნენ. რა იცოდნენ, რომ ოთხმოცზე მეტმა ირმებზე მონადირე კამიკაძემ მავთულხლართზე გადაძრომისას საკუთარი სხეულით მოკლე ჩართვა გამოიწვია. ბევრი მათგანი ახლაც იქ ეგდო, იკრუნჩხებოდა, ძაგძაგებდა, იწვოდა, კვდებოდა, მაგრამ მაინც „ახლას“ გაჰყვიროდა.

ვერაჟინ შეამჩნია კიდევ ერთი გაქცეული, – მაღალი, გამხდარი, ძველმოდური რქოვანი სათვალით, – რომელიც ბოსლის მეორე მხრიდან გავიდა და დიაგონალზე გადაკვეთა ნამქერით დაფარული მინდორი. მიუხედავად იმისა, რომ მდევარს ვერ ხედავდა და ვერც იმას ხვდებოდა, მისდევდნენ თუ არა, – მაინც გარბოდა. პროჟექტორებით გაჩახჩახებულ მინდორში თავს უზომოდ დამცირებულად

გრძნობდა. სირენებისა და განგაშის ზარების ხმა აგიჟებდა, პანიკურ შიშს უნერგავდა და ისე ტანჯავდა, როგორც დადიტსის ტირილი იმ დღეს, „ძმები თრექერების“ შენობის უკან.

იმედოვნებდა, რომ ანდერჰილი ელოდა. ჯერ არაფერი იცოდა, რადგან ხშირი თოვლი ბაკის შორეულ ბოლოს ფარავდა. თუმცა მალე იქ იქნებოდა და ყველაფერი გაირკვეოდა.

## 9

როდესაც განგაში რომ ატყდა, კურცი ჩექმას იცვამდა. დამატებითმა პროჟექტორებმა კიდევ უფრო გაანათა ღვთისგან მივიწყებული კუთხე. კურცს არც გაოცება უგრძნია, არც – წყენა, მხოლოდ – სინანული და შვება. შვება იმიტომ, რომ უცნობმა ურჩხულმა, რომელიც მას ნერვებს უჭამდა, ბოლოს და ბოლოს, თავი გამოამჟღავნა და ახლა მხოლოდ სიტუაციის გაკონტროლება ევალებოდა. სინანული კი იმიტომ, რომ ორი საათიდა აკლდა. კიდევ ორი საათი და ოპერაციას წარმატებით დაასრულებდა.

„ვინებაგოდან“ გამოსულს ცალი ჩექმა ისევ ხელში ეჭირა. ბოსლიდან გაშმაგებული, დაუოკებელი ღრიალი ისმოდა, რაღაც საბრძოლო შეძახილის მსგავსი, რასაც, უნებურად, მისი გულიც გამოეხმაურა. ქარიშხალი ხმებს მხოლოდ ნაწილობრივ ახშობდა: ჩანდა, პაკტიმრები ბრძოლაში გადაეშენენ. იმ გამაძღარი, განებივრებული ადამიანების წიაღში საიდანლაც სპარტაკი<sup>179</sup> გაჩნდა – ასეთი რამ არ უნდა მომხდარიყო, ამას ვერავინ იფიქრებდა.

სულ იმ წყეული ტელეპათიის ბრალია, – გაიფიქრა მან. ინტუიციამ, რომელიც არასდროს ღალატობდა, უკარნახა, რომ გამოუსწორებელი რამ მოხდა, რომ ოპერაციას დედა ეტირა. მაგრამ კურცი მაინც ილიმებოდა, – მაინც ეს წყეული ტელეპათია. იგრძნეს, რაც ელოდათ... და ვილაცამ მოქმედება გადაწყვიტა.

---

<sup>179</sup> ყოფილი რომაელი მონა, რომელმაც მონათა დიდი ამბოხი მოაწყო.



კურცმა დაინახა, როგორ გამოცვივდა ბოსლის მონგრეული კარი-დან ქურთუკებსა და ნარინჯისფერ კეპებში აჭრელებული ბრბო. ერთი კაცს გადატეხილი ფიცარი ვამპირის ვერხვის სოლივით შეესო. თოვლში დაცემულები სხვებმა გადათელეს. ყველა ნათურა თუ პროექტორი ენთო. კურცი თითქოს რინგზე გამართულ ორთაბრძოლას აკვირდებოდა, ყველაფერს კარგად ხედავდა, რადგან მაყურებლებისთვის განკუთვნილ საუკეთესო ადგილზე იჯდა.

ორი ჯგუფი – თითოში ორმოცდაათი-სამოცი კაცი იქნებოდა – მწყობრად და შეთანხმებულად, კარგად გაწვრთნილი რაზმივით მივარდა ლობეს და ძველი მაღაზიის ორივე მხრიდან დაეჭიდა. თავ-დამსხმელებისთვის უცნობი იყო, ანდა – სულერთი, რომ მავთულ-ხლართებში მაღალი ძაბვის დენი გადიოდა. კურცი მიხვდა, რომ ზღუდე დაეცემოდა.

არასდროს ასე უხეშად არ ჩაუშლიათ მისი ყოველმხრივ გათვლილი გეგმა: ორასი-სამასი მოუხერხებელი, ახალწვეული ჯარისკაცი დაუფიქრებლად გადაეშვა ბრძოლაში „ბანზაის“ ძახილით. კურცს კი ეჭვი არ ეპარებოდა, რომ ისინი საქონელივით მორჩილად დაელოდებოდნენ, როდის წაიყვანდა პატრონი სასაკლაოზე.

– ცუდი არ არის, ბიჭებო, – ჩაილაპარაკა კურცმა და იგრძნო, რომ რალაც კიდევ იწვოდა, – ალბათ, მისი დაწყევლილი კარიერა... მაგრამ ბოლო ისედაც ახლოს იყო, ტყუილშუბრალოდ როდი აირჩია ასეთი მძიმე ოპერაცია, რათა ღირსეულად წასულიყო სცენიდან. ახლა ხვდებოდა, რომ კოსმოსიდან მოსული რუხი კაცუნები, ამიერიდან, მეორე პლანზე გადაინაცვლებდნენ. ახალი ამბების წამყვანი რომ ყოფილიყო, ეკრანზე შემდეგ წარწერას გამოიტანდა: სიურპრიზი! ახალი ეპოქის ამერიკელები საოცარ სიმამაცეს იჩენენ! გაუგონარ სიმამაცეს! განა სირცხვილი არ არის ასეთი ადამიანების დახოცვა?

სირენების კივილი იმ თოვლიან ღამეს ხან ძლიერდებოდა, ხანაც

სუსტდებოდა. გაქცეულთა პირველი ტალღა მაღაზიის უკანა კედელს შეასკდა. კურცმა თითქოს დაინახა კიდეც, როგორ შეზანზარდა შენობა.

– წყეული ტელეპათია, – გაიმეორა მან ღიმილით. მისი ხალხი, ბოლოს და ბოლოს, როგორც ჩანს, გამოფხიზლდა. საგუშაგო ჯიხურებიდან, ავტოპარკიდან, სასადილოდან და იმპროვიზებული ბარაკებიდან – ტრაილერებიდან გამოცვივდნენ. კურცის სახეზე ღიმილი გაოგნებამ შეცვალა.

– ესროლეთ, – შესძახა მან, – რატომ არ ისვრით?

ზოგიერთმა დაუჯერა, მაგრამ ასეთები ერთეულები იყვნენ. ძალიან ცოტანი. მიხვდა, რომ ეს პანიკა იყო. მეზრძოლებმა შიშისგან ჩაისვარეს, მიხვდნენ, რომ იგივე ბედი ელოდათ და იმიტომ არ ისროდნენ.

– წყეული ტელეპათია, – გაიმეორა მან.

უეცრად მაღაზიაში სროლა ატყდა. იმ ოფისის ფანჯრები, სადაც ჯერ კიდევ გუშინ ოუენ ანდერჰილთან ორიგინალური თათბირი გამართა, დამაბრმავებლად ნათდებოდა. ორგან შუშები ჩაიმსხვრა. ერთ-ერთიდან ვილაც კაცს გადმოხტომა სურდა. კურცმა მასში ჯორჯ ადელი ამოიცნო, რომელსაც არ აცალეს, ხელი ჩაავლეს და უკან შეათრის.

ოფისში მყოფი ბიჭები წინააღმდეგობის გაწევას მაინც ცდილობდნენ. სხვა რა დარჩენოდათ? ისინი საკუთარი სიცოცხლის გადასარჩენად იბრძოდნენ. ჯარისკაცებს კი შერკინების ადგილამდე ვერაფრით მიეღწიათ. კურცი უკვე ჩექმისთვის ხელის გაშვებასა და ცხრამილიმეტრიანი პისტოლეტის ამოღებას აპირებდა, რამდენიმე გაქცეული მაინც რომ დაეწვინა. მოენადირებინა. ნადავლი მოეგროვებინა. ირგვლივ ისედაც ყველაფერი ინგრეოდა. რატომაც არა?

ანდერჰილი. აი, რატომაც არა. იმ არეულობაში ოუენ ანდერჰილს რალაც წვლილი ჰქონდა. კურცმა ეს ისევე ზუსტად იცოდა, როგორც

თავისი სახელი. ლალატის სუნი სცემდა, ანდერჰილს კი ლალატი სისხლში ჰქონდა გამჟღადარი.

გოსლინის ოფისიდან კვლავ გაისმა სროლა... განწირულთა კვნესა... გამარჯვების შედახილი. კომპიუტერების ჭიებმა, „ვეიანის“ მსმელებმა, სალათას მჭამელმა გოთებმა თავიანთი სიმაგრე აიღეს.

კურცმა „ვინებაგოს“ კარი მიხურა, ის სისაძაგლე რომ აღარ დაენახა და საძინებელში შებრუნდა, ფრედი ჯონსონთან დასარეკად. ჩექმა ისევ ხელში ეჭირა.

## 10

კემბრი ბებერი გოსლინის საწერი მაგიდის უკან, მუხლებზე იდგა, როდესაც მაღაზიაში პატიმრების პირველი ტალღა შემოვარდა. ამ დროს გონებაარეული კემბრი ყუთებში იარაღს ეძებდა. სწორედ იმან გადაარჩინა, რომ მსგავსს ვერაფერს მიაგნო.

– ახლა! ახლა! ახლა! – შეშლილებივით ყვიროდნენ გაქცეულები. მაღაზიის უკანა კედელს ისეთი ძალით ეტაკნენ, კემბრის ეგონა, სატვირთო მანქანა შეასკდაო. შემდეგ საშინელი ტკაცატკუცი მოესმა – მავთულხლართებს პირველი ადამიანები ემსხვერპლნენ. ოფისში შუქი ათამაშდა.

– ერთად დადექით, ბიჭებო! – შესძახა დენი ო'ბრაიენმა, – ღვთის გულისთვის, ერთად...

ამ დროს უკანა კარი ანჯამებიდან ისე ჩამოვარდა, რომ წინ კი არა, უკან გადავარდა და თავდამსხმელებს ფარივით აეფარა. კემბრი მაგიდის ქვეშ შეძვრა და თავს ხელებით იფარავდა. კარი ახლა წინ გადმოიხარა და მაგიდას დაემხო, ამან კემბრი დროებით გადაარჩინა.

პატარა ოთახში სროლის ხმა აფეთქებასავით გაისმოდა, დაჭრილთა და მომაკვდავთა კვნესას ახშობდა, მაგრამ კემბრი მიხვდა, რომ მხოლოდ ტრეზვესკი, ადელი და ო'ბრაიენი ისროდნენ.

კოლმენი, ევერეტი და რეი პარსონსი თავზარდაცემულნი იდგნენ

და იარალი მკერდზე მიეკრათ.

სახელდახელო თავშესაფრიდან ჯინ კემბრიმ დაინახა, როგორ ანადგურებდნენ პატიმრები გზად ყველაფერს, როგორ წაიქცნენ ტყვიით განგმირული მეწინავეები, როგორ შეიღება მათი სისხლით იატაკი, კედლები და სარეკლამო პლაკატები. აი, ჯორჯ ადელმა კარაბინიდან ორ ნარინჯისფერქურთუკიან ახმანს ესროლა და ფანჯარას ეცა. თითქმის გადაძვრა, მაგრამ კაცმა, რომელსაც ლოყაზე ხალივით მოუჩანდა რიპლის წითელი ლაქა, კბილები ისე ჩაასო კოჭში, როგორც საშობაო ინდაურს, მეორემ კი ჯორჯს კისერი მოუგრინა და ყვირილი შეაწყვეტინა. ოთახი დენთის მოცისფრო კვამლით გაივსო, მაგრამ კემბრიმ დაინახა ელ კოლმენი, რომელმაც იარალი გადაადგო და საყოველთაო შეძახილი – „ახლა! ახლა! ახლა!“ – აიტაცა. რეი პარსონმა, მსოფლიოში ყველაზე მშვიდობისმოყვარე და მშვიდმა ადამიანმა, დენი ო'ბრაიენს კარაბინი დაუმიზნა და ტვინი გაასხმევინა.

ყველაფერი გამარტივდა – დაინფიცირებულები ჯანმრთელების წინააღმდეგ.

ძლიერი დარტყმისგან მაგიდა კედლისკენ გასრიალდა. კარი კემბრის დაეცა და სანამ წამოდგომას მოასწრებდა, ხალხმა გადაუარა. თავს ისე გრძნობდა, როგორც არეულობის დროს ცხენიდან ჩამოვარდნილი კოვბოი. ვკვდები, – გაიფიქრა მან, მაგრამ მომდევნო წამს მომაკვდინებელი ზეწოლა შესუსტდა. სისხლში ადრენალინმომატებული კემბრი სწრაფად წამოჯდა მუხლებზე. კარი გადავარდა, – ნახვამდისო და, – გაბრაზებით სახელური თეძოზე მიარტყა. ვილაცამ ჩარბენისას ფეხი ნეკნებში უთავაზა, ვილაცის ჩექმამ ყური ატკინა, მაგრამ ადგომა მაინც მოახერხა. ოთახი სქელ კვამლს გაეგსო, გიჟური ყვირილისა და შეძახილებისგან ყურთასმენა აღარ იყო. რამდენიმე ზორბა მონადირე ლუმელს დაეტაკა, საკვამური გადმოვარდა, იატაკზე დაეხეთქა და გავარვარებული ნაკვერჩხლები აქეთ-

იქით მოიფანტა. ფულსა და კარტს ცეცხლი მოედო. მაღაზიაში პიკერის პლასტმასის კოჭების მძაფრი სუნი დატრიალდა. ეს რეის კოჭებია, – გაიფიქრა კემბრიმ, – სპარსეთის ყურეში თან ჰქონდა. ბოსნი-აშიც.

დაბნეული იდგა. ყურადღებას არავინ აქცევდა. გამოქცეული პატიმრები ოფისსა და მაღაზიას შორის კარში თითქმის არ შედიოდნენ. ეს არაფერში სჭირდებოდათ, რადგან კედელი, უფრო სწორად, თხელი ტიხარი, მოენგრიათ. ნამტვრევები თანდათანობით იწვოდა.

– ახლა, – ჩაიბურტყუნა ჯინ კემბრიმ, – ახლა.

მან თვალი მოჰკრა რეი პარსონსს, რომელიც სხვებთან ერთად, მაღაზიის პარმალისკენ გარბოდა. უკან ჰოუი ევერეტი მისდევდა. გზად ჰოუიმ პურს დასტაცა ხელი და ცენტრალური გასასვლელისკენ გაქანდა.

გამხდარი ბერიკაცი ფრთაგაყრილი შლაპითა და მძიმე პალტოთი ძლიერი მუჯღუფუნისგან ღუმელს შეასკდა და აღარც წამომდგარა. როდესაც სახე გავარვარებულ ლითონს მიედო და ღნობა დაიწყო, კემბრის მისი გამყინავი ხმა შემოესმა. შემოესმა და იგრძნო კიდევ.

– ახლა! – შესძახა მან და დანარჩენებს აჰყვა, – ახლა!

ღუმლიდან გამოვარდნილ ცეცხლის ალს გადაახტა, გაიქცა და თავისი პატარა ტვინი დიდ, გაერთიანებულ ტვინს შეუერთა.

პრაქტიკული თვალსაზრისით, ოპერაცია „ცისფერი ბიჭი“ დასრულდა.

## 11

ჰენრიმ გზის სამი მეოთხედი გაიბინა, გაჩერდა და ხელი გულზე იტაცა, მძიმედ სუნთქავდა. უკან მის მიერ შექმნილი მინიატიურული არმაგედონი<sup>180</sup> მოიტოვა, წინ კი ვერაფერს ხედავდა, წყვილიადის გარდა. ის არამზადა ანდერჰილი გაქცეულიყო და მიეტოვებინა...

---

<sup>180</sup> ბიბლიაში ადგილი, სადაც კეთილისა და ბოროტის უკანასკნელი ბრძოლა გაიმართება.

„სიტყვები შეარჩიე, ლამაზო“...

შუქი ორჯერ აინთო და ჩაქრა. აღმოჩნდა, რომ ჰენრი სხვაგან ეძებდა. ოუენი საძოვრის სამხრეთ-დასავლეთი კუთხის ოდნავ მარცხნივ იმყოფებოდა. ახლა ჰენრიმ გარკვევით დაინახა ყველგანმავლის კვადრატული მოხაზულობა. უკნიდან კვლავ ყვირილი, შეძახილი, ბრძანებები და სროლა ისმოდა. არც ისეთი სასოწარკვეთილი, როგორსაც ელოდა, მაგრამ ახლა იმის დრო არ ჰქონდა, მიზეზები გაერკვია.

„მოუჩქარე, – დაუძახა ოუენმა, – აქაურობას უნდა გავეცალოთ! “

„დამელოდე, მოვრბივარ, მეტი რა ვქნა“.

ჰენრი წინ გაქანდა. რაც უნდა ყოფილიყო ოუენის აბები, მათი მოქმედება აშკარად შესუსტდა. ფეხებიც საგრძნობლად დაუმძიმდა. თეძოსა და პირის ღრუს ქავილს ლამის გაეგვიჟებინა. გრძნობდა, როგორ მიცოცავდა სოკო ენაზე უალკოჰოლო გაზიანი სასმლის ბუშტუკივით, რომელსაც გასკდომა არ სურდა.

ოუენმა მავთულები გადაჭრა – ეკლიანიცა და დენისაც – და უკვე თეთრი ფერის შნო-ჩატ-ის წინ იდგა (გასაკვირი არ იყო, რომ ჰენრიმ თოვლში ის ვერ შეამჩნია), ავტომატი თეძოზე მიებჯინა და გაფაციცებით ათვალეერებდა არემარეს. ურიცხვი ნათურისგან წამოსული სინათლის ფონზე მისი ჩექმის ჩრდილები უაზროდ მოძრავ საათის ისრებს დამსგავსებოდა. ოუენმა ჰენრის მხარში ხელი სტაცა.

„კარგად ხარ?“

ჰენრიმ თავი დაუქნია. როგორც კი ოუენმა შნო-ჩატ-თან მიათრია, გამაყრუებელი აფეთქების ხმა გაისმა, თითქოს მსოფლიოში უდიდესი კარაბინი გაისროლესო. ჰენრი დაიხარა, რაღაცას გამოედო და კინალამ წაიქცა. კიდევ კარგი, ოუენმა მოასწრო და ქურთუკის საყელოში ხელი ჩაავლო.

„რა“...

„გაზი. შესაძლოა, ბენზინიც. გაიხედე“.

მან ჰენრი მიატრიალა. ჰენრიმ გიგანტური ცეცხლის სვეტი დაინახა. ცაში გოსლინის მალაზიის ნაწილები დაფრინავდა: ფიცრები, კრამიტები, აღმოდებული „ჩირიოზოს“ შეკვრები და ტუალეტის ქალაქის რულონები. რამდენიმე ჯარისკაცი მონუსხული შესცქეროდა ფეიერვერკს. ზოგი ტყისკენ გარბოდა, ალბათ, გაქცეულ პატიმრებს მისდევდნენ, თუმცა ჰენრის გარკვევით ჩაესმოდა თავში მათი პანიკური შეძახილი: „გავიქცეთ! გავიქცეთ! ახლავე! ახლავე!“... დაჯერება უჭირდა. მოგვიანებით, შედარებით მშვიდ ვითარებაში, მიხვდა, რატომ აუბეს მხარი ჯარისკაცებმა სამოქალაქო პირებს, მაგრამ ახლა ვერაფერი მოეფიქრებინა – ყველაფერი ელვის სისწრაფით ვითარდებოდა.

ოუენმა კვლავ თავისკენ მოატრიალა იგი და თითქმის ძალით შეაგდო მანქანაზე გადმოკიდებული ტილოს ფარდის ქვეშ, რომელსაც ძრავას ზეთის მძაფრი სუნი ასდიოდა, და მგზავრისთვის განკუთვნილ სკამზე დასვა. კაბინაში თბილოდა, სახელდახელოდ გაკეთებულ ხელსაწყოების პანელზე ჩამოკიდებული რაცია წრიპინებდა და ტკაცუნებდა. ერთადერთი, რისი გარჩევაც ჰენრიმ შეძლო, ათობით ადამიანის მკაფიო, ისტერიკული ხმა იყო, ერთმანეთს ლაპარაკს არ აცლიდნენ. ენით აუწერელი სიხარული იგრძნო – ასეთი ბედნიერი მას შემდეგ არ ყოფილა, რაც რიჩი გრენადოსა და მის ხულიგან ძმაკაცებს შიში აჭამეს. ამ ოპერაციასაც მათი მსგავსი ადამიანები ხელმძღვანელობდნენ, – მოზრდილი რიჩი გრენადოების ბანდა, – რომელთაც ძაღლის გამხმარი განავლის ნაცვლად ხელში ავტომატები ეჭირათ.

სკამებს შორის რაღაც იდო: ყუთი, რომელზეც ორი ქარვისფერი წერტილი ბრწყინავდა. ჰენრი დაიხარა, რათა გაერჩია, რა იყო. ამასობაში ოუენმა მძღოლის სავარძლის თავზე გადაფარებული ბრენტი გადასწია და ზედ მძიმედ დაებერტყა. მან უკანასკნელად გახედა ახრიალებულ მალაზიას. მძიმედ სუნთქავდა, მაგრამ სახეზე ღიმილი გადაჰყვნოდა.

- ამასთან ცოტა ფრთხილად იყავი, ძმობილო, - გააფრთხილა ჰენრი, - ღილაკებს არ შეეხო.

ჰენრიმ ყუთი ასწია, იგი დადიტსის საუზმისთვის განკუთვნილ, სკუბი-დუსგამოსახულებიან კოლოფს ჰგავდა. ანდერჰილის მიერ ნახსენები ღილაკები მოციმციმე ინდიკატორების ქვეშ მდებარეობდა.

- ეს რა არის?

ოუენმა გასაღები გადაატრიალა და გამთბარი ძრავა მაშინვე ამუშავდა. ოუენი კვლავ იღიმებოდა, საქარე მინიდან შემოსული კაშკაშა სინათლის ფონზე ჰენრიმ ბაირუსის მოწითალო ნარინჯისფერი ძაფები შენიშნა, თვალეხვეწი კოსმეტიკურ ტუშს ჰგავდა. წარბებზეც იგივე მოუჩანდა.

- აქ ზედმეტი შუქია, - თქვა ოუენმა, - ცოტა უნდა ჩავაბნელოთ.

მან ნარნარად, მოტორიანი ნავივით მოაბრუნა ყველგანმავალი და ჰენრი განცხრომით მიეყრდნო სავარძლის ზურგს, მოციმციმეწერტილებიან ყუთს ხელიდან არ უშვებდა და გრძნობდა, რომ მომდევნო ხუთი წლის განმავლობაში სიარულს ვეღარ შეძლებდა. არც ჰქონდა ამის სურვილი.

ოუენმა ალმაცერად გადახედა და გეზი დათოვლილი არხისკენ აიღო, რომელსაც ოდესღაც სუონიფონდროუდი ერქვა.

- შენ ეს შეძელი, - თქვა მან, - არ დაგიმაღავ და არც იმის აღიარება მრცხვენია, რომ ეჭვი მეპარებოდა. მაგრამ შენ მოახერხე და ყველა და ყველაფერი აამოძრავე.

- ხომ გეუბნებოდი, მოტივაციების ოსტატი ვარ-მეთქი, - გაეცინა ჰენრის.

„გარდა ამისა, - გაუგზავნა გონებით, - მათი უმრავლესობა ისედაც მოკვდება“.

„ამას მნიშვნელობა არა აქვს. შენ მათ შანსი მიეცი. და ახლა“...

სროლა ისევ გაძლიერდა და როცა ტყვიამ მათ თავზე ჩაუწვილა,



ჰენრი მიხვდა, რომ მათ უმიზნებდნენ. მეორე ყველგანმავლის მუხლუხამ აისხლიტა. ჰენრიმ თავი მხრებში ჩარგო, თითქოს ეს რამეს უშველიდა.

ოუენი კვლავ იღიმებოდა. ხელთათმნიანი ხელი მარჯვნივ გაიშვირა. ჰენრიმაც იქით სწორედ მაშინ გაიხედა, როდესაც კიდევ ორი ტყვია მოხვდა ყველგანმავლის კვადრატულ კორპუსს. ჰენრი ორივეჯერ მოიკუნტა. ოუენი კი თითქოს ვერაფერს ამჩნევდა.

ჰენრიმ ერთად მდგარი ტრაილერები დაინახა. ზოგ მათგანზე „სისკოსა“ და „სკოტ-ფეიფას“ მსგავსი რეკლამა იყო გაკრული. მათ წინ ბორბლებზე შემდგარი სახლების კოლონია მოჩანდა. ყველაზე დიდის, „ვინებაგოს“ გვერდით, რომელიც ჰენრის ნამდვილ სასახლედ მოეჩვენა, რამდენიმე კაცი იდგა და მათ უმიზნებდა. საკმაოდ დიდი მანძილისა და თოვლიანი ქარის მიუხედავად, მსროლელები მიზანს ხშირად არტყამდნენ. მათკენ დამხმარე ძალა გარბოდა (ერთ-ერთ მუტრუკს მკერდი საჩვენებლად მოეწიშვლებინა და კომიქსების სუპერგმირს ჰგავდა). ცენტრში მალალი, თმაჭალარა კაცი იდგა, მის გვერდით კი – უფრო ჩასკვნილი მებრძოლი. ჰენრის თვალწინ გამხდარმა შაშხანა ასწია და დაუმიზნებლად გაისროლა. ბახ! და ტყვიამ ჰენრის ცხვირწინ აბეზარი ბუზივით ჩაუქროლა.

ოუენს გაეცინა.

– გამხდარი და ჭალარა კაცი – კურცია. ის არის აქ მთავარი, ტყვიას ტყვიაში აჯენს.

ტყვიები ისევ ხვდებოდა ყველგანმავლის კორპუსსა და მუხლუხას. ერთი მათგანი კაბინაში შემოვარდა და რაცია დაადუმა. მანძილი მათსა და „ვინებაგოს“ შორის თანდათან იზრდებოდა, მაგრამ ეს მსროლელთა სიზუსტეზე ოდნავაც არ აისახებოდა. ჰენრი მიხვდა, რომ საუცხოო მსროლელები იყვნენ და ადრე თუ გვიან მისწვდებოდნენ... ოუენი კი გაბადრული იყურებოდა, ჰენრისთვის გასაგები გახდა, რომ კომპანიონს მასზე მეტად აკვიატებოდა თვითმკვლელობის სურვილი.

– კურცის გვერდით ფრედი ჯონსონია. ეს ბიჭები მისი მუშაკეტე-  
რები არიან, რომელთაც... ეი, ფრთხილად!

კიდევ ერთი გატკაცუნება, კიდევ ერთი ფოლადის ფუტკარი, რო-  
მელმაც მათ შორის ჩაიქროლა და სირქარეთა გადამრთველის ბერ-  
კეტზე პლასტმასის ბურთულა დაამსხვრია. ოუენმა გადაიხარხარა.

– ეს კურცი იყო! – შესძახა მან, – ამაზე თავს დავდებ! ხომ წარ-  
მოგიდგენია, წესით, ორი წლის წინ თადარიგში უნდა გასულიყო, ის  
კი კვლავინდებურად ანი ოუკლივით<sup>181</sup> ისვრის!

აღტაცებულმა ოუენმა საჭეს მუშტი დაარტყა და დაამატა:

– საკმარისია. ვიმხიარულეთ და გვეყოფა. აბა, ლამაზო, ერთი ეგ  
შუქი გამომირთე.

– რა თქვი?

კვლავაც გაღიმებულმა ოუენმა ცერით მოციმციმეწერტილებიან  
ყუთზე მიუთითა და ახლა ჰენრის მის თვალებქვეშ ბაირუსის ზოლე-  
ბი საბრძოლო მოხატულობად მოეჩვენა.

– ღილაკებს დააწევი, პატარავ. დააწევი და ფარდა დაუშვი.

## 12

უეცრად – ასეთი რამ ყოველთვის უეცრად, ჯადოსნური ჯოხის  
აქნევასავით ხდება – სამყარო გაქრა და კურცი მარტო დარჩა. აღა-  
რც აშარი ქარი იყო და აღარც – თოვლი, აღარც სირენებისა და გან-  
გაშის ზარების ღმუილი ისმოდა. კურცი ველარც ფრედი ჯონსონსა  
და „იმპერიალის ხეობის“ დანარჩენ მებრძოლებს ხედავდა. მთელი  
ყურადღება ყველგანმავალზე გადაეტანა, რომელიც სულ უფრო  
შორდებოდა მას. არადა, ისე მკაფიოდ ხედავდა ფოლადის კაბინის  
მარცხენა სავარძელში მჯდომ ოუენ ანდერჰილს, თითქოს თვალეტი-  
დან სუპერმენივით რენტგენის სხივებს აფრქვევდა. სამიზნე ძალიან  
შორს იყო, მაგრამ ამას მნიშვნელობა არ ჰქონდა. შემდეგი ტყვია აუ-  
ცილებლად კეფაში მოხვდებოდა მოლალატეს, რომელმაც გაბედა და

---

<sup>181</sup> ქალი კოვბოი, სახელგანთქმული მსროლელი.

ზღვარს გადააბიჯა. მან შაშხანა ასწია, დაუმიზნა და...

ღამეში ორი აფეთქების ხმა გაისმა, საკმაოდ ახლოს, რათა მათგან მოვარდნილ ტალღას კურცი და მისი ბიჭები წაექცია. ტრაილერი, რომელსაც გვერდზე „ინტელ ინსაიდი“ ეწერა, გადაბრუნდა და „სპაგოს“ – გადასატან სამზარეულოს დაეცა.

– დალახვროს ეშმაკმა, – შესძახა ვილაცამ.

ყველა პროექტორი როდი ჩაქრა – ოუენ ანდერჰილს მხოლოდ ნახევარი საათი ჰქონდა და მან ოთხიდან ორ გენერატორში მოახერხა თერმიტული დინამიტის ჩადება (ამასთან, განუწყვეტლივ ერთსა და იმავეს ლიღინებდა: „ბენბერი-კროსისკენ, ბენბერი-კროსისკენ, ცხენ-ჯოხზე შემჯდარი ბენბერი-კროსისკენ...), მაგრამ მოულოდნელად სწრაფად მიმავალი ყველგანმავალი ნაპერწკლებით მოფენილი ჩრდილიდან ისე გაქრა, რომ კურცმა გასროლა ვერ მოასწრო. გაბრაზებულმა შაშხანა ძირს დააგდო.

– ამის დედაც! .. – თქვა მან აუღელვებლად, – არ ისროლოთ, არ ისროლოთ, ბრიყვებო. შეჩერდით, ღვთის გულისთვის. ფრედის გარდა, ყველანი ფურგონში ადით. ერთმანეთს ხელები ჩაჰკიდეთ და ყოვლისშემძლე უფალს სთხოვეთ, რომ ამ დაწყევლილი ადგილიდან ცოცხალი გაგიყვანოთ. წამოდი, ფრედი, ფეხი გამოადგი.

დანარჩენები, ოცამდე კაცი, ნელა აუყვა საფეხურებს, თან შიგადაშიგ ცეცხლმოდებულ გენერატორებსა და აალებულ სამზარეულოს გასცქეროდნენ (სასადილოც იმ დღეში იყო, იზოლატორსა და მორგსაც იგივე ბედი ელოდა). ნათურებისა და პროექტორების ნახევარი გადაიწვა.

კურცმა ფრედი ჯონსონს მხრებზე ხელი მოხვია და განზე გაიყვანა, ნამქერისკენ, სადაც ქარს ახალი ძალით ბოლქვებად მოჰქონდა რაღაც, რაც მისტიკურ ნისლს უფრო ჰგავდა მოჩვენებებზე გადაღებული ფილმიდან. მათ წინ ცეცხლი მხიარულად ნთქავდა გოსლინის მალაზიას. მის გვერდით ბოსელი იწვოდა. ჩამოგლეჯილი კარების ადგილას სიბნელეს დაელო პირი.

– ფრედი, გიყვარს ღმერთი? სიმართლე მითხარი.

ფრედის ეს უკვე გაეგლო. ეს მანტრა იყო. ჩვეულებრივი მანტრა. ბოსი გონებას ისუფთავებდა.

– მიყვარს, ბოს.

– თუ დაიფიცებ, რომ სიმართლეს ამბობ? – არ ეშვებოდა კურცი და თვალებით ბურღავდა. უფრო სწორად, მის მიღმა იყურებოდა და მომდევნო ხუთ-ექვს ნაბიჯს გეგმავდა. ცხადია, თუკი ამ არსებას, რომელიც მხოლოდ ინსტინქტებისგან შედგებოდა, რაიმეს დაგეგმვა ხელეწიფებოდა, – ხომ იცი, ტყუილისთვის სამუდამო ჯოჯოხეთი გელის.

– ვფიცავ, ბოს.

– ძალიან გიყვარს, არა?

– ძალიან, ბოს.

– რაზმზე უფრო მეტად? დაშოშიან ჩხუბსა და საკუთარ საქმეზე მეტადაც? – პაუზა, – ჩემზე მეტადაც?

თუ სიკვდილი არ გასურდათ, ასეთ შეკითხვებზე ფრთხილად და გონივრულად უნდა გეპასუხათ. საბედნიეროდ, კითხვები სირთულით არ გამოირჩეოდა.

– არა, ბოს.

– ტელეპათიამ გაიარა, ფრედი?

– მე მას ოდნავ შევეხე. არ ვიცი, ეს ტელეპათია იყო თუ არა... თავში რაღაც ხმები ჩამესმოდა...

კურცმა თავი დაუქნია. ბოსლის სახურავზე „რიპლის სოკოს“ შეფერილობის მოწითალო ოქროსფერი ცეცხლის ალი აცეკვდა.

– ...მაგრამ ყველაფერი დამთავრდა.

– რაზმის დანარჩენი წევრები?

– „იმპერიალის ხეობის“? – დაზუსტება სცადა ფრედიმ და თავი „ვინებაგოსკენ“ გაიქნია.

– აბა, სხვა ვინ? სახანძრო რაზმი ხომ არა? ცხადია, ისინი.

– ყველა სუფთაა, ბოს. არავინ დაინფიცირებულა.

– შესანიშნავია. ცხადია, ცუდიცაა. ფრედი, ჩვენ ორი ავადმყოფი გვჭირდება. როცა ვამბობ ჩვენ-მეთქი, შენ გგულისხმობ და საკუთარ თავს. ამერიკელები მჭირდება, ეს ნაგავი ყველაზე მეტად რომ ეტყობათ. გასაგებია?

– დიახ.

ფრედი, რასაკვირველია, ვერაფერს მიხვდა, მაგრამ ეს, ჯერჯერობით, მნიშვნელოვანი არ იყო. იგი გრძნობდა, ხედავდა, როგორ ეუფლებოდა კურცი სიტუაციას, მისთვის ეს დიდი შვება იყო. საჭიროების შემთხვევაში კურცი მას ყველაფერს აუხსნიდა.

ფრედიმ ფრთხილად გახედა აბრიალებულ მაღაზიას, ალმოდებულ ბოსელს, ცეცხლმოკიდებულ სამზარეულოს. ურთულეს მდგომარეობაში იყვნენ.

თუმცა, ვინ იცის. ახლა ხომ ყველაფერს კურცი მიხედავდა.

– ყველაფერი იმ წყეული ტელეპათიის ბრალია, – ხმამაღლა ფიქრობდა კურცი, – მაგრამ გადამწყვეტი ბიძგი ამ ყველაფერს ტელეპათიამ კი არა, ჩვეულებრივმა ადამიანურმა უნამუსობამ მისცა, დიდება უფალს. ვინ უღალატა იესოს, ფრედი? ვინ მიანიშნა მასზე მოღალატის ამბორით?

ფრედი ბიბლიას, ძირითადად, იმიტომ კითხულობდა, რომ კურცმა აჩუქა.

– იუდა ისკარიოტელმა, ბოსს.

კურცმა თავი რამდენჯერმე დააქნია. თვალებს აქეთ-იქით აცეცებდა, ნგრევის ხარისხს აფასებდა, საპასუხო ქმედებების შესაძლებლობას ითვლიდა, რასაც ქარიშხალი ძალიან ართულებდა.

– სწორია, მეგობარო. იუდამ იესოს უღალატა, ოუენ ანდერჰილმა კი – ჩვენ. ამისთვის იუდამ ოცდაათი ვერცხლი მიიღო. როგორ ფიქრობ, ეს არც ისე ბევრია, არა?

– არაა ბევრი, ბოს, – დაეთანხმა ფრედი და ოდნავ შეტრიალდა, რადგან ამ დროს სასადილოში რაღაც აფეთქდა, მაგრამ კურცმა ფო-

ლადის თითები მხარში ჩაავლო, თავისკენ მოატრიალა და მოჩვენების მსგავსი თეთრი წამწამებით დამშვენებული, ფართოდ გაღებულ მოელვარე თვალები მიაშტერა.

– მე მიყურე, როცა გელაპარაკები, – თქვა მან, – და მოისმინე, როცა მოგმართავენ, – კურცმა ხელი თავის ცხრამილიმეტრიან პისტოლეტს დაადო, – თორემ ტვინს გაგასხმევენებ. ისედაც ძძიმე ღამე გამოდგა და ჩემს გაბრაზებას არ გირჩევ, ხომ გაიგე, ძაღლისშვილო? გაიგე თუ არა?

ჯონსონს სიმხდალეს ვერავინ დასწამებდა, მაგრამ ახლა მუცელში რაღაც ამოუტრიალდა და პირისკენ ამოუცოცდა.

– დიახ, ბოს, მაპატიეთ.

– რა გაეწყობა. ღმერთს ვუყვარვართ და გვპატიობს, ჩვენც ასე გვიბრძანა მოქცევა. არ ვიცი, რამდენი ვერცხლი შეხვდა ოუენს, მაგრამ ერთს გეტყვი: ჩვენ უნდა შევიპყროთ იგი, დუნდულები გავაწევინოთ და ჩვენს ბიჭუნას ახალი, ხუთჯერ უფრო დიდი ნახვრეტი გავუკეთოთ. გამომყვები?

– დიახ, ბოს, – ფრედის ახლა ყველაზე მეტად იმ ტიპის დაჭერა და გაჟიმვა უნდოდა, მისი მოწესრიგებული სამყარო თავდაყირა რომ დააყენა, – როგორ მიგაჩნიათ, რამდენადაა ოუენი ამ ყველაფერზე პასუხისმგებელი?

– იმდენად, რომ ჩემთვის საკმარისია, – მშვიდად წარმოთქვა კურცმა, – ფრედი, გული მიგრძნობს, რომ ფსკერისკენ ვეშვები...

– არა, ბოს.

– ...მაგრამ სხვასაც გავიყოლებ.

კურცმა, რომელსაც ხელი კვლავ ფრედისთვის გადაეხვია, თავისი ახალი მოადგილე „ვინებაგოსკენ“ წაიყვანა. ცეცხლის დადაბლებული, მომაკვდავი სვეტები დამწვარი გენერატორების ადგილებს მიუთითებდა. და ეს ყველაფერი ანდერჰილს ჩაედინა, კურცის ერთერთ ბიჭს. ფრედის უჭირდა ამის დაჯერება, მაგრამ თანდათანობით მაინც განიმსჭვალა ამ აზრით. „რამდენ ვერცხლად, ოუენ? რამდენი

ვერცხლი აიღე, შე მოლალატევ?“

კურცი საფეხურებთან გაჩერდა.

– მაშასადამე, პოვნა და განადგურება. ჯგუფის ხელმძღვანელად ვის დანიშნავდი?

– გალაჰერს, ბოს.

– კეიტს?

– დიახ.

– ის ქალი კაციჭამიაა, ფრედი? ასეთი ჯგუფის მეთაური კაციჭამია უნდა იყოს. ხომ იცი, მისია...

– შეჭამს კი არა, შეახრამუნებს, ბოს.

– კარგი, – კურცმა თავი დააქნია, – ჭუჭყიანი სამუშაოა. ორი რიპლით დაინფიცირებული მჭირდება, „ცისფერი ბიჭის“ საუკეთესო მებრძოლები. დანარჩენებს... როგორც ცხოველებს, ფრედი. მაშასადამე, „იმპერიალის ხეობის“ ამოცანაა პოვნა და განადგურება. გალაჰერმა და მისმა ხალხმა უნდა აღმოაჩინონ ისინი და, შეძლებისდაგვარად, მოსპონ. როგორც სამხედროები, ასევე სამოქალაქოები. ვადა – ხვალინდელი დღის თორმეტი საათი და ნული წუთი. შემდეგ კი ყველა თავის თავს მიხედავს. ჩვენ გარდა, ფრედი.

ცეცხლმა კურცის სახეზე ბაირუსი აღბეჭდა და თვალებით სინდიოფალას დაამსგავსა.

– უნდა შევიპყროთ ოუენი და ვასწავლოთ, როგორ უნდა ღვთის სიყვარული.

მიუხედავად იმისა, რომ „ვინებაგოს“ საფეხურები თოვლით დაფარული და მოლიპული იყო, კურცი არხარივით მარჯვედ ავიდა ზედ. ფრედი ჯონსონი უკან მიჰყვა.

შნო-ჩატ-ი სუონიფონდროუდისკენ ყრილით ისე სწრაფად დაემგვა, რომ ჰენრის კინალამ გული აერია. შემდეგ ყველგანმავალი მოტირიალდა და სამხრეთისკენ გაემართა. ოუენი საჭეს ჩაჰფრენოდა და

გზას თვალს არ აცილებდა. სიჩქარეს მარჯვედ არეგულირებდა და მანევრირებდა ნამქერს შორის. ჰენრის აზრით, პირველი სიჩქარით მიდიოდნენ და საათში, დაახლოებით, ოცდათხუთმეტი მილს ფარავდნენ. გოსლინის მაღაზიას, ცხადია, გვარიანად დაშორდნენ, მაგრამ ჰენრის ეჩვენებოდა, რომ ჯოუნსი მათზე სწრაფად გადაადგილდებოდა.

„მთავარი გზატკეცილი წინაა? – ჰკითხა ოუენმა, – ასეა, არა?“

„ეგრეა. ოთხიოდე მილი დაგვრჩა“.

„იქ რომ მივალთ, მანქანა უნდა გამოვცვალოთ“.

„არავინ დაზარალდება, ცხადია, თუ ეს ჩვენზე იქნება დამოკიდებული. და არავინ მოკვდება“.

„ჰენრი... არ ვიცი, როგორ აგიხსნა, მაგრამ ეს სკოლაში კალათბურთის თამაში არ გეგონოს“.

– არავინ დაზარალდება. და არავინ მოკვდება. ყოველ შემთხვევაში, მანქანის წართმევისას. თუ არ მეთანხმები, ახლავე გავაღებ კარს და გადავხტები.

ოუენი მისკენ მიბრუნდა:

– შენ ამას მართლა გააკეთებ, არა? და ჯანდაბას შენი მეგობარი და ყველაფერი ის, რასაც იგი ჩვენს სამყაროს უმზადებს?

– ჩემი მეგობარი არაფერ შუაშია. იგი მოიტაცეს.

– კარგი. თუ ეს ჩვენზე იქნება დამოკიდებული, არავინ დაზარალდება მანქანების გაცვლისას. არც არავინ დაილუპება. ისევ ჩვენ თუ დავილუპებით. საით მივდივართ?

„დერი“.

„ის იქ არის? უკანასკნელი გადარჩენილი უცხოპლანეტელი?“

„ასე მგონია. ნებისმიერ შემთხვევაში, დერიში მეგობარი მყავს, რომელიც დაგვეხმარება. იგი ხაზს ხედავს“.

„რომელ ხაზს?“

– ამას მნიშვნელობა არა აქვს, – თქვა ჰენრიმ და გაიფიქრა: ეს რთული ასახსნელია.



– რას ნიშნავს, „რთული ასახსნელია“? ან „არ არის მოძრაობა, არ არის თამაში“?

„გზაში აგისხნი. თუ შევეძლებ“.

შნო-ჩატ-ი – ფოლადის ეს კაფსულა თავისივე ყვითელი ათინათით შტატების გამყოფი გზატკეცილისკენ მიქროდა.

– ერთხელაც გამიმეორე, რა უნდა გავაკეთოთ, – თქვა ოუენმა.

– ჩვენი სამყარო უნდა გადავარჩინოთ.

– ისიც მითხარი, ვინ გავხდებით... ეს უნდა გავიგონო.

– გმირები, – თქვა ჰენრიმ, თავი უკან გადასწია და თვალები დახუჭა. წამის შემდეგ უკვე ეძინა.

## ნაწილი III

კუებინი

ერთხელ, დილით, კიბეზე რომ დავაპირე ასვლა,  
კაცი შემხვდა, იქ არ იყო, გეფიცებით, მართლა;  
არც დღეს იყო! კვლავ შევხვდები? ისევ ვნახავ მაღლა?  
ნეტა თავი დამანებოს, აღარ ვიცი, რა ვქნა.

*ჰიუზ მირნსი<sup>182</sup>*

---

<sup>182</sup> ამერიკელი პოეტი.

# თავი მეთვრამეტე დევნა იწყება

## 1

ჯოუნსი ვერაფრით მიხვდა, რა დრო იყო, როდესაც თოვლის კორიანტელიდან მწვანე აბრამ ამოყვინთა, წარწერით „დაიზარტსი“, – საათი „რემის“ პანელზე კარგა ხანია, აღარ მუშაობდა და გამუდმებით შუალამეს უჩვენებდა, – მაგრამ ისევ ბნელოდა და ძლიერად თოვდა. თოვლსაწმენდი მანქანები მარცხს მარცხზე განიცდიდნენ ქარიშხალთან უთანასწორო ბრძოლაში. მოპარული „რემი“ ძალიან კარგი მოსიარულე იყო, როგორც ჯოუნსის მამილო იტყოდა, მაგრამ მასაც კი გაუჭირდა ნამქერთან ჭიდილი, ცურავდა, ბუქსაობდა, ღმუილით მიიწევდა წინ სიბნელესა და ქარბუქში. ჯოუნსიმ არ იცოდა, საით მიიჩქაროდა მისტერ გრეი, მაგრამ არ სჯეროდა, რომ ის ამას შეძლებდა. ასეთ საშინელ ამინდში და ასეთი სატვირთო მანქანით.

რადიო მუშაობდა, მაგრამ ხარვეზებით; ყველაზე ხმამაღლა სტა-

ტიკური მუხტების ტკაცატკუცი ისმოდა. ზუსტ დროს არ აცხადებდნენ, მაგრამ ჯოუნსიმ ამინდის პროგნოზის მოსმენა მოახერხა. პორტლენდის სამხრეთით თოვლი წვიმას ჩაენაცვლებინა, ოგასტიდან ბრუნსვიკამდე კი ნალექი, ძირითადად, სველი თოვლისა და ყინულივით ცივი წვიმის საძაგელი ნაზავის სახით მოდიოდა. ბევრ ქალაქსა და დასახლებას დენი არ მიეწოდებოდა და მანქანების უჯაჭვებოდ გადაადგილება არათუ შეუძლებელი, სასიკვდილო განაჩენის ტოლფასი იყო.

ამ სიახლემ ჯოუნსი აღაფრთოვანა.

## 2

როდესაც მისტერ გრეიმ სატვირთო მანქანის პანდუსისკენ მობრუნება სცადა, რომლის თავზეც მწვანე აბრა იწონებდა თავს, „რემი“ უმწეოდ მოსრიალდა გვერდზე, თოვლი ააშხეფა და დიდრონი ღრუბლები წარმოქმნა. ჯოუნსიმ ღმერთს მადლობა შესწირა, რომ საჭესთან თვითონ არ იჯდა, თორემ ახლა უკვე გზის გასწვრივ რომელიმე არხში ეგდებოდა. მართალია, მისტერ გრეი ჯოუნსის ემოციებისგან დაცული არ იყო, სტრესულ სიტუაციებში მას მოთმინება იშვიათად ღალატობდა. ახლაც, ამ გოლიათთან გაუაზრებელი ბრძოლის ნაცვლად, საჭეს ჩააფრინდა და მანქანას დაცურების საშუალება მისცა, მანქანამ მალე თავისით დაამუხრუჭა. შემდეგ კვლავ გაასწორა „რემი“. ძაღლს, მშვიდად ეძინა ნოხზე, არ გაღვიძებია, არც ჯოუნსის ასჩქარებია მაჯისცემა. თუმცა, საჭესთან რომ მჯდარიყო, გული საგულედან ამოუხტებოდა. არა, ასეთ ამინდში, მანქანას, რა თქმა უნდა, გარაჟში დააყენებდა და შინ დარჩებოდა.

მისტერ გრეიმ დამჯერედ გააჩერა მანქანა პანდუსის ბოლოს, „სდექ“ ნიშანთან, თუმცა მეცხრე გზატკეცილზე წამლად ერთი მანქანაც არ ჩანდა. პანდუსის მოპირდაპირედ უშველებელი განათებული ავტოსადგომი დაინახა, იქ ქარისგან დაყენებული თოვლის კორიან-

ტელი უხილავი, უშველებელი მხეცის სუნთქვას წააგავდა. ჩვეულებრივ დღეებში იქ ნემსიც არ ჩავარდებოდა, ძრავები გუგუნებდა, ფარების ყვითელი და მწვანე შუქი უხვად იღვრებოდა, სატვირთო მანქანების, ტრაილერებისა და მსუბუქი ავტომობილების განუწყვეტელი მიმოსვლა და ხმაური იყო. დღეს კი იქ თითქმის არავინ ჩანდა, მხოლოდ აბრა ეკიდა, წარწერით: „ფასიანი ავტოსადგომი, მიმართეთ მენეჯერს, შეიძინეთ ქვითარი“. ლობის იქით ათი-თხუთმეტი თვითმცლელი სატვირთო იდგა, დათოვლილი. მათი მძღოლები ახლა, ალბათ, შენობაში ისხდნენ, პინბოლს თამაშობდნენ, ბარში ტელევიზორს უყურებდნენ ან დაძინებას ცდილობდნენ უბადრუკ საერთო საძინებელ ოთახში, სადაც ათ დოლარად სუფთა საბანსა და საწოლს იძლეოდნენ და საიდანაც, ბეტონის კედლის სახით, თვალწარმტაცი ხედი იშლებოდა. ყველას ერთი და იგივე აზრი ტანჯავდა: როდის მოვცილდები აქაურობას? რა თანხა დამიჯდება ეს სიამოვნება?

მისტერ გრემი ფრთხილად დააჭირა ფეხი გაზს, იმის შესაბამისად, როგორც ატარებდა ჯოუნსი ზამთარში მანქანას. პიკაპის ოთხივე ბორბალი ამოდრავდა, სატვირთო დაიძრა და თოვლში შეიჭრა.

„მიდი! – ამხნევებდა ჯოუნსი ოფისის ფანჯრიდან, – მიდი, გაიჭედე! რადგან თუ სრულამძრავიანი სატვირთო გაიჭედება, აღარაფერი უშველის!“

მაგრამ ბორბლები გაგორდა – ჯერ წინა, იქ, სადაც ძრავის სიმძიმე მეტ ხახუნს ქმნიდა, შემდეგ კი უკანა. „რემმა“ მეცხრე გზატკეცილი გადაკვეთა და ოდნავ შეყოვნდა აბრასთან, წარწერით „შესასვლელი“. იმის იქით კიდევ ერთი მოჩანდა: „კეთილი იყოს თქვენი მოზრძანება ახალი ინგლისის საუკეთესო ავტოსადგომზე“. შემდეგ მანქანის ფარებმა მესამე, თოვლით ნახევრად დაფარული, მაგრამ მაინც ადვილად წასაკითხი აბრა გაანათა: „დალახვროს ეშმაკმა, კეთილი იყოს თქვენი მოზრძანება ახალი ინგლისის საუკეთესო ავტოსადგომზე“.

„ეს მართლაც მსოფლიოში საუკეთესო ავტოსადგომია?“ – დაინტერესდა მისტერ გრეი.

„რასაკვირველია“, – დაუდასტურა ჯოუნსიმ, მაგრამ თავი ველარ შეიკავა და გადაინახარხარა.

„ეს რატომ გააკეთე? რატომ გამოსცემ ასეთ ხმებს?“

ამ დროს ჯოუნსიმ რაღაც საშინელი და, იმავდროულად, გულისამაჩუყებელი გააცნობიერა: მისტერ გრეი მისი ტუჩებით ილიმებოდა. ფართოდ არა, ძლივს შესამჩნევად, მაგრამ ეს მაინც ღიმილი იყო!

მან არ იცის, რა არის ღიმილი, – გაიფიქრა ჯოუნსიმ. ცხადია, მან არც გაბრაზება იცოდა, მაგრამ ყველაფერს საოცრად სწრაფად ითვისებდა, ყოველ შემთხვევაში, ისტერიკა მშვენივრად გამოსდიოდა.

„შენი სიტყვები სასაცილოდ მომეჩვენა“.

„რას ნიშნავს სასაცილო?“

ჯოუნსი შეეყოვნდა, ნორმალური პასუხი არ მოაფიქრდა. უნდოდა, რომ მისტერ გრეის ადამიანური ემოციის მთელი სპექტრი განეცადა. როგორც ჩანს, მხოლოდ იმ შემთხვევაში გადარჩებოდა, თუ დამპყრობელს – მას, ვინც სხეული და გონების უდიდესი ნაწილი მოსტაცა, გააადამიანურებდა. „პოგომ“<sup>183</sup> ერთხელ თქვა: „ჩვენ შევხვდით მტერს და ეს მტერი ჩვენ ვართ“. მაგრამ როგორ აუხსნას სიტყვა „სასაცილოს“ მნიშვნელობა სხვა სამყაროდან მოსულ ერთ მუჭა სპორას? და რა არის სასაცილო, თუ „დაიზარტისის“ მფლობელები საკუთარ ავტოსადგომს „მსოფლიოში საუკეთესოს“ უწოდებდნენ?

ამჯერად მათ მორიგ, ორმხრივისრიან აბრას ჩაუარეს. მარცხენის ქვეშ „მძიმეტვირთიანი“ ეწერა, მარჯვენის ქვეშ – „მსუბუქტვირთიანი“.

„რომელი ავირჩიო?“ – იკითხა მისტერ გრეიმ და აბრასთან გაჩერდა.

---

<sup>183</sup> ამერიკული საგაზეთო კომიქსი და მისი მთავარი გმირი ოპოსუმი.

ჯოუნსის შეეძლო ეიძულებინა, რომ ინფორმაცია თვითონ მოეძებნა, მაგრამ რა აზრი ჰქონდა?

„მსუბუქტივითანი“, – მოკლედ მოუჭრა მან და მისტერ გრეიმ „რემი“ მარჯვნივ მიაბრუნა. ბორბლებმა ბუქსაობა დაიწყო. სატვირთო მანქანა შეჯანჯღარდა. ლედმა თავი ასწია, კიდევ ერთხელ გამოუშვა ხმაურით სურნელოვანი ეთერგაზები და საწყალობლად დაიყმუვლა. მუცელი გაზრდოდა და ჩამოჰკიდებოდა: ვინც კი შეხედავდა, ლეკვების დასაყრელად გამზადებული ძუკნა ეგონებოდა.

ავტოსადგომზე ოცი-ოცდახუთი მსუბუქი მანქანა და პიკაპი იდგა. ისინი, რომლებიც თოვლს თითქმის დაეფარა, ნამდვილად მომსახურე პერსონალს ეკუთვნოდა: მექანიკოსებს (აქ ორი მაინც ყოველთვის მორიგეობდა), ოფიციანტებს, მზარეულებს. ჯოუნსის მძაფრი დაინტერესება იმან გამოიწვია, რომ ყველაზე სუფთად საპატრულო ღია ცისფერი მანქანა გამოიყურებოდა, რომლის სახურავზე დამაგრებულ შუქურას მცირეოდენი თოვლი მიჰყროდა. დაპატიმრება გამოეწვია? ეს, მისტერ გრეის გეგმებს, ცხადია, ბოლოს მოუღებდა, მაგრამ, მეორე მხრივ, იგი უკვე სამ მკვლელობას შესწრებოდა, თუ პიკაპის მძღოლსაც ჩავთვლით. მართალია, პირველი ორი მკვლელობის მოწმე არ არსებობდა, ისევე, როგორც გარი ჯოუნსის თითების ანაბეჭდები, მაგრამ აქ? უამრავი. მან თავი სასამართლოს დარბაზში წარმოიდგინა. „ბატონო მოსამართლე, ყველა მკვლელობა უცხოპლანეტელმა მისტერ გრეიმ ჩაიდინა, რომელმაც ჩემში შემოაღწია“. კიდევ ერთი ხუმრობა, რომელსაც მისტერ გრეი ვერ დააფასებდა.

ამასობაში მისტერ გრეი მის ცნობიერებაში დაძვრებოდა.

„გაზდაიზარტსი, – თქვა მან, – რატომ უწოდებთ ამ ადგილს გაზდაიზარტს, როდესაც აბრაზე დაიზარტსი წერია?“

„ეს ლამარმა მოიგონა, – აუხსნა ჯოუნსიმ და გზისპირა რესტორანში, „კედელში გაკეთებული ხვრელისკენ“ მგზავრობისა ან იქიდან დაბრუნებისას გამართული მხიარული ჭამა-სმა მოაგონდა. ესეც

ტრადიციის ნაწილი იყო, – მამაჩემიც ასე უწოდებდა“.

„ეს სასაცილოა?“

„არც ისე, საკმაოდ უხეში ხუმრობაა“.

მისტერ გრეი რესტორნის განათებულ სადგომზე, ყველაზე ახლო რიგში გაჩერდა, თუმცა – ყველაზე შორის პოლიციის მანქანისგან. ჯოუნსიმ ვერ გამოიცნო, მიხვდა თუ არა მისტერ გრეი მოციმციმე შუქურის დანიშნულებას. მან ფარები გამორთო, ხელი გასაღებისკენ წაიღო, მაგრამ შეცრად შეჩერდა და ძაღლის ყევის მსგავსი ბგერები გამოსცა:

– ჰამ! ჰამ! ჰამ! ჰამ!

„როგორ მოგწონს?“ – დაუფარავი ცნობისმოყვარეობითა და ოდნავი შეშფოთებით იკითხა ჯოუნსიმ.

– მოსაწონი არაფერია, – თქვა მისტერ გრეიმ. იგი კვლავაც სიბნელეში იჯდა და კაბინის გარეთ მოზუზუნე ქარს უსმენდა. შემდეგ უფრო მტკიცე წარმოთქვა:

– ჰამ! ჰამ! ჰამ! ჰამ!

თავშესაფრად ქცეულ ოფისში მყოფი ჯოუნსი შეკრთა. ეს საშინელი ხმა იყო, თითქოს მოჩვენება გაადამიანურებას ცდილობდა.

სიცილი არც ლედს მოეწონა. კვლავ დაიწკმუტუნა და შეშინებულმა შეხედა პატრონის მანქანის საჭესთან მჯდომ მამაკაცს.

### 3

ოუენი ჰენრის ანჯღრევდა და მის გაღვიძებას ცდილობდა. ჰენრიმ უხალისოდ გაახილა თვალი, დარწმუნებულმა, რომ მხოლოდ ხუთი წუთი ეძინა, ხელ-ფეხი ტყვიასავით დამძიმებოდა.

– ჰენრი!

– აქ ვარ.

მარცხენა ფეხი ექავებოდა, პირის ღრუც, წყეული ბაირუსი ტუჩებზე მოსდებოდა. ჰენრიმ ხელი მოისვა და გაოცებულმა აღმოაჩინა,



რომ სოკო ძალიან ადვილად, მზესუმზირის ჩენჩოსავით სცილდებოდა.

– მომისმინე. და წინ გაიხედე. შეგიძლია?

ჰენრიმ მოჩვენებასავით თეთრ გზას გახედა. ოუენმა შნო-ჩატ-ი გზის პირას გააჩერა და ფარები გამორთო. ცოტა მოშორებით, სიბნელეში, ხმები ისმოდა. ვილაცას, ალბათ, ბანაკი გაეშალა. ჰენრი გონებით იქით გაემართა. ოთხი ახალგაზრდა სამხედრო იყო, რიგითები...

„ცისფერი ჯგუფიდან, – წაიჩურჩულა ოუენმა, – „ცისფერ ჯგუფს“ გადავაწყდით“.

ოთხი ახალგაზრდა რიგითი „ცისფერი ჯგუფიდან“, რომლებიც შიშს არ იმჩნევდნენ, აქაოდა, მაგარი ბიჭები ვართო... ხმები სიბნელეში. ხმების ნაპერწკლები სიბნელეში...

ჰენრიმ აღმოაჩინა, რომ ყველაფრის დანახვა შეეძლო, მაგრამ ბუნდოვნად. ცხადია, თოვლის გამო: ყვითლად მოციმციმე შუქი მოსახვევს ანათებდა. ხელსაწყოების პანელზე პიცის დასადები, ლანგრად გადაქცეული მუყაო ეგდო, რომელზეც რამდენიმე ნაჭერი ყველი, კრეკერი და შვეიცარიული სამხედრო ჯაყვა დაედოთ. დანა ერთ-ერთ ყმაწვილს, სახელად სმიტის ეკუთვნოდა. ყველანი რიგრიგობით ჭრიდნენ ყველს. რაც უფრო დიდხანს უყურებდა ჰენრი, მით უკეთ ხედავდა. მეტიც – თავბრუდამხვევ სიღრმეებში ისე თავისუფლად შედიოდა, თითქოს ფიზიკური სამყარო სამგანზომილებიანი კი აღარ იყო, არამედ ოთხ თუ ხუთგანზომილებიანი. ეს ადვილად აინსნებოდა: იგი არა ერთი, არამედ ერთდროულად ოთხი წყვილი თვალით ხედავდა. ახალგაზრდები საცოდავად მობუზულიყვნენ...

„ჰამერია! – თქვა კმაყოფილმა ოუენმა, – გასაშტერებელი „ჰამერი“! მომატებული გამავლობის! თოვლშიც თავისუფლად დადის! სწორედ ისაა, რაც ჩვენ გვინდა!“

ჯარისკაცები ერთმანეთთან საკმაოდ ახლოს ისხდნენ, მაგრამ ოთხივე, მაინც, სხვადასხვა ადგილას იმყოფებოდა. სამყაროს ოთხი

სხვადასხვა წერტილიდან შესცქეროდნენ, მხედველობაც განსხვავებული ჰქონდათ – არწივისებური მზერიდან (დენინა მეიბრუკიდან, ნიუ-იორკის შტატიდან) – საშუალომდე, მაგრამ ჰენრის ტვინი, როგორც, ახერხებდა მათ გადამუშავებას, ერთდროულად ახდენდა ყველას შეფასებას, თითქოს ფირზე გამოსახულ უძრავ კადრებს აცოცხლებდა. ოღონდ ისე არა, როგორც კინოში – ეს ნაკლებად საიმედო სამგანზომილებიანი გამოსახულება როდი იყო, ხედვის სრულიად ახალი ხერხი გახლდათ, ისეთი, რომელიც აზროვნების სულიად განსხვავებულ მეთოდს დაუდებდა სათავეს.

თუ ეს ნაგავი კიდევ უფრო გავრცელდა, – გაიფიქრა შეშინებულმა და საშინლად აღგზნებულმა ჰენრიმ, – თუ გავრცელდა...

უეცრად ოუენისგან მუჯღუგუნი მოხვდა.

– იქნებ, ლექცია უფრო შესაფერის დროს წაიკითხო? – ურჩია მან, – აჯობებს, იქით გაიხედო, გზის მეორე მხარეს.

ჰენრი ასეც მოიქცა, თან თავისი უნიკალური გაოთხმაგებული მზერით ტკბებოდა და გვიან მოისაზრა, რომ არა მარტო უყურებდა, არამედ ოთხივეს თვალები გაეერთიანებინა, რათა უკეთ დაენახა გზის შორეული ბოლო. იქაც ბევრი შუქი ციმციმებდა.

– საკონტროლო-გამშვები პუნქტია, – ჩაიბურტყუნა ოუენმა, – კურცს ასე უყვარს თავის დაზღვევა. გზა ორივე მხრიდან დაბლოკილია, გადაადგილება მხოლოდ საშვებით ხდება. „ჰამერი“ მჭირდება. ასეთ ქარიშხალში უკეთესს ვერაფერს ინატრებს კაცი, მაგრამ მეორე მხარეს მყოფი ბიჭების აფორიაქება არ მინდა. შევძლებთ ამის გაკეთებას?

ჰენრიმ კვლავ გამოსცადა ახალგაზრდა ჯარისკაცების მზერა, მათი თვალის კაკლები აამოძრავა და აღმოაჩინა, რომ თუ ისინი ერთსა და იმავე საგანს არ უყურებდნენ, ოთხ-ხუთგანზომილებიანი, ღვთაებრივი მხედველობის შეგრძნება სადღაც ქრებოდა და მის ადგილას გულის ამრევი, გაფანტული პერსპექტივა რჩებოდა, მენტალური

პროცესორები აღარ მუშაობდა. თუმცა, იგი ამოძრავებდა მათი თვალების კაკლებს, ძალიან ენერგიულად არა, მაგრამ...

„ვფიქრობ, შევძლებ, თუ ერთად ვიმოქმედებთ, – მიუგო ჰენრიმ, – ახლოს მივიდეთ. ხმამაღლა აღარ ილაპარაკო. მხოლოდ გონებით დამიკავშირდი“.

მოულოდნელად, ჰენრის თავი რაღაც ახლით შეივსო. მზერა კვლავ დაეწმინდა, პერსპექტივა ისეთი ღრმა აღარ იყო. მხოლოდ ორი წყვილი თვალიღა დარჩა: მისი და ოუენის.

ოუენმა ყველგანმავალი პირველ სიჩქარეში ჩააგდო და წინ გამორთული ფარებით დაიძრა. ძრავის ხმადაბალ გუგუნს ქარის ზუზუნი ახშობდა. მიახლოებასთან ერთად, ჰენრი „ჰამერში“ მსხდომთა გონებაზე კონტროლს აძლიერებდა.

„ბიჭოს! ..“ – თქვა სუნთქვააჩქარებულმა ჰენრიმ ოდნავი ღიმილით.

„რა არის? რა მოხდა?“

„შენზე ვამბობ – ეს ჯადოსნურ, მფრინავ ხალიჩას ჰგავს. ღმერთო ჩემო, როგორი ძლიერი ყოფილხარ“.

„ასე გგონია? ვნახოთ, როგორ აჭიკჭიკდები, როდესაც ჯოუნსის შეხვედები“.

ოუენმა შნო-ჩატ-ი დაბალი გორაკის ძირში გააჩერა, მის იქით გზატკეცილი იყო, სამხრეთ პანდუსის ზედა ნაწილში გაჩერებულ „ჰამერში“ მსხდომი ბერნი, დეინა, ტომი და სმიტი კი, იმპროვიზებულ ლანგარზე დაყრილ ყველსა და კრეკერებს მიირთმევდნენ. ეს ახალგაზრდები, ბაირუსი ჯერ რომ არ შეხებოდათ, არც კი ეჭვობდნენ, რომ მათ ვიღაც უთვალთვალებდა.

„მზად ხარ?“ – იკითხა ჰენრიმ.

„მგონი, – ჰენრის თავში მოთავსებული მეორე პიროვნება, რომელსაც წარბიც რომ შეუხრია, კურცი და მისმა ბიჭები რომ ესროდნენ, ახლა ნერვიულობდა, – სარდლობა შენ იკისრე, ჰენრი. მე მხოლოდ შემსრულებელი ვარ“.

„ვიწყებთ“.

შემდგომ მოქმედებებს ჰენრი ინსტინქტურად აკეთებდა. მან „ჰამერის“ ოთხეული სიკვდილითა და ნგრევით კი არ დააშინა, არამედ კურცად გარდაიქმნა, რისთვისაც ურცხვად ისარგებლა ოუენ ანდერჰილის ენერგიით, რაც იმ მომენტში მას უფრო მეტი ჰქონდა. თან წესდებისა და მეთაურის უფლება-მოვალეობებზე მისი ზედმიწევნითი ცოდნაც გამოიყენა. ამან ერთ გამოუთქმელი სიამოვნება მიანიჭა. და შვებაც, სხვათა შორის. ერთია სხვების თვალების ამოძრავება, და სულ სხვაა მათი გონების სრულად დამორჩილება. არადა, ისინი ბაირუსით არ იყვნენ დაინფიცირებულები და ამგვარი ზემოქმედებისადმი იმუნიტეტი უნდა ჰქონოდათ. მაღლობა ღმერთს, რომ ასე არ აღმოჩნდა.

„ბიჭებო, გორაკის გადაღმა, თქვენგან აღმოსავლეთით შნო-ჩატი დგას, – განაცხადა „კურცმა“, – ახლავე ბაზაზე უნდა გადაიყვანოთ, დაუყოვნებლივ. და არავითარი შეკითხვა თუ შენიშვნა არ გამაგონოთ. იჩქარეთ. თქვენს ახლანდელ ტრანსპორტთან შედარებით, ცოტათი ვიწრო მოგერვენებათ, მაგრამ არა უშავს, ჩაეტევით, დიდება უფალს. გაინძერით, ბიჭებო, ღმერთს უყვარხართ“.

ჰენრიმ დაინახა, როგორ ჩამოხტნენ ისინი თოვლში ერთიმეორის მიყოლებით. მშვიდი, გულგრილი სახეებითა და უსიცოცხლო თვალებით. იგი გადმოსვლას აპირებდა, როდესაც შენიშნა, რომ ოუენი უძრავად იჯდა, მხოლოდ ტუჩებს ამოძრავებდა და სიტყვებს აწყობდა: „გაინძერით, ბიჭებო, ღმერთს უყვარხართ“.

„ოუენ! წამოდი!“

ოუენმა დაბნეულად მიიხედ-მოიხედა, თავი დააქნია, მის მხარეს ჩამოფარებული ბრეზენტი გასწია და მანქანიდან გადმოხტა.

#### 4

ჰენრი წაბორძიკდა, მუხლებზე დაეცა, წამოდგა და ფრთხილად ჩააცქერდა ჩამოწოლილ წყვილს. ცოტალა რჩებოდა, ღმერთმანი,

სულ ცოტა, მაგრამ ამ ნამქერებში ოც ფუტსაც ველარ გაივლიდა, არათუ ას ორმოცდაათს. ეგმენი სულ წინ და წინ მიდიოდა, – გაიფიქრა მან, – მე გავაკეთე ეს. ცხადია, ეს პასუხია. საშინლად დავიქანცე და ჯოჯოხეთში მოვხვდი. ეგმენი ჯოჯო“...

ოუენმა ხელი შეაშველა... არა მარტო ხელი. იგი ჰენრის ენერჯიასაც აძლევდა.

„გმაღლობთ“...

„მაღლობას მერე მეტყვი. ძილითაც მოგვიანებით დაიძინებ. ახლა კი რაზმს თვალი არ მოაცილო“.

მაგრამ ეს რაზმი აღარ იყო, ესენი იყვნენ მხოლოდ ბერნი, დეინა, ტომი და სმიტი, რომლებიც ერთად მიაბიჯებდნენ თოვლში – კომბინებონებსა და კაპიუშონიან ქურთუკებში გამოწყობილი მღუმარე მთვარეულები. ისინი აღმოსავლეთისკენ მიემართებოდნენ, სუონი-ფონდროუდისკენ, სადაც შნო-ჩატ-ი იდგა. ოუენსა და ჰენრის სხვა გზა ჰქონდათ – დასავლეთისკენ, მიტოვებული „ჰამერისკენ“. ხელსაწყოების დაფაზე ყველი და კრეკერები ეყარა. ეს რომ გააცნობიერა, ჰენრის პირზე ნერწყვი მოადგა.

„ჰამერი“ ზუსტად კურსის მიხედვით იდგა. ისინი მას ფარების აუნთებლად, პირველი სიჩქარით წაიყვანდნენ, წყნარად, ჩუმად, გვერდს აუვლიდნენ საპირისპირო მხრიდან წამოსულ ყვითელ ნათებსა და თუ ბედი გაუღიმებდათ, ჩრდილოეთის საგუშაგოზე მდგარი ბიჭები მათ წასვლას ვერც კი გაიგებდნენ.

„თუ შეგვამჩნევენ, შეძლებ, რომ გადაავიწყო? – ჰკითხა ოუენმა, – ისე მოაწყო... არ ვიცი... რომ ამნეზია დაემართოთ?“

ჰენრის ეჭვი თითქმის არ ეპარებოდა, რომ შეძლებდა.

„ოუენ“.

„რა?“

„თუ გამოვძვრებით, ეს ყველაფერს შეცვლის. ყველაფერს“.

პაუზა. ოუენი ნათქვამს იაზრებდა. ჰენრი იმ ძალაზე არ საუბრობდა, რომელიც კურცის ბოსებისთვის – ქვეყნის სათავეში მდგომი

მაღალი იერარქიისთვის ჩვეულებრივი მონეტა იყო. იგი ადამიანის გონების შესაძლებლობებს გულისხმობდა, სხვისი აზრების საცოდავ კითხვას გაცილებით რომ აღემატებოდა.

„ვიცი“, – როგორც იქნა, თქვა მან.

## 5

ისინი „ჰამერში“ ჩასხდნენ და სამხრეთისკენ გაემართნენ. სამხრეთისკენ, თოვლსა და ქარბუქში. ჰენრი დევლინი ჯერაც კრეკერებსა და ყველს ღეჭავდა, როდესაც დაღლილობამ თავისი გაიტანა და მის გადანურებულ გონებაში შუქი ჩააქრო.

ასეც დაეძინა – პირზე ნამცეცებით.

და სიზმარში ჯოზი რინკენჰაუერი ნახა.

## 6

ხანძრის დაწყებიდან ნახევარი საათის შემდეგ ბებერი რეჯი გოსლინის ბოსლიდან მხოლოდ მრგვალი მბუჟტავი ლაქა დარჩა, როგორც დრაკონის თვალი გამდნარი თოვლისგან გაკეთებულ ფოსოში. ტყიდან, სუონიფონდროუდის მხრიდან, აღმოსავლეთის მიმართულებით შაშხანების სროლის ხმა ისმოდა. თავიდან – ხშირად, შემდეგ სულ უფრო იშვიათად და ჩუმად: რაზმი, სახელწოდებით „იმპერიალის ხეობა“ (ამიერიდან – „იმპერიალის ხეობა“ კეიტ გალაჰერის მეთაურობით), გაქცეულებზე ნადირობდა. გაქცეულები გარეული იხვების როლს ასრულებდნენ და მათგან ცოტა თუ გადარჩებოდა. ცხადია, იღბლიანები აუცილებლად მოუყვებოდნენ თავიანთ სევდიან თავგადასავალს აღშფოთებულ საზოგადოებას და ვინ იცის, რა ელოდათ ახლანდელ მამაც მონადირეებს, მაგრამ ამაზე წუხილს ხვალაც მოასწრებდნენ.

სანამ ეს ნადირობა მიმდინარეობდა, – და სანამ მოლაღატე ოუენ ანდერჰილი სულ უფრო სცილდებოდა მათ, – კურცი და ფრედი ჯონსონი სამეთაურო პოსტზე იდგნენ (ოლონდ, ჯონსონის აზრით, იგი

ჩვეულებრივ „ვინებაგოდ“ ქცეულიყო, რადგან მისი ძლევამოსილება და მნიშვნელოვნება აღარსად ჩანდა) და სათამაშო კარტს ქუდში ისროდნენ.

ტელეპათიის უნარს მოკლებული კურცი კვლავაც ზუსტად გრძნობდა ხელქვეითთა განწყობას – იმას, რომ მის განკარგულებაში მხოლოდ ერთი მებრძოლი დარჩენილიყო, მნიშვნელობა არ ჰქონდა. მან ფრედის შეხედა:

- დინჯად იჩქარე, მეგობარო. ეს წესი არასდროს მოძველდება.
- დიახ, ბოს, – მიუგო ფრედიმ, რომელსაც დიდი ენთუზიაზმი არ ეტყობოდა.

კურცმა ყვავის ორიანი ისროლა. იგი ჰაერში გაფრთხილდა და კეპში ჩაეშვა. სიამოვნებისგან დაიკრუტუნა და მორიგი კარტის სატყორცნად მოემზადა. ამ დროს კარზე დააკაკუნეს. ფრედიმ იქით შეტრიალება დააპირა, მაგრამ კურცის მრისხანე მზერას წააწყდა და მთელი ყურადღება კვლავ კარტზე გადაიტანა. ეს თითქოს თანაბრად მიფრინავდა, მაგრამ კეპის წინაფრაზე დაეცა. კურცმა რალაც ჩაიბუზღუნა და თავი შემოსასვლელისკენ გაიქნია. ფრედიმ გულში ღმერთს მადლობა შესწირა და კარის გასაღებად გაემართა.

ზედა საფეხურზე ჯოსლინ მაკევიო იდგა, „იმპერიალის ხეობის“ წევრი ორი ქალიდან ერთ-ერთი. რბილი, სოფლური კილო მიანიშნებდა, რომ ტენესიდან უნდა ყოფილიყო, სამაგიეროდ, მოკლედ, ბიჭურად შეკრეჭილი ქერა თმის ქვეშ სახე ქვისგან გამოკვეთილს მიუგავდა. წესდებით გაუთვალისწინებელი ისრაელის წარმოების ავტომატი მოხდენილად ეჭირა. ფრედი ვერაფრით მიხვდა, სად იშოვა ქალმა ის იარაღი, ბოლოს კი ხელი ჩაიქნია – უკანასკნელი საათ-ნახევრის განმავლობაში ბევრმა რამემ დაკარგა მნიშვნელობა.

- ჯოს, – შესძახა ფრედიმ, – აქ რას აკეთებ, ცუდო გოგო?
- ბრძანების შესაბამისად, რიპლით დაავადებული ორი ადამიანი მოვიყვანე.

ტყიდან კვლავ გაისმა სროლის ხმა და ფრედიმ შეამჩნია, რომ

ქალმა მზერა იქით გააპარა. როგორც ჩანს, სურდა, დავალების შესრულების შესახებ მოეხსენებინა და იქ, ტყეში დაბრუნებულიყო, თამაშის დასრულებამდე სროლით გული ეჯერა. ფრედი ამას შესანიშნავად მიხვდა.

– აქ მოიყვანე, ლამაზო, – ბრძანა კურცმა. იგი კვლავაც ძირს დაგდებულ კეპთან იდგა (იატაკზე რამდენიმე ადგილას მეღროუზის, მზარეულის მესამე თანაშემწის სისხლის კვალი შემორჩენილიყო), მაგრამ თვალებს უკვე მტაცებელივით აკვესებდა, – ვნახოთ, ვინ გამოძებნე.

ჯოსლინმა ავტომატი გაიქნია. ქვემოთ, კიბის საფეხურებთან, მაკაცის ხმამ ჩაიბურტყუნა:

– გაინძერით, თქვენი დედაც! .. და ორჯერ ნუ გამამეორებინებთ.

პირველი ტყვე მაღალი და ძალზე შავგვრემანი აღმოჩნდა. ლოყასა და კისერზე რიპლით ამოვსებული იარები მოუჩანდა. წარბებს ზემოთ ბარდებს ამოეყარა. ფრედის მისი სახე ეცნო, მაგრამ სახელი ვერ გაიხსენა. თუმცა ეჭვი არ ეპარებოდა, რომ მოხუცს ნამდვილად ემახსოვრებოდა. მისი აზრით, მან თავისი ყველა ხელქვეითის გვარი იცოდა. ცოცხლებისაც და მკვდრებისაც.

– კემბრი! – შესძანა კურცმა და თვალები კიდევ უფრო დააკვესა, შემდეგ კარტი კეპში ჩაყარა და ხელის გაწვდენა დააპირა, მაგრამ გადაიფიქრა და მხოლოდ სამხედრო წესით მიესალმა. პირქუშმა და ოდნავ დაბნეულმა ჯინ კემბრიმ არაფერი უპასუხა, – კეთილი იყოს შენი მობრძანება მართლმსაჯულების ამერიკულ ლიგაში.

– ტყეში იმ პატიმრებთან ერთად გარბოდა, რომლებსაც გუშაგად მივუჩინეთ, – თქვა ჯოსლინ მაკევიმ. სახე კვლავაც გულგრილი ჰქონდა, მაგრამ ხმაში ზიზღი შერეოდა.

– მერე რა? – იკითხა კემბრიმ, – თქვენ ისედაც აპირებდით ჩემს მოკვლას. ყველას მოკვლას აპირებდით. ტყუილები არ დაიწყით. მე თქვენს აზრებს ვკითხულობ.

კურცი ოდნავაც არ შეცბუნებულა. მან ხელები მოიფშვნიტა და



კემბრის მეგობრულად მიაჩერდა.

– თუ სამუშაოს კეთილსინდისიერად შეასრულებ, იქნებ გადავიფიქრო კიდევ, მეგობარო. გული იმისთვისაა შექმნილი, რომ გაიბზაროს და გატყდეს, გონება კი – ნაჩქარევი გადაწყვეტილებების შესაცვლელად, მადლობა უფალს. კიდევ ვინ მოიყვანე, ჯოს?

ფრედიმ ბორძიკით მომავალ ფიგურას გაოცებით შეხედა. მერე კი სახე გაებადრა. მისი მოკრძალებული აზრით, რიპლი უკეთეს ობიექტს ვერც შეარჩევდა. თავიდანვე ვერავინ იტანდა ამ ბოზიშვილს.

– სერ... ბოს... არ მესმის, აქ რატომ ვარ... ბრძანების თანახმად, გაქცეულებს მივდევი, როდესაც ამ... ამ... ბოლიში მომითხოვია, თავის მომაბეზრებელმა ბოზმა აქ მომათრია...

– სხვებთან ერთად გარბოდა, – მოწყენილი ხმით აღნიშნა მაკევიმი, – ამასთან საშინლად არის დაინფიცირებული.

– ტყუილია! – აღშფოთება ვერ დამალა კარში მდგომმა კაცმა, – აბსოლუტური ტყუილი! სრულიად სუფთა ვარ. ასი პროცენტით...

მაკევიმი დაუდევრად მოხადა ტყვეს კეპი, რომელსაც გამეჩხერებული თმა შესქელებოდა და წითელი ფერი დასდებოდა.

– ახლავე ყველაფერს აგიხსნით, სერ, – ჩაიბუტბუტა არჩი პერლმუტერმა, – საქმე ისაა, რომ... მე...

მან ლაპარაკის უნარი, როგორც ჩანს, საბოლოოდ დაკარგა. არჩის დანახვაზე კურცს სახე გაუნათდა და საჩქაროდ ნილაბი გაიკეთა, რამაც მის მამობრივ ღიმილს იმ მანიაკის პირქუში გამომეტყველება შეურია, ბავშვის მოტყუებას მადის აღმძვრელი ნამცხვრით რომ ცდილობს.

– ყველაფერი კარგად იქნება, პერლი, – თქვა მან, – ჩვენ უნდა გავემგზავროთ. სულ ესაა. ერთ ტიპს მოვძებნით, რომელსაც კარგად იცნობ...

– ოუენ ანდერჰილს, – ჩაიჩურჩულა პერლმუტერმა.

– სწორია, რიგითო, – თქვა კურცმა და მაკევიმის მიუბრუნდა: – ჯარისკაცს მისი პლანშეტი მოუტანეთ, მაკევიო. დარწმუნებული

ვარ, თავს მაშინვე უკეთ იგრძნობს. შემდეგ კი ნადირობა განაგრძეთ. ვხედავ, რომ ამას მოუთმენლად ელით.

– დიახ, ბოს.

– მაგრამ ჯერ ამას შეხედეთ... ჩვეულებრივი ფოკუსია, რომელიც კანზასში ვისწავლე.

კურცმა დასტა აიღო. მარჯვედ გაწელა, ისევ შეაერთა და მალა აისროლა. კარიდან შემოვარდნილმა ქარმა კარტი სხვადასხვა მხარეს გაფანტა. მხოლოდ ერთი მათგანი დაეცა ნახატით ამოტრიალებული. და ეს ყვავის ტუზი იყო.

## 7

მისტერ გრეიმ მენიუ აიღო, კერძების ჩამონათვალს გადახედა – ძეხვის პური, მოთუშული ბოსტნეული, შემწვარი წიწილა, შოკოლადით მოჭიქული ტორტი – და ინტერესით და ოდნავ გაოცებით ასწია თავი. ჯოუნსი მიხვდა, რომ მისტერ გრეიმ არათუ არ იცოდა, როგორი გემო ჰქონდა ამ კერძებს, თვით გემოს შესახებაც არაფერი სმენოდა. ან საიდან უნდა სცოდნოდა? ბოლოს და ბოლოს, იგი ხომ მხოლოდ სოკო იყო ინტელექტის მაღალი კოეფიციენტით.

გამოჩნდა ოფიციანტი ქალი, რომელსაც თავზე ღია ფერფლისფერი თმის უშველებელი ბულული ედო. მკერდზე მიმაგრებულ ფირფიტაზე ეწერა: „კეთილი იყოს თქვენი მობრძანება „დაიზარტსში“, მე თქვენი ოფიციანტი დარლინი ვარ“.

– გამარჯობა, საყვარელო, რა მოგართვა?

– ჩახლილი ერბოკვერცხი ბეკონით. ოდნავ შებრაწული.

– ტოსტი?

– ნიბლები თუ გაქვთ?

ოფიციანტმა წარბები ასწია და კლიენტს ბლოკნოტის ზემოდან დააცქერდა. შორიანლოს, დახლთან, საპატრულო პოლიციის თანამშრომელი იჯდა, მადისაღმძვრელ სენდვიჩს შეექცეოდა და მზარეულს ესაუბრებოდა.

– მაპატიეთ... მინდოდა მეთქვა, ბიბლინები.

წარბები კიდევ უფრო აიწკიპა. ქალს შუბლზე თითქოს ვიტრინა-ში დაყენებული წითელი ნენონის ასოებით გამოუნათდა შეკითხვა: ეს ტიპი ენაბლუა თუ მასხრად მიგდებს?

ოფისის ფანჯარასთან მდგარ მოლიმარ ჯოუნსის, როგორც იქნა, გული მოუღბა.

– ბლინები, – შვებით თქვა მისტერ გრეიმ.

– აჰა. მეც ეს ვიფიქრე. ყავა?

– დიახ, თუ შეიძლება.

ქალმა ბლოკნოტი დახურა და შეტრიალდა. გაცოფებული მისტერ გრეი დაუყოვნებლივ ოფისის კართან გაჩნდა.

„ეს როგორ შეძელი? – იკითხა მან, – აქედან ეს როგორ მოა ხერხე?“

ამ სიტყვებს კარზე გაშმაგებული ბრახუნი მოჰყვა. ჯოუნსი მიხვდა, რომ მისტერ გრეი მხოლოდ გაბრაზებული კი არა, შეშინებული, ძალიან შეშინებული იყო, რადგან თუ ჯოუნსის ამგვარი რამ შეეძლო, მისტერ გრეის მისიას საფრთხე ელოდა.

„არ ვიცი, – გულწრფელად აღიარა ჯოუნსიმ, – არ გეწყინოს. საუბრით ისიამოვნე. უბრალოდ, გაგეხუმრე. გაგათამაშე“.

„რატომ? – კვლავ იფეთქა მისტერ გრეიმ. იგი ისევ მარაგდებოდა ჯოუნსის ემოციების ჭიდან საკუთარი ნების საწინააღმდეგოდ, – ეს რატომ გააკეთე?“

„ჩათვალე, რომ სამაგიერო გადაგიხადე იმისთვის, ძილში ჩემს შებრაწვას რომ ცდილობდი“, – გაეცინა ჯოუნსის.

ამ დროს რესტორანში თითქმის არავინ იმყოფებოდა, ამიტომ დარლინმა შეკვეთა სწრაფად შეასრულა. ჯოუნსიმ ერთი პირობა იმის შემოწმებაც კი მოინდომა, მისტერ გრეის პირის დაუფლებას თუ შეძლებდა, რათა მისი აღშფოთება კიდევ გამოეწვია (მაგალითად, „დარლინ, შეიძლება, რომ თმაზე მოგქაჩო?“), მაგრამ გადაწყვიტა, რომ არ ღირდა.

დარლინმა მაგიდაზე თეფში დადო, მამაკაცს ეჭვით სავსე მზერა ესროლა და წავიდა. ასეთივე ეჭვმა შეიპყრო მისტერ გრეიც, რომელიც ჯოუნსის თვალებით დასჩერებოდა ხასხასა ყვითელ კვერცხის გულებსა და ბეკონის მუქ ნაჭერს (ოდნავ შებრაწულს კი არა, თითქმის დამწვარს „დაიზარტის“ საუკეთესო ტრადიციების გათვალისწინებით).

„მიდი! – თქვა ჯოუნსიმ. თავისი ოფისის ფანჯარასთან იდგა და ამ ყველაფერს მხიარული ცნობისმოყვარეობით აკვირდებოდა. იქნებ, ერბოკვერცხმა და ბეკონმა მისტერ გრეის ბოლო მოუღოს? ეს, ალბათ, არ მოხდება, მაგრამ ამ დამპალ გამტაცებელს მუცელი მაინც ასტკივდეს, – მიდი, მისტერ გრეი, მიირთვი. ცეცხლად და შხამად შეგერგოს“.

მისტერ გრეიმ ჯოუნსის ფაილებში ჩაიხედა, რათა დანა-ჩანგლის ხმარება ესწავლა, შემდეგ ჩანგლით ცილის ნაჭერი აიღო და ჯოუნსის პირთან მიიტანა.

ამას განსაცვიფრებელი, წარმოუდგენელი რამ მოჰყვა. მისტერ გრეი ყველაფერს პირში იყრიდა და მხოლოდ იმისთვის ჩერდებოდა, რომ ბლინები ნეკერჩხლის ხელოვნურ სიროფში ამოევლო. ყველაფერი მოეწონა, განსაკუთრებით ბეკონი.

„ხორცი! – ესმოდა ჯოუნსის მისი აღტაცებული, ოცდაათიანი წლების საშინელებათა ფილმების პერსონაჟების მსგავსი ხმა, – ხორცი! ხორცი! ხორცის გემო აქვს!“

სასაცილო იყო... იქნებ, არც იყო სასაცილო. ამას საშინელება უფრო ეთქმოდა. ახალშექმნილი ვამპირის ყვირილს ჰგავდა.

მისტერ გრეიმ მიიხედ-მოიხედა, დარწმუნდა, რომ არავინ უყურებდა (პატრულის თანამშრომელი ალუბლის ღვეზელს მიირთმევდა), თეფში ასწია და ზედ დარჩენილი ცხიმი ჯოუნსის ენით სწრაფად ალოკა. შემდეგ კი სიროფიანი თითები მიაყოლა.

ყავის დასასხმელად მისულმა დარლინმა ცარიელ თეფშებს მოჰკრა თვალი.

- კარგი დასაწყისია, - გაეცინა მას, - სისწრაფეში მედელი გეკუთვნით. კიდევ ხომ არ გნებავთ რაიმე?

- ბეკონი, - უთხრა მისტერ გრეიმ, ჯოუნსის ფაილებთან გადაამოწმა, რომ ისევ იაღლიში არ მოსვლოდა და დაამატა, - ორმაგი ულუფა.

ყელში გაგეჩხიროს, გულზე დაგადგეს, - გაიფიქრა ჯოუნსიმ, თუმცა ამის დიდი იმედი არ ჰქონდა.

- ღუმელს შენთება სჭირდება, - თქვა დარლინმა. ეს კომენტარი მისტერ გრეისთვის გაუგებარი დარჩა, მაგრამ ჯოუნსის ფაილებში გადამოწმება არც უცდია. ყავაში ორი პაკეტი შაქარი განსნა, ისევ მიიხედ-მოიხედა, ხომ არავინ მიყურებსო და მესამე პაკეტი პირდაპირ პირში ჩაიყარა. შემდეგ გამძღარ კატასავით თვალები დახუჭა და განცხრომას მიეცა.

„შეგიძლია, იმდენი მიირთვა, რამდენიც გსურს, თანაც ნებისმიერ დროს“, - შეატყობინა ჯოუნსიმ კარის მეორე მხრიდან. მან ახლა იცოდა, რას გრძნობდა სატანა, როდესაც იესო მთის წვერზე აიყვანა და აცდუნებდა, ჰპირდებოდა, დედამიწაზე არსებული ყველა ქალაქი შენი იქნებაო. ამაში არც ცუდი იყო რამე, არც - კარგი. და არაფერი პირადული. ეშმაკი მხოლოდ თავის სამუშაოს ასრულებდა, საქონლის გასაღებას ცდილობდა.

თუმცა... არა, ეს მართლაც კარგი იყო, რადგან მან მაინც მიაღწია მისტერ გრეიმდე. მის გონებაში შეაღწია. ცხადია, ბევრი ვერაფერი დააკლო, მაგრამ ღონივრად კი უპწკინა. აიძულა, სურვილის პატარა, სისხლიანი წვეთები გადმოსდენოდა. პირში ნერწყვი მოსვლოდა.

„დანებდი, - უკიჟინებდა ჯოუნსი, - გაბუნებრივდი და მრავალი წელი გაძლებ ჩემი გრძნობებით. მათ ჯერ არაფერი ემუქრება: მე ხომ ორმოცისაც არ ვარ“.

მისტერ გრეიმ არაფერი უპასუხა, დარწმუნდა, რომ არავინ უყურებდა, ყავაში ნეკერჩხლის ხელოვნური სიროფი ჩაასხა, გამოსცალა და მეორე ულუფა ბეკონის მოლოდინში სამზარეულოსკენ გაიხედა.

ჯოუნსიმ ამოიოხრა. ეს იმას ჰგავდა, მართლმორწმუნე მაჰმადიანთან ერთად მოულოდნელად ლას-ვეგასში რომ აღმოჩენილიყო.

რესტორნის შორეულ, თაღოვან ბოლოში ეწერა: „ღამის გასათევი და შხაპი მძლოლებისთვის“. პატარა დერეფანში რამდენიმე ტელეფონის აპარატი ეკიდა, რომლებთანაც მძლოლები იდგნენ და, სავარაუდოდ, თავიანთ ცოლებს ან ბოსებს უხსნიდნენ, რომ შეაგვიანდებოდათ, რადგან მენის შტატში ქარიშხალმა მოუსწროთ, ამჟამად, დერის სამხრეთით, „დაიზარტსში“ (ამ ადგილების მცოდნეთათვის – „გაზდაიზარტში“, – გაიფიქრა ჯოუნსიმ) იმყოფებოდნენ და სულ ცოტა, ხვალ შუადღემდე მოუწევდათ დარჩენა.

ჯოუნსიმ ფანჯარას ზურგი აქცია და ძველი, მაგრამ მისთვის კომფორტული ნივთებით დახვავებულ მაგიდას დახედა. აგერ ტელეფონიც, ცისფერი „ტრიმლაინი“. რა მოხდებოდა, ჰენრისთვის რომ დაერეკა? ნეტა ცოცხალი თუა? ჯოუნსი რატომღაც ფიქრობდა, რომ ცოცხალი იყო, წინააღმდეგ შემთხვევაში, მისი გარდაცვალების წუთს იგრძნობდა... ოთახში გაცილებით მეტი ჩრდილი დაგროვდებოდა. „ელვისმა საცხოვრებელი დატოვა და წავიდა, – ასე ბივერი ამბობდა ხოლმე, როდესაც გაზეთში მოთავსებული ნეკროლოგების სიაში ნაცნობ სახელს მოჰკრავდა თვალს, – რა უცნაურია ჩვენი ცხოვრება!“ ჯოუნსი არ ფიქრობდა, რომ ჰენრიმ საცხოვრებელი დატოვა და წავიდა. პირიქით, იქნებ „ბისზეც“ კი გამოსულიყო.

## 8

მისტერ გრეის მეორე ულუფა ბეკონი გულზე არ დასდგომია. ისე გადასანსლა, ნამცეციც არ დაუტოვებია, მაგრამ როდესაც მუცლის ქვედა ნაწილში სპაზმები იგრძნო, შეშინებული აღრიალდა:

„შენ მომწამლე!“

„მოდუნდით, – უთხრა ჯოუნსიმ, – თქვენ ახლა ერთი პატარა ოთახი გჭირდებათ, მეგობარო“.

„ოთახი? რას ამბ“...

სიტყვა შუაზე გაწყვიტა, რადგან კვლავ მუცლის გვრემა იგრძნო.

„რას ვგულისხმობ და იმას, რომ სასწრაფოდ პატარა ბიჭების ოთახში უნდა წახვიდეთ, – აუხსნა ჯოუნსიმ, – ღმერთო ჩემო, მას შემდეგ, რაც სამოციან წლებში ადამიანები გაიტაცეთ, ანატომიაში უკეთ უნდა ერკვეოდეთ. ნუთუ ვერაფერი ისწავლეთ?“

დარღინმა ქვითარი დაუტოვა. მისტერ გრეიმ იგი თვალებთან მიიტანა. „ძირითად თანხას თხუთმეტი პროცენტი დაუმატეთ. ეს პირადად ოფიციალტის გასამრჯელოა“.

„რამდენია თხუთმეტი პროცენტი?“

ჯოუნსიმ ამოიხვნეშა. მაშ, ესენი იყვნენ სამყაროს მბრძანებლები? უდიდესები და უსაშინლესები? შეუბრალებელი ვარსკვლავთმპყრობლები, რომლებმაც არც უნიტაზზე ჯდომა იცოდნენ და არც – გასამრჯელოს დათვლა?

მუცლის ტკივილმა ისევ წამოუარა, თანაც ისე, რომ მისტერ გრეიმ გააცუა. ყარდა, მაგრამ ეთერის სუნი არ ჰქონდა. მადლობა ღმერთს პატარ-პატარა სიამოვნებისთვის, – გაიფიქრა ჯოუნსიმ და მისტერ გრეის უბრძანა: „ჩეკი მაჩვენეთ“.

მისტერ გრეიმ ოფისის ფანჯარას მწვანე ქალღიმილი მიადო.

„დოლარ-ნახევარი აჩუქეთ, – უთხრა ჯოუნსიმ და როდესაც მისტერ გრეის ყოყმანი შეამჩნია, დაამატა, – კარგ რჩევას გაძ ლევთ. თუ მეტს მისცემთ, მფლანგველი ეგონებით, თუ ნაკლებს – წუწურაქი“.

მან იგრძნო, რომ მისტერ გრეიმ მის ფაილებში სიტყვა „წუწურაქი“ მნიშვნელობას ეძებდა. ცოტა ხნის შემდეგ მან უსიტყვოდ დადო მაგიდაზე დოლარი და ორმოცდაათი ცენტი, შვებით ამოისუნთქა და სალაროს მიმართულებით წავიდა, რომლის იქითაც მამაკაცთა ტუალეტი იყო.

პოლიციელს რომ ჩაუარა – ჯოუნსის აზრით, ის საეჭვოდ ნელა შეექცეოდა ღვეზელს – ჯოუნსიმ იგრძნო, რომ მისტერ გრეიმ (სულ

უფრო მეტად გააღამიანურებულმა) თანდათან პოლიციელის თავ-შიც შეაღწია და იქ ფათურს შეუდგა. ახლა ჯოუნსის სასიცოცხლო მნიშვნელობის სისტემებს მხოლოდ შავ-წითელი ღრუბელი წარმართავდა.

ჯოუნსიმ ელვისებურად სტაცა ხელი მაგიდაზე დადებულ ტელეფონს. წამით შეყვინდა – არ იცოდა, სწორად იქცეოდა თუ არა.

მხოლოდ 1-800-ჰენრი აკრიფე, – გაიფიქრა მან.

ცოტა ხანს არაფერი ისმოდა, შემდეგ კი სადღაც, სხვა სამყაროში, ტელეფონი აწკრიალდა.

## 9

– ეს პიტის იდეა იყო, – ჩაიბურტყუნა ჰენრიმ.

ოუენმა, რომელიც „ჰამერის“ (უზარმაზარი, ხმაურიანი, მაგრამ გიგანტური საბურავებით აღჭურვილი მანქანა ქარბუქში ისარივით მიქროდა) საჭესთან იჯდა, თავი მოაბრუნა. ჰენრის ეძინა. სათვალე ცხვირზე ჩამოსცურებოდა. თვალის კაკლების ამოძრავებისთანავე ბაირუსმოდებულ ქუთუთოებზე მსუბუქი ჭავლი გადაუვლიდა ხოლმე. ჰენრი სიზმარს ხედავდა. საინტერესოა, რას?

ოუენს რომ მოენდომებინა, ალბათ შეძლებდა ახალი ამხანაგის თავში შეღწევას და ყველაფრის გაგებას, მაგრამ არ სურდა. ცუდ საქციელად მიაჩნდა.

– პიტის იდეა იყო, – გაიმეორა ჰენრიმ, – პიტმა პირველმა მოჰკრა მას თვალი.

ჰენრიმ ისე საცოდავად ამოიოხრა, რომ ოუენს ლამის გული შეუღონდა. გადაწყვიტა, ჰენრის გონებასა და ფიქრებში არ ჩარეულიყო. დერიმდე მთელი საათი უნდა ევლოთ, მეტიც – თუ ქარი არ ჩადგებოდა. დაე, ცოტა გამოეძინა.

## 10

სკოლის შენობის უკან ფეხბურთის მოედანია, სადაც ოდესღაც



რიჩი გრენადლო ოსტატობით იწონებდა თავს, მაგრამ რიჩი უკვე ხუთი წელია, თინეიჯერი გმირის საფლავში წევს. ეს პატარა ქალაქის კიდევ ერთი ტრაგიკული საგზაო შემთხვევა იყო ჯეიმზ დინის<sup>184</sup> სულისკვეთებით. იგი სხვა გმირებმა შეცვალეს, მათაც მიიღეს თავიანთი წილი დაფნის გვირგვინი, გაიზარდნენ და გაუჩინარდნენ. საფეხბურთო სეზონის დაწყებამდე დიდი დროა. ჯერ გაზაფხულია და მინდორზე უამრავი შავთავიანი დიდრონი წითელი ჩიტი მოჩანს. მუტანტი ყვავები დასაკვეც სკამებზე სხედან, იცინიან და ერთმანეთს რალაცას ეყრანტალებიან, მაგრამ იმპროვიზებულ ტრიბუნაზე მჯდომ მისტერ ტრასკს, დირექტორს, ეს დიდად არ ანალვლებს. მას ხელში მიკროფონი უჭირავს და ადვილად ფარავს მათ ხმებს.

– უკანასკნელი შეტყობინება, სანამ გაგიშვებდეთ! – ხმამაღლა ამბობს იგი, – არ დავიწყებ იმის მტკიცებას, თუ რაოდენ მნიშვნელოვანია, ცერემონიის ბოლოს თქვენი ქუდები შეაგროვოთ; მრავალწლიანი გამოცდილებით ვიცი, ეს იგივეა, რაც კედელთან ლაპარაკი... – სიცილი, ტაში, მოწონების შეძახილი. – მაგრამ გაფრთხილებთ, დაუყოვნებლივ დაკეცეთ ისინი და საჭირო ადგილას მიიტანეთ, თორემ სანაცვლოდ ფულის გადახდა მოგიწევთ!

სტვენა და ბილწსიტყვაობა – ბივერ კლარენდონის ხმა ყველაზე უკეთ ისმის.

მისტერ ტრასკი ერთხელაც მოავლებს თვალს აუდიტორიას.

– ოთხმოცდაორი წლის გამოშვების ახალგაზრდა ქალბატონებო და ბატონებო, ვფიქრობ, მასწავლებელთა მთელი შემადგენლობის სახელით, უფლება მაქვს, გითხრათ, რომ ვამაყობ თქვენით. ამით რეპეტიცია დამთავრებულია, ასე რომ...

მისი უკანასკნელი სიტყვები ღრიალში იკარგება, დინამიკები უძლურია. წითელი ყვავები ნეილონის უხეში შრიალის თანხლებით წამოიშლებიან და სხვადასხვა მხარეს მიფრინავენ. ხვალ ისინი საბო-

---

<sup>184</sup> ამერიკელი კინომსახიობი, დაიღუპა ავტოკატასტროფაში.

ლოოდ დასცილდებიან ერთმანეთს, მაგრამ სამ ყვავს, რომელიც სიცილით მიემართება ავტოსადგომისკენ, სადაც ჰენრის მანქანა დგას, ეს ჯერ არ გაუცნობიერებია. ვერ მიმხვდარან, რომ ბავშვობის წლები რამდენიმე საათში დასრულდება. ჯერჯერობით ვერ მიმხვდარან... და იქნებ, ასე ჯობია კიდევ.

ჯოუნსი ჰენრის ქუდს გამოსტაცებს, თავისაზე ჩამოიფხატავს და ავტოსადგომისკენ გარბის.

– ეი, ვირო, მომეცი! – ყვირის ჰენრი და, თავის მხრივ, ბივერს მოხდის ქუდს. ეს უკანასკნელი აღშფოთებული კაკანებს და სიცილით მისდევს ჰენრის, სამივენი ცელქობენ, სხვა აღარაფერი ახსოვთ. წითელი მანტიები უფრიალებთ და ჯინსებზე ეტმასნებათ. ჯოუნსი თავს ორი ქუდით იწონებს; ფორები საფეთქლებზე სცემს, სასაცილო შესახედავია. ჰენრის ბივერის ქუდი ცალ ყურსა და შუბლზე ჩამოჰფხატავს. ბივერს ქარი უწეწავს გრძელ შავ თმას. პირიდან თავისი განუყრელი კბილსაჩიჩქნი მოუჩანს.

ჯოუნსი გარბის, დროდადრო უკან იყურება და ჰენრის აქებებს:

– მიდი, მისტერ კალათბურთო, მოუჩქარე, რა გოგოსავით დარბიხარ!

მოულოდნელად, იგი კინალამ პიტს ეჯახება, პიტი ავტოსადგომის ჩრდილოეთ შესასვლელთან გრილდება და განცხადებების დაფას ათვალთქმობს. პიტი, რომელიც ახლა გადავიდა გამოსაშვებ კლასში, ჯოუნსის ხელს სტაცებს, ტანგოს მოცეკვავე ქალივით გადააწვენს და ტუჩებში კოცნის. ჯოუნსის ორივე ქუდი სძვრება თავიდან და დაბნეულობისგან ყვირილს იწყებს.

– პედერასტო! – იძახის, პირს გაშმაგებით იწმენდს და... თვითონაც იცინის. პიტი უცნაური ტიპია – ზოგჯერ რამდენიმე კვირის განმავლობაში კაცი სიტყვას ვერ დააცდენინებს, წყნარადაა, ბუზს არავის აუფრენს, მაგრამ უცებ ისეთ რამეს გააკეთებს, რომ ყველა პირლიად რჩება. ჩვეულებრივ, ამგვარი გამოხდომები ორ კათხა ლუდს მოსდევს ხოლმე, მაგრამ დღევანდელი შემთხვევა გამონაკლისია.

– დიდი ხანია, ამაზე ვოცნებობდი, გარიელა, – სენტიმენტალურად ამბობს პიტი, – ახლა ხომ იცი ჩემი გრძნობების შესახებ!

– წყეულო პედერასტო! იცოდე, მოგკლავ, თუ სიფილისი გადმომდე!

ამ დროს ჰენრი მოირბენს, ძირიდან თავის ქუდს იღებს და ჯოუნსის თავში ურტყამს.

– ბალახში დაგისვრია, – ამბობს აღშფოთებული, – თუ ამის გამო ფულს გადამხდევინებენ, მარტო კოცნას არ გაკმარებ, გარიელა!

– ისეთ პირობას ნუ დადებ, რომელსაც ვერ შეასრულებ, შე ბლენძიავ! – იღრინება ჯოუნსი.

– მშვენიერი გარიელა! – საზეიმო ხმით იგერიებს ჰენრი.

მათ აქოშინებული ბივი უერთდება. კბილებში ისევ კბილსაჩიჩქნი გაურჭვია. იგი ჯოუნსის ქუდს იღებს, შიგნით იხედება და მთელი ავტოსადგომის გასაგონად ყვირის:

– აქ რალაც ლაქები მოჩანს! ჩემზე უკეთ არავინ იცის, ეს რა არის – ასეთებს ყოველ დილით ვნახულობ ზეწარზე.

ბივი ღრმად შეისუნთქავს და მინდვრიდან მიმავალი ყველა წითელმანტიიანი კურსდამთავრებულის გულის გასახარად გაჰყვირის:

– გარი ჯოუნსი ქუდში მასტურბირებს! ეი, ხომ გესმით, გარი ჯოუნსი ქუდში...

ჯოუნსი დაეძგერება და წააქცევს. ორივენი ასფალტზე კოტრილობენ წითელი ნეილონის ღრუბლებში. ქუდები სძვრებათ, მათ ჰენრი აიტაცებს, რათა უეჭველ განადგურებას გადაარჩინოს.

– ნუ მაწვები! – ქშინავს ბივერი, – არ გამსრისო, სულელო! დალახვროს ეშმაკმა, ბანანები! ღვთის გულისთვის...

– დადიტსი იცნობდა ამ გოგოს, – ამბობს პიტი, რომელიც კარგა ხანია გულგრილად აკვირდება მეგობრების ცელქობას. ხასიათზე ვერ არის (იგი, შესაძლოა, ერთადერთია, ვინც უდიდესი ცვლილებების მოახლოებას გრძნობს). კვლავ განცხადებების დაფას შესცქერის.

– ჩვენც. ის ყოველთვის დებილების აკადემიის ჭიშკართან იდგა.  
– გამარჯობა, დადი, როგორ ხარ, – წრიპინებს გოგოს ხმით. ეს საკმაოდ კარგად გამოსდის, დაცინვის გარეშე. დიდი ვერაფერი იმიტატორია, მაგრამ ჰენრი წამში ხვდება, ვისზეა საუბარი. ახსენდება გოგონა ფაფუკი ქერა თმით, დიდრონი თაფლისფერი თვალებით, მუდმივად გადატყავებული მუხლებითა და თეთრი პლასტიკატის ჩანთით, რომელშიც საუზმესთან ერთად, ბარბი და კენიცი ედო. მათ ბარბიკენს ეძახდა, თითქოს ერთი სათამაშო იყო.

ჯოუნსი და ბივიც ყველაფერს ხვდებიან, ჰენრიც თავს უქნევს. ეს იმ კავშირის გამო ხდება, მათ შორის რამდენიმე წლის წინ რომ დაამყარდა მათსა და დადიტს შორის. სახელს ვერ იხსენებენ, მხოლოდ ის ახსოვთ, რომ გოგონას ძალიან გრძელი და ძნელად წარმოსათქმელი გვარი ჰქონდა. თანაც მას დადიტსი უყვარდა და ყოველთვის დებილების აკადემიის ჭიშკართან ელოდებოდა.

გამოსაშვებ მანტიებში გამოწყობილი სამეული პიტს გვერდში ამოუდგება და განცხადებების დაფას შესცქერის.

იქ, როგორც ყოველთვის, უამრავი ქალაღია გაკრული – საცხოების გაყიდვა, მანქანების რეცხვა, ადგილობრივი როკჯგუფისთვის კანდიდატების შერჩევა, საზაფხულო სწავლა ფენსტერში, მოსწავლეების ხელით დაწერილი განცხადებები: ვიყიდი, გავყიდი, ვეძებ ბოსტონში წამყვანს, ვინმესთან ერთად ვიქირავებ ბინას პროვიდენსში.

ზედა კუთხეში კი ქერათმიანი (უკვე არა ფაფუკი, არამედ წვრილად დაწნული) მოლიმარი გოგონას ფოტოსურათია ფართოდ გახეული და ოდნავ გაოცებული თვალებით. პატარა აღარ ჰქვია. გარი განცვიფრებულია (უკვე მერამდენედ), თუ როგორ სწრაფად იზრდებიან ბავშვები (საკუთარი თავის ჩათვლით), მაგრამ ეს მუქი, დაბნეული თვალები არ შეცვლილა.

დაიკარგა – იუწყება წარწერა სურათის ქვეშ. უფრო ქვემოთ კი

წვრილი შრიფტით დამატებულია: ჯოზეტა რინკენჰაუერი. იგი უკანასკნელად სტროფორდ-პარკში, სოფთბოლის სათამაშო მოედანზე ნახეს 1982 წლის 7 ივნისს.

ტიქსტი გრძელდება, მაგრამ ჰენრი მის წაკითხვას არ აპირებს. ამის ნაცვლად იმაზე ფიქრობს, როგორი ალიაქოთი ატყდება დერიში, როდესაც ბავშვის დაკარგვის ამბავი გავრცელდება. დღეს რვა რიცხვია, მაშასადამე, გოგონა ერთი დღეა, არ ჩანს, ფოტოსურათი კი უკვე სადღაც მიუკუჭავთ, როგორც რაღაც მეორეხარისხოვანი და უმნიშვნელო. არც გაზეთში გამოუქვეყნებიათ. ჰენრიმ იცის, რადგან მოასწრო და წაიკითხა, უფრო სწორად, გადაათვალიერა, სანამ ბურ-ბუმელას რძეს აყოლებდა.

იქნებ ცნობა ადგილობრივი სიახლეების განყოფილებაშია ჩამარხული, – ფიქრობს იგი და თავში მაშინვე გაუელვებს, რომ საკვანძო სიტყვაა „ჩამარხული“. დერიში ასე ბევრ რამეს მარხავენ.

თუნდაც, დაკარგულ ბავშვებზე ვთქვათ. უკანასკნელი წლების განმავლობაში ბევრი გაუჩინარდა. ამის შესახებ ყველამ იცის. ტყუილუბრალოდ ხომ არ მოსვლიათ ეს აზრი ბიჭებს იმ დღეს, როცა დადიტს ქვევლს შეხვდნენ, მაგრამ უფროსები ამ თემაზე დუმილს ამჯობინებენ. თითქოს ყოველი მომდევნო დაკარგული ბავშვი ერთგვარი მსხვერპლია ამ მშვენიერ ადგილას ცხოვრების უფლების მოსაპოვებლად. ამ აზრთან ერთად, ჰენრის აღშფოთება ეუფლება, რაც თანდათან ჯაბნის მის იდიოტურ სიხარულს.

ისიც საყვარელი გოგო იყო... მისი ბარბიკენი... სასაცილო... დადიტსივით კეთილი. კარგად ახსოვს, როგორ მიაცილებდა მათი ოთხეული დადიტსს სკოლაში და როგორ ხშირად ელოდა მათ ჭიმკართან მუხლებგადატყავებული ჯოზი რინკენჰაუერი პლასტმასის დიდი ჩანთით, რომელზეც ეწერა: „გამარჯობა, დადიტს“.

ძალიან სიმპათიური გოგო იყო.

და არის კიდევ, – ფიქრობს ჰენრი, – იგი...

- იგი ცოცხალია, - მტკიცედ აცხადებს ბივერი, პირიდან დაღეჭილ კბილსაჩიჩქნს იღებს, ათვალეიერებს და ძირს აგდებს, - ცოცხალია, თანაც სადღაც აქ არის, ქალაქში. ხომ ასეა?

- ჰო, - თავს უქნევს პიტი და ფოტოსურათს თვალს არ აშორებს. ჰენრი ადვილად კითხულობს მის აზრებს, თითქმის საკუთარის მსგავსს: როგორ გაზრდილა. სწორედ ის ჯოზი, რომელიც სხვა, უფრო სამართლიან ცხოვრებაში, ალბათ, დუგ ქეველის მეგობარი გოგონა გახდებოდა.

- მაგრამ, ვფიქრობ, იგი... თქვენც იცით...

- ცუდ ღღეშია, - ამბობს ჯოუნსი. მას უკვე გაუხდია მანტია და ახლა გულმოდგინედ კეცავს.

- ის გაიჭედა, - თითქოს სძინავსო, ისე ბურტყუნებს პიტი და კვლავ სურათს შეჰყურებს, - ხაფანგშია, ოღონდ...

საჩვენებელ თითს საათის ქანქარასავით წინ და უკან ამოძრავებს: ტიკ-ტაკ, ტიკ-ტაკ.

- სად? - ჩურჩულებს ჰენრი, მაგრამ პიტი თავს აქნევს, ჯოუნსიც მას ჰბაძავს.

- მოდით, დადიტს ვკითხოთ, - ამბობს მოულოდნელად ბივერი. მიზებს კი ყველა ხვდება, რადგან დადიტსი ხაზს ხედავს. დადიტსი...

## 11

- ...ხაზს ხედავს! - შეჰყვირა მოულოდნელად ჰენრიმ, წამოჯდა, კინალამ თავი აარტყა „ჰამერის“ კაბინის ჭერს და ლამის გული გაუხეთქა ოუენს, რომელიც მთელი ამ დროის განმავლობაში საიმედოდ დაცულ, ყოველი მხრიდან დაფარულ მყუდრო ადგილას იჯდა, სადაც არავინ იყო მისი, ქარიშხლისა და უსასრულოდ ჩამწკრივებული ფარნების გარდა, რაც ერთადერთი მტკიცებულება იყო იმისა, რომ ისინი კვლავაც გზატკეცილზე იმყოფებოდნენ, - დადიტსი ხაზს ხედავს!

„ჰამერი“ შეხტა, ბუქსაობა დაიწყო და მოცურდა, მაგრამ ოუენმა

მოახერხა და ბოლო წამს მანქანა გაასწორა.

– ღმერთო ჩემო! – შესძახა მან, – წინასწარ გამაფრთხილე მაინც, რომ უნდა წამოვიაროს!

ჰენრიმ ხელისგულებით სახე მოისრისა, ღრმად ჩაისუნთქა და ნელა ამოისუნთქა.

– ვიცი, სად უნდა წავიდეთ და რა გავაკეთოთ...

– ეს უკვე კარგია...

– ...მაგრამ ჯერ ერთ ამბავს მოგიყვები, ყველაფერს რომ მიხვდე. ოუენმა ცერად გახედა.

– შენ თუ ხვდები ყველაფერს?

– ჯერ არა, მაგრამ – იმაზე მეტს, ვიდრე აქამდე ვხვდებოდი.

– დაიწყე. დერიმდე ერთი საათის სავალია. მოასწრებ?

ჰენრიმ გაიფიქრა, რომ დრო საკმარისზე მეტი იყო, მით უმეტეს, თუ ერთმანეთს გონებით დაუკავშირდებოდნენ. მან სულ თავიდან დაიწყო, იქიდან, საიდანაც, მისი აზრით, ეს ყველაფერი სათავეს იღებდა. არა რუხი კაცუნების შემოსევით, არა ბაირუსითა და სინდიოფალებით, არამედ ოთხი ბიჭით, რომელიც გამოსაშვები საღამოს კაბაწამოხდილი დედოფლის სურათის ნახვაზე ოცნებობდა და სხვა არაფერზე. ოუენი საჭეს ატრიალებდა, თუმცა თავი ერთმანეთთან დაკავშირებული უამრავი გამოსახულებით გავსებოდა, უფრო – როგორც სიზმარში, ვიდრე კინოში. დადიტსი, პირველი გამგზავრება „კედელში გაკეთებულ ხვრელში“, ბივერი, რომელიც თოვლში არწყევდა, დილაობით სკოლაში სიარული, თამაშის დადიტსისეული ვერსია: ისინი კარტებს აწყობდნენ, დადიტსი კი პალოებს დებდა; დადიტსის წაყვანა სანტა კლაუსის სანახავად... ძალიან მაგარი იყო! გამოსაშვები საღამოს წინაღულეს განცხადებების დაფაზე ჯოჯი რინკენჰაუერის ფოტოსურათის აღმოჩენა. ოუენმა დაინახა, როგორ მიუახლოვდნენ ისინი ჰენრის მანქანით დადიტსის სახლს მეიპლეინზე, – მანტიები და ქუდები უკან ერთმანეთზე იდო, – შემდეგ მისტერ

და მისის ქვევლებს მიესალმნენ, რომლებიც სასტუმრო ოთახში ის-  
ხდნენ კომპანია „დერიგაზის“ ემბლემის მქონე კომბინებონში გამოწ-  
ყობილ, გაფითრებულ მამაკაცთან და ატირებულ ქალთან ერთად.  
რობერტა ქვევლი მხრებზე მოხვეოდა ელენ რინკენჰაუერს და არ-  
წმუნებდა, რომ ყველაფერი კარგად იქნებოდა – ღმერთი არ დაუშ-  
ვებდა, საყვარელ პატარა ჯოზის რაიმე შემთხვეოდა.

მართლაც მაგრები ყოფილან, – ფიქრობს აღტაცებული ოუენი, –  
ღმერთო ჩემო, აი, ეს მესმის! ნუთუ ასეთი რამ შესაძლებელია?

ქვევლები შემოსულებს ყურადღებას თითქმის არ აქცევენ: მეიპ-  
ლეინზე ოთხივე შინაურად მიაჩნიათ, რინკენჰაუერები კი თავზარ-  
დაცემულნი არიან და მათ ვერ ამჩნევენ. რობერტას მიერ მომზადე-  
ბულ ყავას არც მიჰკარებიან. „ის თავის ოთახშია, ბიჭებო“, – ამბობს  
ელფი ქვევლი სევდიანი ღიმილით. დადიტის კალის ჯარისკაცებით  
თამაშობს (მთელი არმია ჰყავს), მაგრამ მათ დანახვაზე მაშინვე წა-  
მობტება. დადიტს შინ ფეხსაცმელი არასდროს აცვია – მხოლოდ  
ჰენრის მიერ დაბადების დღეზე ნაჩუქარი სასაცილო ბაჭიების ფორ-  
მის ფლოსტები, რომელიც ძალიან უყვარს და იმდენ ხანს ატარებს,  
სანამ არ დაიხვეა. მაგრამ ახლა ფეხსაცმელში გამოწყობილა. იგი  
მათ მოსვლას ელოდა და მიუხედავად იმისა, რომ ისევე გულკეთი-  
ლად იღიმება, როგორც ყოველთვის, თვალები დასერიოზულებია.

– ად ივივათ? – კითხულობს დადიტის („სად მივდივართ?“)

და...

– მაშ, თქვენ ყველანი ასეთები იყავით? – ჩაიჩურჩულა ოუენმა.  
მართალია, ჰენრიმ ერთხელ უკვე ახსენა რაღაც ამგვარი, მაგრამ  
ოუენს მაინც ვერ წარმოედგინა, რაზე საუბრობდა, – დღემდე ასეა?  
– იგი მის ლოყაზე ბაირუსის წვრილ ზოლს შეეხო.

– ჰო. არა. არ ვიცი. გაჩუმდი, ოუენ. აჯობებს, მოუსმინო.

და ოუენის თავი კვლავ გაივსო 1982 წლის სახეებით.



იმ დროისთვის, როცა ისინი სტროფორდ-პარკთან მიდიან, საათი უკვე ხუთის ნახევარს უჩვენებს. სოფტბოლის მოედანი ყვითელბლუზიანი გოგონებითაა სავსე. ყველას ერთნაირი ვარცხნილობა აქვს – თმის კუდი ბეისბოლის კეპების უკანა ჭრილში გაუძვრენიათ. უმრავლესობას კბილებზე ბრეკეტი უკეთია.

– ღმერთო ჩემო, არც კი იციან, რას აკეთებენ, – ამბობს პიტი და შესაძლოა, ასეც არის, სამაგიეროდ, რაც შეუძლიათ, მხიარულობენ. განსხვავებით ჰენრისგან, რომელსაც ცუდი წინათგრძნობა არ ასვენებს. უხარია კიდევ, რომ ჯოუნსიც მასავით გამოიყურება – დამფრთხალია და გაყურებული. თუ პიტისა და ბივერის წარმოსახვანულს უტოლდება, მას და ბებერ გარიელას ის საკმარისზე მეტი აქვთ. პიტისა და ბივისთვის ეს ყველაფერი თამაშია, როგორც ვუნდერკინდ დეტექტივებზე ფილმებსა და წიგნებში. ჰენრისთვის კი სულ სხვაა. თუ ჯობი რინკენჰაუერს ვერ მიაგნებენ, ეს, ცხადია, ცუდი იქნება (რადგან მათ ამის უნარი შესწევთ, მან ეს კარგად იცის), მაგრამ თუ მკვდარს იპოვიან...

– ბივ, – ამბობს იგი.

ბივი, რომელიც გატაცებით შესცქერის გოგონებს, ჰენრისკენ ტრიალდება:

– რა გინდა?

– როგორ ფიქრობ, ცოცხალია?

– მე... – ბივის ღიმილს შეშფოთება ცვლის – არ ვიცი, ძმაო. პიტ? მაგრამ პიტი უარის ნიშნად თავს აქნევს.

– იქ, სკოლაში, ვფიქრობდი, რომ ცოცხალი იყო... დალახვროს ეშმაკმა, მის ფოტოსურათს მხოლოდ ალაპარაკება აკლდა, მაგრამ ახლა...

იგი მხრებს იჩეჩს.

ჰენრი ჯოუნსის უყურებს, მაგრამ ისიც მაშინვე მხრებს იჩეჩს და ხელებს შლის:

– ვერაფერს ვიტყვი.

ახლა ჰენრი დადიტისკენ ტრიალდება, რომელიც მათ იქიდან შესცქერის, რასაც „ემი აალის“ უწოდებს – ვიწრო ნახევრად სფერული მუქი სათვალის სარკისებური შუშებიდან. ჰენრის დადიტის რეი უოლსტონს აგონებს ფილმიდან „ჩემი საყვარელი მარსელი“, მაგრამ ამას ხმამაღლა არასდროს ამბობს. ცდილობს, დადიტის თანდასწრებით არც იფიქროს ამაზე. დადს ბივერის ქუდი დაუხურავს – ძალიან მოსწონს ფორჩებზე სულის ბერვა.

დადიტს არჩევითი აღქმის უნარი არა აქვს: მისთვის ლოთი, რომელიც ნაგვის ურნებში ცარიელ ბოთლებს ეძებს, სოფტბოლის მოთამაშე გოგონები და ხიდან ხეზე მოხტუნავე ციყვები ერთნაირად საინტერესოა. სწორედ ამით არის იგი განსაკუთრებული. ამით გამოირჩევა სხვებისგან.

– დადიტს, – ეუბნება ჰენრი, – ის გოგო თუ გახსოვს, შენთან ერთად რომ დადიოდა აკადემიაში? ჯოზი ერქვა, ჯოზი რინკენჰაუერი.

დადიტის მას თავაზიანი ინტერესით უსმენს, მხოლოდ იმიტომ, რომ მეგობარი მიმართავს, თორემ ეს სახელი არაფერს ეუბნება. ანდა, საიდან უნდა ახსოვდეს ერთი ციდა გოგო, რომელთან ერთადაც სამი-ოთხი წლის წინ სკოლაში დადიოდა, მაშინ, როცა ისიც კი არ ახსოვს, სადილად რა ჭამა?

ჰენრის უიმედობისა და მხიარულების უცნაური ტალღა გადაუვლის. აბა, რა ეგონათ?

– ჯოზი, – ამბობს პიტი თითქმის უიმედოდ, – გახსოვს, რომ დაცინოდით კიდეც? შენს შეყვარებულს ვუწოდებდით. თაფლისფერი თვალები ჰქონდა... ყალყზე შემდგარი ქერა თმა... და... – იგი ღრმად ამოიოხრებს, – ამის დედაც! ..

– აალი დე, იივე აავი, – პასუხობს დადიტის მათი საყვარელი ფრაზით, ... „ახალი დღე, იგივე ნაგავი“, – ა აის მოაობა, ა აის ააში.

– სწორია, – თავს უქნევს ჯოუნსი, – არ არის მოძრაობა, არ არის თამაში. რა გაეწყობა, ბიჭებო, შინ წავიყვანოთ, მაინც...

– არა, – ამბობს ბივერი და ყველანი მის ანთებულ, აღელვებულ

თვალეხს ხედავენ. ისე ენერგიულად ლეჭავს კბილსაჩიჩქნს, რომ იგი შიგადაშიგ პირში უხტის, – სიზმართმჭერი ავგაროზი, – ამატებს იგი.

### 13

– სიზმართმჭერი ავგაროზი? – ეკითხება ოუენი და საკუთარი ხმა თითქოს შორიდან ჩაესმის. ფარების შუქი მისრიალებს უსასრულო თოვლის უდაბნოში, რომელიც გზას მხოლოდ ყვითელი ფარნების გამო ჰგავს. სიზმართმჭერი ავგაროზი, – ფიქრობს იგი და კვლავ ჰენრის წარსულს უბრუნდება, რომელმაც ლამის წალეკოს ზაფხულის წინა დღის პეიზაჟებით, ნახატებით, ხმაურითა და სურნელით.

სიზმართმჭერი ავგაროზი.

### 14

– სიზმართმჭერი ავგაროზი, – ამბობს ბივი და მათ ესმით ერთმანეთის, როგორც ხდება ხოლმე, ეს, მათი აზრით (ჰენრი ამას, შეცდომით, მოგვიანებით მიხვდება), მხოლოდ მეგობრებს ახასიათებს. თუმცა ისინი არასდროს საუბრობდნენ იმ კომმარზე, რომელიც ყველას ერთდროულად დაესიზმრა „კედელში გაკეთებულ ხვრელში“ პირველი დამოუკიდებელი ნადირობისას, ბივერის შეხედულებით, ეს ლამარის სიზმართმჭერმა ავგაროზმა გამოიწვია. მას არავინ შეჰპასუხებია – ნაწილობრივ იმიტომ, რომ უვნებელი, თოკისგან გაკეთებული, ობობას ქსელის მსგავსი ნივთის მიმართ ცრურწმენაზე კამათი არ სურდათ. თუმცა, მთავარი მიზეზი ის იყო, რომ საერთოდ არ სურდათ საუბარი იმ დღეზე. ახლა კი მიხვდნენ, რომ ბივერმა ჭეშმარიტ მიზეზს მიაკვლია. ისინი ერთმანეთ თან მართლაც სიზმართმჭერმა დააკავშირა, ოღონდ არა – ლამარის ავგაროზმა.

მათი ნამდვილი სიზმართმჭერი დადიტსი იყო.

– აბა, ბიჭებო, – წყნარად ამბობს ბივერი, – წინ, და არ შეშინდეთ. ჩაავლეთ ხელი.

სჯერათ, მაგრამ მაინც ეშინიათ... სულ ოდნავ. ბივერსაც ეშინია.

ჯოუნსი დადიტსის მარჯვენა ხელს იღებს, მარჯვედ რომ უმკლავდება სასწავლებელში მდგარ დაზგებს. დადი ცოტათი გაოცებულია, მაგრამ მაინც ილიმება და ჯოუნსის თითებს უჭერს. პიტი მის მარცხენა ხელს ჩაბლუჯავს. ბივერი და ჰენრი უკნიდან დაუდგებიან და დადიტსს წელზე ეხვევიან.

ხუთივენი ბებერი მსხვილი მუხის ქვეშ დგანან, ჩრდილში, თითქოს, ახალი თამაშის დაწყებას აპირებენ. ხასხასა ყვითელ ბლუზებში გამოწყობილი გოგონები მათ ყურადღებას არ აქცევენ. მათთვის არც ციყვებს სცალიათ და არც შრომისმოყვარე ლოთს, საკუთარი ოფლით რომ მოიპოვებს ვახშამს ნაგვის კონტეინერებიდან.

ჰენრი გრძნობს, როგორ შედის მასში შუქი და ხვდება, რომ მის მეგობრებსაც იგივე ემართებათ. ერთად ისინი სინათლისა და მწვანე ჩრდილების შესანიშნავ კონტრასტს ქმნიან. დადიტსი ყველაზე ძლიერად ანათებს. ის მათი მთავარი მამოძრავებელია, უმისოდ თამაში ვერ შედგება. იგია მათი სიზმართმჭერი, რომელიც ოთხივეს აერთიანებს. ჰენრის გული სიხარულით ევსება (ამგვარი გრძნობა მას აღარასდროს დაეუფლება. საიდანღაც გაჩენილი სიცარიელე, უაზრო წლების დაგროვებასთან ერთად, სულ უფრო გაიზრდება და გამუქდება) და ფიქრობს: ნუთუ ეს ყველაფერი იმ დაკარგული ჭკუასუსტი გოგონას მოსაძებნად, რომელიც მშობლების გარდა არავის სჭირდება? ან უტვინო თავხედის მოსაკლავად, რომელიც ერთიანი ძალით მანქანით გზიდან გადააგდეს? და ეს – ოჰ, ღმერთო ჩემო! – სიზმარში გააკეთეს? სულ ეს არის? რაღაც საოცარი და დიდებული – მხოლოდ ასეთი უმნიშვნელო საქმეებისთვის? ნუთუ მართლა სულ ესაა?

თუ ასეა, – იგი ამაზე განმარტოებით, ექსტაზში მყოფიც კი ფიქრობს, – მაშ, რა აზრი აქვს ამ ყველაფერს? რას უნდა ნიშნავდეს იგი?

მაგრამ ყველა ფიქრს ძლიერი განცდების ტალღა წალეკავს ხოლმე. მის წინ ჯოზი რენკენჰაუერის სახე წარმოდგება – ოთხი ადამია-

ნის აღქმისა და მოგონებებისგან შემდგარი მოცახცახე გამოსახულება. მათ მალე მეხუთეც შეუერთდება, როგორც კი დადიტსი გააცნობიერებს, თუ ვისთვის ატყდა ეს ალიაქოთი.

როდესაც მათ დადიტსი ემატება, გამოსახულება ასჯერ უფრო მკვეთრი და მკაფიო ხდება. ჰენრის ესმის, რომ ვილაც... ჯოუნსი... ოხრავს. თვითონაც ამოიოხრებდა, ამის ძალა რომ შესწევდეს. მართალია, დადიტსი, გარკვეული კუთხით, გონებრივად მოისუსტებს, მაგრამ ამ საქმეში ის ნამდვილი გენიოსია, მათი ოთხეული კი საცოდავი და ულონო იდიოტების ნაკრები.

– ღმერთო ჩემო! – გაისმის ბივერის შეძახილი და მის ხმაში აღფრთოვანება და სინანული თანაბრად იგრძნობა.

რადგან ჯოზი აქ არის, მათ გვერდით. მისი სახის განსხვავებულმა აღქმამ იგი თორმეტი წლის გოგონად აქცია: იმაზე მეტი ხნისაა, ვიდრე მაშინ იყო, როდესაც პირველად დაინახეს დებილების აკადემიის ჭიშკართან, მაგრამ – იმაზე ნაკლების, ვიდრე ახლა არის. მათ ის მატროსულას კაბაში გამოაწყვეს, რომელიც ცისფერ, ვარდისფერსა და წითელში გადადის. ხელში პლასტმასის დიდი ჩანთა უჭირავს, საიდანაც ბარბიკენი იჭყიტება. მუხლები გადატყავებია. ყურებში ჭიამიას მსგავსი საყურეები ხან უკეთია, ხან – არა, ჰენრის ახსენდება, რომ ის მართლაც ატარებდა ასეთებს. გოგონა პირს ალებს და ამბობს: „გამარჯობა, დადი“, შემდეგ მიიხედ-მოიხედავს და ამატებს: „გამარჯობა, ბიჭებო“.

სულ ეს არის. მაშინვე ქრება. ისინი კვლავ მუხის ქვეშ დგანან, ოღონდ ახლა არა ექვსნი, არამედ ხუთნი არიან. ხუთი მოზარდი ბებერი მუხის ქვეშ, მუდამ უცვლელი ივნისის მზე ძველებურად ათბობს მათ სახეებს, ყვითელბლუზიანი გოგონები მხიარულად გასძახიან ერთმანეთს. პიტი ტირის. ჯოუნსიც. ლოთი აღარ ჩანს, – ალბათ საკმარისი რაოდენობის ბოთლები შეაგროვა, – მაგრამ მის ადგილს სხვა იკავებს – პირქუში კაცი, რომელსაც, სიცხის მიუხედავად, ზამთრის ქურთუკი აცვია. მარცხენა ლოყაზე წითელი, ხალისმაგვარი

ნიშანი ადევს. ჰენრიმ კარგად იცის, ეს რაც არის. ეს ბაირუსია. ოუენ ანდერჰილი მათთან ერთადაა სტროფორდ-პარკში და ყველაფერს აკვირდება, თუმცა ამით არაფერი შავდება: სიზმართმჭერის მხრიდან მას ვერავინ ხედავს, ჰენრის გარდა.

დადიტსი კვლავინდებურად ილიმება, თუმცა ვერ გაუგია, რატომ ტირის მისი ორი მეგობარი.

– აომ ირი? – ეკითხება ის ჯოუნსის. „რატომ ტირი?“

– ისე, – პასუხობს იგი და ხელს გამოსტაცებს. კავშირი გაწყვეტილია. ჯოუნსი და პიტი ცრემლებს იშმენდენ. ბივერი ნერვიულად, ქსუტუნით გაიცინებს.

– მგონი, კბილსაჩიჩქნი გადავყლაპე, – ამბობს იგი.

– არა, აგერ არის, შტერო, – ეუბნება ჰენრი და ფეხებზე უთითებს, სადაც დანაწევრებული კბილსაჩიჩქნი გდია.

– იოვო ოზი? – კითხულობს დადიტსი. „ვიპოვო ჯოზი?“

– შეგიძლია, დადს? – მაშინვე გამოცოცხლდება ჰენრი. დადიტსი სოფტბოლის მოედნისკენ მიემართება. ყველანი მოკრძალებით მიჰყვებიან უკან. დადსი ოუენს ჩაუვლის, მაგრამ, ცხადია, ვერ ამჩნევს – დადსისთვის ოუენი არ არსებობს, ჯერჯერობით მაინც. ის გასცდება მაყურებელთა ღია ტრიბუნას, მესამე ხაზს, პატარა სასადილოს და ჩერდება. პიტი ჩუმად შეჰყვირებს.

დადიტსი ტრიალდება და მას მხიარულად, ინტერესით, თითქმის სიცილით შესცქერის. თვალები უბრწყინავს. პიტი თითს მაღლა სწევს და ნაცნობ მოძრაობას იწყებს, – წინ და უკან, ტიკ-ტაკ, – თან მიწას ჩასჩერებია. ჰენრიც იქით იყურება და ეჩვენება, რომ ისიც ხედავს ბალახში რაღაცას – კაშკაშა, თითქოს ფუნჯით გავლებულ ყვითელ ხაზს. შემდეგ ეს რაღაც ქრება. რჩება მხოლოდ პიტი, რომელიც იმას აკეთებს, რასაც ყოველთვის, თავისი განსაკუთრებული ნიჭის გამოყენებისას.

– ეავ აზს, იტი? – ეკითხება დადიტსი მამობრივი, მზრუნველი კილოთი, ჰენრი სიცილს ძლივს იკავებს. „ხედავ ხაზს, პიტი?“

– ჰო, – პასუხობს თვალეზდაქაჩული პიტი, – ვხედავ, ამის დედაც! .. – ამბობს და ყველას თვალს მოავლებს, – ის აქ იყო, ბიჭებო! სწორედ აქ!

სტროფორდ-პარკს გადაკვეთენ და მიჰყვებიან ხაზს, რომელსაც მხოლოდ დადიტსი და პიტი ხედავენ. მათთან ერთად, ის ადამიანიც მიდის, რომელსაც მხოლოდ ჰენრი ხედავს. პარკის ჩრდილოეთ ბოლოში მოყანყალეული ფიცრული ღობეა, წარწერით: „D. B. & A. R. R. კერძო საკუთრება. შესვლა არ შეიძლება“.

ბავშვები, ცხადია, ამ აკრძალვას ყურადღებას არ აქცევენ, რადგან დერის, ბანგორსა და არუსტუკს ამ უნაყოფო მიწაზე გამავალი გზით წლების განმავლობაში გადაჰქონდათ ტვირთი. ბიჭები ღობეში გაკეთებულ ხვრელებში მიძვრებიან და დაჟანგულ რელსებს აწყდებიან, ის ქვემოთ ეშვება და მზეზე სუსტად ბზინავს.

საკმაოდ დამრეც ფერდობს მომწამვლელი თუთუბო და სურო მოსდებია. შუაგზაზე ჯოზი რინკენჰაუერის პლასტმასის დიდ ჩანთას ხედავენ, დაძველებულს, გაცვეთილსა და მრავალ ადგილას საიზოლაციო ლენტით დაწებებულს, თუმცა, ჰენრი მას თვალდახუჭულიც ამოიცინობდა.

გახარებული დადიტსი ჩანთას მივარდება, ხსნის და შიგნით იყურება.

– არბინი! – აცხადებს იგი და იქიდან სათამაშოებს იღებს. სახემოლღუშული პიტი არემარეს ისე ათვალეირებს, თითქოს შერლოკ ჰოლმსი ედგას კვალში პროფესორ მორიარტის. გოგონას პიტ მური პოულობს, პიტი, რომელიც თითს ჭუჭყიანი, ბეტონის ჩასადენი მილისკენ იშვერს, ბარდებში რომ მოჩანს.

– იქ არის! – გამკვივანი ხმით ყვირის ის და თუ ორ წითელ ლაქას არ ჩავთვლით ლოყებზე, სახე ქალღმერთით გასთეთრებია, – ბიჭებო, მგონი იქ უნდა იყოს!

დერის ადგილზე უწინ ჭაობები იყო, რომელთა გარშემოც მიკმა-

კის ტომის ინდიელები ცხოვრობდნენ. ახლა ქალაქის მთელ ტერიტორიაზე საკანალიზაციო მილებისა და კოლექტორების ძველი და საოცრად ჩახლართული ლაბირინთია. უმეტესი ნაწილი ოცდაათიან წლებში გაიყვანეს „ახალი კურსის“ ფულით, მაგრამ 1985-ში მოვარდნილმა ქარიშხალმა ბევრი რამ დაანგრია, მათ შორის სტენფაიფის კოშკი, რამაც წყალდიდობა გამოიწვია. თუმცა, ჯერჯერობით ყველა მილი მრთელია. ერთ-ერთი ზემოდან ქვემოთ მოდის და გორაკში შედის. ჯოზი რინკენჰაუერი წაბორძიკდა, დაეცა, მშრალი ფოთლების ორმოცდაათწლიან ხალიჩაზე ციგასავით გასრიალდა, მილში შევარდა და ახლა მის ფსკერზე წევს. ამაოდ ცდილობდა ცხიმიან, ხორკლიან შვეულზე აძრომას და ძალ-ღონე გამოეღია. შემდეგ ორი პატარა ნამცხვარი შეჭამა, ჯინსის ჯიბეში ედო, მომდევნო თორმეტი-თოთხმეტი საათი კი იმ აყროლებულ წყვდიადში იწვა, გარე სამყაროდან შემოსულ სუსტ ხმებს ყურს უგდებდა და სიკვდილს ელოდა.

პიტის ყვირილის გაგონებაზე თავს წამოსწევს, ძალას მოიკრებს და იძახის:

– დამენმარეთ! ვერ ამოვდივარ! მიშველეთ!

ბიჭებს თავში აზრად მოსდით, რომ ეს ამბავი უფროსებს შეატყობინონ, თუნდაც, პოლიციელ ნელს დაუძახონ, რომელიც ამ მხარეში პატრულირებს. მათ მხოლოდ ერთი რამ სურთ – სასწრაფოდ ამოიყვანონ და გადაარჩინონ ჯოზი – ეს მათი ვალია. იმდენი ჭკუა კი აქვთ, დადიტს მილში შეძრომის უფლება არ მისცენ. დანარჩენები კი ცოცხალ ჯაჭვში დგებიან: ჯერ პიტი, შემდეგ ბივი და ჰენრი, ბოლოს ჯოუნსი, რომელიც ყველაზე მძიმეა. მათი საპირწონეა. მათი ღუზა.

ასე ხელიხელჩაკიდებულნი მიფოფხავენ აყროლებული ხვრელისკენ (კანალიზაციისა და კიდევ რალაც საზიზღრობის სუნი ერთმანეთშია არეული). ჰენრი წუმპეში ჩაგდებულ ჯოზის ბოტასს გადააწყდება და დაუფიქრებლად უკანა ჯიბეში იტენის.

რამდენიმე წამის შემდეგ პიტი უკანმოუხედავად იძახის:



– შევჩერდით, ბიჭებო.

ტირილი და მუდარა სულ უფრო ხმამაღლა ისმის. პიტი უკვე ხედავს გოგონას, რომელიც ფოთლებით სანახევროდ ავსებული მილის ფსკერზე ზის. მისკენ მოპყრობილი სახე მოთხუპნილ თეთრ წრესავით მოჩანს.

აღელვების მიუხედავად, ბიჭები ფრთხილად მოქმედებენ. ჯოუნსი ფეხებით ეყრდნობა ბეტონის უზარმაზარ ნატეხს, ჯაჭვი იჭიმება, პიტი ქვევით ეკიდება. ჯოზი თითის წვერებზე დგება, ამაოდ ცდილობს, ბიჭის ხელს მისწვდეს. ბოლოს სულ ოდნავ ამობობლებას ახერხებს, რაც სრულიად საკმარისია იმისთვის, რომ პიტი მის დაკაწრულ, ჭუჭყიან მაჯას ჩაეჭიდოს.

– არის! – ბლავის იგი გამარჯვებულივით, – ჩავავლე!

მათ ნელა ამოჰყავთ გოგონა. ზევით დადიტსი ელოდებათ, რომელსაც ცალ ხელში თეთრი ჩანთა უჭირავს, მეორეში – თოჯინები. აღელვებული წამოხტება და ყვირის, რომ ჯოზის სანერვიულო არაფერი აქვს, რადგან ბარბიკენი მასთანაა. კვლავ მზის სინათლე, სუფთა ჰაერი. და როდესაც ისინი გოგონას მილიდან ამოსვლაში ეხმარებიან...

## 15

„ჰამერი“ ტელეფონით არ იყო აღჭურვილი, შიგნით მხოლოდ ორი რაცია იდო. მიუხედავად ამისა, სიჩუმეში გამაყრუებელი ზარის ხმა გაისმა, ამან ჰენრის მოგონებათა ძაფი გაწყვიტა და ორივე მათგანი ძალიან შეაშინა.

ოუენი იმ ადამიანივით შეკრთა, რომელიც უხეშად გამოიყვანეს ღრმა ძილიდან. „ჰამერმა“ გზაზე კონტროლი დაკარგა, ჯერ ბუქსაობა დაიწყო, შემდეგ კი მოსრიალდა და მოცეკვავე დინოზავრივით მოჰყვა აქეთ-იქით კუდის ქნევას.

– შენი დედაც! ..

ოუენმა ვითარების გამოსწორება სცადა, მაგრამ ბორბლები კაპიტნის გარეშე დარჩენილი გემის საჭესავით უმწეოდ, გულის ამრევი სიმსუბუქით ტრიალებდა, ბოლოს კი ნამქერში გვერდულად გაიჭედა, ფარებით კი იმ დათოვლილ მხარეს ანათებდა, საიდანაც მოვიდნენ.

„წკრრ! წკრრ! წკრრ!“ – გაისმა სადღაც ჰაერში.

ეს ჩემს თავშია, – გაიფიქრა ოუენმა, – მე კი მის პროექციას ვახდენ. მაგრამ ეს ჩემს თავშია. წყეული ტელეპა...

ჰენრისა და მას შორის პისტოლეტი „გლოკი“ იდო. ჰენრიმ აიღო და ზარი მაშინვე შეწყდა. მან პისტოლეტის ლულა ყურთან მიიტანა.

რა თქმა უნდა! – გაიფიქრა ოუენმა, – მშვენიერი აზრია. „გლოკით“ რეკავს. სულ ესაა. დიდი ამბავი.

– ალო, – თქვა ჰენრიმ. ოუენმა პასუხი ვერ გაიგონა, მაგრამ დაინახა, რომ მის თანამგზავრს სახე ღიმილმა გაუნათა, – ჯოუნსი! ვიცოდი, რომ შენ იყავი!

აბა სხვა ვინ იქნებოდა, – გაუკვირდა ოუენს, – ოპრა უინფრი<sup>185</sup> ხომ არა? ”

– სად...

პაუზა.

– ჯოუნსი, მას დადიტის სჭირდება, არა? ამიტომაც...

კვლავ პაუზა.

– სტენდფაიფი? რატომ... ჯოუნსი, ჯოუნსი...

ჰენრის ცოტა ხანს კიდევ ეჭირა პისტოლეტი, შემდეგ დახედა, თითქოს ვერ გაეგო, ეს რა იყო, ბოლოს კი ნელა დადო თავის ადგილზე. აღარ იღიმებოდა.

– ყურმილი დამიკიდა. ალბათ ის, მეორე დაბრუნდა. იგი მას მისტერ გრეის ეძახის.

– შენი მეგობარი ცოცხალია, მაგრამ რატომღაც ბედნიერი არ ჩანხარ.

---

<sup>185</sup> ამერიკელი ტელეწამყვანი.

მართლაც, ჰენრის ნაკლებსასიხარულო აზრები დაუფლებოდა, თუმცა ამის შესახებ ლაპარაკი საჭირო არ იყო. თავდაპირველად აღფრთოვანდა, – სხვაგვარად როგორ იქნებოდა, როცა ის, ვინც უყვარდა, ძველი „გლოკით“ ესაუბრებოდა, – მაგრამ შემდეგ ხასიათი გაუფუჭდა. რატომ?

– ის... ისინი დერიდან სამხრეთით არიან. დასანაყრებლად „დაიზარტსში“ შეჩერდნენ, მძლოლებისთვის განკუთვნილ გზისპირა რესტორანში – ჯოუნსი მას „გაზდაიზერტსს“ უწოდებს, როგორც – ბავშვობაში. არ მეგონა, თუ ახსოვდა. როგორც ჩანს, ძალიან ეშინია.

– საკუთარი თავის გამო? თუ ჩვენ გამო?

ჰენრიმ დაღვრებით შეხედა ოუენს.

– ამბობს, მეშინია, მისტერ გრემი პატრულის თანამშრომელი არ მოკლას და მისი მანქანა არ გაიტაცოსო. ასე ფიქრობს. ჯანდაბა!

ჰენრიმ ფეხზე მუშტი დაირტყა.

– სამაგიეროდ, ცოცხალია.

– ჰო, – მიუგო ჰენრიმ უხალისოდ, – იმუნიტეტი აქვს სოკოს წინააღმდეგ. დადიტსი... ახლა მაინც თუ მიხვდი?

„არა, და ვეჭვობ, ბოლომდე ვერც შენ მიხვდი, ჰენრი... მაგრამ რაღაც მაინც გავიგე“.

ჰენრი ისევ აზრებით კავშირზე გადაერთო – ასე უფრო უადვილდებოდა.

„დადიტსმა... მასთან ურთიერთობამ ყველა შეგვცვალა. ჯოუნსის კემბრიჯში მანქანა რომ დაეჯახა, იგი ისევ შეიცვალა. იმ ადამიანების ტვინის ელექტრული იმპულსები, რომლებმაც კლინიკური სიკვდილი გადაიტანეს, ხშირად, საოცარ მეტამორფოზას განიცდის – შარშან ამის შესახებ ჟურნალ „ლანცეტში“ სტატია წავიკითხე. ჩემი აზრით, მიუხედავად იმისა, რომ მისტერ გრემი ჯოუნსის სხეული მიიტაცა, სოკოთი მისი დაინფიცირება ვერ შეძლო და ბოლომდე ვერც მის გონებას დაეუფლა. ვერ შეისრუტა. ჯერჯერობით.“

– შესრუტვა?

„კოოპტაცია. სხვა ორგანიზმში განზავება. ერთი სიტყვით, შთან-  
თქმა“, – მიუგო ჰენრიმ, ხმამაღლა კი დაამატა:

– შეძლებ ამ ნამქერიდან მანქანის ამოყვანას?

„მგონი, შევძლებ“.

– სწორედ ამის მეშინოდა, – თქვა სახემოღუშულმა ჰენრიმ.

ოუენმა მისკენ ხელსაწყოების პანელით მომწვანოდ განათებული  
სახე მიაბრუნა.

– რა ჯანდაბა გემართება?

„ღმერთო ჩემო, ნუთუ არ გესმის? რამდენჯერ აგიხსნა? როგორ  
გაგაგებინო? ის კვლავაც იქ არის! ჯოუნსი!“

ოუენს მათი გაქცევიდან მესამედ თუ მეოთხედ მოუხდა გულსა და  
გონებას შორის არსებულ უფსკრულზე გადახტომა.

– აჰა, გასაგებია, – დაიწყო მან და შეჩერდა, – ის ცოცხალია. აზ-  
როვნებს და ცოცხალია. რეკავს კიდევ, – იგი კვლავ შეჩერდა, –  
ღმერთო ჩემო!

ოუენმა „ჰამერი“ პირველ სიჩქარეში ჩააგდო და მდგომარეობის  
გამოსწორება სცადა. დიდხანს იწვალა, სანამ ოთხივე ბორბალი არ  
დატრიალდა. შემდეგ უკან დაიძრა და ნამქერში შევარდა. მანქანის  
ძარა ოდნავ მოშორდა მიკრულ თოვლს. სწორედ ეს სურდა ოუენს.  
ახლა, როდესაც ისევ პირველ სიჩქარეზე გადართავდა, ისინი ბოთ-  
ლიდან ამოვარდნილი საცობივით გაქანდებოდნენ წინ, მაგრამ ოუ-  
ენი არ ჩქარობდა. ცოტა მოიცადა და მუხრუჭს დააწვა. „ჰამერი“ მო-  
უთმენლად აცანცახდა. ძრავა ღმუროდა, ქარი კი ყმოდა და ცარიელ  
გზატკეცილზე მოსეირნე თოვლს თავის ნებაზე ატრიალებდა.

– ალბათ ხვდები, რომ ამის გაკეთება მოგვიწევს, არა? – იკითხა  
ოუენმა, – თუმცა, ჯერ უნდა დავიჭიროთ. დეტალების მიუხედავად,  
მათ გენერალურ გეგმაში მთელი პლანეტის დაინფიცირება შედის.  
და მათემა...

– მათემატიკა მეც მშვენივრად ვიცი, – თქვა ჰენრიმ, – კოსმოსურ

ხომალდ „დედამიწის“ ექვსი მილიარდი მოსახლე ერთი ჯოუნსის წინააღმდეგ.

– ციფრებს ვერსად გავექცევით.

– ციფრები შესაძლოა, იტყუებოდნენ, – შეეპასუხა ჰენრი, თუმცა სახე მოელუშა, რადგან კარგად იცოდა, რომ დიდი რიცხვები არ იტყუებოდა და ვერც მოიიტყუებოდა. ექვსი მილიარდი კი ძალიან დიდი რიცხვი იყო. ოუენმა მუხრუჭს ფეხი აუშვა და აქსელერატორს დააწვა. „ჰამერი“ რამდენიმე ფუტით წინ გაგორდა, ერთი პირობა, მოსრიალეობა დააპირა, მაგრამ შეჩერდა, შემდეგ კი მხეცივით ღრიალით ამოხტა ნამქერიდან. ოუენმა სამხრეთისკენ გადაუხვია.

„მომიყევი, რა მოხდა მას შემდეგ, რაც გოგონა სადინარი მილიდან ამოიყვანეთ“.

სანამ ჰენრი პასუხს გაგზავნიდა, ხელსაწყოების პანელზე დამაგრებული რაცია ატკაცუნდა. ვიღაც ისე ხმამაღლა და მკაფიოდ ალაპარაკდა, თითქოს მათთან ერთად იჯდა „ჰამერში“.

– ოუენ! აქ ხარ, მეგობარო?

ეს კურცი იყო.

## 16

თითქმის ერთი საათი მოანდომეს „ცისფერი ბაზიდან“ (ყოფილი „ცისფერი ბაზიდან“) სამხრეთის მიმართულებით თექვსმეტი მილის გავლას, მაგრამ კურცი არ წუხდა. ეჭვი არ ეპარებოდა, რომ ღმერთი დახმარების ხელს გაუწვდიდა.

„ჰამერში“ ისხდნენ. მანქანას ფრედი ჯონსონი მართავდა. მის გვერდით კარის სახელურზე ხელბორკილით მიბმული არჩი პერლმუტერი მოკუნტულიყო. კემბრი – პერლის, კურცი კი ფრედის უკან იჯდა. კემბრიც დაებათ. თავდაპირველად, კურცი ცოტათი შეშფოთდა, – ტყვეები ერთმანეთს ტელეპათიის საშუალებით არ დაუკავშირდნენ და რამე არ ჩაიფიქრონო, მაგრამ მალევე დამშვიდდა. კურცმა და ფრედიმ ფანჯრები ჩასწიეს, თუმცა „ჰამერში“ ისე ციოდა,

როგორც იანვრის თვეში გლახის ეზოში მდგარ ტუალეტში. იმ ყინვას ვერანაირი გამათბობელი ვერ გაუმკლავდებოდა. ეგ არის, რომ სხვა გზა არ ჰქონდათ: მანქანაში გოგირდისა და ეთერის ისეთი მომწამვლელი სუნი იდგა, როგორც გაზით სავსე ქვანახშირის საბადოში. ყველაზე მეტად პერლმუტერი ყარდა, განუწყვეტლივ წრიალებდა და ჩუმად კვნესოდა. კემბრის რიპლი მოსდებოდა და გაზაფხულის წვიმის შემდეგ აბიბინებულ პურის ყანას დამსგავსებოდა. კურცს ნილაბი ეკეთა, მაგრამ მის სიმყრალეს მაინც გრძნობდა. მიუხედავად იმისა, რომ უზრდელობაში პერლის ვერავინ შეედრებოდა, მაინც ცდილობდა, გაზები უხმაუროდ გამოეშვა (ხან ერთ დუნდულს ასწევდა მალლა, ხანაც – მეორეს და პატარა პუკს აკეთებდა, როგორც კურცის ბურუსით მოცული ბავშვობის დღეებში ამბობდნენ ხოლმე), თან გაკვირვებულ სახეს იღებდა, – აქაოდა, მე არაფერ შუაში ვარო. ჯინ კემბრის რიპლი მოჰყავდა. კურცი ეჭვობდა, რომ პერლი, ღმერთო, შენ დაიფარე, სხვა რამის კულტივირებით იყო დაკავებული.

რაც შეეხება კურცს, იგი წარმატებით მალავდა აზრებს მის მიერვე შეთხზული მონოტონური მანტრის საშუალებით: დევისი და რობერტსი, დევისი და რობერტსი, დევისი და რობერტსი...

– იქნებ შეწყვიტოთ? – უთხრა გაღიზიანებულმა კემბრიმ, – თორემ ლამის გავგიჟდე!

– მეც, – მხარი აუბა პერლმუტერმა. იგი კვლავ აწრიალდა და გრძელი „ფუუუ“ გამოსცა, თითქოს გასაბერი სათამაშოდან ჰაერი გამოეშვაო.

– ღმერთო ჩემო, პერლი, – შესძახა ფრედიმ, ფანჯარა ბოლომდე დაუშვა და თავი გარეთ გაჰყო. „ჰამერი“ მოცურდა და კურცი უარესისთვის მოემზადა, მაგრამ ყველაფერი მშვიდობიანად დასრულდა, – იქნებ გვაკმარო ეგ შენი ანალური პარფიუმერიის რეკლამა?

– ბოდიში, – ცივად შეეპასუხა პერლმუტერი, – მაგრამ თუ იმაზე მიმანიშნებ, რომ გაზები მე გამოვუშვი, გეტყვი, რომ...

– არაფერზე არ მიგანიშნებ, – დაიღრინა ფრედიმ, – უბრალოდ,

გეუბნები, რომ აქაურობა სკუნსივით აღარ ააყროლო, თორემ...

ვინაიდან, ფრედი ვერაფრით შეასრულებდა მის მიერ გამოთქმულ თუ გამოუთქმელ მუქარას, – ჯერჯერობით, ამ ორი ტელეპათის გარეშე არაფერი გამოუვიდოდათ, – კურცმა ჩარევა გადაწყვიტა.

– მინდა, ედვარდ დევისისა და ფრანკლინ რობერტსის ჭკუის სასწავლებელი ამბავი გიამბოთ, – თქვა მან, – რაც კიდეც ერთხელ ამტკიცებს, რომ ახალი – კარგად დავიწყებული ძველია. ეს დიდი ხნის წინათ კანზასში მოხდა, მაშინ, როცა კანზასი ჯერ კიდეც კანზასობდა.

კურცს თხრობა ეხერხებოდა და კორეის ომს გადასწვდა. ედ დევისსა და ფრანკლინ რობერტსს თითქმის ერთნაირი პატარა ფერმა ჰქონდათ ემპორიასთან, კურცის ოჯახის მეზობლად (მაშინ კურცი არ ერქვა). დევისს, რომელსაც თავში გვარიანად უქროდა, რატომღაც აეკვიატებინა, რომ მეზობელს, თავხედ რობერტსს, მისი ფერმის ხელში ჩაგდება სურდა, თანაც ქალაქში მასზე საზიზღარ ჭორებს ავრცელებდა. აცხადებდა, – რობერტსი მინდვრებზე საწამლავს მიყრის, „ემპორიის ბანკს“ გაურიგდა, რათა ვალების სანაცვლოდ ფერმა ჩამომართვანო.

ედ დევისმა იმდენად გააფრინა, რომ როგორღაც ცოფიანი ენოტი დაიჭირა და საქათმეში – საკუთარ საქათმეში შეუშვა. როცა ენოტმა ყველა ქათამს კისერი მოუგრიხა, მადლობა უფალს, – განაგრძობდა კურცი, – ფერმერმა დევისმა თოფი გამოიტანა და ენოტს მოშავომონაცრისფრო ზოლიან თავში ესროლა.

„ჰამერში“ სიჩუმე იდგა, ყველანი სულგანაბული უსმენდნენ კურცს.

ედ დევისმა დახოცილი ქათმები და მკვდარი ენოტი თავის კომბაინში, „ინტერნეიშნლ ჰარვესტერში“ მოათავსა, მეზობლის ფერმას მიადგა და მთვარის შუქზე ყველაფერი ფრანკლინ რობერტსის ორ ჭაში ჩაყარა: იმაშიც, რომლიდანაც საქონელს წყალს ასმევდა, და

იმაშიც, საიდანაც ოჯახი სვამდა. მომდევნო საღამოს ჯერ ბლომად ვისკი ყლურწა, შემდეგ კი თავის მტერს დაურეკა და სიცილით უამბო მომხდარი. „დღეს აუტანელი სიცხე იყო, არა? – ჰკითხა იმ გადარეულმა, თან ისე ხმამაღლა იცინოდა, რომ ფრანკლინ რობერტსი სიტყვებს ძლივს არჩევდა, – რომელი წყალი დალიეთ შენ და შენმა გოგონებმა, რობერტს? ენოტისმძორიანი თუ დახოცილქათმებიანი? ზუსტად ვერ გეტყვი, რადგან, ვაი სირცხვილო და, აღარ მახსოვს, რომელი რომლით ამოვაკვე“.

ჯინ კემბრის ტუჩის მარცხენა კუთხე ინსულტგადატანილი ადამიანივით აუცახცახდა. წარბებს ზემოთ, ნაკეცებში რიპლი ისე წამოზრდოდა, გეგონებოდათ, ცოტაც და, მისტერ კემბრის შუბლი გადაეხსნებო.

– ამით, იმის თქმა გასურთ, – იკითხა მან, – რომ მე და პერლი არაფრით ვჯობივართ ორ ცოფიან ქათამს?

– ბოსს თავაზიანად ელაპარაკე, კემბრი, – გააფრთხილა ფრედიმ და ნილაბი, როგორც ჩანს, აღშფოთებისგან, მოუსვენრად აუმოძრავდა.

– ჯანდაბამდე გზა ჰქონია შენს ბოსს! მისია დასრულებულია! ფრედიმ ხელი ასწია, რათა კემბრი სავარძელზე მიესრისა, მაგრამ ამ უკანასკნელმა შიშით დალრეჯილი და გამძვინვარებული სახე სულ ახლოს მიუტანა.

– მიდი, ჯიგარო! მაგრამ იქნებ, ჯერ საკუთარი მუშტი შეგემოწმებინა? ხომ იცი, პატარა ნაკაწრი და წასულია შენი საქმე.

ფრედიმ ხელი ჰაერში გააჩერა და ისევ საჭეზე დადო.

– სხვათა შორის, ფრედი, შენს ადგილას უკან ხშირ-ხშირად მივიხედავდი. გაგიჟებულხარ, თუ გგონია, რომ ბოსი მოწმეებს დატოვებს.

– გაგიჟებულა, დიახ, – გულთბილად თქვა კურცმა და ჩაიცინა, – რომ იცოდეთ, ბევრი ფერმერი სიცოცხლეს საგიჟეთში ასრულებს, ან



ასრულებდა ვილ ნელსონამდე<sup>186</sup> – ღმერთმა დალოცოს იგი – და ფერმერთა დახმარების პროგრამამდე. ვფიქრობ, ამის მიზეზი მოხშირებული სტრესი უნდა იყოს. საბრალო ედ დევისმა სიცოცხლე ვეტერანთა დახურულ დაწესებულებაში დაასრულა, – რომ იცოდეთ, იგი დიდ ომში მონაწილეობდა, – ამ ჭების ამბიდან ცოტა ხნის შემდეგ ფრანკ რობერტსმა ფერმა გაყიდა, უიჩიტოში გადავიდა და „ელის-ჩალმერზში“ კომივოიაჟორად დაიწყო მუშაობა, მიუხედავად იმისა, რომ ჭები მოწამლული არ აღმოჩნდა – სინჯი ააღებინა ოლქის სანიტარულ ინსპექტორს, რომელმაც უთხრა, რომ წყალი სასმელად ვარგისი იყო. თურმე, ცოფი წყლით არ გადადის. ნეტა რიპლის შემთხვევაში რა ხდება?

– უპირველეს ყოვლისა, კარგი იქნებოდა, თუ მას ნამდვილ სახელს უწოდებდით, – ჩაიბურტყუნა კემბრიმ, – ეს რიპლი კი არა, ბაირუსია.

– გინდ ბაირუსი ეძახე, გინდ რიპლი, – თქვა კურცმა, – ეს ტიპები ჩვენი ჭების მოწამვლას ცდილობენ. ჩვენი თხევადი გარემოს დაბინძურებას, როგორც ვილაცამ სწორად აღნიშნა.

– თქვენ ეს ფეხებზე გკიდიათ! – ისეთი ძალით იფეთქა პერლიმ, რომ ფრედი შეხტა კიდეც, – ანდერჰილის შეპყრობის გარდა, არაფერი გადარდებთ!

გაჩუმდა, შემდეგ სევდიანად დაამატა:

– მგონი, მართლაც გაგიჟდით, ბოს.

– ოუენ! – ბურუნდუკივით დასჭყვივლა კურცმა, – კინალამ არ დამავიწყდა? სად არის, ბიჭებო?

– წინ, – პირქუშად მიუგო კემბრიმ, – წყეულ ნამქერში გაიჭედა.

– შესანიშნავია! – შესძახა კურცმა, – მიზანთან ახლოს ვყოფილვართ!

– დროზე ადრე ნუ ზეიმობთ, ბოს. ახლავე თავს დააღწევს. ზუს-

---

<sup>186</sup> ქანთრის მომღერალი და კომპოზიტორი.

ტად ჩვენნაირი „ჰამერი“ ჰყავთ. ვინც იცის, რას აკეთებს, თან საჭეს-თან ჯდომაც ეხერხება, ჯოჯოხეთსაც კი არ შეუშინდება. ის კი, როგორც ჩანს, ასეთია.

– სამწუხაროა. შანსები თუ გვაქვს?

– არცთუ ისე ბევრი, – მიუგო პერლიმ, შემდეგ ისევ აწრიალდა, შეიჭმუხნა და უწესო ხმა გამოსცა.

– უჰ, შენი... – თქვა ფრედიმ ხმადაბლა.

– მიკროფონი მომეცი, ფრედი. საერთო არხი, რომელიც ჩვენს მეგობარს, ოუენს, ძალიან უყვარს.

ფრედიმ მიკროფონი ისე გაუწოდა, არ შებრუნებულა, ხელსაწყობების პანელზე მიმაგრებულ გადამცემს რაღაც უჯადოქრა და თქვა:

– მზად არის, ბოს.

კურცმა მიკროფონის გვერდზე მოთავსებულ ღილაკს თითი დააჭირა.

– ოუენ! აქ ხარ, მეგობარო?

დუმილი, უძრაობა და მხოლოდ ქარის მონოტონური ზუზუნი. კურცმა ხელმეორედ დააპირა გადაცემის ღილაკზე თითის დაჭერა, როდესაც ოუენის მშვიდი ხმა გაისმა – გარკვეული ხარვეზებით, მაგრამ მკვეთრად.

– აქ ვარ.

– მიხარია შენი ხმის გაგონება, მეგობარო! ამაღელვებელი მომენტია! ვფიქრობ, ორმოცდაათიოდე მილით უნდა გვისწრებდე. ჩვენ ახლახან გავიარეთ 39-ე მოსახვევი, ასე რომ, მგონი, არ შევმცდარვარ, არა? – სინამდვილეში მათ 36-ე მოსახვევი გაიარეს და მათთან, ალბათ, ორჯერ უფრო ახლოს იყვნენ.

დუმილი.

– აჯობებს, მანქანა გააჩერო, მეგობარო, – ურჩია კურცმა ძალზე გულკეთილი და წინდახედული ადამიანის კილოთი, – ჯერ კიდევ შეიძლება რაღაცის გადარჩენა და ამ სიბინძურისგან თავის დაღწევა.

ჩვენი კარიერა დასრულებულია, ამას წყალი არ გაუვა, მაგრამ თუ რამე მიზანი გაქვს, ნება მომეცი, დაგეხმარო. პატარა აღარ ვარ და მინდა, ღირსეულად...

– მორჩი ტყუილების ჩმახვას, კურც, – ერთდროულად გაისმა „ჰამერის“ ექვსივე დინამიკიდან, თანაც ისე ხმამაღლა და გარკვევით, რომ კემბრიმ თავი ველარ შეიკავა და თავხედურად გადაიხარხარა. კურცმა მას განმგმირავი მზერა ესროლა. ჩვეულებრივ ვითარებაში ეს საკმარისი იქნებოდა, კემბრის შავი კანი შეძრწუნებისგან რომ განაცრისფრებულყო, თუმცა, ეს – ჩვეულებრივ ვითარებაში. ახლა მსგავსი ვითარებისგან ძალიან შორს იყვნენ და კურცმა მისთვის სრულიად შეუფერებელი შიშის მოახლოება იგრძნო. ერთია იმის გააზრება, რომ ყველაფერი თავდაყირა დადგა, სულ სხვაა, როდესაც სიმართლე გულ-მუცელში ცხელ ტყვიასავით ჩაგედვრება.

– ოუენ... მეგობარო...

– მომისმინე, კურც. არ ვიცი, ერთი ნორმალური ნაოჭი მაინც თუ დაგრჩა მაგ გადარეულ ტვინში, მაგრამ თუ ასეა, ორიოდე წამი მაჩუქე. ჩემ გვერდით ერთი კაცი ზის, ჰენრი დევლინი. წინ... შესაძლოა, ასი მილის დაშორებით, მისი მეგობარია, გარი ჯოუნსი. ოლონდ იგი უკვე სხვა არსებაა. მას უცხოპლანეტელის გონება დაეუფლა, რომელსაც თვითონ მისტერ გრეის უწოდებს.

გარი... გრეი, – გაიფიქრა კურცმა, – ანაგრამებით გავიგებთ მათ შესახებ.

– იმას, რაც ჯეფერსონტრექტში ხდებოდა, აზრი არ ჰქონდა, – განაგრძო ხმამ დინამიკებიდან, – შენ მიერ ჩაფიქრებული სასაკლაო უაზრობა იყო, კურც, – თავისით მოკვდებიან თუ ტყვიით დაიხოცებიან, ისინი საფრთხეს მაინც არ წარმოადგენენ.

– ხომ გესმით?! – ისტერიულად შესძახა პერლმუტერმა, – არ წარმოადგენენ! არ...

– მოკეტე! – დაუღრინა ფრედიმ და სახეში გაარტყა. კურცმა ეს

თითქოს ვერც შეამჩნია. სიმივით გაიჭიმა, თვალები დააკვესა, ყურები დაცქვიტა. რაო? უაზრობაო? ოუენ ანდერჰილი ამტკიცებს, რომ მისი ცხოვრების მთავარი ოპერაცია უაზრობაა?

– ...ისინი ამ გარემოში, გასაგებია? ჩვენს ეკოსისტემაში ვერ გადარჩებიან. გრეის გარდა. რადგან მას გაუმართლა და ისეთ მასპინძელს მიაგნო, რომელიც ყველასგან ძირეულად განსხვავდება. ჰოდა, კურც, თუ შენთვის ამ სამყაროში რაღაც მაინც ძვირფასია, თუ რაიმე პრინციპი გაგაჩნია, დაუყოვნებლივ შეწყვიტე ნადირობა და ნება მოგვეცი, საქმეს მშვიდად მივხედოთ. მივხედოთ მისტერ ჯოუნსისა და მისტერ გრეის. შენ, ალბათ, მოახერხებ ჩვენს დაკავებას, მაგრამ ვეჭვობ, მათი დაჭერა მოახერხო. ისინი ძალიან შორს არიან სამხრეთისკენ. ჩვენი აზრით, გრეის რაღაც გეგმა აქვს. ისეთი, რომელმაც შეიძლება იმუშაოს.

– ოუენ, შენ გადაღლილი და აღგზნებული ხარ, – მშვიდად თქვა კურცმა, – გაჩერდი. რთული ვითარების დაძლევას ჩვენ ერთად შევძლებთ. ჩვენ...

– თუ შენთვის სულერთი არ არის, თამაშიდან გახვალ, – ცივად გააწყვეტინა ოუენმა, – კავშირის დასასრული. ვწყვეტ შენთან საუბარს.

– ეს არ გააკეთო, მეგობარო! – ილრიალა კურცმა, – ეს არ გააკეთო! გიკრძალავ!

გაისმა ხმამალალი ტკაცუნის და დინამიკებმა გაურკვეველი შიშისნი გამოსცა.

– კავშირი გაწყვიტა, – თქვა პერლმუტერმა, – მიკროფონი გამორთო. მიმღები გათიშა. მორჩა.

– მაგრამ ხომ გაიგეთ, რა თქვა? – იკითხა კემბრიმ, – ეს ყველაფერი უაზრობაა. უკან დავბრუნდეთ.

კურცს შუბლზე ძარღვი აუტოკდა.

– გგონიათ, იმის მერე, რაც მოხდა, მის სიტყვებს ვენდობი?

– მაგრამ იგი სიმართლეს ამბობდა, – მოუჭრა კემბრიმ და პირველად შეტრიალდა კურცისკენ მთელი ტანით: ფართოდ გახელილი თვალები, კუთხეებში რიპლისა თუ ბაირუსის – თუ რას ეძახიან – კვალი. კურცის ლოყებს, შუბლსა და ნიღაბს ნერწყვი შეეშხეფა, – მე მესმოდა მისი აზრები! პერლისაც ესმოდა! ის სიმართლეს ამბობს! ის...

კურცმა ელვისებურად, ძლივს შესამჩნევი მოძრაობით ამოიღო ბუდიდან პისტოლეტი და გაისროლა. დახშულ სივრცეში უკუცემდა აფეთქებასავით გაისმა. ფრედიმ მოულოდნელობისგან შეჰყვირა, საჭე ხელიდან გაექცა, „ჰამერმა“ მართვა დაკარგა და დატრიალდა. შეშინებულმა პერლმუტერმა დაიღრიალა და წითელი ლაქებით დაფარული სახე მიაბრუნა. შეიძლება ითქვას, რომ კემბრის სიკვდილში მაინც გაუღიმა ბედმა: მან ხელის აფარებაც ვერ მოასწრო, რომ ტვინი კეფაში გაჩენილი ხვრელით ფანჯარაში გაიტყორცნა და გაიფანტა.

არ ელოდი ხომ, მეგობარო? – გაიფიქრა კურცმა, – უძლური აღმოჩნდა შენი სანაქებო ტელეპათია!

– მართალია, – დაღვრემით ჩაილაპარაკა პერლიმ, – რა უნდა გააწყო იმ ადამიანთან, რომელმაც თვითონაც არ იცის, მომდევნო წამს რას გააკეთებს? გიჟები უმართავი ხალხია.

კურცმა პისტოლეტი ახლა პერლმუტერს დაუმიზნა.

– ერთხელ კიდევ დამიძახე გიჟი. მიდი, მომასმენინე.

– გიჟი! – დაუფიქრებლად გაიმეორა პერლიმ, გაიღიმა და გამოაჩინა დარჩენილი კბილები, რომელთა შორისაც ხვრელები მოჩანდა, – გიჟი-გიჟი-გიჟი. შენ არ მესვრი. ჩემი დუბლიორის მოკვლის შემდეგ საკუთარ თავს ამის უფლებას არ მისცემ.

გალიზიანებულმა პერლიმ ხმას სახიფათო ზღვრამდე აუწია. ფანჯრიდან შემოვარდნილი ცივი ქარი კემბრის ცხედარს კარზე ახეთქებდა, თმასა და ბაირუსს უწეწავდა.

– მოკეტე, პერლი, – მშვიდობიანად უთხრა კურცმა, რომელიც

ცოტათი დამშვიდებულიყო და თავს აშკარად უკეთ გრძნობდა, რადგან მიაჩნდა, რომ კემბრი უარესსაც იმსახურებდა, – მიხედვით შენს პლანშეტს და ჩუმად იყავი. ფრედი!

– დიახ, ბოს.

– შენ კვლავინდებურად ჩემთან ერთად ხარ?

– ბოლომდე, ბოს.

– ოუენ ანდერჰილი მოლაღატეა, ფრედი. შეგიძლია თუ არა, ღმერთს მადლობა შესწირო, რომ მის მხილებამი დაგვეხმარა?

– მადლობა უფალს! – ფრედი სარგადაყლაპულივით იჯდა და გზასა და „ჰამერის“ ფარებისგან შექმნილ სინათლის კონუსებს უყურებდა.

– ოუენ ანდერჰილი საშობლოსა და ამხანაგებს უღალატა. მან...

– მან შენ გიღალატა, – თითქმის ჩურჩულით ჩაილაპარაკა პერლმუტერმა.

– მართალია, პერლი, და ძალიანაც ნუ დაიფასებ თავს, შვილო. ეს ერთადერთია, რის გაკეთებასაც არ გირჩევ, რადგან, როგორც თვითონვე აღნიშნე, გიჟმა არ იცის, მომდევნო წამს თავში რა წამოუფლის.

კურცმა მზერა ფრედის ფართო კეფას მიაპყრო.

– ჩვენ შევიპყრობთ ოუენ ანდერჰილს, მასაც და იმ დევლინსაც, თუკი ის კვლავაც მასთანაა. გასაგებია?

– დიახ, ბოს.

– ჯერჯერობით კი ბალასტი გადავყაროთ, რას იტყვი?

კურცმა ჯიბიდან ხელბორკილის გასაღები ამოიღო და ცხედრისკენ გაიწვდინა. ცოტათი კი დაესვარა გაცივებულ ყელეში, რაც ფანჯრიდან არ გადავარდა და სალონში დარჩა, მაგრამ კარის სახელურს მაინც მიაგნო. კიდევ წამი და მისტერ კემბრის ცხედარი, მადლობა უფალს, თოვლის საბურველში გაეხვია.

ამასობაში, ფრედი გაშმაგებით იფხანდა საზარდულს, რომელიც საშინლად ექავებოდა. ილღიებშიც იგივე შეგრძნება ჰქონდა, და...

თავი ოდნავ მიაბრუნა და დაინახა, რომ პერლი მას მიშტერებოდა. დიდრონი ჩაშავებული თვალები უძირო ჭასავით მოუჩანდა ფერმკრთალ, წითელი ლაქებით მოფენილ სახეზე.

– რას მომშტერებინარ? – ჰკითხა ფრედიმ. პერლმუტერი უსიტყვოდ შეტრიალდა ფანჯრისკენ.

# თავი მეცხრამეტე დევნა გრძელდება

## 1

მისტერ გრეი ადამიანური ემოციებითა და საკვებით გვარიანად დატკბა, აი, ჯოუნსის ნაწლავების დაცლა კი აშკარად არ მოეწონა. არც კი დახედა იმას, რაც გამოაგდო, ოდნავ აკანკალებული ხელე-ბით შარვალი აიწია და შეიკრა.

„ღმერთო ჩემო, ნუთუ არ გამოიწმენდ? – აღშფოთდა ჯოუნსი, – ჩარეცხე მაინც! “

მაგრამ მისტერ გრეის მხოლოდ ერთი რამ სურდა: კაბინიდან სას-წრაფოდ გასვლა. კიდევ კარგი, რომ ხელეები მაინც დაიბანა გასვლის წინ.

ჯოუნსი ძალიანაც არ გაოცებულა, როდესაც კარში პატრულის თანამშრომელს მოჰკრა თვალი.

– შარვლის ბარტყის შეკვრა დაგვიწყებიათ, მეგობარო, – თქვა პოლიციელმა.

– ჰოო? მართლაც! გმადლობთ.



– ჩრდილოეთიდან მოდინხართ, არა? რადიოთი გადმოსცეს, რომ იქ დიდი ამბები ხდება. თუმცა იქაური სადგურები ძნელი დასაჭერია. ზოგი უცხოპლანეტელების ჩამოსვლაზეც ალაპარაკდა.

– მე დერიდან ვარ, – მიუგო მისტერ გრემი, – არაფერი ვიცი.

– შეიძლება გკითხოთ, ასეთ ღამეში სახლიდან რამ წამოგიყვანათ?

უთხარი, რომ მეგობარი გყავს ავად, – გაიფიქრა ჯოუნსიმ და მაშინვე უსიამოვნო ჩხვლეტა იგრძნო. არ სურდა ამის დანახვა, მით უმეტეს – ამაში მონაწილეობა, თუნდაც უნებურად.

– მეგობარი მყავს ავად, – თქვა მისტერ გრემი.

– მართლა? იქნებ თქვენი მართვისა და პირადობის დამადასტურებელი მოწმობა მარ...

უეცრად პოლიციელს თვალები საოცრად დაუმრგვალდა. შეტრიალდა და გაუბედავად გაემართა კედლისკენ, რომლის შესავლელთან ფირფიტა ეკიდა წარწერით: „შნაპი მხოლოდ შორეული გადამზიდავებისთვის“. იქ ცოტა ხანს შედგა, მთელი ტანით აცახცახდა და მკვეთრად და რიტმულად... კაფელზე თავის მირტყმა დაიწყო. პირველ დარტყმაზე „სტეტსონის“<sup>187</sup> ქული მოსძვრა, მესამეზე კლარეტი გადმოსდინდა – ჯერ წვეთ-წვეთად შეგროვდა კრემისფერ ფილებზე, შემდეგ კი მუქ ნაკადულებად წამოვიდა.

ჯოუნსის ძალა არ შესწევდა ამ საშინელების შესაჩერებლად. ტელეფონს მივარდა, მაგრამ ყურმილში არაფერი ისმოდა – მისტერ გრემის ხაზი გადაეჭრა, ან მეორე ულუფა ბეკონის ჭამისას, ან ტუალეტში გასვლის წინ. ჯოუნსი მარტო დარჩა.

## 2

მიუხედავად ზიზლისა, ან იქნებ, ამის გამოც, ჯოუნსის სიცილი აუტყდა, როდესაც მისი ხელები „დაიზარტისს“ ემბლემიანი პირსახო-

---

<sup>187</sup> კოვბოის ქულის მსგავსი შლაპა.

ცით კაფელიდან სისხლის წმენდას შეუდგა. მისტერ გრეიმ ღირსეულად დააფასა ჯოუნსის ცოდნა ისეთ დელიკატურ სფეროში, როგორცაა გვამის გადამალვა (თავიდან მოცილება) და მიხვდა, რომ ოქროს ძარღვისთვის მიეგნო. საშინელებათა ფილმების, დეტექტივებისა და კრიმინალური ამბების ერთგული თაყვანისმცემელი და დიდი მოყვარული ჯოუნსი დროთა განმავლობაში ამ საქმის, თუ შეიძლება ითქვას, ნამდვილი ექსპერტი გახდა. ახლაც კი, როდესაც მისტერ გრეიმ სისხლიანი პირსახოცი პატრულის თანამშრომლის სველ მუნდირზე დააგდო (პოლიციელის ქურთუკი მისი დასახიჩრებული თავის შესაფუთად გამოიყენა), ჯოუნსის თავში ფრედი მაილსის გვამის დამარხვის სცენა უტრიალებდა „ნიჭიერი მისტერ რიპლიდან“ – როგორც ფილმიდან, ისე პატრიცია ჰაისმიტის<sup>188</sup> რომანიდან. ამას სხვა ფილმებიდანაც დაემატა კადრები, რომლებიც ხან გამორჩეულად, ქრებოდა, ხანაც ერთმანეთს ებმოდა, ამან ჯოუნსის თავბრუ დაახვია, ეგონა უფსკრულის პირას იდგა და ქვევით იყურებოდა. ეს კიდეც არაფერი. ჯოუნსის დახმარებით, ნიჭიერმა მისტერ გრეიმ ის აღმოაჩინა, რაც შებრაწულ ბეკონსა და ჯოუნსის გაშმაგების დაუმრეტელ წყაროზე მეტად მოსწონდა.

ეს მკვლელობა გახლდათ.

### 3

საშხაპის უკან გასახდელი მდებარეობდა, იმის იქით – დერეფანი, საიდანაც მძღოლების ღამის გასათევ ოთახში შეიძლებოდა მოხვედრა. დერეფანში კაციშვილი არ ჭაჭანებდა. შორეულ ბოლოში შენობის უკანა ეზოში გასასვლელი კარი მოჩანდა, რომლის მიღმაც თოვლით დაფარული ჩიხი იყო. იქ ორი უშველებელი მწვანე ნაგავსაყრელი იდგა. ერთადერთი ლითონისაბაჟურიანი სუსტი ფარანი თოვლზე წაგრძელებულ ჩრდილებს აჩენდა. მისტერ გრეიმ, რომელიც

---

<sup>188</sup> ამერიკელი მწერალი, ფსიქოლოგიური დეტექტივების ავტორი.

სიტყვის უთქმელადაც ყველაფერს სწრაფად ხვდებოდა, მიცვალებულს ჯიბეები მოუჩხრიკა, მანქანის გასაღები იპოვა, პოლიციელის პისტოლეტი ჯოუნსის ქურთუკის ჯიბეში ჩადო და მეტი საიმედოობისთვის ელვაშესაკრავით ჩაკეტა. კარი თავისით რომ არ მიხურულიყო, მისტერ გრეიმ ის ისევ იმ სისხლიანი პირსახოცით დაამაგრა და გვამი ნაგვის ურნაში მოათავსა.

ამ ყველაფერს – პატრულის თანამშრომლის საზარელ თვითმკვლელობას დერეფანში ჯოუნსის გამოჩენამდე – სულ ათი წუთი დასჭირდა. ჯოუნსიმ სიმსუბუქე და მოქნილობა იგრძნო, დაღლილობა სადღაც გამქრალიყო, ყოველ შემთხვევაში, იმ წუთებში მაინც. ის და მისტერ გრეი ენდოფრინული ეიფორიის მორიგი აფეთქებით ტკბებოდნენ. ახლა ეს „სველი საქმე“ არა მარტო მისტერ გრეის, არამედ გარი ემბროუზ ჯოუნსის სინდისზეც იყო. არა მხოლოდ გვამის თავიდან მოცილების უნარი – პიროვნებაში გაღვიძებული სისხლისმსმელი კაციჭამიას აღტყინებაც, რომელსაც ზემოდან თხელ ფენად ეყარა შაქრის ფხვნილი, სახელწოდებით „ეს სინამდვილეში არ ხდება“. დიახ, მთავარი შემოქმედი მისტერ გრეი იყო – ჯოუნსის სულაც არ ტანჯავდა აზრი, რომ მკვლელობა მან ჩაიდინა, მაგრამ ყველაფერი მისი ხელებით ხდებოდა.

შესაძლოა, ჩვენ ვიმსახურებთ კიდევ განადგურებას, – ფიქრობდა ჯოუნსი, (სანამ მისტერ გრეი საშხაპეში, ჯოუნსის თვალებით, სისხლის დარჩენილ ლაქებს ეძებდა და პოლიციელის გასაღები ჯოუნსის ხელში ჰქონდა ჩაბლუჯულია), – იქნებ ვიმსახურებთ, რომ მოვისპოთ, არარაობად ვიქცეთ, წითელი ბალახით დავიფაროთ, რომელიც ქარის დაქროლვისას შეირხევა. იქნებ ასე ჯობდეს, ღმერთო, შენ გვიშველე.

#### 4

სალაროსთან მჯდომმა დაღლილი შესახედაობის მქონე ქალმა ჯოუნსის ჰკითხა, პოლიციელი ხომ არ გინახავთო.

- ცხადია, ვნახე, - მიუგო ჯოუნსიმ, - მართვის მოწმობა და სხვა საბუთები ვუჩვენე.

- დღეს პოლიცია შუადღის აქეთ დაძრწის, - თქვა ქალმა, - მათთვის სულერთია, ქარბუქია თუ არა. არ გვასვენებენ. საშინლად გაღიზიანებულები არიან. ისევე, როგორც სხვები. უცხოპლანეტელების ნახვა რომ მნდომოდა, ვიდეოკასეტებს ვიქირავებდი. რამე სიახლე ხომ არ გაგიგიათ?

- რადიოთი აცხადებენ, რომ ცრუ განგაშია, - მიუგო მისტერ გრეიმ და ქურთუკი შეიკრა, შემდეგ ფანჯარაში გაიხედა, რათა ერთხელაც დარწმუნებულიყო იმაში, რაც უკვე დაენახა: შუშები ისე დაჭირხლულიყო, რომ ვერავინ შეამჩნევდა, რომელი მანქანით წავიდოდა.

- რას ამბობთ, მართლა? - შვებით გაეღიმა ქალს და თვალსა და ხელს შუა ათი წლით გაახალგაზრდავდა, დაღლილობაც გაუქრა.

- დიახ. თქვენს მეგობარს კი ცოტა შეაგვიანდება, ძვირფასო. ასე თქვა, სერიოზული მუშაობა მომიწევს, რომ დავიცალოო.

ქალს წარბებს შორის ნაოჭი გაუჩნდა.

- ასე თქვა?

- ღამე მშვიდობის. მაღლიერების დღეს გილოცავთ. ბედნიერ შობას გისურვებთ. ღმერთმა მრავალ ახალ წელს დაგასწროთ.

ჯოუნსი უეცრად მიხვდა - ამ სისულელეს იმიტომ ამბობდა, რომ შეემჩნიათ და დაემახსოვრებინათ. დაიმახსოვრეს კიდევ. მაგრამ სანამ გაიაზრებდა, დაიმახსოვრეს თუ არა, ხედი ოფისის ფანჯრიდან ას ოთხმოცი გრადუსით შეტრიალდა - მისტერ გრეიმ იგი სალაროს მოაცილა და ახლა კვლავ სამხრეთისკენ მიიჩქაროდნენ. საპატრულო მანქანის თოვლსაწინააღმდეგო ჯაჭვები გამუდმებით წკარუნებდა, სამაგიეროდ, საშუალებას აძლევდა, საათში ორმოცი მილის სიჩქარით ევლოთ.

ჯოუნსიმ იგრძნო, რომ მისტერ გრეიმ გონების საცეცები უკან გაიწვდინა. მას შეეძლო ჰენრის ტვინს შეხებოდა, მაგრამ შიგნით ვერ

შეაღწევა – ჰენრი, ჯოუნსის მსგავსად, დანარჩენი ადამიანებისგან ერთგვარად განსხვავდებოდა. სამაგიეროდ, ჰენრისთან ერთი კაცი იყო – ოვერჰილი თუ ანდერჰილი, რომელსაც მისტერ გრეი აუცილებლად ჩაავლებდა. ისინი აქედან სამოცდაათი ან მეტი მილის დაშორებით იმყოფებოდნენ... და გზატკეცილიდან გადაუხვიეს? დიახ, დერისკენ მიემართებოდნენ.

მისტერ გრეიმ უფრო ღრმად შეაღწია და ახალი მღევრები აღმოაჩინა. სამნი იყვნენ... მაგრამ მათი ძირითადი სამიზნე არა მისტერ გრეი, არამედ ოვერჰილი (ანდერჰილი) იყო. ჯოუნსის ეს დაუფერებელ და აუხსნელ ფაქტად მოეჩვენა, სამაგიეროდ, მისტერ გრეი ალფრთოვანდა. იგი არც კი დაინტერესებულა, რატომ გადაწყვიტეს ოვერჰილმა (ანდერჰილმა) და ჰენრიმ დერიში შეველა.

ახლა მისტერ გრეის მთავარი საზრუნავი მისი მანქანის თოვლსაწმენდით შეცვლა იყო, თუ, რა თქმა უნდა, ჯოუნსის მისი მართვა შეეძლო. ეს კი მორიგ მკვლელობას ნიშნავდა, მაგრამ გაადამიანურებისკენ სწრაფად მქროლავ მისტერ გრეის ეს სულ არ ადარდებდა.

მისტერ გრეი თანდათანობით აზარტში შედიოდა.

## 5

ოუენ ანდერჰილი ფერდობზე დგას, ახლოს მილთან, რომელიც ფოთლებიდან იყურება, და ხედავს, როგორ ეხმარებიან ბიჭები მოთხუპნილ, დაბნეულ გოგონას ამოძრომაში. ხედავს, როგორ ეხვევა მას დადიტის (ჩასკვნილი ახალგაზრდა კაცი ფეხბურთელის მხრებითა და კინოვარსკვლავისთვის დამახასიათებელი, უჩვეულოდ ხშირი ქერა თმით) და ჭუჭყიან სახეზე გემრიელად კოცნის. ესმის გოგონას პირველი სიტყვები:

– დედასთან მინდა.

ყველაფერი კარგად დასრულდა: არც პოლიციის გამოძახება დასჭირდათ, არც – სასწრაფო დახმარების. ისინი გოგონას მხოლოდ იმა-

ში ეხმარებიან, რომ მილს თავი დააღწიოს, ლობეში გაძვრეს, გადაკვეთოს სტროფორდ-პარკი (ყვითელბლუზიანი გოგონები მწვანებლუზებიანებს შეუცვლიათ, თუმცა არც ისინი და არც მათი მწვრთნელები ყურადღებას არ აქცევენ ბიჭებსა და მათ მოთხუპნილ, თმაგაწეწილ პრიზს), გაიაროს კანზასსტრიტზე და მეიპლეინზე შეუხვიოს. მათ იციან, სად არის ჯოზის დედა. და მამაც.

და არა მხოლოდ ისინი. მეიპლეინის ორივე მხარეს, კუთხემდე, მანქანების ჯაჭვია – რობერტა ქვევლმა მოიფიქრა, ჯოზის მეგობრებისა და კლასელების მშობლებისთვის დაერეკა. იგი დარწმუნებულია, რომ ყველანი მიიღებენ მონაწილეობას გოგონას ძებნაში და ქალაქში მისი დაკარგვის შესახებ განცხადებებს გააკრავენ. არა მოფარებულ ადგილებში (დერის მოქალაქეების აზრით, მათი ადგილი სწორედ იქაა), არამედ, სადაც მათ ყველა დაინახავს. რობერტას ერთუზიანში ისეთი გადამდებია, რომ ელენ და ჰექტორ რინკენჰაუერებს იმედის ნაპერწკალი უჩნდებათ.

დანარჩენი მშობლებიც მზად არიან აქტიური მოქმედებისთვის, თითქოს, მხოლოდ ამის თქმას ელოდებოდნენ. რობერტა სახლიდან ბიჭების გასვლისთანავე შეუდგა რეკვას (მას ეჭვი არ ეპარება, რომ ისინი სადღაც შორიანლოს თამაშობენ, რადგან ჰენრის ბებერი ჯაგლაგი კვლავ სადარბაზოსთან მისასვლელ გზაზე დგას). იმ დროისთვის, როცა ისინი ბრუნდებიან, სასტუმრო ოთახში ოცამდე სტუმარია, რომელიც ორთქლმავალივით ბოლავს და ყავას მიირთმევს. მამაკაცი, რომელიც ჰენრის ადრეც უნახავს, სიტყვით გამოდის. ეს ადვოკატი დეივ ბოკლინია. მისი ვაჟიშვილი, ქენდალი, ზოგჯერ, დადიტსთან ერთად თამაშობს. ქენიც დაუნია, კარგი ბიჭია, მაგრამ დადსამდე ბევრი აკლია. ისე, სიმართლე რომ ითქვას, განა დადიტს ვინმე შეედრება?

ბიჭები სასტუმრო ოთახის კარებში დგანან, ჯოზი შუაში ჩაუყენებიათ. გოგონამ დადიტს უკვე გამოართვა თავისი ჩანთა და ბარ-

ბიკენი. სახეც თითქმის სუფთა აქვს, რადგან ბივერმა, ამდენი მანქანის დანახვაზე საკუთარი ცხვირსახოცი გასწირა, რათა გოგონასთვის ჭუჭყი მოეცილებინა. ("რომ არ დაგიმალოთ, – იტყვის ბივი მოგვიანებით, როცა ყვირილი, შეცხადება, ცრემლი და მთელი ის აურზაური გადაივლის, – თავს, ცოტა არ იყოს, უხერხულად ვგრძნობდი. ვიდექი და სახეს ვუწმენდდი ისეთი შესანიშნავი აღნაგობის გოგონას, „ფლეიბოსი“ ყდასაც რომ დაამშვენებდა, თუმცა ჭკუა გაზონსაკრეჭზე მეტი არ ჰქონდა.") თავდაპირველად მათ ვერავინ ამჩნევს, მისტერ ბოკლინის გარდა, მაგრამ ეს უკანასკნელი, როგორც ჩანს, ისეა გატაცებული საკუთარი სიტყვით, რომ ნანახს ვერ აცნობიერებს.

– მაშასადამე, უპირველეს ყოვლისა, ჯგუფებად დავიყოფით... თითოში, ვთქვათ, სამი წყვილი... წყვილი იყოს... და ჩვენ... ჩვენ... ჩვენ...

მისტერ ბოკლინი სულ უფრო და უფრო ნელა ლაპარაკობს – იმ სათამაშოს ჰგავს, დაქოქვა რომ სჭირდება. ბოლოს და ბოლოს, ქვევლების „ტელეაუდიტორიის“ წინაშე გაჩერდება და გამტერებული იყურება. ოთახში მოუსვენარი ჩურჩული იწყება: იქ მყოფნი ვერაფრით მიმხვდარან, რა დაემართა ადამიანს, რომელიც სულ რაღაც ერთი წუთის წინ ასე თავდაჯერებულად გამოიყურებოდა.

– ჯოზი, – ყრუდ, ყოველგვარი გამოთქმის გარეშე წარმოთქვამს იგი, რაც არაფრით ჰგავს მის მტკიცე ხმას სასამართლო დარბაზში გამოსვლისას.

– დიახ, – თავს უქნევს ჰექტორ რინკენჰაუერი, – მას ასე ჰქვია. რა მოხდა, დეივ? ხომ კარგად...

– ჯოზი, – იმეორებს დეივი და აცახცახებულ ხელს მალლა სწევს. ჰენრი (და, შესაბამისად, ოუენიც, რომელიც ამ ყველაფერს ჰენრის თვალებით ხედავს) მას იმ შობის მოჩვენებას ამსგავსებს, ებენეზერ სქერუჯის<sup>189</sup> საფლაგზე რომ უთითებს.

---

<sup>189</sup> ჩარლზ დიკენსის მოთხრობის, „საშობაო სიმღერის“, მთავარი პერსონაჟი.

ჯერ ერთი მშობელი მიტრიალდება კარისკენ, შემდეგ – მეორე... მესამე... ელფი ქვეველიც, რომლის დიდი თვალები სათვალისადაც ურწმუნოდ იყურება... ბოლოს კი მისის რინკენჰაუერიც.

– მე ვარ, დე, – ამბობს ჯოზი, თითქოს არაფერი მომხდარაო და მას ჩანთას უწვდის, – დადიმ ჩემი ბარბიკენი იპოვა. მე გავიჭედე...

ქალების სინარულის გამომხატველ წივილ-კივილში აღარაფერი ისმის. ჰენრის ასეთი ხმაური ცხოვრებაში არ მოუსმენია და თუმცა, ყველაფერი კარგადაა, რატომღაც კანკალებს.

– ბარემ მიხმარე, ფრედი, – თავისთვის ბურტყუნებს ბივერი.

ჯოუნსის ხელი ჩაუკიდია დადიტისთვის, რომელსაც ეს არეულობა ცოტათი აფრთხობს.

პიტი ჰენრის შესცქერის და თავს უქნევს: „მაგრები ვართ“.

ჰენრიც თავის დაქნევით პასუხობს: „აბა, რა!“

შესაძლოა, ეს მათი დიდების წუთი არ არის, მაგრამ რაღაც ამის მსგავსია. აქვითინებული მისის რინკენჰაუერი ქალიშვილს მკერდში იკრავს. ჰენრი დადიტს მხარზე ეხება და, როდესაც იგი მისკენ ტრიალდება, ლოყაზე კოცნის.

კეთილი, ბებერი დადიტსი, – ფიქრობს ჰენრი, – კეთილი, ბებერი...

## 6

– აი ისიც, ოუენ, – წყნარად ამბობს ჰენრი, – 27-ე მოსახვევი.

ქვევლების სასტუმრო ოთახის სურათი საპნის ბუშტივით გასკდა და ოუენმა საგზაო ნიშანს შეხედა: „27-ე მოსახვევი, კანზას სტრიტი, მარჯვენა მხარეს გადადით“.

ყურებში კვლავაც ბედნიერი და მხიარული შეძახილი ჩაესმის.

– კარგად ხარ? – ჰკითხა ჰენრიმ.

– ჰო. ყოველ შემთხვევაში, ასე მეჩვენება, – მან საჭე მარჯვნივ აიღო და „ჰამერის“ უზარმაზარი ბორბლები თოვლში გასრიალდა.



ხელსაწყობების პანელზე საათი არ მუშაობდა, ისევე, როგორც ჰენ-რის მაჯაზე, მაგრამ ოუენს მოეჩვენა, რომ ცა ოდნავ განათდა, – დაშვების შემდეგ მარჯვნივ ავილო თუ მარცხნივ? ახლავე მითხარი. თორემ მერე გაჩერება საფრთხის შემცველია.

– მარცხნივ, მარცხნივ.

ფარნების მოციმციმე შუქში ოუენმა საჭე მარცხნივ აილო, მორიგი ნამქერიც დასძლია და კანზასსტრიტს გაუყვა. აქ ცოტა ხნის წინ თოვლსაწმენდს გაევლო, მაგრამ გზის საფარი ახალ თოვლს დაეფარა.

– როგორც ჩანს, თოვას მალე გადაიღებს, – თქვა ჰენრიმ.

– ჰო, მაგრამ ქარმა აიწყვიტა. გინდა, რომ მალე ნახო, არა? დადიტს ვგულისხმობ.

– ცოტათი ვნერვიულობ, მაგრამ, ალბათ, ეგრეა, – გაიღიმა ჰენრიმ და თავი დააქნია, – დადიტსი... მის გვერდით თავს უკეთ ვგრძნობ. იგი ტრიბლს<sup>190</sup> ჰგავს. ამაში თავადაც დარწმუნდები. ოღონდ ცუდი ის არის, ასეთ უდროო დროს რომ დავადგებით თავს.

ოუენმა მხრები აიჩეჩა. „სხვა რა გზა გვაქვს ” , ,, – თქვა უსტიტ.

– უკვე ოთხი წელია, ახალ ბინაში ცხოვრობენ, მე კი იქ ერთხელაც არ ვყოფილვარ, – ჩაილაპარაკა ჰენრიმ და, უნებურად, აზრებით ურთიერთობაზე გადაერთო: „ელფის სიკვდილის შემდეგ გადავიდნენ“.

„შენ“... – და სიტყვების ნაცვლად სურათი გაჩნდა: შავებში გამოწყობილი ხალხი შავი ქოლგებით. დაკრძალვისას წვიმს. კუბოზე წარწერა: „მშვიდად განისვენე, ელფი“.

„არა, – დარცხვენით ამბობს ჰენრი, – ვერც ერთი ვერ დავესწარი“.

„?“

მაგრამ ჰენრიმ არ იცოდა, რატომ არ იყვნენ დაკრძალვაზე, თუმცა თავში ასეთი ფრაზა მოუვიდა: „ბედისწერის თითი წერს და წერს,

---

<sup>190</sup> სამყაროს მომავალზე ამერიკული სერია „ვარსკვლავური გზის“ პერსონაჟი.

არ ჩერდება, წერას წამითაც არ წყვეტს”<sup>191</sup>. დადიტის მისი ბავშვობის მნიშვნელოვანი (უფრო სწორად, „სასიცოცხლოდ მნიშვნელოვანი“) ნაწილი იყო, მაგრამ როგორც კი კავშირი გაწყდა, წარსულთან დაბრუნება მტკივნეული აღმოჩნდა. და არა მარტო მტკივნეული, არამედ – უსარგებლოდ მტკივნეულიც. ახლა ჰენრი რალაცას ხვდებოდა: ის სახეები, რომლებსაც დეპრესიასა და გარდაუვალ თვითმკვლელობაზე ფიქრს უკავშირებდა, – მამის ნიკაპზე ჩამოღვრილი რძე, კაბინეტიდან გაქცეული ბარი ნიუმენის უშველებელი საჯდომი, – სიზმართმჭერის უფრო ძლიერ და ქმედით სახეს ფარავდა. განა, ეს არ იყო მისი სასოწარკვეთილების რეალური წყარო? სიზმართმჭერის თეორიის სილიადის შერწყმა ბანალობასთან, რომლისთვისაც ის გამოიყენებოდა. დადიტის შესაძლებლობების გამოყენება მხოლოდ ჯოზი რინკენჰაუერის მოსაძებნად იმისი ტოლფასი იყო, კვანტური ფიზიკით მხოლოდ ვიდეთამაშების შესაქმნელად რომ ესარგებლათ. თანაც ეფიქრათ, რომ მას მეტი არაფერი შეეძლო. რა თქმა უნდა, კეთილი საქმე გააკეთეს, მათ გარეშე ჯოზი რინკენჰაუერი მილში ისე დაიღუპებოდა, როგორც ვირთხა – წყლით სავსე კასრში. მაგრამ, მოდით, გულახდილი ვიყოთ – ბოლოს და ბოლოს, მათ ხომ მომავალი ნობელის პრემიის ლაურეატი არ გადაურჩენიათ...

„ვერ ვასწრებ იმის გააზრებას, რაც შენს თავში ხდება, – დაიწუწუნა მოულოდნელად ოუენმა, – მაგრამ, როგორც ჩანს, ძალზე დიდი წარმოდგენა გაქვს საკუთარ თავზე. რომელი ქურჩაა?“

თავმოყვარეობაშელახულმა ჰენრიმ გაბრაზებით შეხედა.

– ბოლო ხანს, მის სანახავად არ ჩამოვსულვართ, გასაგებია? და მოვრჩეთ ამაზე ლაპარაკს.

– კარგი, – მიუგო ჰენრიმ.

– მაგრამ ყოველწლიურად ვუგზავნიდით მისალოც ბარათებს საშობაოდ, ხომ გესმის? ყოველწლიურად. ამიტომაც ვიცი, რომ ისინი ვესტსაიდში, ღირბორნსტრიტის 41-ში გადავიდნენ. მესამე ქურჩაა

---

<sup>191</sup> ომარ ხაიამის ლექსი.

აქედან.

- კარგი, დამშვიდდი.
- ახლა კი გაჟიმე დედაშენი და ჩაძალდი.
- ჰენრი...

- ჩვენ უბრალოდ კავშირი დავკარგეთ. ასე ხდება ხოლმე. შესაძლოა, ასეთი რამ შენნაირ კეთილშობილ მისტიკერ სრულყოფილებას არასდროს ემართება, მაგრამ დანარჩენ ხალხს... დანარჩენ ხალხს...  
- ჰენრიმ თავი ჩალუნა, თავისი მომუშტული ხელები დაინახა და ძალა მოიკრიბა, რომ თითები გაეშალა.

- ხომ ვთქვი, გვეყოფა-მეთქი.

- შესაძლოა, მისტიკერ სრულყოფილებას დღემდე არ დავიწყებია ერთი მეგობარიც კი, მათ შორის ისინიც, ვის გვერდითაც ღამის ქოთანზე იჯდა. ალბათ, წელიწადში ერთხელ აუცილებლად იკრიბებოდა, რათა ლიფები გაცვალოთ, „მოტლი ქრიუს“<sup>192</sup> ჩანაწერებით თავი მოიწონოთ და თინუსის სალათა მიირთვათ, როგორც ამას სკოლის კაფეტერიაში აკეთებდით.

- მაპატიე, თუ გაწყენინე.

- მიკბინე, რამდენიც გენებოს. მე არ მწყინს. ისე იქცევი, თითქოს უპატრონოდ მივაგდეთ, როგორც უკანასკნელმა... - რაც სიმართლისგან არც ისე შორს იყო.

ოუენმა არაფერი უპასუხა. გზას გაჰყურებდა, სადაც თოვლის კორიანტელი იდგა - ეშინოდა, განთიადის ბინდბუნდში აბრა არ გამოჩენოდა ქუჩის დასახელებით... აგერ ისიც! კანზასსტრიტზე გავლილ თოვლსაწმენდს თოვლი დირბორნის ბოლოში მიეყარა, მაგრამ ოუენი იმედოვნებდა, რომ „ჰამერი“ მას მაინც გაუმკლავდებოდა.

- კი არ დამვიწყებია, - განაგრძო ჰენრიმ, ჯერ გონებაში, შემდეგ კი სიტყვებით. დადიტსზე ფიქრი საკუთარი თავის გაცემას ნიშნავდა, - ჩვენ ყველას გვახსოვდა იგი. მე და ჯოუნსი გაზაფხულზე მის

---

<sup>192</sup> ამერიკული გლემმეტალ ჯგუფი, დაარსდა ლოს-ანჯელესში 1981 წელს.

ნახვას ვაპირებდით. მაგრამ ჯოუნსი ავარიაში მოჰყვა და მე ყველაფერი გადამავიწყდა. ნუთუ ეს გასაკვირია?

– სულაც არა, – რბილად თქვა ოუენმა და მკვეთრად მოუხვია ჯერ მარჯვნივ, შემდეგ კი მარცხნივ, რათა მანქანას ბუქსაობა არ დაეწყო, და აქსელერატორს დააწვა. „ჰამერი“ ისეთი ძალით შეეჯახა თოვლის სქელ კედელს, რომ ორივენი სავარძლის საზურგეებს მიეხეთქნენ, მაგრამ მძღავრმა მანქანამ მაინც გაარღვია ნამქერი და ოუენმა ძლივს მოახერხა მისი შუა ქურჩაზე გაყვანა, თორემ გზის გასწვრივ დაყენებულ ავტომობილებს შეეჯახებოდა.

– არ მსურს, იმ ადამიანის თუნდაც სამართლიანი აღშფოთების ობიექტი ვიყო, რომელიც ასობით უდანაშაულო ადამიანის ცოცხლად შეწვას აპირებდა, – ჩაიბურტყუნა ჰენრიმ.

ოუენმა ორივე ფეხი დააჭირა მუხრუჭს, რის გამოც მანქანა ძლიერად შეჯანჯღარდა და ზიგზაგებით წავიდა.

– მოკეტე, შენი...

„შეეშვი იმაზე ლაპარაკს, რაც არ გესმის“.

– სავსებით შესაძლებელია, რომ...

„ჩავძალღდე კიდევ“...

– შენ გამო. ამიტომ იქნებ, შენთვის შეინახო ეგ...

„შენი თვითკმაყოფილი“...

(ჭირვეული ბავშვის გამოსახულება წინ წამოწეული ქვედა ტუჩით).

– რაციონალური აბდაუბდა.

მოულოდნელობისგან განცვიფრებული ჰენრი ოუენს მიაჩერდა. ნეტავ, როდის მიმართეს მას ასეთი კილოთი უკანასკნელად? არასდროს მიუმართავთ.

– მე მხოლოდ ერთი მჭირდება, – აუხსნა დაღლილობისგან გაფითრებულმა ოუენმა. ლოყები ჩაცვივნოდა, კანი ყვრიმალეებზე მოჭიმვოდა, – შენი ტიფიანი ჯოუნსის პოვნა და შეჩერება. გასაგებია? და ჯანდაბას შენი ფაქიზი გრძნობები, ჯანდაბას, თუ დაღლილი ხარ,

ჯანდაბამდე გზა გქონია. აი, ასე.

– კარგი, – დაეთანხმა ჰენრი.

– არ მსურს ეთიკასა და მორალზე ლექციის მოსმენა იმ ადამიანისგან, რომელსაც საკუთარი სუპერგანათლებული და ზემგრძნობიარე ტვინის გასხმა გადაუწყვეტია.

– კარგი.

– ამიტომ გაჟიმე დედაშენი და ჩაძაღლდი.

„ჰამერში“ სიჩუმე ჩამოვარდა. აღარაფერი ისმოდა, ფანჯრებს მიღმა ქარის მტვერსასრუტის ზუზუნის გარდა.

– აი, როგორ მოვიქცეთ, – თქვა ბოლოს ჰენრიმ, – მე დედაშენს გავჟიმავ და ჩავძაღლდები; შენ დედაჩემს გავჟიმავ და ჩაძაღლდები. ამგვარად სისხლის აღრევას თავიდან ავიცილებთ.

ოუენს უნებურად გაელიმა. ჰენრიმაც ღიმილით უპასუხა.

„შეგიძლია მითხრა, რას აკეთებენ ჯოუნსი და მისტერ გრეი?“ – ჰკითხა ოუენმა.

ჰენრიმ ტუჩებზე ენა მოისვა. ფეხი თითქმის არ ექავებოდა, მაგრამ ენა პირში ძველი დაძენძილი ნოხის ნაჭერივით ეღო.

– არა. მათ კავშირი გაწყვიტეს. ეს გრეის ოინებს ჰგავს. შენი უშიშარი ბელადი კურცი კი, ალბათ, გვიახლოვდება, არა? – ჰო. და თუ ლიდერობის შენარჩუნება გვსურს, უნდა მოვუჩქაროთ.

– ასე მოვიქცეთ.

ოუენმა სახიდან წითელი ფენა მოიფხიკა, თითებიდან ჩამოცვენილ ბეწვებს თვალი გააყოლა და სიჩქარეს მოუმატა.

„41 ნომერი თქვი, არა?“

„ჰო. ოუენ?“

„რა?“

„მეშინია“.

„დადიტის?“

„რალაც მაგის მსგავსი“.

„რატომ?“

„არ ვიცი“.

ჰენრიმ ოუენს დაღვრემით შეხედა.

„გული მიგრძნობს, რომ რაღაც ცუდი სჭირს“.

## 7

შუალამის სიზმარი მოულოდნელად გაცხადდა და როდესაც კარზე დააკაკუნეს, რობერტამ აღმოაჩინა, რომ ფეხები არ ემორჩილებოდა. თითქოს მოეკვითა. ლამის წყვილიანი შუბლშეკრული განთიადის მქრქალმა, კიდევ უფრო სევდის მომგვრელმა სინათლემ შეცვალა და მიცვალებულები, პიტი და ბივი, მისი შვილის წასაყვანად მოვიდნენ.

კარზე მუშტით დააბრაზუნეს, ერთხელ, მეორედ – ისეთი ძალით, რომ ფოტოსურათებიც კი შეიერხა, განსაკუთრებით ჩარჩოში ჩასმული ადგილობრივი „ნიუსის“ პირველი გვერდი დადიტის, მისი მეგობრებისა და ჯოზი რინკენჰაუერის ფოტოსურათით. ექვსივენი ხელიხელგადახვეულნი დგანან ერთად, ყურებამდე გაღიმებულები (რა მშვენივრად გამოიყურებოდა დადიტი ამ სურათზე, როგორი ძლიერი და ნორმალური იყო), ქვემოთ კი წარწერაა დიდი ასოებით: „სკოლის მეგობრები დეტექტივობანას თამაშობენ, დაკარგული გოგონა ნაპოვნია“.

„ბახ! ბახ! ბახ! “

არა, – გაიფიქრა ქალმა, – ჩუმი ვიჯდები და ადრე თუ გვიან წავლენ, უნდა წავიდნენ. ხომ არ შემიძლია, მიცვალებულები შემოვიპატიჟო და თავი ისე მოვაჩვენო, თითქოს...

მაგრამ უცებ დადიტსმა გაირბინა – ჩაიქროლა, თუმცა ბოლო დროს სიარულიც კი უჭირდა. თვალებში უწინდელი, ენით გამოუთქმელი ნათელი ჩასდგომოდა. რა კარგი ბიჭები იყვნენ, რამდენი ბედნიერება მოუტანეს მას, მაგრამ ახლა ცოცხლები აღარ არიან და ამ საშინელ ქარბუქში ესტუმრნენ – მიცვალებულები...

– არა, დადი! – შესძახა ქალმა, მაგრამ შვილმა, თითქოს არაფერი

გაუგონიაო, ისე ჩაურბინა ძველ ფოტოსურათს – დადიტს ქეველი პირველ გვერდზე, დადიტს ქეველი გმირია, სასწაულები ხდება – და რობერტას ესმის, როგორ ალებს იგი კარს და ყვირის:

– ენი! ენი! ენი!

## 8

ჰენრიმ პირი დაალო, რამე რომ ეთქვა, მაგრამ ვერაფერი მოიფიქრა. მეხდაცემულივით იდგა და სიტყვას ვერ ძრავდა. ეს დადიტსი არ იყო, შეუძლებელია, დადიტსი ყოფილიყო – უფრო მის ავადმყოფ ბიძას ან უფროს ძმას ჰგავდა, გაფითრებულს მელოტ თავზე „რედ სოქსის“ კეპი ირიბად ეხურა, სახეზე წვერი წამოზრდოდა, ცხვირქვეშ სისხლი შეხმოხოდა, თვალეხეხვებში შავი წრეები მოუჩანდა. და მაინც...

– ენი! ენი! ენი!

კარში მდგომი მაღალი, სახეგაფითრებული უცნობი ჰენრის დადიტსის ძველებური ექსტრავაგანტურობით გადაეხვია და კინალამ უკან, დათოვლილ ზღურბლზე მიაგდო, არა სიმძიმით – ის ბუმბულივით მსუბუქი იყო, არამედ იმიტომ, რომ ჰენრი ამას არ ელოდა და ოუენს ხელი რომ არ შეეშველებინა, ორივენი თოვლში აღმოჩნდებოდნენ.

– ენი! ენი!

სიცილ-ტირილით ხმამაღლა კოცნის ძველი დადიტსივით. სადღაც ღრმად, მეხსიერების საცავეებში, ბივერ კლარენდონმა ჩაიჩურჩულა: „თუ თქვენ, ბიჭებო, ვინმესთან წამოგცდებათ“... რასაც ჯოუნსის გესლიანი რეპლიკა მოჰყვა: „ჰო, შენ აღარასდროს დაიჭერ ჩვენთან საქმეს, დამპალო ონანისტო“... დიახ, ეს დადიტსია, დადიტსი კოცნის ჰენრის წითელი კეთრის ლაქებით დაფარულ ლოყებზე... მაგრამ რატომ არის ასეთი ფერმკრთალი? და საშინლად გამხდარი... არა, რაღაცნაირად ილაჯგაწყვეტილი, ნესტოებში სისხლი, სუნი – არა ისეთი, როგორიც ბეკი შუს ასდიოდა, არც ბაირუსის სიმყრალე,

მაგრამ მაინც სიკვდილის სუნი.

რობერტაც იქ იყო. შემოსასვლელში იდგა სურათის გვერდით, რომელიც დადიტსა და ელფის „დერის დღეებზე“ გამართულ კარნავალზე გადაეღოთ. ბედნიერი და მხიარული სახით ისხდნენ კარუსელის ხელოვნურ ცხენებზე.

ელფის დაკრძალვაზე არ მოვედი, სამაგიეროდ, ღია ბარათი გამოვგზავნე, – გაიფიქრა ჰენრიმ და საკუთარი თავი შეზიზლდა.

რობერტა ხელებს იმტვრევდა და მას ცრემლიანი თვალებით შესცქეროდა. მკერდი და თეძოები ოღნავ მოსუქებოდა, თმა თითქმის გაჭაღარავებოდა, მაგრამ მისი ცნობა მაინც ადვილი იყო. აი, დადიტსი კი... ღმერთო ჩემო, დადიტსი...

ჰენრი ქალს მისჩერებოდა, თან მხრებზე ეხვეოდა ძველ მეგობარს, რომელიც წამდაუწუმ მის სახელს გაიძახოდა. ბოლოს გაბედა, დადიტსს ხელი მოუთათუნა და წამსვე შეიგრძნო მისი ძვლების სიმყიფე, რომელიც, თითქოს, ცოტაც და დაიმსხვრეოდა.

– რობერტა, – თქვა მან, – რობერტა! ღმერთო, რა სჭირს?

– მლღ, – მიუგო ქალმა და გაღიმება სცადა, – სარეცხი ფხვნილის სახელწოდებას ჰგავს, არა? მწვავე ლიმფოციტური ლეიკოზი. დიაგნოზი ცხრა თვის წინ დაუსვეს. მკურნალობა დაგვიანებული აღმოჩნდა. ისლა დაგვრჩენია, ცოტაოდენი დრო მოვიგოთ.

– ენი! – შესძახა დადიტსმა. განაცრისფრებულ და დაღლილ სახეს კვლავაც სულელური ღიმილი უნათებდა, – აალი დე, იივე აავი.

– სწორია, – უთხრა ჰენრიმ და ტირილი წასკდა, – ახალი დღე, იგივე ნაგავი.

– ვიცი, აქ რატომაც ხართ, – თქვა რობერტამ, – მაგრამ არ გინდათ. გთხოვ, ჰენრი. გვედრები. არ წაიყვანოთ ჩემი ბიჭი. ის კვდება.



კურცი უკვე აპირებდა, პერლმუტერისთვის ანდერჰილისა და მისი ახალი მეგობრის – მას ჰენრი ერქვა, ჰენრი დევლინი – გადაადგილების შესახებ ეკითხა, როდესაც პრელიმ ხმამაღლა დაიყვირა და სახე „ჰამერის“ ქერს მიაპყრო. ერთხელ, ნიკარაგუაში ყოფნისას, კურცი ვილაც ქალს მოლოგინებაში დაეხმარა (ისინი კი მაინც „ცუდ ბიჭებს“ გვეძახდნენ, – გაიფიქრა მან სენტიმენტალურად), და ამ ყვირილმა სწორედ ის შემთხვევა გაახსენა – მშვენიერი მდინარე იუვენის ნაპირზე.

– გამაგრდი, პერლი! – შესძახა კურცმა, – გამაგრდი, მეგობარო! ღრმად ისუნთქე, მიდი!

– წადი, შენი! .. – დაიყვირა პერლიმ, – შეხედე, რა შარში გამხვიე, ბებერო ნაბიჭვარო! შენი დედაც! ..

კურცს ეს არ სწყენია. მელოგინე ქალები ზოგჯერ საშინელ სიტყვებს ამბობდნენ და თუმცა, პერლი სუსტ სქესს არ მიეკუთვნებოდა, კურცს რატომღაც მოეჩვენა, რომ მისი ტანჯვა სამშობიარო ჭინთვებისგან ბევრით არაფრით განსხვავდებოდა. იქნებ, ღირდა კიდევ მისი გათავისუფლება ამ წვალებისგან...

– აბა, სცადე, – დაიკვნესა პერლიმ და აწითლებულ ლოყებზე სიმწრის ცრემლები ჩამოუგორდა, – გირჩევ, ეს არ გააკეთო, ბებერო ხვლიკო!

– ნუ ღელავ, ბიჭუნო, – სცადა მისი დამშვიდება კურცმა და პერლმუტერს აცახცახებულ მხარზე მოეფერა. წინიდან თოვლსაწმენდი მანქანის თანაბარი ჟღარუნი ისმოდა: კურცმა მძლოლი დაიყოლია, გზა გაეწმინდა (როგორც კი განთიადმა უხასიათოდ გაანათა ცა, მანქანის სიჩქარე საათში თავბრუდამხვევ ოცდათხუთმეტ მილამდე გაიზარდა). თოვლსაწმენდის გაბარიტული შუქი დაბინდული წითელი ვარსკვლავებივით ციმციმებდა.

კურცი წინ გადაიწია და ანთებული თვალებით მიაშტერდა პერლმუტერს. უკანა სავარძელზე ძალიან ციოდა, გატეხილი ფანჯრიდან ქარი უბერავდა, მაგრამ კურცი ვერაფერს ამჩნევდა. პერლის

ქურთუკი წინიდან ბუშტივით იბერებოდა და კურცმა კვლავ პისტოლეთი მოიმარჯვა.

– ბოს, თუ ის კიდევ...

ფრედის ჯერ სიტყვა არ დაესრულებინა, რომ პერლმუტერმა გამაყრუებლად გააკუა. კაბინაში წამსვე აუტანელი, საზიზღარი სუნი გავრცელდა, მაგრამ პერლიმ, როგორც ჩანს, ვერაფერი იგრძნო. თავი აქეთ-იქით უქანავებდა, თვალეები ნახევრად დაეხუჭა, სახეზე უზომო შვება აღბეჭდოდა.

– ოჰ, შენი დედაც! .. – შესძახა ფრედიმ და კვლავ დაუშვა ფანჯარა, მიუხედავად საშინელი ორპირი ქარისა.

კურცი მოჯადოებულებით შეჰყურებდა, უზომოდ გაბერილი მუცელი თვალსა და ხელს შუა როგორ დაპატარავდა, ოღონდ – ბოლომდე არა, და, იქნებ, ასე ჯობდა კიდევ. ქმნილება, რომელიც პერლმუტერის შიგნით იზრდებოდა, შესაძლოა, გამოსდგომოდა. დანამდვილებით ვერაფერს იტყოდა, მაგრამ ამგვარ შესაძლებლობას არ გამორიცხავდა. ბიბლიის თანახმად, ყველა არსება ღმერთს ემსახურებოდა და ეს ტრაწიანი სინდიოფალები გამონაკლისი ხომ არ იქნებოდნენ.

– გამაგრდი, ჯარისკაცო, – გაიმეორა კურცმა და ერთი ხელი პერლმუტერს მხარზე გადაუსვა, მეორით კი პისტოლეთი გვერდით დაიდო, – გამაგრდი და ღმერთზე იფიქრე.

– ჯანდაბას ღმერთი, – პირქუშად მიუგო პერლმუტერმა, რითაც ძალიან გააოცა კურცი, რომელიც ვერასდროს წარმოიდგენდა, თუ მას ასეთი მკრეხელური სიტყვების წარმოთქმა შეეძლო.

თოვლსაწმენდის გაბარიტულმა შუქმა მკვეთრად გაიელვა და გზის მარჯვენა მხარეს გაჩერდა.

– ოჰ, – ამოიხვნეშა კურცმა.

– როგორ მოვიქცეთ, ბოს?

– უკან დაუდექი, – მხიარულად მიუგო კურცმა, მაგრამ პისტო-

ლეტი ხელით მაინც მოსინჯა, – ვნახოთ, რა უნდა ჩვენს ახალ მეგობარს, – თუმცა, ეტყობოდა, რომ ეს ისედაც იცოდა, – ფრედი, ძველი მეგობრების შესახებ ხომ არ გსმენია რამე? მიაგენი?

– მხოლოდ ოუენს, – გაუბედავად უთხრა ფრედიმ, – მასთან ერთად მყოფს კი – ვერა. ვერც იმას, ვისაც მისდევენ. ოუენმა გზიდან გადაუხვია. ახლა სახლში არიან და ვილაცხას ელაპარაკებიან.

– დერიში?

– დიახ.

თოვლსაწმენდი მანქანის მძღოლი ძირს ჩასულიყო და უშველებელი რეზინის ჩექმებით მათკენ გაჭირვებით მოარღვევდა თოვლს. კაპიუშონიანი მოზრდილი პარკა ესკიმოსსაც კი გამოადგებოდა. შალის განიერი შარფიდან, რომლის ბოლოებსაც ქარი აფრიალებდა, მხოლოდ ცხვირი მოუჩანდა. ტელეპათის ნიჭი არ სჭირდებოდა იმის მიხვედრას, რომ კაშნე დედას ან ცოლს მოექსოვა.

მძღოლმა თავი მათი მანქანის ფანჯარაში შეჰყო, გოგირდისა და ეთილის სპირტის ჰაერი შეისუნთქა და დაიღრიჯა. შემდეგ ეჭვის თვალით შეხედა ფრედის, ნახევრად გონწასულ პერლმუტერსა და თვალეხანთებულ კურცს. ამ უკანასკნელმა გადაწყვიტა, რომ აჩქარება არ ღირდა და პისტოლეტი მარცხენა ფეხის ქვეშ დამალა.

– გისმენთ, პოლიციელო, – თქვა მან.

– რადიოგრამა მოვიდა ვილაც ტიპისგან, რომელიც საკუთარ თავს რენდალს უწოდებს, – უთხრა მძღოლმა ხმამალა, რათა ქარის ხმაური გადაეფარა. აქცენტის მიხედვით, წმინდა სისხლის იანკი უნდა ყოფილიყო, – გენერალ რენდალს. განაცხადა, რომ ვაიომინგში მდებარე შაიენის მთებიდან თანამგზავრით მიკავშირდებოდა.

– ეს სახელი ჩემთვის უცნობია, პოლიციელო, – ხალისიანად განაგრძო კურცმა და ყურადღება არ მიაქცია საბრალო პერლმუტერს, რომელიც განუწყვეტლივ კვენსოდა: „სულ ცრუობ, ცრუობ, ცრუობ“.

მძღოლმა მას თვალი შეავლო და ისევ კურცს მიაჩერდა.

– იმ ტიპმა კოდური ფრაზაც მითხრა – „ცისფერი დასრულებულია“. ეს არაფერს გეუბნებათ?

– მე ბონდი მქვია, ჯეიმზ ბონდი, – გაეცინა კურცს, – ვილაც გასულელებთ, პოლიციელო.

– გადმომცა, რომ თქვენი მისია დასრულებულია და ქვეყანა მადლობას გიხდით.

– ოქროს საათის შესახებ არაფერი უთქვამს? – ისევ სიცილით უთხრა კურცმა.

მძლოლმა ტურჩებზე ენა ნერვიულად მოისვა.

საინტერესოა, – გაიფიქრა კურცმა. მან ის მომენტი ჩაიჭირა, როცა მძლოლმა გაიფიქრა, – შეშლილს ვესაუბრებო. ზუსტად ჩაიჭირა.

– ოქროს საათის შესახებ ვერაფერს მოგახსენებთ. მხოლოდ იმის თქმა მინდოდა, რომ ბრძანების გარეშე გზას ვერ გავაგრძელებ.

კურცმა პასუხის ნაცვლად პისტოლეტი ამოიღო და კაცს შუბლში დაუმიზნა.

– ესეც შენი ბრძანება, მეგობარო, ხელმოწერილი და ბეჭედდასმული. გამოდგება?

მძლოლი იანკის ცისფერი თვალებით უსიტყვოდ მიაჩერდა პისტოლეტს, თუმცა, ეტყობოდა, რომ დიდად არ შეშინებია.

– ვფიქრობ, გამოდგება. ყველაფერი კარგადაა.

კურცმა გადაიხარხარა.

– ყოჩაღ! აი, ეს მომწონს! ახლა კი გზას გავუდგეთ. იცოდე, რომ თუ სინქარეს მოუმატებ, ღმერთი უფრო ძლიერ შეგიყვარებს. საქმე ისაა, რომ დერიში ერთი კაცია, რომელიც უნდა... – მან შესაფერისი სიტყვის მოძებნა სცადა, კმაყოფილმა თავი დააქნია და დაასრულა, – დავკითხო.

პერლმუტერმა რალაც ხმა გამოსცა. კაცი ვერ გაიგებდა, დაიკვნესა თუ გაიცინა. მძლოლმა უკან დაიხია.

– ყურადღებას ნუ მიაქცევ, ორსულადაა, – ნდობის კილოთი უთხრა კურცმა, – ცოტაც და ხამანწკებსა და კამით შეკაზმულ მჟავე

კიტრს მოგვთხოვს.

– ორსულადაა, – ექოსავით გამოეხმაურა მძლოლი საოცრად გულგრილი ხმით.

– დიახ, მაგრამ ამას მნიშვნელობა არა აქვს. ეს შენი პრობლემა არაა. უნდა გითხრა, მეგობარო, რომ...

კურცი წინ გადაიხარა და პისტოლეტის დაუშვებლად შეთქმულივით ჩაუჩურჩულა:

– ...დერიში ის კაცი უნდა დავაკავო. ვფიქრობ, მალე ქალაქიდან გავა, რადგან დანამდვილებით იცის, რომ მასზე ვნადირობ...

– მან ყველაფერი იცის, – გააწყვეტინა ფრედი ჯონსონმა და ჯერ კისერი მოიფხანა, მერე საზარდულზე გადაერთო.

– მანამდე კი უნდა დავეწიოთ, – განაგრძო კურცმა, – აბა, მიხვდი თუ ვერა?

მძლოლმა თავი დაუქნია და თოვლსაწმენდისკენ გაემართა. ინათა.

ეს ჩემი ცხოვრების უკანასკნელი გათენებას ჰგავს, – გაიფიქრა კურცმა და ამ აზრმა ოდნავ გააოცა კიდეც.

პერლმუტერმა კვლავ დაიკვნესა – ჯერ ჩუმად, შემდეგ კი ხმას აუწია და ყვირილზე გადავიდა. საბრალომ ხელი მუცელზე იტაცა.

– ღმერთო ჩემო! – შესძახა ფრედიმ, – მუცელზე შეხედეთ, ბოს! ცომივით უფუვდება.

– ღრმად ისუნთქე, – უბრძანა კურცმა პერლის და მხარზე ხელი კეთილგანწყობით მოუთათუნა. თოვლსაწმენდი კვლავ ამოძრავდა, – ღრმად ისუნთქე. მოდუნდი. მოდუნდი და მხოლოდ კარგზე იფიქრე.

## 10

დერიმდე ორმოცი მილი რჩებოდა.

ორმოცი მილია ჩემსა და ოუენს შორის, – გაიფიქრა კურცმა, – კარგია, კარგი. შენთან მოვდივარ, მეგობარო. ჭკუა უნდა გასწავლო.

საკუთარ თავზე გამოცდი, რა ემართებათ მათ, ვინც კურცს გზაზე გადაეღობება.

კიდევ ოცი მილი გაიარეს. ისინი კი, ფრედისა და პერლმუტერის თქმით, კვლავ დერიში იყვნენ. თუმცა ფრედი ბოლომდე დარწმუნებული არ იყო. სამაგიეროდ, პერლმუტერი ამტკიცებდა, – დედას ელაპარაკებიანო, ანუ ოუენი და ის, მეორე, დედას ესაუბრებოდნენ. დედას კი მისი გაშვება არ უნდოდა.

– ვისი გაშვება? – აინტერესებდა კურცს, თუმცა, კაცმა რომ თქვას, ეს მისთვის სულერთი იყო. ვილაცის დედა მათ დერიში აყოვნებდა და მღევრებს მანძილის შემცირების საშუალებას აძლევდა. მაშ, ღმერთმა დალოცოს ის დედა – რა მნიშვნელობა აქვს, ვინ არის და ასე რატომ იქცევა.

– არ ვიცი, – მხრები აიჩეჩა პერლიმ. მძლოლთან საუბრის შემდეგ მუცელი ოდნავ დაუწყნარდა, მაგრამ მაინც საშინელ დაღლილობას გრძნობდა, – ვერ ვხედავ. ისე ჩანს, თითქოს ტვინი არა აქვს, სადაც ჩახედვა შეიძლება.

– ფრედი.

ფრედიმ თავი გააქნია.

ოუენი ჩემთვის დაკარგულია. თოვლსაწმენდის მძლოლისაც კი ძლივს მესმის. ეს იმას ჰგავს... არ ვიცი... თითქოს რადიოსიგნალი დამეკარგოს.

კურცი წინ გადაიხარა და ფრედის ლოყაზე რიპლის პატარა კუნძულს დააკვირდა. სოკო შუაში ჯერაც მოწითალო ნარინჯისფრად ხასხასებდა, ნაპირებზე კი გახუნებულიყო და ფერფლისფერი სითეთრე დასდებოდა.

კვდება, – გაიფიქრა კურცმა, – ან ფრედის სისხლშია რაღაც ისეთი, რაც კლავს, ან ამას გარემო აკეთებს. ოუენი მართალი ყოფილა. მართალი ყოფილა, დალახვროს ეშმაკმა! მაგრამ ეს არაფერს ცვლიდა. ზღვარი ზღვარია, ოუენმა კი ამ ზღვარს გადააბიჯა.

- თოვლსაწმენდის მძლოლი, - დაღლილი ხმით წარმოთქვა პერლმუტერმა.

- მძლოლის შესახებ რას იტყვი, მეგობარო?

მაგრამ პასუხი აღარ სჭირდებოდა. წინ საგზაო ნიშანი ბრჭყვიალებდა, რომელზეც ეწერა: „32-ე მოსახვევი, გრენდვიუ (გრენდვიუს სადგური)“. თოვლსაწმენდმა, მოულოდნელად, თოვლსახვეტი ასწია და სიჩქარე საათში ორმაცდაათ მილამდე გაზარდა, ციმციმას აუნთებლად გზიდან გადაუხვია, თოვლის კორიანტელი დააყენა და გაშპა. „ჰამერს“ კვლავ თავისით მოუხდა ფუტის სიმაღლე თოვლში გზის გაკვალვა.

- გავეკიდო? - იკითხა ფრედიმ, - ახლავე დავეწევი, ბოს.

კურცს ძალიანაც უნდოდა ებრძანებინა, დაეწიე იმ ძაღლიშვილს და გასრისეო, რათა ერგენებინა, თუ რა მოსდის ადამიანს, რომელიც ზღვარს გადააბიჯებს. ახი იყო ის წამალი გადაეყლაპებინა, ოუენ ანდერჰილისთვის რომ ჰქონდა გამზადებული, მაგრამ თოვლსაწმენდი „ჰამერზე“ დიდი იყო, გაცილებით დიდი, და ვინ იცის, მათი შერკინება როგორ დამთავრდებოდა.

- თავი დაანებე. გზას მიჰყევი, - თქვა მან, - ნადირობა გრძელდება.

კურცმა მაინც გულდაწყვეტით გააყოლა თვალი თოვლსაწმენდს, რომელიც დილის სუსხში თანდათან თვალს მიეფარა. იმის იმედიც არ ჰქონდა, რომ იმ წყეულმა იანკიმ ფრედისა და არჩი პერლმუტერისგან რამე აიკიდა, რადგან სოკო სიცოცხლისუნარიანი არ აღმოჩნდა.

მათ გზა განაგრძეს. მანქანის სიჩქარე საათში კვლავ ოც მილამდე შემცირდა, მაგრამ, კურცის ვარაუდით, სამხრეთისკენ გზები ნაკლებად დათოვლილი უნდა ყოფილიყო. თანაც, ქარიშხალიც ძალას კარგავდა.

- გილოცავ, - გადაუჩურჩულა ფრედის.

- რაო?

კურცმა მხარზე ხელი მოუთათუნა.

– გამოჯანმრთელების გზაზე დგახარ.

შემდეგ პერლმუტერს მიუბრუნდა და დაამატა:

– შენზე კი ვერაფერს ვიტყვი, ჯარისკაცო.

## 11

კურცის ადგილსამყოფლიდან ჩრდილოეთით, ასი მილის დაშორებით და სოფლის გზის გასაყარიდან ორიოდ მილში, იქ, სადაც ჰენრი შეიპყრეს, „იმპერიალის ხეობის“ რაზმის ახალი მეთაური, ორმოცი წლის მკაცრი გამომეტყველების ლამაზნაკვებიანი ქალი, ფიჭვის ძირში იდგა იმ ხეობაში, რომელსაც, პირობითად, „წმენდის ზონა ერთი“ ერქვა. ზონა, ხატოვნად რომ ვთქვათ, სიკვდილის ხეობად ქცეულიყო. მიწაზე გროვებად ეყარა დასახიჩრებული, ნარინჯისფერქურთუკიანი გვამები. სულ, ასზე მეტი იქნებოდა. უმრავლესობას კისერზე პირადობის დამადასტურებელი ან მართვის მოწმობა ეკიდა, თუმცა შიგადაშიგ „ვიზას“, „დისქავერის“, „ბლუ ქროსის“ ბარათები და სამონადირეო ლიცენზიებიც მოჩანდა. შუბლზე დიდი შავი ხვრელის მქონე ქალს მკერდზე ვიდეოს მოყვარულთა კლუბის წევრის ნიშანი უბრჭყვიალებდა.

კეიტ გალაჰერი მიცვალებულთა ყველაზე დიდ გორასთან იდგა და მეორე მოხსენებისთვის მიახლოებით გათვლებს აწარმოებდა. ცალ ხელში Palm Pilot-ის ჯიბის კომპიუტერი ეჭირა, მოწყობილობა, რომელიც ადოლფ აინშანს<sup>193</sup>, სიკვდილის იმ უბადლო მთვლელსაც კი შეშურდებოდა. ცოტა ხნის წინ ეს კომპიუტერი არ მუშაობდა. მაგრამ ახლა ტექნიკა, როგორც ჩანს, მწყობრში ჩადგა.

კეიტს თავზე ყურსასმენები ეკეთა, ნიღბის წინ მიკროფონი მიემაგრებინა. დროდადრო რალაცას აზუსტებდა ან მორიგ ბრძანებას გასცემდა. კურცს მშვენიერი არჩევანი გაეკეთებინა: ამ ენერგიულმა

---

<sup>193</sup> მეორე მსოფლიო ომის წლებში 6 მილიონი ებრაელის განადგურებაში მთავარი სამხედრო დამნაშავე. გესტაპოს ოფიცერი.



მემკვიდრემ თავისი საქმე შესანიშნავად იცოდა. შედეგების შეჯამების შემდეგ გალაჰერმა დაადგინა, რომ მის ჯგუფს გაქცეულთა სამოცი პროცენტი მაინც გაენადგურებინა. მათ იშვიათი ბრძოლისუნარიანობა გამოიჩინეს, რაც, ცოტა არ იყოს, მოულოდნელი აღმოჩნდა, მაგრამ ხანგრძლივ დევნასა და სირბილს ვერ გაუძლეს.

– ეი, კეტი-კეტი! – დაუძახა მას ჯოსლინ მაკევიომ, რომელიც ხეობის მეორე ბოლოში ამოსულ ხეებს შორის გამოჩნდა. კაპიუშონი მოეხადა, მოკლედ შეკრეჭილ თმაზე აბრეშუმის მწვანე შარფი წაეკრა, მხარზე ავტომატი გადაეკიდა, ქურთუკზე სისხლი მისცხებოდა, – ხომ არ შეგაშინე? – გაეცინა მას.

– აბა?! წნევამ ამიწია!

– მომისმინე, მეოთხე კვადრატი გასუფთავებულია, – თვალეხი აენტო მაკევიოს, – ორმოცამდე დავაწვინეთ. ჯექსონი უფრო ზუსტად გეტყვის, მათემატიკაში ჩემზე მაგარია. სხვათა შორის, არც ჩვენ გვაწყენდა მაგარი...

– მაპატიეთ, ქალბატონებო...

ქალები შეტრიალდნენ. ხეობის ჩრდილოეთი მხრიდან, დათოვლილი ბუჩქებიდან, ექვსი მამაკაცისა და ორი ქალისგან შემდგარი ჯგუფი გამოჩნდა. თითქმის ყველას ნარინჯისფერი ტანსაცმელი ეცვა, მაგრამ მათ, როგორც ჩანს, ჩასკვნილი, ღონიერი კაცი ხელმძღვანელობდა, რომელსაც ქურთუკის ქვემოდან „ცისფერი ჯგუფის“ ფორმა მოუჩანდა. სახეზე გამჭვირვალე ნილაბი ეკეთა, რომლის ქვეშაც რიპლის ზოლები უხასხასებდა. რვავეს ავტომატი ეჭირა ხელში.

მოულოდნელი სანახაობით დაბნეულმა გალაჰერმა და მაკევიომ ერთმანეთს გადახედეს, შემდეგ მაკევიომ ხელი ავტომატს სტაცა, გალაჰერმა კი თავისი „ბრაუნინგისკენ“ გაიწია, მაგრამ ორივემ დაავიანა. ჰაერში სროლის ხმა გაისმა. მაკევიო ოციოდე ფუტზე გადავარდა, ფეხიდან ჩექმა გასძვრა და ტოტზე ჩამოეკიდა.

– ეს ლარისთვის! – შეჰყვირა ნარინჯისფერქურთუკიანი ქალებიდან ერთ-ერთმა, – ლარისთვის, თქვე ბოზებო, ლარისთვის!

როდესაც სროლა მიწყდა, ჩასკვნილმა, „რიპლი-ესპანური“ წვერის მქონე მამაკაცმა თავისი რაზმის წევრები კეიტ გალაჰერის პირველ გაწოლილი გვამის სიახლოვეს შეკრიბა, რომელიც ოდესღაც, სანამ კურცად წოდებული ჭირი შეეყრებოდა, მეცხრე იყო ვესტპონტის გამოსაშვებ კურსზე. მან ქალის ავტომატი შეათვალიერა, რომელიც ხარისხით მისას აშკარად ჯობდა.

– მტკიცედ მწამს დემოკრატიის, – დაიწყო მან, – ამიტომაც ისე მოიქეცით, როგორც მოგესურვებათ, მე კი ჩრდილოეთისკენ გავემუშრები. არ ვიცი, რამდენ ხანს მომიწევს კანადის ჰიმნის შესწავლა, მაგრამ გავიგებ მაინც.

– მეც შენთან ერთად წამოვალ, – გამოეხმაურა ერთი მამაკაცი და მალე გაირკვა, რომ ჯგუფიდან მოწყვეტას არავინ აპირებდა. სანამ წავიდოდნენ, მეთაური დაიხარა და თოვლში დაგდებული ჯიბის კომპიუტერი აიღო.

– ყოველთვის მინდოდა, ასეთი მქონოდა, – გულწრფელად აღიარა ემილ „დოგ“ ბროდსკიმ, – ვგიჟდები ახალ ტექნოლოგიებზე.

მათ სიკვდილის ხეობა იმავე მიმართულებით დატოვეს, საიდანაც მოვიდნენ. დროდადრო ტყეში ერთეული გასროლის ხმა ისმოდა, შიგადაშიგ ტყვიამფრქვევის კაკანიც გამოერეოდა, მაგრამ ყველაფერი იმაზე მიუთითებდა, რომ ოპერაცია „წმენდაც“ დასრულებულიყო.

მისტერ გრეიმ მორიგი მკვლელობა ჩაიდინა და კიდევ ერთი სატრანსპორტო საშუალება გაიტაცა, ამჯერად საზოგადოებრივი სამუშაოების სამმართველოს თოვლსაწმენდი. ჯოუნსიმ საქმის დეტალები არ იცოდა, რადგან ამას არ შესწრებია. მისტერ გრეიმ, როგორც ჩანს, გადაწყვიტა, რომ ჯოუნსის ოფისიდან ვერ გამოიტყუებდა (ყო-

ველ შემთხვევაში მანამდე, სანამ ამ საქმეს სერიოზულად არ მოჰკიდებდა ხელს) და იგი გარე სამყაროს მოსწყვიტა. ახლა ჯოუნსიმ იცოდა, რას გრძნობდა ფორტუნატო, როდესაც მონტრეზორმა მარნიდან გამოსასვლელი აგურებით ამოუქოლა.<sup>194</sup>

ყველაფერი მას შემდეგ მოხდა, რაც მისტერ გრეიმ საპატრულო მანქანა კვლავ სამხრეთისკენ მიაბრუნა. ახლა გზაზე მხოლოდ ერთი, შედარებით თავისუფალი, და ისიც მოყინული ზოლი დარჩენილიყო. ამ დროს ჯოუნსი თავისი იდეის განხორციელებას ცდილობდა.

მისტერ გრეიმ ტელეფონი წაართვა? არა უშავს, ის ახალი სახის კავშირს მოიფიქრებდა. როგორც მაშინ, გავარვარებული ოფისის გამაგრილებელი თერმოსტატი რომ შექმნა, როდესაც მისტერ გრეი მის გამოტყუებას ცდილობდა. გადაწყვიტა, ამ საქმისთვის ყველაზე შესაფერისი ფაქსი იქნებოდა. რატომაც არა? მას მხოლოდ ერთი რამ სჭირდებოდა – ყურადღების მობილიზება, აპარატის თვალნათლივ წარმოდგენა და იმ ძალის გამოყენება, რომელიც მასში თითქმის ოცი წლის განმავლობაში თვლემდა. ტყუილუბრალოდ ხომ არ იყნოსა მისტერ გრეიმ ეს ძალა, დასძლია დაბნეულობა და ყველაფერი იღონა, ჯოუნსისთვის მისი გამოყენების საშუალება რომ არ მიეცა. ახლა კი ჯოუნსის უნდა გადაელახა მისტერ გრეის მიერ, მისთვის შექმნილი ყველა დაბრკოლება, სანამ იგი სამხრეთისკენ გადაადგილების გზებს ეძებდა.

ჯოუნსიმ თვალები დახუჭა და გონებაში ფაქსის დახატვა სცადა – ისეთივესი, როგორიც ისტორიული ფაკულტეტის ოფისში იდგა, ოღონდ ამჯერად ის თავისი ახალი ოფისის საკუჭნაოში მოათავსა. შემდეგ, როგორც ალადინი უსვამდა ხელს ჯადოსნურ ლამპარს (ოღონდ ახლა მას განუსაზღვრელი რაოდენობის სურვილის შესრულება შეეძლო, ცხადია, თუ ყველაფერს სწორად წარმართავდა), ქალღმერთების შეკვრა და მის გვერდით მდებარე „ბეროლ ბლექ ბიუთის“

---

<sup>194</sup> ედგარ ალან პოს მოთხრობიდან „ამონტილადოს კასრი“.

ფანქარი წარმოიდგინა. ბოლოს კი საკუჭნაოში შეიხედა იმის სანახავად, თუ რა გამოვიდა.

თითქოს ყველაფერი კარგად გამოსვლოდა... თუმცა ფანქარი ცოტა უცნაურად გამოიყურებოდა – ახალი და წვერწამახული კი იყო, ოღონდ ბოლო ჰქონდა მოღეჭილი. არა, არაფერი შეშლია. ბივერი ხომ ჯერ კიდევ დაწყებითი სკოლაში ხმარობდა „ბლექ ბიუთის“, მაშინ, როცა დანარჩენები უფრო მიღებულ „ებერჰარდ ფაბერსს“ ატარებდნენ.

საკიდარზე ერთადერთი ნარინჯისფერი ქურთუკი ეკიდა (ის, რომელიც დედამ უყიდა პირველი ნადირობის წინ და გულზე ხელის დადებით დააფიცა, რომ ყოველთვის ჩაიცვამდა, როგორც კი კარის ზღურბლს გადააბიჯებდა), მის ქვეშ კი ფაქსი იდგა, მშვენივრად გამოიყურებოდა და გამამხნეველად გუგუნებდა კიდევ.

მაგრამ ჯოუნსი სასოწარკვეთილებამ მოიცვა, როდესაც ჩაიჩოქა და ფანჯრიდან შემოსულ შუქზე მიღებული შეტყობინება წაიკითხა: „დანებდი, ჯოუნსი, და გამოდი“.

ტელეფონის ყურმილი აიღო და მისტერ გრეის ჩაწერილი ხმა მოესმა: „დანებდი, ჯოუნსი, და გამოდი. დანებდი, ჯოუნსი, და გამო...“

იმავედროულად, ისეთი საშინელი ბრახაბრუხი გაისმა, რომ ჯოუნსიმ შიშისგან შეჰყვირა და შეხტა კიდევ. თავში გაუელვა – მისტერ გრეიმ, ალბათ, სპეცრაზმელების ხელსაწყოები იშოვა, კარს ანგრევს და საცაა, შემოვარდებაო. მაგრამ ეს კარი კი არა, ფანჯარა აღმოჩნდა, რაც უარესი იყო. მისტერ გრეის ქარხნული წესით დამზადებული ფოლადის დარაბები დაეყენებინა, თანაც ნაცრისფერი. ჯოუნსი დაბრმავებულ ტყვედ იქცა.

დარაბების შიგა მხარეს დიდი წითელი ასოებით ეწერა: „დანებდი და გამოდი“. ჯოუნსის რატომღაც „ოზის ჯადოქარი“<sup>195</sup> გაახსენდა – ცაში დაწერილი „დანებდი, დოროთი“ – და კინალამ გაეცინა. მაგრამ ვერ შეძლო. ეს სასაცილო და სამხიარულო კი არა, სატირალი იყო.

<sup>195</sup> ამერიკელ მწერალ ფრენკ ბაუმის ზლაპარი.

– არა! – შესძახა მან, – მოხსენი! მოხსენი, ეშმაკმაც წაიღოს შენი თავი!

დუმილი. ჯოუნსიმ ხელი შემართა, რათა ფანჯარა ჩაემტვრია და ფოლადის დარაბას დაჯაჯგუთებოდა, მაგრამ მაშინვე გონს მოეგო და თავი ხელში აიყვანა: „ხომ არ შეიშალე? იმასაც ხომ სწორედ ეს უნდა. როგორც კი შუშას ჩაამტვრევ, დარაბებს მოხსნის და შენთან გაჩნდება. მაშინ კი ველარაფერი გიშველის, მეგობარო“.

წამით რალაც მოძრაობა შეიგრძნო – ეს მძიმე თოვლსაწმენდი მიდიოდა ყრუ გუგუნით. ნეტა სად არიან? უოტერვილში? ოგასტაში? თუ კიდევ უფრო სამხრეთით? ზონაში, სადაც თოვლი წვიმამ შეცვალა? სავარაუდოდ, არა. მისტერ გრეი თოვლსაწმენდს არ აირჩევდა, თუ დიდი სიჩქარით გადაადგილების შესაძლებლობა მიეცემოდა. ახლა კი თოვლისგან გზა უნდა გაეწმინდათ, თანაც ჩქარა, რადგან სამხრეთისკენ მიდიოდნენ.

– მაგრამ საით?

ასეთივე წარმატებით იმქვეყნადაც გავემართებოდი, – გაიფიქრა ჯოუნსიმ და უნუგეშოდ მიაჩერდა დახურულ დარაბებსა და დამცინავ გზავნილს, – თანაც ახლავე.

## 14

საბოლოოდ სწორედ ოუენმა მოხვია მხრებზე ხელი რობერტა ქეველს და იმის ახსნას შეუდგა, თუ რატომ უნდა წაეყვანათ დადიტის, მიუხედავად იმისა, რომ იგი ცუდად იყო. თან ცალი თვალით საათს შესცქეროდა – კარგად იცოდა, რომ ყოველ წუთ-ნახევარში კურცი მათ ერთი მილით უახლოვდებოდა. ჰენრის ამ ვითარებაშიც კი არ შეეძლო სერიოზული სახით წარმოეთქვა ფრაზა: „ამაზე სამყაროს ბედია დამოკიდებული“. სამაგიეროდ, ეს ოუენმა მოახერხა, რომელიც მთელი ცხოვრება იარაღით ხელში ემსახურებოდა თავის ქვეყანას.

დადიტსი კვლავინდებურად გადახვეოდა ჰენრის და მას საოცრად გაბრწყინებული მწვანე თვალებით შესცქეროდა. ეს თვალები არ შეცვლილიყო. არც ის შეგრძნება, რასაც ჰენრი განიცდიდა ხოლმე დადიტსის გვერდით: ყველაფერი კარგადაა ან მალე ასე იქნება.

სასოწარკვეთილი რობერტა ოუენს მისჩერებოდა და თვალსა და ხელს შუა ბერდებოდა, თითქოს, ბოროტი ძალა დროს წარმოუდგენელი სისწრაფით მიერეკებოდა.

– დიახ, – თქვა მან, – დიახ, მესმის, გსურთ, რომ ჯოუნსი მოძებნოთ, – და დაიჭიროთ, – მაგრამ რას აპირებს იგი? და თუ აქ ჩამოვიდა, რატომ არ გააკეთა ის რაღაც?

– მემ, მიჭირს ამ შეკითხვებზე პასუხის გაცემა...

– ომი, – ჩაერთო მოულოდნელად დადიტსი, – ოუნის ალი უდა.

„ალი? ცეცხლის ალი? ომი? – გონებით ჰკითხა შემფოთებულმა ოუენმა ჰენრის, – რა ომი?“

„მნიშვნელობა არა აქვს, – მიუგო ჰენრიმ და მისი ხმა ოუენის თავში ძალიან სუსტად გაისმა, – ჩვენი წასვლის დროა“.

– მემ, მისის ქეველ, – დაიწყო ოუენმა და ხელზე ხელი ფრთხილად მოჰკიდა. ჰენრის ეს ქალი დედასავით უყვარდა, თუმცა ბოლო წლებში მას სასტიკად ექცეოდა და ერთხელაც არ უნახავს. და ოუენი ხვდებოდა, რომ ამ სიყვარულის მიზეზი რობერტასგან წამოსული სიკეთე და კეთილგანწყობა იყო, – უნდა წავიდეთ.

– არა. ოჰ, გეხვეწებით, თქვით „არა“, – ქალი კვლავ ატირდა.

„გეყოფათ, ქალბატონო, – უნდოდა ეთქვა ოუენს, – ისედაც ცუდ დღეში ვართ. გთხოვთ, არ გინდათ“.

– მოგვდევენ. ერთი ძალიან ცუდი კაცია. მის მოსვლამდე უნდა წავიდეთ.

მოულოდნელად სევდიანმა და დამწუხრებულმა რობერტამ მტკიცედ განაცხადა:

– კარგი. თანახმა ვარ. ოღონდ მეც თქვენთან ერთად წამოვალ.

– არა, რობერტა, – თავი გადააქნია ჰენრიმ.

- დიახ! დიახ! მე ვიზრუნებ მასზე... წამლებს დავალევი... „პრედნიზონს“... ლიმონის ტამპონებსაც წამოვიღებ და...

- ედა, აქ არი.

- არა, დადი, არა!

- ედა, აქ არი! აქ უიათოა! აქ უიათოა! - იძახდა აღელვებული დადიტსი. „დედა, აქ დარჩი. აქ უხიფათოა, აქ უხიფათოა“.

- დრო აღარ გვაქვს, - თქვა ოუნმა.

- რობერტა, - გაიმეორა ჰენრიმ, - გთხოვთ.

- მეც წამიყვანეთ! - შესძახა ქალმა ტირილით, - დადი ყველაფერია, რაც ამქვეყნად გამაჩნია!

- ედა, - თქვა დადიტსმა მტკიცე ხმით, - აქ არი.

რობერტამ შვილს შეხედა და მაშინვე მოეშვა.

- კარგი, - დაეთანხმა იგი, - ოღონდ კიდევ ერთი წუთი მომეცით. რალაცას გავატან.

იგი დადიტსის ოთახში გავარდა, იქიდან ქალაღდის პაკეტი გამოიტანა და ჰენრის გაუწოდა.

- აქ მისი აბლებია. ცხრაზე „პრედნიზონი“ უნდა მისცეთ. არ დაგავიწყდეთ, თორემ ცემინება აუტყდება და მკერდი ეტკინება. თუ მოგთხოვთ, „პერკოსეტი“ მიეცით. ალბათ, მოგთხოვთ, რადგან ბოლო დროს სიცივეს ვერ იტანს.

რობერტა ჰენრის სევდიანად შესცქეროდა, მაგრამ მის თვალეში საყვედური არ იკითხებოდა. ჰენრის კი თითქმის უნდოდა, რომ ესაყვედურა. ღმერთი ხომ ხედავდა, რომ ცხოვრებაში თავისი საქციელის ყველაზე მეტად ახლა რცხვენოდა. არა მარტო ლეიკოზის გამო. უფრო იმიტომ, რომ დადიტსი ამდენ ხანს ავად იყო და მათ არაფერი იცოდნენ.

- ლიმონის ტამპონები მხოლოდ ტუჩებზე წაუსვით. ღრძილებიდან სისხლი სდის ხოლმე და აეწვება. თუ ცხვირიდან წასკდება, ბამბა გაუკეთეთ. ჰო, კათეტერი არ დაგავიწყდეთ. ხომ ხედავთ, მხარზე რომ უკეთია?

ჰენრიმ თავი დაუქნია. სახვევიდან პლასტმასის პატარა მილი მოჩანდა. მის დანახვაზე ჰენრის ისეთი შეგრძნება გაუჩნდა, თითქოს ეს ყველაფერი სადღაც უკვე ენახა.

– ქუჩაში გასვლისას რამე დააფარეთ... მართალია, დოქტორი ბრისკო დამცინის, მაგრამ დარწმუნებული ვარ, რომ სიცივე შეგნით აღწევს... შარფი საკმარისია... ცხვირსახოციც ეყოფა...

იგი კვლავ ატირდა. ცრემლებს ველარ იკავებდა.

– რობერტა... – დაიწყო ჰენრიმ და საათს დახედა.

– მასზე მე ვიზრუნებ, – თქვა ოუენმა, – მამაჩემს ბოლო ამოსუნთქვამდე ვუვლიდი. „პრედნიზონისა“ და „პერკოსეტის“ შესახებ ყველაფერი ვიცი.

მეტიც იცოდა: ძლიერმოქმედი სტეროიდები, საუკეთესო ტკივილგამაყუჩებლები. ბოლოს კი მარისხუნა, მეტადონი და სუფთა მორფი, ნებისმიერ ჰეროინზე უფრო ძლიერი. მორფი სიკვდილის ყველაზე საიმედო საშუალება იყო.

ქალი დაუყოვნებლივ შეეხო მის გონებას: უცნაური, ჩხვლეტის შეგრძნება, როგორც ნოხზე ფეხშიშველა სიარულისას. სიამოვნებდა კიდევ. რობერტას აინტერესებდა, სიმართლე თქვა თუ არა ოუენმა მამამისზე: ეს მისი არაჩვეულებრივი შვილის მოკრძალებული საჩუქარი იყო. ოუენი მიხვდა, რომ ის იმდენად დიდხანს სარგებლობდა ამით, რომ ახლა ვერც კი ხვდებოდა, რას აკეთებდა... როგორც ჰენრის მეგობარი ბივერი, რომელიც გამუდმებით ღეჭავდა კბილსა-ჩიჩქნს. ცხადია, ქალი ჰენრის ვერ შეედრებოდა, მაგრამ რაღაც მაინც შეეძლო, და ოუენს ცხოვრებაში არასდროს ასე არ გახარებია სიმართლის თქმა.

– თუმცა, ეს ლეიკოზი არ ყოფილა, – თქვა რობერტამ.

– ფილტვის კიბო. მისის ქვევლ, ჩვენ მართლაც...

– რაღაც უნდა მივცე.

– რობერტა, ჩვენ აღარ შეგვიძლია... – დაიწყო ჰენრიმ.



– ახლავე, ერთი წუთით! – ქალი სამზარეულოსკენ გაქანდა. ოუენმა თავი ასწია. შეშინებულს ჰგავდა.

– კურცი და ფრედი პერლმუტერთან ერთად... ჰენრი, არ ვიცი, სად არიან! დავკარგე!

ჰენრიმ წამლების პაკეტი გახსნა, შიგ ჩაიხედა და გაშეშდა. თითქოს მოაჯადოვა იმან, რაც გლიცერინითა და ლიმონით გაჟღერებული ტამპონების ყუთზე იდო. მან უპასუხა ოუენს, მაგრამ ხმა ყველასგან დაუცველი ხეობის შორეული ბოლოდან მოდიოდა, რომლის შესახებაც ჰენრიმ არაფერი იცოდა. არადა, ის არსებობდა. თანაც არაერთი წელი. არ შეიძლებოდა იმის თქმა, რომ მსგავსი აზრი მას თავში არასდროს მოსვლია, მაგრამ, ღმერთო ჩემო, რატომ ერთხელაც არ გადაამოწმა?

– მათ ახლახან 29-ე მოსახვევი გაიარეს, – თქვა ჰენრიმ, – ჩვენგან ოცი მილი აშორებთ. შესაძლოა, ნაკლებიც.

– რა გემართება?

ჰენრიმ ხელი პაკეტში ჩაჰყო და იქიდან გაუგებარი დანიშნულების, თოკისგან გაკეთებული აბლაბუდა ამოიღო, რომელიც აქ, მეიპლენზე, დადიტის საწოლის თავზე ეკიდა.

– დადიტს, ეს საიდან გაქვს? – ჰკითხა მან მეგობარს, თუმცა პასუხი აღარ სჭირდებოდა. სიზმართმჭერი ავგაროზი იმაზე პატარა იყო, რაც „კედელში გაკეთებული ხვრელის“ ჭერზე ჰქონდა ნანახი. ისინი ერთმანეთისგან მხოლოდ ზომით განსხვავდებოდა.

– იერი, – აუხსნა დადიტსმა, თან ჰენრისთვის თვალი არ მოუცილებია. თითქოს არ სჯეროდა, რომ მის გვერდით იდგა, – იერმა ამომიანა. აობაოდ. აულ ირას.

რაც უფრო უკეთ უმკლავდებოდა ორგანიზმი ბაირუსს, სხვების აზრების წაკითხვის უნარი თვალსა და ხელს შუა ქრებოდა, მაგრამ ოუენი მაინც მიხვდა დადიტის ნათქვამს: „ბივერმა გამომიგზავნა საშობაოდ, გასულ კვირას“. დაუნის სინდრომით დაავადებული ადამიანებისთვის, მათ შორის დადიტისთვის, დრო, ფაქტობრივად, არ

არსებობდა. მისთვის წარსული – წინა კვირა, მომავალი კი მომდევნო კვირა იყო. ოუენმა გაიფიქრა, ყველას რომ ასე მიაჩნდეს, დედამიწაზე გაცილებით ნაკლები სევდა და სიძულვილი იქნებოდაო.

ჰენრიმ უკანასკნელად შეავლო თვალი პატარა სიზმართმჭერ ავგაროზს და პაკეტში სწორედ მაშინ ჩადო, როდესაც ჰოლში რობერტა შემოვარდა. მის დანახვაზე დადიტსს სახე გაებადრა.

– უბი-უ! – შესძახა მან, – ემი ოოფი!

მან კოლოფს ხელი სტაცა და დედას ორივე ლოყაზე აკოცა.

– ოუენ, – თქვა თვალეზგაბრწყინებულმა ჰენრიმ, – ძალიან კარგი ამბავი მაქვს.

– გისმენ.

– ის არამზადები გზაში გაიჭედნენ: ზედ 29-ე მოსახვევთან მისაბმელიანი ტრაქტორი გადაბრუნდა. ისინი ათიდან ოც წუთამდე დაკარგავენ.

– მადლობა ღმერთს. ეს დრო გონივრულად უნდა გამოვიყენოთ, – ოუენი საკიდართან მივიდა, სადაც უშველებელი ზომის კაპიუშონიანი ქურთუკი ეკიდა, წარწერით „რედ სოქსის ზამთრის სეზონი“, – ეს შენია, დადიტს?

– ემია, – ლიმილით დაუქნია თავი, – ურუკი. „ქურთუკი“.

და როდესაც ოუენმა მისკენ ხელი გაიწვდინა, დაამატა:

– ენ ახე, ოორ ივაენით ოზის.

ოუენი მის ნათქვამს მიხვდა და გააჟრჟოლა. „შენ ნახე, როგორ მივაგენით ჯოზის“.

მან მართლაც ნახა... და დადიტსმა ეს იცოდა. წუხელ შეამჩნია თუ იმ დღეს, ცხრამეტი წლის წინ? ნუთუ, მას დროში მოგზაურობაც შეეძლო?

მაგრამ შეკითხვებისთვის დრო აღარ რჩებოდა და ოუენს ეს უხაროდა კიდევ.

– ვთქვი, რომ ამ კოლოფს ბევრ დროს არ დავუთმობდი, მაგრამ არ გამომივიდა, – თქვა რობერტამ, რომელიც უყურებდა, როგორ

გადაჰქონდა დადიტს ყუთი ხელიდან ხელში და ვერ ახერხებდა იმ ქურთუკის ჩაცმას, რომელიც აგრეთვე „რედ სოქსის“ ნაჩუქარი იყო. ცისფერი ქურთუკისა და ხასხასა ყვითელი კოლოფის ფონზე სახე არაბუნებრივად გასთეთრებოდა.

– ვიცოდი, რომ წავიდოდა. მე კი არ წამიყვანდით.

მან მზერა ჰენრის მიაპყრო.

– გთხოვ, ჰენრი, თქვენთან ერთად წამოვალ.

– იმაზე თუ დაფიქრებულხართ, რომ შესაძლოა, მის თვალწინ მოკვდეთ? – ჰკითხა ჰენრიმ და საკუთარი თავი შესძულდა ასეთი სისასტიკისთვის, იმისთვის, რომ ცხოვრებამ ასე გამობრძმედა და საჭირო ღილაკებზე თითის დაჭერა ასწავლა, – გინდათ, რომ ამას შეესწროს, რობერტა?

– არა, რასაკვირველია, არა, – დაქანცული ხმით მიუგო ქალმა და ხანმოკლე პაუზის შემდეგ კინაღამ გული მოუკლა, – დაგწყევლოთ ღმერთმა!

შემდეგ დადიტსთან მივიდა, ოუენს ხელი ჰკრა, შვილს ქურთუკი შეუკრა, მხრებში ხელები ჩაავლო და თვალებში ჩახედა. პატარა, დაუცხრომელი ქალჩიტა. მაღალი, გაფითრებული, უშველებულ ქურთუკში თითქმის ჩამალული ვაჟიშვილი. მოულოდნელად რობერტას თვალებზე ცრემლი შეაშრა.

– კარგად მოიქეცი, დადი.

– აად, ედა.

– ჰენრის დაუფერე.

– ჰო, ედა. ენის ავუეებ.

– ქურთუკი არ შეიხსნა. შეიფუთნე ხოლმე.

– ჰო, ედა, – დამჯერედ იმეორებდა დადიტსი, აშკარად ეჩქარებოდა აქედან წასვლა, ამან ჰენრი კვლავ წარსულში დააბრუნა: აი, ისინი ნაყინის შესაჭმელად მიდიან, მინიგოლფს თამაშობენ (უცნაურია, მაგრამ დადიტსი შესანიშნავად თამაშობდა, მხოლოდ პიტი თუ მოუგებდა ხოლმე, იშვიათად), კინოში შედიან, და ყოველთვის:

„ჰენრის დაუჯერე“ ან „ჯოუნსის დაუჯერე“, „კარგად მოიქეცი, დადი“; პასუხად კი მუდამ: „აად ოვიევი, ედა“.

ქალმა იგი უკანასკნელად შეათვალიერა.

– მიყვარხარ, დეგლას. შენ ყოველთვის შესანიშნავი შვილი იყავი. ძალიან მიყვარხარ. მაკოცე.

დადიტსმა დედას აკოცა, ის კი გაუბედავად, თითქოს მალულად მოეფერა გაუპარსავ ლოყაზე. ჰენრის ძალიან უჭირდა ამ სცენის ყურება, მაგრამ მაინც უყურებდა. უყურებდა, რადგან აბლაბუდაში გაბმული ბუზივით უღონოდ გრძნობდა თავს. ყოველი სიზმართმჭერი, იმავდროულად, ხაფანგიც იყო.

დადიტსმა ერთხელაც აკოცა ხმაურით დედამისს, მაგრამ გაბრწყინებული მწვანე თვალებით ხან ჰენრის უყურებდა, ხანაც გასასვლელს. ეჩქარებოდა. ნეტა, რატომ? იქნებ იცოდა, რომ ჰენრისა და ოუენზე მონადირენი ახლოს იყვნენ? იქნებ მისთვის ეს მხოლოდ თავგადასავალი იყო უწინდელივით, როდესაც მათი ხუთეული ერთმანეთს თითქმის არასდროს შორდებოდა? იქნებ ერთიცა და მეორეც? შესაძლებელია.

რობერტამ ხელები გაშალა, უკან დაიხია და შვილს სასოწარკვეთილი მიაჩერდა.

– რობერტა, – წაიჩურჩულა ჰენრიმ, – რატომ არ გაგვაგებინეთ, რაც ხდებოდა? რატომ არ დაგვირეკეთ?

– თქვენ რატომ არ ინახულეთ?

ჰენრის შეეძლო ეკითხა, დადიტსი რატომ არ რეკავდაო, მაგრამ ეს აშკარა ტყუილი იქნებოდა. მარტიდან მოყოლებული, მას შემდეგ, რაც ჯოუნსი ავარიაში მოყვა, დადიტსი გამუდმებით რეკავდა. მას პიტი გაახსენდა, რომელიც გადაყირავებული სკაუტის გვერდით იჯდა და თოვლში დადიტსის სახელს წერდა და წერდა. დადიტსი ნელ-ნელა კვდებოდა კუნძულზე, სახელწოდებით „სადღაც, არსაით“, მესიჯს მესიჯზე გზავნიდა, პასუხად კი დუმილი იყო. ბოლოს ერთ-ერთ-

თი მეგობარი მხოლოდ იმისთვის გამოეცხადა, ნაჩქარევად რომ წაეყვანა და თან მხოლოდ წამლების პაკეტი და საუზმისთვის განკუთვნილი კოლოფი წაეღო. სიზმართმჭერ ავგაროზში სიკეთის ნასახიც არ იყო. მათ კი დადიტსისთვის მხოლოდ კარგი უნდოდათ, პირველივე დღიდან მთელი გულით შეიყვარეს. და მაინც ყველაფერი ასე აეწყო.

– გაუფრთხილდი მას, ჰენრი, – თქვა რობერტამ, მზერა ოუენზე გადაიტანა და ახლა მას მიმართა:

- და თქვენც. გაუფრთხილდით ჩემს შვილს.
- ყოველნაირად შევეცდებით, – დაჰპირდა ჰენრი.

## 15

დირბორნსტრიტზე ვერსად მოტრიალდებოდნენ, სადარბაზოებთან მისასვლელი ყველა გზა თოვლით იყო დაფარული. მოახლოებულ განთიადში მძინარე ქალაქი ალასკის ტუნდრაში ესკიმოსების დასახლებას ჰგავდა. ოუენმა „ჰამერი“ უკან დახია და ნელა გაიყვანა ეზოდან, მერე კი ქუჩაზე გააქროლა. უშველებელი ძარა მოუხერხებლად ქანაობდა აქეთ-იქით. ბამპერი რომელიღაც დათოვლილ, გზის პირას გაჩერებულ მანქანას გაეღო. გაისმა შუშის მსხვრევის ხმა. შემდეგ გაყინული თოვლის დაბრკოლებები გადალახეს და გზაჯვარედინზე, იქიდან კი კანზასსტრიტზე გავიდნენ. მალე გზატკეცილსაც მიაღწევდნენ. დადიტსი მშვიდად იჯდა უკანა სავარძელზე, კოლოფი მუხლებზე ეღო.

„ჰენრი, რატომ თქვა დადიტსმა, ჯოუნსის ალი უნდაო, ცეცხლის ალი, ომი იგულისხმა?“

ჰენრიმ გონებით სცადა პასუხის გაგზავნა, მაგრამ ოუენს მისი აღარ ესმოდა. სახეზე ბაირუსი გასთეთრებოდა და როგორც კი ლოყას მოიფხანდა, ბლუჯა-ბლუჯად სცვიოდა. მის ქვეშ კანი გაწითლებული და გაღიზიანებული მოუჩანდა, თუმცა არაფერი სტკიოდა.

„გაციებას ჰგავს, – გაუკვირდა ჰენრის, – ჩვეულებრივ სურდოს“.

– მას „ალი“ არ უთქვამს, ოუენ.

– ალი, – დაეთანხმა დადიტის უკანა სავარძლიდან, წინ გადაიხარა და დიდ, მწვანე საგზაო ნიშანს შეხედა: „95 სამხრეთისკენ“, – ოუენს ალი უდა.

ოუენმა შუბლი შეიჭმუნხა: მკვდარი ბაირუსის ბეწვები ქერტლივით ჩამოსცვივდა ქურთუკზე.

– რა...

– წყალი, – აუხსნა ჰენრიმ და დადიტს გამხდარ ფეხზე ხელი მოუთათუნა, – მას იმის თქმა სურს, რომ ჯოუნსის წყალი უნდა. მაგრამ ეს ჯოუნსი კი არა, ის არის, ვისაც იგი „მისტერ გრეის“ ეძახის.

## 16

რობერტა დადიტის ოთახში შევიდა და მიყრილ-მოყრილი ტანსაცმლის შეგროვებას შეუდგა. ლამის ჭკუიდან გადასულიყო იმის გაფიქრებაზე, თუ როგორ შეუბრალებლად და უხეშად წაართვეს შვილი, მაგრამ ახლა ამაზე წუხილი აღარ ღირდა. ხუთიოდე წუთის შემდეგ ფეხები მოეკეცა, ძლივს მიფოფხდა ფანჯარასთან მდგარ სკამამდე და დაჯდა. საითაც უნდა გაეხედა, თვალწინ დადიტის საწოლი ედგა, რომელზეც მან ბოლო ერთი წელი გაატარა. მშვიდად ვერც მის ბალიშს უყურებდა – მას ხომ ჯერაც ემჩნეოდა შვილის თავის ანაბეჭდი.

ჰენრის აზრით, მან დადიტს წასვლის ნება იმიტომ დართო, რომ, როგორც მათ სწამდათ, კაცობრიობის მომავალი იმაზე იყო დამოკიდებული, იპოვიდნენ თუ არა ჯოუნსის, თანაც უმოკლეს ვადაში. თუმცა ცდებოდა. რობერტამ დადიტს იმიტომ გაუშვა, რომ შვილს ასე უნდოდა. ზოგჯერ მომაკვდავებს ავტოგრაფებიან ბეისბოლის კეპებს ჩუქნიან. ზოგს კი მეგობრებთან ერთად სამოგზაუროდ წასვლის უფლებაც აქვს.

მაგრამ რაოდენ სამძიმო იყო ეს.

როგორ უმძიმდა მისი დაკარგვა.

მან შვილის ერთმანეთზე დაწყობილი მაისურები სახესთან მიიტანა, რათა დაჭმუჭნილი საწოლი აღარ დაენახა, და მისი სუნი იგრძნო: „ჯონსონის“ შამპუნის, „დაიალის“ საპნისა და ყველაზე მძაფრად – ყველაზე ცუდის, „არნიკის“ კრემისა, რომლითაც ზურგსა და ფეხებს უზელდა ტკივილის დროს.

სასოწარკვეთილმა შვილის ტვინში შეღწევა და მისი და იმ ორი კაცის პოვნა სცადა, რომლებიც ღამით მიცვალებულებივით გამოეცხადნენ და დადიტსი წაიყვანეს, მაგრამ ვერ მოახერხა.

გამემიჯნა, – გაიფიქრა ქალმა.

წლების განმავლობაში ისინი ტელეპათიური კავშირით ერთობოდნენ, რომელიც, შესაძლოა, სულ ოდნავ განსხვავდებოდა იმისგან, რასაც თითქმის ყველა განსაკუთრებული ბავშვის დედა გრძნობს (რამდენჯერ გაუგონია სიტყვა „ურთიერთკავშირი“ მხარდამჭერთა ჯგუფის შეკრებებზე, რომელთაც ელფისთან ერთად ესწრებოდა), მაგრამ ახლა ყველაფერი გაქრა. დადიტსი გაემიჯნა მას და ეს ნიშნავდა, რომ რაღაც საშინელი უნდა მომხდარიყო.

დადიტსმა იცოდა.

რობერტას კვლავ სახესთან მიეტანა მაისურები და შვილის სუნით ტკბებოდა. შემდეგ ისევ ატირდა.

## 17

კურცი კარგად (შედარებით კარგად) იქამდე იყო, სანამ პირქუშ დილას საპატრულო მანქანების კაშკაშა ლურჯ ციმციმს არ მოჰკრა თვალი. შუაგზაზე მკვდარი დინოზავრივით ეგდო მისაბმელიანი ტრაქტორი. თავიდან ფეხებამდე შეფუთნილმა პოლიციელმა გაჩერება ანიშნა.

– ამის დედაც! .. – შეიკურთხა კურცმა და ძლივს შეკავა თავი პისტოლეტის ამოღებისა და ცეცხლის გახსნისგან. იცოდა, რომ ეს თვითმკვლელობის ტოლფასი იქნებოდა, რადგან პოლიციელები

მრავლად იყვნენ. მაინც გრძნობდა მძაფრ, თითქმის გაუკონტროლებელ მოთხოვნილებას. ისინი ხომ მიზანს ასე მიუახლოვდნენ! ახლოს იყვნენ, ჯვარცმული იესოს ხელების მადლმა! და ასეთი უიღბლობა! ამის დედაც, დედაც, დედაც! ..

– როგორ მოვიქცე, ბოს? – გულგრილი ხმით ჰკითხა ფრედიმ, მაგრამ ავტომატი ყოველი შემთხვევისთვის მუხლებზე დაიდო, – თუ მივაწვები, მარჯვნიდან შევძლებ გვერდის ავლას. მხოლოდ სამოც წამს დავკარგავთ.

კურცმა კვლავ შეიკავა თავი, რათა არ ებრძანებინა: „მიდი, კურც, გატარნე, და თუ რომელიმე ცისფერსამოსიანი გზაზე გადაგვეღობება, ნაწლავები გადმოაყრევი“.

ფრედის, შესაძლოა, გამოსვლოდა, მაგრამ იქნებ... არც გამოსვლოდა. კურცი კარგა ხანია მიხვდა, რომ იგი დიდი ვერაფერი მძლოლი იყო. მფრინავების უმრავლესობის მსგავსად, ფრედის ურყევად სწამდა, რომ საჰაერო ტრანსპორტი სახმელეთოსგან არაფრით განსხვავდებოდა. კორდონი რომც გაერღვიათ, ხმაური მაინც ატყდებოდა. ეს კი სულ არ იყო საჭირო მას შემდეგ, რაც კურდღელივით დამფრთხალმა გენერალმა რენდალმა ოპერაციის შეწყვეტა ბრძანა. მისი თვითნებობის მანდატს ყავლი გასვლოდა. ახლა იგი სამართლიანობისთვის მებრძოლ მარტოხელა რაინდად ქცეულიყო.

არაფერია, მეტი მოხერხებაა საჭირო, – გაიფიქრა მან, – განა ამაში არ მიხდიან ამდენ ფულს?

– ჭკვიანად იყავი და ისე მოიქეცი, როგორც გეუბნებიან, – თქვა კურცმა ხმამაღლა, – ხელი დაუქნიე, ორივე ცერი მაღლა ასწიე, და ანახვე, თითქოს აღფრთოვანებული ხარ. სამხრეთისკენ წადი და პირველი შესაძლებლობისთანავე გზატკეცილზე დაბრუნდი. ღმერთი მოწყალეა.

იგი ფრედისკენ დაიხარა, საკმაოდ ახლოს, რათა მის მარჯვენა ყურში შეთეთრებული ბუსუსები დაენახა და ვნებამორეული შეყვარებულივით წასჩურჩულა, – თუ რამე შეგეშლება, კეფაში ტყვიას



დაგახლი, მეგობარო, – კურცი იმ ადგილს შეეხო, სადაც რბილი კისერი თავის ქალას უერთდებოდა, – აი, ზუსტად აქ.

ფრედის ინდიელივით გაქვავებულ სახეზე ერთი ნერვიც არ შესტოკებია.

– დიახ, ბოს.

კურცმა თავი დააქნია, თითქმის უგონოდ მყოფ პერლმუტერს მხრებში ხელები ჩაავლო და იქამდე ანჯღრია, სანამ ქუთუთოები არ შეარხია.

– თავი დამანებე. მეძინება.

კურცმა ყოფილ ადიუტანტს ზურგში პისტოლეტის ლულა მიაჭირა.

– არ გამოვა. თვალი გაახილე და გაიღიმე, მეგობარო. ხანმოკლე ბრიფინგს ვატარებთ.

პერლიმ დაიკვნესა, მაგრამ მაინც გაიმართა. როგორც კი პირი გააღო, იქიდან კბილი გადმოუვარდა და ქურთუკზე დაეცა. კურცის აზრით, კბილი სრულიად სალი იყო. „შეხედე, დე, ერთი ხვრელიც არ აქვს“.

პერლიმ დაადასტურა, რომ ოუენი და მისი ახალი მეგობარი კვლავაც დერიში იმყოფებოდნენ. ძალიანაც კარგი. შესანიშნავია. ზუსტად თხუთმეტი წუთის შემდეგ ფრედი დათოვლილი პანდუსის გავლით გზატკეცილზე გავიდა. ეს 28-ე გადასახვევი იყო, მიზნამდე მხოლოდ ერთი გზაჯვარედინი რჩებოდა, მაგრამ იქამდე მთელი მილი მაინც უნდა გაეგლოთ.

– ისინი გზას გაუდგნენ, – მოულოდნელად განაცხადა პერლმუტერმა, რომელიც პირში ენას ძლივს ატრიალებდა.

– დალახვროს ეშმაკმა! – იფეთქა გაშმაგებულმა კურცმა. იგი საშინელ სიძულვილს გრძნობდა ოუენ ანდერჰილის მიმართ, რომელიც მისთვის ამ უიღბლო, თავიდანვე განწირული ოპერაციის სიმბოლოდ მიაჩნდა.

პერლიმ ყრუ, სასოწარკვეთილებით აღსავსე ხმით დაიკვნესა. მუცელი კვლავ გაუფუვდა. ზედ ხელს იჭერდა, ოფლში იწურებოდა და იკლაკნებოდა. მუდამ არაფრის გამომხატველი სახე ტკივილისგან გამშვენდებოდა.

პერლის ისევ დაეწყო გაზების გამოყოფა და ამ საშინელებას ბოლო არ უჩანდა. კურცს რატომღაც ის გასართობი გაახსენდა, საზაფხულო ბანაკში რომ აკეთებდნენ კონსერვის ქილებისა და გასანთლული თოკისგან. საკმარისი იყო, ერთ ცალს შეხებოდა ვინმე, რომ გამაყრუებელი ხმაური ისმოდა. ისინი ამას „ღრიალას“ ეძახდნენ.

„ჰამერში“ დაგროვილი სიმყრალე იმ კიბოსგან იყო, რომელიც კურცის შიგნით იზრდებოდა და ჯერ ორგანიზმის უსარგებლო ნარჩენებს ნთქავდა, შემდეგ კი თვით ორგანიზმსაც. სამაგიეროდ, ფრედი აშკარად გამოჯანმრთელების გზაზე იდგა, კურცი კი საერთოდ არ დაინფიცირებულა (იქნებ იმუნიტეტი ჰქონდა; ყოველ შემთხვევაში, მან თხუთმეტი წუთის წინ ნილაბი მოიხსნა და სადღაც მოისროლა). მართალია, პერლი კვდებოდა, მაგრამ მისი გამოყენება კიდევ შეიძლებოდა: მას ხომ უკანალში შესანიშნავი რადარი ეყენა. ადრე თუ გვიან, მასში ჩაბუდებული ქმნილება გარეთ გამოალწევდა და ამით პერლის უსარგებლო ნივთად აქცევდა, მაგრამ ჯერჯერობით კურცი ამაზე არ წუხდა.

– გამაგრდი, – უთხრა პერლის ალერსიანად, – უბრძანე შენს შიგნეულობას, დაწყნარდეს და მშვიდად დაიძინე.

– წყეულო... იდიოტი! – ამოიოხრა პერლმუტერმა.

– მართალი ხარ, – დაეთანხმა კურცი, – როგორც შენ იტყვი, მეგობარო.

ბოლოს და ბოლოს, იგი მართლაც იდიოტი იყო. ოუენი მშვიდარა კოიოტი აღმოჩნდა, მაგრამ განა მან არ შეუშვა იგი იმ დაწყევლილ საქათამში?

27-ე მოსახვევი გაიარეს. კურცმა პანდუსს შეხედა და თითქოს დაინახა კიდევ ოუენის „ჰამერის“ საბურავების კვალი. სადღაც იქ,

რომელიღაც ქუჩაზე იდგა სახლი, რომლისკენაც ოუენი და მისი ახალი მეგობარი მიიჩქაროდნენ. რატომ დაიგრძელეს გზა?

– მათ დადიტის წასაყვანად შეიარეს, – თქვა პერლმუტერმა. მას მუცელი ცოტათი დაჰპატარავებოდა და სპაზმიც აღარ აწუხებდა. ჯერჯერობით მაინც.

– დადიტსი? ეს რა სახელია?

– არ ვიცი. დედამისისგან გავიგე. დადიტის დანახვა ვერ შევძელი. იგი სხვანაირია, ბოს. თითქოს, ადამიანი კი არა, რუხი კაცუნაა. კურცმა ყურები ცქვიტა.

– იმ ქალის აზრით, დადიტსი პატარა ბიჭიცაა და მოწიფული მამაკაციც, – დაამატა პერლიმ. ეს მისი ყველაზე მნიშვნელოვანი შეტყობინება იყო მას შემდეგ, რაც გოსლინის მალაზია დატოვეს. პერლმუტერი დადიტსით დაინტერესებულიყო. ნეტა რა ემართებოდა?

– იქნებ, ჭკუასუსტია, – თქვა ფრედიმ.

პერლმუტერი მიაშტერდა და ჩაილაპარაკა:

– შესაძლოა. რაც უნდა იყოს, იგი ავადაა.

– მე კი ვიცი, რასაც გრძნობს, – დაამატა ცოტა ხნის შემდეგ.

კურცმა კვლავ მხარზე მოუთათუნა ხელი.

– ყურადღება არ მოაღუნო, ბიჭუნი. იმ ტიპებზე რას იტყვი, ვისაც მისდევენ? გარი ჯოუნსისა და იმ სავარაუდო მისტერ გრეიზე?

ისინი დიდად არ ანალვლებდა, მაგრამ არსებობდა შანსი, რომ ჯოუნსისა და გრეის – თუ ეს უკანასკნელი ანდერჰილის გადახურებული წარმოსახვის ნაყოფი არ იყო – სვლაგებს ანდერჰილის, დევლინისა და... დადიტის გადაადგილებაზეც მოეხდინა ზეგავლენა.

პერლმუტერმა თავი გადააქნია, თვალეზი დახუჭა და სავარძლის საზურგეს მიეყრდნო. უეცრად მოვარდნილი ენერგია და ინტერესი თანდათან გაუქრა.

– არაფერია. დამბლოკეს.

– სულ არაფერი? – ჩაეძია კურცი.

– ერთი ციციქნა, შავი ხვრელის მსგავსი, – მიუგო პერლიმ და ნამძინარევი ხმით განაგრძო, – ხმები მესმის. ბევრი ხმა. ისინი დამხმარე ძალას გზავნიან.

და თითქოს რაღაც ჯადოქრობით, კურცმა გზის მეორე მხარეს მათკენ მომავალ იმსიგრძე ქარავანს მოჰკრა თვალი, რამხელა ც ბოლო ოცი წლის განმავლობაში არ ენახა. წინ სპილოსავით უზარმაზარი ორი თოვლსაწმენდი მოუძლოდა, თოვლს ისე გულმოდგინედ იღებდნენ და ყრიდნენ სხვადასხვა მხარეს, რომ ბეტონის საფარიც კი მოჩანდა. მათ ორრიგად მოსდევდა ქვიშით დატვირთული სატვირთო მანქანები. სულ ბოლოს, ასევე ორრიგად, სამხედრო ტრაილერები მოგორავდა ზედ მოთავსებული მძიმე პლატფორმებით. ბრეზენტგადაფარებული საგნების მოხაზულობის მიხედვით, ესენი რაკეტები უნდა ყოფილიყო. დანარჩენ მანქანებზე რადარის თეფშები, მანძილსაზომები და ათასგვარი მოწყობილობა იდო. მათ შორის ფარებანთებული ტრასპორტიორები მოდიოდნენ პირადი შემადგენლობის გადასაყვანად. სინათლის კონუსები წინ მიმავალი მანქანების ძარებს ებჯინებოდა. იმ მანქანებში ასობით კი არა, ათასობით ჯარიკაცი იჯდა, რომელიც, ღმერთმა იცის, რისთვის მოემზადებინათ – მესამე მსოფლიო ომისთვის, „ვარსკვლავური დესანტი“ გამოსხმულ ორთავა ქმნილებებთან და მოაზროვნე ხოჭოებთან ხელჩართული ბრძოლისთვის, ჭირისთვის, სიკვდილისთვის, სიგიჟისა თუ განკითხვის დღისთვის. სანამ „იმპერიალის ხეობის“ მეზობლებს, კეიტ გალაჰერის მეთაურობით, ოპერაცია არ დაესრულებინათ, ჯობდა, დრო მოეგოთ, ყველაფერი მიეტოვებინათ და კანადაში გადასულიყვნენ. მათ ვერც ხელების აწევა უშველიდათ და ვერც შეძახილი: *ილ ნ'ყ პას დ'ინფეცტიონ იცი*. ამან პირველადაც ვერ გაამართლა.

გულის სიღრმეში კურცი გრძნობდა, რომ ოუენი ერთ რამეში მაინც არ ცდებოდა: აქ ყველაფერი დასრულებული იყო. მათ შეეძლოთ

თავლის კარი დაეკეტათ, დიდება უფალს, მაგრამ ცხენი უკვე მოეპარათ.

– აპირებენ, ეს გზა სამუდამოდ ჩაკეტონ, – თქვა პერლმუტერმა, – ჯეფერსონტრექტი ახლახან ორმოცდამეთერთმეტე შტატად იქცა. ეს პოლიციელთა შტატია.

– კვლავაც ოუენის ტალღაზე მუშაობ?

– ჯერჯერობით, – დაბნეულად დაუქნია თავი პერლმუტერმა, – მაგრამ ეს დიდხანს არ გაგრძელდება. იგი გამოჯანმრთელების გზაზეა. ტელეპათიის უნარს კარგავს.

– ახლა სად არის, მეგობარო?

– ახლახან 25-ე გადასახვევს გასცდა. ჩვენგან თხუთმეტიოდე მილი თუ აშორებს, მეტი არა.

– სიჩქარეს ხომ არ მოვუმატო, ბოს? – ჰკითხა ფრედიმ. მათ იმ წყეული ტრაქტორის გამო დაჰკარგეს ოუენის შეპყრობის შანსი. ის-ღა აკლდათ, გზიდან გადასულიყვნენ და საბოლოო მარცხი განეცადათ.

– თავი დაანებე, – უთხრა კურცმა, – დაველოდოთ, ვნახოთ, რა მოხდება.

მან გულხელი დაიკრიფა და გადათეთრებულ არემარეს მიაშტერდა. თოვა შეწყდა და ამიტომ სამხრეთისკენ გზები ნაკლებად მოყინული იქნებოდა.

ბოლო ოცდაოთხი საათი მოვლენებით დატვირთული აღმოჩნდა. კურცმა უცხოპლანეტელთა ხომალდი ააფეთქა, მას იმ ადამიანმა უღალატა, რომელიც თავის ლოგიკურ მემკვიდრედ მიაჩნდა, მოქალაქეთა აჯანყებასა და ამბოხს თავი დააღწია, დაბოლოს, გაბრაზებულ გულზე იმ გენერალმა გადააყენა, რომელსაც დენტის სუნი არასდროს ეყნოსა.

კურცმა ქუთუთოები დაუშვა. რამდენიმე წამის შემდეგ ის უკვე თვლემდა.

ჯოუნსი მოღუშული იჯდა საწერ მაგიდასთან და ხან გაფუჭებულ ტელეფონს შესცქეროდა, ხან ჭერზე ჩამოკიდებულ, სიოზე აქეთ-იქით მოქანავე სიზმართმჭერ ავგაროზს, ხანაც ფოლადის ახალ დარაბებს, რომლითაც იმ არამზადა გრემი ფანჯარა დაგმანა. ყურში გამუდმებით ჩაესმოდა ჩუმი ღრენა, რის გამოც სკამზე დატყეპებული დუნდულები უთრთოდა. მწყობრიდან დიდი ხნის გამოსული აირღუმლის ხმა ჰქონდა. მაგრამ ეს ლუმელი კი არა, თოვლსაწმენდი იყო, რომელიც ჯიუტად მიიწევდა წინ, სამხრეთისკენ, სამხრეთისკენ და კვლავ სამხრეთისკენ. მძლოლის სავარძელში, ალბათ, მისტერ გრემი იჯდა DPჭ წარწერის მქონე კეპით, ბოლო მსხვერპლს რომ მოჰპარა, სატერფულს ჯოუნსის ფეხით აწვებოდა, საჭეს ჯოუნსის ხელებით ატრიალებდა და რაციით გადაცემულ ბრძანებებს ჯოუნსის ყურებით უსმენდა.

„აბა, ჯოუნსი, კიდევ რამდენ ხანს აპირებ აქ ყოფნას და საკუთარი თავის სიბრაღულს?“

ჯოუნსი, რომელიც სავარძელში ღრმად იჯდა და თითქმის თვლემდა, შეხტა. ეს ჰენრის ხმა იყო, ოღონდ არა ტელეპათიის საშუალებით გადმოცემული – ასეთი კავშირი აღარ არსებობდა, რადგან მისტერ გრემის ყველა ხაზი დაებლოკა, საკუთრის გარდა. ამ ხმამ მის ტვინში გაიჟღერა. და მაინც, ეს ჩხვლეტა საკმაოდ მგრძნობიარე აღმოჩნდა.

„სულაც არ ვიცოდებ საკუთარ თავს, უბრალოდ დამბლოკეს! – დაიწყო ჯოუნსიმ და თვითონვე არ მოეწონა ჭირვეული კილოთი თავის მართლება. მას რომ ემოცია სიტყვებით გამოეხატა, ისინი ვერაფერს გაიგონებდნენ, ნაცემი ძაღლის წკმუტუნის გარდა. – ვერ ვრეკავ, ფანჯრიდან ვერ ვიხედები, გარეთ ვერ გავდივარ. არ ვიცი, სად ხარ, ჰენრი. მე კი ნამდვილ ციხეში ვარ“.

„ტვინიც მოგპარა?“

– მოკეტე.

ჯოუნსიმ საფეთქელი მოისრისა.

„მეხსიერება ხომ არ წაგართვა?“

არა, რასაკვირველია, არა. აქაც, ამ დახურულ კარს მიღმა, რომელიც მას მარკერით მონიშნულ მილიარდობით კოლოფთან არ უშვებდა, ახსოვდა, როგორ მოიწმინდა წვინტლი ბონი დილის ნაწნავით (მეშვიდე კლასში კი იგივე ბონი წვეულებაზე საცეკვაოდ გაიწვია), როგორ ასწავლიდა ლამარ კლარენდონი თამაშს, რომელსაც დაბალი წარმომავლობისა და გაუთვითცნობიერებელი ადამიანები ქრიბიჯს ეძახდნენ, როგორ მიაღმგავსა რიკი მაკარტი ირემს. ეს ყველაფერი ახსოვდა. ცხადია, საიდუმლოს გასაღებიც სადღაც აქ იმალებოდა, მაგრამ ჯოუნსი მზად იყო, ხატზე დაეფიცა, რომ ამის შესახებ არაფერი იცოდა. იქნებ, იმიტომ არ იცოდა, რომ ის ზედაპირზე იდო.

„ასე, სულელურად გაეჩხირე. ამდენი დეტექტივი მაინც არ გქონდეს წაკითხული! – დასცინოდა ტვინში შემოსული ჰენრის ორეული, – უცხოპლანეტელთა შემოსევების შესახებ ფილმ-ფანტასტიკებზე აღარაფერს ვამბობ „დღე, როდესაც დედამიწა გაჩერდადან“ დაწყებული, „მკვლელი პომიდვრებით“ დამთავრებული, განა, ყველა არ ნახე? და ამ ყველაფრის შემდეგ იმ ტიპს ვერაფერს უხერხებ? ნუთუ არ შეგიძლია, კუთხე-კუნჭული მოიძიო და მის ბუნავს მიაგნო?“

ჯოუნსიმ კვლავ მოისრისა საფეთქელი. ეს ხომ ექსტრასენსორული აღქმა კი არა, მისი საკუთარი გონება იყო. მაშ, რატომ არ ჩუმიდებოდა? რაღა მნიშვნელობა ჰქონდა?. რაღა ის და რაღა უტრანსმიციო ძრავა, უცხენო ფორანი, მკვებაუსითხიან რეზერვუარში მოთავსებული დონოვანის<sup>196</sup> ტვინი ყოვლად უსარგებლო სიზმრების გარემოცვაში.

„რა უნდა? ამით დაიწყე“.

ჯოუნსიმ მალლა აიხედა და სიზმართმჭერ ავგაროზს შეხედა, რო-

---

<sup>196</sup> ამერიკელი ფანტასტი მწერლის, კურტ სიოდმაცის რომან „დონოვანის ტვინის“ პერსონაჟი.

მელსაც თბილი ჰაერის ნაკადი აცეკვებდა. შეიგრძნო თოვლსაწმენდის რახრახი, საკმარისად ძლიერი იმისთვის, რომ კედელზე ჩამოკიდებულ სურათებს გადასდებოდა. თინა ჯინ შლოსინგერი – აი, როგორ ერქვა იმ გოგოს, და, გავრცელებული ჭორების მიხედვით, აქ მისი ფოტოსურათი უნდა ყოფილიყო, რომელზეც კაბა ისე ჰქონდა წამოხდილი, რომ ყველას შეეძლო დაენახა მისი „ფისო“, და ვინ მოთვლის, რამდენი მოზარდი გაებრუებინა მასზე ოცნებას!

ჯოუნსი წამოდგა – თითქმის წამოხტა – და ნაბიჯებით ოთახის გაბომვას შეუდგა. ოდნავ კოჭლობდა. ქარიშხალი ჩადგა და თეძო ისე ძლიერ აღარ ტეხდა.

„ერკიულ პუარო გაიხსენე, – უთხრა საკუთარ თავს, – აამუშავე პატარა რუხი უჯრედები. გაემიჯნე მოგონებებს და მხოლოდ მისტერ გრეიზე იფიქრე. ლოგიკურად იაზროვნე. რა უნდა მას?“

ჯოუნსი გაჩერდა. გრეის სურვილები ზედაპირზე იდო. იგი სტენდფაიფთან, წყალსატევთან მივიდა, – იმ ადგილას, სადაც ის ოდესღაც იდგა, – რადგან წყალი სჭირდებოდა. სასმელი წყალი. მაგრამ კომპი აღარ არსებობდა, 85 წელს მოვარდნილ ქარიშხალს მოენგრია (ჰა-ჰა, მისტერ გრეი, იაღლიში მოგივიდა), დერისთვის აუცილებელი მარაგი კი ახლა ცოტა მოშორებით, ჩრდილო-აღმოსავლეთით იყო და იქ მისვლა, ქარბუქის გამო, სრულიად შეუძლებელი ჩანდა, თანაც სხვადასხვა ადგილას გადაენაწილებინათ. ამიტომ მისტერ გრეიმ ჯოუნსის ცოდნის საცავში იფათურა და გეზი კვლავ სამხრეთისკენ აიღო. საით?..

უეცრად, ყველაფერს მიხვდა. ფეხები წამსვე ბამბასავით დაურბილდა, მოეკეცა და ჯოუნსი იატაკზე დაგებულ ნოხზე დაენარცხა, თეძოს ტკივილისთვის ყურადღება არც კი მიუქცევია.

ძალლი. ლედი. ძალლი კვლავაც მასთან იყო?

– რა თქმა უნდა, – ჩაიჩურჩულა ჯოუნსიმ, – ცხადია, ის ნაბიჭვარი მასთანაა. მისი სუნი აქაც კი აღწევს, მაკარტივით აკუებს.

ეს სამყარო ბაირუსს მტრულად შეხვდა, მისი მკვიდრნი საოცრად



ენერგიულად იბრძოდნენ და ამისთვის ენერგიას ადამიანური ემოციის უძირო ქიდან იღებდნენ. მაგრამ ერთადერთ გადარჩენილ უცხოპლანეტელს საოცრად უმართლებდა, ვეგასში კამათლებით მოთამაშესავით, რომელიც ზედიზედ აგორებდა მომგებიან რიცხვებს. მან მიაგნო ჯოუნსის, თავის „ტიფიან მერის“, დაიპყრო მისი სხეული და გონების უდიდესი ნაწილი; მოძებნა პიტი, რომელმაც საჭირო ადგილამდე მიიყვანა, შემდეგ კი სასიგნალო შუქივით ჩაქრა. შემდეგ შეხვდა მინესოტელი ენდი ჯანასი, „რიპლისგან“ მოკლული ორი ირემი რომ გადაჰქონდა. მისტერ გრეის ირემები არ სჭირდებოდა, მაგრამ ჯანასის მანქანაში უცხოპლანეტელის ლპობაშეპარული გვამიც იყო.

ნაყოფის მატარებელი სხეულები, – გაიფიქრა ჯოუნსიმ, – ნაყოფის მატარებელი სხეულები, საიდან მახსოვს ეს?

ამას მნიშვნელობა არ ჰქონდა. რადგან მისტერ გრეის მორიგი იღბლიანი გაგორება ბებერი „მე-მიყვარს-ჩემი-ბორდერ-კოლის“ „დოდჯ-რემი“ იყო. როგორ მოიქცა გრეი? ძალღს ნაცრისფერი ადამიანის სხეული აჭამა? დრუნჩი გვამში ჩააყოფინა და ნაყოფის მატარებელი სხეულის სპორების შესუნთქვა აიძულა? არა, ალბათ, მისი შეჭმა აიძულა; „მიდი, ლეჭე, ბიჭო, დრო არ ითმენს“. როგორიც უნდა ყოფილიყო სინდიოფალას გაჩენის პროცესი, ის ფილტვებში კი არა, კუჭში ჩნდებოდა. ჯოუნსის თვალწინ კვლავ მაკარტი წარმოუდგა, რომელსაც ტყეში გზა აებნა. ბივერმა ჰკითხა:

„რა ჯანდაბა ჭამეთ? გარეული ღორის ფუნა?“

მაკარტიმ კი რა უპასუხა?

„ტოტები, ხავსი, ყველაფერი ამგვარი, ზუსტად არ ვიცი, ძალიან მშოიდა და...“

მართალია. მშოიერი იყო, გზააბნეული, შეშინებული და მშოიერი, ფოთლებსა და მწვანე ხავსზე ბაირუსის წითელ წინწკლებს ვერ ამჩნევდა, პირში იტენიდა და კუჭისკენ გზავნიდა, რადგან ადრე, როდესაც, ოჰ, ღმერთო დიდებულო, ადვოკატის უზრუნველი, მოსაწყენი ცხოვრებით ცხოვრობდა, სადღაც ამოეკითხა, რომ ექსტრემალურ

შემთხვევებში შიმშილის მოკვლა ხავსითა და ფოთლებითაც შეიძლებოდა. ნუთუ ყველას, ვინც ბაირუსი (შეუიარაღებელი თვალისთვის უხილავი, ჰაერში მოფარფატე ნაწილაკი) ჩაყლაპა, საშინელი ურჩხულები მუცელში უნდა გამოეზარდა? ერთ-ერთმა მათგანმა მაკარტი შიგნიდან გამოჭამა და გაგლიჯა, მეორემ კი ბივი მოკლა. თუმცა არა. ყველა ქალი ხომ არ ფენძიმდება დაუცველი სექსის პირველივე შემთხვევაში? მაკარტის არ გაუმართლა... არც ლედის.

– მან იცის კოტეჯის შესახებ, – თქვა ჯოუნსიმ.

რა თქმა უნდა. კოტეჯი უეირში, ბოსტონის დასავლეთით სამოციოდე მილში. იქაურების მსგავსად, მანაც იცოდა რუსი ქალის ამბავი. თვითონაც არაერთხელ მოუყოლია სხვებისთვის. ეს იცოდნენ უეირში, ახალ სალემში, კულივილემში, ბელჩერთაუნში, ჰარდვიქში, პაკარდსვილსა და პელჰემში. ყველა გარშემო მდებარე ქალაქში. და რას ერტყმოდნენ ისინი?

როგორ თუ რას? ცხადია, კუებინს. კუებინის რეზერვუარს. ბოსტონისა და მისი გარეუბნების წყალსაცავს. რამდენი ადამიანი იღებდა წყალს კუებინიდან ყოველდღიურად? ორი მილიონი? სამი? ჯოუნსიმ ეს ზუსტად არ იცოდა, მაგრამ ალბათ – გაცილებით მეტი, ვიდრე დერის სტენდფაიფიდან. მისტერ გრეი კამათელს კამათელზე აჯენდა. კიდევ ერთი გაგორება და ბანკსაც მოხსნიდა.

ორი-სამი მილიონი. მისტერ გრეის სურდა, რომ მათთვის ლედი ბორდერ კოლი და ლედის ახალი მეგობარი წარედგინა.

ბაირუსს ახალ გარემოსთან შეგუება, წესით, არ უნდა გასჭირვებოდა.

# თავი მეოცე დევნა მთავრდება

## 1

სამხრეთისაკენ! სამხრეთისაკენ! სამხრეთისაკენ!

მას შემდეგ, რაც მისტერ გრეი ოგასტას შემდეგ პირველივე, გარდინერის გადასახვევს გასცდა, თოვლის საფარი გაცილებით შეთხელდა, გზატკეცილი კი თუმცა ატალახებული, მაგრამ მთელ სიგანეზე ნაძქერისგან გაწმენდილი იყო. დადგა დრო, თოვლსაწმენდი სხვა, ნაკლებად თვალში საცემი ტრანსპორტით შეეცვალათ. თანაც ის აქეთ აღარ სჭირდებოდათ. ჯოუნსის კი, რომელიც ასეთი დიდი მანქანების საჭესთან უწინ არასდროს მჯდარა, დაძაბულობისგან ხელები სტკიოდა. დროებითი მასპინძლის სხეული მისტერ გრეის სულ არ აღარდებდა (ყოველ შემთხვევაში, ცდილობდა, საკუთარი თავი ამაში დაერწმუნებინა, თუმცა, სიმართლე ითქვას, რთული იყო ერთგვარი სიმპათია არ ეგრძნო თუნდაც „ბეკონისა“ და „მკვლელობის“ მიმართ, რომლებმაც მოულოდნელად სიამოვნება მიანიჭეს), მაგრამ მისი დახმარება კიდევ ორი ასეული მილის მანძილზე სჭირდებოდა.

მისტერ გრეის აზრით, ასაკთან შედარებით, ჯოუნსი არცთუ კარგად გამოიყურებოდა. შესაძლოა, ამაში წვლილი უბედურმა შემთხვევამაც შეიტანა, მაგრამ „ბრალი“, ძირითადად, მის სამსახურს მიუძღოდა. იგი „პროფესორი“ იყო და აქედან გამომდინარე, სრულებით უგულვებელყოფდა საკუთარი ცხოვრების ფიზიკურ ასპექტებს, რაც მისტერ გრეის გაოცებას იწვევდა. როგორც გაირკვა, ამ არსებების სამოც პროცენტს ემოცია შეადგენდა, ოცდაათს – შეგრძნება, გონებას კი მხოლოდ ათი პროცენტი რჩებოდა (მისი ვარაუდით, კიდევ უფრო ნაკლები). სხეულის მიმართ ამგვარი უდარდელი დამოკიდებულება მისტერ გრეის სისულელედ და თავქარიანობად მიაჩნდა. თუმცა ეს მისი პრობლემა არ იყო. და უკვე – აღარც ჯოუნსისა. ჯოუნსი იმად გადაიქცა, ყოველთვის რომ ნატრობდა – წმინდა გონებად. მაგრამ რეაქციაზე ეტყობოდა, რომ არც ეს მდგომარეობა მოსწონდა.

ლედიმ, რომელიც იატაკზე სიგარეტის ნამწვავებს, ქალაღდის ჭიქებსა და ჩიპსის პაკეტებს შორის იწვა, ტკივილისგან დაიყმუვლა. საბრალოს, ტანი საშინლად გაჰბეროდა და კასრს დამსგავსებოდა. მალე გაზებს გამოუშვებდა და მუცელი კვლავ დაუცხრებოდა. მისტერ გრეის ძალღში არსებულ ბაირუსთან კონტაქტი დაემყარებინა და მისი მომწიფებისა და ზრდის რეგულირება შეეძლო.

ძალღი იმის მოდიფიკაცია უნდა გამხდარიყო, რაც მისი მასპინძლის გონებაში „რუს ქალად“ აღიქმებოდა. ძალღის ადგილზე მიყვანით მასზე დაკისრებულ სამუშაოს პირნათლად შეასრულებდა.

მან გონება მოჩხრიკა სხვების შესახებ ინფორმაციის მისაღებად. ჰენრი და მისი მეგობარი ოუენი მოულოდნელად გამქრალიყვნენ – თითქოს რადიოსადგურმა მაუწყებლობა შეწყვიტაო. ეს შემაშფოთებელი სიგნალი იყო. მათ უკან (ნიუპორტის გადასახვევთან, მისტერ გრეის ახლანდელი ადგილსამყოფლიდან დაახლოებით სამოცი მილის დაშორებით) სამკაცციანი ჯგუფი მოდიოდა მკაფიო კონტაქ-

ტი: „პერლი“. ძალის მსგავსად, პერლიც ატარებდა მუცლით ბაირუსს, ამიტომ მისტერ გრეის მისი კარგად ესმოდა. ადრე ასეთივე სიგნალებს მეორისგან, ფრედისგანაც იღებდა, მაგრამ ბოლო დროს ის დუმდა. მასში არსებული ბაირუსი დაიღუპა. „პერლიმ“ ასე თქვა.

გზის პირას მწვანე საგზაო ნიშანმა გაიელვა, წარწერით „დასვენების ზონა“. იქ აუცილებლად იქნებოდა „სამეფო ბურგერი“, რომელიც ჯოუნსის ფაილებში „რესტორნისა“ და „სწრაფი კვების სასაუზმის“ სახით იყო განმარტებული, სადაც ბეკონის შეკვეთა შეიძლებოდა. ამის გაფიქრებაზეც კი მუცელი სიხარულით აუბუყბუყდა. აბა, უარი როგორ ეთქვა – მას მრავალმხრივ შეეძლო მისთვის სიამოვნების მინიჭება. მაგრამ ახლა ბეკონისთვის ვერ მოიცლიდა. მანქანა უნდა გამოეცვალა. თანაც ისე, რომ ვერავის შეემჩნია.

დასვენების ზონაში ორი გზა შედიოდა: ერთი – მსუბუქი ავტომანქანებისთვის, მეორე კი – მხოლოდ სატვირთო მანქანებისა და ავტობუსებისთვის. მისტერ გრეიმ დიდი ნარინჯისფერი თოვლსაწმენდი სატვირთო მანქანების ავტოსადგომისკენ წაიყვანა (ჯოუნსის დადლილობისგან ხელები უკანკალებდა). იქ გვერდიგვერდ მდგარ, ოთხ ზუსტად მისნაირ თოვლსაწმენდს მოჰკრა თვალი და გახარებულმა მანქანა მათი რიგის ბოლოში დააყენა.

ახლა ჯოუნსისთან საუბრისთვისაც მოიცალა. ის უცნაურ თავშესაფარში იჯდა, მისტერ გრეის იქ შესვლა არ შეეძლო.

– რა ჩაიფიქრე, პარტნიორო? – ჩაიბურტყუნა მისტერ გრეიმ.

კითხვა უპასუხოდ დარჩა, მაგრამ გრძნობდა, რომ ჯოუნსი უსმენდა.

– რას აკეთებ?

კვლავ დუმილი. ანდა რა უნდა გაეკეთებინა ჩაკეტილს, დაბრმავებულსა და კავშირის გარეშე დარჩენილს. და მაინც, ჯოუნსის დავიწყება არ ღირდა... ჯოუნსი, მისი ამაღელვებელი წინადადებით, – მისტერ გრეის დავეიწყებინა მიზანი, თესლის დათესვა, და დედამი-

წაზე ცხოვრებით დამტკვარიყო. ეს აზრი – ჯოუნსის მიერ ნებაყოფლობითი საპატიმროს კარქვეშ ამოდებული გზავნილი – ჯიუტად წამოჰყოფდა ხოლმე თავს სრულიად შეუფერებელ დროს. ჯოუნსის ფაილების მიხედვით, ამგვარ მოკლე, უბრალო და ადვილად გასაგებ აზრებს „სლოგანი“ ეწოდებოდა. უკანასკნელი სლოგანი იუწყებოდა, რომ „ბეკონი – მხოლოდ დასაწყისია“. მისტერ გრეი არც კი დაეჭვებულა, რომ ეს სიმართლე იყო. იგი ჯერ კიდევ საავადმყოფოს პალატაში (რომელი პალატა? რომელი საავადმყოფო? ვინ არის მარსი? ვის სჭირდება ნემსის გაკეთება?) მიხვდა, რომ აქ ცხოვრებას არაფერი სჯობდა. მაგრამ ბრძანება მკაფიო, არაორაზროვანი და შეუვალი იყო: მას აქაურობა ბაირუსის სპორებით უნდა მოეფინა, შემდეგ კი მომკვდარიყო. მაგრამ თუ გზად ბეკონის ჭამასაც მოასწრებდა, არაფერი დაშავდებოდა.

– ვინ იყო რიჩი? ისიც „ვეფხვი“ იყო? რატომ მოკალით?

მისტერ გრეი პასუხს ვერც ახლა ეღიროსა, მაგრამ ჯოუნსი უსმენდა, თანაც ყურადღებით. მისტერ გრეის ეზიზღებოდა მისი იქ ყოფნა – თითქოს ყელში თევზის პატარა ფხა გასჩხეროდა (ლიმილი ჯოუნსის მეხსიერების საცავიდან). არც ისე დიდი, რომ დაეხრჩო, მაგრამ გამუდმებით ჩხვლეტდა და ხელს უშლიდა.

– საშინლად მალიზიანებ, ჯოუნსი, – მან ხელთათმანები ჩაიცვა, რომელიც ადრე „დოდჯის“ მფლობელს, ლედის პატრონს ეკუთვნოდა.

ამჯერად პატიმარმა პასუხი გასცა: „მეც იმავეს ვგრძნობ, პარტნიორო. რატომ თვითონ არ წახვალ იქ, სადაც სიამოვნებით მიგიღებენ?“

– არ შემიძლია, – მიუგო მისტერ გრეიმ და ხელი კოლისკენ გაიშვირა. ლედმა მადლიერებით დაყნოსა, რადგან ხელთათმანზე ძველი პატრონის სუნი იგრძნო. მისტერ გრეიმ გონებით წყნარად ჯდომა უბრძანა, თვითონ კი მანქანიდან გადავიდა და რესტორანს შემოუარა. შენობის უკან კიდევ ერთი ავტოსადგომი უნდა ყოფილიყო –

თანამშრომლებისთვის.

„ჰენრი და მისი ამხანაგი მალე დაგიჭერენ, შე დამპალო. ვერსად გაექცევი. ამიტომ მოდუნდი და დრო გაატარე, სამმაგი ბეკონი შეუკვეთე“.

– ისინი ვერ მომაგნებენ, – თქვა მისტერ გრეიმ და პირიდან ორთქლი გამოუშვა (პირსა და ყელში სიგრილის შეგრძნებამ სიმხნევე შემატა, ბენზინისა და დიზელის სუნიც კი საუცხოოდ ეჩვენებოდა), – თუ მე ვერ ვპოულობ მათ, ვერც ისინი მიპოვიან.

ჯოუნსის გაეცინა – მართლა გაეცინა. მოულოდნელობისგან შემცბარი მისტერ გრეი ნაგვის ურნის გვერდით შეჩერდა.

„წესები შეიცვალა, ჩემო მეგობარო. მათ დადიტსს შეუარეს, დადიტსი კი ხაზს ხედავს“.

– არ ვიცი, ეს რას ნიშნავს.

„ყველაფერი იცი, შე დამპალო“.

– ასე ნუ მეძახი! – შეულრინა მისტერ გრეიმ.

„თუ ჩემს ინტელექტს არ შეურაცხყოფ, იქნებ დაგიჯერო კიდეც“.

მისტერ გრეი გზას გაუყვა. იქვე, კუთხეში, რამდენიმე მანქანა იდგა, ძირითადად, ძველი და შელახული.

„დადიტსი ხაზს ხედავს“.

მან მართლაც იცოდა, რას ნიშნავდა ეს. ამის ნიჭი, მცირე დოზით, იმასაც ჰქონდა, პიტი რომ ერქვა. თუმცა ამ უცნაურ არსებასთან, დადიტსთან, ახლოსაც ვერ მოვიდოდა.

მისტერ გრეის სულაც არ ეპიტნავებოდა იმის გაცნობიერება, რომ დადიტსი მის კვალს მიჰყვებოდა, მაგრამ მან ისეთი რამ იცოდა, რასაც ჯოუნსი ვერც კი წარმოიდგენდა. „პერლის“ აზრით, ჰენრი, ოუენი და დადიტსი მისგან სამხრეთით, სულ რაღაც, თხუთმეტი მილის მანძილზე იმყოფებოდნენ. თუ ეს სიმართლეს შეესაბამებოდა, ჰენრი და ოუენი ორმოცდახუთი მილით ჩამორჩებოდნენ და, შესაძლოა, ჯერაც პიტსფილდსა და უოტერვილს შორის მოძრაობდნენ.

ასე რომ, უახლოესი დროის განმავლობაში მას ვერაფერს დააკლებდნენ.

თუმცა აქ დიდხანს ყოფნას აზრი არ ჰქონდა.

რესტორნის უკანა კარი გაიღო და უნიფორმაში გამოწყობილმა ახალგაზრდა კაცმა (მის სამოსს ჯოუნსის ფაილები განმარტავდა, როგორც „მზარეულის წინსაფარს“) ნაგვით სავსე ორი დიდი ტომარა გამოიტანა ურნაში ჩასაყრელად. მას ჯონი ერქვა, მაგრამ მეგობრები ბაჩს<sup>197</sup> ეძახდნენ. მისტერ გრეი სიამოვნებით მოკლავდა ამ ახალგაზრდას, მაგრამ იგი ჯოუნსიზე გაცილებით ღონიერი და მოხერხებული ჩანდა, თანაც მკვლელობა რამდენიმე არასასიამოვნო ეფექტსაც იწვევდა, რომელთა შორის ყველაზე ცუდი გატაცებული მანქანის თავიდან მოშორება იყო.

„გამარჯობა, ბაჩ“.

ბაჩი შეჩერდა და შეშფოთებით მიაჩერდა მას.

„რომელია შენი მანქანა?“

სიმართლე ითქვას, მანქანა მას კი არა, დედამისს ეკუთვნოდა. ეს უკეთესიც იყო. ბაჩს თავისი დაჟანგული ჯაბახანა შინ ეყენა, რადგან აკუმულატორი აღარ უვარგოდა. ამიტომაც დედის ოთხამძრავიანი „სუბარუ“ წამოეყვანა. მისტერ გრეის, როგორც ჯოუნსი იტყოდა, კოჭი კვლავ ალჩუბე დაუჯდა.

ბაჩმა დაუზარებლად გაუწოდა გასაღები. კვლავაც შეშფოთებული იყურებოდა (“თვალანთებული და კუდაპრეხილი” – ჯოუნსის განმარტებით, თუმცა, რამდენადაც მისტერ გრეი ხედავდა, მას კული არ ჰქონდა), მაგრამ გონება გასთიშოდა.

ველარ აზროვნებს, – გაიფიქრა მისტერ გრეიმ და თქვა: – შენ არაფერი დაგამახსოვრდება.

– არაფერი, – დაეთანხმა ბაჩი.

„ახლა სამუშაოს დაუბრუნდი“.

– სხვაგან სად უნდა წავიდე, – კვლავ არ შეეწინააღმდეგა ბაჩი,

---

<sup>197</sup> დაკუნთული, ძლიერი.



ტომრებს ხელი დაავლო და ნაგვის ურნისკენ გაეშურა. იმ დროისთვის, როდესაც ცვლას დაასრულებდა და მიხვდებოდა, რომ დედამისის მანქანა სადღაც გაქრა, ყველაფერი დამთავრებული იქნებოდა.

მისტერ გრეიმ წითელი „სუბარუს“ კარი გამოალო და შიგნით შეძვრა. მგზავრის სავარძელზე კარტოფილის ჩიფსის ნახევრად სავსე პაკეტი იდო. მისტერ გრეი ხარბად დააცხრა მას და ღეჭვა-ღეჭვით მიადგა თოვლსაწმენდს, რათა იქიდან ძალლი გადმოეყვანა. პაკეტი რომ დაცალა, ჯოუნსის თითები გაილოკა. ცხიმიანი იყო. გემრიელი. ბეკონს ჰგავდა.

მან ძალლი მანქანაში ჩაისვა და ხუთი წუთის შემდეგ უკვე ტრასას მიუყვებოდა.

სამხრეთისაკენ! სამხრეთისაკენ! სამხრეთისაკენ!

## 2

ლამის სიმყუდროვეში ხმამაღალი მუსიკა, სიცილი და აღგზნებული ხმები გაისმის, ჰაერში გრილში შემწვარი ჰოთდოგის, შოკოლადის და არაქისის მაცდური სუნი ტრიალებს, ცაში ფერადი შუშხუნები ფეთქდება. ამ საყოველთაო მხიარულებას სტროფორდ-პარკში დაყენებული დინამიკებიდან წამოსული როკ-ენ-როლი აერთიანებს ზაფხულის ავტოგრაფივით:

ჰეი, ლამაზო, თუ აქ მოგწყინდა,  
ალაბამაში წავიდეთ – გინდა?

ამ დროს გამოჩნდება მსოფლიოში ყველაზე მაღალი კოვბოი, ცხრაფუტიანი პეკოს ბილი. იგი ზემოდან, აბრიალებული ციდან დასცქერის ხალხს. ნაყინით სახემოთხუპნილი პატარები პირდაღებულნი მისჩერებიან მას. გამხიარულებული მშობლები ბავშვებს მხრებზე ისვამენ, რათა მათ ყველაფერი უკეთ დაინახონ. პეკოს ბილი ერთი ხელით შლაპას იქნევს, მეორეში კი ბანერი უჭირავს, წარწერით „დერის დღეები – 1981“.

ჩვენ ფეხით წავალთ სადგურისკენ,  
ღამეს გავათევთ იქ ორ რაუნდად,  
თუკი სიჩუმე თავს მოგვაბეზრებს,  
ჩხუბის მიზეზის პოვნას რა უნდა!

– ოორ ეულია იო აეთი აალი? – კითხულობს დადიტსი, რომელ-საც ტკბილი ბამბის ცისფერი კონუსი ძირს დაუშვია და სამი წლის ბავშვივით გაფართოებული თვალებით შესცქერის ოჩოფეხებზე მდგარ კოვბოის, თავი რომ შუშუნებით აელვარებული ცისთვის მიუბჯენია. დადიტსის მარჯვნივ პიტი და ჯოუნსი დგანან, მარცხნივ – ჰენრი და ბივი. კოვბოის უკან ქურუმ ქალწულთა გუნდი მოჰყვება (მათ შორის ნამდვილად იქნება ერთ-ორი ქალწული ამ დალოცვილ 1981 წელსაც კი). კილიტებით გაწყობილი კოვბოური ქვედაწელი და კოვბოური თეთრი ჩექმა აცვიათ და მალლა-დაბლა სწევენ კვერთხებს.

– არ ვიცი, როგორ შეუძლია იყოს ასეთი მალალი, დადს, – პასუხობს პიტი ღიმილით, ბამბას ცოტას მოაგლეჯს და დადიტსს გაღებულ პირში უდებს, – ეს, ალბათ, ჯადოქრობაა.

ყველას ეცინება იმაზე, თუ როგორ ღეჭავს დადიტსი და თან თვალს არ აცილებს ოჩოფეხებზე შემდგარ კოვბოის. დადსი ყველაზე მალალია, ჰენრიზეც კი, მაგრამ კვლავინდებურად პატარა ბავშვივით იქცევა, და ეს ბიჭებს აღაფრთოვანებს. სინამდვილეში, ჯადოქარი მხოლოდ თვითონაა. თუმცა ჯოზი რინკენჰაუერს დადიტსი მხოლოდ მომავალ წელს იპოვის, ბიჭებს არასდროს შეჰპარვიათ ეჭვი, რომ იგი ჭეშმარიტი ჯადოქარია. მართალია, მათ გვარიანად შეეშინდათ, როდესაც რიჩი გრენადოსა და მის ამხანაგებს დაუპირისპირდნენ, მაგრამ ახლაც სჯერათ, რომ ის მათი ცხოვრების ყველაზე ბედნიერი დღე იყო.

წამოდი ჩემთან, არ მითხრა „არა“,  
წინ გველოდება ჩვენ ალაბამა!

– ჰეი, ტექს<sup>198</sup> – ეძახის ბივი მაღალ კოვზის და თავის შლაპას იქნევს (ბეისბოლის კეპს „დერელი ვეფხვების“ ემბლემით), – მაკოცე ტაკოში, ახმანო! თუ გინდა ამაზე დაჯექი და იტრიალე!

სიცილისგან მუცელი ლამის გაუსკდეთ (მათ სამუდამოდ დაამახსოვრდებათ ეს ღამე და შუშხუნებით განათებული ცა, როდესაც ბივერი ოჩოფხვებზე შემდგარ კოვზის აბრაზებდა), ყველას, გარდა დადიტისა, რომელიც მომხდარს კვლავაც გაოცებით მიშტერებია, და – ოუენ ანდერჰილისა („ოუენ! – ფიქრობს ჰენრი, – შენ როგორღა გაჩნდი აქ, მეგობარო?“), რომელიც შეშფოთებული იჭმუხნება.

ოუენი ანჯლრევს მას, ეუბნება, რომ გაიღვიძოს.

– ჰენრი, გაიღვიძე, გა...

### 3

– ...გაიღვიძე, ღვთის გულისთვის!

საბოლოოდ, სწორედ ოუენის ათრთოლებულმა ხმამ გამოაღვიძა ჰენრი. ჯერაც გრძნობდა მოხალული არაქისისა და ტკბილი ბამბის სუნს. ამ დროს ძილ-ღვიძილში რეალობა შემოიჭრა: თეთრი ცა, დათოვლილი გზატკეცილი, მწვანე საგზაო ნიშანი, წარწერით „ოგასტა, მომდევნო ორი გადასახვევი“. ოუენი კვლავ ანჯლრევდა, უკნიდან კი ხრინწიანი, სასოწარკვეთილი, მყეფარა ... ხმა მოისმოდა. დადიტის ახველებდა.

– გაიღვიძე, ჰენრი! სისხლი მოსდის! იქნებ გაიღვიძო, შენი...

– გავიღვიძე, გავიღვიძე.

მან უსაფრთხოების ქამარი შეიხსნა, შეტრიალდა და მუხლებზე დადგა. გადაღლილ თეძოს კუნთებში ტკივილი იგრძნო, მაგრამ ყურადღება არ მიაქცია.

ყველაფერი იმაზე უკეთ აღმოჩნდა, ვიდრე ელოდა. როდესაც ოუენის პანიკური ყვირილი მოესმა, გაიფიქრა, დადიტის სისხლისგან იცლებო. მას ცალი ნესტოდან სისხლი სდიოდა, პირიდან კი ყოველ

---

<sup>198</sup> ტეხასელების მეტსახელი.

დახველებზე წვრილად აშხეფებდა. ოუენს, ალბათ, ეგონა, რომ იგი ფილტვებიდან სისხლს ანთხევდა, სინამდვილეში კი მხოლოდ ყელი გადაღლოდა. ცხადია, პოტენციურ საფრთხეს ესეც შეიცავდა. ასეთი მძიმე მდგომარეობისას, წვრილმანიც კი შეიძლება კატასტროფად იქცეს, უბრალო გაციებამაც კი შეიძლება კაცი მოკლას. ჰენრი თავიდანვე მიხვდა, რომ დადსი უკანასკნელ გზაზე იდგა.

– დადს! – მკვეთრად შესძახა მან. მასში რაღაც შეიცვალა. რაღაც ახალი აქვს, ჰენრი. მაგრამ რა? ამაზე ფიქრის დრო არ ჰქონდა, – დადიტს, ცხვირით ისუნთქე! ცხვირით, დადიტს! აი ასე.

ჰენრიმ რამდენჯერმე ღრმად შეისუნთქა. ყოველ ამოსუნთქვაზე ნესტოებიდან თეთრი ღინღლი ცვიოდა, როგორც რძიანას ან ბაბუ-აწვერას. ეს ბაირუსია, – გაიფიქრა ჰენრიმ, – ცხვირში იზრდებოდა, მაგრამ უკვე დაიღუპა. მე ბაირუსს ვაცემინებ. მან გააცნობიერა, რომ თედო, პირის ღრუ და საზარდული აღარ ექავებოდა. ენა კვლავინდებურად ნოხივით ხორკლიანი ჰქონდა, მაგრამ ქავილი აღარ აწუხებდა.

დადიტსმა მიჰბაძა და ცხვირით შეუდგა სუნთქვას. ახლა ისე მძაფრად აღარ ახველებდა. ჰენრიმ პაკეტი მოჩხრიკა, ხველის საწინააღმდეგო, უვნებელი, უსპირტო სიროფი მოძებნა და დადიტსს დაუსხა.

– დალიე და მოგეშვება, – უთხრა თავდაჯერებულად, თან ცდილობდა, რომ ასე ეფიქრა კიდევ – დადიტსთან ურთიერთობისას სიტყვებთან ერთად ფიქრებიც მნიშვნელოვანი იყო.

დადიტსმა „რობიტუსინი“ გადაყლაპა, დაიჭყანა და ჰენრის გაუღიმა. ხველა შეუწყდა, მაგრამ ცხვირიდან და თვალის კუთხიდან სისხლი კვლავ სდიოდა. საქმეს ცუდი პირი უჩანდა. დადიტსს ფერი დაჰკარგოდა და ლოყები ჩაცვივნოდა. ამას ემატებოდა მისი მდგომარეობისთვის შეუფერებელი სიცივე, უძილობა და აღელვება. იგი ავად იყო. მლლ-ის ბოლო სტადიაზე კი რესპირატორული ინფექციაც სასიკვდილო საფრთხეს შეიცავდა.

- კარგად არის? – ჰკითხა ოუნმა.
- დადსი? დადსი რკინისაა. არა, დადსი?
- ინის, – დაეთანხმა დადსისი და საშინლად გამხდარი ხელი მოხარა.

დადსისი დალლილი, გაწამებული, მაგრამ მოლიმარი სახის დანახვაზე ჰენრის ყვირილი მოუნდა. ცხოვრება რომ უსამართლო იყო, კარგა ხანია, იცოდა და შეეგუა კიდევ ამას. მაგრამ ის, რაც ახლა ხდებოდა, უსამართლობას აღემატებოდა. შემზარავი უსამართლობა – სწორედ ეს სიტყვები შეეფერებოდა.

- ვნახოთ, რისი დალევა შეუძლიათ კარგ ბიჭებს, – თქვა მან და საუზმის კოლოფი გახსნა.

- უბი-დუ, – თქვა დადსიმა. ილიმებოდა, მაგრამ ხმა დასუსტებოდა.

- აბა, საქმეს მივხედოთ, – თქვა ჰენრიმ და თერმოსს თავი მოხადა. მან დადსის „პრედნიზონის“ აბი მისცა, თუმცა ჯერ რვა საათი არ შესრულებულიყო, და ჰკითხა, „პერკოსენი“ თუ უნდოდა. დადი წამით დაფიქრდა და ორი თითი ასწია. ჰენრის გული მოუკვდა, – არაფრად ვარგა, არა? – ჰკითხა და დადსის წამალი გაუწოდა. პასუხს არც ელოდა – დადსისნაირი ადამიანები კაიფის დასაჭერად ზედმეტ ტაბლეტს არ მოითხოვდნენ.

დადსიმა ხელი ჩაიქნია, რაც ნიშნავდა: *comme ci, comme ça*.<sup>199</sup> ჰენრის კარგად ახსოვდა ეს შესტი. იგი ისევე დამახასიათებელი იყო მისთვის, როგორც პიტისთვის ფანქრების, ბივისთვის კი კბილსაჩიქების ღეჭვა.

რობერტას დადსისი თერმოსი მისი საყვარელი შოკოლადიანი რძით გაევისო. ჰენრიმ რძე ფინჯანში ჩაასხა, დაელოდა, სანამ „ჰამერი“ გზის მოლიპულ მონაკვეთს დასძლევდა, და დადსის გაუწოდა. მან წამალი დალია და რძე მიაცოლა.

- სად გტკივა, დადს?

<sup>199</sup> ისე რა (ფრ).

– აქ, – ხელი ყელზე მიიღო, – აქ ურო, – ახლა მკერდზე ანიშნა, ბოლოს კი ოდნავ გაწითლდა, შარვლის ბარტყს შეეხო და გაუბედავად ჩაილაპარაკა, – აქაც.

შარდ-სასქესო ტრაქტის ინფექცია, – გაიფიქრა ჰენრიმ, – დალახვროს ეშმაკმა!

– უეთ არ ავები?

– აუცილებლად გახდები უკეთ, – თავის დაქნევით მიუგო ჰენრიმ, – აბები გიშველის, ოღონდ, ცოტა მოითმინე. ჩვენ ისევ ხაზს მივყვებით, დადიტს?

დადიტსმა თანხმობის ნიშნად თავი დაუქნია და ხელი წინ გაიშვირა. ჰენრიმ გაიფიქრა (პირველად არა), – ნეტა რას ხედავსო. ერთხელ იგივე შეკითხვა პიტს დაუსვა, რომელმაც აუხსნა, რომ ეს რაღაც ძაფის მაგვარი იყო, რომელიც ზოგჯერ ძლივს ჩანდა.

„კარგია, თუ იგი ყვითელია, – თქვა მან, – არ ვიცი, რატომ, მაგრამ უფრო ადვილი გასარჩევია“.

მაგრამ თუ პიტი წვრილ ყვითელ ძაფს ხედავდა, დადიტსი ალბათ – განიერ ყვითელ ზოლს ან ყვითელი აგურით მოკირწყლულ გზას, რომელსაც დოროთი<sup>200</sup> მიუყვებოდა.

– თუ ხაზი სხვა გზაზე გადავა, მითხარი, კარგი?

– აგი.

– ხომ არ დაგეძინება?

დადიტსმა თავი გააქნია. უცნაური ის იყო, რომ იგი ასეთი გამოცოცხლებული და მხნე არასდროს ყოფილა. დაქანცულ სახეზე თვალები ვარსკვლავებით უბრწყინავდა, ასე ზოგჯერ ნათურა ანათებს ხოლმე გადაწვის წინ.

– თუ ძილი მოგერევა, გვითხარი და მანქანას გავაჩერებთ, შენთვის ყავას ვიშოვით. ჩვენ არ გვეძინება.

– აგი.

---

<sup>200</sup> ფრენკ ბაუმის ოზის ქვეყანაზე შექმნილი ზღაპრების ციკლის მთავარი გმირი.

ჰენრი აპირებდა, ფრთხილად შეტრიალებულიყო, კუნთები რომ არ სტკენოდა, როდესაც დადიტსმა დაამატა:

- ისერ ეის ეონი უდა.
- მართლა? – ჰკითხა ჰენრიმ ჩაფიქრებული სახით.
- რაო? – დაინტერესდა ოუენი, – ვერ გავიგე.
- ამბობს, რომ მისტერ გრეის ბეკონი უნდა.
- ეს მნიშვნელოვანია?
- არ ვიცი. მომისმინე, აქ ჩვეულებრივი რადიომიმღები თუ არის? იქნებ ახალი ამბებისთვის მოგვესმინა.

ჩვეულებრივი რადიომიმღები ხელსაწყოების პანელის ქვემოთ ეკიდა. ცოტა ხნის წინ დაეყენებინათ. საწყის კომპლექტში იგი არ შედიოდა. ოუენმა მისკენ ხელი გაიწვდინა, მაგრამ უეცრად ფეხი მუხრუჭს დააჭირა, რათა მის წინ ჩამდგარ სრულამძრავიან, ზაფხულის საბურავებიან „პონტიაკს“ არ დასჯახებოდა. „პონტიაკი“ მოცურდა, მაგრამ ბედმა გაუღიმა და გზიდანაც კი არ გადავიდა. მძლოლმა სიჩქარეს მოუმატა და მანქანა წინ გაიჭრა. ჰენრის გაანგარიშებით, იგი საათში არანაკლებ სამოცდახუთ კილომეტრს ავითარებდა. ოუენი მოიღუშა.

- რა თქმა უნდა, მე მხოლოდ მგზავრი ვარ, – თქვა ჰენრიმ, – მაგრამ თუ ყველა ბავშვს შეუძლია ასეთი მანევრირება ზამთრის საბურავების გარეშე, იქნებ, ჩვენც შევფუცხუნებულიყავით? კარგი იქნებოდა, მანძილს თუ შევამცირებდით.

- „ჰამერი“ ტალახში უკეთ დადის, ვიდრე თოვლში. შეგიძლია მენდო.

- და მაინც...

- ჩვენ მას ათი წუთის შემდეგ დავინახავთ. ერთ კვარტ<sup>243</sup> კარგ ვისკიზე გენაძლევები. ან დამცავ ზღუდეს გაარღვევს და სადმე ყრილზე ეგდება, ან ღერძულა ხაზზე გაიჩხირება. თუ გაუმართლა, მარჯვენა გვერდი ზემოთ ექნება. თანაც... ცხადია, ტექნიკური დე-

ტალებია, მაგრამ არ დაგავიწყდეს, რომ გაქცეულები ვართ, ხელი-სუფლებას ვემალებით, და, თუკი ასე ვიზოზინებთ, კაცობრიობას ვერ გადავარჩინთ... ღმერთო ჩემო!

მათ ღრიალით ჩაუქროლა და თოვლის კორიანტელი დააყენა სრულამძრავიანმა „ფორდ-ექსპლორერმა“, რომელსაც ამგვარი ამინდისთვის შეუფერებელი, საათში თითქმის სამოცდაათი მილის სიჩქარე განევიტარებინა. სახურავზე დამაგრებული საბარგული საგსე იყო დაუდევრად შეკრული და ბრეზენტით სანახევროდ დაფარული ჩემოდნებითა და ჩანთებით. სულაც არ იქნებოდა გასაოცარი, თუ ეს ყველაფერი მალე გზაზე აღმოჩნდებოდა მოფანტული.

დადიტსს რომ მიხედა, ჰენრიმ გზა ყურადღებით შეათვალიერა. ნანახს არ გაუოცებია. შემხვედრ მხარეს თითქმის არავინ მოძრაობდა, არც სამხრეთის მიმართულებით შეიმჩნეოდა მანქანების მატება. ოუენმა რადიო სწორედ მაშინ ჩართო, როდესაც „მერსედესმა“ გადასწრო და ტალახი ააშხეფა. მან თითი ძებნის ღილაკს დააჭირა და კლასიკურ მუსიკას მიაგნო, კვლავ დააჭირა და იუმორისტულ არხზე მოხვდა, მესამედ დააჭირა... და ხმა გაისმა.

– ...უზარმაზარი, გასაოცარი მოსაწევი, – განაცხადა ვილაცამ. ჰენრიმ და ოუენმა ერთმანეთს გადახედეს.

– აიუანას ეევა, – შენიშნა უკანა სავარძელზე მჯდომმა დადიტსმა.

– სწორია, – თავი დააქნია ჰენრიმ, როდესაც ხმის პატრონმა მიკროფონში ხმამაღლა ამოისუნთქა, – მარიხუანას ეწევა და, როგორც ჩანს, ბალახი არ დანანებია.

– მეეჭვება, რომ კავშირგაბმულობის ფედერალურმა კომისიამ ეს მოიწონოს, – განაგრძო დიჯეიმ მორიგი ღრმა და ხმაურიანი ნაფაზის დარტყმის შემდეგ, – მაგრამ თუ იმის ნახევარი მაინც სიმართლეა, რაც გავიგონე, კვკ<sup>201</sup> ყველაზე ნაკლებად უნდა გვადარდებდეს.

---

<sup>201</sup> კავშირგაბმულობის ფედერალური კომისია.



უბედურება ისაა, რომ ჩვენთან ვარსკვლავთმორისი ჭირი შემოიჭრა. მას გინდ „ცხელი ზონა“ უწოდეთ, გინდ – „მკვდარი ზონა“ ან „ბინდუნდის ზონა“, მაგრამ ეცადეთ, ჩრდილოეთისგან თავი შორს დაიჭიროთ.

კიდევ ერთი ღრმა და ხმაურიანი ნაფაზი.

– ძმებო და დებო, მარსელი მარვინი მარშით მოემართება, როგორც ამას სომერსეტისა და ქასლის ოლქებიდან გადმოგვცემენ. ჭირი, სიკვდილის სხივები, ცოცხლებს მკვდრების შურთ.

გაისმა ტკაცატკუცი. თითქოს პლასტმასის საგანი გატყდა. ჰენრი მონუსხულივით უსმენდა. აი, ისიც, სულ ახლოს არის – წყვილია, მისი ძველი მეგობარი, ოლონდ ამჯერად არა თავში, არამედ ამ წყეულ რადიოში.

– ძმებო და დებო! თუ ახლა ოგასტას ჩრდილოეთით იმყოფებით, მოუსმინეთ თქვენს მეგობარს, მარტონელა დეივს WWWE-დან: საპირისპირო მხარეს გადადით და სამხრეთისკენ გასწიეთ. დაუყოვნებლივ. გზაში კი მუსიკას არ მოგაკლებთ.

მარტონელა დეივმა WWWE-დან, ცხადია, The Doors<sup>202</sup> გაუშვა. ჯიმ მორისონი მონოტონურად შეუდგა „დასასრულის“ მღერას. ოუენი საშუალო სიხშირეებზე გადაერთო და მალე ახალი ამბების გამოშვებას მიაგნო. დიქტორის ხმა ისე ტრაგიკულად აღარ ისმოდა, რაც უდავოდ წინ გადადგმული ნაბიჯი იყო. მან თქვა, რომ პანიკის საფუძველი არ არსებობდა – კიდევ ერთი ნაბიჯი წინ. შემდეგ ეთერში პრეზიდენტისა და მენის შტატის გუბერნატორის გამოსვლის ნაწყვეტები გაისმა. ორივენი დაახლოებით ერთსა და იმავეს ამბობდნენ: „მშვიდად, მოქალაქენო, არ ინერვიულოთ, ყველაფერს ვაკონტროლებთ“. ერთი სიტყვით, ჩვეულებრივი, დამამშვიდებელი ლაქლაქი – რობიტუსინი პოლიტიკოსებისთვის. პრეზიდენტი ამერიკელი ხალხის წინაშე გამოსვლას აღმოსავლეთის სასარტყლო დროით დილის თერთმეტის ნახევარზე აპირებდა.

---

<sup>202</sup> ამერიკული როკჯგუფი, შეიქმნა 1965 წ-ს.

– ის სიტყვაა, რომლის შესახებაც კურცი ამბობდა, – გაახსენდა ოუენს, – ოღონდ ერთი დღით გადაუწევიათ.

– რომელი სიტყვა...

– ჩუ-უ-უ, – ოუენმა რადიოზე მიუთითა.

ასეთი სანუგეშო გამოსვლის შემდეგ დიქტორი კვლავაც აფორიაქებდა მსმენელებს დაუსრულებელი ჭორებით, რომლებიც მათ უკვე მოესმინათ კაიფში წასული დიჯეისგან, ოღონდ – უფრო დახვეწილი ფორმით: ჭირი, უცხოპლანეტელები, სიკვდილის სხივები. ამას ამინდის პროგნოზი მოჰყვა: თოვა წვიმასთან ერთად, ძლიერი ქარი თბილი ფრონტის სახით – მკვლელ მარსელებზე რომ აღარაფერი ვთქვათ – ჩრდილოეთისკენ გადაინაცვლებდა. შემდეგ გაისმა მოკლე-მოკლე სიგნალები და გადაცემის გამეორება დაიწყო.

– ეედეთ! – შესძახა დადიტსმა; „შეხედეთ!“ – აიროეს, – „შეხედეთ, ჩაგვიქროლეს“.

დადიტსმა თითი ჭუჭყიან ფანჯარას მიადო. თითიც ისევე უცახცახებდა, როგორც მთელი სხეული. კბილებიც კი უკაწკაწებდა.

ოუენმა „პონტიაკს“ გახედა, რომელიც მართლაც შუაგზაზე გაჩხერილიყო, თუმცა ამოყირავებას გადარჩენოდა. დაბნეული მგზავრები გარს შემოხვეოდნენ და არ იცოდნენ, რა ექნათ. ოუენმა მხრები აიჩეჩა და დადიტსს მიუბრუნდა – საცოდავად მოკუნტულს სახეზე ფერი არ ედო, ცალი ნესტოდან გასისხლიანებული ბამბა მოუჩანდა.

– ჰენრი, როგორ არის?

– არ ვიცი.

– აბა, ენა გამოყავი.

– ხომ არ გგონია, რომ აჯობებს, გზას...

– მე მშვენივრად ვარ, სიტყვას ბანზე ნუ მიგდებ. ენა გამოყავი.

ჰენრი დაემორჩილა. ოუენმა შეხედა და შუბლი შეიჭმუნა.

– საშინლად გამოიყურება, მაგრამ იქნებ ყველაფერი არც ისე ცუდაა. ის რაღაც გათეთრებულა.

– ნაჭრილობევე ფეხზეც ასეა. შენს სახესა და წარბებზეც. გაგვიმართლა, რომ ფილტვებში, ტვინში ან კუჭში არ შეაღწია. სხვათა შორის, პერლმუტერს იგი კუჭში ჰყავს. საბრალო, ამ საზიზღარი ქმნილების ინკუბატორად იქცა.

– შორს არიან, ჰენრი?

– ვფიქრობ, ჩვენგან ოცი მილის დაშორებით. იქნებ, უფრო ახლოსაც. შენ რომ ცოტათი მაინც მოუჩქარო...

ოუენი ასეც მოიქცა. იცოდა, რომ კურციც იმავეს გააკეთებდა – სიჩქარეს მოუმატებდა, როგორც კი მიხვდებოდა, რომ მასობრივი სვლის ნაწილი გახდა და იმის ალბათობა, რომ სამოქალაქო ან სამხედრო პოლიცია მის ძებნას შეუდგებოდა, ძალიან მცირე იყო.

– შენ კვლავაც კავშირზე ხარ პერლისთან, – გაოცდა ოუენი, – თუმცა ბაირუსი კვდება, მაინც...

მან თითი გაიშვირა უკანა სავარძლისკენ, რომელზეც დადიტსი ნახევრად მიწოლილიყო და ისე ძლიერ აღარ კანკალებდა.

– რასაკვირველია, – თავი დაუქნია ჰენრიმ, – ეს დადიტსისგან ჯერ კიდევ დიდი ხნის წინ გადმომეცა. მარტო მე კი არა, ბივერსაც, ჯოუნსისაც და პიტსაც. ჩვენ მას თითქმის ვერ ვამჩნევდით, ჩვეულებრივ ამბად მიგვაჩნდა, – „რა თქმა უნდა. ისევე, როგორც ფიქრები სამართებლის, აბაზანის, ხიდის მოაჯირებისა და სანადირო თოფების შესახებ. ჩვეულებრივ ამბად“, – უბრალოდ, ახლა გაძლიერდა. დროთა განმავლობაში, შესაძლოა, ისევე შესუსტდეს, მაგრამ ჯერჯერობით... – მან მხრები აიჩეჩა, – ხმები მესმის.

– პერლის?

– მისიც, – თავი დაუქნია ჰენრიმ, – და სხვებისაც, ვის ორგანიზმშიც ბაირუსია გააქტიურებული. ძირითადად, მათი, ვინც ჩვენ უკანაა.

– ჯოუნსის ხმაც? შენი მეგობარი ჯოუნსის? ან გრეის?

ჰენრიმ თავი გააქნია.

– მაგრამ პერლის რაღაც ესმის.

– პერლის? ეს როგორ?

– ბაირუსის გამო მას გაცილებით ფართო ტელეპათიური დიაპაზონი აქვს.

– ეს რაღაა?

– ქმნილება, რომელიც უკანალში უზის, – აუხსნა ჰენრიმ, – ტრაწიანი სინდიოფალა.

ოუენს წამსვე მუცლის ტკივილმა წამოუარა.

– ის, ვისიც ესმის, ადამიანი არ არის. არა მგონია, ეს მისტერ გრეი იყოს, მაგრამ ვინ იცის? მხოლოდ იმას ვხვდები, რომ პერლი მასზეა დამოკიდებული.

ორივე გაჩუმდა. მანქანების რიცხვი გაიზარდა. მძღოლები, რომლებიც გიუბივით მიქროდნენ, სადმე, გზისპირა თხრილში ამთავრებდნენ გზას. ოგასტას სამხრეთით მიტოვებულ, ნაავარიებ „ექსპლორერს“ წამოეწივნენ, რომლის ბარგიც აქეთ-იქით გაფანტულიყო. ოუენის აზრით, მათ ჯერჯერობით უმართლებდათ. ქარიშხლის შიშით, ბევრ მძღოლს ადგილიდან დაძვრა ვერ გაეხებდა, მაგრამ ახლა, როდესაც ქარბუქი ჩადგა, ყველანი სამხრეთისკენ გაიქცეოდნენ. ოუენმა მოახერხა და პირველ ტალღას გადაასწრო. ქარიშხალი მათ მიმართ კეთილგანწყობას იჩენდა, თითქმის მეგობარი გამხდარიყო.

– რაღაც მინდა, იცოდე, – თქვა ოუენმა.

– ლაპარაკით თავს ნუ შეიწუხებ. ჩემ გვერდით ზიხარ, მე კი კვლავაც შემოძლია შენი ფიქრების წაკითხვა.

ოუენი ფიქრობდა, „ჰამერი“ გაეჩერებინა, გადასულიყო და კურცს დალოდებოდა. მაგრამ არ იცოდა, კურცი მას თუ დასჯერდებოდა და დევნას შეწყვეტდა. ამისი ნაკლებად სჯეროდა. მართალია, კურცის მთავარი სამიზნე ოუენ ანდერჰილი იყო, მაგრამ იგი ხვდებოდა, რომ ოუენი საშინელ ღალატზე მხოლოდ გამოუვალი მდგომარეობის გამო თუ წავიდოდა. არა, ის ანდერჰილს ტყვიას ჩააჭედებდა და დევნას გააგრძელებდა. ოუენთან ერთად ჰენრის გამარჯვების შანსი ჰქონდა, მის გარეშე კი ვერ გადარჩებოდა. ვერც დადიტსი.

– ჩვენ ერთად ვიქნებით. როგორც ამბობენ, კუბოს ფიცრამდე მეგობრებად დავრჩებით, – ჩაილაპარაკა ჰენრიმ.

– ენ ერ ერი ამე ავს, – მოესმა უკანა სავარძლიდან.

– მართალი ხარ, დადს, – ჰენრი დადიტსისკენ შეტრიალდა და ცივ ხელზე ხელი მოუჭირა, – ჩვენ ჯერ ბევრი საქმე გვაქვს.

#### 4

ათი წუთის შემდეგ საბოლოოდ გამოცოცხლებულმა დადიტსმა ოგასტას გასცდნენ თუ არა, პირველივე დასვენების ზონისკენ გაიშვირა ხელი. იქიდან ლუისტონამდე თითქმის აღარაფერი რჩებოდა.

– აქ! აქ! – შესძახა და კვლავ ხველა აუტყდა.

– დაწყნარდი, დადიტს, – უთხრა ჰენრიმ.

– იქნებ აქ ყავისა და ნამცხვრისთვის შემოიარეს, – გამოთქვა ვარაუდი ოუენმა, – ან ბეკონის სენდვიჩისთვის.

მაგრამ დადიტსმა შესტიტ ანიშნა, რესტორნისთვის შემოევლოთ. ისინი თანამშრომლებისთვის განკუთვნილ ავტოსადგომთან შეჩერდნენ. ცა კვლავ ღრუბლებს დაეფარა. დადიტსი მანქანიდან გადავიდა. ცოტა ხანს ერთ ადგილზე იდგა, რალაცას ბურტყუნებდა და ქარის ყოველ დაბერვაზე მისი გამხდარი და დასუსტებული სხეული ოდნავ ირწეოდა.

– ჰენრი, – თქვა ოუენმა, – არ ვიცი, მის თავში რა ხდება, მაგრამ კურცი კვალში გვიდგას, და...

ამ დროს დადიტსმა თავი დააქნია, მანქანაში ჩაჯდა და ხელი გასასვლელისკენ გაიშვირა. საოცრად დაქანცული, მაგრამ, იმავდროულად, კმაყოფილიც ჩანდა.

– რას ნიშნავს ეს ყველაფერი, ღვთის გულისთვის? – იკითხა გაოგნებულმა ოუენმა.

– ვფიქრობ, მან მანქანა გამოიცვალა, – თქვა ჰენრიმ, – ასეა, დადიტს? მანქანა გამოიცვალა?

დადიტსმა თავი ენერგიულად დაიქნია.

– ოიარა! ოიარა! ანანა!

– მანქანა მოიპარა? ახლა უფრო ჩქარა ივლის, – ამოიოხრა ჰენრიმ, – მიდი, ოუენ. კურცი აღარ მადარდებს, მისტერ გრეი უნდა შევიპყროთ.

ოუენმა ჰენრის შეხედა... შემდეგ ისევ გახედა მას.

– რა დაგემართა? ძალიან გაფითრდი.

– ნამდვილი სულელი ვარ! თავიდანვე უნდა მივმხვდარიყავი იმ ნაძირალას ჩანაფიქრს. მხოლოდ ის თუ გამამართლებს, რომ დაღლილი და შეშინებული ვარ, თუცა, რა მნიშვნელობა აქვს, თუკი... ოუენ, აუცილებლად უნდა დაეწიო. ის დასავლეთ მასაჩუსეტისისკენ მიემართება, მაგრამ ჩასვლამდე უნდა შევიპყროთ.

ახლა ისინი აშხეფებდნენ ტალახიან თოვლს აქეთ-იქით. ტალახი გაცილებით მეტი იყო. მიუხედავად ამისა, ოუენი თამამად აწვებოდა აქსელერატორს, ოღონდ ეს სითამამე საათში მხოლოდ სამოცდახუთ მილს ჰყოფნიდა.

– შევეცდები, მაგრამ თუ რამე ხათაბალას არ გადაეყარა ან სადმე არ შეეკვნა, – თქვა ოუენმა და თავი გადააქნია, – არა მგონია, მეგობარო, არა მგონია.

## 5

ბავშვობაში ამ სიზმარის ხშირად ხედავდა (მაშინ გვარად კუნცი იყო), მაგრამ როცა წამოიზარდა, ერთხელ თუ ორჯერ ნახა ოფლში გაწურულმა: თითქოს სავსემთვარეობისას მინდორში გარბოდა და უკან მიხედვის ემინოდა, რადგან ის მისდევდა. ის. რაც ძალი და ღონე ჰქონდა, მიქროდა. ცხადია, ვერაფერს ახერხებდა. სიზმარში ზედმეტად გაჭაჭვას აზრი არ ჰქონდა, მაინც არაფერი გამოვიდოდა. ის კი თითქმის დაეწია და ისე ახლოს მივიდა, რომ კურცი მის მშრალ სუნთქვასა და სპეციფიკურ მშრალ სუნს გრძნობდა.

დიდი, წყნარი და ძალიან ლამაზი ტბის ნაპირზე აღმოჩნდა (მისი ბავშვობისდროინდელ უფერულ და გასაცოდავებულ კანზასში ტბა

არ იყო და ვერც იქნებოდა), მის სიღრმეში მთვარე ანთებული ლამპარივით აირეკლებოდა და კურცს შიში იპყრობდა, რადგან ტბა უნდა გადაეცურა, ცურვა კი არ იცოდა.

მუხლებზე დაეცა, – ამ ადგილამდე სიზმარი არაფრით განსხვავდებოდა ბავშვობაში ნანახისგან, – მაგრამ იმის ნაცვლად, რომ უძრავ წყალში იმის, იმ საშინელი საფრთხობელას ანარეკლი დაენახა, რომელსაც თავი ბამბით გამოეტენა, გაბერილ ხელებზე კი ლურჯი ხელთათმანები წამოეცვა, – კურცმა ამჯერად ოუენ ანდერჰილი დაინახა... მას სახეზე წითელი წინწკლები ეყარა. მთვარის შუქში ბაირუსი უზარმაზარ, ღრუბლოვან და უფორმო შავ ხალებს ჰგადა.

პატარაობისას ყოველთვის ამ ადგილზე ეღვიძებოდა (ხშირად გამაგრებული ასოთი, თუმცა მხოლოდ ღმერთმა იცოდა, რატომ იწვევდა საშინელი სიზმარი ბავშვში ასეთ რეაქციას), მაგრამ ახლა ის... ოუენი... მართლაც შეეხო მას, საყვედურით სავსე თუ გაკვირვებული თვალებით მიაჩერდა.

„ვინაიდან ბრძანებას არ დაემორჩილე, მეგობარო! ვინაიდან ზღვარს გადახვედი!“

მან ხელი ასწია, ოუენისთვის რომ ეკრა, ის გზიდან ჩამოეშორებინა... და მთვარის შუქზე დაინახა, რომ ოუენი განაცრისფრებულიყო.

„არა, – გაივლო გულში, – ეს მთვარის შუქის ბრალია“.

მაგრამ რატომ ჰქონდა მხოლოდ სამი თითი? ამაშიც მთვარის შუქი იყო დამნაშავე?

ოუენის ხელი მას ეხება, საძაგელ დაავადებას გადასცემს... და კიდევ ბედავს, რომ ეძახის...

## 6

– ბოს! გაიღვიძეთ, ბოს!

კურცმა თვალი გაახილა, უკმაყოფილო ბურტყუნით წამოიწია და

ფრედის ხელი მოიცილა, რომელიც მხარზე კი არა, მუხლზე ედო. თავისი ადგილიდან ფრედი მხოლოდ მის მუხლს სწვდებოდა და აჯანჯლარებდა, მაგრამ ესეც აუტანელი იყო.

– მღვიძავს, მღვიძავს.

რომ დარწმუნებულიყო ორივე ხელი თვალებთან მიიტანა. მართალია, ახალშობილივით ვარდისფერი ხელები არ ჰქონდა, იქამდე ბევრი აკლდა, მაგრამ არც ნაცრისფერი ედო, თითოეულზე კი, როგორც ყოველთვის, ხუთი თითი ება.

– რომელი საათია, ფრედი?

– არ ვიცი, ბოს. მხოლოდ იმის თქმა შემიძლია, რომ დილაა.

რა თქმა უნდა. ყველა საათი გაჩერდა, ჯიბისაც კი. კურცს, რომელიც თანამედროვეობის ისეთივე მსხვერპლი იყო, როგორც სხვები, საათის მომართვა დავიწყებოდა. თუმცა, მძაფრად აღიქვამდა დროს და ახლაც მიხვდა, რომ ცხრა საათი იქნებოდა. მაშასადამე, ორი საათი სძინებია. მეტი ჯობდა, მაგრამ ესეც საკმარისი იყო, თავს გაცილებით უკეთ გრძნობდა. საკმაოდ კარგად, რათა ფრედის ხმაში შემოფოთება დაეჭირა.

– რა მოხდა, მეგობარო?

– პერლი ამბობს, რომ კონტაქტი დაკარგა. ყველასთან. ბოლოს ოუენს დაუკავშირდა, მაგრამ ისიც გაქრა. პერლის ვარაუდით, მან სოკო დაამარცხა.

კურცმა უკანა ხედვის სარკეში უსიცოცხლო სახეზე ღიმილი შეამჩნია, რაც ნიშნავდა: მე-თქვენ-ყველანი-გაგასულელებთ.

– რა მოხდა, არჩი?

– არაფერი, – არჩი თითქოს ცოტათი გამოცოცხლდა და დამშვიდდა, სანამ კურცს ეძინა, – მე... ბოს, მწყურია. არ მშია, მაგრამ...

– გავჩერდებოდით წყლის დასალევად, – თქვა კურცმა, – კონტაქტი რომ გვეკონდეს. თუ ყველანი დავკარგეთ, – ჯოუნსიც, ოუენიც და დევლინიც, – ხომ კარგად მიცნობ, მეგობარო, სიკვდილის წინ ძა-



ლიან მწარედ ვიკბინები, ორი ქირურგი და პისტოლეტი იქნება საჭირო, ხელი რომ შემეშალოს. შეგიძლია, წყურვილით მოკვდე, სანამ მე და ფრედი, კვალის პოვნის მიზნით, სამხრეთისკენ მიმავალ გზებს არ გადავაქოთებთ, ცხადია, იმ შემთხვევაში, თუ ჩვენს დახმარებას არ მონდომებ. მიდი, არჩი, ფრედის ვუბრძანებ, პირველივე შემხვედრ მალაზიასთან გააჩეროს. მე თვითონ შევირბენ Stop&Go-სა ან შევენ-ელევენ-ში და ყველაზე დიდი ბოთლით ჩაცივებულ Pოლანდ შპრინგ-ს გიყიდი. აბა, როგორ უღერს?

საუცხოოდ ისმოდა, რადგან პერლმუტერმა ხარბად გააწკლავუნა პირი და ტუჩები გაილოკა (ტუჩებსა და ლოყებზე „რიპლი“ მოსდებოდა, ალაგ-ალაგ – მოწითალო, ძირითადად – მუქი შინდისფერი), მაგრამ თვალეები ეშმაკურად მოეწკურა. სოკოს ფუფხით მოჩარჩოებული თვალეები აქეთ-იქით დაურბოდა. გული გულს იცნობსო, ნათქვამია, და კურცი წამსვე ყველაფერს მიხვდა: პერლი გაგიჟებულიყო.

– ისე გეუბნებით, როგორც აღსარებაზე – მათთან კავშირი დაგკარგე, – თქვა არჩიმ, თან თითი ცხვირზე მიიღო და კურცს სარკიდან კვლავ ეშმაკურად გახედა.

– როგორც კი მათ შევიპყრობთ, ვფიქრობ, აუცილებლად მოგარჩენთ, ჩემო ბიჭუნო, – სცადა დარწმუნება კურცმა თავისი ცივი, ოფიციალური, გულგრილი კილოთი, – ვისთან გაქვს კონტაქტი? ჯოუნსისთან? თუ იმ ახალ ტიპთან, დადიტსთან? (კურცმა ეს სახელი ისე წარმოთქვა, როგორც „დად-დატსი“.)

– მათთან არა. არავისთან.

მაგრამ თითი კვლავ ცხვირზე მიეღო და ცელქი ბავშვივით იყურებოდა.

– მითხარი და წყალს მიიღებ, – არ ეშვებოდა კურცი, – თუ ჩემი მოთმინების გამოცდას გაარძელებ, რიგითო, ტყვიას დაგაჭედებ და გარეთ მოგისვრი. მიდი, წაიკითხე ჩემი აზრები და თქვი, რომ გატყუებ.

პერლიმ კურცს სარკიდან პირქუშად გახედა და თქვა:

– ჯოუნსი და მისტერ გრეი კვლავაც გზატკეცილზე არიან, პორტლენდთან ახლოს. ჯოუნსიმ მისტერ გრეის აუხსნა, თუ როგორ უნდა შემოუაროს ქალაქს 295-ე ავტომაგისტრალით. ოღონდ ეს სიტყვებით არ უთქვამს. მისტერ გრეი მის თავშია და, როდესაც რამე უნდა, უბრალოდ, ეძებს და პოულობს.

კურცი მას მომეტებული მოკრძალებით უსმენდა და რაღაცას ანგარიშობდა.

– ძაღლი, – განაგრძო პერლიმ, – მათთან ძაღლია, სახელად ლედი. მე სწორედ მასთან მაქვს კონტაქტი. ის... მე მგავს, – მათი თვალები კვლავ შეხვდა ერთმანეთს სარკეში, ოღონდ, ამჯერად, პერლის ეშმაკობისა აღარაფერი ეცხო. მას ნახევრად ნორმალური ადამიანის გამომეტყველება ჰქონდა, – თქვენი აზრით, მართლა შემიძლია გავხდე ის... ხომ გესმით... ვინც ვიყავი?

კურცი ხვდებოდა, რომ პერლის ნებისმიერ წამს შეეძლო მის გონებაში შეღწევა, ამიტომ გადაწყვიტა, ფრთხილად ემოქმედა.

– ვფიქრობ, არსებობს შანსი, რომ ამ ტვირთისგან გათავისუფლდე. ამისათვის კარგი ექიმი დაგვჭირდება. ჰო. ასეთი რამ სასვებით შესაძლებელია. ცოტა მეტი ქლოროფორმი, და როცა გაიღვიძებ... ფუუჰ, და მორჩა.

კურცმა თითის წვერები შეაერთა და აკოცა, შემდეგ კი ფრედის მიუბრუნდა:

- თუ ისინი პორტლენდში არიან, რამდენით ჩამოვრჩებით?
- დაახლოებით სამოცდაათი მილით, ბოს.
- მაშინ სიჩქარეს მოუმატე და მადლობა უფალს. სწრაფად იმოძრავე, მაგრამ შეეცადე, თხრილში არ გადაეშვა.

სამოცდაათი მილი. და თუ ოუენმა, დევლინმა და დად-დატსმა იციან ის, რაც პერლმუტერმა იცის, ისინიც კვალს მიჰყვებიან.

- მოდი, არჩი, დამიზუსტე. მისტერ გრეი ჯოუნსიში ზის...
- დიახ...
- და მათთან ერთად ძაღლია, რომელიც აზრებს კითხულობს?

– არა, მას ესმის, მაგრამ ვერაფერს იცებს. ის ხომ მხოლოდ და მხოლოდ ძაღლია. მწყურია, ბოს.

„ის ისე უსმენს ძაღლს, როგორც რადიოს“, – გაოცდა კურცი.

– ფრედი, შემდეგი გადასახვევი. ირგვლივ სულ წყალია.

მას საოცრად არ უნდოდა გაჩერება და დროის დაკარგვა, მაგრამ პერლმუტერი სჭირდებოდა. თანაც, კარგ ხასიათზე, თუ ეს შესაძლებელი იყო.

წინ სწორედ ის დასვენების ზონა გამოჩნდა, სადაც მისტერ გრემი თავისი თოვლსაწმენდი მზარეულის „სუბარუზე“ გადაცვალა. და სადაც ცოტა ხნით ოუენმა და ჰენრიმაც შეიარეს, რადგან იქ ყვითელმა ხაზმა მიიყვანა. ავტოსადგომი მანქანებით იყო სავსე, მაგრამ, მაღლობა ღმერთს, მათ ცოტაოდენი ხურდა ფული აღმოაჩნდათ და სავაჭრო ავტომატებამდე მიაღწიეს.

## 7

რა გამარჯვებები და მარცხიც უნდა შეემატოს ეგრეთ წოდებულ „ფლორიდულ პრეზიდენტობას“ (მათი სრული სია ჯერაც გამოუქვეყნებელია), მის აქტივში ყოველთვის იქნება ერთი: სიტყვით გამოსვლამ ნოემბრის იმ დილას ბოლო მოუღო კოსმოსურ შიშს.

მისი ეფექტიანობის მიზეზებზე განსხვავებული მოსაზრებები გაჩნდა (“მასების გაძლოლის უნარი კი არ აქვს, უბრალოდ, ხელსაყრელი მომენტი შეარჩია“, – დამცინავად ქირქილებდა ერთი კრიტიკოსი), მაგრამ მან იმუშავა. ინფორმაციას მოწყურებული ხალხი, რომელიც საცხოვრებელი ადგილიდან აყრილიყო და გარბოდა, პრეზიდენტის გამოსვლის მოსასმენად ჩერდებოდა. სავაჭრო ცენტრებში საყოფაცხოვრებო ტექნიკის მაღაზიები მდუმარე, დაბნეულ ლტოლვილებს გაევსოთ. I-95 გზატკეცილის გასწვრივ მდებარე ბენზინგასამართი სადგურების თანამშრომლები, კლიენტების მომსახურების ნაცვლად, იკეტებოდნენ, სალაროების გვერდით ტელევიზორებს

დგამდნენ და გაფაციცებით მიშტერებოდნენ ეკრანებს. ბარებში ნემსიც არ ჩავარდებოდა. ბევრგან, ადგილობრივი მცხოვრებლები ყველას უღებდნენ კარს, ვისაც კი პრეზიდენტის გამოსვლის ყურება სურდა. მათ რადიოთიც შეეძლოთ მოსმენა (ჯოუნსისა და მისტერ გრეის მსგავსად) თავიანთ მანქანებში, მაგრამ ასე ცოტა იქცეოდა. პრეზიდენტის არაკეთილმოსურნეთა აზრით, მან მხოლოდ ინერციით აგორებული პანიკა შეაჩერა.

– ასეთ დროს მის ადგილას პორკი-ფიგი<sup>203</sup> რომ გამოსულიყო, ისიც იმავე შედეგს მიაღწევდა, – ამბობდა ერთ-ერთი.

მეორე განსხვავებულ აზრს გამოთქვამდა:

– ეს გარდამტეხი მომენტი იყო კრიზისულ ვითარებაში. გზებზე ექვსი ათასამდე მანქანა იდგა. ერთი არასწორი გამონათქვამი და მათი რიცხვი ასჯერ გაიზრდებოდა. ეს ტალღა, ყველაზე დიდი „მტვრიანი თასის“<sup>204</sup> შემდეგ, ნიუ-იორკს დაატყდებოდა თავს. ამერიკელებმა, განსაკუთრებით ახალი ინგლისის მცხოვრებლებმა, თავიანთ, უმნიშვნელო უპირატესობით არჩეულ ლიდერს დახმარებისთვის, ნუგეშისა და გამხნევებისთვის მიმართეს. და მანაც ყველა დროის საუკეთესო, გულში ჩამწვდომი გამოსვლით უპასუხა. ეს იყო და ეს.

მოკლედ, სოციოლოგიამ გადაწონა თუ პრეზიდენტის სიბრძნემ, გამოსვლა თითქმის ისეთი აღმოჩნდა, როგორსაც ოუენი და ჰენრი ელოდნენ... რაც შეეხება კურცს, მან ყოველი სიტყვა და ინტონაციაც კი იწინასწარმეტყველა. გამოსვლის ქვაკუთხედი იყო ორი უბრალო იდეა – უტყუარი ფაქტის სახით წარმოდგენილი და იმ შიშის გაფანტვაზე გათვლილი, რომელსაც ამერიკელი მოქალაქეები შეეპყრო. პირველი: მიუხედავად იმისა, რომ უცხოპლანეტელები ზეთისხილის რტოებს არ იქნევდნენ და არც საჩუქრებს არიგებდნენ, – მტრულ და-

---

<sup>203</sup> მულტსერიალ „გიჟური მელოდიების“ პერსონაჟი გოჭი.

<sup>204</sup> მტვრიანი ქარიშხალი ამერიკაში.

მოკიდებულებას არ იჩენდნენ. მეორე: მართალია, მათ ახალი ვირუსი შემოიტანეს, მაგრამ მისი იზოლირება ჯეფერსონტრექტის მიდამოებში მოხერხდა (პრეზიდენტმა რუკაზე ისევე მარჯვედ აჩვენა ის ადგილი, როგორც სინოპტიკოსმა – დაბალი წნევის ზონა). და იქაც კი იღუპებოდა მეცნიერებისა და სამხედრო ექსპერტების ყოველგვარი ჩარევის გარეშე.

– თუმცა დანამდვილებით თქმა შეუძლებელია, – მიმართა პრეზიდენტმა სულგანაბულ მსმენელს (განსაკუთრებით მათ, ვინც ახალი ინგლისის ჩრდილო-აღმოსავლეთ დერეფანში აღმოჩნდა – ისინი თითქოს საერთოდ აღარ სუნთქავდნენ), – დარწმუნებული ვართ, ეს ვირუსი ჩვენმა სტუმრებმა უნებლიეთ შემოიტანეს, იმ მოგზაურთა მსგავსად, რომლებმაც საზღვრის გადმოკვეთისას არც კი იციან, რომ მათ ბარგსა თუ სხვა ნივთებში მწერებსა და მიკრობებს დაუბუდებიათ. ცხადია, მეზაჟეები ყველაფერს ამოწმებენ, მაგრამ, სამწუხაროდ... – ღიმილი დიდებული თეთრი მამის სახეზე – ... ჩვენს უკანასკნელ სტუმრებს საბაჟო-გამშვები პუნქტის კონტროლი არ გაუვლიათ. დიახ, რამდენიმე ადამიანი დაინფიცირდა. ძირითადად – სამხედრო მოსამსახურეები, მაგრამ აბსოლუტურმა უმრავლესობამ ეს ავადმყოფობა (რომელიც ჩვეულებრივ სოკოს დაავადებას, მიკოზს წააგავს) დამოუკიდებლად დაამარცხა. რაიონში კარანტინია გამოცხადებული, ზონის გარეთ მყოფ ადამიანებს კი საფრთხე არ ემუქრება, ვიმეორებ, მათ საფრთხე არ ემუქრება, – თუ თქვენ მენში ცხოვრობთ და სახლი მიატოვეთ, – განაცხადა პრეზიდენტმა, – უკან დაბრუნდით. როგორც ფრანკლინ დელანო რუზველტმა თქვა, შიშის გარდა საშიში არაფერია.

მას კრინტიც არ დაუძრავს რუხი კაცუნების დახვრეტის, ხომალდის აფეთქების, შეპყრობილი და ინტერნირებული მონადირეების, გოსლინის მაღაზიაში გაჩენილი ხანძრისა და ამბოხის, აგრეთვე მათ შესახებ, რომლებსაც „იმპერიალის ხეობის“ რაზმი კეიტ გალაჰერის

მეთაურობით დასდევდა და ცოფიანი ძაღლებივით ხოცავდა (მრავალთა აზრით, ისინი ცოფიან ძაღლებზე უარესები იყვნენ). არც ერთი სიტყვა კურცისა და „ტიფიანი ჯოუნსის“ თაობაზე. პრეზიდენტმა მხოლოდ პანიკის ტალღა დააცხრო, რათა უკონტროლო ვითარება არ შექმნილიყო.

მსმენელთა უმრავლესობამ რჩევა ყურად იღო და შინ დაბრუნდა. ზოგიერთისთვის ეს, ცხადია, შეუძლებელი აღმოჩნდა. ზოგისთვისაც სიტყვა „შინ“ აღარ არსებობდა.

## 8

მოქუფრული ცის ქვეშ მცირერიცხოვანი პროცესია სამხრეთისკენ მიემართებოდა. მას წინ მიუძღოდა დაჟანგული წითელი „სუბარუ“, რომელსაც ლიჩფილდელი მარი ტერჟენი ვეღარასოდეს იხილავდა. ჰენრი, ოუენი და დადიტსი მას ორმოცდათხუთმეტი მილით, ანუ ორმოცდათხუთმეტი წუთით ჩამორჩებოდნენ. კურცი და მისი ხალხი 81-ე მილზე მდებარე დასვენების ზონიდან გამოვიდნენ (გზატკეცილზე გასვლისას პერლი უკვე „ნაიას“ მეორე ბოთლს ყლურწავდა) და ჯოუნსისა და მისტერ გრეის დაახლოებით სამოცდათხუთმეტი მილით ჩამორჩებოდნენ, კურცსა და მის პირველ პოტენციურ მსხვერპლს ერთმანეთისგან ოცი მილი აშორებდა.

ღრუბლები რომ არა, დაბლა მფრენი სპორტული თვითმფრინავიდან დამკვირვებელი ადვილად დაინახავდა სამივეს – „სუბარუსა“ და ორივე „ჰამერს“ – ზუსტად თერთმეტ საათსა და ორმოცდასამ წუთზე, აღმოსავლეთის დროით, სწორედ მაშინ, როდესაც პრეზიდენტმა თავისი გამოსვლა შემდეგი სიტყვებით დაამთავრა:

– ღმერთმა დაგლოცოთ, ჩემო თანამემამულეებო, და ღმერთმა დალოცოს ამერიკა.

ამ დროს ჯოუნსი და მისტერ გრეი ქითერი-პორტსმუთის ხიდზე გადადიოდნენ ნიუ-ჰემპშირის მიმართულებით. ჰენრი, ოუენი და და-

დიტსი მე-9 გადასახვევს გასცდნენ, საიდანაც ფალმუტში, კამბერ-  
ლენდსა და იერუსალიმს-ლოტში შეიძლებოდა მოხვედრა. კურცი,  
ფრედი და პერლმუტერი (ამ უკანასკნელს მუცელი კვლავ გაჰბერო-  
და; ნახევრად მიწოლილი კვნესოდა და აყროლებულ გაზებს უშვებ-  
და – შესაძლოა, ამით, ერთგვარად, დიდებულ თეთრ მამას აკრიტი-  
კებდა) ბოუდუინჰემის 295-ე გადასახვევთან, ბრუნსვიკის სიანლო-  
ვეს, მის ჩრდილოეთით იმყოფებოდნენ. სამივე მანქანის ადვილად  
დანახვა იმიტომ შეიძლებოდა, რომ გზა თითქმის ცარიელი იყო –  
მძღოლები გაჩერებულიყვნენ, რათა ფერადი რუკის ფონზე მჯდარი  
პრეზიდენტის დამამშვიდებელი ლექციით დამტკბარიყვნენ.

მისტერ გრეიმ, რომელიც ჯოუნსის ულვევი მოგონებებით იკვებე-  
ბოდა, ნიუ-ჰემპშირისა და მასაჩუსეტის საზღვრის გადაკვეთისთა-  
ნავე 95-დან 495-ე გზაზე გადაუხვია... და უნებლიეთ დადიტსსაც  
უკარნახა მიმართულება, რომელიც ჯოუნსის გზას ხასხასა ყვითელი  
ზოლის სახით ხედავდა – „ჰამერი“ სწორედ იმ ხაზს მიჰყვებოდა. პა-  
ტარა ქალაქ მალბოროში მისტერ გრეი I-90-ზე, ამერიკის აღმოსავ-  
ლეთისა და დასავლეთის ერთ-ერთ ყველაზე ფართო ავტოსტრადაზე  
გადავიდოდა. „ყურის შტატში“<sup>205</sup> ეს გზა „მას-პაიკის“ სახელით იყო  
ცნობილი. ჯოუნსის თანახმად, მე-8 გადასახვევს პალმერი, ამჰერ-  
სტი და უეირი მოსდევდნენ. უეირიდან ექვს მილში კი კუებინი მდე-  
ბარეობდა.

მას მე-12 ჭაბურღილი სჭირდებოდა, ასე თქვა ჯოუნსიმ, და რო-  
გორც უნდა მოენდომებინა, ვერ მოიტყუებოდა. უინძორის კაშხლის  
გვერდით, კუებინის წყალსაცავის სამხრეთ ბოლოში, წყალმომარა-  
გების სამმართველოს ოფისი მდებარეობდა. ჯოუნსის თავისუფლად  
შეეძლო მისი იქ მიყვანა, დანარჩენზე კი მისტერ გრეი იბრუნებდა.

---

<sup>205</sup> მასაჩუსეტის შტატის მეტსახელი.

ჯოუნსის მაგიდასთან ჯდომა აღარ შეეძლო: სკამზე დაშვებისთანავე ტირილს იწყებდა. საცაა, ხმამაღლა ლაპარაკზე გადავიდოდა, შემდეგ კი კედელს ახლიდა თავს. ასეთ ყოფას ვეღარ გაუძლებდა და გარეთ გავარდებოდა, სადაც მისტერ გრეის ხელში აღმოჩნდებოდა და საკუთარ თავს მსხვერპლად მიართმევდა.

„საინტერესოა, სად ვართ? – ფიქრობდა იგი, – მალბოროში უკვე ჩავვლით? 495-დან 90-ზე გადავივართ? მგონი, ასე უნდა იყოს“.

დაკეტილი ფანჯრის გამო დაბუსტებით ვერაფერს იტყოდა. ჯოუნსიმ იქით გაიხედა... და უნებურად გაელიმა: „დანებდი და გამოდის“ ნაცვლად, წითლად ეწერა ის, რაზეც ცოტა ხნის წინ ფიქრობდა: „დოროთი, დანებდი“.

მე ეს შევძელი და მზად ვარ, დავნაძლევდე, რომ, თუ მოვინდომე, ამ წყეული დარაბების მოშორებასაც მოვახერხებ, – გაიფიქრა მან.

მერე რა? მისტერ გრეი ახალს დააყენებდა, ფანჯრებს სულაც შავად შეღებავდა. თუკი არ სურდა, რომ ჯოუნსის გარეთ გაეხედა, ასეც მოხდებოდა. საუბედუროდ, მისტერ გრეი მის სხეულს მართავდა. მისტერ გრეის თავი გაუსკდა, სპორები ჯოუნსის თვალწინ გადმოიფრქვა – დოქტორი ჯეკილი<sup>206</sup> მისტერ ბაირუსად იქცა – და ჯოუნსიმ ის შეისუნთქა. ახლა მისტერ გრეი იყო...

ის ტკივილია, – გაიფიქრა ჯოუნსიმ, – მისტერ გრეი ჩირქია ჩემს ტვინში.

რალაც სუსტად ეწინააღმდეგებოდა ასეთ ფიქრებს და საიდანღაც კოჰერენტული, განსაკუთრებული აზრი გაჩნდა, – „შენ ყველაფერს თავდაყირა აყენებ, სწორედ შენ აითესე, გაიქეცი, დაიმალე“, – მაგრამ ჯოუნსიმ იგი უკუაგდო. ეს ფსევდოინტუიციური ნაგავი იყო, გონების შეფერხება, ჰალუცინაცია – მირაჟით, რომელსაც უდაბნოში უწყლოდ გათანგული ადამიანი ხედავს. იგი აქ არის ჩაკეტილი,

---

<sup>206</sup> შოტლანდიელ მწერალ რობერტ სტივენსონის მოთხრობის, „დოქტორი ჯეკილისა და მისტერ ჰაიდის უცნაური თავგადასავლის“ გმირი.



მისტერ გრეი გარეთაა, ბეკონს მიირთმევს და ალლუმს ხელმძღვანელობს. თუკი ჯოუნსი თავს სხვაგვარად ფიქრის უფლებას მისცემს, ნოემბერშიც კი პირველ აპრილს გამასხრებულ იდიოტს დაემსგავსება.

„როგორმე უნდა შევაცოვნო. თუ მისტერ გრეის შეჩერებას ვერ შევძლებ, იქნებ, გზა მაინც გავურთულო დროში შეთანხმებულად მიმდინარე?“

იგი წამოდგა და ოფისი მოიარა. სულ ოცდაათობმეტი ნაბიჯი გამოვიდა. ძალიან პატარა მანძილი. თუმცა პატიმრის საკანზე დიდი მაინც იყო. უოლპოლის, დენვერის ან შოსჰენკის ციხეში გამომწყვდეულ ბიჭებს იგი სასახლედ მოეჩვენებოდათ. ჭერის შუაში სიზმართმჭერი ავგაროზი კვლავინდებურად ირხეოდა და ცეკვავდა. ჯოუნსის გონების ერთი ნაწილი ნაბიჯებს ითვლიდა, მეორე კი ფიქრობდა, თუ რა მანძილზე იმყოფებოდნენ მასპაიკის მე-8 გადასახვევიდან.

„ოცდათერთმეტი, ოცდათორმეტი, ოცდაცამეტი, ოცდაათობმეტი“.

იგი კვლავ თავის სკამთან აღმოჩნდა. მეორე რაუნდის დრო დადგა.

ისინი სულ მალე უეირში იქნებოდნენ... და, ცხადია, არ შეჩერდებოდნენ. რუსი ქალისგან განსხვავებით, მისტერ გრეიმ ზუსტად იცოდა, რაც სჭირდებოდა.

„ოცდათორმეტი, ოცდაცამეტი, ოცდაათობმეტი, ოცდათხუთმეტი, ოცდათექვსმეტი“.

სკამს შემოუარა და ახალი წრისთვის მოემზადა.

ოცდაათი წლისთვის მას და კარლას უკვე სამი შვილი ჰყავდათ (მეოთხეს ჯერ ერთი წელიც არ შესრულებოდა), და თუნდაც მოკრძალებულ ოსბორნროუდზე, ჩრდილოეთ უეირში მდებარე საზაფხულო კოტეჯზეც კი არ ოცნებობდნენ. მოულოდნელად, ფაკულტეტზე სე-

ისმური ძვრა მოხდა. დეკანად მისი მეგობარი დანიშნეს, მან კი ჯო-  
უნსი მაშინვე სრული პროფესორის თანამდებობაზე გადაიყვანა –  
ამაზე, სულ ცოტა, სამი წლის განმავლობაში ვერც კი იოცნებებდა.  
ხელფასიც საგრძნობლად მოემატა.

„ოცდათხუთმეტი, ოცდათექვსმეტი, ოცდაჩვიდმეტი, ოცდათვრა-  
მეტი“.

კვლავ სკამის გარშემო. მართალია, გალიაში დამწყვედელივით  
დადიოდა, მაგრამ ეს ცოტათი ამწვიდებდა მაინც.

იმავე წელს კარლას ბებია გარდაიცვალა და გვარიანი ქონებაც  
დატოვა, რომელიც მემკვიდრეობით ერგოთ კარლასა და მის დას,  
როგორც უახლოეს ნათესავებს. სწორედ ასე იყიდეს კოტეჯი. გასულ  
წელს კი ბავშვები უინძორის კაშხლის დასათვალიერებლად წაიყვა-  
ნეს, საიდანაც ერთ-ერთ საზაფხულო ტურისტულ მარშრუტს გაუყ-  
ვნენ. მუქმწვანე უნიფორმაში გამოწყობილმა მეგზურმა, მასაჩუსეტ-  
სის წყალმომარაგების სამმართველოს თანამშრომელმა, უამბო მათ,  
რომ კუებინის წყალსაცავის მიმდებარე რაიონი „თვითმყოფად ვე-  
ლურ გარემოდ“ იწოდებოდა და ის მასაჩუსეტსში არწივების ძირი-  
თად სამკვიდრებლად მიიჩნეოდა (ჯონსა და მიშას მათი დანახვა  
სურდათ, მაგრამ იმედი გაუცრუვდათ). წყალსაცავი ოცდაათიან  
წლებში აეგოთ, რისთვისაც სამი დასახლებული პუნქტი დაეტბო-  
რათ – თითოეულის შუაგულში პატარა ცენტრალური ქალაქი მდე-  
ბარეობდა. იმ დროს ტბის გარშემო ყველაფერი კეთილმოწყობილი  
იყო, მაგრამ სამოცი წლის შემდეგ ბუნებამ თავისი გაიტანა და იქაუ-  
რობამ ისეთივე სახე მიიღო, ახალ ინგლისს რომ ჰქონდა მეჩვიდმეტე  
საუკუნეში, სამრეწველო რევოლუციამდე, სანამ პროგრესი გიგან-  
ტური ნაბიჯებით წაიწევდა წინ. ოღროჩოლო, მოუკირწყლავი გზე-  
ბი და ბილიკები ქაოსურად მომრავლდა ტბის გარშემო, რომელიც  
ერთ-ერთი ყველაზე სუფთა წყალსაცავი იყო ჩრდილოეთ ამერიკაში.  
და ცივილიზაციაც ამით დასრულდა. თუკი ვინმეს მე-12 ჭაბურღი-

ლის მიღმა, აღმოსავლეთის ქედზე, ბუნების დათვალიერების სურვილი წამოუვლიდა, სქელლანჩიანი მიძიმე ფენსაცმელი უნდა ჩაეცვა. ეს მათ გიღმა, გვარად ლორინგტონმა უთხრა.

ჯგუფში კიდევ ათი-თორმეტი ტურისტი მაინც იყო, იმ დროისთვის თითქმის ყველანი საწყის პუნქტში დაბრუნდნენ და უინძორის კაშხლის გადამკვეთი გზის ბოლოში იდგნენ (კუებიანი ცისფრად ლაპლაპებდა მზის შუქზე და უთვალავ სარკისებურ ნატეხად იფანტებოდა. ჯოუნის მშვიდად ეძინა „კენგურუში“, რომელიც ჯოუნსის ეკეთა. ლორინგტონს სათქმელი დაემთავრებინა და უკვე დამშვიდობებას აპირებდა, როდესაც სპორტულ პიჟამაში გამოწყობილმა ახალგაზრდამ ხელი მოწაფესავით ასწია და იკითხა:

– ეს ის მე-12 ჭაბურღილი ხომ არ არის, სადაც რუსმა ქალმა...? „ოცდათვრამეტი, ოცდაცხრამეტი, ორმოცი, ორმოცდაერთი“... და უკან, მაგიდასთან მდგარ სკამთან.

მექანიკური თვლა მისი ძველი ჩვევა იყო. კარლას ეს მანიაკურ სინდრომად მიაჩნდა. ჯოუნსი ამაში ვერ ერკვეოდა, უბრალოდ, იცოდა, რომ თვლა ამშვიდებდა, ამიტომ მორიგ წრებზე წავიდა.

რუსი ქალის ხსენებაზე ლორინგტონმა ტუჩები მოკუმა. როგორც ჩანს, ამ თემაზე საუბარი მის ლექციაში არ შედიოდა. და, რასაკვირველია, არც ტურისტების კარგ განწყობას უწყობდა ხელს. რა თქმა უნდა, ბევრი რამ იმაზე იყო დამოკიდებული, თუ რომელ მუნიციპალურ მიწებში მიედინებოდა წყალი რვა-ათი მილის მანძილზე, მაგრამ სისუფთავითა და გემოთი ბოსტონის წყალსადენის წყალს მსოფლიოში მაინც არაფერი ჯობდა. ამ ბიბლიური ჭეშმარიტების გავრცელებას აქაურები ყოველმხრივ ცდილობდნენ.

– ამის შესახებ ვერაფერს მოგახსენებთ, სერ, – თქვა მეგზურმა და ჯოუნსიმ გაიფიქრა: ღმერთო ჩემო, მგონი, ჩვენმა გიღმა იცრუა და თვალიც არ დაუხამხამებია.

„ორმოცდაერთი, ორმოცდაორი, ორმოცდასამი“.

შემდეგ ისევ სკამი და ყველაფერი თავიდან. ნაბიჯს მოუჩქარა.

ხელები გემის კაპიტანივით ზურგს უკან დაეწყო და თითქოს გემბანზე დასეირნობდა... ან ბრიგზე, გემზე წარმატებით განხორციელებული ამბოხის შემდეგ. მისი აზრით, ეს ამ უკანასკნელს უფრო ჰგავდა.

ცხოვრების უმეტესი დროის განმავლობაში ჯოუნსი ისტორიას ასწავლიდა და ცნობისმოყვარეობა ერთ-ერთ მთავარ თვისებად გადაჰქცევოდა. მეორე დღეს ბიბლიოთეკაში წავიდა, ადგილობრივი ძველი გაზეთები მოიძია და ყველაფერი წაიკითხა, რაც კი ამ ამბის შესახებ ეწერა. ყველაფერი ძალიან მშრალად და მოკლედ იყო გადმოცემული. იმავე გვერდზე აღწერილი პიკნიკები კი გაცილებით ლამაზად და მიმზიდველად გაეფორმებინათ. სამაგიეროდ, მათმა ფოსტალიონმა, მოხუცმა მისტერ ბეკუიტმა იცოდა უფრო მეტი და სიამოვნებით მოუყვა. ჯოუნსის ახლაც ახსოვდა მისი უკანასკნელი სიტყვები, რის შემდეგაც მან ცისფრად და თეთრად შეღებილი საფოსტო მანქანა დაქოქა და ოსბორნროუდზე მომდევნო კოტეჯისკენ დაეშვა; ზაფხულში ტბის სამხრეთით მდებარე დასახლებაში ყოველთვის უამრავი გზავნილი მოდიოდა.

ჯოუნსი თავისი სახლისკენ – იმ მოულოდნელი საჩუქრისკენ ჩაფიქრებული გამობრუნდა. ახლა აღარ უკვირდა, რატომ არ უნდოდა ლორინგტონს რუს ქალზე საუბარი.

## 10

მას ილენა თუ ილანა ტიმაროვა ერქვა – ზუსტად არავინ იცოდა. იგი უეირში 1995 წლის შემოდგომის დასაწყისში გამოჩნდა „ფორდ-ესკორტიტ“, რომლის საქარე მინაზეც „ჰერცის“ მოკრძალებული ყვითელი სტიკერი მიეკრა. მანქანა მოპარული აღმოჩნდა, ამიტომ დიდხანს არ შემწყდარა დაუსაბუთებელი, მაგრამ პიკანტური საუბრები იმის შესახებ, რომ ლოგანის აეროპორტში ავტომობილის გასაღები მან სექსის სანაცვლოდ მიიღო.

მაგრამ აშკარად ორიენტაციადაკარგულს ჰგავდა, თავში ყველა-

ფერი წესრიგში ვერ ჰქონდა. ვილაცამ მის სახეზე ჩალურჯება შეამჩნია, ვილაცამ – არასწორად შეკრული ღილები ბლუზაზე. ინგლისურად ცუდად ლაპარაკობდა, მაგრამ კუეზინის წყალსაცავისკენ მიმავალი გზის გაგება თავისუფლად მოახერხა. იქ მან ბარათი დატოვა (რუსულ ენაზე). სალამოს, როდესაც უინძორის კაშხლისკენ აღარავის უშვებდნენ, პიკნიკების ზონაში, გუნდოდაიკთან, მიტოვებულ „ესკორტს“ წააწყდნენ. მანქანა მეორე დღესაც იქ რომ დახვდათ, წყალმომარაგების სამმართველოს ორი თანამშრომელი (ვინ იცის, იქნებ ერთ-ერთი ლორინგტონი იყო), ორ მეტყვევსთან ერთად, ქალის მოსაძებნად წავიდა.

ისტორიკის ზევით, ორიოდ მილის დაშორებით, მის ფენსაცემელს წააწყდნენ. იქიდან ორ მილში, იქ, სადაც ისტორიკი თანდათან ატალახებულ ბილიკად გადაიქცევა (ბარდებში მიიკლანება წყალსაცავის აღმოსავლეთ ნაპირზე – ქუჩა კი არა, დიფქათროუდის მასაჩუსეტსური ვარიანტია), ქალის ბლუზა იპოვეს... ოჰ-ოჰ. ისტორიკი მიწაზე დაგდებული ბლუზიდან კიდევ ორი მილის მანძილზე გრძელდება, მერე კი წყდება და დაღარული განაკაფი ზოლი, ფიცპატრიკროუდი იწყება. ის ზოლი ტბას სულ სცილდება. საძიებო ჯგუფი იმ ბილიკის გამოკვლევას აპირებდა, მაგრამ ვილაცამ ვარდისფერ ნაჭერს მოჰკრა თვალი, ნაჭერი წყლისკენ გადახრილ ტოტზე ეკიდა. ახლოს მისულებს ხელში ლიფი შერჩათ.

იქ მიწა შედარებით ნოტიო, მაგრამ არაჭაობიანი იყო და ისინი კვალს გაჰყვნენ. რუს ქალს ბარდნარში ევლო, რასაც დამტვრეული ტოტები მოწმობდა. იმის გაფიქრებაც კი ზარავდათ, თუ რა დავემართებოდა მის ნაზ კანს. თუმცა მტკიცებულებას თვალს ვერ აარიდებდნენ – წვეტიან ტოტებსა და ქვებს სისხლის ლაქები შერჩენოდა, ქალის ყოველ ნაბიჯს სისხლის მეწამული წვეთი ახლდა. ისტორიკიდან ერთ მილში ქვის შენობა დაინახეს, რომელიც, თითქოს, ბუნებრივ საძირკველზე, ქანებზე იდგა და პომერის მთის აღმოსავლეთ

კალთას გაჰყურებდა. სწორედ იმ შენობაში მდებარეობდა მე-12 ჭაბურღილი. მანქანით იქ მხოლოდ ჩრდილოეთის მხრიდან შეიძლებოდა მისვლა. ვერავინ მიხვდა, რატომ არ აირჩია ეს გზა ილენამ თუ ილანამ.

აკვედუკი, რომელიც კუებინში იწყებოდა, აღმოსავლეთით სამოცი მილის მანძილზე, ბოსტონამდე იყო გადაჭიმული და გზად უფრო მცირე და ნაკლებად სუფთა უაჩუსეტსისა და სადბერის წყალსაცავებიდან ივსებოდა. ტუმბოები არ იდგა – ოცდაათი ფუტი სიმაღლისა და თერთმეტი ფუტი სიგანის აკვედუკის მილებს ისინი არაფერში სჭირდებოდა. წყალი თავისით ჩაედინებოდა, როგორც ძველ ეგვიპტეში, ოცდათხუთმეტი საუკუნის წინ. მიწის ზედაპირსა და აკვედუკს შორის თორმეტი ვერტიკალური ჭაბურღილი იდგა, რომლებიც სავენტილაციო შახტებად და წნევის რეგულატორებად გამოიყენებოდა. მილის გამოგნესის შემთხვევაში მათი გავლით აკვედუკში მოხვედრა შეიძლებოდა. წყალსაცავთან ყველაზე ახლოს მდებარე მე-12 ჭაბურღილი „შემშვები შახტის“ სახელით იყო ცნობილი. იქ წყლის სისუფთავე მოწმდებოდა, ასევე – ქალის ზნეობრიობა (ქვის შენობა არ იკეტებოდა და აქ ნავით ხშირად შემოცურდებოდნენ ხოლმე შეყვარებული წყვილები).

კარისკენ მიმავალი რვა საფეხურიდან ქვედაზე აკურატულად დაედოთ ქალის ჯინსის შარვალი, ზედაზე კი – ტრიკოტაჟის თეთრი ტრუსი. კარი ღია იყო. მამაკაცებმა ერთმანეთს უსიტყვოდ გადახედეს, ყველა კარგად ხვდებოდა, იქ რაც დახვდებოდათ – რუსი ქალის გვამი და არავითარი ტანსაცმელი.

მაგრამ შიგნით მსგავსი ვერაფერი ნახეს. ჭაბურღილს რკინის თავსახურავი ეფარა. იგი იმდენზე იყო გადაწეული, რომ ქვემოთ, რეზერვუარის გვერდზე, წყვდიადს ნახევარმთვარის ფორმა მიეღო. იქვე ძალაყინი ეგდო, რომლითაც ქალს სახურავი დაეძრა: ჩვეულებრივ, მას სხვა ხელსაწყოებთან ერთად, კარის უკან აყუდებდნენ

ხოლმე. მის გვერდით რუსი ქალის ხელჩანთა იდო, ზედ კი პორტმონე, საიდანაც პირადობის დამადასტურებელი მოწმობა მოჩანდა. პორტმონეზე – პირამიდის წვერო, სხვა სიტყვებით რომ ვთქვათ, პასპორტი. მასში მოთავსებული ფურცელი უცნაურ იეროგლიფებს დაეფარა, სავარაუდოდ, რუსული ანბანის ასოებს, თუმცა იქნებ კირილიცა უფრო სწორი იყოს. მამაკაცებს ეჭვი არ შეჰპარვიათ, რომ თვითმკვლელის გამოსამშვიდობებელ წერილს ხედავდნენ, მაგრამ გადათარგმნის შემდეგ აღმოჩნდა, რომ ზედ მისი მარშრუტი ეწერა: „როდესაც გზა დასრულდება, ნაპირს გავუყვები“. ასეც მოიქცა, გზადაგზა იხდიდა და ნაკაწრებსა და ჭრილობებს ყურადღებას არ აქცევდა.

მამაკაცები ნახევრად თავდახურული ჭაბურღილის გარშემო იდგნენ, თავს იფხანდნენ და უსმენდნენ წყლის ჩუხჩუხს, რომელიც სწორედ იქიდან იღებდა სათავეს ბოსტონის შადრევნებისკენ, ონკანებისა და ებოს შლანგებისაკენ. ხმა ყრუდ, მონოტონურად და ცოტა პირქუშადაც კი გაისმოდა, რაც სულაც არ იყო გასაოცარი, რადგან მე-12 ჭაბურღილი სიმაღლეში ას ოცდახუთ ფუტს აღწევდა. მამაკაცებს ვერ გაეგოთ, რამ აიძულა ქალს იმის გაკეთება, რაც გააკეთა, მაგრამ სრულიად გარკვევით დაინახეს, თუ როგორ იჯდა იგი ქვის იატაკზე, ფეხებს აქანავებდა და იმავდროულად ჭკიტიე ლოცკის ეტიკეტზე გამოსახულ ქალიშვილს ჰგავდა, ოღონდ შიშველს, სამოსის გარეშე. მან უკანასკნელად მოიხედა უკან, შესაძლოა, იმაში დასარწმუნებლად, რომ პორტმონე და პასპორტი ისევ იქ იდო. უნდოდა, რომ მას, ვინც იქ შევიდოდა, სცოდნოდა, თუ ვინ წავიდა იმქვეყნად ამ გზით. იყო ამაში რაღაც საშინელი და საოცრად სევდიანი. მხოლოდ ერთი მიხედვა უკან და იგი თავსახურსა და მილს შორის, ნახევარმთვარეში გაუჩინარდა. იქნებ, ნესტოებზე ხელიც მოიჭირა, როგორც ბავშვები აკეთებენ ხოლმე ქალაქის საცურაო აუზში გადახტომის წინ. თუმცა ვინ იცის. ასე იყო თუ ისე, წამის შემდეგ იქ ისევ სიმშვიდე დაისადგურა. გამარჯობა, წყვილიალო, ძველი მეგობარო.

წასვლისას, სანამ ფოსტის სატვირთო მანქანით გზას გაუდგებოდა, მისტერ ბეკუიტმა შემდეგი სიტყვები წარმოთქვა: „როგორც ამბობენ, ბოსტონელებმა დილის ყავასთან ერთად დალიეს ვალენტინობის წინააღმდეგ, – მან ჯოუნსის ეშმაკურად გაუღიმა და დაამატა: – მე წყალს არ ვსვამ. ლუდი მირჩევნია“.

ჯოუნსიმ ოფისის თორმეტი თუ თოთხმეტი წრე დაარტყა. შემდეგ სკამთან გაჩერდა, დაბნეული სახით თეძოზე ხელი მოისვა და კვლავ იმავე მარშრუტს გაუყვა – ჩვენი ძველი, გულკეთილი, აკვიატებული აზრებით შეპყრობილი ჯოუნსი.

„ერთი... ორი... სამი...“

რუსი ქალის ამბავი, ცხადია, მიყრუებული ქალაქის საზარელი ზღაპრების შესანიშნავი ნიმუში იყო (ისევე, როგორც მოჩვენებებით სავსე სახლები, სადაც შემადრწუნებელი დანაშაული და საშინელი საავტომობილო კატასტროფები ხდებოდა) და ნათელს ჰფენდა მისტერ გრეის გეგმებს საბრალო კოლისთან დაკავშირებით, მაგრამ რას აძლევდა ჯოუნსის იმის ცოდნა, თუ საით მიემართებოდა მისტერ გრეი? ბოლოს და ბოლოს...

კვლავ სკამი.

„ორმოცდარვა, ორმოცდაცხრა, ორმოცდაათი“.

ერთი წუთი მოიცადე, მხოლოდ ერთი წყეული წუთი. პირველ ჯერზე, ოთახის შემოვლას ოცდაათხმეტი ნაბიჯი მოანდომა, არა? ორმოცდაათი საიდანღა გაჩნდა? ნაბიჯები არ დაუპატარავებია, მსგავსი არაფერი გაუკეთებია, მაშ, როგორ...

„შენ სივრცეს აფართოებ. ის ყოველ მომდევნო წრეზე იზრდება. ვინაიდან ვერ ისვენებ. მაგრამ ეს შენი ოთახია. დარწმუნებული ვარ, რომ მოინდომო, „უოლდორფ-ასტორიის“ სამეფლისო დარბაზადაც



აქცევ... და მისტერ გრეი ხელს ვერ შეგიშლის”.

– ნუთუ ეს შესაძლებელია? – ჩაიჩურჩულა ჯოუნსიმ. მაგიდასთან იდგა და ხელები ზურგს უკან ისე შემოეწყო, თითქოს პორტრეტისთვის პოზირებდა. პასუხი არ სჭირდებოდა. ისედაც ყველაფერს ხედავდა – ოთახი გადიდებულიყო.

ჰენრი მოდიოდა. თუ დადიტსიც მოჰყავდა, მისტერ გრეი ვერსად დაიმალებოდა, მანქანების ცვლა ვერაფერს უშველიდა, რადგან დადიტსი ხაზს ხედავდა. სწორედ მან მიიყვანა ისინი – სიზმარში – რიჩი გრენადოსთან, მოგვიანებით კი – ცხადში – ჯოზი რინკენჰაუერთან. ახლა კი ჰენრის მიუძღოდა წინ, როგორც მელაზე დაგეშილი მწვევარი მიუძღვის ხოლმე თავის პატრონს. უბედურება ის იყო, რომ მისტერ გრეის ფორა ჰქონდა, წყეული ფორა. ერთი საათი. იქნებ მეტიც. და როგორც კი მისტერ გრეი ძაღლს მე-12 ჭაბურღილში ჩააგდებდა, ყველაფერი დასრულდებოდა. მართალია, თეორიულად, კიდევ დარჩებოდა შანსი ბოსტონისკენ მიმავალი წყლის გადაკეტვისა, მაგრამ შეძლებდა კი ჰენრი ვინმეს დარწმუნებას ამ საგანგებო, საფრთხის შემცველი ნაბიჯის გადადგმაში? ალბათ, ვერა. და ის ხალხი, ვინც აკვედუკის გაყოლებაზე ცხოვრობდა? მათ ხომ წყალი მაშინვე მიეწოდებოდათ? სამოცდახუთი ათასი უეირში, თერთმეტი ათასი ეტოლში, ას ორმოცდაათ ათასზე მეტი უორჩესტერში. მათ მხოლოდ რამდენიმე კვირის ან სულაც რამდენიმე დღის სიცოცხლედა დარჩებოდათ.

ნუთუ არ არსებობდა გზა, იმ ბოზისშვილის შესაჩერებლად, რათა ჰენრის მისი დაჭერის შანსი გასჩენოდა?

ჯოუნსიმ მზერა სიზმართმჭერ ავგაროზს მიაპყრო და ოთახში მაშინვე რაღაც შეიცვალა... ეს ამოსუნთქვას ჰგავდა, ისეთ ხმას, როგორსაც სპირიტული სეანსების დროს სულები გამოსცემენ, მაგრამ

ეს სული არ იყო. მკლავებში ჩხვლეტა იგრძნო. თვალები ცრემლებით აევსო, თომას ვულფის<sup>207</sup> სიტყვები გაახსენდა: „ყველაფერი დაკარგულია – ქვაც, ფოთოლიც, ვერნაპოვნი კარიც“. თომას ვულფი, რომელსაც მიაჩნდა, რომ შინ ველარასოდეს დაბრუნდებოდა.

– დადიტს? – ჩაიჩურჩულა მან და თმა ყალყზე დაუდგა, – დადიტს, ეს შენ ხარ?

ხმა არავინ გასცა... მაგრამ როდესაც მაგიდას დახედა, სადაც უსარგებლო ტელეფონი იდო, იქ ახალი ნივთი აღმოაჩინა. ის ქვა, ფოთოლი ან ვერნაპოვნი კარი კი არ იყო, არამედ – ქრიბიჯის დაფა და ბანქოს დასტა.

ვილაცას მასთან თამაში სურდა.

### 13

ახლა ყველაფერი საშინლად სტკიოდა. დედამ იცოდა, რადგან დედას უთხრა. იესომაც იცოდა, ვინაიდან იესოსაც უთხრა. ჰენრის კი არ გაუმხილა. ჰენრისაც ყველაფერი სტკიოდა, ძალიან დაღლილი და სევდიანი სახე ჰქონდა. ბივერი და პიტი ზეცაში იყვნენ, ყოვლისშემძლე ღმერთის – დაილოცოს მისი სახელი – ცისა და ხმელეთის შემოქმედის მარჯვენაზე ისხდნენ, აწ და მარადის. ო, ღმერთო! ეს მას სევდას ჰგვრიდა – ისინი კარგი მეგობრები იყვნენ და არასდროს დასცინოდნენ. ერთხელ მათ ჯოზის მიაგნეს, ერთხელაც ძალიან მაღალი კოვბოი ნახეს, ხშირად თამაშობდნენ კიდეც.

ესეც თამაში იყო, ოღონდ თუ ადრე პიტი ამბობდა, – დადიტს, მნიშვნელობა არა აქვს, მოიგებ თუ წააგებ, მთავარია, როგორ ითამაშებო, ახლა, ჯოუნსის თქმით, მოგება მნიშვნელოვანი გახდა. ჯოუნსის ხმა ჯერ ცუდად ისმოდა, მაგრამ მალე, ძალიან მალე, უკეთესად გაიგონებდა. ოღონდაც ტკივილი გაყურებოდა. „პერკოსენმაც“ კი არ უშველა. ყელში ფხაჭნიდა, სხეული უთრთოდა, მუცელი აწუხებდა, თითქოს გაზების გამოშვება უნდოდა, თუმცა, სინამდვილეში

---

<sup>207</sup> ამერიკელი მწერალი

არ უნდოდა. ხველებსას კი პირში ზოგჯერ სისხლს გრძნობდა. ძილზე უარს არ იტყოდა, ეგაა, რომ ჰენრი და მისი ახალი მეგობარი, ოუენი, რომელიც მათთან ერთად იყო იმ დღეს, როდესაც ჯოზი იპოვეს, გამუდმებით იმეორებდნენ: „მისი შეჩერება რომ შეგვეძლოს... დრო რომ მოგვაგებინა...“ – ამიტომაც არ იძინებდა და ეხმარებოდა მათ, მაგრამ ჯოუნსის ხმა რომ გაეგო, თვალეები უნდა დაეხუჭა. მათ კი ეგონათ, რომ ეძინა. „ხომ არ გაგვეღვიძებინა? იმ ნაბიჭვარმა სადმე არ გადაუხვიოს“, – თქვა ოუენმა. „გეუბნები, ვიცი-მეთქი, საითაც მიემართება, დადს კი I-90-თან გავაღვიძებთ, რომ არ ვიმარჩიელოთ. ახლა იძინოს. ღმერთო ჩემო, რა დაღლილი სახე აქვს“, – მიუგო ჰენრიმ. და ისევ ჰენრი, ოღონდ უკვე არა ხმამაღლა, არამედ ფიქრებში: „ნეტავ, როგორმე შეგვაჩერებინა ის ბოზისშვილი“.

თვალეები დახუჭული ჰქონდა. ხელეები მტკივან მკერდზე დაეწყო. ნელა სუნთქავდა. დედამ უთხრა, ხველისას ნელა ესუნთქა. ჯოუნსი მკვდარი არ იყო. ის ზეცაში ბივერისა და პიტის გვერდით არ ჩანდა. მაგრამ მისტერ გრეიმ თქვა, რომ ჯოუნსი ჩაიკეტა. ჯოუნსის ოფისში არც ტელეფონი მუშაობდა, არც – ფაქსი, მას ვერ უკავშირდებოდა, რადგან ბოროტ მისტერ გრეის ეშინოდა, ჯოუნსის არ შეეტყო, თუ ვინ იყო სინამდვილეში იქ ჩაკეტილი.

როდის ლაპარაკობდნენ ისინი ყველაზე მეტს?

როდესაც თამაშობდნენ.

თამაში.

მას კვლავ გააჟრჟოლებს. კარგად უნდა დაფიქრდეს, ეს კი ტკივილს ჰგვრის, უკანასკნელ ძალას ართმევს. ახლა ეს თამაში კი არა, თამაშზე მეტია, მოგება-წაგებას დიდი მნიშვნელობა აქვს. ამიტომაც ხარჯავს ამდენ ძალას და დაფასა და ბანქოს აკეთებს. ჯოუნსი ტირის, ჯოუნსი ფიქრობს, რომ ყველაფერი დაიკარგა, მაგრამ დადიტს ქვეელი არ დაკარგულა, დადიტსი ხაზს ხედავს, რომელიც ოფისისკენ მიდის. ამჯერად იგი პალოების დასმაზე გაცილებით მეტს აკეთებს.

– ნუ ტირი, ჯოუნსი, – ამბობს იგი და სიტყვები, როგორც ყოველთვის, მის თავში მკაფიოდ, გარკვევით გაისმის. მხოლოდ ეს სულელი ენა ამახინჯებს ხოლმე მათ, – ნუ ტირი, მე არ დავკარგულვარ.

თვალეები დახუჭული ჰქონდა. ხელები გადაეფვარედინებინა.

ჯოუნსის ოფისში, სიზმართმჭერი ავგაროზის ქვეშ, ჯოუნსი თამაშობდა.

## 14

– ძაღლს ჩავავლე, – დაღლილი ხმით განაცხადა ჰენრიმ, – ისიც პერლმუტერივით საცოდავ დღეშია. ჩავავლე. ცოტათი მივუახლოვდით. ოჰ, ღმერთო ჩემო, როგორმე მათი შეჩერება რომ მოგვეხერხებინა!

გაწვიმდა. ოუენი იმედოვნებდა, რომ მანამ მოასწრებდნენ სუსხიანი ზონიდან გასვლას, სანამ თოვლ-ჭყაპი დაიწყებოდა. ქარი ისეთი ძალით უბერავდა, რომ „ჰამერი“ ლამის გზიდან გადაეგდო. უკვე შუადღე იყო, ისინი კი კვლავაც სეიკოსა და ბიდფორდს შორის მიდიოდნენ. ოუენმა დადიტს უკანა ხედვის სარკიდან შეავლო თვალი. მას თვალეები დაეხუჭა, თავი საზურგეზე მიედო, გამხდარი ხელები გულზე დაეკრიფა. სახე შემამოფოთებლად გაჰყვითლებოდა, ტურის კუთხიდან კი ვიწრო ზოლად ჩამოსდიოდა ხასხასა წითელი სისხლი.

– შენს მეგობარს ხომ არ შეუძლია დახმარება? – იკითხა ოუენმა.

– ვფიქრობ, ის სწორედ ამას ცდილობს.

– შენ ხომ თქვი, სძინავსო.

ჰენრი შეტრიალდა, დადიტს შეხედა და თქვა:

– შევცდი.

## 15

ჯოუნსიმ კარტი დაარიგა, თავისი ხელიდან ორი ცალი ქრიბში ჩავაგდო, მეორე ხელით დადიტსის ნაცვლად აიყვანა და ქრიბს კიდევ ორი დაამატა.

– ნუ ტირი, ჯოუნსი. ნუ ტირი. მე არ დავკარგულვარ.

ჯოუნსიმ თავი ასწია და სიზმართმჭერ ავგაროზს შეხედა, დარწმუნებულმა, რომ სიტყვები იქიდან ესმოდა.

– არ ვტირი, დადს. ეს სულ ალერგიის ბრალია, მაგრამ თუ თამაში გინდა...

– ორი, – გამოაცხადა ხმამ სიზმართმჭერი ავგაროზიდან.

ჯოუნსი დადიტის კარტიდან ორიანს ჩავიდა, – ცუდი დასაწყისი ნამდვილად არ იყო. მას საკუთარი ხელიდან შვიდიანით უპასუხა. ჯამი ცხრას უტოლდებოდა. დადიტს ექვსიანი ეჭირა. მიხვდებოდა თუ არა დადიტსი, რომ...

– ექვსი თხუთმეტისთვის, – გაისმა სიზმართმჭერი ავგაროზიდან, – თხუთმეტი ორისთვის. მაკოცე ტაკოში!

ჯოუნსის უნებურად გაეცინა. ეს, ცხადია, დადიტსი იყო, მაგრამ საოცრად ჰგავდა ბივერს.

– მიდი, დასვი პალოები, – თქვა მან და დაინახა, როგორ აიწია ჰაერში ერთი პალო, დაფასთან მიცურდა და პირველი ქუჩის მეორე ფოსოში მოთავსდა.

უეცრად მას გონება გაუნათდა.

– შენ თავიდანვე იცოდი წესები, დადიტს, ხომ ასეა? და პალოებს უთავბოლოდ ჩვენს გასართობად სვამდი! – ამის გაფიქრებაზე თვალებიდან კვლავ წამოსცივდა ცრემლები. მაშასადამე, მთელი ამ წლების განმავლობაში მათ ეგონათ, რომ დადიტსს ართობდნენ, სინამდვილეში კი თურმე დადიტსი ართობდა მათ. იმ დღესაც, „ძმები თრექერების“ შენობის უკან, ვინ ვის მიაგნო? ვინ ვინ გადაარჩინა?

– ოცდაერთი, – თქვა მან.

– ოცდათერთმეტი ორისთვის, – ეს სიზმართმჭერი ავგაროზი იყო. უხილავმა ხელმა პალო ასწია და ორი ფოსოთი წინ გადააადგილა, – მათ მე დამბლოკეს, ჯოუნსი.

– ვიცი, – ჯოუნსი სამიანს ჩავიდა. დადიტსმა ცამეტი გამოაცხადა და ჯოუნსიმ სვლა დადიტის კარტიდან გააკეთა.

– შენ კი – არა. მასთან საუბარი შეგიძლია.

ჯოუნსიმ ორიანით ითამაშა და პალო გადასვა. დადიტსმა, თავის მხრივ, კარტი გაშალა და პალო ფოსოში ჩაუშვა. როგორ მოგწონთ? ჭკუასუსტმა დამამარცხა, – გაიფიქრა ჯოუნსიმ. მაგრამ დადიტსი ჭკუასუსტი არ იყო. დაღლილი და მომაკვდავი – დიახ, მაგრამ არა ჭკუასუსტი.

მათ თამაში განაგრძეს. დადიტსი მნიშვნელოვნად დაწინაურდა, თუმცა ეს ჯოუნსის ქრიბი იყო.

– რა უნდა მას, ჯოუნსი? რა უნდა წყლის გარდა?

მორიგი მკვლელობა, – გაიფიქრა ჯოუნსიმ, – მას ადამიანების მოკვლა უყვარს.

მაგრამ ამაზე საუბარი აღარ ღირდა. ღმერთმანი, აღარ ღირდა.

– ბეკონი, – წარმოთქვა ჯოუნსიმ ხმამაღლა, – მას ბეკონი უყვარს.

მან კარტის აჩეხა დააპირა... და გაქვავდა, როდესაც მისი გონება დადიტსმა შეავსო. ნამდვილმა დადიტსმა, ახალგაზრდა, ძლიერმა და ბრძოლისთვის შემზადებულმა დადიტსმა.

## 16

ჰენრის ზურგს უკან დადიტსმა ხმამაღლა დაიკვნესა. ჰენრი მისკენ შეტრიალდა და ნესტოებიდან ბაირუსივით წვრილად მოწანწკარე სისხლი შეამჩნია. დადიტსს დაძაბულობისგან სახე არაბუნებრივად დაღმეჭოდა. ჩამოშვებული ქუთუთოების ქვეშ თვალები სწრაფად უმოძრავებდა.

– რა სჭირს? – შეეშინდა ოუენს.

– არ ვიცი.

დადიტსს ღრმად, ბრონქებში დააწყებინა ხველა. პირიდან სისხლს აშხეფებდა.

– გაალვიძე, ჰენრი! გაალვიძე, ღვთის გულისთვის! .

ჰენრიმ ოუენ ანდერჰილს შეშინებული მზერა მიაპყრო. ისინი

თითქმის კენებანკპორტთან იყვნენ, ნიუ-ჰემპშირის საზღვრიდან ოციოდე მილის მანძილზე. კუებიზის წყალსაცავამდე ას ათი მილი რჩებოდა. ჯოუნსის ოფისის კედელზე წყალსატევის სურათი ეკიდა. ჰენრის საკუთარი თვალით ჰქონდა ნანახი. და კიდევ – საზაფხულო კოტეჯისა უეირში.

- გააღვიძე! ამბობს, რომ სტკივა! ნუთუ არ გესმის?
- არ სტკივა.
- აბა?
- ის ამბობს, „ბეკონი“.

## 17

არსება, რომელიც მისტერ გრეივით ფიქრობდა, – ის, ვინც საკუთარ თავზე მისტერ გრეივით ფიქრობდა, – სერიოზული პრობლემის წინაშე იდგა, მაგრამ მან, უცხოპლანეტელმა თუ დედამიწელმა, ეს იცოდა მაინც.

„ვინც გაფრთხილებულია, შეიარაღებულიცაა“, – იტყოდა ჯოუნსი. მისი მოგონებების ყუთებში უხვად იყო ასეთი გამონათქვამი, სულ ცოტა, რამდენიმე ათასი. ზოგიერთი მათგანი მისტერ გრეის უაზრობად მიაჩნდა, მაგალითად: „თავის დაქნევა იგივეა, რაც უსინათლო ცხენისთვის თვალის ჩაპაჭუნება“, ან „რაც ბრუნავს, ყველაფერი საწყის წერტილს უბრუნდება“. ყველას ეს სჯობდა: „ვინც გაფრთხილებულია, შეიარაღებულიცაა“.

პრობლემა ის იყო, რას გრძნობდა ჯოუნსის მიმართ. და ეს არცთუ ძალიან მოსწონდა. შეეძლო ეფიქრა: „ჯოუნსი გამოვკეტე, გარე სამყაროს მოვწყვიტე და ახლა ჩემს პრობლემასაც მივხედავ. ის კარანტინში ჩავსვი. სამხედროებიც ხომ ასე ცდილობდნენ ჩვენს იზოლირებას. ჩემზე ნადირობენ, ფაქტობრივად, კვალდაკვალ მომდევნენ, მაგრამ თუ ძრავა არ ჩაქრება ან საბურავი არ დაეშვება, მდევარს ჩემი დაჭერის შანსი არა აქვს, რადგან ბევრად დავწინაურდი“.

ყველაფერი მართლაც ასე იყო, მაგრამ შვებას ვერ ჰგვრიდა. ყველაზე მეტად ის უნდოდა, რომ იმ ოთახში შევარდნილიყო, სადაც არასტუმართმოყვარე მასპინძელი იმალებოდა და პირში მიეხალა: „ხომ დაგდე ბეჭებზე? ხომ შავი დღე ვაყარე შენს პატარა წითელ ფურგონს?“

რომელ ფურგონს გულისხმობდა და რატომ მაინცდამაინც წითელს, მისტერ გრეიმ არ იცოდა, მაგრამ ამ ემოციურ ტყვიას დიდი კალიბრის ხვრელის გაკეთება შეეძლო ჯოუნსის აბჯარში, რადგან ბავშვობისდროინდელ ფაქიზ სიმებს ეხებოდა. შემდეგ ჯოუნსის ენას გამოყოფდა (“ჩემს ენას”, – ფიქრობდა აშკარად კმაყოფილი მისტერ გრეი) ჯოუნსის ტუჩებს შორის და დასცინებდა, ჯოუნსი კი პასუხსაც ვერ გასცემდა.

რაც შეეხება მდევრებს, ერთი სული ჰქონდა, ჯოუნსის შარვალი ჩაეხადა და მათთვის ჯოუნსის უკანალი მიეშვირა. ცხადია, ეს ისეთივე უაზრობა იყო, როგორც „რაც ბრუნავს, ყველაფერი საწყის წერტილს უბრუნდება“, ან „პატარა წითელი ფურგონი“, მაგრამ საშინლად უნდოდა დუნდულების ჩვენება.

მისტერ გრეი ხვდებოდა, რომ დედამიწის ბაირუსით იყო დაინფიცირებული. ყველაფერი ემოციით დაიწყო, სენსორული ინფორმირებულობის გამოღვიძებით (საჭმლის გემო, მძაფრი სიამოვნება პატარულის თანამშრომლის დანახვაზე, რომელიც თავს საშხაპის კაფელის კედელს ურტყამს – და ამ დარტყმების შედეგად ყრუდ გამოცემული „ბუჰ-ბუჰ“) გაგრძელდა და ბოლოს იმად გადაიქცა, რასაც ჯოუნსი აზროვნების უმაღლეს საფეხურს უწოდებდა. მისტერ გრეის აზრით, ეს ხუმრობა იყო: აბა, რა შეიცვლებოდა, თუ განავალს გადამუშავებულ საკვებს უწოდებდა, გენოციდს – ეთნიკურ წმენდას. და მაინც, აზროვნებას თავისი განსაკუთრებული ხიბლი და მიმზიდველობა ჰქონდა იმ არსებისთვის, რომელიც ყოველთვის ვეგეტაციური გონების ნაწილი და ერთგვარი მაღალინტელექტუალური გაუცნობიერებლობა იყო.



სანამ მისტერ გრეი ჯოუნსის იზოლირებას მოახდენდა, იმ უკანასკნელმა შესთავაზა, დაევიწყებინა თავისი მისია და ადამიანური ყოფით დამტკბარიყო. ახლა კი აღმოაჩინა, რომ სურვილმა მასში – ჰარმონიული გონების, ცნობიერების არმქონე არსებაში – დანაწევრება დაიწყო და შეუსაბამო ხმების გუნდს დაემსგავსა: ზოგს A უნდოდა, ზოგს – B, ზოგსაც – Q კვადრატში და გაყოფილი ძ-ზე. უწინ ამგვარ ბურტყუნს ბოდვად, სიგიჟის წინა პირობად აღიქვამდა, ახლა კი მიხვდა, რომ შინაგანი ბრძოლით ტკბებოდა.

ბეკონი. „სექსი კარლასთან“ – ჯოუნსის თქმით, საოცრად სასიამოვნო აქტი, რომელიც როგორც სენსორულ, ისე ემოციურ ფაქტორებს შეიცავდა. მანქანის სწრაფად ტარება და ბილიარდის თამაში ბარში, სახელწოდებით „ო'ლირი“, ფენუეი-პარკის გვერდით, ლუდი და ორკესტრის ხმამალალი, ცოცხალი შესრულება, პეტი ლავლესი და მისი ნამღერი „ამაში შენი ცივი, ორსახოვანი, მოღალატე, მატყუარა მოსიყვარულე გული დაადანაშაულე“ (რასაც უნდა ნიშნავდეს). ზაფხულის ნისლიანი დილით ბუნების გამოღვიძება. და, რა თქმა უნდა, მკვლელობა.

თუ საქმეს სწრაფად არ დაასრულებდა, შესაძლოა, საერთოდ ვეღარ შეესრულებინა. ის ხომ უკვე ბაირუსი კი არა, მისტერ გრეი იყო. რა დრო გავიდოდა, სანამ მისტერ გრეის ტყავიდან გამოძვრებოდა და ჯოუნსიში აითქვიფებოდა?

ეს არ მოხდება, – გაიფიქრა მან და აქსელერატორს დააწვა. არცთუ მძლავრი ძრავის „სუბარუმ“ ცოტათი მოუმატა სიჩქარეს. უკანა სავარძელზე გაწოლილმა ძაღლმა დაიწკმუტუნა... შემდეგ კი ტკივილისგან აყმუვლდა. მისტერ გრეი ძაღლში მოკალათებულ ბაირუსს გონებით დაუკავშირდა. ბაირუსი სწრაფად იზრდებოდა. ძალიან სწრაფად. და კიდევ: აზრების გაცვლა არც სიამოვნებას იწვევდა, არც – სითბოს, რასაც, ჩვეულებრივ, განიცდიან ხოლმე ამგვარად თანამოსაუბრენი. ბაირუსის გონება ცივი იყო... დამძალებული...

– უცხოტომელი, – ჩაიჩურჩულა მან.

მაგრამ მაინც მოახერხა მისი დამშვიდება. როდესაც ძალლი წყალში ჩავარდება, ბაირუსი მასთან ერთად აღმოჩნდება იქ. ადაპტაციისთვის გარკვეული დრო დასჭირდება. ძალლი, ცხადია, დაინრჩობა, მაგრამ ბაირუსი ცოტა ხანს მაინც იცოცხლებს – ძალლის მძორს შექამს, სანამ დრო მოვა. თუმცა ჯერ იქამდე უნდა მიაღწიოს.

ბევრი აღარ რჩებოდა.

მისტერ გრეი I-90 გზატკეცილზე მიქროდა, ვესტბოროს, გრაფტონისა და დოროთიფონდის მსგავს უამრავ პატარა ქალაქს გასცდა (ჯოუნსი მათ საპირფარეოებს უწოდებდა, თუმცა ერთგვარი სიმპათიით), მიზანს სულ უფრო უახლოვდებოდა, კიდეც ორმოცი მილი რჩებოდა. გამუდმებით ეძებდა ადგილს, სადაც თავის ახალ, გამაღიზიანებელ ცნობიერებას შეჩურთავდა და შესაძლო უბედურებას აიცილებდა. ჯოუნსის ბავშვებზე მათი მოჭარბებული ემოციურობის გამო თქვა უარი. დადიტსთან კავშირს ვერ ამყარებდა. ჯოუნსიმ მას მოგონებები მოჰპარა. ბოლოს, ჯოუნსის სამსახურზე შეჩერდა, ისტორიის სწავლებაზე, მის საშინლად მიმზიდველ სპეციალობაზე. 1860-1865 წლებში ამერიკა ორად გაყოფილიყო, როგორც ბაირუსის კოლონიები განვითარების ყოველი ციკლის ბოლოს. ამას რამდენიმე მიზეზი ჰქონდა. მათგან მთავარი, რალაციით, „მონობას“ უკავშირდებოდა, თუმცა ეს იგივე იყო, ნარწყევისთვის ან განავლისთვის „გადამუშავებული საკვები“ გეწოდებინა. „მონობა“ არაფერს ნიშნავდა. არც – „გამოყოფის უფლება“. არც – „კავშირის შენარჩუნება“. არსებითად, მათ ის გააკეთეს, რისი გაკეთებაც ყველაზე უკეთ შეეძლოთ: „გამაგდნენ“, ეს კი თითქმის იგივეა, რაც „გაგიჟდნენ“, მაგრამ სოციალურად გაცილებით მისაღებია. და მასშტაბს აღარ იკითხავთ?

მისტერ გრეი გატაცებით, ერთმანეთის მიყოლებით ხსნიდა ყუთებს, სადაც გასაოცარ შეიარაღებას პოულობდა – აი, მსხვილი საფანტი, შრაპნელი, ზარბაზნის ყუმბარები, ხიშტები, ნაღმები. ამ დროს გონებაში დაუკითხავად შემოიჭრა ხმა:

ბეკონი

მან უკუაგდო ეს ფიქრი, მაგრამ ჯოუნსის მუცელი აუწრიალდა. ცხადია, ცუდი არ იქნებოდა ბეკონის გემრიელი, ცხიმოვანი და სლიკინა ნაჭერი, რომელიც ფიზიკურ სიამოვნებას მიანიჭებდა, მაგრამ დრო არ ჰქონდა. აი, როცა ძაღლს თავიდან მოიცილებდა D და თუ მდევრებსაც შეაგვიანდებოდათ, იმდენს შეჭამდა, სანამ მუცელი არ გაუსკდებოდა. ახლა კი ამის დრო არ იყო.

როცა მე-10 გადასახვევს გასცდა, – კიდევ ორი რჩებოდა, – გონებით კვლავ სამოქალაქო ომს მიუბრუნდა, ლურჯ და ნაცრისფერ ტანსაცმელში გამოწყობილ მამაკაცებს, რომლებიც კვამლში დარბოდნენ, ყვიროდნენ და ერთმანეთს ხიშტებს ურჭობდნენ, უამრავ წითელ ფურგონს ანადგურებდნენ, კონდახებს თავში ურტყამდნენ მტერს – ამ დროს კვლავ გაისმოდა საამური ბუჰ-ბუჰ! და...

ბეკონი

მუცელი ისევ აუბუყბუყდა. ჯოუნსის პირში ნერწყვი დაუგროვდა და მას „დაიზარტისი“ გაახსენდა, ცისფერ თევზზე დაწყობილი ყავისფერი შებრაწული ზოლები, რომლებიც თითებით უნდა აეღო. ტექსტურა მყარი იყო – მკვდარი და გემრიელი ხორცის ტექსტურა...

„ამაზე ნუ ფიქრობ“.

კლაქსონმა გამაღიზიანებლად დაიყვირა. მისტერ გრეი შეხტა, ლედი აყმუვლდა. მანქანა სხვა ზოლში გადასულიყო, რომელსაც ჯოუნსი „შემოვლითს“ უწოდებდა. იძულებული გახდა, „სუბარუ“ გაეჩერებინა და მასზე გაცილებით სწრაფად მოძრავი სატვირთო მანქანა გაეტარებინა, რომელმაც საქარე მინაზე ჭუჭყიანი წყალი შეასხა. მისტერ გრეი ვერაფერს ხედავდა. ღირსი ხარ, რომ დაგეწიო და მოგკლა, – გაიფიქრა მან, – ტვინი გაგასხმევიანო, შე სამხრეთელო მეამბოხევე, მაგარ მძღოლად რომ მოგაქვს თავი, ბუჰ-ბუჰ! ეგ შენი პატარა წითელი ფურგონი მიგიღეწო...

ბეკონის სენდვიჩი

ეს მის თავში თოფის გასროლასავით გაისმა. როგორც შეეძლო, ეწინააღმდეგებოდა, მაგრამ ვერაფერი მოუხერხა. ნუთუ, ეს ჯოუნსი

იყო? ნამდვილად არა, მას საამისოდ ძალა არ ეყოფოდა.

მოულოდნელად იგი უშველებელ ცარიელ კუჭად გადაიქცა, რომელიც კვნესოდა და საწყალობლად ევედრებოდა. თავისუფლად მოასწრებდა, მანქანა გაეჩერებინა და მისი სურვილი დაეკმაყოფილებინა. ასე რომ არ მოქცეულიყო, სადღაც გადაჩეხავდა ეს...

ბეკონის სენდვიჩი!

მაიონეზით!

მისტერ გრემი ნმამალლა შეჰყვირა და ვერც კი შეამჩნია, რომ პირიდან ნერწყვი გადმოუვიდა.

## 18

– მე მესმის მისი, – თქვა მოულოდნელად ჰენრიმ და მიუშტები საფეთქლებზე მიიჭირა, თითქოს თავის ტკივილის შეჩერება სურდა, – ღმერთო ჩემო, რა საშინელებაა! მას მგელივით შია.

– ვის? – გაუკვირდა ოუენს. და სწორედ ამ დროს მასაჩუსეტსის შტატის საზღვარი გადაკვეთეს. ქარის გამო, წვიმის ვერცხლისფერი წვეთები ცერად ეცემოდა მათი მანქანის წინ, – ძალღს? ჯოუნსის? მითხარი, ვის?

– მას, მისტერ გრემის, – მიუგო ჰენრიმ. მან ოუენს შეხედა და თვალეში იმედის ნაპერწკალი აუკიაფდა, – ვფიქრობ, ამუხრუჭებს. მგონი გაჩერებას აპირებს.

## 19

– ბოს!

კურცი თვლემდა, როდესაც პერლმუტერი მისკენ გაჭირვებით შემობრუნდა და ალაპარაკდა. სწორედ ამ დროს ისინი ნიუ-ჰემპშირის საგზაო ბაჟის გადახდის პუნქტს მიუახლოვდნენ. ფრედი ჯონსონმა სიფრთხილე გამოიჩინა და მანქანა იმ ზოლში გადაიყვანა, სადაც ფული ავტომატში უნდა ჩაეყარათ (ემინოდა, მოლარეს „ჰამერის“ სალონში დაგროვილი სიმყრალე არ ეგრძნო ან ჩამსხვრეული

ფანჯარა, იარალი და... სამივე მათგანი არ დაენახა).

კურცი ინტერესით აკვირდებოდა არჩი პერლმუტერის ოფლიან, გაწამებულ სახეს. აღტაცებითაც კი. სად გაქრა ის გულცივი ბიუროკრატი, თავისი განუყრელი პორტფელით, ხოლო სავლელე პირობებში – განუყრელი პლანშეტით? თმა ყოველთვის აკურატულად მარცხნივ ჰქონდა გადავარცხნილი, გეგონებოდა, სახაზავით აქვს გაყოფილი. ის, ვინც სასიკვდილო საფრთხის დროსაც ვერ ივიწყებდა სიტყვას „სერ“ – გაქრა. და თუმცა საშინლად გამხდარიყო, თითქოს ზემთაგონება სწვეოდა. მა ჯოუდალ<sup>208</sup> გადაიქცა, – გაიფიქრა კურცმა და კინალამ სიცილი აუტყდა.

– კიდევ მწყურია, ბოს.

პერლიმ სევდიანად შეხედა კურცის „პეპსის“ და საშინლად აყროლებული მორიგი მუხტი გამოუშვა.

მა ჯოუდი ჯოჯოხეთში საყვირით ხელში, – გაიფიქრა კურცმა და ამჯერად ხმამალა გაიცინა. ფრედიმ კვლავ შეიგინა, ოღონდ ზიზლის გარეშე – იგი ბედს შეჰკუთებოდა და მოწყენილიც კი ჩანდა.

– ვშიშობ, ეს ჩემია, მეგობარო, – თავი გადააქნია კურცმა, – პირი მეც გამიშრა.

პერლმუტერმა რალაცის თქმა დააპირა, მაგრამ ტკივილმა წამოუარა და შეიჭმუხნა. მან კვლავ გააკუა, ოღონდ ამჯერად ისე ხმამურით აღარ – თითქოს უნიჭო ბავშვი პიკოლოზე<sup>209</sup> უკრავდა. თვალები ეშმაკურად მოწკურა:

– დამალევიანეთ და რალაცას გეტყვით, – პაუზა, – იმას, რაც აუცილებლად უნდა იცოდეთ.

კურცი ჩაფიქრდა. ჩამსხვრეული ფანჯრიდან წვიმა ასხამდა და სავარძელს ასველებდა. ეს წყეული ფანჯარა უკანალში გარჭობილი ხიჭვივითაა, მადლობა უფალს, ქურთუკის სახელო სულ დაუსველდა, მაგრამ უნდა მოითმინოს. ბოლოს და ბოლოს, ვისი ბრალია?

---

<sup>208</sup> ჯონ სტაინბეკის რომან „მრისხანების მტევნების“ მთავარი გმირის დედა.

<sup>209</sup> მუსიკალური ინსტრუმენტი.

– თქვენი, – თქვა პერლიმ და კურცი შეხტა. დასწყევლოს ღმერთმა, რა არასასიამოვნო რამ ყოფილა აზრების წაკითხვა. გგონია, რომ უკვე შეეჩვიე, მაგრამ თურმე ნურას უკაცრავად, – თქვენი ბრალია. ასე რომ, მომეცით ეს წყეული ბოთლი, ბოს.

– სიტყვები შეარჩიე, ნაბიჭვარო! – დაუღრინა ფრედიმ.

– მითხარი, რაც იცი და მოგცემ.

კურცმა ბოთლი ასწია და სახეგაწამებული პერლის ცხვირწინ შეაჯანჯღლარა, თუმცა საკუთარი თავის მიმართ ზიზღნარევი ირონიაც იგრძნო. ოდესღაც იგი დიდ ქვედანაყოფებს მეთაურობდა და მათ ბრძოლაში გზავნიდა, რათა თავი გაეწირათ გეოპოლიტიკური გადაწყვეტილებების განხორციელებისთვის. ახლა კი მისი რაზმი მხოლოდ ორი ადამიანისა და ერთი ბოთლი გამაგრილებელი სასმლისგან შედგებოდა. როგორ დაეცა! აი, რა მოსდევს სიამაყეს, დიდება უფალს. მას სატანისებური სიამაყე ტანჯავდა, მაგრამ თუ ეს მომაკვდინებელი ცოდვა იყო, მასზე უარის თქმა ძალიან გაუჭირდებოდა. სიამაყე მისთვის ის ქამარი გახლდათ, რომელიც შარვალს იჭერდა მაშინაც კი, როცა ის აღარ ეცვა.

– მპირდებით? – პერლიმ ბანჯგვლიანი ენა გამშრალ ტუჩებზე მოისვა.

– მიწამ ჩამიტანოს, თუ გატყუებდე, – საზეიმოდ დაიფიცა კურცმა, – თუ არ გჯერა, ჩემი აზრები წაიკითხე.

პერლი მას რამდენიმე წუთის განმავლობაში აკვირდებოდა და კურცი თითქმის გრძნობდა, როგორ ფათურობდა რბილი თითები (ფრჩხილებქვეშ ჩაბუდებული სოკოთი) მის ტვინში. საშინელი განცდა ჰქონდა, მაგრამ ითმენდა.

ბოლოს პერლმუტერმა თავი კმაყოფილებით დააქნია.

– ახლა უკეთ მესმის, – თქვა მან და შეშინებული სახით, ენის ბორძიკით ჩაიჩურჩულა, – იგი მჭამს, შიგნეულობას მიჭამს. ვგრძნობ.

კურცმა ხელზე ხელი მოუთათუნა. ამ დროს საგზაო ნიშანს ჩაუ-

არეს, რომელზეც ეწერა: „კეთილი იყოს თქვენი მობრძანება მასაჩუსეტსში.

- ხომ შეგპირდი, მოგარჩენ-მეთქი. ახლა კი მოჰყევი, რაც გაიგე.
- მისტერ გრეი ჩერდება. მოშვივებუღია.

კურცმა პერლმუტერს ხელზე ხელი მოუჭირა, კლანჭებივით ჩააფრინდა.

- სად?

- იმ ადგილის სიახლოვეს, საითაც მიემგზავრება. ეს მაღაზიაა, - თქვა არჩი პერლმუტერმა ჭირვეული ბავშვის ხმით, რის გამოც კურცს ტანში გააჟრჟოლა. და შესძახა, - საუკეთესო საჭმელი! შემოდი, რაღას ელოდები? საუკეთესო საჭმელი! შემოდი, რაღას ელოდები?

შემდეგ მან თითქმის ნორმალური ხმით დაამატა:

- ჯოუნსიმ იცის, რომ მათ ჰენრი, ოუენი და დადიტსი მისდევენ, ამიტომაც აიძულა მისტერ გრეი, გაჩერებულყო.

იმის გაფიქრებამ, რომ ოუენს ჯოუნსი-მისტერ გრეის დაჭერა შეეძლო, კურცს თავზარი დასცა.

- არჩი, ყურადღებით მომისმინე.

- მწყურია, - დაიწუწუნა პერლიმ, - მწყურია, შე ნაბიჭვარო.

კურცმა კვლავ ასწია „პეპსის“ ბოთლი, მაგრამ როგორც კი პერლიმ მისკენ გაიწია, ხელში ჩაარტყა.

- ჰენრიმ, ოუენმა და დად-დატსმა თუ იციან, სად გაჩერდნენ ჯოუნსი და მისტერ გრეი?

- დად-დიტს, შე ბებერო სულელო! - დაიღრიალა პერლიმ, ტკივილისგან დაიკვნესა და ხელები გაფუებულ მუცელზე იტაცა, - დიტს, დიტს, დად-დიტს! დიან, იციან! დადიტსი დაეხმარა მათ და ისე გააკეთა, რომ მისტერ გრეის მოშვივებოდა. მას ჯოუნსიც დაეხმარა!

- ეს არ მომწონს, - თქვა ფრედიმ.

არა მარტო შენ, - გაიფიქრა კურცმა.

– გთხოვთ, ბოს, – თქვა პერლიმ, – ძალიან მწყურია.

კურცმა პერლმუტერს ბოთლი გაუწოდა, შემდეგ კი გულგრილად უყურებდა, როგორ ხარბად სვამდა იგი.

– 495, ბოს, – განაცხადა ფრედიმ, – საით წავიდე?

– ჯერ 495-ით, – უთხრა პერლმუტერმა, – შემდეგ 95-ზე გადაუხვიე, დასავლეთისკენ, – მან დააბოყინა – ხმაურით, მაგრამ ნაკლები სიმყრალე ამოუშვა, – მას კიდევ უნდა „პეპსი“. მოსწონს სიტკბო. კოფეინიც მოსწონს.

კურცი მოიღუშა. ოუენმა იცოდა, რომ მისტერ გრეი შეჩერდა, ყოველ შემთხვევაში, დროებით მაინც. ახლა ოუენი და ჰენრი სიჩქარეს მოუმატებდნენ და საათნახვერიანი ჩამორჩენის შემცირებას შეეცდებოდნენ. მაშასადამე, თვითონაც უნდა აჩქარებულყო.

ნებისმიერი პოლიციელი, რომელიც გზაზე გადაეღობებოდა, სიცოცხლეს გამოესალმებოდა, ღმერთო, შენ შეიწყალე. ასე იყო თუ ისე, დევნა დასასრულს უახლოვდებოდა.

– ფრედი!

– დიახ, ბოს!

– გაზს დააწეე. აიძულე, რომ გაფრინდეს და ღმერთი მოწყალე თვალთ გადმოგხედავს. აიძულე, რომ გაფრინდეს.

ფრედი ჯონსონმა ბრძანება შეასრულა.

## 20

აქ არც ბოსელი იყო, არც – ფარდული, არც – ბაკი. ვიტრინაში წინასაარჩევნო პლაკატების ნაცვლად, კუების წყალსაცავის სურათი „იწონებდა თავს“. მის ქვემოთ მაცდური მოწოდება ანათებდა: „საუკეთესო კერძები, შემოდი, რაღას ელოდები?“ მაგრამ სხვაფრივ, იგი ძალიან წააგავდა გოსლინის მალაზიას – ისეთივე უბადრუკი ფიცრული კედლები და ბაცი ყავისფერი კრამიტი, ისეთივე დაცერებული საკვამური, საიდანაც წვიმიანი ცისკენ ბოლქვებად აღიოდა კვამლი, ისეთივე დაჟანგული ბენზინგასამართი სვეტი პარმალთან.



იქვე ჩამოკიდებულ ფირფიტაზე ეწერა: „ბენზინი არ არის, დააბრალეთ არაბებს“.

ნოემბრის იმ დღეს მაღაზიაში მხოლოდ მეპატრონე იყო, ჯენტლმენი, სახელად დიკ მაკკასკელი. თანამემამულეთა უმრავლესობის მსგავსად, მთელი დილის განმავლობაში ტელევიზორს არც ის მოსცილებია. ახალი ამბების მრავალჯერ გამეორების შემდეგ ჩრდილოეთის ტყეების იმ ნაწილის სურათებს უჩვენებდნენ, რომელიც სამხედროებით იყო გარშემორტყმული, აგრეთვე – შეიარაღებულ ძალებს, ავიაციას და ასე შემდეგ. ამას პრეზიდენტის გამოსვლა მოჰყვა. დიკმა პრეზიდენტს „მისტერ ჰა-და-ჰა“ შეარქვა არჩევნების დროს ატეხილი აურზაურისა და გაუგებრობის გამო – დალახვროს ეშმაკმა, ნუთუ არავინ ჰყავდათ, ვინც ხმებს წესიერად დათვლიდა? თუმცა თვითონ აღარასოდეს უსარგებლია ხმის მიცემის უფლებით ჯიპერის<sup>210</sup> შემდეგ (აი, ვინ იყო ნამდვილი პრეზიდენტი). დიკს ეჯავრებოდა პრეზიდენტი ჰა-და-ჰა, იგი მერყევ, არასაიმედო ტიპად მიაჩნდა, რომელსაც დიდი კბილები ჰქონდა (ცოლს, მართალია, არა უშავდა). პრეზიდენტის მიერ, დილის თერთმეტ საათზე წარმოთქმულ სიტყვას ჩვეულებრივ ლაქლაქად აღიქვამდა და მისი არ სჯეროდა. ფიქრობდა, რომ ამ გამოსვლით ამერიკელი გადასახადის გადამხდელების გაბრიყვება სურდათ, რათა მათ მეტი ხალხით გაეღოთ ფული ქვეყნის თავდაცვისუნარიანობის ასამაღლებლად და გადასახადების გადასახდელად. მეცნიერებს უკვე დაემტკიცებინათ, რომ კოსმოსში დედამიწელების გარდა, არავინ იყო. ერთადერთი უცხოტომელები (ცხადია, თვითონ პრეზიდენტი ჰა-და-ჰას გარდა) მექსიკელები იყვნენ, რომლებიც საზღვარზე ფარულად გადმოდიოდნენ. მაგრამ ჭორებით დაშინებული ხალხი შინ იჯდა და ტელევიზორს მისჩერებოდა. მოგვიანებით, ვინმე შემოივლიდა ლუდის ან ღვინის საყიდლად, მაგრამ ჯერჯერობით, ვაჭრობა ისე ჩამკვდარიყო, როგორც გზაზე გადარბენისას მანქანის ქვეშ მოყოლილი კატა.

---

<sup>210</sup> აშშ-ის პრეზიდენტი რონალდ რეიგანის მეტსახელი.

დიკს ტელევიზორი ნახევარი საათის წინ გამოერთო – ღმერთმანი, სისულელის მოსმენაზე დრო რატომ დაეხარჯა. როდესაც ორის თხუთმეტ წუთზე, შემოსასვლელ კართან ზარი აწკარუნდა, იგი მაღაზიის ყველაზე შორეული თაროდან აღებულ ყურნალს ათვალერებდა. იქვე წარწერაც გაეკრა: „მხოლოდ 21 წლის ასაკიდან“. იმ განსაკუთრებულ პერიოდულ გამოცემას „ქალიშვილები სათვალით“ ერქვა, რაც სრული ჭეშმარიტება გახლდათ, რადგან ყოველ გვერდზე სათვალისანი ქალის სურათი მოეთავსებინათ. მართალია, მათ სხეულზე კაცი სხვას ვერაფერს აღმოაჩენდა, მაგრამ სათვალე ეკეთათ.

დიკმა პოტენციურ მყიდველს შეხედა, სურდა, რამე ეთქვა – მაგალითად, „როგორ ბრძანდებით“ ან „დღეს გზები მოლიპულია“, მაგრამ სიტყვა პირზე შეაშრა. რატომღაც მოუსვენრობა იგრძნო და უხერხულობასთან ერთად, მტკიცე რწმენა გაუჩნდა, რომ გაძარცვადნენ, აშკარად გაუმართლებდა, თუ ამით დაკმაყოფილდებოდნენ. თორმეტი წლის განმავლობაში, რაც მაღაზიას ფლობდა, იგი არასდროს გაეძარცვათ. თუკი ვინმეს რამდენიმე ბანკნოტის გულისთვის საკუთარი თავისუფლების სასწორზე შეგდება სურდა, ირგვლივ საკმაოდ იყო ისეთი ადგილი, სადაც იმ თანხის მნიშვნელოვნად გაზრდა შეიძლებოდა. ალბათ ეს ტიპი...

დიკმა ნერწყვი გადაყლაპა. მისი აზრით, ეს კაცი გვარიანად აფრენდა. იქნებ მანიაკი იყო, რომელმაც ცოტა ხნის წინ მთელი ოჯახი ამოხოცა და ახლა, სანამ შუბლში ტყვიას იკრავდა, იმქვეყნად კიდევ ორიოდე კაცის გასტუმრება სურდა?

დიკი პარანოიკების რიცხვს არ მიეკუთვნებოდა (მისი ცოლყოფილის თქმით, მძიმედ მოაზროვნე უფრო იყო), მაგრამ მაინც მძაფრად იგრძნო, რომ ამ პირველი კლიენტისგან რაღაც ბოროტება მოდიოდა. მას არ მოსწონდა, ბიჭები მაღაზიაში რომ შემოეხეტებოდნენ და „პატრიოტებსა“ თუ „რედ სოქსზე“ ლაყბობდნენ, ანდა ტრაბახობდნენ, როგორ დაიჭირეს უშველებელი თევზი წყალსაცავში. მაგრამ

ახლა რას არ მისცემდა ერთი ასეთი ბიჭისთვის, ან თუნდაც მთელი ჯგროსთვის თვალი რომ მოეკრა.

მამაკაცი თავდაპირველად კარებში იდგა. მართლაც უცნაურად გამოიყურებოდა. მონადირის ნარინჯისფერი ქურთუკი ეცვა, არადა, მასაჩუსეტსში ნადირობის სეზონი ჯერ არ დაწყებულიყო. დიკს განსაკუთრებით მამაკაცის დაკაწრული ლოყები არ მოეწონა. ისეთი შესახედაობა ჰქონდა, თითქოს რამდენიმე დღის განმავლობაში ჯაგნარში მიიკვლევდა გზას, ჩაცვივნილი ლოყები კი მოწმობდა, რომ მოსდევდნენ. ტუჩებს ისე ამოძრავებდა, გეგონებოდათ, საკუთარ თავს ელაპარაკებო. ამას ისიც ემატებოდა, რომ დამტვერილი ვიტრინიდან შემოსულ, შუადღის ნაცრისფერ შუქზე ნიკაპი საეჭვოდ უბრწყინავდა.

ამ ბოზისშვილს ნერწყვი ჩამოსდის, – გაიფიქრა დიკმა, – ეშმაკმა წამიღოს, თუ ვცდებოდე.

შემოსული თავს სწრაფად, ჩიტივით ამოძრავებდა, ტანი კი გაუნძრევლად ეჭირა. სწორედ რომ სანადიროდ გამოსულ ზარნაშოს ჰგავდა. ერთი პირობა, დიკმა სკამიდან ჩამოსვლა და დახლს მიღმა დამალვა დააპირა, მაგრამ სანამ ასეთი ნაბიჯის ავკარგიანობას აწონ-დაწონიდა (მის ყოფილ ცოლს სწორად შეენიშნა, რომ სწრაფად აზროვნება უჭირდა), კაცმა თავი მისკენ მიაბრუნა და მიაშტერდა.

დიკის გონების რაციონალურ ნაწილს ჯერაც არ გადასწუროდა იმედი (თუმცა ბოლომდე ჩამოუყალიბებელი), რომ ეს ყველაფერი მისი ფანტაზიის ნაყოფი იყო, რომ მენის ჩრდილოეთიდან წამოსულმა სულელურმა ცნობებმა და კიდევ უფრო უაზრო ჭორებმა, პრესა წაღმა-უკუღმა რომ ატრიალებდა, თავგზა აუბნია. იქნებ, კაცს უბრალოდ სიგარეტი, ლუდის შეკვრა, თუნდაც ყავის ლიქიორი ან პორნოგრაფიული ჟურნალი უნდოდა, რათა უეირში ან ბელჩერთაუნში მიმავალს, მოტელში როგორმე გრძელი, ავდრიანი ღამე გადაეგორებინა?

მაგრამ იმედის ეს ნაპერწკალიც ჩაუქრა, როდესაც მათი თვალე-  
ბი ერთმანეთს შეხვდა.

არა, ის არ ჰგავდა ოჯახის მკვლელ მანიაკს, რომელიც უკანას-  
კნელ კრუიზს ახორციელებდა, თუმცა დიკს რატომღაც მოეჩვენა,  
რომ მანიაკის სტუმრობა ჯობდა. კლიენტის თვალებს ცარიელი  
არაფრით ეთქმოდა. პირიქით, გადავსებულიც კი ჩანდა. მათში მი-  
ლიონობით ფიქრი და იდეა დაქროდა და ერთმანეთს ენაცვლებოდა  
როგორც მოლეკულები – ბროუნის მოძრაობაში<sup>211</sup> ან მაზანდა, სუ-  
პერსინქარით რომ გამოაქვს ბირჟაზე აპარატს. მეტისმეტი დაძაბუ-  
ლობისგან თვალის კაკლები თითქოს ფოსოებში დაუხტოდა.

ამაზე უფრო მშვიერი თვალეები დიკ მაკკასკელს ცხოვრებაში არ  
ენახა.

– ჩვენ არ ვმუშაობთ, – თქვა დიკმა, თუმცა მისი ხმა ყვავის ჩხა-  
ვილს უფრო ჰგავდა, – მე და ჩემმა პარტნიორმა... ის უკანა ოთახ-  
შია... დღეს დასვენება გადავწყვიტეთ. იმის გამო, რაც ჩრდილოეთში  
ხდება. მე... ანუ ჩვენ... კარზე დაფის გამოკვრა დაგვაავიწყდა. ჩვენ...

მას შეეძლო საათების, დღეების განმავლობაშიც ელაპარაკა ასე,  
მაგრამ მონადირის ქურთუკში გამოწყობილმა კაცმა გააწყვეტინა:

– ბეკონი, – თქვა მან, – სად არის ბეკონი?

მოულოდნელად დიკი მიხვდა, რომ თუ მაღაზიაში შემთხვევით  
ბეკონი არ აღმოჩნდებოდა, კაცი მას მოკლავდა, თუმცა, ცხადია,  
მოკვლა ისედაც შეეძლო, ყოველგვარი ბეკონის გარეშე. ბეკონი რო-  
გორ არ ჰქონდა. მადლობა ღმერთს, მადლობა იესოს, მადლობა ჰა-  
და-ჰას და მადლობა ყველა არაბს, ბეკონი ჰქონდა!

– მაცივარი იქაა, ბოლოში, – თქვა მან ახალი და უცნაური ხმით.

ჟურნალზე დადებული ხელი ყინულივით გასცივებოდა. თავში  
უცხო ჩურჩული მოესმა. წითელი ფიქრები და შავი ფიქრები. მშვიერი  
ფიქრები.

---

<sup>211</sup> სითხესა და აირში შეწონილი უმცირესი ნაწილაკების სითბური მოძრაობა,  
რაც გამოწვეულია შეჯახებით იმ სითხისა და აირის მოლეკულებთან.

„რა არის მაცივარი?“ – იკითხა არაადამიანურმა ხმამ. დაღლილმა, ძალზე ადამიანურმა ხმამ უპასუხა: „იქით გაუყევი, ლამაზო, მაშინვე დაინახავ“.

ხმები მესმის, – გაიფიქრა დიკმა, – ოჰ, ღმერთო ჩემო, არა. ალბათ სწორედ ასე გიჟდებიან ადამიანები.

მამაკაცმა დიკს ჩაუარა და კოჭლობით გაემართა ცენტრალური გასასვლელისკენ.

სალაროს გვერდით ტელეფონის აპარატი იდო. დიკმა შეხედა, მაგრამ მაშინვე თვალი აარიდა. სულ ახლოს იყო, ხელის გაწვდენაზე. თითის ერთი დაჭერით 911 აიკრიფებოდა, თუმცა ასეთივე წარმატებით მთვარეზეც შეეძლო მოხვედრა. გამბედაობა რომც ჰყოფნოდა და ხელი ყურმილისკენ წაედო...

„მე ყველაფერს მივხვდები“, – თქვა არაადამიანურმა ხმამ და დიკმა კვლავ ჩუმად დაიკვნესა. ეს მის თავში იყო. თითქოს ტვინში ვიღაცამ რადიომიმღები ჩაუდგა.

კარის ზემოთ ამობურცული სარკე ეკიდა. ერთი შეხედვით უბრალო ნივთი განსაკუთრებით კარგად ზაფხულში საღებოდა, როდესაც მაღაზიას ბევრი ბავშვი სტუმრობდა, მშობლებთან ერთად წყალსაცავზე მიდიოდნენ – კუებიანი აქედან სულ რაღაც თვრამეტ მილში მდებარეობდა – სათევზაოდ, პიკნიკზე ან ექსკურსიაზე. პატარა ონავრები ყოველთვის ცდილობდნენ, რამე აეწაპნათ, რაც ცუდად იდო, განსაკუთრებით კანფეტები, საღეჭი რეზინი ან ჟურნალი შიშველი ქალების სურათებით. დიკი სარკეს მიაჩერდა და შიშნარევი ინტერესით აკვირდებოდა, როგორ მიუახლოვდა ნარინჯისფერქურთუკიანი მამაკაცი მაცივარს, კარი გამოაღო, წამით შეეკვნა და ბეკონის ერთი კი არა, ოთხივე პაკეტი გამოიღო.

შემდეგ კოჭლობით გამობრუნდა უკან, თან თაროებს ათვალერებდა. საშიშ, მშიერ და საშინლად დაღლილ ადამიანს ჰგავდა, მართონელს, რომელსაც მხოლოდ ერთი, მაგრამ ყველაზე რთული მილი დარჩენია დასაძლევად. საბრალო დიკს თავბრუ დაესხა, თითქოს

ძალიან მაღლიდან ქვევით იყურებოდა. ეს იმას ჰგავდა, ერთისთვის კი არა, ერთდროულად რამდენიმე ადამიანისთვის რომ ედევნებინა თვალი, რომლებიც შიგადაშიგ ჩნდებოდნენ, თვალთახედვის არეს უფარავდნენ და ქრებოდნენ. დიკს წამით ოდესღაც ნანახი ფილმი გაახსენდა, რომელშიც ვიღაც შეშლილ მეძავს პიროვნების გაორება კი არა, გაასება სჭირდა.

უცნობი შეჩერდა, ჯიბეში მაიონების ქილა ჩაიღო, თაროდან დაჭრილი პური მოხვეტა და სალაროსკენ გამოემართა. დიკი თითქოს გრძნობდა მის დაღლილობას. დაღლილობასა და სიგიჟეს.

კაცმა პროდუქტი დახლზე დადო და თქვა:

– სენდვიჩი ბეკონით, თეთრ პურზე, მაიონებით. ეს ყველაზე გემრიელია.

შემდეგ გაიღიმა. ეს ისეთი დაღლილი, გულის ამარყუებლად გულწრფელი ღიმილი იყო, რომ წამით დიკს შიში გადაავიწყდა და ხელი გაიწვდინა.

– მისტერ, ხომ კარგად...

მაგრამ ხელი ისე გაშეშდა, თითქოს წინ კედელი დახვდაო, შეტოკდა და დიკს მთელი ძალით სახეში მოხვდა – თხლამ! მერე ნელა მოსცილდა და ჰაერში ღირიჟაბლივით დაიწყო ცურვა.

„არ მოკლა! “

„გამოდი და შემაჩერე! “

„თუ გამაბრაზებ, შენ თავს დააბრალებ! “

ფრაზები მის თავში ისმოდა.

ღირიჟაბლივით მოძრავი ხელის ორი თითი ნესტოებში შეძვრა, თავი საიმედოდ დაუცო, ცოტა ხანს შეჩერდა და – ოო, ღმერთო! – უფრო ღრმად დაიწყო შესვლა. მისტერ მაკკასკელს ბევრი საეჭვო ჩვეულება ჰქონდა, მაგრამ ფრჩხილების კვნევა არ ახასიათებდა. თავდაპირველად, თითებს სივიწროვეში ცოტათი გაუჭირდათ, მაგრამ როგორც კი სისხლი წამოვიდა, გაშმაგება დაეცოთ. ჭიაყელებით იკლაკნებოდნენ. ჭუჭყიანი ფრჩხილები ხორცში ეშვებოდათ

ესობოდა და ზევით, ტვინისკენ მიიწევდა. დიკი გრძნობდა, როგორ იმსხვრეოდა ხრტილი, ესმოდა...

„შეწყვიტეთ, მისტერ გრეი, ახლავე შეწყვიტეთ!“

მოულოდნელად, დიკის თითები კვლავ ჩვეულებრივს დაემსგავსა. მან სველი ტკაცუნით გამოსწია ხელი. სისხლმა იფეთქა და დახლს, ხურდის დასადებ, „სქოულის“ ემბლემიან პატარა ნაჭერსა და იმ შიშველი სათვალისანი ლამაზმანების სურათებს დაეშხევა, დიკი ამ არსების შემოსვლამდე რომ ათვალისერებდა.

– რამდენი უნდა გადაგიხადოთ, დიკ?

– ისე წაიღეთ! – კვლავ ყვავის ჩხავილივით გაისმა, ოღონდ ამჯერად მოგუდულად, რადგან ნესტოებში სისხლი დაგროვილიყო, – წაიღეთ და თავიდან მომწყდით!

– არა, ასე ვერ მოვიქცევი. ეს ბიზნესია, რომლის დროსაც გარკვეული საფასურის საქონელი მიმოქცევაში არსებულ ვალუტაზე იცვლება.

– სამი დოლარი! – ხრინწიანი ხმით ჩაილაპარაკა გაოგნებულმა და შეძრწუნებულმა დიკმა. გული ბაგაბუგით უცემდა, კუნთები მოზღვავებული ადრენალინისგან უთრთოდა. იმედოვნებდა, რომ ეს ქმნილება წავიდოდა და ამისგან კიდევ უფრო ცუდად ხდებოდა: ცხოვრება იქვე, სულ ახლოს ჩქეფდა, მაგრამ მისი ყოფნა-არყოფნა ვიღაც დარტყმულის ჭირვეულობაზე იყო დამოკიდებული.

დარტყმულმა კი ძველი, გაცვეთილი საფულე ამოიღო, გახსნა და შიგ ქექვა დაიწყო. დიკს მოეჩვენა, რომ დრო უსაშველოდ გაიწელა. შეშლილს პირიდან კვლავ გადმოსდიოდა ნერწყვი, რომელიც საფულის გახუნებულ ტყავს ეწვეთებოდა. როგორც იქნა, სამი დოლარი ამოაძვრინა და დახლზე დადო, საფულე კი აკურათულად ისევ ჯიბეში ჩაიღო. შემდეგ საოცრად ჭუჭყიანი ჯინსის უკანა ჯიბე მოიჩხრიკა (ალბათ სულ საჭესთან იჯდა და არასდროს გაუშრია, – გაიფიქრა დიკმა) და ხურდისთვის განკუთვნილ ნაჭერზე სამი მონეტა დააგდო. ორი თხუთმეტცენტიანი და ერთი ათცენტიანი.

– ეს გასამრჯელოს სახით. ოცი პროცენტიცა, – დაუფარავი სიამაყით განაცხადა მყიდველმა, – ჯოუნსი თხუთმეტს იძლევა ხოლმე. ასე ჯობს. უფრო მეტია.

– რა თქმა უნდა, – ჩაიჩურჩულა დიკმა. ცხვირი კვლავ სისხლით ჰქონდა სავსე.

– კარგ დღეს გისურვებთ.

– თქვენ... გულთან ახლოს ნუ მიიტანთ.

ნარინჯისფერქურთუკიანი კაცი ცოტა ხანს თავდახრილი იდგა. დიკს ესმოდა, როგორ არჩევდა იგი შესაძლო პასუხებს და უმწეობისგან დაყვირება სურდა. ბოლოს უცნობმა თქვა:

– ვეცდები, არ მივიტანო, – პაუზის შემდეგ კი დაამატა, – არ მინდა, რომ ვინმეს დაურეკოთ, პარტნიორო.

– არავის დავურეკავ, – დაჰპირდა დიკი.

– შეგიძლიათ, ღმერთი დაიფიცოთ?

– დიახ, ღმერთს გეფიცებით.

– მეც ღმერთივით ვარ, – თქვა მყიდველმა.

– დიახ, რა თქმა უნდა. როგორც თქვენ...

– თუ ვინმეს დაურეკავთ, შევიტყობ, დავბრუნდები და შავ დღეს დაგაყრით.

– არ დავრეკავ!

– ძალიანაც კარგი.

მან კარი გამოაღო. ზარმა დაიწკარუნა. კაცი გარეთ გავიდა.

დიკი ერთხანს მილურსმწულივით გაუნძრევლად იდგა და მხოლოდ თვალებს აფახულებდა. გონს რომ მოეგო, კარისკენ გაქანდა, თედო დახლს მიარტყა, მაგრამ არც კი შეჭმუხნილა. საღამოსთვის ფეხი გვარიანად ჩაულურჯდებოდა, მაგრამ ახლა ვერაფერს გრძნობდა. მან გასაღები გადაატრიალა, ურდული გასწია და ვიტრინიდან გაიხედა. მაღაზიის წინ პატარა, წითელი, გასაცოდავებული „სუბარუ“ იდგა. ერთიანად ტალახში ამოსვრილი – როგორც ჩანს,



დიდი გზა გაველო და ერთხელაც არ გაერეცხათ. კაცმა ნავაჭრი მეორე ხელში გადაიტანა, კარი გააღო და საჭეს მიუჯდა.

„დროზე წადი, – ფიქრობდა დიკი, – გთხოვ, მისტერ, ღვთის გულისთვის, ჩქარა წადი აქედან“.

მაგრამ ის არ წასულა. რაღაც აიღო, – ალბათ, პური, – პაკეტი გახია, იქიდან რამდენიმე ნაჭერი ამოიღო, მაიონეზის ქილა გახსნა და თითოთ ზედ გადაუსვა. ეს რომ დაასრულა, თითები გულმოდგინედ გაილოკა, თვალები დახუჭა და თავი უკან გადასწია. ტურნებს ნეტარებით აცმაცუნებდა. მთელი სახე უბრწყინავდა. ექსტაზში იყო. შემდეგ ხორციან პაკეტს მიუბრუნდა, ერთ გირვანქამდე დაჭრილი ბეკონი პურის ნაჭერს დაატყეპა, ზევიდან მეორე ნაჭერი დააფარა და მგელივით დააცხრა სენდვიჩს. განცხრომის გამომეტყველება სახიდან, გურმანის სახიდან, ცხოვრებაში საუკეთესო სადილს რომ მიირთმევდა, წამით არ მოსცილებია. ყოველი ლუკმის გადაყლაპვისას ყელი ებერებოდა. პირველ სენდვიჩს სამ ლუკმაში მოულო ბოლო. როდესაც ხელი პურის მორიგი ნაჭრისკენ წაიღო, დიკ მაკკასკელს ტვინი ნეონის ნათურასავით გაუნათა აზრმა: „ასე უკეთესია. ცოცხალივითაა. ცივია, მაგრამ თითქმის ცოცხალი!“

დიკი კარს მოშორდა. ნელა მოძრაობდა. თითქოს წყალქვეშ იყო. დღის ნაცრისფერმა შუქმა შენობა გაავსო და ლუმინესცენციური ლამპების ნათება გადაფარა. უეცრად, ფეხები მოეკვეთა და სანამ ჭუჭყიანი ფიცრული იატაკი მისკენ წამოვიდოდა, ნაცრისფერი შავად იქცა.

## 21

როდესაც დიკი გონს მოვიდა, უკვე გვიან იყო. არ იცოდა, იატაკზე რამდენ ხანს ეგდო, რადგან ლუდის შესანახი მაცივრის თავზე „ბუდვაიზერის“ ელექტრონული საათი მხიარულად ციმციმებდა და 88:88-ს უჩვენებდა. ძირს სამი კბილი ეგდო, ალბათ, დაცემისას მოსტყდა. ზედა ტურისა და ნიკაპზე სისხლი შეხმობოდა. თმა ასწეწოდა.

ადგომა სცადა, მაგრამ ვერ მოახერხა და გულში ლოცვით კარისკენ გაფოფნდა. ღმერთს შეესმინა მისი ვედრება. პატარა, წითელი, ტუალეტის მსგავსი მანქანა აღარსად ჩანდა. მის ადგილას ბეკონის ცარიელი პაკეტი, სამ მეოთხედამდე დაცლილი მაიონეზის ქილა და ნახევარი პური ეგდო. ცნობისმოყვარე ყვავებს – წყალსაცავის სიახლოვეს ისინი დიდი ზომით გამოირჩეოდნენ – უკვე მიეგნოთ მისთვის და დახეული პაკეტიდან პურის ნაჭრებს იტაცებდნენ. მოშორებით, 32-ე გზის სიახლოვეს, კიდევ რამდენიმე ფრინველი გაყინულ ბეკონსა და ზედ მიკრულ პურის ნამცეცებს უმკლავდებოდა. ჩანს, მესიე გურმანს საუბმე არ შერგებია.

ღმერთო დიდებულო! – გაიფიქრა დიკმა, – იმედი მაქვს, ისე გაღებინა, რომ გულ-მუცელი ამოგიტრიალდა, შე...

უეცრად საკუთარი შიგნეულობა ისეთი ფანტასტიკური ძალით აუჯანყდა, რომ პირზე ხელის აფარება ძლივს მოასწრო. თვალწინ ადამიანის კბილების მკაფიო, მახინჯი გამოსახულება წარმოუდგა. პურის ნაჭრებს ორივე მხრიდან გადმოჰკიდებოდა ქონიანი ხორცი, ყავისფრად დაძარღვული, ნაცრისფერი, უმი ხორცი, რომელიც ცხენის ლემის მოჭრილ ენას ჰგავდა. დიკმა ხელაფარებული პირიდან ოღნავ დახშული ბუებუყი გამოსცა.

გარდაუვალი ღებინებისგან გზაზე გამოჩენილმა ავტომობილმა იხსნა. სწორედ ეს სჭირდებოდა – ნორმალური კლიენტი. მსუბუქი, სატვირთო ან სპორტული ავტომანქანა კი არ იყო, არამედ საშინელი, კამუფლაჟიანი, მწვანე და შავი ლაქებით მოხატული „ჰამერი“. წინ ორნი ისხდნენ, – ამაში დიკი თითქმის დარწმუნებული იყო, – უკან კი ერთი მოჩანდა.

დიკმა სასწრაფოდ გადაატრიალა კარზე ჩამოკიდებული დაფა, წარწერით „ლიაა“ და უკან დაიხია. როგორც იქნა, წამოდგომა მოახერხა, მაგრამ იგრძნო, რომ შესაძლოა, კვლავ გული წასვლოდა. შემამჩნიეს, ამას წყალი არ გაუვა, – გაიფიქრა მან, – ახლა შემოვლენ

და მკითხავენ, აქ რომ კაცი იყო, სად წავიდაო, იმიტომ, რომ მას მის-  
დევენ. მათ ის სჭირდებათ, ბეკონისსენდვიჩიანი კაცი. მეც ავდგები  
და ვეტყვი. მაინც მათქმევიწებენ. მერე კი მე...

ხელი მის დაუკითხავად მიუახლოვდა თვალებს. ორი თითი, რომ-  
ლებზეც მეორე სახსრამდე სისხლი შეხმოზოდა, საგრძნობლად უთ-  
რთოდა. დიკს მოეჩვენა, რომ ისინი მისკენ მუქარით მოიწევდა: „გა-  
მარჯობა, თვალებო, რას აკეთებთ? დატკბით, სანამ შეგიძლიათ,  
რადგან მალე მოგაკითხავთ“.

უკანა სავარძელზე მჯდომი თითქოს წინ გადაიხარა, მძლოლს რა-  
ღაც უთხრა და მანქანა წინ გაიჭრა. უკანა ბორბალმა წინა მძლოლის  
ნარწყევი ააშხეფა. „ჰამერი“ მობრუნდა, წამით შეყოვნდა და უერი-  
სა და კუეზინის მიმართულებით გაქანდა.

როგორც კი ბორცვს მიღმა გაუჩინარდა, დიკ მაკკასკელმა ამოის-  
ლუკუნა და დახლისკენ წალასლასდა (ბორძიკითა და ბარბაცით,  
მაგრამ საკუთარი ფეხებით). უეცრად იატაკზე სამი კბილი დაინახა.  
საკუთარი სამი კბილი. კიდევ იოლად გამოძვრა. ჰო, მცირე ფასად.  
შემდეგ შეჩერდა და დახლზე დადებულ სამ ერთდოლარიანს მიაშ-  
ტერდა. გასული დროის განმავლობაში მათ მოწითალო-ნარინჯის-  
ფერი ბუსუსებიანი ფენა გადაჰკვროდა.

## 22

– აქ აა! ზა ააძე, ოუენ!

ოუენი მე ვარ, – გაიფიქრა დაღლილმა ოუენ ანდერჰილმა, რო-  
მელსაც იმ დროისთვის უკვე საკმაოდ კარგად ესმოდა დადიტსის  
(თუ ერთხელ ყურს მიაჩვევდი, ეს არც ისე რთული იყო), – აქ არა!  
გზა განაგრძე!

მან 32-ე გზაზე გადაუხვია, დადიტსი კი სავარძლის ზურგს მოწ-  
ყვეტით მიეყრდნო და ხველა აუვარდა.

– შეხედე, – თქვა ჰენრიმ და ხელი გაიშვირა, – ხედავ?

ოუენმა დაინახა. წვიმაში დახეული პაკეტები სველდებოდა. და

მაიონების ქილა. მან სირქარეს მოუმატა და გეზი ჩრდილოეთისკენ აიღო. წვიმა განუწყვეტლივ ესხმებოდა საქარე მინას, თანაც – ისეთი ძალით, რომ მინასაწმენდებს მუშაობა უჭირდა. მალე, ალბათ, თოვსაც დაიწყებდა. დაღლილ-დაქანცული და ტელეპათიის უნარის შემცირებით რატომღაც დასევდიანებული ოუენი უეცრად მიხვდა, რომ ყველაზე მეტად ასეთ საზიზღარ დღეს არ სურდა სიკვდილი.

– ისევ შორს არის? – დაინტერესდა ოუენი, რომელმაც ვერ გაბედა, ყველაზე ბუნებრივი შეკითხვა დაესვა: „დავაგვიანეთ?“

ვარაუდობდა, რომ ჰენრი სიმართლეს ეტყოდა.

– იქ არის, – დაბნეულად მიუგო ჰენრიმ. იგი შეტრიალებულიყო და სველი ნაჭრით დადიტს სახეს უწმენდდა. დადიტსი მადლიერებით შესცქეროდა მას და გაღიმებას ცდილობდა. ნაცრისფერი ლოყები ოფლისგან უბრწყინავდა, თვალების გარშემო გაჩენილი შავი წრეები თანდათან ენოტივით უდიდებოდა.

– თუ იქ არის, აქეთ რატომ წამოვედით? – იკითხა ოუენმა. იგი „ჰამერს“ საათში სამოცდაათი მილის სირქარით მიაქროლებდა, რაც ძალიან საშიში იყო ღორღიანი ასფალტ-ბეტონის გზაზე, მაგრამ არჩევანი არ ჰქონდა.

– მეშინია, დადიტსმა ხაზი არ დაკარგოს, – მიუგო ჰენრიმ, – თუ ეს მოხდება...

დადიტსმა საცოდავად დაიკვნესა, ხელები მუცელზე წაივლო და მოიკუნტა. კვლავაც მუხლებზე მდგარმა ჰენრიმ გამხდარ კისერზე ხელი ფრთხილად გადაუსვა.

– დამშვიდდი, დადიტს, – თქვა მან, – დამშვიდდი, კარგად ხარ.

მაგრამ დადიტსი კარგად არ იყო და ეს ოუენმაც იცოდა და ჰენრიმაც. სიცხისგან გათანგული, სპაზმებისგან შეწუხებული, მიუხედავად „პრედნიზოლონის“ მეორე და „პერკოსეტის“ კიდევ ორი ტაბლეტისა, ყოველ დახველებზე სისხლიან ნახველს იღებდა. დადიტს ქვევლი ძალიან შორს იყო კარგად ყოფნისგან. თავს იმით ინუგეშებდნენ, რომ ჯოუნსისა და გრეის სიმბიოზსაც არაერთი სირთულის

დაძლევა უხდებოდა.

და ეს ყველაფერი ბეკონის გამო. მხოლოდ იმის იმედი ჰქონდათ, რომ მისტერ გრეის მცირე ხნით შეაყოვნებდნენ. ვერც კი წარმოიდგენდნენ, თუ ღორმუცელობა ასეთ გასაოცარ შედეგს გამოიღებდა. გასაკვირი არ იყო, რომ ჯოუნსის კუჭმა ვერ გაუძლო. მაღაზიასთან პირღებინების პირველი შადრევნის შემდეგ მისტერ გრეის კიდევ ორჯერ მოუხდა უეირისკენ მიმავალ გზაზე შეჩერება. ყოველ ჯერზე მანქანიდან გადმოუსვლელად თავს ფანჯარაში ჰყოფდა და, ლამის კრუნჩხვაში ჩავარდნილი, ბეკონის ნაჭრებს აფრქვევდა.

შემდეგ კუჭი აეშალა. მანქანა მე-9 გზაზე მდებარე ბენზინგასამართ სადგურ „მოზილთან“ გააჩერა და ძლივს მოასწრო კაცების საპირფარეშომდე მიღბენა. სადგურთან შემდეგი წარწერა მოჩანდა: „იაფი გაზი, სუფთა ტუალეტები“. იმ დროისთვის, როდესაც მისტერ გრეი იქიდან გამოვიდა, წარწერის მეორე ნახევარი სიმართლეს აღარ შეესაბამებოდა. ამჯერად, მისტერ გრეის არავინ მოუკლავს, რაც ჰენრიმ პლუსად მიიჩნია.

სანამ კუებისკენ გადაუხვევდა, მისტერ გრემი კიდევ ორჯერ დაამუხრუჭა, უახლოეს ბურქებს მიაკითხა და ჯოუნსის აჯანყებული შიგნეულობის განტვირთვა სცადა. ამასობაში, კოკისპირულ წვიმას სველი თოვლის უზარმაზარი ფანტელები ჩაენაცვლა.

გაცოფებული და გაბოროტებული მისტერ გრეი განუწყვეტლივ უღრენდა ჯოუნსის, განსაკუთრებით გაჩერებისას. რაღას არ აბრალებდა, ყველაფერში ჯოუნსი მიაჩნდა დამნაშავედ. ჯოუნსიმ გააბა იგი მახეში. მან არჩია, დაევიწყებინა შიმშილის გრძნობა და საოცარი ღორმუცელობა, რამაც ოთხი გირვანქა ბეკონის ორ წამში გადასანსვლისკენ უბიძგა და თითებიც გაალოკვინა.

ჰენრის არაერთხელ ენახა მსგავსი პაციენტები, რომლებიც ფაქტების ერთობლიობიდან იმას ირჩევდნენ, რაც აწყობდათ და ყველას ადანაშაულებდნენ, საკუთარი თავის გარდა. რაღაც გაგებით, მისტერ გრეი ბარი ნიუმენის ერთგვარი ორეული იყო.

როგორ გაადამიანურებულა, – გაიფიქრა ჰენრიმ, – საოცრად დამსგავსებია ადამიანს.

– რას გულისხმობდი, როდესაც თქვი, ის იქ არისო? – ჰკითხა ოუენმა.

– თვითონაც არ ვიცი. ისევ დამბლოკა. დადიტს, შენ გესმის ჯოუნსის?

დადიტსმა გაჭირვებით გაიღიმა და თავი დააქნია.

– ისერ ეიმ ენი კარტი აიო, – თქვა მან, – „მისტერ გრემ ჩვენი კარტი აილო“, – მაგრამ ეს სლენგის სიტყვასიტყვით თარგმანს უფრო ჰგავდა. დადიტსს სიტყვები არ ჰყოფნიდა იმის აღსაწერად, რაც სინამდვილეში მოხდა, მაგრამ მის ტვინში ისე კითხულობდა, როგორც გადაშლილ წიგნში. მისტერ გრემ ჯოუნსის ციხესიმაგრეში ვერ შეაღწია და კარტი ვერ მოიპარა, მაგრამ როგორღაც მოახერხა და მათზე ნახატები წაშალა.

– როგორ ხარ, დადიტს? – ჰკითხა ოუენმა და მას უკანა ხედვის სარკიდან გახედა.

– აად არ (“კარგად ვარ”), – მიუგო დადიტსმა და აცახცახდა. მუხლებზე ყვითელი კოლოფი და ყავისფერი პაკეტი ელო წამლებითა და ბაწრისგან გაკეთებული უცნაური აბლაბუდით. განიერი ლურჯი ქურთუკი ეცვა, მაგრამ მაინც კანკალებდა.

ძალიან სწრაფად გვტოვებს, – გაიფიქრა ოუენმა, როდესაც ჰენრი კვლავ ძველი მეგობრის სახის წმენდას შეუდგა.

უეცრად „ჰამერი“ მოსრიალდა და გზისპირისკენ, ანუ კატასტროფისკენ ცეკვა-ცეკვით წავიდა – ასე სწრაფად მოძრაობისას ავარია სამივე მათგანის დალუპვას ნიშნავდა. რომც გადარჩენილიყვნენ, მისტერ გრემის შეჩერების შანსი საბოლოოდ დასამარდებოდა, მაგრამ ოუენმა ამჯერადაც იმარჯვა და მანქანაზე კონტროლი აღიდგინა. ოუენმა, უნებურად, ქალაღდის პაკეტს გახედა და ფიქრებით კვლავ თოკისგან დამზადებულ აბლაბუდას დაუბრუნდა. „ბივერმა გამომიგზავნა. საშობაოდ. გასულ კვირას“.

ოუენის აზრით, ტელეპათიით ურთიერთობა იგივე იყო, რაც ბოთლში წერილის მოთავსება, თავის დაცობა და ოკეანეში გადაგდება. მაინც სცადა აზრის გაგზავნა, როგორც თვითონ ეგონა, დადიტის მიმართულებით: „ამას რას უწოდებ, შვილო?“

უეცრად მის თვალწინ დიდი დარბაზი გაჩნდა – სასტუმრო და სასადილო ოთახებისა და სამზარეულოს კომბინაცია. გამოყვანილ ფიჭვის ფიცრებზე ლაქი ბზინავდა, იატაკზე ნავაჰოს ხალიჩა ეფინა, კედელზე კი გობელენი ეკიდა: ერთი ციდა ინდიელი მონადირეები გარს შემოხვეოდნენ ნაცრისფერ ფიგურას, მრავალრიცხოვანი სუპერმარკეტების ტაბლოიდების გმირს, ტიპურ უცხოპლანეტელს. შორეულ კუთხეში ქვისსაკვამურიანი ბუხარი მოჩანდა, რომლის გვერდით მუხის სასადილო მაგიდა იდგა. ოუენს მზერა შუა კოჭზე ჩამოკიდებული, თოკისგან გამონასკვული აბლაბუდისთვის მიეპყრო (ეს არც იყო გასაკვირი, ის ხომ დადიტის მიერ გამოგზავნილი სურათის ცენტრში მდებარეობდა და საკუთარი, განსაკუთრებული ნათება ჰქონდა). აბლაბუდა დადიტის პაკეტში მოთავსებული ავგაროზის გადიდებულ ვარიანტს წარმოადგენდა და მისგან მხოლოდ ზომით განსხვავდებოდა.

ოუენს თვალები ცრემლებით აევსო. ასეთი ლამაზი ოთახი დედამიწის ზურგზე არსად ეგულებოდა. მან იგრძნო ეს, რადგან დადიტის ასე ფიქრობდა, დადიტის კი ასე იმიტომ ფიქრობდა, რომ აქ მისი მეგობრები ჩამოდიოდნენ და მას ისინი უყვარდა.

– სიზმართმჭერი ავგაროზი, – ჩაიჩურჩულა უკანა სავარძელში მჯდომმა მომაკვდავმა ადამიანმა და ეს სიტყვები იდეალურად გარკვევით წარმოთქვა.

ოუენმა თავი დაუქნია. ჰო, სიზმართმჭერი ავგაროზი.

„ეს შენ ხარ, – გაუგზავნა მან. იცოდა, რომ ჰენრი უსმენდა, მაგრამ ამას არად დაგიდევდათ. ეს შეტყობინება დადიტისთვის იყო, მხოლოდ დადიტისთვის, – სიზმართმჭერი შენ ხარ, ხომ ასეა? მათი სიზმართმჭერი. და ყოველთვის იყავი“.

სარკიდან გალიმებული დადიტსი იყურებოდა.

## 23

ისინი გასცდნენ საგზაო ნიშანს, რომელზეც ეწერა: „კუებიანის წყალსაცავი. 8 მილი. თევზაობა აკრძალულია. სერვისი არ არის. პიკნიკი დასაშვებია. ბილიკები გახსნილია. სეირნობა თქვენთვის პასუხისმგებლობით“.

ზედ სხვა წარწერებიც მოჩანდა, მაგრამ მანქანა საათში ოთხმოცი მილის სიჩქარით მოძრაობდა და ჰენრიმ წაკითხვა ვერ მოასწრო.

– ხომ არ არსებობს შანსი, რომ მანქანა გააჩეროს და გზა ფეხით განაგრძოს? – ჰკითხა მას ოუენმა.

– გულშიც არ გაივლო, – მიუგო ჰენრიმ, – თავქუდმოგლეჯით გარბის. იქნებ სადმე გაიჭედოს ან რამეს შეეჯახოს. მხოლოდ ეს თუ გვიშველის. ეს კი სავსებით შესაძლებელია. გარდა ამისა, დასუსტდა და სწრაფად ვეღარ მოქმედებს.

– შენ, ჰენრი? შენ კი შეგიძლია სწრაფად მოქმედება?

იმის გათვალისწინებით, რომ მთელი სხეული გაშეშებოდა, ფეხი კი სტკიოდა, ლოგიკური შეკითხვა იყო.

– თუკი შესაძლებლობა მომეცემა, ცდას არ დავაკლებ. ნებისმიერ შემთხვევაში, დადიტსი არ უნდა დაგვაგვიწყდეს. საეჭვოა, რომ ასეთ მომქანცველ სიარულს გაუძლოს.

„და საერთოდ სიარულს“, – აღარ დაამატა მან.

– კურცი, ფრედი და პერლმუტერი, ჰენრი. სად არიან ახლა ისინი?

ჰენრიმ ყურადღება მოიკრიბა. პერლმუტერს საკმაოდ კარგად გრძნობდა... და მის მუცელში მოკალათებულ გაუმაძღარ კაციჭამიასთანაც შეეძლო კავშირის დამყარება. ურჩხული რალაცით მისტერ გრეის აგონებდა, ისიც ბეკონის სამყაროში ცხოვრობდა. არჩიბალდ პერლმუტერი, ოდესღაც შეერთებული შტატების არმიის ოფიცერი, ბეკონად გადაქცეულიყო. ჰენრის იქ შეღწევა არ სურდა. იქ მხოლოდ



ძლიერ ტკივილსა და შიმშილს დაეუბნებინა.

– თხუთმეტი მილი, – თქვა მან, – იქნებ თორმეტიც. მაგრამ ამას მნიშვნელობა არ აქვს, ოუენ. ჩვენ მათ გადავასწრებთ. მთავარია, მოვახერხებთ თუ არა მისტერ გრეის შეპყრობას. ეჰ, ცოტა იღბალი არ გვაწყენდა. სულ ცოტა. ან დახმარება.

– და თუ შევიპყრობთ, ჰენრი? კვლავაც გმირები ვიქნებით?

ჰენრის დაღლილი სახე ღიმილმა გაუნათა:

– ვფიქრობ, უნდა ვცადოთ.

# თავი ოცდამეერთე

## მე-12 ქაბურღილი

### 1

მისტერ გრეის თითქმის სამი მილი ჰქონდა გავლილი „სუბარუთი“ ისტორიტიზე, – ჭუჭყიან, უსწორმასწორო ქუჩაზე, – როდესაც გამოგნესილი კულვერტის<sup>212</sup> სახით, მორიგ დაბრკოლებას გადაეყარა. იქამდე „სუბარუმი“ ვაჟკაცურად დასძლია რამდენიმე მილი გუდნოდაიკის ჩრდილოეთით, თუმცა ერთ ადგილას ხმის ჩამხშობი მოსძვრა, გამოსაბოლქვი მილიც ზედ მიჰყვა – ბედის ბოლო სიმუხთლეს ველარ გაუძლო, მანქანა ცხვირით შეიჭრა ნაპრალში და მიღზე დაჯდა. ხმის ჩამხშობის გარეშე დარჩენილი ძრავა საშინლად ღრიალებდა. ჯოუნსი წინ გადაქანდა. უსაფრთხოების ქამარი დიაფრაგმაზე დააწვა. გული აერია და ზედ ხელსაწყოების პანელზე აღებინა უსასოო ბავშვივით – მყარი არაფერი ამოუღია, მხოლოდ ნერწყვი და

---

<sup>212</sup> სადრენაჟო მილი.

ნალველი. წამით სამყარო ჩაქრა, ძრავის ღრიალმა შორს გადაინაცვლა. მისტერ გრეი გაშმაგებით ეწინააღმდეგებოდა, ეშინოდა, – ვაითუ, გონება დავკარგო და ჯოუნსიმ ძალაუფლება დაიბრუნოსო.

ძალმა დაიწკმუტუნა. თვალები კვლავ დახუჭული ჰქონდა, მაგრამ უკანა თათები ნერვიულად უცახცახებდა, ყურები უტოკავდა, მუცელი საშინლად გაჰბეროდა, ბალანი შიგადაშიგ ეჭავლებოდა. გადამწყვეტი წუთი ახლოვდებოდა.

თანდათან სამყაროს კვლავ დაუბრუნდა ფერები და რეალობაც აღდგა. მისტერ გრეიმ რამდენჯერმე ღრმად შეისუნთქა ავადმყოფი და გასაცოდავებული სხეულის გამოსაცოცხლებლად. ნეტა, კიდევ რამდენი ჰქონდა გასავლელი? მისი აზრით – ცოტა. ოღონდ, თუ მანქანას ვერაფერს მოუხერხებდა, ფეხით სიარული მოუწევდა. ძალლი ამას ვერ შეძლებდა. ლედს ახლა ისედაც ძილი ესაჭიროებოდა, ის კი, სადაცაა, ისევ გაიღვიძებდა.

მისტერ გრეი მისი რუდიმენტული ტვინის ძილის ცენტრს მოეფერა, თან ნერწყვით მოთხვრილ პირს იწმენდდა. მისი გონების ერთი ნაწილი აცნობიერებდა, რომ გამოკეტილი და დაბრმავებული ჯოუნსი მომენტს ელოდებოდა, თავს რომ დასხმოდა და ყველაფერი დაენგრია, რისთვისაც ასე თავდაუზოგავად იღვწოდა; მეორე ნაწილი კი, საოცარია, მაგრამ კვლავ ბეკონს ნატრობდა, სწორედ იმ საკვებს, რომელმაც ორგანიზმი მოუწამლა.

„იძინე, მეგობარო“, – ამშვიდებდა ძალღს. ბაირუსსაც. ორივე უსმენდა. ლედი გაყურდა. თათები აღარ უცახცახებდა. ბალანიც სულ უფრო შეუმჩნევლად ეჭავლებოდა, ბოლოს შეუწყდა კიდევც. ჯერჯერობით სიმშვიდე სუფევდა, მაგრამ ეს სიწყნარე დიდხანს არ გაგრძელდებოდა. არც ეს იყო ცუდი.

„დანებდი, დოროთი“.

– მოკეტე, – დაიღრინა მისტერ გრეიმ, – მაკოცე ტაკოში!

მან მანქანა უკან დაძრა და აქსელერატორს დააწვა. ძრავამ და-

იღმუვლა, მაგრამ მხოლოდ ახლომდებარე ხეებზე შემომსხდარი ჩიტები დააფრთხო. წინა ბორბლები არ იძვროდა, უკანა კი მაღლა აწეულიყო და ჰაერში სულელურად ტრიალებდა.

– ამის დედაც! .. – შეჰყვირა მისტერ გრეიმ და საჭეს ჯოუნსის მუშტი დასცხო, – დალახვროს ეშმაკმა, ბანანები! ბარემ მიხმარე, ფრედი!

მან გადაწყვიტა გაეგო, რამდენად მიუახლოვდნენ მღევრები, მაგრამ მკაფიო პასუხი ვერ მიიღო, იმას კი გრძნობდა, რომ ახლოს იყვნენ. ორი ჯგუფი მოსდევდა და ერთში, რომელიც, სადაცაა, დაეწეოდა, დადიტსი იმყოფებოდა. მისტერ გრეის ეშინოდა დადიტსის, ხვდებოდა, რომ ის იყო მთავარი მიზეზი იმისა, რომ შედარებით ადვილი დავალება თითქმის ჩააფლავა. თუკი დადიტსს ახლოს არ მოუშვებდა, ყველაფერს წარმატებით გაართმევდა თავს. ამაში იმის ცოდნაც დაეხმარებოდა, თუ რა მანძილი აშორებდათ მათ ერთმანეთისგან, მაგრამ დადიტსი, ჯოუნსი და ის, რომელსაც ჰენრი ერქვა, საიმედოდ ბლოკავდნენ მას და ისეთ ძალას წარმოადგენდნენ, როგორსაც მისტერ გრეი აქამდე არსად გადაჰყროდა. ამიტომაც ეშინოდა.

– ჯერ მაინც საკმაოდ წინ ვარ, – შეატყობინა ჰენრის და მანქანიდან გადმოვიდა. ფეხი დაუსხლტა და ბივერის სიტყვებით შეიგინა. შემდეგ კარი მიხურა. კვლავ წამოთოვა. უშველებელი ფიფქები ციდან კანფეტებივით ცვიოდა და ჯოუნსის ლოყებზე ადნებოდა. მისტერ გრეი საბარგულისკენ წალასლასდა, ბორძიკობდა და ტალახში ეფლობოდა. იქ ცოტა ხანს შედგა და არხიდან გამოჩრილი სადრენაჟო მილის მიჭექყილ ნარჩენს მიაჩერდა (ნაწილობრივ ისიც თავისი პატრონის ჯოჯოხეთური ცნობისმოყვარეობის მსხვერპლი გამხდარიყო), შემდეგ კი გამობრუნდა, – შენს ყველა დამპალ მეგობარს ცალი ხელით გავუმკლავდები.

ამ წაქეზებამ ჯოუნსის სიტყვა ვერ დააცდენინა, მაგრამ მისტერ გრეი მას ისევე გრძნობდა, როგორც სხვებს. მღუმარე ჯოუნსიც კი

ძვალივით გასჩხეროდა ყელში.

„არა უშავს. ჯანდაბას მისი თავი. მთავარი პრობლემა ძალღია. ბაირუსი სადაცაა გარეთ გამოვა. როგორ გადავიყვანო ძალღი?“

კვლავ ჯოუნსის მენსიერების საცავში ჩაყვინთა. თავიდან ვერაფერს მიაგნო... შემდეგ სცენა გამოჩნდა „საკვირაო სკოლიდან“, სადაც ჯოუნსი ბავშვობაში დაჰყავდათ, რათა „ღმერთისა“ და „ღმერთის მხოლოდშობილი შვილის“ შესახებ შეეცყო, მისტერ გრეის ცნობიერებაში იგი ბაირუსთან, ბაირუსის კულტურის შემქმნელთან ასოცირდებოდა, ჯოუნსის გონება კი, ერთდროულად, „ქრისტიანობასა“ და „აბდაუბდასთან“ აიგივებდა. სურათი მკაფიოდ ჩანდა და ალებული იყო წიგნიდან, რომელსაც „ბიბლია“ ერქვა. წიგნზე „ღვთის მხოლოდშობილ ძეს“ ბატკანი მიჰყავდა, მხრებზე მოეგდო, ბატკნის წინა ფეხები „მხოლოდშობილი ძის“ მარჯვენა მხარზე გადმოჰკიდებოდა, უკანა – მარცხენაზე.

სხვა რა გზა ჰქონდა, თვითონაც ასე მოიქცა.

მისტერ გრეიმ მძინარე ძალღი გამოიყვანა და მხრებზე შემოიღო. უკვე მძიმე იყო – ჯოუნსი კუნთებში იდიოტურ, აუტანელ სისუსტეს გრძნობდა – და დროსთან ერთად, კიდევ უფრო დამძიმდებოდა... მაინც ბოლომდე უნდა გაეძლო.

განშირებულ თოვაში ისტეტრიტს გაუყვა. მძინარე ბორდერ-კოლი კისერზე ბეწვის ყელსახვევივით შემოეხვია.

## 2

გზაზე დაფენილი თოვლი სწრაფად იყინებოდა და 32-ე გზაზე გასვლის შემდეგ ფრედი იძულებული გახდა, სიჩქარე საათში ორმოც მილამდე შეემცირებინა. კურცი გაშმაგებისგან ადგილს ვერ პოულობდა. ყველა სიკეთესთან ერთად, ნახევრად კომატოზურ მდგომარეობაში მყოფი პერლმუტერიც ხელიდან უსხლტებოდა. თანაც სწორედ მაშინ, როდესაც, დალახვროს ეშმაკმა, მოულოდნელად იმ არსების აზრებში შეაღწია, ვისაც ოუენი და მისი ახალი მეგობარი

ჰენრი მისტერ გრეის ეძახდნენ.

– იგი ძალზე დაკავებულია იმისათვის, რომ დამალვაზე იფიქროს,  
– ჩაილაპარაკა პერლიმ ნელა, ნამძინარევი ხმით, – მას ეშინია. ან-  
დერჰილის შესახებ ვერაფერს გეტყვით, ბოს, მაგრამ ჯოუნსი... ჰენ-  
რი... დადიტსი... მას იმ სამეულის ეშინია. და სწორიც არის, რომ ეში-  
ნია. მათ რიჩი მოკლეს.

– რიჩი ვინლაა, მეგობარო?

კურცს რიჩი სულ არ ადარდებდა, მაგრამ პერლმუტერის გამოფ-  
ხიზლება სურდა. ხვდებოდა, რომ ისინი იქით მიემართებოდნენ, სა-  
დაც პერლმუტერი მალე აღარ დასჭირდებოდა, მაგრამ ჯერ უნდა  
გამოეყენებინა.

– არ... ვიცი...

პერლმუტერმა ბოლო სიტყვას ხვრინვა მოაყოლა. „ჰამერი“ მო-  
ცურდა და რამდენიმე იარღზე გასრიალდა. ფრედიმ შეიკურთხა, სა-  
ჭეს ჩააფრინდა და მანქანის შეჩერება ზედ თხრილის პირზე მოახერ-  
ხა. კურცს ეს არც შეუმჩნევია. ის სავარძელზე გადაიხარა და პერ-  
ლმუტერს ლოყებში ერთი-ორჯერ შემოულაწუნა. ამ დროს სწორედ  
იმ მაღაზიას ჩაუარეს, რომლის ვიტრინაზე ეწერა: „საუკეთესო საჭ-  
მელი, შემოდი, რაღას ელოდები?“

– ე-ე-ე! – შეჰყვირა პერლიმ და თვალები გაახილა. თეთრი გარსი  
გაჰყვითლებოდა, მაგრამ კურცს, როგორც რიჩი, ესეც ფეხებზე ეკი-  
და, – არ გინდაათ, ბოს...

– ახლა სად არიან?

– წყალი, – ჩაიბურტყუნა პერლიმ ჭირვეული ავადმყოფის და-  
სუსტებული ხმით. პალტოს ქვეშ უზომოდ გაზრდილი მუცელი შე-  
ზანზარებულ მთას მიუგავდა.

მა ჯოული მეცხრე თვეში, ღმერთო, შენ დაგვიფარე და შეგვიწყა-  
ლე, – გაიფიქრა კურცმა.

– წყააა...

ქუთუთოები კვლავ დაეშვა. კურცმა ხელი შემოსარტყმელად ასწია.

– ეძინოს, – უთხრა ფრედიმ.

კურცმა შეხედა და წარბები ასწია.

– ალბათ წყალსაცავის თქმა უნდოდა. თუ ასეა, აღარაფერში გვჭირდება.

მანქანის კვალზე მიუთითა, რომელსაც იქ ცოტა ადრე გაეგლო. ჩამავებული ზოლები მკვეთრად ჩანდა ახალ თოვლზე.

– დღეს ამ გზაზე ჩვენ გარდა არავინაა, ბოს. არავინ.

– მადლობა ღმერთს, – კურცი სავარძლის საზურგეს მიეყრდნო, პისტოლეტი ამოიღო, შეათვალიერა და ისევ ბუდეში ჩააბრუნა, – რაღაც მინდა გკითხო, ფრედი.

– გისმენთ, ბოს.

– როდესაც ეს ყველაფერი დასრულდება, მექსიკაზე რას იტყვი?

– თანახმა ვარ. ოღონდ იმ პირობით, რომ აქაური წყლის დაღვევა არ მოგვიწევს.

კურცმა გადაიხარხარა და ფრედის მხარზე ხელი მოუთათუნა. ამასობაში არჩი პერლმუტერი სულ უფრო ღრმად იძინებდა კომაში. მისი მსხვილი ნაწლავის ყველაზე ქვედა ნაწილში, გადამუშავებული საკვების ნარჩენებსა და გაცვეთილ მკვდარ უჯრედებს შორის, რაღაც ქმნილებამ პირველად გაახილა თვალი.

### 3

იმ უზარმაზარი ტერიტორიის შესასვლელი, კუებინის წყალსაცავს რომ ერტყა, ორი ქვის სვეტით მოენიშნათ. იქით გზა საგრძნობლად ვიწროვდებოდა და მხოლოდ ერთი მანქანა თუ გაივლიდა. ჰენრიმ იგრძნო, რომ წრე დაარტყა და საწყის წერტილში დაბრუნდა. თითქოს მასაჩუსეტსში კი არა, მენში აღმოჩნდა, თუმცა ფირნიშზე გარკვევით ეწერა: „კუებინისკენ“. ისინი კვლავ ღიფქათროუდს მი-

უყვებოდნენ. მოცეკვავე შუქის დანახვის მოლოდინში, გაუცნობიერებლად ახედა ცას და თვალი მოჰკრა არწივს თავზე თეთრი ნიშნით, ის ისე დინჯად და დაბლა დაფრინავდა, რომ კაცი ხელითაც კი მისწვდებოდა. ფრინველი ფიჭვის ქვედა ტოტზე შემოფეხდა.

დადიტსმა ფანჯრის გრილ შუშას თავი მოაცილა და განაცხადა:

– ისერ ეი ფეთ იდის.

ჰენრის გული აუფანცქალდა.

– გაიგონე, ოუენ? მისტერ გრეი ფეხით მიდის.

– გავიგონე, – მიუგო ოუენმა, თავი დაუქნია და სიჩქარეს მოუმატა. სველი თოვლი ყინულზე არანაკლებ საშიში იყო, მაგრამ წყალსაცავისკენ მხოლოდ ერთი კვალი მიდიოდა.

ჩვენ მეორეს დაგტოვებთ, – გაიფიქრა ჰენრიმ, – თუ კურცი აქამდე მოაღწევს, ტელეპათია აღარ დასჭირდება.

დადიტსმა დაიკვნესა, მუცელზე ხელები მოიჭირა და შეკრთა.

– ენი, ავად ვარ. დადიტსი ავადაა.

ჰენრიმ დადიტსს შუბლზე ხელი მიაღო და დამდულრულივით უკან გამოსწია. მერე რა მოხდება? ალბათ, შეტევა დაეწყება. მისი დასუსტებული ორგანიზმი ძლიერ შეტევას ვერ გაუძლებს, თუმცა მხოლოდ ღმერთმა იცის, ასეთ მდგომარეობაში მისთვის რა ჯობს. გული ძალიან სწყდებოდა, რადგან თვითონ, ჰენრი დევლინი, პოტენციური თვითმკვლეელი იყო, წყვდიადს კი მისი საუკეთესო მეგობრები ერთიმეორეზე მიყოლებით მიჰყავდა.

– გამაგრდი, დადს. ყველაფერი მალე დამთავრდება.

თუმცა კარგად იცოდა, რომ წინ უარესი ელოდათ. დადიტსმა კვლავ გაახილა თვალი.

– ისერ ეი... აიედა.

– რაო? – იკითხა ოუენმა, – ვერ გავიგე.

– ამბობს, რომ მისტერ გრეი გაიჭედა, – თქვა ჰენრიმ, რომელიც დადიტსს კვლავ შუბლზე ეფერებოდა და მისი ოქროსფერი გრუზა თმა ახსენებოდა. დადიტსის შესანიშნავი ქერა თმა. მისი ტირილი



ბიჭებს ტანჯავდა, ტვინში ბლავგი სამართებელივით ერჭობოდა. სამაგიეროდ, სიცილი ჩუქნიდა ბედნიერ წუთებს – დადიტსის სიცილის გაგონებისთანავე თქვენც, თუნდაც ცოტა ხნით, კვლავ დაიჯერებდით ზღაპრებს, დაიჯერებდით, რომ სიცოცხლე მშვენიერია, რომ ბიჭებსა და კაცებს, გოგონებსა და ქალებს ცხოვრებაში რაღაც მიზანი აქვთ. რომ წყვილიადის გარდა სინათლაც არსებობს.

– რატომ პირდაპირ წყალსაცავში არ მოისვრის იმ წყეულ ძალსს, – იკითხა ოუენმა დაღლილობისგან ათრთოლებული ხმით, – რატომ აუჩემებია მე-12 ჭაბურღილი? იმიტომ, რომ რუსი ქალი იქ დაიხრჩო?

– ვფიქრობ, წყალსაცავი მისთვის საკმარისი არ არის, – მიუგო ჰენრიმ, – წყალსადაწნეო კოშკი კარგი იქნებოდა, მაგრამ აკვედუკი იდეალური საშუალებაა ასეთი მიზნისთვის. ეს იგივეა, რაც სამოცდახუთმილიანი ნაწლავები, მე-12 ჭაბურღილი კი ყელია. დადიტს, შევძლებთ მის დაჭერას?

დადიტსმა მას დაღლილი თვალებით შეხედა და თავი დაუქნია. უძლურებისგან გამწარებულმა ოუენმა ხელი თეძოზე შემოირტყა. დადიტსმა ტუჩები მოილოკა და ხრინწიანი ხმით ორი სიტყვა წარმოთქვა.

ოუენმა გაიგონა, მაგრამ ვერ მიხვდა.

– რაო? რა თქვა?

– მხოლოდ ჯოუნსიო.

– მერედა, ეს რას ნიშნავს? ჯოუნსი რა შუაშია?

– ვფიქრობ, მხოლოდ ჯოუნსის შეუძლია მისი შეჩერება.

„ჰამერმა“ კვლავ ბუქსაობა დაიწყო. ჰენრი სავარძელს ჩააფრინდა. დადიტსმა თითებში ხელი ჩაავლო და სასოწარკვეთილი მზერა მიაპყრო. რაღაცის თქმას ცდილობდა, მაგრამ კვლავ ხველა აუვარდა. საშინელ ხმებს გამოსცემდა. ტუჩებზე ღია წითელმა, თითქმის ვარდისფერმა, ბუშტუკებიანმა სისხლმა გამოჟონა. ჰენრიმ გაიფიქ-

რა, რომ ეს ფილტვებიდან წამოსული სისხლი იყო, მაგრამ ხველისგან გამოწვეული კანკალის მიუხედავად, დადიტს ხელი ისევ მაგრად ჰქონდა ჩავლებული ჰენრიზე.

– ჩემთვის იფიქრე, – სთხოვა ჰენრიმ, – შეგიძლია, ჩემთვის იფიქრო?

რამდენიმე წამის განმავლობაში არაფერი ხდებოდა, შემდეგ დადიტსმა გაყინული ხელი ძლიერად მოუჭირა ჰენრის და თვალის დაუხამხამებლად მიაშტერდა. მალე დადიტსი და „ჰამერის“ ხაკისფერი ინტერიერი მალულად მოწეული სიგარეტის სუნთან ერთად გაქრა.

ამის ნაცვლად ჰენრი ტელეფონს ხედავს – ძველმოდურ აპარატს სხვადასხვა ზომის ჭრილით: ერთი – თხუთმეტცენტისანისთვის, ერთი – დაიმისთვის<sup>213</sup>, სხვა – ნიკელისთვის<sup>214</sup>. განუწყვეტელი ჩხაკჩხუკის ფონზე მამაკაცების საოცრად ნაცნობი ხმები ისმის. უეცრად ხვდება, რომ ეს დაფაზე შაშის ქვების კაკუნია. იგი გოსლინის მალაზიის ტელეფონს ხედავს, სწორედ იმას, რომლისგანაც დადიტსს დაურეკეს რიჩი გრენადოს სიკვდილის შემდეგ. სიმართლე ითქვას, მხოლოდ ჯოუნსი რეკავდა, რადგან მხოლოდ მას ჰქონდა ნომერი, რომელზეც ანგარიშის გამოგზავნა შეიძლებოდა. დანარჩენები გარს შემოეხვივნენ; ქურთუკები არც კი გაუხდიათ, რადგან მალაზიაში ისევე ციოდა, როგორც გარეთ – მიუხედავად იმისა, რომ ტყეში ცხოვრობდა, სადაც ხეების მეტი არაფერი იყო, ძუნწი გოსლინი ღუმელში ერთ ზედმეტ შემის ნაპობსაც კი არ შეაგდებდა. აპარატთან ორი დაფაა გაკრული. ერთზე თხოვნაა, რომ ხუთ წუთზე მეტი არ ილაპარაკონ. მეორე...

გაისმა ღრჭიალი და დარტყმის ხმა. დადიტსი ჰენრის სავარძლის საზურგისკენ გადავარდა, ჰენრი კი ცხვირით – პანელისკენ. ერთმანეთს ხელები გაუშვეს. ოუენი გზიდან თხრილში გადავიდა. წინ, თოვლში, შავად მოჩანდა „სუბარუს“ კვალი.

---

<sup>213</sup> ატცენტისანი მონეტა აშშ-ში.

<sup>214</sup> ხუთცენტისანი მონეტა აშშ-ში.

– ჰენრი! კარგად ხარ?

– კი. შენ, დადს? კარგად ხარ?

დადიტსმა თავი დაუქნია, მაგრამ მირტყმული ლოყა საოცარი სისწრაფით უშავდებოდა. თქვენი ლეიკემია თქვენ მაგივრად მუშაობს.

ოუენმა მანქანა პირველ სიჩქარეში ჩააგდო და ფრთხილად დაიწყო ამოსვლა. „ჰამერი“ გზისკენ სახიფათო, ოცდაათგრადუსიანი კუთხით იდგა, მაგრამ საკმაოდ სწრაფად დაემორჩილა მძღოლს და, მომხდარის გათვალისწინებით, თავშეკავებით იქცეოდა.

– უსაფრთხოების ღვედები ჩაამაგრე, ჯერ დადიტსის.

– იგი ცდილობდა ჩემთვის ეთქვა, რომ...

– ფეხებზე მკიდია, რისი თქმა უნდოდა. ამჯერად გადავრჩით, მაგრამ შემდეგ ჯერზე შესაძლოა ამოვიყრავდეთ კიდეც. ჯერ მისი ღვედი დაამაგრე, მერე – შენი.

ჰენრი უსიტყვოდ დაემორჩილა, თან, მეორე ფირფიტაზე გაკეთებული წარწერის გახსენებას ცდილობდა. რა თქვა? რაღაც ჯოუნსის შესახებ. მხოლოდ ჯოუნსის შეუძლია მისტერ გრეის შეჩერება – ეს დადიტსის სახარებაა.

რა ეწერა მეორე ფირფიტაზე?

#### 4

ოუენი იძულებული გახდა, სიჩქარე საათში ოც მილამდე შეემცილებინა. ლამის გაგიჟებულიყო, ასე რომ მიბობლავდა, მაგრამ ისე გამალებით თოვდა, რომ ხილვადობა ნულს გაუტოლდა.

სწორედ მაშინ, როდესაც „სუბარუს“ კვალი საბოლოოდ გაქრა, ისინი თხრილში ცხვირით შერჭობილ მანქანას წააწყდნენ. ერთი კარი ღია იყო, უკანა ბორბლები ჰაერში ეკიდა.

ოუენმა ფეხი ავარიულ მუხრუჭს დააჭირა, „გლოკი“<sup>215</sup> ამოიღო და კარი გააღო.

– აქ დარჩი, ჰენრი, – თქვა მან, ძირს ჩახტა, „სუბარუსკენ“ გაიქცა

<sup>215</sup> ავსტრიული წარმოების პისტოლეტის სახეობა.

და დაიხარა.

ჰენრიმ ღვედი შეიხსნა და სავარძელზე გადაწოლილი დადიტისისკენ შეტრიალდა. დადი მიძიმედ სუნთქავდა. ვერტიკალურ მდგომარეობაში მას მხოლოდ ღვედი იჭერდა. ცალი ლოყა ცვილივით გაჰყვითლებოდა, მეორე გვარიანად ჩალურჯებოდა. ცხვირიდან კვლავ სისხლი მოსდიოდა, ბამბაში აღწევდა და ქურთუკზე ეწვეთებოდა.

– დადს, ძალიან ვწუხვარ, – ჩაიჩურჩულა მან, – მაგარ ხათაბალაში გავვებით.

დადიტსმა თავი დაუქნია და ხელები ასწია. ასე მხოლოდ რამდენიმე წამი გააჩერა, მაგრამ ჰენრი ყველაფერს მიხვდა. მან კარი გააღო და სწორად ჩავიდა, ამ დროს ოუენმა მიირბინა, გზად „გლოკს“ იტენიდა ქამარში. ძალიან ძლიერად თოვდა, ლამის ხელისგულისოდენა ფანტელები ცვიოდა. ისეთი შთაბეჭდილება რჩებოდა, თითქოს ჰაერი გამქრალიყო და მის ნაცვლად ფილტვებში თოვლი ხვდებოდა.

– მე ვთქვი, სადაც ხართ, იქ დარჩით-მეთქი, – გამოსცრა ოუენმა.

– მასთან გადაჯდომას ვაპირებდი.

– რატომ?

ჰენრიმ საკმაოდ მშვიდად უპასუხა, თუმცა ხმა ოდნავ უთრთოდა.

– იმიტომ, რომ კვდება, – თქვა მან, – ის კვდება, მაგრამ ვფიქრობ, რალაცას კიდეც მეტყვის.

## 5

ოუენმა უკანა ხედვის სარკეში ჩაიხედა, დაინახა, რომ ჰენრი დადიტსს მხრებზე მოხვეოდა, დარწმუნდა, რომ უსაფრთხოების ღვედი ორივეს ეკეთა და თვითონაც დაიმაგრა.

– მაგრად გეჭიროს, – თქვა მან, – ახლა ჯოჯოხეთური რყევა დაიწყება.

მან „ჰამერი“ უკან დაძრა, პირველ სიჩქარეში ჩააგდო და კუს ნაბიჯებით წაიყვანა, ცდილობდა, მიტოვებული „სუბარუსთვის“ მარჯვნიდან შემოეველო, იქ ნაპრალი უფრო ვიწრო ჩანდა.

ეს მართლაც ჯოჯოხეთური რყევა იყო. ოუენს უსაფრთხოების დვედი შეკრული ჰქონდა. დაინახა, როგორ უმწეოდ ყანყალებდა დადიტსის სხეული ჰენრის ხელში, მოტვლეპილი თავი კი მის მკერდს ეხეთქებოდა. მაგრამ მათ მშვიდობიანად გაიარეს ნაპრაღი და ახღა ისტსტრიტს მიუყვებოდნენ. ოუენი გზის თეთრ ლენტზე ფეხსაცმლის დატოვებულ, სანახევროდ თოვლით ამოვსებულ ნაკვალევს ხედავდა. მისტერ გრეი ფეხით მიდიოდა, ისინი – კვღავაც მანქანით. ოღონდ კი მოესწროთ იმ არამზადის დაჭერა, სანამ ის ტყეში შევიღოდა. ვერ მოასწრეს.

## 6

უკანასკნელი არაადამიანური ძალისხმევით დადიტსმა თავი წამოსწია და შეძრწუნებულმა ჰენრიმ დაინახა, რომ მას თვალეზიც ჩასისხლიანებოდა.

ნი, ნი-ნი. მოხუცების ხრინწიანი ჩაცინება – ვიღაცამ ზღაპრული სამმაგი ნახტომის გაკეთება მოახერხა. თვალთახედვის არეში კვღავ ტელეფონი და მის ზემოთ მოთავსებული ფირფიტები მოცურდა.

– არა, დადიტს, – ჩაიჩურჩულა ჰენრიმ, – არ გინდა. ძალას ნუ დახარჯავ.

მაგრამ რისთვის? რისთვის შეინახოს, თუ არა ამისთვის?

წარწერა მარცხენა ფირფიტაზე: „გთხოვთ, ხუთ წუთზე დიდხანს არ იღაპარაკოთ“. თამბაქოს, დამწვარი შეშის, მჟავე კიტრის სუნი. მხარზე მეგობრის ხელი.

და წარწერა მარჯვენა ფირფიტაზე: „ახღავე დაურეკე ჯოუნსის“.

– დადიტს...

მისი ხმა სიბნელეს ერწყმის. წყვდიადი, მისი ძველი მეგობარი.

– დადიტს, არ ვიცი, როგორ.

უკანასკნელად აღწევს მის ყურამდე დადიტსის ხმა – საოცრად დაქანცული, მაგრამ მშვიდი:

„ჩქარა, ჰენრი... ცოტა ხანს კიდევ გავძლებ... შენ მას უნდა და-  
ვლაპარაკო“.

ჰენრი ტელეფონის ყურმილს იღებს. არ ასვენებს სულელური აზ-  
რი (განა მთელი ეს ვითარებაც სულელური არაა?), რომ ხურდა ფუ-  
ლი არა აქვს, ერთი გროშიც კი. ყურმილი ყურთან მიაქვს.

და რობერტა ქვევლის უსიცოცხლო, საქმიანი ხმა ჩაესმის:

– მასაჩუსეტსის საავადმყოფოა, ვისთან შეგაერთოთ?

## 7

მისტერ გრეი ჯოუნსის სხეულს წყალსაცავის აღმოსავლეთ ნაპი-  
რის გასწვრივ, ბილიკზე მიათრევდა იმ ადგილიდან, სადაც ის-  
ტორიტი მთავრდებოდა. ფეხი უსხლტოდა, ეცემოდა, ტოტებს ებ-  
ლაუჭებოდა, კვლავ დგებოდა. ჯოუნსის მუხლები დალილავებოდა.  
ჯინსი გახეოდა და სისხლით მოთხვროდა. ფილტვები საშინლად ეწ-  
ვოდა, გული ნეკნებში სცემდა, მაგრამ ყველაზე მეტად თეძო სტან-  
ჯავდა, რომელიც შეჯახებისას დაუზიანდა. მოტეხილობის ადგილი  
გავარვარებულ, მფეთქავ ბურთულად გადაქცეოდა, საიდანაც ტკი-  
ვილის ისრები მიფრინავდა და ფეხსა და ზურგში ერჭობოდა. ეს წყე-  
ული ძალლიც ყოველი ნაბიჯის გადადგმაზე სულ უფრო მძიმდებო-  
და. მართალია, ჯერაც ეძინა, მაგრამ მასში ჩაბუდებული ქმნილება  
ვერ ისვენებდა და მას მხოლოდ მისტერ გრეის ნებისყოფა თუ აკა-  
ვებდა. ერთხელ, მორიგი დაცემისა და ადგომის შემდეგ, თეძო ველარ  
დაიმორჩილა და იძულებული გახდა, ხელთათმანწამოცმული ჯოუნ-  
სის მუშტები ერტყა. კიდევ ბევრი რჩებოდა? კიდევ დიდხანს უნდა  
ევლო ამ წყეულ, სულის შემხუთავ, დამაბრმავებელ, გადაუღებელ  
თოვაში? ჯოუნსი რას გეგმავდა? რალაცას? მისტერ გრეი წამითაც  
ვერ ბედავდა, გარეთ გამოეშვა ბაირუსის მტანჯველი შიმშილის  
გრძნობა, ამიტომ ლაპარაკიც ზედმეტი იყო, წამით მაინც მოედუნე-  
ბინა ყურადღება, დაკეტილ კართან მისულიყო და ყურს უგდებდა.

წინ ბუნდოვანი სილუეტი გამოჩნდა. აქოშინებულმა მისტერ გრემიმ ნაბიჯი შეანელა, სითეთრეს ჩააშტერდა და გზა ძველებურად განაგრძო. ძაღლის მოქანავე თათები ხელით ეჭირა, ჯოუნსის მარჯვენა ფეხს გაჭირვებით მიათრევდა.

თვალი ბოძზე მიკრულ დაფას მოჰკრა, ზედ ეწერა: „ჭაბურღილის სიახლოვეს თევზაობა აკრძალულია“.

დაფიდან ორმოცდაათ იარღში ქვის საფეხურები იწყებოდა. ექვსი... არა, რვა. ზემოთ, ქვის საძირკველზე აშენებული ქვის შენობა აღმართულიყო, რომელიც მოთეთრო-მონაცრისფრო სივრცეში გადადიოდა, იქ წყალსაცავი მდებარეობდა – ჯოუნსის ქვაზე მიხეთქებული წყლის ტყლაშუნი ესმოდა, წყლის ხმაური მისი გულის აჩქარებულ, დაძაბულ ფეთქვასაც კი ახშობდა.

მან მიაღწია იმ ადგილს.

მისტერ გრემიმ ძაღლის თათებს ხელი მოუჭირა, ჯოუნსის უკანასკნელი ძალა მოიკრიბა და დათოვლილ საფეხურებს აუყვა.

## 8

გასცდნენ თუ არა ქვის სვეტებს, საიდანაც წყალსაცავი იწყებოდა, კურცმა თქვა:

– გზის პირას შეაჩერე, ფრედი.

ფრედიმ ზედმეტი შეკითხვების გარეშე შეასრულა ბრძანება.

– შენი „ავტო“ სად არის, ყმაწვილო?

ფრედიმ შაშხანა ასწია – ძველი, ბებერი M-16, გამოცდილი და საიმედო. კურცმა თავი დაუქნია.

– პისტოლეტი?

– „მაგნუმ-44“, ბოს.

თვითონ კურცს ახლო ბრძოლისთვის საუკეთესო ცხრამილიმეტრიანი ჰქონდა. ახლა სურდა, მიბჯენით გაესროლა და ენახა, თუ რა ფერის იყო ოუენ ანდერჰილის ტვინი.

– ფრედი?

– დიახ, ბოს.

– მინდა, ერთი რამ იცოდე: ეს ჩემი უკანასკნელი დავალებაა და უკეთეს პარტნიორს ვერც ვინატრებდი.

იგი წინ გადაიხარა და მხარზე ხელი დაადო ფრედის. გვერდით პერლმუტერი ხვრინავდა. ჯოდის სახე ჭერისკენ მიემართა. ხუთი წუთით ადრე, სანამ ქვის სვეტებს გასცდებოდნენ, მან კვლავ გაავსო კაბინა უსაზიზღრესი არომატით, რის შემდეგაც მუცელი, მაღლობა ღმერთს, დაუპატარავდა. კურცის აზრით, უკანასკნელად.

ფრედის თვალები მაღლიერებით გაუბრწყინდა. კურცი კმაყოფილი იყო. როგორც ჩანს, ფორმა ჯერ არ დაეკარგა.

– კარგი, მეგობარო, – თქვა კურცმა, – აბა, წინ სრული სიჩქარით და ჯანდაბას ტორპედოები. ასეა?

– ასეა, სერ.

კურცმა მიმართვა „სერ“, არსებულ ვითარებაში, სავსებით მისაღებად მიიჩნია. ბოლოს და ბოლოს, ის ოპერაცია დასრულდა, თუმცა უსახელოდ. ახლა საკუთარ თავს ეკუთვნოდნენ, როგორც სამოქალაქო ომის უკანასკნელი პარტიზანები, დასავლეთ მასაჩუსეტისის ველეებზე მონავარდე თავზე ხელაღებული ჯეიჰოკერები<sup>216</sup>.

ფრედი ზიზლით შეიჭმუნა და პერლმუტერს თითი მიადო.

– ხომ არ გავალვიძო, სერ? ჭკუა კი დაკარგა, მაგრამ...

– ზედმეტი თავის ტკივილი რაში გვჭირდება? – ჰკითხა კურცმა და ისე, რომ ფრედის მხრიდან ხელი არ აუღია, საქარე ფანჯრისკენ მიუთითა, რომლის მიღმა ვიწრო გზა თოვლის საბურველში იკარგებოდა. წყეული თოვლი სიკვდილივით ყველგან თან სდევდათ, ოღონდ შავი მოსასხამი თეთრით შეეცვალა. „სუბარუს“ კვალი აღარ ჩანდა, სამაგიეროდ, ოუენის მიერ მოპარული „ჰამერის“ ბორბლების ანაბეჭდი ჯერ არ გამქრალიყო. თუკი მკვირცხლად ივლიდნენ, დიდება უფალს, მიზნის მიღწევა პარკში გასეირნებაზე რთული არ აღმოჩნდებოდა.

---

<sup>216</sup> კანზასელი პარტიზანები სამოქალაქო ომის დროს



– ვფიქრობ, ის აღარაფერში გვჭირდება, რაც უდიდეს შვებად მი-  
მაჩნია. მიდი, ფრედი. მიდი.

„ჰამერმა“ კული გაიქნია, მაგრამ მაშინვე გასწორდა. კურცმა პის-  
ტოლეტი ამოიღო და ფეხზე მიიღო. „შენკენ მოვდივარ, ოუენ. შენ-  
კენ, მეგობარო. ღმერთისთვის მიმართვა გაამზადე, რადგან საათზე  
მეტი ხნის სიცოცხლე აღარ დაგრჩენია“.

## 9

ოფისი, რომელიც ასე გულმოდგინედ მოეწყო ტვინსა და მესხიე-  
რებაში ქექვის შედეგად, მის თვალწინ ინგრეოდა.

ჯოუნსი წინ და უკან დაქროდა, ოთახს ათვალიერებდა, მოკუმუ-  
ლი ტუჩები გასთეთრებოდა. მიუხედავად იმისა, რომ საშინლად ცი-  
ოდა, შუბლი გაოფლიანებოდა.

ეს ჯოუნსის ოფისის დაცემა იყო და ძალიან ჰგავდა „აშერების  
სახლის დაცემას“<sup>217</sup>. მის ქვემოთ ღუმელი ისე ხმამაღლა ღმუოდა და  
ტკრციალებდა, რომ იატაკიც კი ააცახცახა. თეთრი ფხვნილი, ალბათ  
თოვლის კრისტალები, ვენტილაციის გავლით კედელზე ფუმფულა  
სამკუთხედს ქმნიდა. სადაც კი ხის პანელს შეეხებოდა, იქ ნაკაწრი  
და ობი ჩნდებოდა. სურათები იატაკზე ერთიმეორის მიყოლებით ისე  
ცვიოდა, როგორც თვითმკვლელები ცვივიან სახურავებიდან. სკამი,  
რომელსაც ყოველთვის ნატრობდა, უხილავი ნაჯახით ორად გაიხ-  
ლიჩა. წითელი ხის პანელები დასკდა და შემოდგომის ფოთლებივით  
ჩამოცვივდა. მაგიდის უჯრები რახარუხით დაეხეთქა ძირს. მისტერ  
გრეის მიერ დაყენებული დარაბები ისე ცახცახებდა, ჯოუნსის ლამის  
კბილები ასტკივდა.

მისტერ გრეის დაძახებას და კითხვას, თუ რა ხდებოდა, აზრი არ  
ჰქონდა... გარდა ამისა, ჯოუნსი საჭირო ინფორმაციას სრულად  
ფლობდა. მან შეაჩერა მისტერ გრეი, მაგრამ ამ უკანასკნელმა გაბე-

---

<sup>217</sup> ედგარ ალან პოს მოთხრობა.

დულად მიიღო მისი გამოწვევა და იმარჯვებდა კიდევ. ბრავო მისტერ გრეის, რომელმაც ან უკვე მიაღწია მიზანს, ან საცაა მიაღწევდა.

ჩამოცვნილი პანელის ქვეშ ჭუჭყიანი ბათქაში გამოჩნდა. სწორედ ასეთი იყო „ძმები თრექერების“ კედლები 1978 წელს, როდესაც ოთხი მეგობარი შუბლებით ფანჯარას მიჰკროდა, მათი ახალი მეგობარი კი მორჩილად ელოდებოდა მათ დაბლა, სანამ ცნობისმოყვარეობას არ დაიკმაყოფილებდნენ და შინ არ წაიყვანდნენ.

კიდევ ერთი პანელი ჩამოვარდა ძირს ქალაქის ფხრეწვით და განცხადებების დაფა გამოაჩინა, რომელზეც ერთადერთი ფოტოსურათი, პოლაროიდი იყო მიმაგრებული. მასზე სილამაზის დედოფალს, თინა ჯინ შლოსინგერს კი არ წამოეხადა კაბა ტრუსამდე, არამედ ვიღაც უცნობ, სულელური გამომეტყველების ქალს. მშვენიერი ხალიჩა თვალის დახამხამებაში მოიჭმუჭნა და ქვემოდან დაფხაჭნილი მეტლახის ფილებმა გამოიხედა. აქა-იქ პოლაროიდული, გულგრილი გამომეტყველების ქალის – იგი არაფრისმთქმელი წარსულის არტეფაქტი იყო და სხვა არაფერი – „თანდასწრებით“ საჟიმოდ მოსული წყვილების დატოვებული, ნახმარი პრეზერვატივები ეყარა.

ჯოუნსი აქეთ-იქით კოჭლობით აწყდებოდა, ავარიის შემდეგ ფეხს ასე ძლიერ ჯერ არასდროს შეუწუხებია. ყველაფერს ხვდებოდა – უნდა შეჰკუებოდა და დაეჯერებინა. თეძოში, თითქოს, ხიჭვები და შუშის ნამსხვრევები ჩაურჭვეს, კისერი და მხრები დაუბუჟდა და უჩვეულო სიმძიმისგან ასტკივდა. მისტერ გრეიმ გადაწყვიტა, მისი სხეულისთვის ქანცი გაეწყვიტა, სიკვდილის პირას მიეყვანა და მსხვერპლად შეეწირა, ჯოუნსი კი ამას ვერაფრით შეეწინააღმდეგებოდა.

ერთადერთი, რაც არ დაზიანდა, სიზმართმჭერი ავგაროზი იყო. იგი სახიფათოდ ირწეოდა და ჰაერში გიგანტურ წრეებს ხაზავდა, მაგრამ ჩამოვარდნას არც კი ფიქრობდა. ჯოუნსი მას მიაშტერდა. არა, არ სურდა ამ აყროლებულ ოფისში სიკვდილი. მის კედლებს

მიღმა ოდესღაც კეთილ საქმეებს აკეთებდნენ, თითქმის კეთილშობილურად იქცეოდნენ. ახლა კი განცხადებების დაფაზე მიკრულ ფოტოსურათზე გამოსახული ქალის გულგრილი, დამტვერილი მზერის თანდასწრებით უნდა ჩაძაღლებულიყო. ეს უსამართლობად მიაჩნდა. ფეხებზე ეკიდა დანარჩენი სამყარო, მაგრამ იგი, მასაჩუსეტსელი, ბრუკლინელი გარი ჯოუნსი, ერთ დროს მენის შტატის ქალაქ დერიში რომ ცხოვრობდა, უკეთეს ბედს იმსახურებდა.

– გთხოვთ, ამაზე უკეთესი ხვედრი მარჯუნეთ! – ასძახა მან ჰაერში მოცეკვავე აბლაბუდას. სწორედ ამ დროს მაგიდაზე, რომელიც მის თვალწინ იღეწებოდა, ტელეფონი აწკარუნდა.

ჯოუნსი მკვეთრად შეტრიალდა. თეძოში საშინელი ტკივილისგან კბილები დაადრჭიალა. ტელეფონი, ცისფერი ტრიმლაინი, რომელზეც ჰენრიმ მოასწრო და დაურეკა, სადღაც გამქრალიყო, მის ადგილას, დამსკდარ მაგიდაზე, ძველმოდური, შავი აპარატი იდგა, ღილაკების ნაცვლად თითით დასატრიალებელი დისკი ჰქონდა, ზედ მიკრულ სტიკერზე კი ეწერა: „ღმერთმა ძალა მოგცეს“. ეს სწორედ ის ტელეფონი იყო, რომელიც მშობლებმა დაბადების დღეზე აჩუქეს. 949-7784 – ნომერი, რომელზეც დადიტსთან საუბრის ანგარიში გადმოუგზავნეს მრავალი წლის წინ.

ჯოუნსიმ თეძოს ტკივილს ყურადღება არ მიაქცია და აპარატისკენ გავარდა. ღმერთს ევედრებოდა, ყურმილის ალებამდე ხაზი არ გაეთიშათ.

– ალო! ალო! – ყვიროდა იგი და აცახცახებულ იატაკზე თავის შეკავებას ცდილობდა. ოფისი ძლიერ ლელვაში მოხვედრილი გემივით ქანაობდა.

ყველაფერს მოელოდა, მაგრამ არა რობერტას ხმის გაგონებას:

– დიახ, ექიმო, ახლავე დაგალაპარაკებთ.

ისეთი მკვეთრი ჩხაკუნი გაისმა, რომ ჯოუნსი შეიჭმუნა. შემდეგ სიჩუმე ჩამოვარდა. ჯოუნსიმ დაიკვნესა და უკვე ყურმილის დადებას აპირებდა, როდესაც რაღაც კიდევ გაჩხაკუნდა.

– ჯოუნსი?

ეს ჰენრი იყო! ძლივს ისმოდა, მაგრამ ჰენრის ხმა იყო!

– სად ხარ? – შესძახა ჯოუნსიმ. ღმერთო ჩემო, ჰენრი, ეს ადგილი ინგრევა! მეც ნაწილ-ნაწილ დავიშლები!

– გოსლინის მალაზიაში ვარ, – თქვა ჰენრიმ, – ოღონდ არც ვარ. იცოდე, რომ სადაც უნდა იყო, იქ არც შენ ხარ. ჩვენ საავადმყოფოში ვართ, სადაც ავარიის შემდეგ მიგიყვანეს...

გაისმა ტკაცატკუცი, ზუზუნის, ხმაური, შემდეგ კი – ისევ ჰენრის ხმა, გაცილებით ახლოს და ხმამალლა. ერთადერთი ნათელი წერტილი იმ არეულ-დარეულობაში... მაგრამ არც იქ იყო!

– რაო?

– ჩვენ სიზმართმჭერში ვართ, ჯოუნსი! სიზმართმჭერში ვართ და ყოველთვის იქ ვიყავით! ჯერ კიდევ 78 წლიდან! სიზმართმჭერი – დადიტსია, ოღონდ ის კვდება. უკანასკნელ ძალ-ღონეს იკრებს, მაგრამ არ ვიცი, კიდევ რამდენ ხანს...

ისევ ტკაცუნის ზუზუნის თანხლებით, მჩხვლეტავი და დამუხტული.

– ჰენრი! ჰენრი!

– ... გამოდი! – ჰენრის ხმა კვლავ ძლივს ისმის, ოღონდ სასოწარკვეთილია.

– უნდა გამოხვიდე, ჯოუნსი! ჩემს შესახვედრად! სიზმართმჭერს სირბილით გამოჰყევი ჩემკენ! დრო კიდევ გვაქვს! კიდევ შეგვიძლია იმ ბოზისშვილის დაჭერა! გესმის? ჩვენ შეგვიძლია...

მორიგი ტკაცუნის და კავშირი გაწყდა. საბავშვო ტელეფონის კორპუსი გაიბზარა, დაიშალა და უთავბოლოდ არეული სადენები გადმონათხია. ყველა ნარინჯისფერი და ყველა ბაიურუსით დაინფიცირებული.

ჯოუნსიმ აპარატი დააგდო და თვალები მოქანავე სიზმართმჭერ ავგაროზს, იმ ეფემერულ აბლაბუდას მიაპყრო. გაახსენდა ფრაზა,

რომელიც ერთი კომიკოსის რეპერტუარიდან გადმოიღეს და ბავშვობაში ძალიან უყვარდათ: „სადაც ხარ, სწორედ იქ ხარ“. თავდაპირველად, მან კიდევ გადაფარა „ახალი დღე, იგივე ნაგავი“ და, შესაძლოა, პირველ ადგილზეც გადაინაცვლა მას შემდეგ, რაც წამოიზარდნენ და თავი ყოვლისმცოდნეებად, გამოცდილ ადამიანებად მიაჩნდათ. სადაც ხარ, სწორედ იქ ხარ. ოღონდ, ჰენრის ახლანდელი ნათქვამის მიხედვით, ეს სიმართლე არ იყო. სადაც, მათი აზრით, იყვნენ, სინამდვილეში იქ არ იყვნენ.

ისინი სიზმართმჭერში იმყოფებოდნენ.

ჯოუნსიმ კვლავ ზევით აიხედა და შეამჩნია, რომ სიზმართმჭერის ცენტრიდან ოთხი ძირითადი ჩხირი მოდიოდა, რომლებიც აბლაბუდის დანარჩენ განივ ძაფებს იჭერდა. მთავარი მაინც ცენტრი იყო – ბირთვი, სადაც ყველა თავს იყრიდა და ერთიანდებოდა.

„სიზმართმჭერს სირბილით გამოჰყევი ჩემკენ! დრო კიდევ გვაქვს!“

ჯოუნსი შეტრიალდა და კარისკენ გაქანდა.

## 10

მისტერ გრეიც კართან იდგა, ოღონდ იმ კართან, საიდანაც ჭაბურღილის შენობა იწყებოდა. კარი დაკეტილი დახვდა. ეს არც იყო გასაკვირი იმის გათვალისწინებით, რაც რუს ქალს შეემთხვა. როგორც ჯოუნსი ამბობდა, „როცა ცხენს მოგპარავენ, თავლის ჩაკეტვით მას უკან ვერ დაიბრუნებ“. ძალაყინი რომ ჰქონოდა, ყველაფერს მარტივად მოეგვებოდა. თუმცა არც ამას დარდობდა ძალიან. აღმოაჩინა, რომ ადამიანის ბუნების ემოციური ნაწილის ძალზე საინტერესო გვერდით ეფექტს წინასწარ გათვლისა და დაგეგმვის უნარი წარმოადგენს, რათა არ მოხდეს დაგროვილი ემოციის აფეთქება, თუ საქმე ცუდად წავა. იქნებ სწორედ ესაა ერთ-ერთი მიზეზი იმისა, რომ ქმნილებებმა ამდენ ხანს გაძლეს?

ჯოუნსის შეთავაზებამ, – დარჩი და ჩვენნაირი გახდიო, თითქმის

მოხიბლა მისტერ გრეი; იდუმალებით მოცულ, ეგზოტიკურ წინადადებად მოეჩვენა, რომელიც ხშირად ახსენებდა თავს, მაგრამ ჯიუტად იცილებდა მას, რადგან აქ თავის მისიას ასრულებდა და ის ბოლომდე უნდა მიეყვანა. მერე კი – ვინ იცის? შესაძლოა, ბეკონის სენდვიჩზეც დასთანხმებოდა და იმაზეც, რასაც ჯოუნსის გონება „კოქტიელს“ ეძახდა – გამაგრილებელ, მაცოცხლებელ, ოღნავ მათრობელა სასმელს.

წყალსაცავის მხრიდან ქარმა ძლიერად დაუბერა, მისტერ გრეის სახეში სველი თოვლი შეაყარა და წამით დააბრმავა. ეს სველი პირსახოცის დარტყმას ჰგავდა, რომელმაც იგი აწმყოში დააბრუნა – საქმე უნდა დაესრულებინა.

იგი ფრთხილად წავიდა მართკუთხედის ფორმის საფეხურის მარცხენა კიდისკენ, ფეხი დაუსხლტა და მუხლებზე დაეცა, მაგრამ ჯოუნსის თეძოში მწვავე ტკივილს ყურადღება არ მიაქცია. იმისთვის როდი გაეველო ამხელა გზა, შავი სინათლის წლები და თეთრი მიღები, რომ კიბიდან დაგორებულიყო და კისერი მოეტეხა, ან კუებინში ჩაეყვინთა და ყინულივით წყალში გადაცივებისგან ფეხები გაეფშკა.

ზედა საფეხურს დაქუცმაცებული ქვის ყრილი ამყარებდა. მისტერ გრეი დაბალ მოაჯირზე გადაიხარა, ყრილიდან თოვლი გადახვეტა და მოყანყალებული რიყის ქვის გამოძრობა სცადა. დაკეტილი კარიდან ვიწრო, მაგრამ არცთუ ძალიან ვიწრო ფანჯრების წყება მოჩანდა.

თოვლის სქელი ფენა ხმაურს ახშობდა და ასუსტებდა, მაგრამ მისტერ გრეიმ მაინც გაიგონა მოახლოებული მანქანის ღმუილი. სადღაც, მის უკან, კიდევ ერთი მოდიოდა, თუმცა ის უკვე გაჩერებულიყო, სავარაუდოდ, ისთსტრიტის ბოლოში. ისინი მოდიოდნენ, მაგრამ ვეღარ მოუსწრებდნენ. ყველაფერი დასრულდა. ჭაბურღილამდე კიდევ ერთი მილი უნდა ევლოთ, ოღროჩოღრო და მოლიპულ

გზაზე. მათი მისვლის დროისთვის ძალღი უკვე ჭაბურღილის ფსკერზე იწვებოდა, მკვდარი, მაგრამ ბაირუსისგან დაცლილი.

მან ქვა გამოადრო. ფრთხილად მოქმედებდა, რათა არ გაღვიძებოდა მხრებზე მოგდებულ ძალღს, რომლის სხეულშიც უცხო არსება ფეთქავდა. შემდეგ უკან დაიხია და წამოდგომა სცადა. თავდაპირველად ვერ მოახერხა. ჯოუნსის თეძოში ცეცხლოვანი ბურთი კვლავ გაიბერა. ბოლოს თავს ძალა დაატანა და ბარბაცით წამოდგა, თუმცა საშინელმა ტკივილმა წამით დააბრმავა და კბილებამდე და საფეთქლებამდეც მიაღწია.

მისტერ გრეი ცოტა ხანს შედგა, დაკეტილ კარს მიეყრდნო და სიმძიმე ჯანმრთელ ფეხზე გადაიტანა, როგორც ამას ცხენი აკეთებს, როცა ნალში კენჭი ჩაუვარდება ხოლმე. როდესაც ტკივილი ცოტათი დაუცხრა, კარის მარცხნივ მდებარე ფანჯრის შუშა ქვით ჩაამტვრია და ჯოუნსის ხელი რამდენიმე ადგილას გაიჭრა. ერთი ჭრილობა საკმაოდ ღრმა აღმოჩნდა. შუშის რამდენიმე მოზრდილი ნატეხი არ ჩამოვარდა, ფანჯრის ზედა ნაწილში ჩარჩა და ახლა თვითნაკეთ გილიოტინასავით გამოიყურებოდა, მაგრამ მისტერ გრეის ასეთი წვრილმანებისთვის არ ეცალა. არც იმისთვის მიუქცევია ყურადღება, რომ ჯოუნსიმ თავშესაფარი მიატოვა.

მისტერ გრეი ფანჯარაში გადაძვრა, ცემენტის ცივ იატაკზე დაეშვა და მიიხედ-მოიხედა.

მართკუთხა ოთახის სიგრძე დაახლოებით ოცდაათი ფუტი იქნებოდა. შორეულ ბოლოში ფანჯარა მოჩანდა, საიდანაც, უეჭველია, შესანიშნავი ხედი იშლებოდა წყალსაცავზე, განსაკუთრებით დარში. მაგრამ ახლა ზედ თითქოს თეთრი ზეწარი ეფინა. ერთ მხარეს რაღაც ეკიდა – გიგანტური ფოლადის ვედრო, გვერდებზე წითელი ლაქებით, ოღონდ ეს ბაირუსი კი არა, ოქსიდი იყო, რომელსაც ჯოუნსი ჟანგს უწოდებდა. მისტერ გრეიმ ზუსტად არ იცოდა, მაგრამ ივარაუდა, რომ, აუცილებლობის შემთხვევაში, ამ ვედროთი ჭაბურღილში ადამიანებს უშვებდნენ.

ოთხი ფუტი დიამეტრის რკინის სახურავი იატაკის ცენტრში იდო. მისტერ გრეიმ ცალ მხარეს კვადრატული ნაღარი შეამჩნია და იქაურობა მოათვალიერა. კედელზე ხელსაწყოები მიეყუდებინათ, მათ შორის ძალაყინიც. იქვე ფანჯრის ნამტვრევები ეყარა. შესაძლოა, რუსმა ქალმა ეს ძალაყინი გამოიყენა, როდესაც თვითმკვლევლობისთვის ემზადებოდა.

როგორც გავიგე, – გაიფიქრა მისტერ გრეიმ, – ბოსტონელები ამ უკანასკნელ ბაირუსს დილის ყავასთან ერთად შესვამენ ვალენტინობის წინაღღეს.

ძალაყინი აიღო, მძიმედ, კოჭლობით მიიტანა ოთახის შუაგულამდე და ხვრელში შეჰყო.

შესანიშნავად, დაუბრკოლებლად შევიდა.

## 11

ჰენრი ყურმილს დებს, ფილტვებს ჟანგბადით ივსებს, სუნთქვას იკავებს და... კარისკენ მირბის, რომელსაც ორი წარწერა ამშვენებს: ოფისი და შესვლა არ შეიძლება.

– ეი, – გასძახის სალაროსთან მჯდომი, ბებერი რინი გოსლინი, – დაბრუნდი, ბიჭო! იქ არ შეიძლება!

მაგრამ ჰენრი არ ჩერდება, ნაბიჯსაც კი არ ანელებს, იქ შესული კი ხვდება, რომ სინამდვილეში, ისევ პატარა ბიჭია, თავის ახლანდელ სიმძლავრეზე ფუტით დაბალი და ნაკლებად სქელშუშიან სათვალეს ატარებს. დიახ, იგი ბიჭია, მაგრამ ცხიმოვანი თმის ქვეშ (ოცდაათ წელს გადაბიჯებულს ცოტათი რომ შესთხვლებია) მოზრდილი ადამიანის ტვინი მუშაობს.

„მე ორი ვარ, ორი ერთში“, – ფიქრობს იგი ბებერი გოსლინის ოფისში და თავშეუკავებლად ხარხარებს, როგორც მაშინ, როცა სიზმართმჭერის ყველა ჩხირი მრთელი იყო და ცენტრში ერთდებოდა, დადიტსი კი პალოებს არჭობდა. „კინალამ გავსკდი სიცილით, – ამბობდნენ ისინი, – კინალამ გავსკდი სიცილით, ეს რა მაგარია“.



იგი ოფისშია, მაგრამ ეს ბებერი გოსლინის ოფისი არ არის, სადაც ოუენ ანდერჰილად წოდებულმა ადამიანმა აბრაჰამ კურცად წოდებულ ადამიანს რუხი კაცუნების ჩანაწერი მოასმენინა, ცნობილი ადამიანების ხმებით რომ ლაპარაკობდნენ. ეს დერეფანია, საავადმყოფოს დერეფანი, რაც ჰენრის სულაც არ აოცებს. იგი მის მიერვე შექმნილ მასაჩუსეტისის საავადმყოფოშია.

დერეფანთან შედარებით აქ გაცილებით მეტი ნესტი და სიცივე იგრძნობა, კედლებს ბაირუსი მოსდებია. საიდანღაც კვნესა ისმის: „თქვენ არ მჭირდებით, არც ნემსის გაკეთება მჭირდება, მე ჯოუნსი მინდა. ჯოუნსი დადიტს იცნობდა. ჯოუნსი მოკვდა, სასწრაფო დახმარების მანქანაში მოკვდა. ჯოუნსი ერთადერთია, ვინც გამოდგება. აქედან დაიკარგეთ, მაკოცეთ ტაკოში, მე ჯოუნსი მინდა“.

მაგრამ ის არ წავა. იგი ბებერი, ვერაგი „მისტერ სიკვდილია“ და კუთხეში მიყუჟვას არ აპირებს. მას აქ საქმე აქვს.

ის – ბიჭი ნარინჯისფერი ქურთუკით, რომელიც მალე იმ ქურთუკში აღარ ჩაეტევა – უჩინარი კაცივით მიიპარება დერეფანში, სადაც ისე ცივა, სუნთქვისას პირიდან ორთქლი გამოდის. გული წყდება, რომ პიტის მამის მიერ, საგანგებოდ მისთვის დატენილი თოფი თან არ აქვს. იარაღი დაიკარგა, დავიწყებულია, წლების სიღრმეშია ჩამარხული ჯოუნსის „ვარსკვლავური ომების“ სტიკერებით დამშვენებულ ტელეფონთან ერთად (ამის გამო მისი ყველას შურდა). ბივერის ელვით მოხატული ქურთუკი და პიტის NAშA-ს ემბლემაიანი სვიტერიც იქაა. ზოგიერთი ოცნება კვდება და შემდეგ თავისუფლად დაფრინავს – ეს ამ სამყაროს კიდევ ერთი მწარე სინამდვილეა. ასეთი კი ძალზე ბევრია.

იგი ორ ექთანს ჩაუვლის, რომლებიც საუბრობენ და იცინიან. ერთი მათგანი გაზრდილი ჯოზი რინკენჰაუერია, მეორე – ქალი პოლაროიდული ფოტოსურათიდან, რომელიც იმ დღეს „ძმები თრექერების“ ოფისის ფანჯრიდან დაინახეს. ისინი ჰენრის ვერ ხედავენ, რადგან ის მათთვის არ არსებობს. იგი ახლა სიზმართმჭერ ავგაროშია

და მისი ცენტრისკენ გარბის.

„მე ეგმენი ვარ, – ფიქრობს იგი, – დრო შენელდა, რეალობა გამრუდდა, ეგმენი კი სულ წინ და წინ მიდის“.

ჰენრი დერეფანს იქით მიუყვება, საიდანაც მისტერ გრეის ხმა ისმის.

## 12

მანქანის ჩატეხილი ფანჯრიდან კურცმა მკაფიოდ გაიგონა ავტომატური იარაღიდან უწესრიგოდ ატეხილი სროლის ხმა, რომელმაც უხერხულობისა და მოუთმენლობის მიძინებული გრძნობები გაუღვიძა – ბრაზი, რომ სროლა მის გარეშე დაიწყო, და შიში, რომ ყველაფერი მის მოსვლამდე დასრულდებოდა და ხელში მხოლოდ აკვნესებული დაჭრილები შერჩებოდა, რომლებიც ექიმის დახმარებას ითხოვდნენ.

– მიაწეი, ფრედი, – შესძახა მან, რათა კომაში მყოფი პერლმუტერის ხვრინვა გადაეფარა.

– ძალიან მოლიპულია, ბოს.

– არა უშავს. ისეთი შეგრძნება მაქვს, რომ ჩვენ თითქმის...

მან თოვლის თეთრ საბურველზე ვარდისფერ ლაქას მოჰკრა თვალი, რომელიც ისე გადღაბნილიყო, როგორც პარსვის შემდეგ განაკაწრზე წასმული საპარსი კრემიდან გამოჟონილი სისხლი, და მხოლოდ მერე გაარჩია მიწაში ცხვირით შერჭობილი „სუბარუ“. კურცმა გულწრფელად ინანა, ფრედის მიერ მანქანის ტარების ოსტატობაში ეჭვი რომ შეიტანა. მისმა მოადგილემ საჭე მკვეთრად აიღო მარჯვნივ და „ჰამერს“ ბუქსაობა რომ არ დაეწყო, სიჩქარეს მოუმატა. უზარმაზარი მანქანა მძლოლს დაემორჩილა და ნაპრაღს ზედ გადაევიდა. ბიძგი საგრძნობი იყო. კურცი შეხტა და თავი ქერს მიარტყა, თანაც ისე მაგრად, რომ თვალეზიდან ნაპერწკლები გადმოსცვივდა. პერლმუტერს ხელები უსიცოცხლოსავით უქანავებდა, თავი ჯერ უკან გადაუვარდა, შემდეგ – წინ. „ჰამერმა“ „სუბარუს“ ისე ახლოს

ჩაუქროლა, რომ კინალამ კარის სახელურს გაედო. იგი წინ მძლავრად გაიჭრა და ახლა მხოლოდ ერთი მანქანის მიერ გაკვალულ თოვლში მიდიოდა.

კუდში მოგდევ, ოუენ, – გაიფიქრა კურცმა, – ხომ გრძნობ ჩემს სუნთქვას, ღმერთმა დასწყევლოს შენი ცისფერი თვალები.

მას მხოლოდ ერთი რამ აშფოთებდა – ხანმოკლე ბათქაბუთქი. რას ნიშნავდა ეს? ფაქტია, რომ აღარ ისროდნენ.

წინ კიდევ ერთი ლაქა გამოჩნდა, ამჯერად, მწვანე ზეთისხილისფერი. ისევ „ჰამერი“. ისინი, ალბათ, წავიდნენ. წავიდნენ, მაგრამ...

– საბრძოლო მზადყოფნა, – უთხრა მან ფრედის ოდნავ გამკინავი ხმით, – ვილაცას გადახდა მოუწევს.

### 13

როდესაც ოუენმა იმ ადგილს მიაღწია, სადაც ისტორიტი მთავრდებოდა (უფრო სწორად, ჩრდილო-აღმოსავლეთისკენ მიმავალ ფიცპატრიკროუდს ერწყმოდა – არჩევანი თქვენს წარმოსახვაზე დამოკიდებული), შორიდან მეორე „ჰამერის“ ძრავის ღმუილი გაისმა. თავის მხრივ, კურციც გაიგებდა მისი მანქანის ხმას – თუმცა „ჰამერები“ „ჰარლებივით“ არ ხმაურობდნენ, არც მტრედებივით ლულუნი სჩვეოდათ.

ჯოუნსის კვალი საბოლოოდ გაქრა, მაგრამ ოუენი ბილიკს ხედავდა, რომელიც მთავარ გზას სცილდებოდა და წყალსაცავის ნაპირს მიუყვებოდა.

მან ძრავა გამორთო.

– ჰენრი, როგორც ჩანს, აქედან ფეხით მოგვიწევს...

მას სიტყვა პირში შეაცივდა. იგი ისე ჩაშტერებოდა საქარე მინას, ისე ეშინოდა, რომ კვლავ თხრილში არ გადავარდნილიყო, რომ ერთხელაც არ მოუბრუნებია თავი, არც უკანა ხედვის სარკეში ჩაუხედავს. ამიტომაც სრულიად მოუმზადებელი აღმოჩნდა იმისთვის, რაც დაინახა. მოუმზადებელი და შეძრწუნებული.

ჰენრი და დადიტი ერთმანეთს გადახვეოდნენ და გაუპარსავი ლოყებით მიჰკვროდნენ. ოუენმა ეს საბოლოო გამომშვიდობებად მიიჩნია. თვალები დაეხუჭათ, სახესა და ქურთუკზე სისხლი ეცხოთ. სუნთქვა არ ისმოდა. ოუენმა დაასკვნა, ალბათ, ორივე მოკვდაო: დადიტი – ლევკემიისგან, – ჰენრი კი – გადაღლითა და წარმოუდგენელი, ენით აუწერელი ოცდაათსაათიანი სტრესით გამოწვეული გულის შეტევისგან. კინალამ შეჰყვირა, მაგრამ ამ დროს შეამჩნია, რომ ქუთუთოები ოდნავ შეირხა. ორივესი.

გადახვეულნი. სისხლით მოთხვრილნი. მაგრამ ცოცხლები. მძინარენი.

„სძინავთ“.

ოუენმა დააპირა, ჰენრისთვის დაეძახა, მაგრამ გადაიფიქრა. ჰენრიმ უარი თქვა ჯეფერსონტრექტში მდებარე ბანაკის დატოვებასა და იქ მყოფი ტყვეების ბედის ანაბარა მიტოვებაზე და თუმცა, ყველაფერი გამოუვიდათ, – მხოლოდ შემთხვევითობისა და საოცარი გამართლების წყალობით. ხომ გჯერათ, რომ ასეთი რამ მხოლოდ სატელევიზიო შოუებში არ ხდება? ასე იყო თუ ისე, შეუმჩნევლად გაპარვა ვერ მოახერხეს და ახლა გაცოფებული კურცი მისდევდათ. სხვები ფეხებზე რომ დაეკიდათ და ქარიშხლის ღრიალსა და ზუზუნში მხოლოდ საკუთარ თავზე ებრუნათ, ამას თავიდან აიცილებდნენ.

ახლა აღარაფერი შეიცვლება, – გაიფიქრა ოუენმა, მანქანის კარი გააღო და ძირს ჩახტა. სადღაც, ჩრდილოეთიდან, თეთრი სიცარიელიდან, ცუდი ამინდით შეწუხებული არწივის კივილი გაისმა. უკნიდან, სამხრეთიდან, კურცის, იმ დაუოკებელი გიჟის მანქანის ღრიალი ახლოვდებოდა. ეს მომაბეზრებელი თოვლი კი მათ შორის არსებული მანძილის გამოთვლას შეუძლებელს ხდიდა, რადგან ასეთ ამინდში ხმა იხშობა და ადამიანი შეცდომაში შეჰყავს. შესაძლოა, ორი მილით იყო მათგან დაცილებული, შესაძლოა, გაცილებით ნაკ-

ლებით. კურცს თან ფრედი ახლდა, წყეული ფრედი, შესანიშნავი ჯარისკაცი – დოლფ ლუნდგრენი<sup>218</sup> ჯოჯოხეთიდან.

ოუენმა მანქანებს გარს შემოუარა, ფეხი წამდაუწუმ უსხლტებოდა, გულში იკურთხებოდა. საბარგულს თავი ახადა, იქნებ ავტომატი ან ნალმმტყორცნი ვიპოვო. ვერც ნალმმტყორცნები აღმოაჩინა და ვერც ხელყუმბარები, სამაგიეროდ, ოთხ ცალ MP-5-ს – ავტომატურ შაშხანასა და ყუთში ჩაწყობილ ასოცვაზნიან მჭიდებს მიაგნო.

ბანაკში ოუენი ჰენრის წესებით მოქმედებდა. მათ ალბათ მოახერხეს რამდენიმე ადამიანის გადარჩენა, მაგრამ ამჯერად, ჰენრის დაკრულზე ველარ იცეკვებდა – თუ მას ჯერ კიდევ არ გადაეხადა რეიპლოუს წყეული თეფშის საფასური, სხვა რა გზა ჰქონდა, ვალით იცხოვრებდა. ოლონდ ცოტა ხანს, თუ ბედი კურცს გაუღიმიებდა.

ჰენრის ან ეძინა, ან გულწასული იწვა, ან ბავშვობის მომაკვდავ მეგობარს რაღაც უცნაური ძალით გონებრივად შერწყმოდა. დაე, ასე ყოფილიყო. გამოღვიძებულს სიმხნევე და საღი გონება დაუბრუნდებოდა და აუცილებლად შეუშლიდა ხელს იმას, რაც უნდა მომხდარიყო. განსაკუთრებით – იმ შემთხვევაში, თუკი არ ცდებოდა და ჯოუნსი უცხოპლანეტელების მიერ გატაცებული გონების მიუვალ სიღრმეებში მართლაც იმალებოდა. ოუენს ხელი არ აუკანკალდებოდა... და ვინაიდან ტელეპათიის უნარიც აღარ ჰქონდა, ვერც ჯოუნსის სიკვდილისწინა ხვეწნა-მუდარას გაიგონებდა, თუნდაც იქ ყოფილიყო. „გლოკი“ მოსწონდა, მაგრამ ამ საქმეში ბოლომდე ვერ ენდობოდა.

აი, MP-5 კი გარი ჯოუნსის სხეულს ნაფლეთებად აქცევდა.

ოუენმა იარაღს ხელი სტაცა და ჯიბეებში სამი დამატებითი მჭიდი ჩაიდო. კურცი სულ ახლოს იყო – ახლოს, ახლოს, ახლოს.. ოუენმა ისტორიკოსს გახედა. უკვე ელოდა „ჰამერის“, მომწვანო-მოყავისფრო

---

<sup>218</sup> შვედური წარმოშობის ამერიკელი მსახიობი, რეჟისორი, საბრძოლო ხელოვნებათა ოსტატი.

მოჩვენების მატერიალიზებას, მაგრამ გზაზე არაფერი ჩანდა. დიდება უფალს, – როგორც კურცი იტყოდა.

„ჰამერის“ ფანჯრები თოვლს დაეფარა, მაგრამ ოუენმა მაინც გაარჩია უკანა სავარძელზე ერთმანეთს გადახვეული ორი სილუეტი.

– მშვიდობით, ბიჭებო, – ჩაიჩურჩულა მან, – სასიამოვნო სიზმრებს გისურვებთ.

თუ ბედი გაულიმებდათ, არ გაიღვიძებდნენ, ასე მოულებდნენ მათ არსებობას ბოლოს კურცი და იუენი მთავარი ნადირობის წინ.

ოუენი მოულოდნელად შეჩერდა, ფეხი დაუცდა და, რომ არ წაქცეულიყო, ხელი „ჰამერის“ „კაპოტს ჩაავლო. დადიტს ალარაფერი ეშველებოდა, მაგრამ ჰენრი დევლინის გადარჩენა კიდევ შეიძლებოდა.

„არა! – შესძახა მისი გონების ერთმა ნაწილმა, როდესაც ხელი უკანა კარის სახელურს წაავლო, – დრო აღარ ითმენს!“

მაგრამ ოუენმა გადაწყვიტა, რომ გაერისკა და კაცობრიობის ბედი სასწორზე შეეგდო. იქნებ, ასე იმიტომ მოიქცა, რომ ცოტათი მაინც გამოესყიდა თავისი საქციელი რეიპლოუს თეფშთან დაკავშირებით? ან იმაზე, რაც გუშინ ჩაიდინა (როცა შიშველი ნაცრისფერი ფიგურები ჩამოვარდნილი ხომალდის გარშემო ხელებაწეულნი იდგნენ, თითქოსდა დანებების ნიშნად), ან იქნებ ჰენრის ხათრით, რომელმაც უთხრა, გმირები ვართო, თვითონ კი ვაჟკაცურად ცდილობდა დანაპირების შესრულებას?

არავითარი თანაგრძნობა ეშმაკისადმი, – გაიფიქრა მან და კარი გამოაღო, – არა, სერ, არავითარი თანაგრძნობა იმ დედანატირებისადმი.

დადიტსი უფრო ახლოს იჯდა. ოუენმა მას განიერ ცისფერ ქურთუკში ჩაავლო ხელი და დაქაჩა. დადიტსი სავარძელზე გვერდულად გადაწვა. ქუდი მოსძვრა და მოლაპლაპე თავი გამოუჩნდა. ჰენრიმ ხელი არ გაუშვა მეგობარს და ზემოდან დაეცა, თვალი არ გაუხელია,

მხოლოდ ჩუმად დაიკვნესა. ოუენი მისკენ დაიხარა და ყურში გაშმაგებით ჩასძახა:

– არ წამოდგე. ღვთის გულისთვის, ჰენრი, არ წამოდგე.

შემდეგ კარი გაიჯახუნა, სამი ნაბიჯით უკან დაიხია, თოფი თეძოზე მიიღო და გაისროლა. „ჰამერის“ შუშები დაიბზარა, გათეთრდა და ძირს ჩამოცვივდა. ცარიელი მასრები ოუენის ფეხებთან დაეცა. იგი კვლავ მიუახლოვდა მანქანას და შიგნით შეიხედა. ჰენრი და დადიტსი გაუნძრევლად იწვნენ, ზედ შუშის ნამსხვრევები ეყარათ, ნამსხვრევებს დადიტსის სისხლი შერეოდა. სიცოცხლის ნიშანწყალიც არ ეტყობოდათ. ოუენი იმედოვნებდა, რომ კურცი სიჩქარეში ზედმეტ ცნობისმოყვარეობას არ გამოიჩინდა. ყოველ შემთხვევაში, მან ყველაფერი გააკეთა, რაც შეეძლო.

ოუენს ლითონის მკვეთრი ჟღარუნი შემოესმა და ჩაეცინა. ახლა ზუსტად იცოდა, სად იმყოფებოდა კურცი – იქ, სადაც „სუბარუმ“ გზა დაასრულა. კარგი იქნებოდა, კურცი და ფრედიც ცხვირით შესჯახებოდნენ იმ წყეულ ჯაბახანას, მაგრამ, სამწუხაროდ, ხმის მიხედვით, ასე არ მოხდა. ის ხომ მაინც იცოდა, ახლა სად იყვნენ: მისგან ერთი მილის, მთელი ერთი მილის დაშორებით. ამას არა უშავდა რა.

– დრო ბევრი მაქვს, – ჩაიბურტყუნა ოუენმა. კურცთან მიმართებაში არ ცდებოდა, მაგრამ მეორე მხარეც ხომ არსებობდა? ნეტა, სად იყო ახლა მისტერ გრეი?

ოუენმა შაშხანა ღვედით დაიჭირა და მე-12 ჭაბურღილისკენ მიმავალ ბილიკზე დაეშვა.

მისტერ გრეიმ საკუთარ თავში კიდევ ერთი არასასიამოვნო, ადამიანებისთვის დამახასიათებელი ემოცია აღმოაჩინა: პანიკა. ისე გამოდიოდა, რომ მან ამხელა მანძილი – სინათლის წლები კოსმოსში და ასობით მილი თოვლში – იმიტომ გამოიარა, რომ გზის ბოლოს,

ჯოუნსის მოდუნებულ კუნთებს ეღალატათ და მუშაობა აღარ შესძლებოდათ. ამასთან, რკინის თავსახური იმაზე მძიმე აღმოჩნდა, ვიდრე ეგონა. ისეთი ძალით დააწვა ძალაყინს, რომ ჯოუნსის ზურგის კუნთებმა სასტიკად გააპროტესტა... გარჯა მაინც დაუფასდა, დაჟანგული სახურავი ოდნავ დაიძრა – სულ ერთი-ორი დუიმით გადაიწია – და წყვილი ნაგლეჯი გამოჩნდა. ამას რკინის ღრჭიალი ახლდა. ჯოუნსის წელი ისე გაუკავდა, შებარბაცებულმა მისტერ გრეიმ ნატკენ ადგილზე ხელი იტაცა, თითქოს ამით ტკივილს შეაჩერებდა, კბილები გააკრაჭუნა (იმუნიტეტის წყალობით, ყველა მათგანი შერჩენოდა) და უკან დაიხია.

ლედი წკმუტუნს მოჰყვა. მისტერ გრეიმ შეხედა ძალს და მიხვდა, რომ ქმნილება, საცაა, გარეთ გამოვიდოდა. მართალია, ძალს ეძინა, მაგრამ მუცელი ისე გაზრდოდა, რომ ერთი თათი გაუნძრევლად ეკიდა ჰაერში. მუცელზე კანი გადატკეცოდა და გასკდომაზე ჰქონდა, ვენები გამალებით უფეთქავდა. კუდქვემოდან სისხლი მოწანწკარებდა.

მისტერ გრეიმ ბრაზიანად გადახედა რკინის თავსახურში გარჭობილ უდანაშაულო ძალაყინს. ჯოუნსის წარმოსახვაში რუსი ქალი მოხდენილ შავთმიან, მუქ, ტრაგიკულთვალეზიან ლამაზმანად გადაიქცა. სინამდვილეში ის მხარბეჭიანი, ზორბა და დაკუნთული იქნებოდა, წინააღმდეგ შემთხვევაში, როგორ მოახერხებდა...

სახიფათოდ ახლოს გასროლა გაისმა. მისტერ გრეიმ ამოიოხრა და უკან მიიხედა. ჯოუნსის წყალობით, მასში ადამიანებისთვის დამახასიათებელ იჭვნეულობასაც ჩაებუდებინა და მან პირველად გააცნობიერა, რომ შესაძლოა, მარცხი განეცადა, დიახ, დამარცხებულიყო. თანაც ახლა, როცა მიზნის შესრულებას აღარაფერი აკლდა – უკვე წყლის ხმა ესმოდა, რომელიც სამოცმილიან მიწისქვეშა მოგზაურობას იწყებდა. ბაირუსსა და დანარჩენ სამყაროს ერთმანეთისგან რაღაც საცოდავი ასოცგირვანქიანი დაჟანგული თავსახური ჰყოფდა.



მისტერ გრეი ბივერის უხამსი, სასოწარკვეთილი ბურტყუნით ეძგერა სახურავს. ჯოუნსის განაწამები სხეული წინ და უკან ქანაობდა და მტკივან მარჯვენა ფეხს ეყრდნობოდა. ერთ-ერთი მდეგარი, ოუენი, მალე იქ გაჩნდებოდა. მისტერ გრეის იმედი გადაეწურა, რომ ოუენს, თვითმკვლევლობას აიძულებდა. მოულოდნელად რომ დასხმოდა თავს, მაშინ კიდევ ჰო, მაგრამ ამის არც დრო ჰქონდა და არც – ძალა. თანაც, ადამიანი, რომელიც მისკენ მოდიოდა, განსწავლული იყო მკვლევლობაში. ეს მისი ხელობა იყო.

მისტერ გრეი შეხტა. ტკაცუნის გაისმა – ჯოუნსის თეძოს ძვალმა დატვირთვას ვერ გაუძლო და სახსრიდან ამოვარდა. მისტერ გრეი ძალაყინს ჯოუნსის მთელი ტანით დააწვა. თავსახური აიწია და ამჯერად, თითქმის ერთი ფუტით გაჩოჩდა. კვლავ გამოჩნდა შავი ნახევარმთვარე, რომელშიც ოდესღაც რუსი ქალი ჩახტა. იმდენად ნახევარმთვარე არ იყო, რამდენადაც კალიგრაფის მიერ ნატიფად გამოყვანილი ლათინური ჩ, მაგრამ ძალლი კი გაეტეოდა.

ჯოუნსის ფეხი მის სიმძიმეს ველარ იჭერდა (ნეტა თვითონ ჯოუნსი სად იყო ახლა? კარგა ხანია, მოუსვენარი მასპინძლისგან აღარაფერი სმენოდა). ამას გადამწყვეტი მნიშვნელობა არ ჰქონდა. ხოხვი-თაც იოლად გავიღოდა.

მისტერ გრეი ასეც მოიქცა და ყინულივით ცივ იატაკზე მძინარე ბორდერ-კოლისკენ გახიზნდა. ლედს ხელი საყელურში ჩაავლო და მე-12 ჭაბურღილისკენ წაათრია.

## 15

მალე მოგონებათა დარბაზი – ყუთების დიდი საცავი – ნანგრევებად იქცევა. იატაკი ისე ირყევა, თითქოს დაუსრულებელი სუსტი მიწისძვრა იყოს. ჭერზე ლუმინესცენციური ნათურები გაუთავებლად ციმციმებს და იქაურობას ჰალუცინაციებით შეპყრობილი ადამიანის თვალით დანახულ, დაუჯერებელ სახეს აძლევს.

ჯოუნსი თავქუდმოგლეჯილი გარბის, დერეფნიდან დერეფანში

გადადის და ლაბირინთში გზას ინტუიციურად იკვლევს. თან გამუდმებით უჩიჩინებს საკუთარ თავს, რომ წყეულ თეძოს ყურადღება არ მიაქციოს – ბოლოს და ბოლოს, ის ხომ სუფთა გონებაა, სხვა არაფერი. მაგრამ ინვალიდსაც და ასევე შეუძლია დაარწმუნოს მოკვეთილი კიდური, რომ თრთოლა და ფეთქვა შეწყვიტოს.

იგი ჩაუქროლებს ყუთებს, წარწერებით „ავსტრია-უნგრეთის ომი“, „კათედრალური პოლიტიკა“, „საბავშვო ამბები“ და „ზედა კარადის შიგთავსი“. შემდეგ მიმოფანტულ კოლოფებს გადააწყდება, რომლებსაც „კარლა“ აწერია, მტკივან ფეხზე დაეშვება და ტკივილისგან ხმამაღლა გაჰკივის. თავის შესაკავებლად ყუთებს („გეტის-ბერგი“) ჩააფრინდება და როგორც იქნა, საცავის შორეულ ბოლოს დაინახავს. მადლობა ღმერთს, მრავალი მილი მოუტოვებია უკან.

კარზე წარწერაა: „ინტენსიური თერაპიის ბლოკი“, „დაიცავით სიჩუმე“ და „მნახველები უსაშვოდ არ დაიშვებიან“.

დიახ, სწორედ აქ მოიყვანეს იგი. აქ მოესმა გამოღვიძებულს ეშმაკი მისტერ სიკვდილის ხმა, რომელსაც თავი მოეკატუნებინა, თითქოს მარსის ეძახდა.

ჯოუნსი კარში შევარდება და სხვა სამყაროში აღმოჩნდება, მაგრამ მაშინვე ცნობს: ეს ინტენსიური თერაპიის ბლოკის თეთრად და ცისფრად შეღებილი დერეფანია, სადაც უბედური შემთხვევიდან ოთხი დღის შემდეგ პირველი გაუბედავი ნაბიჯები გადადგა. იგი კოჭლობით გადის ათ-თორმეტ ფუტს ქვის იატაკზე და კედლებზე ბაირუსის წინწკლებს ამჩნევს, თან საავადმყოფოსთვის შეუფერებელი, თუმცა წყნარი მუსიკა ესმის – ეჩვენება, რომ ეს „როლინგ სტოუნზის“ „ემშაკისადმი თანაგრძნობაა“.

მხოლოდ ამის გაცნობიერებას ასწრებს და თეძოში ატომური ბომბი უფეთქდება. ჯოუნსი გაოცებით შეჰყვირებს, ინტენსიური თერაპიის ბლოკის შავ-წითელ ქვის იატაკზე ეცემა და ფეხზე ხელს იტაცებს. იმავს გრძნობს, რაც ავარიის დროს იგრძნო – წითელი აგონიის მხუთავ ტალღას. იატაკზე გორავს, მოციმციმე ტაბლოს,

მრგვალ დინამიკებს შეჰყურებს, იქიდან მუსიკა ისმის ("ანასტასია ტყუილუბრალოდ ყვიროდა"), სხვა სამყაროს მუსიკა, ტკივილისგან გული უწუნს, ყველაფერი სხვა სამყაროში დარჩა, აქ კი ტკივილი ფიქრს უხორცო ჩრდილად აქცევს, სიყვარულს – დაცინვად, ეს მან ჯერ კიდევ მარტში გაიგო და ახლა ხელმეორედ უნდა გააცნობიეროს. გასივებულ თედოს ჩააფრინდება და გორავს, თვალები ლამის ფოსოებიდან ამოუცვივდეს, პირი საზიზღრად გაჭიმულ ნაპრაღად გადაჰქცევია. გულის სიღრმეში ხვდება, რაც მოხდა. იცის: ეს მისტერ გრეია. ბოზისშვილმა მისტერ გრემი ერთხელ მოტეხილი თედო ხელმეორედ მოსტეხა.

ამ დროს იმ მეორე სამყაროდან ნაცნობი ხმა ესმის – ბავშვის ხმა: „ჯოუნსი!“

ექოსავით გაისმის, დამახინჯებულია... მაგრამ არც ისეთი შორეული. ეს ის კი არა, მეზობლად მდებარე ერთ-ერთი დერეფანია. ვისი ხმაა? მისი რომელიმე შვილის? იქნებ ჯონია? არა...

„ჯოუნსი, ჩქარა! ის შენს მოსაკლავად მოდის! ოუენს შენი მოკვლა უნდა!“

ჯოუნსიმ არ იცის, ვინ არის ოუენი, მაგრამ ხმას ცნობს. ეს ჰენრი დევლინია. არა ახლანდელი დევლინი, ის, რომელიც უკანასკნელად გოსლინის მალაზიაში წასვლის წინ ნახა, არამედ ის ჰენრია, რომელთან ერთადაც გაიზარდა, რომელმაც რიჩი გრენადოს უთხრა, რომ ყველას ყველაფერს უამბობდნენ, თუ დადიტს თავს არ დაანებებდა, რომ ის და მისი მეგობრები პიტს ვერასდროს დაიჭერდნენ, რადგან პიტი ქარივით დაქროდა.

„არ შემიძლია! – პასუხობს ჯოუნსი და კვლავ იატაკზე გორავს. გრძნობს, რომ თანდათან რაღაც იცვლება, მაგრამ რა? – არ შემიძლია, მან ისევ მომტეხა თედო, იმ ბოზისშვილმა მომტეხა...“

უეცრად ხვდება, რაც ემართება: ტკივილი უკან იხევს. თითქოს ფირი უკულმა იწყებს ტრიალს: რძე ჭიქიდან პაკეტში ბრუნდება,

ყვავილი, რომელსაც გაფურჩქნა დაეწყო, რაღაც სასწაულით, თითქოს თაიმლაპსით<sup>219</sup> გადაიღესო, ფურცლებს კეცავს და იკვრება.

როცა თავს დახრის და ხასხასა ნარინჯისფერ ქურთუკს დაინახავს, მიხვდება, რაც ემართება – ქურთუკი ხომ დედამ უყიდა „სიარსში“, სანამ პირველად გაემგზავრებოდნენ „კედელში გაკეთებულ ხვრელში“, სადაც ჰენრიმ ირემი მოინადირა და სადაც ერთად მოკლეს რიჩი გრენადო და მისი მეგობრები, სიზმრით მოკლეს. შესაძლოა, ამის გაკეთება არ უნდოდათ, მაგრამ ასე გამოვიდა – იგი კვლავ ბავშვია, თოთხმეტი წლის ბიჭი. ტკივილი აღარ აწუხებს. ან რატომ უნდა აწუხებდეს? თეძოს ხომ მხოლოდ ოცდასამი წლის შემდეგ მოიტეხს. ამ დროს ტვინში ყველაფერი ბრახაბრუხით იყრის თავს: სინამდვილეში მისტერ გრეი არ არსებობს. ის მხოლოდ სიზმართმჭერ ავგაროზში ცხოვრობს, სხვაგან არსად, ის ისევე არ არსებობს, როგორც თეძოში არსებული ტკივილი. „მე დაცული ვარ, – ფიქრობს ჯოუნსი და დგება, – ბაირუსის წინწყალიც არა მცხია. ის, რაც ჩემს თავშია, მხოლოდ მეხსიერება კი არა, მანქანაში მყოფი მოჩვენებაა. ის მე ვარ. ღმერთო ჩემო, მისტერ გრეი მე ვარ.

ჯოუნსი წამოხტება და ისე სწრაფად გარბის, რომ მოსახვევში კინალამ დაეცემა. თავის შეკავებას მაინც ახერხებს. თოთხმეტი წლის ბიჭის მარჯვე ფეხები წინ მიაქროლებს. ტკივილის ნასახსაც ველარ გრძნობს.

შემდეგი დერეფანი ეცნობა. იქ ბორბლებიანი საკაცე დგას ღამის ჭურჭელთან ერთად. იქვე ფრთხილად დასეირნობს წვრილფეხება ირემი, რომელიც კემბრიჯში ნახა, ავარიის წინ. კისერზე ირემს განიერი საყელური უკეთია, ზედ კი უზარმაზარი, ავგაროზივით მაგიური კრისტალი ჰკიდია. ჯოუნსი ირემს ჩაუქროლებს, ის კი ვეებერთელა, თვინიერი თვალეებით შეჰყურებს.

---

<sup>219</sup> Time-lapce (ინგ) – ფოტოგადაღების ხერხი, ე.წ. ინტერვალური გადაღება, როცა კამერა ხანგრძლივი დროის განმავლობაში ერთსა და იმავე ადგილიდან აფიქსირებს კადრებს, რომლებსაც შემდგომ აერთებენ და ქმნიან აჩქარებულ ვიდეოფიქტს.

„ჯოუნსი! “

უკვე ახლოს არის. ძალიან ახლოს.

„ჯოუნსი, მოუჩქარე! “

ჯოუნსი სისწრაფეს ზრდის, ფეხები მიფრინავს, ახალგაზრდა ფილტვები თავისუფლად სუნთქავს. არანაირი ბაირუსი, რადგან მას იმუნიტეტი იცავს, არავითარი მისტერ გრეი, ყოველ შემთხვევაში – მასში. მისტერ გრეი საავადმყოფოშია და ყოველთვის იქ იყო. მისტერ გრეი ფანტომური ტკივილია იმ მოკვეთილი ფეხისა, რომელსაც ჯერაც გრძობს და მზად არის, დაიფიცოს, რომ ის კვლავ მასთანაა. მისტერ გრეი მოჩვენებაა მანქანაში, სიცოცხლის უზრუნველმყოფ აპარატურასთან მიერთებული მოჩვენება, ის აპარატურა კი თვითონაა.

იგი კიდევ ერთხელ მოუხვევს. მის წინ სამი ღია კარია. მეოთხესთან, რომელიც დაკეტილია, ჰენრი დგას, ისიც ჯოუნსივით თოთხმეტი წლისაა. მასაც ნარინჯისფერი ქურთუკი აცვია. სათვალე, როგორც ყოველთვის, ცხვირზე ჩამოსცურებია. გამალებით უქნ ევს ხელს.

„მოუჩქარე! მოუჩქარე, ჯოუნსი! დადიტსი დიდხანს ვერ გაატანს! თუ ის მანამდე მოკვდება, სანამ ჩვენ მისტერ გრეის მოკვლავთ...“

ჯოუნსი ჰენრისთან მირბის. უნდა, ხელები გაშალოს და მეგობარს გადაეხვიოს, მაგრამ დრო არ ითმენს.

„ეს ჩემი ბრალია“, – ეუბნება ჰენრის მოზარდისთვის დამახასიათებელი წვრილი ხმით.

„არა“, – პასუხობს ჰენრი და შესცქერის ნაცნობი მოუთმენლობით, რაც ბავშვობაში პიტს, ბივსა და ჯოუნსის მისდამი მოკრძალებას აღუძრავდა – ჰენრი თითქოს ყოველთვის მათზე წინ იყო, თავს ძლივს იკავებდა, რომ მომავალში არ გადამხტარიყო და ყველა უკან ჩამოეტოვებინა. ისინი მას თითქოს ყოველთვის ტვირთად აწვნიან მხრებზე.

„მაგრამ...“

„ბარემ ისიც თქვი, რომ რიჩი გრენადლო დადიტსმა მოკლა, ჩვენ კი მისი თანამზრახველები ვართ. იგი ის იყო, ვინც იყო, ჯოუნსი, და ისეთებად გვაქცია, როგორებიც ვართ... მაგრამ ეს განზრახ არ გაუკეთებია. ერთადერთი, რისი გაკეთებაც გამიზნულად შეეძლო, ფეხსაცმელზე ზონრის შეკვრა იყო, განა არ გახსოვს?“

და ჯოუნსი ფიქრობს: „ას აგებ? ოტას აგებ?“

„ჰენრი... დადიტსი...“

„ის ჩვენთვის ცდილობს, ჯოუნსი. ეს უკვე გითხარი. და ყველანი ერთად ვყავართ“.

„სიზმართმჭერ ავგაროზში“.

„სწორედ. აბა, კიდეც ვიდგეთ აქ და ვიკამათოთ, სანამ სამყარო არ განადგურებულა, თუ...“

„ის ბოზისშვილი უნდა მოვკლათ“, – ამბობს ჯოუნსი და ხელს კარის სახელურისკენ იშვერს, კარზე დაფაა წარწერით: „აქ ინფექციის მსგავსიც არ არის, IL N'Y PAS D'INFECTION ICI“. მოულოდნელად იგი ამ წარწერის ორმაგ მნიშვნელობას ხვდება. ეს ეშერის<sup>220</sup> ოპტიკურ ილუზიას ჰგავს. თუ ერთი კუთხით შეხედავ, სიმართლეს დაინახავ, თუ სხვა კუთხით – ისეთ სიცრუეს, რომლის მსგავსიც დედამიწის ზურგზე ჯერ არავის უთქვამს.

„სიზმართმჭერი ავგაროზი“, – ფიქრობს ჯოუნსი და კარს აღებს.

ოთახი – ბაირუსის საგიჟეთია, კომმარული სიზმრების ჯუნგლი ერთმანეთში ალისფერ ნაწნავებად გადახლართული ხვიარა მცენარეებით, ვაზითა და ლიანებით. აქ გოგირდისა და გამაგრილებელი ეთილის სპირტის სუნი, აგრეთვე იანვრის სუსხიან დილას გაჯიუტებულ კარბურატორში ჩასხმული, სტარტერის ასამუშავებელი სითხის სიმყრალე იგრძნობა. კიდეც კარგი, რომ იმ ტრაწიანი სინდიოფალების შიში მაინც არა აქვს, ოღონდ აქ არა, ისინი სიზმართმჭერი

---

<sup>220</sup> იგივე მხედველობითი ილუზია ჰოლანდიელ მხატვარ მორის კორნელიუს ეშერის (1898-1972 წწ.) ნამუშევრებში.

ავგაროზის სხვა ჩხირზე არიან, სხვა დროსა და სივრცეში. ბაირუსი ახლა ლედის, ბუნდოვანი მომავლის მქონე ბორდერ-კოლის პრობლემაა.

ტელევიზორი ჩართულია და თუმცა ეკრანს ბაირუსი მოსდებია, მისი ზედაპირისკენ ჯიუტად მიიწევენ აჩრდილისებური შავ-თეთრი ფიგურები. მამაკაცი ცემენტის დამტვერილ, შემოდგომის უსიცოცხლო ფოთლებით მოფენილ იატაკზე ძაღლის მძორს მიათრევს. უცნაური შენობა აკლდამას ჰგავს, ჯოუნსის საყვარელი ორმოცდაათიანი წლების საშინელებათა ფილმებიდან. მაგრამ ეს აკლდამა არ არის – მასში გამდინარე წყლის ყრუ ხმა ისმის.

იატაკის ცენტრში მრგვალი დაჟანგული თავსახურია, რომელზეც ასოებია ამოტვიფრული: მწრს – მასაჩუსეტსის წყლის რესურსების სამმართველო. წარწერა ეკრანზე გადაფარებული მოწითალო ფენის ქვეშაც კი იკვეთება. ეს არც არის გასაკვირი. მისტერ გრეისთვის, რომელიც ფიზიკურად ჯერ კიდევ „კედელში გაკეთებულ ხვრელში“ დაიღუპა, ის ყველაფერს ნიშნავს.

ფიგურალურად რომ ვთქვათ, მთელ სამყაროს.

თავსახური ოღნავ გადაწეულია და სიღრმიდან აბსოლუტური წყვდიადის შავი ნახევარმთვარე მოჩანს. ჯოუნსი აცნობიერებს, რომ მამაკაცი, ძაღლს რომ მიათრევს, თვითონაა, ძაღლი კი ჯერაც ცოცხალია. მისი სხეული ცემენტზე სისხლის ვიწრო ზოლს ტოვებს, თათებს ისე ამოძრავებს, თითქოს ნიჩბებს უსვამსო.

„ამოიგდე თავიდან ეგ ფილმი“, – ბუზღუნებს ჰენრი. ჯოუნსი ლოგინზე გაწოლილი ფიგურისკენ ტრიალდება – ნაცრისფერი არსებისკენ, რომელსაც ბაირუსით აჭრელებული ზეწარი ბრტყელ, უთმო, ძუძუსთავების არმქონე, ნაცრისფერ ხორცზე ნაცრისფერ ტყავგადაკრულ მკერდამდე აფარია. ჯოუნსიმ თვალის შევლების გარეშეც იცის, რომ მას არც ჭიპი აქვს, რადგან ეს ქმნილება ამქვეყნად არასდროს გაჩენილა. იგი მხოლოდ და მხოლოდ ბავშვური წარმოდგენაა სხვა სამყაროს მკვიდრზე, რომელიც ცხოვრებაში მათ შემოიყვანეს,

ვინც პირველად დაეკონტაქტა ბაირუსს. ამ უცხოტომელებს, უცხოპლანეტელებს რეალურად არასდროს უარსებიათ. ადამიანის წარმოსახვით განსხეულებული ნაცრისფერი არსებები სიზმართმჭერი ავგაროზიდან გამოვიდნენ. ეს აზრი ჯოუნსის ერთგვარ შვებას ჰგვრის – მაშასადამე, მხოლოდ იგი არ გაუსულელებიათ. ესეც რაღაცას ნიშნავს.

კიდევ ერთი რამე ახარებს: საზიზლარი შავი თვალების მზერა. მათში შიში ჩაბუდებულია.

## 16

– მოვედით, – მშვიდად განაცხადა ფრედიმ და გააჩერა „ჰამერი“, რომელსაც კიდევ სამი მილი გაველო.

– შესანიშნავია, – თქვა კურცმა, – მანქანა შეამოწმე. მე დაგაზღვევ.

– ახლავე.

ფრედიმ ჯერ პერლმუტერს გახედა, რომელსაც მუცელი საშინლად გაზრდოდა, შემდეგ – ოუენის „ჰამერს“. იმ სროლის მიმართულებაც, გზაში რომ მოესმათ, აშკარად ჩანდა: მანქანა დაეცხრილათ. მხოლოდ ერთი შეკითხვა რჩებოდა პასუხგაუცემელი – ვის ეჭირა იარაღი და ვის ერგო ტყვიები? კვალი, რომელიც „ჰამერიდან“ იწყებოდა, თოვლს თითქმის დაეფარა, მაგრამ გარჩევა ჯერაც შეიძლებოდა. ერთი ადამიანის კვალი იყო. მძიმე ფეხსაცმლის ანაბეჭდი. სავარაუდოდ, ოუენის.

– წავედით, ფრედი!

ფრედი გზაზე გადავიდა. კურცი უკან მიჰყვა. ფრედიმ სასხლეტის ჩნაკუნი გაიგონა. „თავისი ცნრამილიმეტრიანის იმედი აქვს. ვერაფერს იტყვი, იქნებ მართალიცაა. ბოსი იარაღს ყოველთვის საუცხოოდ ფლობდა“.

როგორც კი კურცმა პისტოლეტი იქით, ზუსტად იქით გაიშვირა, ფრედიმ ზურგში სიცივე იგრძნო. რა სისულელეა! ოუენი – დიახაც.



ოუენი სხვა საქმეა. ოუენი ზღვარს გადავიდა.

17

ორი ბიჭის დანახვაზე, რომლებიც უსიტყვოდ მოიწევენ ბაირუსით მოქარგული საწოლისკენ, მისტერ გრეი გამალებით აჭერს ხელს ექთანის გამოძახების ლილაკს, მაგრამ არავინ მოდის.

„ალბათ სისტემა ბაირუსმა დააზიანა, – ფიქრობს ჯოუნსი, – მით უარესი, მისტერ გრეი, მით უარესი თქვენთვის“.

იგი ტელევიზორისკენ ტრიალდება და ხედავს, რომ ეკრანზე მის ორეულს ძალლი უკვე ჭაბურღილის კიდესთან მიუთრევია. ნუთუ დააგვიანეს? იქნებ კიდევ აქვთ დრო? რთული სათქმელია. ბორბალი კვლავ ტრიალებს.

„გამარჯობა, მისტერ გრეი. ძალიან მინდოდა თქვენი გაცნობა“, – ამბობს ჰენრი და მწოლიარეს ვიწრო, უყურო თავქვეშიდან ბაირუსით დაფარულ ბალიშს აცლის. მისტერ გრეი ცდილობს, საწოლის მეორე მხარეს გადახობდეს, მაგრამ ჯოუნსი მას ბავშვივით გამხდარ მკლავებს გაუკავებს და ლოგინზე მიაჯაჭვავს. კანი არც მხურვალეა, არც ცივი. ვერც იტყვი, რომ კანია. რალაც...

„სიცარიელის მსგავსი, – ფიქრობს იგი, – როგორც სიზმარში“.

„მისტერ გრეი? – ეუბნება ჰენრი, – აი, ასე ვესალმებით სტუმრებს პლანეტა დედამიწაზე“.

ჯოუნსის ხელებში მოქცეული მისტერ გრეი შეწინააღმდეგებას ცდილობს და იკლაკნება. საიდანღაც მონიტორის გაშმაგებული წივილი ისმის, თითქოს ამ არსებას მართლაც ჰქონდა გული, რომელმაც ახლალა შეწყვიტა ფეთქვა.

ჯოუნსი მომაკვდავ მონსტრს შესცქერის და მხოლოდ იმაზე ოცნებობს, რომ ეს ყველაფერი მალე დამთავრდეს.

18

მისტერ გრეიმ ძალღი შახტის კიდემდე მიათრია, რომლის თავსახურის ნაწილობრივ გადაწევა მოეხერხებინა. ვიწრო შავი ნახევარწრიდან გამდინარე წყლის დგაფუნის მოისმოდა და ცივი ჰაერის ნაკადს შმორის სუნი მოჰქონდა.

„თუ რაიმე უნდა მოხდეს, დაე, ჩქარა მოხდეს“<sup>221</sup>... ეს იმ ყუთიდან იყო, რომელსაც შექსპირი ეწერა. ძალღს უკანა თათები გაშმაგებით უტოკავდა. მისტერ გრეის ხორცის გლეჯისა და თქვლეფის ხმა ესმოდა: ბაირუსი ერთი ბოლოთი წინ მიიწევდა, გზას მიიკვლევდა და მეორით იღეჭებოდა. ძალღის მუცლიდან ისეთი ხმები ისმოდა, თითქოს გაბრაზებული მაიმუნი ჭყვივისო. ძალღი ჭაში იქამდე უნდა ჩაეგდო, სანამ ის ქმნილება გარეთ გამოვიდოდა. წყალში მისი დაბადება აუცილებელი არ იყო, მაგრამ ეს მისი გადარჩენის შანსს უფრო გაზრდიდა.

მისტერ გრეიმ სცადა, ძალღის თავი ცემენტსა და თავსახურს შორის ჩაეკვებებინა, მაგრამ ვერ მოახერხა. ლედს კისერი სულელურად გაეზნიქა, დაღრეჯილი სახე ზევით მიემართა. ჯერაც არ გაღვიძებოდა, თუმცა, ჩუმად მაინც დაიყეფა.

ხვრელში არ ეტეოდა.

– ბარემ მიხმარე, ფრედი! – შესძახა მისტერ გრეიმ, რომელიც ვერც კი ამჩნევდა ტკივილს ჯოუნსის თეძოში, არც მის გადათეთრებულ სახესა და მომწვანო-მოთაფლისფრო, იმედების მსხვრევით აცრემლებულ, დაღლილ თვალებს აქცევდა ყურადღებას. სამაგიეროდ, აცნობიერებდა, მძაფრად და ძრწოლით აცნობიერებდა, რომ რაღაც ხდებოდა. „რაღაც ხდება ჩემ ზურგს უკან“, – იტყოდა ჯოუნსი. სხვა ვინ იქნებოდა? ვინ იქნებოდა, თუ არა ჯოუნსი, მისი არასტუმართმოყვარე მასპინძელი?

– შენი დედაც! .. – დაუყვირა მან წყეულ, საძულველ, ჯიუტ, ზომაზე ოდნავ დიდ ძალღს, – შენ ქვემოთ გადაეშვები, გასაგებია? შენ გადა...

---

<sup>221</sup> უილიამ შექსპირის დრამიდან „მაკბეტი“.

სიტყვები ყელში გაეჩხირა. ყვირილი აღარ შეეძლო, თუმცა საოცრად უნდოდა ამის გაკეთება. ოჰ, რა სიამოვნებით დაიყვირებდა ან ჩასცხებდა მუშტს, რასაც მოიხელთებდა (თუნდაც ამ მომაკვდავ, მაკე ძალღს)! ყვირილს აღარ დაგიდევდათ, სუნთქვაც კი ეკვროდა. ნეტა, ასეთს რას უკეთებდა ეს ჯოუნსი?

არ ელოდა, თუ ვინმე უპასუხებდა, მაგრამ მოულოდნელად ცივი, მძვინვარებით აღსავსე უცნობი ხმა მოესმა:

„აი, ასე ვესალმებით სტუმრებს პლანეტა დედამიწაზე“.

## 19

საავადმყოფოს საწოლზე გაკრული რუხი არსება უმწეოდ იქნევს სამთითა ხელებს, მოულოდნელად მაღლა სწევს და წამით ბალიშს თავიდან იშორებს. ბრტყელი, წაშლილი, უნაკვთო სახიდან მომზირალი შავი თვალეები ბრაზითა და შიშით ავსებია. რუხი ქმნილება იგუდება. და თუმცა სინამდვილეში იგი ჯოუნსის ტვინშიც კი არ არსებობს, თუნდაც ფიზიკური არტეფაქტის სახით, გააფთრებით იბრძვის სიცოცხლის გადასარჩენად. ჰენრი ვერ თანაუგრძნობს, მაგრამ ყველაფერი კარგად ესმის. მისტერ გრეისაც ის უნდა, რაც ჯოუნსისა და დადიტს, ასევე, ჰენრის, რადგან, მიუხედავად შავი ფიქრებისა, გული ხომ კვლავაც უცემს? ღვიძლი ხომ ისევ უსუფთავებს სისხლს? განა შეწყვიტა მისმა სხეულმა უხილავი ომი ყველაფრის წინააღმდეგ, დაწყებული სიცივით და დამთავრებული კიბოთი და თვით ბაირუსით? სხეული ან სულელია, ან უსაზღვროდ ბრძენი, მაგრამ, ნებისმიერ შემთხვევაში, თავისუფალია აზრების დამანგრეველი გრძნეულებისგან. მან მხოლოდ ის იცის, რომ, სანამ ძალა შესწევს, მედგრად უნდა იდგეს და იბრძოლოს. თუკი ოდესმე მისტერ გრეი სხვანაირი იყო, ახლა ყველაფერი შეიცვალა. მას სიცოცხლე სწყურია.

„არა მგონია, ეს გამოგივიდეს, – წყნარად, თითქმის დამამშვიდებლად ამბობს ჰენრი, – არა მგონია, მეგობარო“.

და კვლავ აჭერს მისტერ გრეის სახეზე ბალიშს.

## 20

მისტერ გრეის სასუნთქი გზები კვლავ გაეხსნა. მან ხარბად შე-  
ისუნთქა ჭაბურღილიდან ამოსული ცივი ჰაერი, ერთხელ... მე-  
ორედ... და უეცრად სუნთქვა ისევ შეეკრა. ისინი მას ახრჩობდნენ,  
გუდავდნენ, კლავდნენ.

„არა! მაკოცე ტაკოში! მაკოცე ტრაწიან ტაკოში! ამას ვერ გაბე-  
დავთ! “

ძალლი გადმოათრია და გადააბრუნა. ასე ის მგზავრი ცდილობს  
ჩემოდანში გაჯიუტებული ნივთის ჩატენას, რომელსაც თვითმფრი-  
ნავზე უკვე დააგვიანდა. ასე გაეტევა, – გაიფიქრა მისტერ გრეიმ.

დიახ. გაეტეოდა. ამისთვის თუნდაც ჯოუნსის ხელებით ძალლის  
მუცლის გაფატვრა დასჭირვებოდა. მაშინ ბაირუსი გათავისუფლდე-  
ბოდა. ასე თუ სხვაგვარად, ის წყეული ქმნილება გარეთ გამოვიდო-  
და.

გასივებული სახე. გადმოკარკლული თვალები. გადაკეტილი სუნ-  
თქვა. ჯოუნსის შუბლის შუაში მფეთქავი ერთადერთი მსხვილი ვენა.  
მისტერ გრეი თავდავიწყებით ტენიდა ლედს ღრიჭოში, შემდეგ კი  
ზურგში ჯოუნსის მუშტები დაუშინა.

„ჩაძვერი, შე წყეულო, ჩაძვერი-მეთქი! “

ჩაძვერი!

## 21

ფრედი ჯონსონმა კარაბინი მიტოვებული „ჰამერის“ ფანჯარაში  
შეყო, კურცი კი ამ დროს მისგან ოდნავ მოშორებით იდგა (რადაციით  
ეს რუხი კაცუნების ხომალდზე თავდასხმას ჰგავდა) და ელოდებოდა,  
რა მოხდებოდა.

– ორი ტიპია, ბოს. როგორც ჩანს, ოუენმა ზედმეტი ტვირთის თა-  
ვიდან მოშორება გადაწყვიტა, სანამ გზას გაუდგებოდა.

– მკვდრები არიან?

– ასე მგონია. ერთი დევლინი უნდა იყოს, მეორე კი ის, ვისაც შეუარეს.

კურცი ფრედისთან მივიდა, ჩამსხვრეულ ფანჯარაში შეიხედა და თავი დააქნია. უკანა სავარძელზე მოკუნტულ ორ თეთრსახიან კაცს, სისხლით რომ მოთხვრილიყო და ზემოდან შუშის ნამტვრევები ეყარა, სიცოცხლის ნიშანწყალი არ ეტყობოდა. მან პისტოლეტი ასწია, როგორც ჩანს, საკონტროლო გასროლისთვის, რათა ეჭვის ნატამალიც არ დარჩენოდა, მაგრამ გადაიფიქრა და ძირს დაუშვა. ოუენს მათი მანქანის ხმა, ალბათ, არ გაუგონია – საოცრად მძიმე და წყლიანი თოვლი შესანიშნავი აკუსტიკური საბურველი იყო, ამიტომ ვერც ამას გამორიცხავდა. სამაგიეროდ, ახლა აუცილებლად მოჰკრავდა ყურს გასროლას.

კურცი მკვეთრად შეტრიალდა.

– წინ გამიძეხი, მეგობარო, ოღონდ ფრთხილად, თორემ მგონი, ყინულზე ვდგავართ. გარდა ამისა, იქნებ მოულოდნელად წავადგეთ თავს. ვფიქრობ, არ დაგავიწყდება, ხომ ასეა?

ფრედიმ თავი დაუქნია.

კურცმა გაიღიმა და მაშინვე საოცრად დაემსგავსა კბილებდაკრეჭილ თავის ქალას.

– თუ ბედი გაუღიმებს, მეგობარო, ოუენ ანდერჰილი მანამ აღმოჩნდება ჯოჯოხეთში, სანამ გაიგებს, რომ მოკვდა.

## 22

ბაირუსით დაფარული ტელევიზორის პულტი, მართკუთხა შავი პლასტმასი, მისტერ გრეის ტუმბოზე დევს. ჯოუნსი მას ხელს სტაცებს.

– ამის დედაც! .. – ამბობს იგი. ხმა საოცრად მიუგავს ბივერისას.

შემდეგ იგი პულტს მთელი ძალით დასცხებს მაგიდის კიდე, თითქოს მოხარშულ კვერცხს ამტვრევსო. პულტი ტყდება, იქიდან

ელემენტები ცვივა და ჯოუნსის ხელში პლასტმასის უშნო ნატეხი რჩება. ხელს ბალიშისკენ იწვდის, რომელსაც ჰენრი მოფართხალე ქმნილებას სახეზე აჭერს. წამით შეყოყმანდება, მისტერ გრეისთან თავის პირველ და ერთადერთ შეხვედრას იხსენებს. სააბაზანოს კარის სახელური ისევე უჭირავს ხელში, ზამბარის გატეხის შემდეგ რომ ეჭირა, როცა ქმნილების ჩრდილი შენიშნა და სრული წყვილადის შეგრძნება დაეუფლა. მაშინ ყველაფერი რეალური ჩანდა, ვარდებივით, წვიმის წვეთებივით რეალური. ჯოუნსი შეტრიალდა და ის დაინახა, – ვინც ან რაც უნდა ყოფილიყო მისტერ გრეი, სანამ მისტერ გრეი გახდებოდა, – რომელიც დიდ მთავარ ოთახში იდგა. ასობით მხატვრული და „ამოუხსნელ საიდუმლოზე“ შექმნილი დოკუმენტური ფილმების მოქმედი პირი. ოღონდ ბებერი. ბებერი და ავადმყოფი. უკვე მაშინ შეეძლო საავადმყოფოს ინტენსიური თერაპიის ბლოკში დაწოლა.

„მარსი“, – თქვა მან და ეს სიტყვა პირდაპირ ჯოუნსის ტვინიდან ამოიღო. საცობივით ამოაძრო. ხვრელი გააკეთა, საიდანაც შესვლას შეძლებდა. შემდეგ იგი აფეთქდა, როგორც საახალწლო ტკაცუნა, კანფეტების ნაცვლად ბაირუსი გადმოაფრქვია და...

„და დანარჩენი მე წარმოვიდგინე ჩემს გონებაში. ხომ ასე იყო? გალაქტიკათშორისი შიზოფრენიის მორიგი შემთხვევა. სხვა არაფერი“.

„ჯოუნსი! – ყვირის ჰენრი, – თუ ამის გაკეთებას აპირებ, გააკეთე!“

„აბა, მისტერ გრეი, – ფიქრობს ჯოუნსი, – მოემზადეთ. ანგარიშსწორების...“

მისტერ გრეის ლედი იმ სივიწროვეში ნახევრად უკვე გაეძვრინა, როცა თავი ჯოუნსის ხმებით გაეცხო.

„აბა, მისტერ გრეი, მოემზადეთ. ანგარიშსწორების დრო მოვიდა“.

ჯოუნსის ყელი საშინლად სტკიოდა. მისტერ გრეიმ ჯოუნსის ხელები ასწია. ყელიდან საშინელი ბუყბუყი ისმოდა, რომელიც ყვირილად ვერ გარდაიქმნა. ამჯერად, ჯოუნსის გაბანჯგვლული კისერი კი არ იგლიჯებოდა, არამედ მისი საკუთარი ხორცი. საშინელი ურწმუნოება დაატყდა თავს – უკანასკნელი ემოცია, რომელიც ჯოუნსის მოჰპარა.

„შეუძლებელია, ეს მოხდეს“.

ისინი, ეს არტეფაქტები, ყოველთვის ხომალდებით ჩადიოდნენ, ყოველთვის ხელებს მაღლა სწევდნენ და ნებდებოდნენ. და ყოველთვის იმარჯვებდნენ. შეუძლებელია, ეს მოხდეს.

აღმოჩნდა, რომ შესაძლებელი ყოფილა.

ბაირუსის გონება კი არ ქრებოდა, იშლებოდა. კვდომის პროცესში არსება, რომელიც ოდესღაც მისტერ გრეი იყო, საწყის მდგომარეობას დაუბრუნდა. სანამ უსულო არსებად გარდაიქმნებოდა (სწორედ წამით ადრე მანამდე, სანამ ეს იგი არაფრად იქცეოდა), გაბრაზებულმა და სასოწარკვეთილმა ძაღლს წიხლი უთავაზა. ლედმა ხვრელში ჩაძრომა სცადა, მაგრამ შუაგზაში გაიჭედა.

ბაირუსის უკანასკნელი, ჯოუნსის გონების დახმარებით წარმოქმნილი ფიქრი ეს იყო: „მის წინადადებას უნდა დავთანხმებულებიყავი. მეცადა მაინც გაადამიანუ...“

## 24

ჯოუნსი ტელევიზორის პულტის ბასრ ნატეხს მისტერ გრეის დანოჭებულ კისერში ურტყამს. ყელზე პირის მსგავსი ჭრილობა ჩნდება. იქიდან მოწითალო-ოქროსფერი მტვრის ღრუბელი ამოდის, ჰაერს ალისფრად ღებავს და ზეწარზე იღექება.

ჯოუნსისა და ჰენრის ხელებში მოქცეული მისტერ გრეის სხეული დენდარტყემულივით ცახცახებს, უეცრად სიზმარივით იკუმშება –

ისედაც, ყოველთვის სიზმარი იყო – და რაღაც ნაცნობს ემსგავსება. ჯოუნსი ვერ ხვდება – რას, მაგრამ შემდეგ გონება მაშინვე უნათდება – მისტერ გრეი „ძმები თრექერების“ დაცარიელებულ ოთახში იატაკზე დაყრილ პრეზერვატივებს ჰგავს.

ის...

...მკვდარია! – სურს დაასრულოს ჯოუნსის, მაგრამ უეცრად საშინელი ტკივილი დაუვლის. ამჯერად არა თეძოში, არამედ თავში. და ყელში. კისერზე ცეცხლოვანი ყელსაბამი ჩნდება. მთელი ოთახი გამჭვირვალე ხდება და მიწამ უყოს პირი, თუ ასე არაა. ის კედელში იყურება, ჭაში იხედება, ხვრელში გაჩხერილი ძალღიმილი საზიზღარ წითელ არსებას შობს, რომელიც უზარმაზარ, სისხლით სავსე მატლთან შეჯვარებულ სინდიოფალას წააგავს. ჯოუნსიმ იცის, რაც არის. მორიგი ბაირუსია.

სისხლით, განავლითა და საკუთარი პლაცენტის ნაფლეთებით დაფარული ქმნილება მას უაზრო შავი თვალებით შესცქერის (მისი თვალებით, – ფიქრობს ჯოუნსი, – მისტერ გრეის თვალებით), იგი მის თვალწინ იბადება, საოცრად მოქნილ ტანს წელავს, გათავისუფლებას ცდილობს, რათა წყვილიაღში გადაეშვას მოდგაფუნე წყალთან შესახვედრად.

ჯოუნსი ჰენრის შეჰყურებს.

ჰენრი – ჯოუნსის.

წამით მათი ახალგაზრდა, შეშინებული თვალები ერთმანეთს ხვდება... შემდეგ კი ისინიც უჩინარდებიან.

„დადიტსი, – ჩურჩულებს ჰენრი სადღაც შორიდან, – დადიტსი მიდის, გვტოვებს, ჯოუნსი...“

მშვიდობით. შესაძლოა, ჰენრის სურს, თქვას „მშვიდობით“, მაგრამ ვერ ასწრებს. ორივენი ქრებიან.



ცუდადაა, საშინლად ცუდად. ფიქრობს, რომ კვდება, მისტერ გრეის მოკვლით, ალბათ, თავიც მოიკლა, ყელი გამოიჭრა, როგორც იტყვიან ხოლმე.

გონზე ისევ ტკივილმა მოიყვანა. არა, ყელი აღარ სტკივა, გაუარა, სუნთქვა ისევ შეუძლია. ესმის კიდეც, როგორ ხმაურით შედის და გამოდის ჰაერი. ეს ძველი ტკივილია. თედოსი. ტკივილმა მიაგნო მას და უკან, სამყაროში მოისროლა, გასივებული, აყვრებული ღერძის გარშემო ბზრიალასავით დაატრიალა. მუხლებით ბეტონზე დგას, ხელები ბეწვებით გავსებია, არაადამიანური ხმები ესმის.

ეს ნაწილი ხომ მაინც რეალობაა, – გაიფიქრა მან, – ეს ნაწილი სიზმართმჭერი ავგაროზის გარეთ მოხვდა.

საშინელი ხმა.

ჯოუნსიმ სიბნელეში კიდეზე კუდით ჩამოკიდებული სინდიოფალას მსგავსი არსება დაინახა, რომელიც ძალლიდან ჯერ არ გამოსულიყო. ჯოუნსი მისკენ გაექანა და სლიპინა, მოცახცახე სხეულს სწორედ იმ დროს ჩაავლო ხელები, როცა ის გათავისუფლდა. ჯოუნსი წინ გადაიხარა, ცდილობდა, ყურადღება არ მიექცია სიცხისგან მფეთქავი თედოსთვის, მოჟიჟივე ქმნილების დაკლაკნილი სხეული გველებზე მონადირესავით თავზემოთ ეჭირა. ის კი სხმარტალებდა, ჰაერში კბილებს აკრაჭუნებდა, აქეთ-იქით იზნიქებოდა, რათა ჯოუნსის ხელში სწვდომოდა. იმდენი მოახერხა, რომ ქურთუკის სახელომდე მიაღწია და დაუძიძგნა.

ჯოუნსიმ ვილაცის მზერა იგრძნო, შეტრიალდა და ჩამტვრეულ ფანჯარასთან, საიდანაც მისტერ გრეი გადაძვრა, მამაკაცი დაინახა, რომელსაც გოცებისგან სახე წაგრძელებოდა, კამუფლაჟიანი ქურთუკი ეცვა და ხელში შაშხანა ეჭირა.

ჯოუნსიმ მასთან მებრძოლი სინდიოფალა შორს მოისროლა, რაც სულაც არ გასჭირვებია. ქმნილებამ ათიოდე ფუტი იფრინა, ტყლაშუნით დაეცა იატაკზე და მაშინვე ჭისკენ გახობდა. მართალია, ხვრელში ძალლი იყო გაჩხერილი, მაგრამ შიგ ჩასაძრომად საკმაო

ადგილი კიდევ რჩებოდა.

- ესროლე! - დაუყვირა ჯოუნსიმ შაშხანიან კაცს, - ესროლე, ღვთის გულისთვის, სანამ წყალში ჩამხტარა!

მაგრამ ფანჯარასთან მდგომი მამაკაცი თითქოს რაღაცას მოენუსხა. კაცობრიობის გადარჩენის ბოლო იმედი მილურსმწულივით იდგა ერთ ადგილზე და პირი დაელო.

## 26

ოუენი საკუთარ თვალებს არ უჯერებდა - მის წინ რაღაც საზიზღარი, უშნო, უფეხო წითელი არსება მოჩანდა. ერთია, ამის შესახებ მოსმენა, და სულ სხვაა საკუთარი თვალით ნახვა. ქმნილება იატაკის შუაში მდებარე ხვრელისკენ მიიწევდა, სადაც ძალღი გაჩხერილიყო და თათები ზემოთ არაბუნებრივად აეშვირა, თითქოს შველას ითხოვდა.

მამაკაცი, სავარაუდოდ, „ტიფიანი ჯოუნსი“, ყვიროდა, მოითხოვდა, რომ ამ არსებისთვის ესროლა, მაგრამ ოუენს ხელები ტყვიასავით დამძიმებოდა. საძაგელი ქმნილება საცაა გაიქცეოდა და ის, რისთვისაც თვითონ იბრძოდა და რისი თავიდან აცილებაც სურდა, ახლა მის თვალწინ მოხდებოდა. ეს ჯოჯოხეთში ყოფნას ჰგავდა.

იგი მოჯადოებულებით შეჰყურებდა, როგორ მიხობავდა საზიზღარი არსება, მისი მაიმუნივით ჭყვივლი ექოსავით ჩაცემოდა; ხედავდა, როგორ მიიწევდა წინ სასოწარკვეთილი ჯოუნსი იმ იმედით, რომ მის დაჭერას თუ არა, გაგდებას მაინც მოახერხებდა. მაგრამ არაფერი გამოსდიოდა. ხელს ძალღი უშლიდა.

ოუენმა საკუთარ ხელებს იარაღის შემართვა და დამიზნება უბრძანა, მაგრამ ვერ მოახერხა. გინდ აქ ჰქონოდა MP-5 და გინდ სხვა გალაქტიკაში. მის გამო ქმნილება სადაცაა გაიქცეოდა. ის კი საფრთხობელასავით იდგა და ამას ხელს არ უშლიდა. ღმერთო, შენ დაეხმარე მას.

ღმერთო, შენ უშველე ყველას.

ჰენრი შეირხა, თვალდახუჭული მთვრალივით წამოჯდა და სავარძლის საზურგეს მიეყრდნო. თავზე რაღაც ეყარა. მან თმა ჩამოიფერთხა. საავადმყოფოში ნანახი სიზმრიდან ჯერაც ვერ გამოორკვეულიყო (თუმცა ეს სიზმარი არ იყო, – გაიფიქრა მან). უეცრად მწვავე ტკივილმა რეალობის მსგავს სივრცეში დააბრუნა. ეს შუშის ნატეხი იყო. თმა ჩატეხილი ფანჯრის ნამსხვრევებით გავსებოდა. სავარძელზეც ბევრი ეყარა, დადიტსის სხეულზეც.

– დად?

დაძახებას აზრი აღარ ჰქონდა. დადიტსი მკვდარი იყო. ალბათ. მან დარჩენილი ენერგია ჰენრისა და ჯოუნსის საავადმყოფოს პალატამდე მიყვანას დაახარჯა.

მაგრამ დადიტსმა დაიკვნესა და თვალი გაახილა. თვალეში რომ ჩახედა, ჰენრი კვლავ უკან, დათოვლილ ჩიხში დაბრუნდა. დადიტსს თვალეში წითელ, სისხლიან ნულებს მიუგავდა. სიბილას თვალეშს.

– უბი! – შესძახა დადიტსმა და ხელები ისე ასწია, თითქოს თოფი ეჭირა და გასროლას აპირებდა, – უბი-დუ! ამე არ იდის! „საქმე არ იცდის!“

სადღაც, ტყეში, ორჯერ გაისროლეს, პაუზის შემდეგ კი – მესამედაც.

– დად, – ჩაიჩურჩულა ჰენრიმ, – დადიტს...

დადიტსმა დაინახა იგი. სისხლით სავსე თვალეშითაც კი დაინახა. ჰენრი გრძნობდა ამას. მეტიც: წამით საკუთარ თავს დადიტსის თვალეშით შეაცქერდა. ეს ჯადოსნურ სარკეს ჰგავდა. მასში წლების წინანდელ ჰენრის ხედავდა. ეს ბიჭი სამყაროს რქისჩარჩოიანი სათვალით უყურებდა, სათვალე დიდი ჰქონდა და სულ ცხვირზე უცურდებოდა. გრძნობდა მისდამი დადიტსის სიყვარულს, უბრალო, სადა ემოციას, ყოველგვარი ეჭვის, ეგოიზმისა და მადლიერების გარეშე.

ჰენრი დადიტსის, ძველი მეგობრის დაუძღვრებულ, ბუმბული-  
ვით მსუბუქ სხეულს მოეხვია და ტირილი აუვარდა.

– შენ ილბლიანი იყავი, ძმაო, – ჩაიჩურჩულა მან და გული დაწ-  
ყდა, რომ ბივერი მათ გვერდით არ იყო. ბივერს იმის გაკეთება შეეძ-  
ლო, რაც ჰენრის არ გამოსდიოდა – იავნანათი დადიტსის მიძინება,  
– ვფიქრობ, ჩვენ შორის ყველაზე ბედნიერი შენ იყავი.

– ენი, – ჩაიბურტყუნა დადიტსმა და ფრთხილად შეეხო ჰენრის  
ლოყას, შემდეგ გაიღიმა და საოცრად გამართულად წარმოთქვა:

– მიყვარხარ, ენი.

## 28

წინიდან კიდევ ორი გასროლა გაისმა – კარაბინიდან ისროდნენ.  
არცთუ ისე შორს. კურცი შეჩერდა. ოციოდე ფუტით დაწინაურებუ-  
ლი ფრედი იმ დაფასთან შედგა, რომელზეც ეწერა: „ჭაბურღილების  
სიახლოვეს თევზჭერა აკრძალულია“.

მესამე გასროლა. შემდეგ სიჩუმე.

– ბოს, – თქვა ფრედიმ, – შენობაში რაღაც ხდება.

– ვერაფერს ხედავ?

ფრედიმ თავი გადააქნია.

კურცი მიუახლოვდა და ცოტათი გამხიარულდა კიდევ, როდესაც  
ფრედიმ მხარზე ბოსის ხელი იგრძნო და ნერვიულად შეხტა. შეხტა  
და სწორადაც მოიქცა. თუ ეიბი კურცი მომდევნო თხუთმეტ-ოც  
წუთს მშვიდობიანად გადაიტანდა, გადაწყვეტილი ჰქონდა, ახალი  
ცხოვრების შესახვედრად გზა მარტოს გაეგრძელებინა. არც სულს  
დაუმძიმებდა ვინმე და არც ტვირთად დააწვეებოდა. მისი ბოლო პარ-  
ტიზანული ბრძოლის მოწმე აღარავინ იქნებოდა. ფრედის, შესაძ-  
ლოა, ეჭვი ჰქონოდა, მაგრამ დაზუსტებით არაფერი იცოდა. სამწუ-  
ხაროდ, ფრედისთვის სამწუხაროდ, ტელეპათია აღარ მუშაობდა.

– როგორც ჩანს, ოუენმა კიდევ ერთი საკბილო იშოვა, – ჩაიჩურ-

ჩულა კურცმა ყურში. ფრედის ყურზე ჯერ კიდევ შერჩენოდა რიპლის კვალი, ოღონდ – გათეთრებული და მშრალი.

– წავიდეთ მისკენ?

– არა, ღვთის გულისთვის! – მიუგო კურცმა, – ეგ არც იფიქრო. როგორც ჩანს, უკან დახვევის დრო მოვიდა – სამწუხაროდ, ასეც ხდება ხოლმე. ხეებს ამოვეფაროთ. ვნახოთ, ვინ გადარჩა და ბრუნდება. ათი წუთი მივცეთ. თანახმა ხარ? ვფიქრობ, ათი წუთი საკმარისზე მეტიცაა.

## 29

სიტყვებს, რომლებმაც ოუენ ანდერჰილის გონება აავსო, აზრობრივი დატვირთვა კი აკლდა, მაგრამ მკაფიოდ ისმოდა: „უბი! უბიდუ! საქმეს მივხედოთ!“

კარაბინი შეიმართა. მას არ აუწევია, მაგრამ როდესაც ძალამ, რომელმაც თოფი ასწია, იგი მიატოვა, – ეს მშვიდად მიიღო. იარაღი ერთეულოვან გასროლებზე დააყენა, დაუმიზნა და ორჯერ გაისროლა. პირველი ტყვია სინდიოფალას თავთან, იატაკს მოხვდა და ასხლტა. აქეთ-იქით ცემენტის ნამსხვრევები გაიფანტა. საზიზღარი ქმნილება შეხტა, შემოტრიალდა, ოუენი დაინახა და ბასრი კბილებით სავსე პირი დაალო.

– მართალი ხარ, ლამაზო, – ჩაილაპარაკა ოუენმა, – კამერას უყურე და გაიღიმე. ახლა ჩიტი გამოფრინდება.

მეორე ტყვია სინდიოფალას პირდაპირ უსიცოცხლო ღიმილში ეძგერა. იგი უკან გადავარდა, კედელს შეასკდა და იატაკზე ჩამოცურდა. მაგრამ უთავო სხეულს ინსტინქტები კიდევ ჰქონდა. იგი კვლავ წინ გახონდა, ოღონდ, ამჯერად უფრო ნელა. ოუენმა ისევ შემართა თოფი და დაუმიზნა, თან რეიპლოუებზე, დიკსა და აირინზე გაიფიქრა. კარგი ადამიანები იყვნენ. კეთილი მეზობლები. როდესაც შაქარი ან რძე შემოაკლდებოდათ, მეზობელს კარზე მიაკაკუნებდნენ და ყველაფერი გვარდებოდა.

„ასე თქვეს, ინსულტიაო, – დაიყვირა მისტერ რეიპლოუმ, ოუენს კი „პულტი“ მოესმა. ბავშვს რა მოეთხოვება.

ასე რომ, ეს რეიპლოუების გულისთვის. და იმ ბავშვისთვის, არასწორად რომ გაიგო.

ოუენმა მესამედ გაისროლა. ტყვიამ ქმნილება ორად გაგლიჯა. სისხლიანი ნაფლეთები აფართხალდა... აფართხალდა... და გაჩერდა.

ოუენმა კვლავ შემართა კარაბინი. ლულა გარი ჯოუნსის შიგ შუბლში დაუმიზნა.

ის კი ოუენს თვალის დაუხამხამებლად შეჰყურებდა. ოუენი დაღლილი იყო, საშინლად დაღლილი, მაგრამ თავი მაინც ღირსეულად ეჭირა და არ იმჩნევდა. ჯოუნსიმ უიარალო ხელები მალლა ასწია.

– შეგიძლიათ, არ დამიჯეროთ, – თქვა მან, – მაგრამ მისტერ გრეი მკვდარია. მე მას ყელი გამოვჭერი, სანამ ჰენრი ბალიშით გუდავდა. სწორედ ისე, როგორც „ნათლიაშია“.

– მართლა? – გამოეხმაურა ოუენი ყოველგვარი გესლის გარეშე, – იქნებ მითხრათ, სად შედგა სიკვდილით დასჯა?

– ჩვენი გონების მასაჩუსეტსის საავადმყოფოში, – მიუგო ჯოუნსიმ და ჩაეცინა. ასეთ სევდიან სიცილს ოუენი ცხოვრებაში არ შესწრებია, – იქ, სადაც დერეფნებში ირემი დახეტიალებს, ტელევიზორში კი ერთადერთი გადაცემა გადის – ძველი ფილმი „ეშმაკისადმი თანაგრძნობა“.

ოუენი ოდნავ შეირხა.

– მესროლე, ჯარისკაცო, თუ მიგაჩნია, რომ ასეა საჭირო. მე სამყარო გადავარჩინე. ვალიარებ, ამაში შენც დამეხმარე იარაღით. ახლა შეგიძლია, სამაგიერო ტრადიციული ხერხით გადამიხადო. თანაც იმ ნაძირალამ ისევ მომტენა თეძო. პატარა გამოსამშვიდობებელი საჩუქარი იმ კაცუნასგან, რომელიც აქ არ ყოფილა. ეს ტკივილი, – ჯოუნსის სახე დაეღრიჯა, – თითქმის აუტანელია.

ოუენს ერთი-ორი წამი კვლავ შემართული ჰქონდა თოფი, შემდეგ კი დაუშვა.

– ამას კიდევ გადაიტანს კაცი, – გაეცინა მას.

ღონემიხდელი ჯოუნსი უკან გადავარდა და იდაყვებს დაეყრდნო, შემდეგ დაიკვნესა, როგორღაც მოახერხა და ჯანმრთელ გვერდზე გადაბრუნდა.

– დადიტსი მკვდარია. იგი ორივეს გვჯობდა, ერთად აღებულს... ახლა კი მკვდარია, – მან წამით თვალები დახუჭა, – ღმერთო ჩემო, რა შტერობაა! ბივერი ასე იტყოდა. ტოტალური შტერობა. ეს „გასაშტერებელის“ საპირისპირო სიტყვაა, რაც, ბივერის განმარტებით, ნიშნავს „არაჩვეულებრივ, არა აუცილებლად სექსუალური ხასიათის სიამოვნებას“.

ოუენი ვერ მიმხვდარიყო, ეს კაცი რაზე ლაპარაკობდა. თითქოს ბოლავდა.

– დადიტსი, შესაძლოა, მკვდარია, მაგრამ ჰენრი – არა. მას მოსდევენ, ჯოუნსი. ცუდი ხალხი მოსდევს. გესმით ჩემი? იცით, ვინ არიან ისინი?

ჯოუნსიმ, რომელიც კვლავინდებურად ცივ, ფოთლებით მოფენილ იატაკზე იწვა, თავი აქეთ-იქით ნელა გადააქნია.

– როგორც ჩანს, სტანდარტულ ხუთ გრძნობას დავუბრუნდი. ტელეპათიამ გამიარა. დანაელებმა ძღვენი შეიძლება მოიტანონ კიდევ, მაგრამ შემდეგ ინდიელებივით უკან წაიღებენ. ღმერთო ჩემო, – ჩაეცინა მას, – ასეთი ხუმრობის გამო სამსახურის დაკარგვაც შეიძლება. დარწმუნებული ხართ, რომ ჩემი ჩაძაღლება არ გასურთ?

ოუენმა ეს უკანასკნელი სიტყვებიც ისევე გაატარა ყურიდან ყურში, როგორც „სიშტერესა“ და „გასაშტერებელს“ შორის არსებული სემანტიკური განსხვავებანი. კურცი მოდიოდა და მთავარი პრობლემაც ის იყო. მას ძრავის ხმაური არ გაუგია, მაგრამ იმ თოვლში ხმაური ძნელად ისმოდა. ცხადია, გასროლების გარდა.

– ტრასაზე უნდა დავბრუნდე, – თქვა მან, – თქვენ აქ დარჩით.

– თითქოს არჩევანი მქონდეს, – მიუგო ჯოუნსიმ და თვალები დახუჭა, – ღმერთო ჩემო, როგორ მენატრება ჩემი თბილი და მყუდრო

ოფისი. ვერასდროს წარმოვიდგენდი, თუ ასეთ რამეს ვიტყვოდი, მაგრამ ფაქტია, რომ ვამბობ.

ოუენი შეტრიალდა და კიბეზე დაეშვა. ფეხი უცურდა და ბორძიკობდა, მაგრამ წონასწორობის შენარჩუნებას ახერხებდა. წასვლის წინ ჩაბნელებულ ტყეს არცთუ ყურადღებით შეავლო თვალი. თუ კურცი და ფრედი იქ ჩასაფრდნენ, მასა და „ჰამერს“ შორის, მათ შემჩნევას ვერ მოასწრებდა. რა თქმა უნდა, კვალის მოძებნაც შეიძლებოდა, მაგრამ ამ პროცესში მათ ისე მიუახლოვდებოდა, რომ გადარჩენის შანსი აღარ ექნებოდა. მხოლოდ იმისი იმედი უნდა ჰქონოდა, რომ გზაში შეფერხდნენ, ან იღბალს მინდობოდა. რატომაც არა? მრავალჯერ გაუვლია ბეწვის ხიდზე და იღბალი ყოველთვის მოწყალე თვალით უყურებდა. იქნებ ამჯერადაც...

პირველი ტყვია მუცელში მოხვდა. ოუენი ზურგზე დაეცა. ქურთუკის კალთები აქეთ-იქით გაეშალა. MP-5-ს დაეყრდნო და წამოდგომა სცადა. არაფერი სტიკოდა. თავს იმ მოკრივესავით გრძნობდა, რომელსაც ვერაგმა მეტოქემ უროსავით მძიმე ხელთათმნიანი ხელი მთელი ძალით დაარტყა.

მეორე ტყვიამ თავი გაუკაწრა, რომელიც ისე აეწვა, თითქოს ვილაცამ ჭრილობაზე სპირტი დაასხა. მესამე გულ-მკერდის მარჯვენა ნაწილში ეძგერა და ყველაფერი დასრულდა. კარაბინი ხელიდან გაუვარდა, ფეხებში ძალა გამოეღია.

რა თქვა ჯოუნსიმ? ვინც სამყარო იხსნა, იმას ტრადიციული ხერხით უზღავენო. საწუწუნო არაფერი ჰქონდა: ბოლოს და ბოლოს, მილურსმნული იესო ექვსი საათის განმავლობაში კვდებოდა, თავზემთ კი დამცინავი წარწერა გაუკრეს, და როდესაც კოქტილის დრო მოვიდა, ძმარნარევი წყალი მიაწოდეს.

იგი ნახევრად იწვა დათოვლილ ბილიკზე, ბუნდოვნად ჩაესმოდა ვილაცის ყვირილი, მაგრამ ეს მისი ხმა არ იყო. თითქოს უშველებელი გაბრაზებული ცისფერი ჩხიკვი იძახდა.

არწივია, – გაიფიქრა ოუენმა.



როგორც იქნა, შესუნთქვა მოახერხა, თუმცა, ამოსუნთქვისას ჰაერზე მეტი სისხლი ამოიღო, იდაყვებზე წამოწევა მოახერხა. ტყვიდან გამოსულ ორ ფიგურას მოჰკრა თვალი. ისინი ფიჭვისა და არყის ხეებს გამოეყვნენ და მას წელში მოხრილნი უახლოვდებოდნენ, როგორც ბრძოლის დროს. ერთი მათგანი ჯმუხი და მხარბეჭიანი იყო, მეორე კი ჭალარა, გამხდარი და ენერგიით აღსავსე. ჯონსონი და კურცი. ბულდოგი და მწევარი. მამასადამე, იღბალმა უმტყუნა. საბოლოოდ, ყოველთვის ასე ხდება.

თვალეზანთებულმა კურცმა მის გვერდით ჩაიმუხლა. ცალ ხელში გაზეთისგან გაკეთებული სამკუთხედი ეჭირა, შელახული, ნაპირებგადაკეცილი, უკანა ჯიბეში ხანგრძლივი დებისგან დაჭმუჭნილი, მაგრამ მაინც ადვილად საცნობი. სამკუთხა ქული. ჯამბაზის ქული.

– არ გაგიმართლა, მეგობარო, – თქვა კურცმა.

ოუენმა თავი დაუქნია. ასეა. არ გაუმართლა.

– როგორც ვხედავ, ჩემთვის საჩუქრის გასაკეთებლად დრო გამოგინახავთ.

– გამოვნახე.. შენს მთავარ მიზანს თუ მიაღწიე? – კურცმა ნიკაპით ჭაბურღილის შენობისკენ მიუთითა.

– ბოლო მოვუღე, – ძლივს უპასუხა ოუენმა. პირში სისხლი დაჰგროვებოდა. გადმოაფურთხა, შესუნთქვა სცადა და გაიგონა, როგორ სტვენით გამოვიდა ჰაერი ახალი ხვრელიდან.

– კარგია, – გულთბილად უთხრა კურცმა, – ყველაფერი კარგია, რაც კარგად მთავრდება, ხომ ასეა?

მან ფრთხილად დაახურა ოუენს თავზე სამკუთხა ქული. დაჭრილის პირიდან სისხლმა შადრევანივით ამოხეთქა და გაზეთში ამოს შესახებ დაწერილი სტატია წითლად შეღებდა.

სადღაც, წყალსაცავის მიდამოებში, კვლავ გაისმა წივილი. შესაძლოა, რომელიმე პატარა კუნძულიდან მოდიოდა ის ხმა, ყოფილი ბორცვიდან, რომელსაც, დატბორვის მიუხედავად, ჯიუტად წამოეყო წყლიდან თავი.

– ეს არწივია, – თქვა კურცმა და ოუენს მხარზე ხელი მოუთათუნა, – ჩათვალე, რომ გაგიმართლა. ღმერთმა ომის მაცნე გამოგიგზავნა, რათა გიმღეროს...

უეცრად კურცს თავი აუფეთქდა და იქიდან სისხლი, ტვინი და ძვლები გადმოიფრქვა. ოუენმა მოასწრო და კაცის ცისფერ, თეთრი წამწამებით მოარშიებულ თვალებში გაოცება და ურწმუნოება ამოიკითხა. წამით კურცი მუხლებზე იდგა, შემდეგ კი პირქვე დაეცა იმით, რაც მისი სახისგან დარჩა. მის უკან ფრედი ჯონსონი იდგა, რომელსაც კარაბინი ჯერაც არ დაეშვა ძირს. ლულას ბოლი ასდროდა.

„ფრედი“, – სცადა, ეთქვა ოუენმა, მაგრამ უმწეოდ მოძრავი ტუჩებიდან ერთი ბგერაც ვერ გამოსცა. ფრედიმ თავი დაუქნია. ალბათ, მიუხვდა სათქმელს.

– არ მინდოდა, მაგრამ ეს გაიძვერა ჩემს მოკვლასაც აპირებდა. თანაც ამდენი წლის ურთიერთობის შემდეგ. ამისთვის მისი აზრების წაკითხვა საჭირო არც იყო.

„დაამთავრე“, – კვლავ სცადა, ეთქვა და ფრედიმაც ისევ დაუქნია თავი. შესაძლოა, მასში კიდევ იყო დარჩენილი იმ წყეული ტელეპათიის კვალი.

დაღლილი და დასუსტებული ოუენი თანდათან ტოვებდა ამქვეყანას. ღამე მშვიდობისა, საყვარელო ქალბატონებო, ღამე მშვიდობისა, დევიდ, ღამე მშვიდობისა, რაინდო. ღამე მშვიდობისა, მშვენიერო უფლისწულო.

გულაღმა იწვა თოვლში და თავს ისე გრძნობდა, როგორც ფუმ-ფულა ლოგინში. სადღაც კვლავ ყვიროდა არწივი. ალბათ იმიტომ, რომ ისინი მის ტერიტორიაზე შეიჭრნენ და თოვლიანი შემოდგომის სიმყუდროვე დაურღვიეს. მაგრამ მალე ყველანი წავიდოდნენ და იგი კვლავ მარტო დარჩებოდა თავის საბრძანებელში.

ჩვენ გმირები ვიყავით, – გაიფიქრა ოუენმა, – მიწა გამისკდეს, თუ ვტყუოდე. ჯანდაბას შენი ქუდი, კურც, ჩვენ გმირები...

ისევ ბათქაბუთქი, შემდეგ კი ისევ სიჩუმე. ჰენრი „ჰამერის“ უკანა სავარძელზე გარდაცვლილი მეგობრის გვერდით იჯდა და ვერ გადაეწყვიტა, როგორ ემოქმედა. შანსი, რომ იქ მყოფებმა ერთმანეთი ამოხოცეს, ძალზე მცირე იყო, იმის ალბათობა კი, რომ ეს კარგმა ბიჭებმა გააკეთეს, თუმცა, კარგმა ბიჭებმა კი არა, კარგმა ბიჭმა ყველა ცუდი ბიჭი სიცოცხლეს გამოასალმა – ნული.

ეს რომ დაასკვნა, პირველი, რაც გაიფიქრა, ის იყო, – „ჰამერს“ მივატოვებ და ტყეს თავს შევაფარებო. მაგრამ თოვლს რომ გახედა, ეს აზრი მაშინვე უკუაგდო (რა გააჭირა ამ თოვლმა საქმე). თუ კურცი და მისი თანამოაზრე თხუთმეტი წუთის განმავლობაში მოვიდოდნენ, კვალი ჯერაც არ იქნებოდა წაშლილი. გაჰყვებოდნენ მას და ცოფიანი ძალღვივით ან სინდიოფალასავით სულს გააფრთხოებინებდნენ.

მაშინ იარაღი იშოვე და სროლა დააწარი.

ასე ჯობდა. ცხადია, უაიეტ ერპს<sup>222</sup> ვერ შეედრებოდა, მაგრამ სროლა იცოდა. დიდი ფილოსოფოსობა არ სჭირდებოდა იმის ცოდნას, რომ მონადირე და ირემი, რომელზეც იგი ნადირობს, ერთმანეთისგან სრულიად განსხვავებული არსებები არიან. ჰენრის ეჭვი არ ეპარებოდა, რომ ნორმალური ხილვადობის პირობებში, ორივე არამზადას ძირს დააწვენდა.

მან ხელი სახელურისკენ წაიღო, როდესაც ვილაცის გაოცებული შეძახილი და გინება მოესმა, შემდეგ – დარტყმის ხმა და მორიგი გასროლა. ძალიან ახლოს. ჰენრიმ გაიფიქრა, ალბათ ვილაცას ფეხი დაუსხლტა და დაეცა, თოფის სასხლეტს კი შემთხვევით გამოჰკრა თითო. იქნებ იმ ნაბიჭვარმა თავი მოიკლა. შეიძლებოდა, ამის იმედი ჰქონოდა? კარგი გამოსავალი კი იქნებოდა...

---

<sup>222</sup> სასამართლოს აღმასრულებელი კანზასიდან; ზუსტი მსროლელი.

თუმცა არა. სასიხარულო არაფერი ჰქონდა: როგორც ჩანს, დაცემული წამოდგა. ერთადერთი გამოსავალი რჩებოდა და ჰენრი ასეც მოიქცა: კვლავ სავარძელზე გაწვა, დადიტსის ხელები მხრებზე დაიწყო და თავი მოიმკვდარუნა. დიდი იმედი არ ჰქონდა, რომ ეს გამართლებდა, მაგრამ სხვა გზა არ ჰქონდა. პირველ ჯერზე ცუდი ბიჭები ძალიან ჩქარობდნენ და „ჰამერს“ ისე ჩაუარეს, რომ ვერ შეამჩნიეს, ცოცხალი თუ იყო. ახლა კი აღარ მოტყუვდებოდნენ. მანქანაში გაკეთებული რამდენიმე ნახვრეტი, ჩამსხვრეული ფანჯარა და საბრალო დადიტსის ცხვირიდან და ფილტვებიდან გადმოღვრილი სისხლი მათ შეცდომაში ველარ შეიყვანდა.

ჰენრის თოვლის ჭრაჭუნი მოესმა. ხმის მიხედვით, მისკენ ერთადერთი ადამიანი მოდიოდა. ალბათ ის უსინდისო კურცი. უკანასკნელი გადარჩენილი ადამიანი. წყვილიადა ახლოვდებოდა. სიკვდილი დღის ბოლოს. იგი მეგობრად აღარ მიაჩნდა, – მხოლოდ თავს იკატუნებდა, რომ მკვდარი იყო, – მაგრამ ის მაინც ახლოვდებოდა.

ჰენრიმ თვალეები დახუჭა და გაირინდა...

ვილაცამ „ჰამერს“ ჩაუარა და გზა განაგრძო.

### 31

ამჟამად ფრედი ჯონსონს უაღრესად პრაქტიკული სტრატეგიული მიზანი ამოძრავებდა: „ჰამერამდე“ მიეღწია, როგორმე მოებრუნებინა, იქაურობას გასცლოდა და მშვიდობიანად გადაელახა ისტორიტიზე გაჩენილი თხრილი (სადაც ცხვირი წაიმტვრია „სუბარუმ“, რომელსაც ოუენი მისდევდა). თუ გზატკეცილამდე მიაღწევდა, დანარჩენზე მერე იფიქრებდა. სწორედ მაშინ, როდესაც ბოსის მანქანის კარი გამოალო და საჭეს მიუჯდა, მასაჩუსეტსის ავტომავისტრალი გაახსენდა. I-90-ის ორივე მხარეს დასავლეთ ამერიკის უდიდესი ნაწილი მდებარეობდა. უამრავი ადგილი იცოდა, სადაც დამალვას მოახერხებდა.

ცხვირში გაზებისა და ეთილის სპირტის საზიზღარი სუნი ეცა.

თითქოს სახეში სილა გააწნესო. პერლი! წყეული პერლი! იმ აურზაურში სულ გადაავიწყდა ის პატარა ნაბიჭვარი.

ფრედიმ კარაბინი შეემართა... პერლი არ ინძრეოდა. მასზე ტყვიის დახარჯვა არც ღირდა. გადაადგებდა თოვლში და მორჩა. თუ გაუმართლებდა, გამოუღვიძებლად გაიყინებოდა. ის და მისი დამპალი...

მაგრამ პერლის არ ეძინა. არც გონება დაჰკარგოდა. არც კომაში იმყოფებოდა. პერლი მკვდარი იყო. და ...რალაცნაირად მოკუნტულდაპატარავებული. დანაოჭებული ლოყები ჩაცვივნოდა. თვალის ფოსოები უძირო ქას მიუგავდა, ქუთუთოების თხელი ფენის ქვეშ მოთავსებული თვალის კაკლები სიღრმეში ჩაძირულიყო. კარს უცნაურად მიყრდნობოდა: ერთი ფეხი მალლა აეწია, ლამის მეორეზე გადაედო, თითქოს სიკვდილის წინ პოპულარული მეთოდით სურდა გაზების გამოშვება. კომბინეზონის შარვალი დასვროდა და გამუქებოდა. სისველეში იჯდა, საიდანაც ფრედისკენ წითელი ბილიკები გაჭიმულიყო.

– რა ჯანდ...

უკანა სავარძლიდან გამაყრუებელი ხმაური გაისმა, გეგონებოდათ, ვილაცამ სტერეოსისტემა ჩართო და ხმა ბოლომდე აუწიაო. ფრედიმ რალაც მოძრაობას მოჰკრა თვალი. გაიხედა და უკანა ხედვის სარკეში საშინელ ქმნილებას მოჰკრა თვალი. სანამ რამეს მოისაზრებდა, ურჩხული ეცა, ყური მოაგლიჯა, ლოყა მოაჭამა, პირში შეუვარდა და ქვედა ყბაზე მოეჭიდა. შემდეგ არჩი პერლმუტერის ტრაწიანმა სინდიოფალამ ფრედის ნახევარი სახე ისე სწრაფად მოაცალა, როგორც მშვიერმა კაცმა შემწვარ წიწილის ბარკალს – ხორცი.

ფრედიმ შეჰყვირა, სასხლეტს დააწვა და „ჰამერის“ კარი დაცხრილა. ხელიც ასწია საზიზლარი ქმნილების მოსაცილებლად, მაგრამ ლორწოიან კანზე თითები უსხლტებოდა. სინდიოფალა უკან გადახ-

ტა, თავი გადასწია და თვალის დახამხამებაში გადაყლაპა მოპოვებული ალაფი. ფრედიმ ხელი კარის სახელურს დაადო, თუმცა გაღება ვერ მოასწრო. ურჩხული კვლავ ეცა მას, ამჯერად კისერსა და მხარს შორის. საუღლე ვენიდან შადრევანივით იფეთქა სისხლმა, „ჰამერის“ სახურავს შეესხა და იქიდან მეწამული წვიმის სახით წამოვიდა. ფრედის ფეხები აუძაგდაგდა, გამალებით აჭერდა სატერფულებს, თითქოს „სტეპს“ ცეკვავდა. საშინელი ქმნილება ისევ უკან გადახტა, წამით შეყოვნდა, შემდეგ ფრედის მხრებზე გასრიალდა და მის მუხლებზე დაეცა.

ფრედიმ ერთხელაც შეჰყვირა, როდესაც ურჩხულმა ელვისებურად მოაგლიჯა მამაკაცური ღირსება, მერე კი სამუდამოდ დადუმდა.

## 32

ჰენრი „ჰამერის“ უკანა ფანჯრიდან აკვირდებოდა, როგორ ქანაობდა აქეთ-იქით მეორე მანქანის საჭესთან მჯდარი ფიგურა. სიამოვნებდა ხვავრიელად თოვა. წინა „ჰამერის“ საქარე მინა სისხლს მოეთხვარა და თითქმის არ მოჩანდა, შიგნით რა ხდებოდა.

ისედაც ყველაფერს ხედავდა.

ბოლოს, საჭესთან მჯდარმა ფიგურამ მოძრაობა შეწყვიტა. მის უკან ვილაცის ჩრდილი ისე წამოიძარტა, თითქოს გამარჯვებას ზეიმობსო. ჰენრიმ იცოდა, რაც იყო. უკვე ენახა ის ჯოუნსის საწოლზე „კედელში გაკეთებულ ხვრელში“. ფანჯარა იმ „ჰამერსაც“ ჩამსხვრეოდა, მათ რომ მისდევდა. ეჭვი ეპარებოდა, რომ საზიზღარ ქმნილებას ინტელექტი გააჩნდა, მაგრამ რა დრო დასჭირდებოდა მას, სუფთა ჰაერის დასაფიქსირებლად?

„სიცივე არ უყვართ. ის მათ კლავს“.

ეს ასე იყო, მაგრამ ჰენრის არ უნდოდა მისი ცოცხლად დატოვება. არა მარტო წყალსაცავთან სიახლოვის გამო – წყლის დგაფუნიც კი

ესმოდა. საიდანღაც უზარმაზარი ვალი გაჩნდა, ანგარიშის წარდგენა კი მხოლოდ მას შეეძლო. ჯოუნსი ხშირად ამბობდა, ვალის გადახდა ამქვეყნად ყველაზე საზიზლარი რამ არისო. ვალის გასტუმრების დრო დამდგარიყო.

იგი წინ გადაიხარა. იარალი არ ჩანდა. როგორღაც ხელსაწყოების პანელს მისწვდა და პატარა უჯრაც შეამოწმა. ვერაფერი აღმოაჩინა, გარდა ბენზინის ქვითრების, ზედნადების და რბილყდიანი წიგნისა, სახელწოდებით „როგორ გავხდეთ საკუთარი თავის საუკეთესო მეგობარი“.

ჰენრიმ კარი გააღო და თოვლში ჩახტა, მაგრამ ფეხები მაშინვე მოეკვეთა და საჯდომით დაეცა, გზად ზურგიც გაიკაწრა „ჰამერის“ მაღალ ფრთაზე. ბარემ მიხმარე, ფრედი! ჰენრი გაჭირვებით წამოდგა. კვლავ დაუცდა ფეხი, მაგრამ მოასწრო და კარს ხელი სტაცა. შემდეგ ფრთხილად შემოუარა მანქანას, თან თვალს არ აშორებდა უკან გაჩერებულ მის ტყუპისცალს. საზიზლარი ქმნილება ჯერაც ვერ დაწყნარებულიყო და ხარბად თქვლევდა მძღოლის ნარჩენებს.

– სადაც ხარ, იქ დარჩი, ლამაზო, – ჩაილაპარაკა ჰენრიმ და გადაიხარხარა. გრძნობდა, რა სიგიჟეც იყო ამ ჯოჯოხეთში სიცილი, მაგრამ თავს ვერ იკავებდა, – იქნებ ერთი-ორი კვერცხიც დაგედო? მე ხომ ეგმენი ვარ, ბოლოს და ბოლოს, შენი გულკეთილი მეზობელი ეგმენი. თუ გინდა, წიგნს მოგიტან, სახელწოდებით „როგორ გავხდეთ საკუთარი თავის საუკეთესო მეგობარი“. წაიკითხავ?

ლაპარაკობდა და ლაპარაკობდა, სველ, მოყინულ თოვლზე სრიალ-სრიალით მიდიოდა, როგორც სკოლიდან მომავალი ბიჭი, უახლოესი ბორცვისკენ ციგით დასაშვებად რომ ემზადება. წონასწორობის შესანარჩუნებლად ხელს შიგადაშიგ „ჰამერს“ ჰკიდებდა, თუმცა ირგვლივ ხელმოსაჭიდი სხვა არც არაფერი იყო. აკვირდებოდა, როგორ დახტოდა და ცელქობდა საზიზლარი ქმნილება. უეცრად ის გაქრა. ოჰო! სად ჯანდაბაში დაიკარგა? ჯოუნსის რომელიღაც სულე-

ლურ ფილმში, ასეთ დროს, შიშის მომგვრელი მუსიკა გაისმის. ტრანზიანი სინდიოფალების, კოსმოსური მკვლევლების თავდასხმა, – გაიფიქრა ჰენრიმ და კვლავ გადაიხარხარა.

როგორც იქნა, ძარამდე მიაღწია. აი ის ღილაკიც, რომელსაც თითო უნდა მიაჭიროს, რათა უკანა ფანჯრის ჩამკეტი გაიხსნას... რა თქმა უნდა, თუ ჩამკეტი საერთოდ არსებობს. იქნებ არც არსებობს. საინტერესოა, როგორ შეძვრა ოუენი შიგნით? ჰენრის არ ახსოვდა. არ ახსოვდა და, რა იქნა. იგი ვერასდროს გახდებოდა საკუთარი თავის საუკეთესო მეგობარი.

ჰენრის სიცილისგან ცრემლები სდიოდა. თითი მიაჭირა ღილაკს და როცა უკანა ფანჯარა ჩამოიწია, შიგ შეიხედა. მადლობა ღმერთს, იარალი იდო. არმიის შეიარაღებაში არსებული კარაბინები, იმის მსგავსი, ოუენმა ბოლო პატრულირებისთვის რომ აიღო. ჰენრიმ ერთ-ერთ მათგანს ხელი სტაცა და შეათვალიერა. დამცველი და რეჟიმის გადამრთველი ჰქონდა, მჭიდრიც, რომელზეც ეწერა: „აშშ-ის არმია კალ. 5.56 ვაზნა 120“.

– ისეთი ადვილი გამოსაყენებელია, ბაირუსიც კი გაისვრის, – თქვა ჰენრიმ და ისეთი სიცილი აუტყდა, მუცელი ხელით ეჭირა. ამ დროს ფეხი დაუსხლტა და კინალამ ზღართანი მოადინა. ფეხები და ზურგი სტკიოდა, გული კიდევ უფრო მეტად აწუხებდა... და მაინც იცინოდა. იგი ეგმენი იყო, ეგმენი, მოცინარი გიენა.

თოფშემართულმა ჰენრიმ კურცის „ჰამერს“ მძლოლის მხრიდან მოუარა (იმედი ჰქონდა, დამცველის ახსნა მოახერხა). ყურებში კვლავ შიშის მომგვრელი მუსიკა ჩაესმოდა, თუმცა მაინც ეცინებოდა. აი, ბენზობაკის თავსახური. ამას წყალი არ გაუვა. მაგრამ სად იყო გამერა<sup>223</sup>, კოსმოსიდან მოსული საშინელება?

თითქოს მისი ფიქრების შესახებ შეიტყო, – ჰენრი მხოლოდ ახლადა მიხვდა, რომ ეს შესაძლებელი იყო, – სინდიოფალა თავით უკანა ფანჯარას დაეჯახა, იმას, რომელიც, საბედნიეროდ, ჩამსხვრევას

---

<sup>223</sup> ურჩხული, გიგანტური კუ იმავე სახელწოდების იაპონური ფილმიდან.



გადაურჩა. გასისხლიანებულ თავზე თმა და ხორცის ნაფლეთები მიჰკროდა. უსიცოცხლო, კოკოლობას<sup>224</sup> ლებნებივით თვალები ჰენ-რის მიშტერებოდა. ნუთუ იცოდა, რომ უკან სათადარიგო გასასვლელი იყო? შესაძლებელია. იქნებ, ისიც ესმოდა, რომ მისი გამოყენება სწრაფ სიკვდილს ნიშნავდა?

მან კბილები დაკრიჭა.

ჰენრი დევლინმა, რომელმაც ერთხელ ამერიკელ ფსიქიატრთა ასოციაციის პრემია დაიმსახურა „ნიუ-იორკ ტაიმსში“ გამოქვეყნებული სტატიისთვის, სახელწოდებით „სიძულვილის დასასრული“, პასუხად თვითონაც დაკრიჭა კბილები. თანაც სიამოვნებით. შემდეგ შუათითი ასწია. ეს ბივერისთვის. და პიტისთვის. კვლავ კმაყოფილება იგრძნო.

როგორც კი კარაბინი შემართა, სინდიოფალა – იგი, შესაძლოა, სულელი იყო, მაგრამ არც იმდენად – ქვევით ჩახტა. ჰენრის ეს არ ადარდებდა: ფანჯარაში სროლას ისედაც არ აპირებდა. მაგრამ თუ ის საზიზლარი ქმნილება იატაკზე იწვა, ჯობდა კიდევ. ბენზინს მიუჩოჩდი, ძვირფასო, – გაიფიქრა მან, კარაბინი ავტომატურ რეჟიმზე გადართო და ბენზობაკი დაცხრილა.

სროლის ხმამ კინალამ დააყრუა. თავსახურის ადგილზე გვერდებ-გადაწეული დიდი ხვრელი გაჩნდა. ცოტა ხანს სხვა არაფერი მომხდარა. „პოლიგუდურ ფილმს სულაც არ ჰგავს, იქ ყველაფერი საათის მექანიზმივით ზუსტად მუშაობს“, – ამის გაფიქრებალა მოასწრო ჰენრიმ და მაშინვე სტვენა და შიშინი მოესმა. სასწრაფოდ ორი ნაბიჯით უკან დაიხია, მაგრამ ფეხები მოეკეცა და დაეცა. სწორედ ამან გადაარჩინა მისი თვალები და, შესაძლოა, სიცოცხლეც. კურცის „ჰამერის“ ძრავა ერთი წამის შემდეგ აფეთქდა. ალი მანქანის ქვემოდან დიდ ყვითელ ფურცლებად გამოვარდა. საბურავები ერთიმეორეზე მიყოლებით, ხმაურით გასკდა. შუშის ნამსხვრევები ყველა მხა-

---

<sup>224</sup> ყურძნის უჩვეულო ჯიში, ე.წ. ზღვის ყურძენი.

რეს ცვიოდა, მაგრამ ჰენრი მათ სასწაულებრივად გადაურჩა. აუტანელი სიმხურვალე იდგა. ჰენრი სწრაფად გახობდა უკან. კარაბინი ღვედით ეჭირა და გიჟივით ხარხარებდა. გაისმა მეორე აფეთქების ხმა და ჰაერში შრაპნელმა დაიწყო სტვენა.

ჰენრიმ ხელი ნაძვის ტოტებს წაავლო და ისე წამოდგა, თითქოს თოკის კიბეზე მიცოცავსო. ბოლოს წელში გაიმართა. მძიმედ სუნთქავდა, ფეხები და ზურგი სტკიოდა, კისერიც, მაგრამ მაინც იცინოდა.

კურცის „ჰამერის“ უკანა ნაწილი ალში გახვეულიყო. ჰენრის კარგად ესმოდა, როგორ ჭყიოდა შიგნით ცეცხლმოკიდებული ქმნილება.

შორიდან შემოუარა ალმოდებულ „ჰამერს“, მარჯვენა კარის მხრიდან მიუახლოვდა და კარაბინი ჩამტვრეულ ფანჯარას დაუმიზნა. სახე მოედუშა, რაღაცას გამალებით ფიქრობდა. უეცრად მიხვდა, რატომ ეჩვენებოდა ეს ყველაფერი იდიოტობად – „ჰამერის“ ყველა ფანჯარა ჩამსხვრეული იყო, წინა საქარეს გარდა. ისევ აუტყდა სიცილი. რა სულელი ყოფილა! ნამდვილი სულელი!

„ჰამერის“ ცეცხლმოდებულ კაბინაში საზიზღარი ქმნილება აქეთ-იქით აწყდებოდა, მთვრალივით ქანაობდა წინ და უკან. ნეტა რამდენი ვაზნა დარჩენოდა მჭიდში იმ შემთხვევისთვის, თუ ის წყეული ძუკნა გარეთ გამოალწევდა? ორმოცდაათი? ოცი? ხუთი? რამდენიც უნდა ყოფილიყო, უნდა ემყოფინა და ისე გამკლავებოდა. ვერ გარისკავდა და ახალი მჭიდის ასაღებად მეორე მანქანასთან ვერ დაბრუნდებოდა.

მაგრამ საზიზღარი ქმნილება აღარ გამოჩენილა.

ჰენრი ხუთი წუთის განმავლობაში იდგა და მანქანას შესცქეროდა. შემდეგ გადაწყვიტა, რომ მეტი სანდოობისთვის ამდენივე ხანს დალოდებოდა. თოვდა, „ჰამერი“ იწვოდა და თეთრი ცისკენ შავ კვამლს ბოლქვებად ისროდა. ჰენრი ხანძარს მისჩერებოდა და „დერის დღეებზე“ გამართულ კარნავალზე ფიქრობდა: გარი U.შ. ბონ-

დსი „ახალ ორლენს“ მღერის, ოჩოფეხებით ამაყად დაიარება გოლიათი, ლეგენდარული კოვბოი, აღგზნებული დადიტსი ერთ ადგილზე დახტის. შემდეგ დერის საშუალო სკოლის ჭიშკართან მდგარი პიტი გაახსენდა, რომელსაც ხელი ისე მოელუნა და ისეთი სახე მიეღო, თითქოს სიგარეტს ეწეოდა. პიტი, რომელიც მარსზე NAშA-ს პირველი ექსპედიციის კაპიტნობაზე ოცნებობდა. არც ბივერი დავიწყებია მისი ფონზის ქურთუკითა და კბილსაჩიჩქნებით; ბივი, დადიტსს რომ უმღეროდა, – პატარა ბავშვის ნავი ვერცხლისფერი სიზმარია, – ბივი, რომელიც ქორწილის დღეს ჯოუნსის გადაეხვია და უბრძანა, ბედნიერი ყოფილიყო, ბედნიერი ყველა მათგანის მაგიერ.

ჯოუნსი.

როდესაც ჰენრი საბოლოოდ დარწმუნდა, რომ სინდიოფალა მოკვდა და დაიფერფლა, ბილიკს გაუყვა ჯოუნსის სანახავად. დიდი იმედი არ ჰქონდა, რომ ცოცხალი დახვდებოდა, მაგრამ რატომღაც, სასოწარკვეთილი მაინც არ იყო.

### 33

ამ სამყაროსთან ჯოუნსის მხოლოდ ტკივილი აკავშირებდა. თავდაპირველად მოეჩვენა, რომ მის წინ მუხლებზე მდგარი გაწამებულნი, გამხდარი, ლოყებჩაცვივნი და გამურული ადამიანი – სიზმარი, მისი წარმოსახვის ბოლო გაელვება იყო, რადგან ეს კაცი საოცრად ჰგავდა ჰენრის.

– ჯოუნსი? ეი, ჯოუნსი, აქ ხარ? – იმეორებდა ჰენრი და მის თვალებთან თითებს ატკაცუნებდა, – ჯოუნსის დედამიწა იძახებს.

– ჰენრი, შენ ხარ? მართლა შენ ხარ?

– მე ვარ, ეჭვი არ შეგეპაროს, – მიუგო ჰენრიმ და ხვრელში გაჩხერილ ძაღლს გახედა. შემდეგ კვლავ ჯოუნსის მიუბრუნდა და შუბლზე ჩამოყრილი, ოფლით გაჟღენთილი თმა უსაზღვრო სინაზით გადაუწია.

– სად იყავი, კაცო, ამდენ... – დაიწყო ჯოუნსიმ, მაგრამ ამ დროს

სამყარო შექანდა. ჯოუნსიმ თვალეზი დახუჭა, ყურადღეზა მოიკრი-  
ბა და თვალეზი ისევ გაახილა, – ...ხანს? მაღაზიაში? პურის ყიდვა  
ხომ არ დაგავიწყდა?

– არა, მაგრამ ჰოთდოგი დავკარგე.

– რა დოყლაპია ხარ! – ამოიხვნეშა ჯოუნსიმ, – შემდეგში მე წა-  
ვალ.

– მაკოცე ტაკოზე, მეგობარო, – მიუგო ჰენრიმ. ჯოუნსიმ გაულიმა  
და სიბნელეში ჩაიძირა.

## ექილოგი – შრომის დღე

სამყარო ნამდვილი ძუკნაა

ნორმან მაკლინი<sup>225</sup>

კიდევ ერთმა ზაფხულმა ჩაიქროლა, – გაიფიქრა ჰენრიმ.

თუმცა სამწუხარო არაფერი ჰქონდა. მშვენიერი ზაფხული იყო. შემოდგომასაც კარგი პირი უჩანდა. მართალია, წელს სანადიროდ ვერ წავიდოდა და სამხედრო უწყებიდან ახალი მეგობრების იშვიათი ვიზიტებისთვისაც როგორმე უნდა გაეძლო (ისინი უნდა დარწმუნებულიყვნენ, რომ ამ დროის განმავლობაში კანზე წითელი ღინღლი არ გასჩენია), მაგრამ შემოდგომა ცუდი მაინც არ იქნებოდა. სიგრილე, მზიანი დღეები, გრძელი ღამეები.

ზოგჯერ, შუალამის გადასვლის შემდეგ, ძველი მეგობარი შემოუვლიდა ხოლმე. ასეთ შემთხვევებში ჰენრი კაბინეტში ჯდებოდა

---

<sup>225</sup> ამერიკელი მწერალი და მეცნიერი.

წიგნით ხელში და მის წასვლას ელოდა. მასაც სხვა აღარაფერი დარჩენოდა და წელათრევით ტოვებდა იქაურობას. მერე მზე მაინც ამოდოდა. თუ ამალამ ძილი დაგაკლდათ, მეორე ღამით აინაზღაურებთ, ძილი აუცილებლად მოგაკითხავთ ნანატრი შეყვარებულივით. ამას გასული ნოემბრის შემდეგ მიხვდა.

ჰენრი პეპერპონდის ნაპირზე, ჯოუნსისა და კარლას კოტეჯის პარმალზე იჯდა და ლუდს შეექცეოდა. იქიდან კუებინის წყალსაცავის სამხრეთი ნაპირი სულ რაღაც ოთხი მილით იყო დაცილებული. ცხადია, ისტორიტიც.

ხელზე, რომლითაც „კურსის“ ქილა ეჭირა, მხოლოდ სამი თითი ჰქონდა. ორი მოაჭრეს. ვერაფრით იხსენებდა, როდის მოეყინა: „კედელში გაკეთებული ხვრელიდან“ დიფქათრუოდისკენ თოვლში გარბენისას, თუ მაშინ, როცა სახელდახელოდ შეკრულ ტოტებით ჯოუნსის გადარჩენილი „ჰამერისკენ“ მიათრევდა. იმ შემოდგომაზე ბედმა თოვლში ადამიანების გადაყვანა არგუნა, თუმცა ეს ორგვარი შედეგით დაასრულა.

ვიწრო სანაპიროს გვერდით კარლა ჯოუნსიც მაყალს უყურებდა. მისგან მარცხნივ, დასაკვეცი მაგიდის გარშემო, ნოელი ნახევრად შეხსნილი პამპერსით დაბაჯბაჯებდა. ხელში დამწვარი სოსისი ეჭირა და მხიარულად აქნევდა. ჯოუნსების დანარჩენი შვილები (სამნი), რომელთა ასაკიც სამიდან თერთმეტ წლამდე მერყეობდა, წყალში ჭყუმპალაობდნენ და ჟრიამულობდნენ. ადრე ჰენრი ფიქრობდა, რომ ბიბლიურ „ინაყოფიერეთ და იმრავლეთ“-ში გარკვეული აზრი იყო ჩადებული, მაგრამ ახლა ეჩვენებოდა, რომ ჯოუნსისა და კარლას ეს სიტყვები თავისებურად ესმოდათ. ყოველ შემთხვევაში, აბსურდამდე მიჰყავდათ.

უკან გასაწევმა კარმა გაიტკაცუნა. პარმალზე ჯოუნსი გამოვიდა. ხელში ვედრო ეჭირა ყინულივით ცივი ლუდის ქილებით. კოჭლობდა, მაგრამ არც ისე ძლიერ. ამჯერად ექიმმა შორს მოისროლა ის,

რაც მას თეძოში ჰქონდა და მის ნაცვლად ფოლადი და ტეფლონი ჩაუსვა. თან დაარწმუნა, – ადრე თუ გვიან ამის გაკეთება მაინც მოგიწევთ, მეტი სიფრთხილე რომ გამოგეჩინათ, სერ, ძველი კიდეც ხუთ წელს გაგიძლებდათ. ოპერაცია თებერვალში გაუკეთეს, მას შემდეგ, რაც მან და ჰენრიმ სამხედრო დაზვერვის თანამშრომლებისა და ფსიქიატრების საზოგადოებაში ექვსკვირიანი „შვებულება“ გაატარეს.

სამხედროებმა შესთავაზეს, სახსრის შეცვლის ოპერაცია „ძია სემის“ ანგარიშზე ჩაეწერა, – სიმწარე, ასე ვთქვათ, ცოტათი დაუტკბეს, – რაზეც ჯოუნსიმ უარი განაცხადა, თუმცა არც მადლობის თქმა დავიწყებია. მოახსენა, რომ ვერც თავის ორთოპედს გამოაცლიდა ხელიდან სამუშაოს და ვერც იმ სიამოვნებას მოიკლებდა, რასაც სადაზღვევო კომპანიისთვის ანგარიშის წარდგენა ჰგვრიდა.

ახლა ორივეს მხოლოდ ის უნდოდა, ვაიომინგი რაც შეიძლება სწრაფად დაეტოვებინა. ცხადია, მშვენიერი ბინა ჰქონდათ (იმათი გემოვნებით, ვინც მიწის ქვეშ ცხოვრებას იყო მიჩვეული), სამზარეულო – როგორც ოთხვარსკვლავიან სასტუმროში (ჯოუნსიმ ათი გირვანქა მოიმატა, ჰენრიმ – თითქმის ოცი), ფილმები – საუკეთესო ხარისხის. მაგრამ ატმოსფერო ცოტათი დოქტორ სტრეინჯლავს<sup>226</sup> აგონებდათ. ჰენრისთვის ამ ექვსმა კვირამ, ჯოუნსისთან შედარებით, გაცილებით ცუდად ჩაიარა. ჯოუნსის, ძირითადად, თეძოს ტკივილი სტანჯავდა. მოგონებები კი სხეულის შესახებ, რომელსაც მისტერ გრეისთან ერთად იყოფდა, საოცრად სწრაფად გახუნდა და სიზმრებს შეერწყა.

ჰენრის კი პირიქით დაემართა – მოგონებები გაუმძაფრდა. მათ შორის ყველაზე საშინელი ბოსელს უკავშირდებოდა. სამხედროები, რომლებიც დაკითხვას აწარმოებდნენ, თავაზიანად ექცეოდნენ, მისდამი თანაგრძნობას იჩენდნენ, სულ არ ჰგავდნენ კურცს, ხალხს

---

<sup>226</sup> სტენლი კუბრიკის ანტიმილიტარისტული ფილმის „დოქტორი სტრეინჯლავი – ანუ როგორ გადავეჩვიე შიშს და შევიყვარე ბომბი“ პერსონაჟი.

ცხვრის ფარასთან რომ აიგივებდა. მაგრამ ჰენრი ვერაფრით ივიწყებდა ბილს, მარშასა და დარენ ჩაილზებს, მისტერ-მარინუანას-ნიუტონიდან. ისინი ხშირად სტუმრობდნენ მას სიზმრებში.

ასევე – ოუენ ანდერჰილი.

– დამხმარე ძალა, – განაცხადა ჯოუნსიმ, ლუდით სავსე ვედრო ძირს დადო და ხვნეშითა და მანჭვით მოკალათდა დაწულ სარწეველაში ჰენრის გვერდით.

– კიდევ ერთი და მეტს ველარ დავლევ, – თქვა ჰენრიმ, – დაახლოებით ერთ საათში პორტლენდში ვბრუნდები და ალკოჰოლზე შემოწმების გავლა სულ არ მეპიტნავება.

– ამალამ აქ დარჩი, – შესთავაზა ჯოუნსიმ და ნოელს გახედა. ბავშვი ფუმფულა საჯდომით მაგიდის ქვეშ, ბალახზე დაებერტყა და ახლა სოსისის ნარჩენს ქიპზე გულმოდგინედ იჭერდა.

– და შენი ონავრების დაუსრულებელ ყურისწამლებ კონცერტს ვუსმინო? – მოიბუზა ჰენრი, – სხვათა შორის ჩემი მოტანილი მაროი ბავას საშინელებათა ფილმების კომპლექტი თუ მოგეწონა?

– სიმართლე გითხრა, მსგავს ფილმებზე რატომღაც გული ავიყარე, – მიუგო ჯოუნსიმ, – სამაგიეროდ, ამ საღამოს კევინ კოსტნერის ფესტივალი გვაქვს, „პირადი მცველით“ ვიწყებთ.

– აკი თრილერები აღარ მომწონსო?

– რა ეშმაკი ხარ, – თქვა ჯოუნსიმ, შემდეგ მხრები აიჩჩია და გაიკრიჭა, – ისე გითხარი.

– ჩვენგან წასულ მეგობრებს გაუმარჯოს, – თქვა ჰენრიმ და ლუდის ქილა ასწია.

– წასულ მეგობრებს გაუმარჯოს, – გაიმეორა ჯოუნსიმ და ჰენრის მიჰბაძა.

მათ ქილები ერთმანეთს მიუჭახუნეს და დალიეს.

– რობერტა როგორაა? – იკითხა ჯოუნსიმ.

ჰენრის გაელიმა.

– კარგად. დაკრძალვაზე მეშინოდა...



ჯოუნსიმ თავი დაუქნია. დადიტსის დაკრძალვაზე ისინი ორივე მხრიდან იჭერდნენ რობერტას, რადგან ის ფეხზე ძლივს იდგა.

– ...მაგრამ ახლა ცოტათი მოლონიერდა. ამბობს, ხელნაკეთი სუვენირების მაღაზია უნდა გავხსნაო. ცხადია, შვილი ძალიან ენატრება. ელფის სიკვდილის შემდეგ დადიტსი მისთვის ყველაფერი იყო.

– ჩვენთვისაც, – დაამატა ჯოუნსიმ.

– ალბათ მართალი ხარ.

– ისე მრცხვენია, ამდენი წლით რომ მივატოვეთ. ლევკემია ჰქონია, ჩვენ კი არც ვიცოდით.

– ვიცოდით, – არ დაეთანხმა ჰენრი.

ჯოუნსიმ შეხედა და წარბები აზიდა.

– ეი, ჰენრი! – დაიძახა კარლამ, – როგორი ბურგერი გინდა?

– კარგად შებრაწული! – გასძახა ჰენრიმ.

– როგორც გვიბრძანებთ, სერ! ჩემო კარგო, იქნებ ბავშვი აგეყვანა, თორემ მის სოსისზე უკვე მიწა უფრო მეტია, ვიდრე ხორცი. წამოიყვანე და მამამისს მიაბარე.

ჰენრიმ კიბე ჩაირბინა, ნოელი მაგიდის ქვეშიდან გამოიყვანა და მასთან ერთად პარმალისკენ გაემართა.

– ენი! – მხიარულად შეჰყვირა წლინახევრის ნოელმა.

ჰენრი შეჩერდა. ჟრუანტელმა დაუარა. თითქოს მოჩვენება მიესალმათ.

– ამე, ენი! ამე! – ტიტინებდა ნოელი და ჰენრის ცხვირში ტალახიან სოსისს სჩრიდა.

– არა, გმადლობთ, ჩემს ბურგერს დაველოდები, – თქვა მან და სიარული განაგრძო.

– არ ინდა ემი სამელი? (“არ გინდა ჩემი საჭმელი?”)

– ჰენრი თავისას შეჭამს, ჩემო კარგო. ეგ სისაძაგლე კი უნდა გამოგართვა. როგორც კი დანარჩენს გაამზადებენ, ახალს მიიღებ.

მან ნოელს ჭუჭყიანი სოსისი გამოართვა, შემდეგ ბავშვი მამამისს ჩაუსვა კალთაში და საფეხურზე ჩამოჯდა. იმ დროისთვის, როდესაც

ჯოუნსიმ თავის შვილს ჭიპი მდოგვისა და კეტჩუპისგან გაუსუფთავა, პატარას უკვე ეძინა.

– რას გულისხმობდი, როდესაც თქვი, ვიცოდითო? – ჰკითხა ჯოუნსიმ ჰენრის.

– კარგი რა, ჯოუნსი. შესაძლოა, მივატოვეთ ის ან მიტოვებას ვცდილობდით, მაგრამ ხომ არ ფიქრობ, რომ დადიტსმაც მიგვატოვა? ნუთუ, მართლა გჯერა, რაც მოხდა?

ჯოუნსიმ თავი ძალიან ნელა გადააქნია.

– ჩვენ გავიზარდეთ, ზოგი რამ დაგვაგვიწყდა, მაგრამ რიჩი გრენადოს ამბავმა ჩვენში სამუდამოდ ჩაიბუდა. იგივე დაგვემართა, რაც ოუენ ანდერჰილს რეიპლოუების გატეხილ თეფშთან დაკავშირებით.

ჯოუნსის იმ ამბის შესახებ დამატებითი შეკითხვების დასმა არაფერში სჭირდებოდა – ვაიომინგში საკმარისზე მეტი დრო ჰქონდათ ერთმანეთისთვის ყველაფრის მოსაყოლად.

– ერთი ძველი ლექსი არსებობს იმ ადამიანზე, რომელიც ღმერთის გასწრებას ცდილობდა, – თქვა ჰენრიმ, – „ზეციური მწევარი“<sup>227</sup> დადიტს, რა თქმა უნდა, ღმერთს ვერ შევადარებ, – ღმერთმა დამიფაროს, – მაგრამ ჩვენი მწევარი კი ნამდვილად იყო. ჩვენ რაც შეგვეძლო სწრაფად გავრბოდით, მაგრამ...

– სიზმართმჭერს თავი ვერ დავალწიეთ, არა? – დაასრულა ჯოუნსიმ, – ეს ჩვენგან ვერცერთმა მოახერხა. შემდეგ ისინი მოვიდნენ. ბაირუსი. უტვინო სპორები სხვა რასის მიერ აგებული ხომალდით მოვიდნენ. სულ ეს იყვნენ, რაც ვნახეთ? მეტი არაფერი შეეძლოთ?

– ვფიქრობ, ამას ველარასოდეს გავიგებთ. შარშან შემოდგომაზე ჩვენ მხოლოდ ერთ შეკითხვაზე მივიღეთ პასუხი. საუკუნეების განმავლობაში შევყურებდით ცას და საკუთარ თავს ვეკითხებოდით, მარტო ვიყავით თუ არა ამ სამყაროში. ახლა ვიცით, რომ ჩვენ გარდა სხვაც ყოფილა. დიდი ამბავი! ჯერიტსენი... გახსოვს ჯერიტსენი?

ჯოუნსიმ თავი დაუქნია. ცხადია, ახსოვდა ტერი ჯერიტსენი –

---

<sup>227</sup> ინგლისელ პოეტ ფრენსის ტომპსონის (1859-1907 წწ.) პოემა.

საზღვაო ფლოტის ფსიქოლოგი იმ გუნდიდან, რომელმაც ვაიომინგში დაჰკითხა.

იგი ხშირად ხუმრობდა ძია სემის თვისებაზე, რომლის გამოც იგი აღმოჩნდა მსგავს მიყრუებულ ადგილას, სადაც ერთადერთი წყლიანი ადგილი ძროხებისთვის განკუთვნილი ლარს კილბორნის გუბურა იყო. ჯერიტსენი და ჰენრი დაახლოვდნენ, და თუ არ დამეგობრდნენ, მხოლოდ იმიტომ, რომ იქ არსებული ვითარება ამას ხელს არ უწყობდა. ჯოუნსისა და ჰენრის კარგად ეპყრობოდნენ, თუმცა სტუმრებივით – არა. სამაგიეროდ, ჰენრი დევლინი და ტერი ჯერისტენი კოლეგები იყვნენ, ეს კი ყოველთვის მნიშვნელოვანი ფაქტორია.

– ჯერიტსენმა თავიდანვე დაასკვნა, რომ ორი საკითხი გაირკვა: ის, რომ ამ სამყაროში ჩვენ გარდა სხვებიც არსებობენ, და რომ არც ერთადერთი გონიერი არსებები ვართ. ვცდილობდი დამერწმუნებინა, რომ მეორე პოსტულატი მცდარ ლოგიკას ეფუძნებოდა და ქვიშაზე აგებულ სახლს ჰგავდა. არა მგონია, რომ ბოლომდე დამიჯერა, მაგრამ მასში ეჭვის დათესვა მაინც მოვახერხე. ვინც ან რაც უნდა იყოს ბაირუსი, მათ ხომალდის აგება არ იციან. რასა, რომელმაც ხომალდი ააგო, შესაძლოა, გაქრა ან ბაირუსად გადაიქცა.

– მისტერ გრეი სულელს ნამდვილად არ ჰგავდა.

– გეთანხმები, ის საოცრად დაჭკვიანდა მას შემდეგ, რაც შენს თავში შეაღწია, ამას ვერ უარვყოფ. მისტერ გრეი ჯოუნსი გახდა. მან მოგპარა ემოცია, მეხსიერება, ბეკონისადმი სიყვარული.

– მე კი ბეკონი შემძულდა.

– ეს სულაც არ მაოცებს. მან ინდივიდუალობა წაგართვა, რაც ცნობიერების გადაგვარებას უწყობს ხელს. რაც შენ მარიო ბავას საშინელებათა ფილმებსა და სერჯიო ლეონეს ვესტერნებში მოგწონდა, რაც შიშსა და ძალადობას უკავშირდებოდა... მეგობარო, ეს ნაგავი მისტერ გრეის უყვარდა. ან რატომ არ უნდა ჰყვარებოდა თვითგადარჩენის პრიმიტიული საშუალებები? და როგორც მტრულ გარე-

მოში მოხვედრილი თავისი სახეობის ერთადერთი ცოცხლად დარჩენილი წარმომადგენელი, ყოველგვარ იარაღს იყენებდა, რაზეც კი ხელი მიუწვდებოდა.

– ჯანდაბა! – თქვა ჯოუნსიმ და სახეზე აშკარად დაეტყო ის ზიზღი, რომელიც მასში ამ აზრმა გამოიწვია.

– არაფერი შეგეშალოს. „კედელში გაკეთებულ ხვრელში“ შენ ის ნახე, რის დანახვასაც ელოდი, ის, რითაც თავი გამოიტენე „საიდუმლო მასალებისა“ თუ „მესამე ხარისხის ახლო კონტაქტის“ ყურებით. შენ ბაირუსი შეისუნთქე... ეჭვი არ მეპარება, რომ ეს იყო ერთადერთი ფიზიკური კონტაქტი. მაგრამ მისდამი სრული იმუნიტეტი აღმოგაჩნდა, ისევე, როგორც – ამჟამად ასეა დადგენილი – ადამიანთა რასის არანაკლებ ორმოცდაათ პროცენტს. რაც შენ შეგეყარა, ეს იყო განზრახვა, მცდელობა... ბრმად გამოსროლილი დირექტივა. დალაზვროს ეშმაკმა, სიტყვები ვერ გამომიძებნია გამოსახატავად, რადგან ასეთი სიტყვები არ არსებობს. ვფიქრობ, მან იმიტომ შემოაღწია შენს თავში, რომ შენ დაიჯერე, თითქოს ის იქ იყო.

– მეუბნები, რომ კაცობრიობა კინალამ მოვსპე ისტერიული დაორსულების ტიპური შემთხვევის გამო? – დაიწყო ჯოუნსიმ და ჰენრის ქვევიდან ახედა,

– არა, ცხადია, არა, – თავი გადააქნია ჰენრიმ, – ასე რომ ყოფილიყო, ყველაფერი უკვალოდ, უბრალო გაცივებისავით ჩაივლიდა. მაგრამ აზრი მისტერ გრეის შესახებ შენს თავში ისე გაიჭედა, როგორც ბუზი აბლაბუდაში.

– უფრო სწორად, სიზმართმჭერში.

– ჰო.

ორივენი დადუმდნენ. მალე მათ კარლა უხმობდა უძირო ზეცის ქვეშ სოსისით, ჰამბურგერებით, კარტოფილის სალათითა და საბამთროთი გაწყობილ სუფრასთან.

– იტყვი, რომ ეს დამთხვევაა? – ველარ მოითმინა ჯოუნსიმ, – რომ ისინი შემთხვევით აღმოჩნდნენ ჯეფერსონტრექტში სწორედ იმ

დროს, როდესაც იქ მე ვიყავი? და არა მარტო მე! შენ, პიტი და ბი-ვიც. და კიდევ დადიტსი, იქიდან სულ რაღაც ორი ასეული მილის და-შორებით, არც ეს დაგავიწყდეს. იმიტომ, რომ ჩვენ ერთმანეთთან დადიტსი გვაკავშირებდა. ის გვაერთიანებდა.

– დადიტსი ყოველთვის ორლესული მახვილი იყო. ერთი მხრივ, ჯოზი რინკენჰაუერი – მხსნელი, გმირი დადიტსი. მეორე მხრივ კი, რიჩი გრენადო – მკვლელი დადიტსი. მაგრამ დადიტსს ჩვენ ვჭირდებოდით, რათა მის მოკვლაში დავხმარებოდით. ამაში ღარწმუნებუ-ლი ვარ. ჩვენი ქვეცნობიერება უფრო ღრმად იყო ჩამარხული და მას სიძულვილითა და შიშით ვკვებავდით, გვეშინოდა, რიჩი გრენადოს სამაგიერო არ გადაეხადა, როგორც დაგვპირდა. ჩვენში ყოველთვის უფრო მეტი ბნელი აზრი იდო, ვიდრე დადიტსში. მისი სიბრაზე მხო-ლოდ იმას თუ გასწვდებოდა, რომ პალო რამდენიმე ციფრით უკან დაესვა, ისიც გამხიარულების მიზნით. და მაინც... ის შემთხვევა თუ გახსოვს, როდესაც პიტმა დადიტსს ქუდი თვალებზე ჩამოაფხატა და საბრალო ბიჭი კედელს შეეჯახა?

ჯოუნსის ახსოვდა, ოღონდ ძალიან ბუნდოვნად. ეს სავაჭრო ცენ-ტრში მოხდა. მაშინ ახალგაზრდები იყვნენ და მაღაზიებში ხეტიალი გართობად ითვლებოდა. ახალი ღღე, იგივე ნაგავი.

– იქიდან მოყოლებული, როდესაც დადიტსის თამაშს ვთამაშობ-დით, პიტი ყოველთვის აგებდა. დადიტსი მას ყოველთვის აკლებდა ქულებს, ოღონდ ამას ვერავინ ვამჩნევდით, ეს უბრალო დამთხვევა გვეგონა, მაგრამ იმის გათვალისწინებით, რაც ბოლოს მოხდა, ამაში ეჭვი მეპარება.

– შენი აზრით, დადიტსმაც კი იცოდა, რომ ვალის გადახდა ამ-ქვეყნად ყველაზე დიდი საზიზღრობაა?

– მან ეს ჩვენგან ისწავლა, ჯოუნსი.

– დადიტსმა მისტერ გრეის საყრდენი წერტილი მისცა. გონებრი-ვი საყრდენის.

– ჰო, მაგრამ არ დაგავიწყდეს, რომ მან შენ ციტადელი მოგცა –

ადგილი, სადაც მისტერ გრეის დაემალე.

არა, – გაიფიქრა ჯოუნსიმ, – ეს არასდროს დამავიწყდება.

– ჩვენთვის ყველაფერი დადიტსიდან დაიწყო, – განაგრძო ჰენრიმ, – იმ წუთიდან, რაც მას შევხვდით, სხვებისგან განსხვავებულები გავხდით. შენ იცი, რომ ეს სიმართლეა. იმას, რაც რიჩი გრენადოსთან დაკავშირებით თავს გადაგვხდა, ჩვენს გონებაში განსაკუთრებული ადგილი ეკავა. მაგრამ თუ შენს ცხოვრებას თვალს გადაავლებ, სხვა შემთხვევებსაც გაიხსენებ. ამაში დარწმუნებული ვარ.

– დეფანიაკი, – წყნარად ჩაილაპარაკა ჯოუნსიმ.

– ეს ვინლაა?

– ბიჭი, რომელიც ტყუილში ზუსტად იმ დღეს გამოვიჭირე, მანქანა რომ დამეჯახა. წარმოგიდგენია? არადა, იმ დღეს ტესტირებას არც დავსწრებივარ.

– ხომ ხედავ? მაგრამ სწორედ დადიტსმა გადატეხა წელში ის რუხი ნაბიჭვარი. მეტსაც გეტყვი. მგონი ისტორიტიზეც დადიტსმა გადამარჩინა. როდესაც კურცის მოადგილემ „ჰამერში“ შემოიხედა, რათა ჩვენს სიკვდილში დარწმუნებულიყო, მას თავში პატარა დადიტსი ეჯდა, რომელიც იმეორებდა: „სანერვიულო არაფერია, ბოს, განაგრძეთ თქვენი საქმე, ისინი მკვდრები არიან“.

მაგრამ ჯოუნსის წინა აზრთან განშორება არ სურდა.

– მაშასადამე, ის, რომ ბაირუსმა ამხელა სამყაროში მაინცდამაინც ჩვენ ამოგვირჩია, შემთხვევითობაა და სხვა არაფერი? ჯერიტსენიც ასე ფიქრობდა. ამას ხმამაღლა არასდროს ამბობდა, თუმცა მისი აზრი ისედაც ვიცოდი.

– რატომაც არა? ბევრი მეცნიერი, ბრწყინვალე სტივენ ჯეი გულდის<sup>228</sup> მსგავსად, ფიქრობს, რომ დედამიწაზე სიცოცხლე ერთი შეხედვით წარმოუდგენელი დამთხვევების გრძელი ჯაჭვის წყალობით გაჩნდა.

---

<sup>228</sup> ამერიკელი პალეონტოლოგი, ბიოლოგ-ევოლუციონისტი და მეცნიერების ისტორიკოსი.

– შენც გჯერა ამ ვერსიის?

ჰენრიმ ხელები ასწია. ამ შეკითხვაზე პასუხის გაცემას მხოლოდ ღმერთის დახმარებით თუ მოახერხებდა, ღმერთი კი ბოლო რამდენიმე თვის განმავლობაში კვლავ შემოიპარა მის ცხოვრებაში. როგორც აღმოჩნდა – უკანა კარიდან, უძილო ღამეების სიმყუდროვეში. მაგრამ, ნუთუ აუცილებელი იყო ღმერთის მოხმობა ამის ასახსნელად?

– ჯოუნსი, მჯერა, რომ დადიტის ჩვენ ვართ. *L'enfant c'est moi ... toi ... tout le monde*<sup>229</sup>. რასა, სახეობა, გენი; თამაში, სეტი და მატჩი. ერთობლიობაში ჩვენ ყველანი დადიტის ვართ, და ჩვენი ყველა კეთილშობილური მისწრაფება სხვა არაფერია, თუ არა იმის ცოდნა, თუ სად დევს საუზმისთვის განკუთვნილი ყვითელი ყუთი, და როგორ უნდა ბოტასებზე ზონრის შეკვრა: „ას აგებ? ოტას აგებ?“ ყველაზე უზნეო საქციელი კოსმოსური მასშტაბით იმას ჰგავს, როდესაც პალოს რამდენიმე ციფრით უკან დაასობ და გულუბრყვილო სახეს მიიღებ, თითქოს ვერაფერს ხვდები. სულ ესაა.

ჯოუნსი აღტაცებით მიაჩერდა მას.

– ეს ყველაფერი ან შთამაგონებელია, ან საშინელი. არც კი ვიცი, რა ვთქვა.

– ეს არც არის მნიშვნელოვანია.

ჯოუნსი ცოტა ხანს დაფიქრდა, შემდეგ კი იკითხა:

– თუ ყველანი დადიტის ვართ, მაშ ვინ გვიმღერის? ვინ გვიმღერის იავნანას, ვინ გვაძინებს, როდესაც სევდა ან შიში გვიპყრობს?

– ოჰ, ამაში ღმერთი გვეხმარება, – მიუგო ჰენრიმ და მაშინვე ენაზე იკბინა, მაგრამ უკვე გვიანი იყო. გულწრფელი განზრახვის მიუხედავად, მაინც წამოსცდა.

– მაშ, ღმერთმა შეუშალა ხელი უკანასკნელ სინდიოფალას, რომ მე-12 ქაბურღილში არ ჩავარდნილიყო? ვინაიდან, თუ იგი წყალში აღმოჩნდებოდა, ჰენრი...

---

<sup>229</sup> „ბავშვი ეს მე ვარ... შენ ხარ... მთელი მსოფლიოა“... (ფრ).

სინამდვილეში უკანასკნელი – პერლმუტერიდან გამომდვარი სინდიოფალა იყო და ეს მნიშვნელოვანი მოსაზრება სხარტ პასუხს მოითხოვდა.

– გეთანხმები – უსიამოვნება თავზე საყრელად გვექნებოდა, სულ ცოტა ორი წლის განმავლობაში მაინც. ვფიქრობ, საქმე მხოლოდ ბოსტონის ცენტრიდან ხალხის მასობრივი გაქცევით არ დასრულდებოდა. მაგრამ კაცობრიობის განადგურება? არა მგონია. ჩვენ მათთვის აუთვისებელი ტერიტორია ვიყავით. მისტერ გრემი იცოდა ეს. შენი ჩანაწერები ჰიპნოზის დროს...

– ამას ნუ მიხსენებ.

ჯოუნსიმ ორ მათგანს მოუსმინა და დაასკვნა, რომ ეს ვაიომინგში მის მიერ დაშვებულ შეცდომათაგან ყველაზე დიდი იყო. იგი საკუთარ თავს, ამ შემთხვევაში მისტერ გრემის უსმენდა – ღრმა ჰიპნოზის დროს იგი მართლაც მისტერ გრემი ხდებოდა – და ასე ეგონა, რომ ბოროტი მოჩვენება ლაპარაკობდა. ზოგჯერ ფიქრობდა, რომ ერთადერთი ადამიანი იყო მთელ დედამიწაზე, რომელსაც მთელი სიგრძე-სიგანით ესმოდა, თუ რას ნიშნავდა გაუპატიურებულის როლში ყოფნა. ზოგიერთი რამ უბრალოდ უნდა დაივიწყოს კაცმა. ასე ჯობია.

– მაპატიე.

ჯოუნსიმ ხელი აიქნია, – არაფერი, მაგრამ ძლიერ გაფითრდა.

– იმის თქმა მინდოდა, რომ ჩვენ ვართ კლასი, რომელიც სიზმართმჭერში ცხოვრობს. თვითონაც მძაგს ამის მოსმენა, იაფი ტრანსცენდენტალიზმი, კალის რგოლები ყურში, მაგრამ ზუსტ, შესაფერის სიტყვას ვერც ამ მოვლენას შეუძრჩევ. ოდესმე, ცხადია, საჭირო განმარტებაც მოიძებნება, ჯერჯერობით კი სიზმართმჭერიც გამოდგება.

ჰენრი შეტრიალდა. ჯოუნსიმ ნოელი უფრო მოხერხებულად დააწვინა და ჰენრის მიჰბაძა. კოტეჯის კარის თავზე ჰენრის მიერ ნა-



ჩუქარი სიზმართმჭერი ავგაროზი ეკიდა. ჯოუნსიმ იგი მაშინვე მი-  
აჭედა იმ კათოლიკე გლახივით, ჯვარზე გაკრული იესოთი რომ ცდი-  
ლობს სახლიდან გამპირების გაყრას.

– იქნებ ისინი, უბრალოდ, შენკენ მოილტვოდნენ, – ვარაუდი გა-  
მოთქვა ჰენრიმ, – ჩვენკენ. ხომ ტრიალდებიან ყვავილები მზისკენ,  
რკინის ნამცეცები კი მაგნიტს ეკვრის. თუმცა დანამდვილებით თქმა  
რთულია, რადგან ბაირუსი ჩვენგან ძალიან განსხვავდება.

– ისინი დაბრუნდებიან?

– რა თქმა უნდა, – მიუგო ჰენრიმ, – ისინი ან სხვები.

მან გვიანი ზაფხულის დღის ცისფერ ცას ახედა. წყალსაცავის  
მხრიდან არწივის ყვილი გაისმა.

– ვფიქრობ, ღირს ამაზე დაფიქრება, ოღონდ დღეს არა.

– ბიჭებო! – დაუძახა მათ კარლამ, – სადილი მზადაა!

ჰენრიმ ჯოუნსის შვილი აიტაცა. წამით მეგობრების ხელები, მზე-  
რა და ფიქრები ერთმანეთს შეეხო. ჰენრიმ გაიღიმა. ჯოუნსიმ ღიმი-  
ლითვე უპასუხა. ისინი ერთად ჩავიდნენ კიბეზე და გვერდიგვერდ  
გაუყვნენ გაბონს – ჯოუნსი ოდნავ კოჭლობდა, ჰენრის ხელში ძი-  
ნარე ბავშვი ეჭირა. უკან მათ მხოლოდ ბალახზე გაფენილი მათი  
ჩრდილი მისდევდა, სხვა არაფერი.

*ლოველი, მენის შტატი.*

*2000 წლის 29 მაისი*

## ავტორის ბოლოსიტყვაობა

არასდროს ისე მადლიერი არ ვყოფილვარ ჩემი პროფესიისა, როგორც „სიზმართმჭერის“ წერისას (1999 წლის 16 ნოემბრიდან 2000 წლის 19 მაისამდე). მთელი ამ დროის განმავლობაში თავს საკმაოდ ცუდად ვგრძნობდი. წიგნი კი ამას მავიწყებდა. მკითხველი ნახავს, რომ ეს ფიზიკური დისკომფორტი, ნაწილობრივ, სიუჟეტშიც აისახა, მაგრამ ყველაზე უკეთ ის უდიდესი შვება მახსოვს, რომელსაც სიზმრებში ვპოულობდი.

ბევრი ადამიანი მეხმარებოდა. ერთ-ერთი მათგანი ჩემი ცოლი იყო, ტაბითა, რომელმაც უარი განაცხადა წარმოეთქვა რომანის თავდაპირველი სახელწოდება: „კიბო“. არა მარტო უშნო სათაურად მიაჩნდა, არამედ ამტკიცებდა, ამით უიღბლობასა და უბედურებას ვეპატიჟებითო. დროთა განმავლობაში მეც იმავე დასკვნამდე მივედი. ახლა ტაბითა ამ რომანს არც „იმ წიგნს“ უწოდებს და არც „ტრანზიან სინდიოფალებზე დაწერილ წიგნს“.

დიდად ვარ დავალებული ბილ პულასგან, რომელმაც ავტომობილით კუებიზის წყალსაცავზე წამიყვანა, აგრეთვე მისი თანმხლები

კოჰორტისგან, პიტერ დალდუჩის, ტერი კემპბელისა და ჯო მაკჯინის შემადგენლობით. კიდევ ერთმა ჯგუფმა, რომლის წევრებმაც სახელის გამხელა არ ისურვეს, ეროვნული გვარდიის ავიაბაზიდან „ჰამერით“ გამომიყვანა და ქარაფშუტულად დამრთო ნება, საჭესთან დავმჯდარიყავი. დამარწმუნეს, რომ ოღროჩოღრო გზებზე არ გავიჭედებოდი. ასეც მოხდა, თუმცა არც ბევრი დამაკლდა. უკან ტალახით მოთხვრილი, მაგრამ ბედნიერი დავბრუნდი. მათ მთხოვეს თქვენთვის გადმომეცა, რომ „ჰამერები“ ტალახში უკეთ დადიან, ვიდრე თოვლში. ეს თავისებურება რომანშიც გამოვიყენე.

მადლობა აგრეთვე სიუზენ მოლდოუსა და ნენ გრემს „სქრიბნერიდან“, ჩაკ ვერილს, წიგნის რედაქტორს, და ართურ გრინს, ჩემს აგენტს. არც რალფ ვიჩინანცას დავივიწყებ, საზღვარგარეთ ჩემი უფლებების დამცველ აგენტს, რომელმაც, სულ ცოტა, ექვსი ვარიანტი აღმოაჩინა, თუ როგორ უნდა მეთქვა ფრანგულად „აქ ინფექციის მსგავსიც კი არაფერია“.

დაბოლოს. ეს წიგნი დაწერილია მსოფლიოში საუკეთესო ტექსტური პროცესორით – „უოტერმენის“ ავტოკალმით. ამ გრძელი წიგნის ხელნაწერის პირველმა ვარიანტმა იმ ენის სამყაროში შემიყვანა, სადაც რამდენიმე წლის განმავლობაში არ ვყოფილვარ. ერთ ღამეს (როდესაც დენი გაითიშა) სანთლის შუქზეც კი ვწერდი. ოცდამეერთე საუკუნეში ასეთი რამ იშვიათობაა და მას დაფასება სჭირდება.

და მათ, ვინც ეს გრძელი გზა გაიარა: გმადლობთ ამ წიგნის წაკითხვისთვის.

*სტივენ კინგი*